


Diža' güen çe
ancho Jesucristo



New Testament in Zapotec, Zoogocho (MX:zpq:Zapotec,
Zoogocho)

Diža' güen che ancho Jesucristo

New Testament in Zapotec, Zoogocho (MX:zpq:Zapotec, Zoogocho)

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
de7d40fb-3909-53d8-8bea-744cf1ce0e41

Contents

San Mateo	1
San Marcos	62
San Lucas	98
San Juan	160
Hechos	204
Romanos	260
1 Corintios	285
2 Corintios	309
Gálatas	324
Efesios	333
Filipenses	342
Colosenses	348
1 Tesalonicenses	354
2 Tesalonicenses	359
1 Timoteo	362
2 Timoteo	370
Tito	375
Filemón	379
Hebreos	381
Santiago	400
1 Pedro	407
2 Pedro	415
1 Juan	419
2 Juan	425
3 Juan	426
Judas	427
Apocalipsis	430

DIŽA' GÜEN DAN' BZOJ SAN MATEO

Xoxtao' Jesucriston'

(Lc. 3:23-38)

¹ Nga nyoj la bene' gosac xoxtao' Jesucriston' chzolaon len da' xoxta' ocho Abraham. Le Jesusen' goque' xi'in diaža che da' David, na' da' Davin' goque' xi'in diaža che da' Abrahanna'.

² Abrahanna' goque' xa Isaac, na' Isaaquen' goque' xa Jacob, na' Jacoben' goque' xa Judá len yezica'chle bene' biše' ca'. ³ Judán' na' Tamar gosaque' xaxna' Fares na' Zara. Na' Faresen' goque' xa Esrom, na' Esronna' goque' xa Aram. ⁴ Na' Aranna' goque' xa Aminadab, na' Aminadaben' goque' xa Naasón, na' Naasónna' goque' xa Salmón. ⁵ Salmónna' na' Rahab gosaque' xaxna' Booz. Na' Boozen' na' Rut gosaque' xaxna' Obed. Na' Obeden' goque' xa Isai. ⁶ Na' Isain' goque' xa rey David, na' rey Davin' goque' xa Salomón. Na' xna' Salomónna' goque' xo'ol da' Urías cate' za' yeca'a rey Davin' le' par gaque' xo'ole'.

⁷ Na' Salomónna' goque' xa Roboam, na' Roboanna' goque' xa Abías, na' Abíasen' goque' xa Asa. ⁸ Na' Asan' goque' xa Josafat, na' Josafaten' goque' xa Joram, na' Joranna' goque' xa Uzías. ⁹ Uzíasen' goque' xa Jotam, na' Jotanna' goque' xa Acaz, na' Acazen' goque' xa Ezequías. ¹⁰ Na' Ezequíasen' goque' xa Manasés, na' Manasésen' goque' xa Amón, na' Amónna' goque' xa Josías. ¹¹ Josíasen' goque' xa Jeconías len yezica'chle biše' ca' gosenita' ca' tiemp caten' bene' Babilonia ca' gosezene' bene' Israel ca' na' goseche' xoxje' legaque' Babilonian'.

¹² Gwde goc ca', golje Salatiel xi'in Jeconíasen'. Na' Salatielen' goque' xa Zorobabel. ¹³ Na' Zorobabelen' goque' xa Abiud, na' Abiuden' goque' xa Eliaquim. Na' Eliaquinna' goque' xa Azor. ¹⁴ Na' Azoren' goque' xa Sadoc, na' Sadoquen' goque' xa Aquim. Aquinna' goque' xa Eliud. ¹⁵ Na' Eliuden' goque' xa Eleazar, na' Eleazaren' goque' xa Matán. Na' Matánna' goque' xa Jacob. ¹⁶ Nach Jacoben' goque' xa José ben' goc bene' che María. Na' Marían' goque' xna' Jesús ben' nzi' Cristo, zeje diža' ben' gwlej Diosen' cont yedenabi'e.

¹⁷ Na' gwzolaon tiemp che da' Abraham bžinte tiemp che da' David gosac žta' diaža chen', na' ca' tiemp che da' David bžinte ca' tiemp caten' gosezene' bene' Israel ca' goseche' xoxje' legaque' Babilonia, lecze gosac yežta' diaža chen', na' ca' tiempen' bžinten ca' žan' golje Criston' ben' gwlej Diosen' cont yedenabi'e, gosac yežta' diaža chen'.

Can' goc cate' golje Jesucriston'

(Lc. 2:1-7)

¹⁸ Na' quingan' goc cate' golje Jesucriston'. Ba naquen gwšagna' Marían' len José, na' za' ca'a Josén' le' par gaque' xo'ole' cate' gocbe'ede' ba noa' Marían' bdao'. Goc ca' dan' ben Spiritw che Diosen' cont bchendao' bdao' na' lo' le'e. ¹⁹ Na' Joséna' ben' ba naquen si'e Marían' par gaque' xo'ole', goque' to bene' ben da' güena' lao Diosen'. Na' bene' xbab cuejyichje' Marían' šižize cont nono gacbe'e na' cont bi' gws'i'e le' zto'. ²⁰ Šlac chone' xbab gone' ca' gwtase' na' to angl bene' gwseła' Xancho Diosen' blo'elagüe' le' lo' bišgal. Na' gože' le':

—José, le' goljo' lo' diaža che da' rey David. Bitw žebo' si'o Marían' par gaque' xo'olo'. Spiritw che Diosen' benen cont no'e bdao' na'. ²¹ Na' sane' to bi' byo

dao' na' gwsio' labe' Jesús, le len' yeque'e xtolá' bene' gualaz che' ca' bene' yesejnilaže'ne'.

²² Goc yogo' da' ca' cont goc can' gwna Diosen' dan' bzoj to ben' be'e xtizen' cani', gwne'.

²³ To no'ol güego' no'ole ne' napši'ichgua cuine' güe'e to bi' byo dao' na' sane'be'. Na' si' labe' Emanuel.

Na' Emanuel zeje diža': Diosen' zoacze' len' chio'.

²⁴ Na' cate' beban Josén' beyož gwñede' yelen', bene' can' gož angl che' Xancho Diosen' le', jaxi'e Marián' liže' par goque' xo'ole'. ²⁵ Perw bi gwzoalene' le' ca xo'ole' san gwzoacze' le' respetw bžinte ža gwxxane' to bi' byo dao', xi'ine' nechw. Na' gwxi' labe' Jesús.

2

Magos ca' jasene'e Jesús'en'

¹ Ca tiempen' cate' gwnabia' rey Herodes, golje Jesús'en' Belén, to yež gan' mbane distritw Judea. Na' besežin to chope magos Jerusalén, za'aque' to nación zito' dan' chi' do ga chla' gwbiž. ² Na' gosenabde' bene' lo ciudan' gose'ene':

—¿Gan' rey che bene' Israel, ben' ba golje? Nezeto' ba golje, le ba ble'eto' beljw čen' cate' blan' lažto' dan' zoa gan' chla' gwbiž. Na' za'to' gonxento'ne'.

³ Cate' gwñeze' rey Herodesen' can' gosenen', gocchgü'e' tole, na' lecze' ca' yogo'lol' bene' lo ciuda Jerusalénna'. ⁴ Nach reyna' btobe' yogo'lol' bxož gwnabia' che' chio' bene' Israel na' lecze' yogo' bene' ca' chososed chosolo'e' dan' bzoj da' Moisésen'. Na' gwñabde' legaue' gan' naquen galje Criston' ben' gwlej Diosen' cont yedenabi'e. ⁵ Nach gose' bene' ca' Herodesen':

—Galje' Belén, gan' mbane distritw Judea, le can' ža dan' bzoj to bene' be' xtiza' Diosen' cani'. Quinga žan:

⁶ Ca nac yež Belén gan' že' diaža che' da' Judá, nacczen yež da' zaca'chgua lao yež gwnabia' ca' zjachi' Judean'.

Le to bene' Belén gaque' bene' gwnabia', na' le' güia ne'e nación Israel čian'.

⁷ Nach Herodesen' goxe' magos ca' bagaše'ze cont ja'aque' lagüen' na' gwnabde' legaue' batyanen' besele'ede' bla' beljon'. ⁸ Nach gwsele' legaue' Belénna', gože' legaue':

—Le šja'ac na' le šjaydiljw bidao'na' tcho'a. Na' cate' yeželebe' le yeda yedyedixjue'ele neda' cont lecze' ša'a šjenxena'be'.

⁹ Beyož bosozenag magos ca' can' gož reyna' legaue', nach gosa'aque'. Na' beljon' dan' besele'ede' do gan' chla' gwbižen' cate' bina' yesa'ac lažgaquen', zejen le'e yaban' žialaon laogaue' bžinten' yo'o gan' zoa bidao'na', na' gwlezen.

¹⁰ Na' magos ca' besyebede' juisyw cate' besele'ede' beljon' da' yoble. ¹¹ Nach cate' besežine' yo'o gan' zoa bidaon', goso'e'lo' yo'ona' na' besele'ede' bidao'na' len xna'be' Marián'. Nach bosozoa xibgaue' gosonxene'be'. Na' gosesaljo caj čhegaquen' gosebeje' oro, yal na' to nechw da' chla' zix' da' nzi' mirra na' gosoen' chebe'. ¹² Na' šlac ne' nita' magos ca' Belénna', Diosen' gwdixjue'ede' legaue' lo bišgal bich yesyedie' gan' zoa rey Herodesen'. Da'nan' besyegue'e yeto nez yoble jaya'ac laže'.

Bosoxnje' ja'aque' Egipto

¹³ Na' cate' ba besyeya'ac magos ca', to angl che' Xancho Diosen' blo'elagüe' Josén' lo bišgal, na' gože'ne':

—Gwyas, gwçhe' bidaon' na' xna'ben' le šja'ac naciön Egipto na' soale na'ze, na' cate'ch nia' le'e, cana' gwaque yeza'le, le Herodesen' ba nžie' bia' yeyiljue' bidao'na' cont gote'be'.

¹⁴ Nach ne' ze bxin gwyas Josén', gwçhe'e bida'ona' len xna'ben' zja'aque' Egipton'. ¹⁵ Nach gosenite' Egipto na'ze šlac bžin ža got Herodesen'. Na' dan' gosone' ca' goc can' gwna Diosen' dan' bzoj to bene' be' xtiže'na' cani', gwne': "Chixjue'eda' Xi'inan' yeze'e Egipton'."

Herodesen' gwsele' soldadw cont gosote' yogo' bi' byo dao'

¹⁶ Na' rey Herodesen', cate' goche'ede' gosonle magos ca' le' dan' bich besyedie' gan' zoe'na', leca bže'e. Na' bsaque' con can' gwyejni'ide' cate' gwnabde' legaque' batcan' bla' beljon', na' gwsele' soldadw çhe' ca' par jasete' yogo'lol bi' byo che'eñ dao' zelao bi' chop ize, bi' ca' gosalje Belénna' na' yezica'chle yež ca' zjanyechj zjambi'i Belénna'. ¹⁷ Na' lagüe dan' gosote' bi' byo dao' ca', goc can' bzoj da' Jeremías ben' be' xtiža' Diosen' cani', žan:

¹⁸ Nente ši'i bene' Ramá, chesebežchgüe' nita'chgüe' yela' güine'. No'ole ca' zjanaque' xi'in diaža çhe da' Raquel chesyeyaše' chesyegüine'de' çhe xi'in da'ogaque' ca', na' bitw chesaçlaže' no yeyoexenlaže' legaque', le ba gosatben'.

¹⁹ Cate' got Herodesen', Josén' ne' zoe' Egipton'. Nach to angl çhe Xancho Diosen' blo'elagüe' Josén' lo bišgal, na' gože'ne':

²⁰ —Gwyas, beçhe' bidaon' len xna'be'na' na' le šjaya'ac Israel. Ba gosat bene' ca' besyeyiljw bidao'na' cont yesote'be'.

²¹ Nach gwyas Josén' beçhe'e bidaon' len xna'ben' jaya'ac lažgaque' Israel. ²² Perw Josén', cate' bende' Arquelao bezoe' chnabi'e latje çhe da' xe' Herodesen', bžebe' yeyeje' gan' mbane distritw Judean'. Na' Diosen' gwduxjue'ede' le' lo bišgalen' bi' cheyala' šjaya'aque' distritw Judean', san šjaya'aque' gan' mbane distritw Galilean'. ²³ Da'nan' besyežine' ciuda Nazaret na' jasenite'. Na' dan' jasenite' Nazaretan' goc can' bosozoj da' bene' goso'e xtiža' Diosen' cani', gosene': "Yososi'e Jesusen' bene' Nazaret."

3

Juan ben' bzoa bene' nis gwduxjue'ede' diža' güen çhe Diosen'

(Mr. 1:1-8; Lc. 3:1-9, 15-17; Jn. 1:19-28)

¹ Na' gwde zan iz, Juan ben' bzoa bene' nis gwyeje' latje daš gan' mbane distritw Judean'. ² Na' gwduxjue'ede' bene', gože' legaque':

—Le yetinje xtoła'le ca', le ba bžin ža cate' Diosen' ben' zoa yaban' nabi'e yichjlaždao' bene' yosozenague' çhe'.

³ Çhe Juanna' bzoj da' Isaíasen' caten' bzoje' Xtiža' Diosen' cani', gwne': Bena' chne' zižje latje dašen', že':

"Le gonšagüe' yichjlažda'olen' cont soale lez gwzenagle çhe Xançon' cate' yide'.

Le cuejyichj da' malen' chonle cont yichjlažda'olen' gaquen ca to nez da' ba gosonšagüe'."

⁴ Na' Juanna', xalane' goquen de yiša' xa camello. Na' da' bçhej lsinen' goquen de yid, na' gwdagüe' biše'zo len šina' beser yixe'. ⁵ Bene' že' ciuda Jerusalénna' na' bene' že' yogo' yež ca' gan' mbane distritw Judean', na' lecze bene' že' yež ca' nyeçhj mbi'i yegw Jordánna' gosa'aque' ja'aque' gan'

zoa Juanna' cont bosozenague' xtiže'na'. ⁶ Na' cate' gosexoadole' bi da' xinj zjanone', Juanna' bzo'e' legaque' nis lo yegw Jordánna'.

⁷ Na' lecze ja'ac zan bene' Israel bene' ca' zjanzi' fariseo na' bene' ca' zjanzi' saduseo. Ja'aque' cont bzoa Juanna' legaque' nis. Nach Juanna' cate' ble'ede' legaque' gože'ne':

—iLe'e nacchguale bene' zgot na' bene' gwxiye! ¿Cahaquele guac yelale lao castigw dan' sela' Diosen' caten' gone' yela' justis che benachen'? ⁸ Se da' li ba betinjle xtoła'len', cheyala' gonle da' nac güen cont yesache'e bene' ba boša' yichjlažda'olen'. ⁹ Na' bitw gonle xbab gaquele Diosen' bitw gone' le'e castigw che xtoła'len' lagüe dan' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. ¹⁰ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, chog xan yaga' len na' gwzeyen'. ¹¹ Neda' da' li chzoa' le'e nis neche ba betinje xtoła'le, perw coža'na' za' yid ben' gon cont soa Spiritw che Diosen' lo' yichjlažda'olen' naban' le'e. Na' bene' ca' bi yeson can' chazlaže' Diosen', sele' legaque' lo yi' gabilen'. Na' ben' za' za' coža'na' zaca'che' ca neda' na' da' nacchgüe' bene' zaca', bi zaca' gona' xmandadoe' lechja' no xele'. ¹² Benan' gone' len benachen' can' choncho cate' chdecho trigon' lo' rner. Chotobcho trigon' chgo'ošagüe'chon na' chzeycho yix beben'. Na' bene' bi chesejnilaže' Diosen', sele' legaque' lo yi' gabilen' dan' cbi cheyol chenit.

Cate' gwzoa Jesúsen' nis
(Mr. 1:9-11; Lc. 3:21-22)

¹³ Na' gwza' Jesúsen' gan' mbane Galilea na' gweyje' gan' zoa Juanna' cho'a yegw Jordánna' cont Juanna' bzo'e' le' nis. ¹⁴ Na' Juanna' ben cho'alagüe' gague goclaže' gwzoe' Jesúsen' nis, gože'ne':

—Chyažjda' gwzo' neda' nisen' na' le' zedenabo' gwzoa' le' nis.

¹⁵ Nach Jesúsen' gože' Juanna':

—Bzoa neda' nisen'. Cheyala' goncho ca' cont gac yogo'lol dan' non Diosen' mandadw gac.

Nach gwcheb Juanna' bzo'e'ne' nis. ¹⁶ Na' cate' beyož gwzoa Jesúsen' nisen', bechoje' lo' nisen', na' la' byaljwte yaban' gan' zoa Diosen'. Na' ble'ede' Spiritw che Diosen' betjen ca to ngolbex na' bžinen gwzoan len le'. ¹⁷ Na' gosende' gwne Dios ben' zoa yaban', gwne':

—Bengan' Xi'ina' bene' chacda' na' chebe chezaquelaže'chgüeda' che'.

4

Goclaže' gwxiyen' co'oyelan' Jesúsen' gone' da' mal
(Mr. 1:12-13; Lc. 4:1-13)

¹ Na' Spiritw che Diosen' benen cont gweyj Jesúsen' latje dašen' gan' Satanás dan' chnabia' da' xigüe' ca' goclažen' co'oyelan' le' cont gone' da' mal.

² Na' bitwbi gwdagw Jesúsen' lao choa ža choa yel, na' cate' gwde da' choa žana' gwdone'. ³ Na' Satanásen' gwbigan' gan' zoa Jesúsen', gožen le':

—Še le' naco' dogualje Xi'in Diosen', gož yej quinga yesyeyaquen yetextil.

⁴ Nach gož Jesúsen' len:

—Nyojcze Xtiža' Diosen' žan: “Gague yela' guagw na'zen' chyažje chio' benač cont gac bancho, san lecze chyažjecho yogo'lol diža' dan' ža Diosen'.”

⁵ Nach gwche' Satanásen' le' ciuda Jerusalén dan' nac ciuda che Dios. Na' bcuen le' yichjo' yodao' blao gan' nac la'zelagüe sibe, ⁶ na' gožen le':

—Še len' naco' dogualje Xi'in Diosen', nga boslažo' cuino', le nyojczen le'e Xtiža' Diosen', žan:
 Seļa' Diosen' bene' ca' zjanac angl che' yesaclene' le',
 na' yesože' le' cont bi chego' no vej.

⁷ Na' gož Jesúsen' gwxiye'na':

—Lecze can' nyojen Xtiža' Diosen', žan: “Bitw goncho Xancho Diosen' prueba še lede' can' že'na'.”

⁸ Da' yoble gwxiye'na' gozche'en le' to lo ya'a da' nacchgua sibe, na' blo'en le' yogo' nación dan' zjachi' doxen yežlion' len yela' zaca' yela' xdan chegaquen.

⁹ Nach gožen le':

—Yogo' da' quinga chle'edo' nga gonan' lo nao' še gwzoa xibo' lagua' nga gonxeno' neda'.

¹⁰ Nach gož Jesúsen' len:

—Beyej ca'ale Satanás. Nyojczen le'e Xtiža' Diosen' žan: “Cheyaļa' šejnilaže'cho Xancho Diosen' na' toze le' gonxencho.”

¹¹ Na' becuase Satanásen' cuite'na' beyejen ga yoble nach besežin to chope angl che Diosen' jasaclene' le'.

Jesúsen' gwzolağüe' chyixjue'ede' diža' güen che Diosen' distritw Galilea
(Mr. 1:14-15; Lc. 4:14-15)

¹² Na' Jesúsen' beze'e distritw Judean' na' beyeje' distritw Galilea cate' bende' ba de Juanna' ližya. ¹³ Na' gwze'e yež Nazareten' jasoe' ciuda Capernaum dan' chi' cho'a nesdaon' do gan' zjachi' distritw dan' zjanzi' Zabulón na' Neftalí. ¹⁴ Na' dan' jayzoe' ciudadan' goc can' gwna da' Isaiás ben' be' xtiža' Diosen' cani' caten' bzoje' dan' ža:

¹⁵ Ca nac distritw Galilea gan' že' zan bene' cbi zjanaque' bene' Israel, gan' nita' distritw Zabulón na' distritw Neftalí dan' zjambane yešļa'ale nesdaon' na' yegw Jordán,

¹⁶ nchol yichjlaždao' bene' ca' že' na'.

Perw Diosen' gwsele' to bene' gwlo'o to be'ni' xen lo' yichjlažda'ogaquen'. Gosaque' ca bene' guat len yichjlažda'ogüen' le gosone' da' malen', perw bena' gwseļa' Diosen' ba bocobe' yichjlažda'ogaquen'.

¹⁷ Cana' gwzolao Jesúsen' gwdixjue'ede' gwne':

—Le yetinje xtoļa'alen', le ba bžin ža cate' Diosen' ben' zoa yaban' nabi'e yichjlaždao' bene' yosozenague' che'.

Jesúsen' gwleje' tap bene' gwxen bel' cont gosaque' txen len le'
(Mr. 1:16-20; Lc. 5:1-11)

¹⁸ Na' zej Jesúsen' cho'a nisdao' che Galilea cate' ble'ede' chope bene' gwxen bel', Simón Pedro na' bene' biše' Andrés, na' zjanite' chosozale' yixjw dan' chesezende' bel'en' lo' nisa'. ¹⁹ Nach gože' legaque':

—Le šo'o len neda'. Nacle bene' gwxen bel', na' chbejle bel' lo' nis, perw na'a gona' cont gaxle bene' yesyechoje' lo' da' malen'.

²⁰ Na' la' gosebejyichjte' yixjw čhen' nach ja'aclene' Jesúsen'.

²¹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e to lo' barcw len xagaque', chesyeyonšagüe' yixjw chegaquen'. Na' lecze gox Jesúsen' legaque' šja'aclene' le'. ²² Na' la' gosontie' barcon' lo' na' xagaque' Zebedeon' na' ja'aclene' Jesúsen'.

Jesúsen' bsd blo'ede' bene' zan
(Lc. 6:17-19)

²³ Na' Jesúsen' gwyeje' yogo' yež ca' zjachi' gan' mbane Galilea, bsed blo'ede' beñe' ca' zjaže' to to yodao' che chio' beñe' Israel. Na' gwđixjue'ede' diža' güen can' nabia' Diosen' yichjlaždao' beñe' yosozenag che'. Na' Jesúsen' beyone' beñe' ca' chese'e bite'teže yižgüe'. ²⁴ Na' doxen nación Siria gwxoá diža' yogo' da' güen da' ben Jesúsen'. Nach beñe' Siria ca' jasesane' yogo' beñe' chesacšene lagüe'na', beñe' chese'e zan yižgüe', beñe' chesey chesela, beñe' zjajo'o zjanyaz da' xigüe' yichjlažda'ogaque' len beñe' chesaz šon na' beñe' natsi' cuerp chegaquen'. Na' beyone' legaque'. ²⁵ Na' zan beñe' gosao' le', beñe' za'ac distritw Galilea na' distritw Decápolis, na' beñe' za'ac ciuda Jerusalén, na' beñe' za'ac yezica'chle yež da' zjachi' distritw Judea, na' beñe' za'ac yešla'a yegw Jordán.

5

Diža' dan' bsed blo'e Jesúsen' to lo ya'a (Lc. 6:20-23)

¹ Na' Jesúsen' cate' ble'ede' beñe' zan zjanžag, na' gwloe' gwchi'e to lo ya'a. Na' beñe' ca' zjanaque' le' txen gosebigue' gan' chi'ena'. ² Nach gwzolao bsed blo'ede' legaque', gwne':

³ —Mbalaz zoa le'e chache'ele chyažjele gaclen Diosen' le'e, le ba chzenagle che Diosen' cont chnabi'e yichjlažda'olen'.

⁴ Mbalaz soa le'e chacyaše'laže'le, le Diosen' yeyoe'xenlaže' le'e.

⁵ Mbalaz zoa le'e chzexjwlaže'le len Diosen' na' len beñachen', le gon Diosen' cont gac lo na'le doxen yežlion' can' gwne'.

⁶ Mbalaz zoa le'e chzelaže'chguale gacle beñe' güen len Diosen', le ba cheyon Diosen' le'e beñe' güen lagüen'.

⁷ Mbalaz zoa le'e cheyaše'le beñe' yoble, le lecze ca' Diosen' yeyaše' yeži'ilaže'de' le'e.

⁸ Mbalaz zoa le'e ba nacle beñe' laždao' xilaže', le šjayzoale txen len Diosen'.

⁹ Mbalaz zoa le'e chego'ole yela' chxenlaže' che beñe' chesedi, le Diosen' ne' nacle xi'ine'.

¹⁰ Mbalaz zoa le'e chosoči chososaca' beñe' le'e lagüe dan' chonle dan' nac güen lao Diosen', le chzenagle che Diosen' cont chnabi'e yichjlažda'olen'.

¹¹ Na' mbalaz soale še dan' chejnlaže'le neda' chesezi'diža' beñe' le'e na' chososaca'zi'e le'e na' chosoxie' diža' güenlaže' chele. ¹² Le yebechgüe na' le soa mbalaz, le Diosen' gone' cont gachgua da' güen chele cate' yežinle gan' zoe'na'. Can' chesonde' le'e, ca'czen' goson da' xoxxta'ocho len da' beñe' ca' gosoe' xtiža' Diosen' cani'.

Naccho ca zede' na' ca be'ni' len beñe' že' yežlio nga (Mr. 9:50; Lc. 14:34-35)

¹³ Le'e nacle ca zede', le zede' chaclenen cont bi cuiayi' no yid bela', na' le'e chonle cont beñachen' cbi chesonteque' da' mal. Perw še zeden' bich bi zxi' naquen, žnacxe goncho cont yeyaquen zxi' da' yoble? Na' bich bi zacan', lete cho'onchon na' gwlej gwšošj beñe' len. Na' le'e še cbich gonle can' chazlaže' Diosen', nacle ca zede' dan' bich bi zxi' naquen.

¹⁴ Na' le'e nacle ca be'ni' dan' chaclenle beñe' cont chesenezde' nac chaclaže' Diosen' yesone'. Na' dan' chonle can', nacle ca to ciuda da' chi' to lo ya'a, le yogo'ze beñe' chesele'eden'. ¹⁵ Notno gwguala' to yi' na' gwđosen' to caj, san chde'en le'e ze'e cont chšenin' len yogo' beñe' že' lo' yo'ona'. ¹⁶ Na'

ca nac le'e, cheyala' soateze soale gonle da' güenna' cont yesele'e bene' na' yesonxene' Xacho Dios ben' zoa yaban'.

Jesúsen' bsed blo'ede' can' ža ley dan' bzoj da' Moisés

¹⁷ Bitw gaquele še neda' za'a zedeyena' cont ley dan' bzoj da' Moisésen' na' dan' bosozoj yezica'chle bene' ca' goso'e xtiža' Diosen' cani' bich yesonen žin. Za'a cont gac can' ža yogo'lol Xtiža' Diosen' dan' bosozoj bene' ca'. ¹⁸ Da' li žia' le'e, te che yežlio nga len da' ca' chle'echo le'e yaban', perw ne to letr dao' ne to punt dao' dan' nyoj le'e leyna' bi gac yexin, san gac yogo'lol dan' nžia bia' Diosen' gac. ¹⁹ Da'nan' note'tezle še bi gonle can' žanna', la'czla' še naquen la'zelagüe to da' dao', na' še lecze gwlo'ele bene' yoble bi yosozenague' chen, Dios ben' zoa yaba chnabi'e ne' bi nacle bene' blao len le'. Na' note'tezle še gonle can' žanna', na' še lecze gwlo'ele bene' yoble yesone' ca', Diosen' ben' zoa yaba chnabi'e ne' nacle bene' blao len le'. ²⁰ Chnia' le'e, bene' fariseo ca' na' bene' ca' chososed chosolo'e dan' bzoj da' Moisés bitw zjanac yichjlažda'ogaquen' güen lao Diosen'. Na' še yichjlažda'olen' bi gacchen güen lao Diosen' clcl ca' che bene' ca', bitw yežinle yaban' gan' zoa Diosen' chnabi'e.

Da' malen' choncho še chža'a lježcho
(Lc. 12:57-59)

²¹ Na' lecze bsed blo'e Jesúsen' legaque' gože'ne':

—Ba nezele can' bzejni'i Moisésen' bene' ca' gosonita' cani', gwne': “Nono gotle. Na' še no got ljež benache', justis ca' yesechoglagüe' che' cheyala' gate'.”

²² Na' neda' žia' le'e, note'tezle še chža'a ljež benachle, zacan' yesechoglagüe' gata' castigw chele. Na' note'tezle še chzi'diža' lježle, zacan' yeson bene' blao ca' chesenabia' nación Israel chechon' castigw chele. Na' note'tezle še chado'diža' lježle, zaca'czen' yesela' Diosen' le'e lo yi' gabil.

²³ Cheyala' soacho binlo len ljež benachcho. Na' la'czla' cate' ba zoale lo' yodao' cont gwnežjwle bi dan' gwnežjwle gonxenle Diosen', še šjasa'laže'le ba benle da' mal contr to bene' lježle, ²⁴ na'ze cheyala' gwcua'anle slož dan' noxe'len' na' šjenle cont yezoale binlo len bene' lježlen'. Yeyoža' guaque šjasanle dan' ba gwlejlle cont gonxenle Diosen'.

²⁵ Cate' to bene' gagüe' xya chele na' che'e le'e lao justis, šlac ngo'ole nezen' le yeyiljwlaže' nac gonle cont yezoale binlo len le' cont bi che'e le'e lao justisen'. Še bitw gonle ca', cate' žinle lao justisen', nach gone' le'e lo na' bene' ca' yososeyjue' le'e ližya. ²⁶ Da' li žia' le'e, bitw yebeje' le'e še bina' chixjwle doxen dan' cha'la'le.

Da' malen' choncho še chzoa xtocho

²⁷ Ba nezele ley dan' bzoj da' Moisésen' žan: “Bitw gata'lenle no'ole bi nac no'ol chele o bene' byo bi nac bene' chele.” ²⁸ Na' neda' žia' le'e, note'tezle še chna'le to no'ole na' chzelaže'lene', ba naple do'la'. Le tozecze ca malen' ba chonle lo' lažda'olen' len dan' chon bene' chzoa xtoe'.

²⁹ Na' še yejlaolen' chonen cont gonle da' xinj, cheyala' cuejyichjle da' malen' chonle. Yejni'a cuiayi' yejlaolen' clcl ca' cuiayi'le lo yi' gabilen' neche len. ³⁰ Na' še na'le chonen cont gonle da' xinj, cheyala' cuejyichjle da' malen' chonle. Yejni'a cuiayi' na'le clcl ca' cuiayi'le lo yi' gabil neche len.

Bene' ca' zjanšagna' bitw cheyala' yesyele'e
(Mt. 19:9; Mr. 10:11-12; Lc. 16:18)

³¹ Lecze nezele ley dan' bzoj da' Moisésen' žan: “Note'teze bene' yele'e len no'ol che', cheyala' chas to yiš ga güen' diža' le besyele'ena'.” ³² Na' neda' žia'

le'e note'teze bene' chele'e len no'ol che', len neztede' no'ole chen' bitw naque' to no'ole chzoa xtoe', chone' cont gaque' ca to no'ole bene' chzoa xto. Na' note'teze yošagna'lene' to no'ole bene' bela'a len bene' che', lecze tozcze ca da' xinj gone' len dan' chon bene' chata'lene' no'ol che bene' yoble.

Jesúsen' bzejni'ide' cheyała' güe'cho diža' li

³³ Na' lecze ba nezele can' bzejni' da' Moisésen' da' xozxta'ocho ca': "Cate' gwzoale testigw Xancho Diosen', cheyała' gonle con can' ba gwnalen'." ³⁴ Perw neda' žia' le'e gwbat nale quinga che bite'teze: "Yabana' zoan testigw chia' cho'a diža' li". Bi nale ca' le yaba nan' zoa Diosen' chnabi'e. ³⁵ Na' neca nale: "Yežlion' zoan testigw chia' cho'a diža' li", le yežlion' den xni'a Dios. Neca nale: "Ciuda Jerusalénna' zoan testigw chia' cho'a diža' li", le naquen ciuda che Dios ben' naque' la'zelagüe bene' chnabia'. ³⁶ Na' neca nale: "Yichja' zoan testigw chia' cho'a diža' li", le bitw gac gonle cont yiša' yichjlen' yesyeyaquen da' šiš o yesyeyaquen da' gasj. ³⁷ Še žale guaquen, gacczen; še žale bi gac, bi gacczen. Le bichle diža' da' nale cont yesejle'e chele, zan' che Satanás dan' chnabia' da' xigüe' ca'.

Bitw co'olaže'cho bene' chesegue'ede' chio' (Lc. 6:29-30)

³⁸ Nezele ley dan' bzoj da' Moisésen' žan: "Še to bene' gone' zi' yejlaolen', guac gonle zi' yejlagüen', na' še to bene' xope' to layle, guac xople to layen'." ³⁹ Perw neda' žia' le'e, bitw gwžonle gwsaca'zi' bene' le'e. Še to bene' cape' šla'a xaga'le, le güe' dan' yešla'a. ⁴⁰ Še to bene' chagüe' xya na' che'nde' que'e xcamisle, le güe' latje que'e len xadoñ chelen'. ⁴¹ Na' še to bene' blao gone' byen šejlenlene' gua'le yoa' chen' do gašj hor, le šejlene' le guan' chop ca'te'le. ⁴² Na' še bi dan' chnabe bene' le'e, le güen'. Na' le cuej še bi da' chnabe' cuejlene'.

Cheyała' gaquecho bene' chgue'e chio' (Lc. 6:27-28, 32-36)

⁴³ Na' lecze ba nezele ley chelen' žan: "Cheyała' gaquele bene' migw chele na' gue'ele bene' chgue'ede' le'e." ⁴⁴ Perw neda' žia' le'e, cheyała' gaquele bene' chgue'ede' le'e, na' cheyała' nabele Diosen' gac güen che bene' chesezi'diže' le'e. Le gon binlo len bene' chesegue'ede' le'e, na' le yol güiž Diosen' cont gac güen che bene' ca' chososacazi'e le'e. ⁴⁵ Še gonle ca', gwlo'ele nacle xi'in Diosen' ben' zoa yaban'. Len' chone' chla' gwbižen' cont chsenin' che bene' zjanaque' bene' güen lente che bene' zjanaque' bene' mal. Na' lecze chone' yejw par bene' zjanaque' bene' güen len bene' zjanaque' bene' mal. ⁴⁶ Še chaquele šinze bene' chacde' le'e na' bi chaquele bene' yoble žbixchen' chbezle gon Diosen' da' güen chele? Con can' cheson bene' güečhixjw ca' chonle, bene' ca' žale zjanaque' bene' xi'achgua. ⁴⁷ Na' še con chguaple tiox bene' biše' lježle ca'ze žchaquele güenŋa' chonle da' chonle ca'? Bitw chonle güen, le ca'czen' cheson bene' ca' bi zjanombi'e Diosen'. ⁴⁸ Cheyała' gacle bene' šagüe' bene' güen len note'teze bene' con can' nac Xacho Diosen' ben' zoa yaban' bene' šagüe' bene' güen.

6

Jesúsen' blo'ede' naquen' cheyała' goncho da' chazlaže' Diosen'

¹ Cate' gonle to da' güen, bitw gonlen cont yesele'e bene' can' chonlen' na' yesonxene' le'e, le še chonle ca', Xacho Dios ben' zoa yaba bitw gone' ga gac

güen çhele. ² Da'nan' cate' gwnežjwle to beñe' da' chyažjde', bitw gwnežjwlen par yeseneze beñe' ca dan' chonlen'. Beñe' gwxiye' ca' chosonežjue' bi da' chosonežjue' do lo' yodao' na' do chanez par yeseneze beñe' na' yesene' güen chegaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. ³ San le'e, še bi da' gwnežjwle to beñe', le gwnežjon šižize. ⁴ Gonlen ga cbi yesabe'e beñe' na' cbi yesonxene' le'e, nach Xacho Diosen' ben' chle'ede' yogo' dan' choncho gone' ga gac güen çhele ga yesele'e yogo' beñe'.

*Bsed blo'e Jesüsen' nac cheyała' yol güižcho Dios
(Lc. 11:2-4)*

⁵ 'Cate' yol güižle Diosen', bitw gonle can' cheson beñe' gwxiye' ca'. Legaque' chesyebede' chesezeche' chosol güiže'ne' lo' yodao' chegaque', na' do squin chanez. Chesone' ca' cont yesele'e beñe' can' chesone'na'. Da' li žia' le'e, ba gosacxenczen' lagüe da' chesone' ca', perw Diosen' bitw gone' ga gac güen chegaque' še ca'. ⁶ Na' cate' yol güižle Diosen', le yeyo'o lo' yo'o çhele na' gwseyjwle puerten' na' güe'le diža' len Diosen' ben' cbi chle'echo la'czła' zoe' len chio'. Na' Xacho Diosen' ben' chle'ede' yogo' dan' chonle gone' ga gac güen çhele.

⁷ 'Na' cate' yol güižle Diosen' bi güe'le diža' zan can' cheson beñe' ca' bi zjanombia' Diosen'. Legaque' chesacde' lagüe' dan' cheso'e diža' zan Diosen' gwzenague' chegaque'. ⁸ Bitw gonle can' chesone'na'. Ca nac Xacho Diosen', cate' za' nabelenen' ba nezczedo' bi dan' chyažjele. ⁹ Quinga yol güižlene': Xato' beñe' zoa yaba, chnabto' yogo'lol beñe' yesonxene' le'.

¹⁰ Zelaže'to' nabi'o yichjlaždao' yogo' neto' beñe'.

Gacšca can' chazlažo' yežlio nga can' chac yabana'.

¹¹ Ca nac dan' che'ej chagwto' tža tža, beñšcan na'a.

¹² Na' bezi'xenšca çheto', le lencze neto' chezi'xento' che ljež beñachto'

bite'teze da' chesonde' neto'.

¹³ Na' bitw go'o latje soa da' gwžigan' neto' gonto' da' mal, san bcuas bcue'ejšca

neto' len da' mala'.

Le'na' chnabi'o na' napo' yela' guac na' naco' beñe' zaca' juisyw toli' tocañe.

Ca'czen' gacšca.

¹⁴ 'Na' še chezi'xenle che ljež beñachlen' bite'teze da' chesonde' le'e, lecze Xacho Diosen' ben' zoa yaban' yezi'xene' xtoła'len'. ¹⁵ Perw na' še le'e bi chezi'xenle che ljež beñachle, lecze ca' Xacho Diosen' bitw yezi'xene' çhelen'.

Jesüsen' bzejni'ide' nac goncho gwbas

¹⁶ 'Cate' le'e gonle gwbas cont gonxenle Diosen', bitw gon cho'alaolen' ca che beñe' chegüine'chgüe', can' cheson beñe' gwxiye' ca'. Legaque' chesone' ca' contze chesele'e beñe' le chesone' gwbas na' yesonxene' legaque'. Da' li žia' le'e, ba gosacxencze' lagüe da' chesone' ca', perw Diosen' bitw gone' ga gac güen chegaque' še ca'. ¹⁷ San le'e cate' gonle gwbas, le gwpa'a yichjle na' le chib cho'alaole. ¹⁸ Le gon ca' cont bi yesabe'e beñe' chonle gwbas, san gache'e toz Xacho Dios ben' zoa len chio' la'czła' bi chle'echone'. Na' Xacho Diosen' ben' chle'e yogo' da' choncho gone' cont gacxenle.

Da' ca' zjazaca'chgua yaba gan' zoa Diosen'

(Lc. 12:33-34)

¹⁹ 'Bitw co'ošagüe'le da' zcha'o da' zjanac da' zaca' da' zjade yežlio nga, le yesebiayin'. Bał da' zjade yežlio nga chesaljen be dao' chesagwban', na' yebałen chesezen xche'en, na' lecze chaš beñe' gwban na' yeseque'en. ²⁰ San

le gaque Diosen' cont gone' da' šagüe' da' güen čhele da' bi te čhen cate' yežinle yaban' gan' zoe'na', da' bi šo'ba', na' neca sen xče'en, na' neca gac šo' bene' gwban yeseque'en. ²¹ Le gan' de dan' chaquelen' na' zoa yichjlažda'olen'.

Žia yejlaocho cont chle'echo
(Lc. 11:34-36)

²² 'Žia yejlaole cont chle'ele. Še bitw bi chaquen, chle'eczele binlo. ²³ Perw še yejlaolen' bi naquen binlo, bitw chle'ele. Ca'czen' naquen len yichjlažda'olen'. Da' licze leca nčho| yichjlažda'ole še bi chzenagle čhe Diosen'.

Bitw gac gaquecho Diosen' na' gaquetecho mechw
(Lc. 16:13)

²⁴ 'Notno gac gon žin len chope xane' to ši'ize, le še gone' ca', gue'ede' to xan žinna' na' gacde' yetoe'; o gone' žin čhe toe' do yichj do laže' na' čhe ben' yeto gonon' to chža'alaze'ze. Lecze ca' le'e bitw gac gonle xšin Diosen' do yichj do laže'le na' gonte xšinle cont gacle bene' gwni'a.

Diosen' chapš'e xi'ine' ca'
(Lc. 12:22-31)

²⁵ 'Da'nan' žia' le'e, bi gacžejlaže'le bi da' ye'ej gagwle šlac mbanle, na' lecze ca' bi gacžejlaže'le čhe xalana'le. Zaca'ch yela' mban čhelen' ca' yela' guagw. Lecze ca' cuerp čhelen', zaca'chen ca' xalana'le. ²⁶ Le gon xbab ca' nac be ca' zjažia xil ben' chesaš lo be', bitw chesazba', bitw cheselapba', neca zoa da'a xoa' čhegacha', perw na' Xacho Diosen' ben' zoa yaba čguagwcze'ba'. iNacchle zaca' le'e ca' be ca' zjažia xilen'! ²⁷ Na' ne tole bi gac yoston' cuinle gašje metr še con cue' yichjle tonle.

²⁸ 'Na' žbixčhen' chbec yichjle xalana'le? Le gon xbab ca' nac yej ca' da' zjaze yixe' chescha'oczen'. Bibi žin chesonen, neca chesaljen do. ²⁹ Na' žia' le'e, da' rey Salomón gocue' lache' güen juisyw, perw bitw bežinlaže' xalane'na' ca' yela' xdan čhe yej ca'. ³⁰ Diosen' none' xdan da' ca' ze yixen' la'czla' to čhop žaze nitan' na' chosozejen'. Nacchxe gon Diosen' len le'e gwleccze yichje' gone' yogo' da' chyažjele, le'e late' lasze chejle'le čhe'. ³¹ Da'nan' bitw cuec yichjle čhe bi dan' chyažjele, nale': "žBin' ye'ej gagwcho na' bin' gacwcho?" ³² Bene' ca' bi chesonxene' Diosen' con chesoe'laže' bi da' gata' yese'ej yesagüe' na' čhe xalana'gaque'. Perw Xacho Diosen' ben' zoa yaban' nezcze' bi da' ca' chyažjele. ³³ Cheyala' güe'laže'le gwzenagle čhe Diosen' cont nabi'e yichjlažda'olen' na' cont gacle bene' güen len le', lenna' naquen da' žialaoch, na' yogo' da' ca' chyažjele, goncze Diosen' len. ³⁴ Bitw cuec yichjle čhe bi dan' gac gwxe güižj, le decze da' cuec yichjcho tža tža. Da'nan' to to ža con cuec yichjcho čhe dan' chac ca' hora'.

7

Bitw zaca'cho nacho zjanap bene' dol'a
(Lc. 6:37-38, 41-42)

¹ 'Bitw gonle xbab zaca'le nale bene' zjanape' dol'a'. Še nale čhe bene' zjanape' dol'a', ca'cze Diosen' ne' le'e nable dol'a'. ² Can' chosbaga'le bene' žale zjanape' dol'a', lecze can' yosbaga' Diosen' le'e ne' nable dol'a'. Con can' chonle len bene', lecze can' gon Diosen' len le'e. ³ žBixčhen' čhna'le beb dao' dan' yo'o lo' yejlao bene' lježle na' bi chache'ele naquech beb xen dan' yo'o lo' yejlaolen'? ⁴ Na' še le'e yo'o to da' xench lo' yejlaolen' žnacxechen' che'le bene' lježlen': "Ben' yebeja' beb dao' dan' yo'o lo' yejlaguon'?" ⁵ žBene' güexoayag!

Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaol beñe' lježle.

⁶ 'Perw bitw güe'tezle xtiža' Diosen' len beñe' ca' cheson yichjlaogüe' chi chesaclaže' yosozenaguen', le xož yesonde' le'e znia ca cheson bał beco' še bi chazlaže'ba' bi da' chosonežjue'ba'. Na' še güe'tezle xtiža' Diosen' len beñe' ca' cheson yichjlaogüe', xož yosolej yosošoše' diža' dan' güe'lenlene'. Ca' cheson coš len da' cbi chesaclaže'ba' yesagwba'.

Le nabe Diosen' bi dan' nabelene', le goncen'
(Lc. 11:9-13; 6:31)

⁷ 'Še žan bi da' chyažecho, chñabchon. Še žan to da' chaclaže'cho želecho, chyiljwchon. Še žan chaclaže'cho saljw beñe' puert che' na' necho cho'a puerta' cont saljue'. Na' ca'cze cheyała' ye'le Diosen' cate' bi da' chyažjele, o bi da' chaclaže'le gone'. ⁸ Na' note'tezle še bi da' chñabelene', goncen'. Na' še bi dan' che'nele nezele, gwzejni'iczen' le'e. Na' še žan chaclaže'le gac to da' gac, yol güižle Diosen' can' chon to beñe' chñie' cho'a puert, nach Diosen' gone' cont gacczen.

⁹ 'Na' le'e xa bidao', še xi'inle nabebe' le'e yetextil ĩgwnežjwlebe' to yej? ¹⁰ Na' še nabbe' yid bel gagwbe', ĩgwnežjwlebe' to be xigüe'? ¹¹ La' nacle beñe' mal, nezele chnežjo xi'inle to da' güen. Nacchxe güen gon Xacho Diosen' ben' zoa yaban' len beñe' chñab lagüe'na' bi dan' chyažjde'.

¹² 'Na' con yogo' da' güen da' chaclaže'le yeson benachen' len le'e, ľecze ca' cheyała' gonle len legaue', le can' zejen da' nyoj le'e ley dan' bzoj da' Moisésen' na' dan' bosozoj da' beñe' ca' goso'e xtiža' Diosen' cani'.

Nez da' yežin yaban' zaca'leben ca to nez las
(Lc. 13:24)

¹³⁻¹⁴ 'Lao yela' mban checho chope nez de, to nez güen na' to nez mal. Nez malen' zaca'leben ca to nez yo to nez laga' dan' chaquele ľeca mba naquen cont talen, na' beñe' zan cheseque'en. Perw cheyała' gonle byen šo'le nez güenna' la'czla' chaquele naquen ca to nez las, to nez zdebe, le nez malen' chežinen gabıl gan' saca'zi'le toli tocañe. Na' nez güenna' chežinen yaba ga banle toli tocañe.

Dan' choncho chlo'en bin' yo'o lo' yichjlažda'och
(Lc. 6:43-44)

¹⁵ 'Cheyała' gwsaca'le cont bi šejle'le xtiža' beñe' ca' chesonlaže' chesene' xtiža' Diosen' cheseyixjue'ede'. Xdanchgua cheso'e dižan', le chesaclaže' gonle xbab zjanaque' beñe' güen. Perw zjanaque' beñe' laždao' xi'a na' chesaclaže' yosožiaje'e le'e. ¹⁶ Con can' nac da' chbia to to yaguen' nezecho bi yaga'. Ca nac yag yeše' bitw chbian uvas na' neca yag lay chbian yixgüigw. Ca'czen' cheyała' gacbe'ele beñe' ca' yeseziye'e le'e cate' le'ele dan' chesone'na'. ¹⁷ Yag dan' nac yag güen, frut güencze chbian, na' yag da' bi nac güen, ľecze frut da' bi nac güen chbian. ¹⁸ Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ¹⁹ Na' yogo'te yag frut da' bibi chbia, chog xan yaga' len na' gwzeyen'. ²⁰ Na' can' nac dan' cheson to to beñe', nezecho še zjanaque' beñe' güen o beñe' mal.

Gague yogo' beñe' yesyežine' gan' zoa Diosen' chnabi'e
(Lc. 13:25-27)

²¹ 'Beñe' zan chese'e neda': "Naco' Xana'", perw gague yogüe' yesyežine' yaban' gan' zoa Diosen' chnabi'e. Beñe' ca' cheson can' chazlaže' Xa' Diosen'

ben' zoa yaban', legaczen' yesyežine' yaban' gan' zoe' na'. ²² Cate' žin ža yosodie' cuent lao Diosen', bene' zan yesi'e neda': "Xana', goclen neto' na'a, le ba gwdixjue'eto' xtižo'na'. Na' lecze ca' bza' bzetjto' lao' bebejto' da' xigüe' ca' zjajo'o zjanyaz yichjlaždao' bene'. Na' lecze bza' bzetjto' lao'na' bento' da' zan yela' guac." ²³ Perw na' yapa' legaque': "Bitw nombi'a le'e. Le šjaya'ac ca'ale le'e bene' güen da' xinj."

Chope bene' na' yo'o da' chon to toe'
(Mr. 1:22; Lc. 6:47-49)

²⁴ Bene' chzenag xtiža'na' na' chone' can' žia'na' zaca'lebde' ca to bene' sina' bene' ben liže' na' gwdixjue' lenen len yej gual. ²⁵ Na' goc yejw zil juisyw na' betj yegw gwyechjen liže'na' na' gwyechj be' bdono'. Perw bitw gosezoen yosochixen len dan' gwdixjue' lenen de yej. ²⁶ Na' bene' chzenag xtiža'na' perw bitw chone' can' žia'na', zaca'lebde' ca to bene' tont bene' bzoa ližen' lo yox. ²⁷ Na' goc yejw zil juisywna' na' betj yegon' gwyechjen liže'na' na' gwyechj be' bdono'. Nach ližen' bebixen gwžiyain'.

²⁸ Na' cate' beyož be' Jesúsen' diža' ca', bene' ca' že' na' besyebande' can' bsed blo'eden'. ²⁹ Le can' bzejni'ide' nachbia' nezde' cayanen' nac xbab che Diosen', gague bzejni'ide' can' chosozejni'i bene' ca' chososed chosolo'e ley dan' bzoj da' Moisésen'.

8

Jesúsen' beyone' to bene' che'ede' yižgüe' dan' nzi' lepra
(Mr. 1:40-45; Lc. 5:12-16)

¹ Bene' zan zesyenagüe' Jesúsen' cate' beyetje' ya'ana'. ² Nach to bene' che'ede' yižgüe' dan' nzi' lepra gwbigue' lao Jesúsen' na' bzoa xibe' lagüe'na' gože'ne':

—Xana', še chaclažo' guac yeca'o yižgüe' dan' che'eda'.

³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' beyactie' ca nac yižgüe' dan' che'ede'. ⁴ Nach Jesúsen' gože' le':

—Notno yo'o can' ba beyona' le'. Con gwyej jaña' bxoza' cont le'ede' bač beyacdo'. Na' bnežjw da' cheyała' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

Jesúsen' beyone' xmos to soldadw
(Lc. 7:1-10)

⁵ Na' cate' bežin Jesúsen' Capernaum to xan soldadw bene' Roma la' bšagte' le'. Na' gota'yoede' Jesúsen', ⁶ gože'ne':

—Xana', xmosan' die' ližan' chacšenchgüede'. Natsi' cuerp chen' na' chžaglaochgüe'.

⁷ Nach Jesúsen' gože' xan soldadoa':

—Sa'lena' le' na' yeyona'ne'.

⁸ Perw na' xan soldadoa' gože'ne':

—Xana', bitw naca' bene' zaque' par sa'o liža'na'. Ngateze ben mandadw yeyac xmosan' na' yeyaccze'. ⁹ Neda' zoa bene' chnabi'e neda', perw lecze nita' soldadw chia' na' chnabia'gaca'ne'. Cate' chapa' toe': "Gwyej", na' cheje', na' cate' chapa' yetoe': "Da", na' chide', na' cate' chapa' xmosa': "Da' nga gono'", na' chonen'. Nan' nezda' con nao' yeyac xmosan' na' yeyaccze'.

¹⁰ Na' Jesúsen' cate' bende' xtiža' xan soldadoa' bebande' na' gože' bene' ca' zjanagüe' le'na':

—Da' licze žia' le'e, ne toze bene' Israel biña' šejnilaže' chgüe' neda' ca benga bi naque' bene' Israel. ¹¹ Žia' le'e, bene' zan za'ac doxen yežlion' šjasyenite' txen len da' xoxxta' ocho Abraham, Isaac na' Jacob yaban' gan' zoa Diosen' chnabi'e na' yesebi'e cho'a mes yesagüe'. ¹² Na' ca nac bene' nación Israelen' ben' gwlej Diosen' cont yesenite' len le', choj bene' zan bitw yesejnilaže' neda'. Da'nan' sele' legaque' lo' yi' gabil gan' nac choj na' yesebežyaše' na' yesagwxejte laye' dan' yesežaglaochgüe'.

¹³ Beyož gwna Jesúsen' ca' nach gože' xan soldadoa':

—Guac yeyejo'. Yeyaque xmoso na', con can' chejli'o gac che'.

Na' xmos xan soldadoa' la' beyactede'.

Jesúsen' beyone' taobi'in che Pedroa'

(Mr. 1:29-31; Lc. 4:38-39)

¹⁴ Na' gwyej Jesúsen' liž Pedroa', na' ble'ede' taobi'in che Pedroa' die' yo'e da' la. ¹⁵ Jesúsen' beḅue' ne'e na' la' bechojtie' da' lan'. Nach la' gwyaste no'olen' bsinie' da' gose'ej gosagüe'.

Jesúsen' beyone' bene' zan

(Mr. 1:32-34; Lc. 4:40-41)

¹⁶ Na' cate' ba gwxin, besežin bene' gan' zoa Jesúsen' zjanči'e bene' zan zjajo'o zjanyaz da' xigüe' yichjlažda'ogaquen'. Jesúsen' con bene' mandadw na' besyechoj da' xigüe' ca'. Lecze beyone' yogo' bene' ca' chesacšene. ¹⁷ Bene' ca' cont goc can' ža Xtiža' Diosen' dan' bzoj da' Isaiás che' cani', žan: "Le'na' yeque'e yela' chžaglao checho na' yeque'e yogo' yižgüe' chechon'."

Can' gož Jesúsen' bene' ca' gosaclaže' yesa'ogüe' le'

(Lc. 9:57-62)

¹⁸ Gwde na' ble'e Jesúsen' ba besežin bene' zan zjanyechjde' le', nach bene' mandadw len bene' ca' zjanaque' le' txen cont yeselague' yešla'a nisdan'. ¹⁹ Na' bchoj to bene' chsed chlo'ede' dan' bzoj da' Moisésen' nach gwbigue' lao Jesúsen' na' gože'ne':

—Maestrw, sa'lena' le' gate'tez šejo'.

²⁰ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil, be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' beḅačh.

²¹ Na' bchoj yeto ben' naque' Jesúsen' txen na' gože'ne':

—Xana', sa'lena' le' perw za' got xa'. Bešca latje zgua'tec šjaycuaša'ne'.

²² Jesúsen' gože'ne':

—Yo'o len neda'. Bene' ca' zjanac yichjlažda'ogüe' ca' che bene' guat, legaque' guacce yosocuaše' yezica'chle bene' guat.

Jesúsen' bcueze' to be' bdono' lo' nisdao'

(Mr. 4:35-41; Lc. 8:22-25)

²³ Beyož be' Jesúsen' diža' ca', gwoyo'e lo' barcon' len bene' ca' zjanaque' le' txen. ²⁴ Na' šlac zej barcon' lo' nisen' gwzolao gwyechj to be' bdono' na' nisdan' leze chas chatan' na' gwzolao cheyož nis lo' barcon', perw ba chtas Jesúsen'. ²⁵ Nach bosyosbane' le' gosi'ene':

—jXanto'! jBosla chio'! jBach chbiayi'cho!

²⁶ Nach Jesúsen' gože' legaque':

—¿Bixchen' chžebtecle ca'? ¿Nacxechen' bi chejle'le chia'?

Na' gwyase' na' gwdile' be' bdonon' len nesdaon', na' la' gosebe'žiten.
²⁷ Na' bene' ca' zjanaque' Jesúsen' txen besyebande' can' bene'na', nach gose' lježgaque':

—¿Noxe benga? lente be' bdono' na' len nesdaon' chosozenaguen che da' že'.

Chope bene' Gadara zjajo'o zjanyaze' da' xigüe'

(Mr. 5:1-20; Lc. 8:26-39)

²⁸ Na' besežine' yešla'a nesdaon' gan' chi' laž bene' Gadara ca'. Na' cate' bechoj Jesúsen' lo' barcoa' bosošag chope bene' le', bene' zjajo'o zjanyaz da' xigüe' yichjlažda'ogaque'. Bene' quinga ba nite' capsantw na' gosacchgüe' bene' znia juisyw len bene' chesyěžague' na' gague no chac ta tnez. ²⁹ Na' bososye'e gose'e Jesúsen':

—¿Bixchen' chgoša' chlaže' chio' len neto', Jesús? Naco' dogualje Xi'in Dios. ¿Zao' gwsaco' neto' na'a cate' biña' žin ža si'to' castigw?

³⁰ Na' gala'ze chesaš zan coš chesagwba'. ³¹ Nach da' xigüe' ca' gosata'yoen Jesúsen' gose'en le':

—Še yebejo' neto' yichjlaždao' bene' quinga, gwseła' neto' gan' nita' coš ca' na' beñ latje šjajo'oto' yichjlažda'oban'.

³² Nach gož Jesúsen' legaquen:

—Le šjajo'o.

Nach besyechojen yichjlaždao' bene' ca' na' jaseyo'on yichjlaždao' coš ca'. Na' besyeyetjses coš ca' le'e ya'a gan' nita'ban', na' jasełažo'ba' lo' nesdaon' ga gosatba' gose'ejba' nis.

³³ Na' bene' ca' chosoyoe' cošen' besele'ede' dan' ba goquen na' bosyoxonje' jasyeyeže' bene' lagüe' yež yogo' can' ba goquen' na' can' ba besyeyac bene' ca' goso'o gosaz da' xigüen' yichjlažda'ogaquen'. ³⁴ Nach yogo' bene' ca' že' yeža' jasešague' Jesúsen' na' cate' besele'ede'ne' gosata'yoede' le' yeže'e lažgaquen'.

9

Jesúsen' beyone' to bene' bi chda šla'a ni'a ne'e

(Mr. 2:1-12; Lc. 5:17-26)

¹ Nach Jesúsen' beyo'e lo' barcon' len bene' ca' zjanaque' le' txen besyelaque' yešla'a nesdaon' par besyēžine' Capernaum gan' ba gwzoacze' sša. ² Na' besežin xonj bene' zjanlene' to bene' xinj bene' bi chda šla'a ni'a ne'e, zjanxoe' le' to lo cam dao'. Cate' gocbe'e Jesúsen' le gosejnilaže'ne' nach gože' bene' güe'na':

—Bebe xi'ina'. Ba bezi'xena' xtolon'.

³ Na' bal bene' ca' chososed chosolo'ede' dan' bzoj da' Moisésen' gosende' dan' gož Jesúsen' bene' güe'na' na' gosone' xbab lo' yichjlažda'ogaquen' gosene': "Benga chnie' diža' bya' che Dios chne' ca', le chon cuine' ca Dios." ⁴ Jesúsen' gocbe'ede' ca nac da' cheseza'laže', na' gože' legaque':

—¿Bixchen' chza'laže'le ca' lo' yichjlažda'olen'? ⁵ Še yapa'ne': "Ba bezi'xena' xtolo'na'," bi nezele še napa' yela' gwnabia' cont yezi'xena' xtolen'. San še yapa'ne': "Gwyas na' gwda", na' nacbja' še napa' yela' guac gac can' gwnian'. ⁶ Perw neda' naca' bene' gwseła' Dios golja' beñač gwlo'eda' le'e na'a zoa' yežlio nga napa' yela' gwnabia' cont yezi'xena' xtol'a beñačhen'.

Nach gože' bene' xinja':

—Beyas, beyoa' xcamon' na' beyej ližo'.

⁷ Na' beyas bena', beze'e zjayde' liže'. ⁸ Na' bene' ca' besele'ede' can' goquen' besežebchgüe'. Na' gosonxene' Diosen' dan' be'e yela' guac che Jesúsen'.

Jesúsen' gwleje' Mateo cont goque' txen len le'
(Mr. 2:13-17; Lc. 5:27-32)

⁹ Na' Jesúsen' gwdie' latje gan' chi' Mateo chchixjue' impuesto. Na' cate' ble'ede' le' na' gože'ne':
—Da len neda'.

Na' gwzoža' Mateon' gwyejlene' le'.

¹⁰ Ca' goquen' ba chi' Jesúsen' liž Mateon' ba che'ej chagüe' txen len zan bene' güechixjw na' len yebale bene' güen da' xinj na' len bene' ca' zjanaque' txen len le'. ¹¹ Na' bene' fariseo ca' cate' besele'ede' chi' Jesúsen' txen len bene' ca', gose'e bene' ca' zjanaque' le' txen:

—¿Nacxechen' ben' chsed chlo'ede' le'e che'ej chagwlene' txen bene' güechixjw na' yebale bene' güen da' xinj?

¹² Na' cate' Jesúsen' bende' xtiža'gaquen' na' gože' legaque':

—Bene' cbi chesacšene bitw cheseyažjde' bene' güen rmed. Bene' chesacšende', legaquen' cheseyažjde' bene' güen rmed. ¹³ Le šjased bi zeje Xtiža' Diosen' dan' nyojen žan: “Chaclaža' yeyaše' yeži'ilaže'le bene', gague con gotle beyixe' gonxenle neda'.” Gague bene' ba zjanaque' bene' güen len Diosen' zedeņeyoeda' cont yesyetinjde' xtołen', san bene' güen da' xinjen'.

Goseñabde' Jesúsen' bixchen' bene' ca' zjanaque' le' txen bi gosone' gwbas
(Mr. 2:18-22; Lc. 5:33-39)

¹⁴ Nach bene' ca' chesone' txen len Juan ben' bzoe' bene' nis gosebigue' lao Jesúsen' na' gose'ene':

—Neto' na' len bene' fariseo ca' chonchguato' gwbas, perw bene' ca' zjanaque' le' txen bi chesone' gwbas. ¿Bixchen'?

¹⁵ Nach gož Jesúsen' legaque':

—¿Guac yesezoa bene' yela' güine' bene' chesaxe' to ga chac yela' güešagna' šlac ben' bšagnan' zoalene' legaque'? Še zoa ben' bšagnan' bi gac yesegüine'de'. Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

¹⁶ Nono zoa bene' chchine' lache' cobe cont yoda' xe' da' de'exo', le lache' coben' yeben' cate' chiben' na' chezan' lache'exon', na' gan' nchezan' gacchen da' xen. ¹⁷ Na' lecze neca zoa bene' chgüe'e vino cobe lo' bzod yide'exo', le vino coben' chšon' yide'exon' na' lałje vino na' yesebiayi' chopen. San chesegüe'e vino coben' lo' yid cobe cont bitw cuiayi' vinon' len yiden'.

Jesúsen' beyone' xi'in Jairo na' beyone' yeto no'ole bene' gwdane' xe'
(Mr. 5:21-43; Lc. 8:40-56)

¹⁸ Na' ne' choe'te Jesúsen' dižan', bžin to bene' gwnabia' bzoa xibe' lao Jesúsen' na' gože'ne':

—Za' gotte to xi'ina' no'ole. Yo'ošca xoa taco' yichjbe' cont yebambe'.

¹⁹ Na' gwzoža' Jesúsen' na' gwche'e bene' ca' zjanaque' le' txen ja'aclene' bene' gwnabian'. ²⁰ Na' šlac zja'aque' liž bene' gwnabian' zej to no'ole nagüe' legaque', bene' ba goc šižinw iz chzoe' gwba'o', na' bene' byen gwbigüe' cože' Jesúsen' gwdane' lox xen'. ²¹ Le bene' xbab lo' yichjlažda'ogüen', gwne': “Con še ba gwdana' xen' nach yeyacda'.” ²² Na' gwyečhj Jesúsen' ble'ede' no'olen', gože'ne':

—Bendiplažo' xi'ina'. Ba beyacdo' dan' chejnilažo' neda'.

Na' la' beyactede'.

²³ Cate' bžin Jesúsen' liž beŋe' gwnabian' na' ble'ede' beŋe' zan zjaže' chesone' sšag chesebežchgüe' na' ba nita' beŋe' chosocuež bžejo par yosocuaše'be'. ²⁴ Na' gože' legaque':

—Le yechoj ngale. Bi' no'ole daon' biŋa' gatbe', san chtasben'.

Na' beŋe' ca' bosoxiže' gosonle' che'. ²⁵ Na' beyož bešaše' yogo'loł beŋe' ca', nach gwyo'o Jesúsen', beχue' taca' bi' no'ol guaten', na' beyasbe'. ²⁶ Na' ca' nac yela' guac dan' ben Jesúsen', gwxa' diža' chen yogo' yež dan' zjachi' do na'.

Jesúsen' beyone' chope beŋe' lchoł

²⁷ Cate' beza' Jesúsen' len beŋe' ca' zjanaque' le' txen, ja'aclen chope beŋe' lchoł legaque' na' gosene' zižje:

—Le' naco' xi'in diaža che da' rey David, beyaše'laže'sca neto'.

²⁸ Na' cate' Jesúsen' len beŋe' ca' zjanaque' le' txen besežine' yo'o gan' zjanite' na' besyeyo'e, na' lecze goso'o beŋe' lchoł ca'. Nach Jesúsen' gože' legaque':

—¿Chejle'le guac gona' cont yele'ele?

Nach gose'ene':

—Chejle'to' Xanto'.

²⁹ Nach Jesúsen' gwdane' yejlaogaquen', na' gože' legaque':

—Yele'ele, le chejnilaže'le neda'.

³⁰ Nach besyeyac yejlaogaquen' besyele'ede'. Na' Jesúsen' gože' legaque' bicze yeso'e diža' can' goc besyeyac yejlaogaquen'.

³¹ Na' besyeya'aque' na' gate'tez ja'aque' doxen distritw Galilean' goso'e diža' ca' nac dan' ben Jesúsen' len legaque'.

Jesúsen' beyone' to beŋe' bi goc nie'

³² Na' cate' besyeya'ac beŋe' ca', la' besežinte beŋe' yoble zjanči'e to beŋe' bi goc nie', na' yo'o yaz da' xigüen' yichjlažda'ogüen'. ³³ Jesúsen' bebeje' da' xigüen' na' la' benete bena'. Na' beŋe' zan besele'ede' can' goquen' besyebanchgüede', na' gosene':

—Chio' beŋe' Israel, da' nechon' za' ble'echo yela' guac dan' nac ca'.

³⁴ Perw na' beŋe' fariseo ca' gosene':

—Satanás dan' nac xan da' xigüe' ca' chaclenen le' cont chebeje' da' xigüen' jJayo'o zjanyaz yichjlaždao' beŋe'.

Jesúsen' cheyaše' cheži'ilaže'de' benachen'

³⁵ Na' Jesúsen' len beŋe' ca' zjanaque' le' txen ja'aque' to to yež na' to to ciuda da' zjachi' do na' bzejni'ide' bene' Israel lo' yodao' chegaque' ca', gwdixjue'ede' diža' güen can' nabia' Diosen' yichjlaždao' beŋe' yosozenag che'. Na' Jesúsen' beyone' beŋe' ca' chese'e bite'teze yižgüe' na' bite'teze da' chesac chegaque'. ³⁶ Na' ble'ede' ba besežag beŋe' zan na' beyaše' beži'ilaže'de' legaque', le goche'ede' chesačzejlaže' nac yesone' na' gague no zoa yesaclen legaque' len yogo' dan' chesežaglaogüe'. Nite' ca' nita' no xila' be nono de gwyoe legacba'. ³⁷ Nach gože' beŋe' ca' zjanaque' le' txen:

—Chyaže beŋe' zan yeseyixjue'ede' xtiža' Diosen', perw to chopga beŋe' nita' yeseyixjue'eden'. Na' beŋe' yosozenague' che Diosen' zjazaca'lebe' ca' to coseš xen da' chyažjen yedoben. ³⁸ Da'n'an' le nabe Xancho Diosen' seła'che' beŋe' yesaclene' chio' yotobcho coseš chen'.

10

Jesús'en gwleje' bene' šižinw ca' gosaque' txen len le'
(Mr. 3:13-19; Lc. 6:12-16)

¹ Jesús'en botobe' bene' šižinw ca' zjanaque' le' txen na' bnežjue' legaque' yela' gwnabia' cont besyebeje' da' xigüe' lo' yichjlaždao' bene', na' cont besyeyone' bene' bite'teze yižgüe' da' chese'ede' na' bite'teze da' chesac čhegaque'.

² Quinga zjale bene' šižinw ca': Simón ben' lecze le' Pedro ben' goque' bene' blaó, na' Andrés bene' biše' Pedroa', na' xi'in Zebedeon' Jacobo len Juan, ³ na' Felipe, na' Bartolomé, na' Tomás, na' Mateo ben' goc bene' güečixjw, na' Jacobo xi'in Alfeo, na' Lebeo ben' lecze le' Tadeo, ⁴ na' Simón ben' ben txen len partidw cananista, na' Judas Iscariote ben' bdie' Jesús'en lo' na' ben' besegue'ede' le'.

Jesús'en gwsele' bene' šižinw ca' jasedixjue'ede' xtiža' Diosen'
(Mr. 6:7-13; Lc. 9:1-6)

⁵ Na' Jesús'en gwsele' bene' šižinw ca' jasedixjue'ede' xtiža' Diosen', gože' legaque':

—Bitw šejle laž bene' cbi zjanaque' bene' Israel, na' neca šejle yež ca' zjachi' distritw Samaria. ⁶ Le šja'ac gan' že' bene' Israel bene' ba zjambiyi' dan' bitw na' yesombi'e Diosen'. ⁷ Le šja'ac le šjatixjue'ede' ba bžin ža Diosen' ben' zoa yaban' nabi'e yichjlaždao' bene' yosozenag čhe'. ⁸ Le yeyon bene' chesacšene, le yeyon bene' ca' chese'e yižgüe' dan' nzi' lepra, le yosban no bene' ba gosat, na' le yebej da' xigüe' ca' zjajo'o zjanyaz lo' yichjlaždao' bene'. Diosen' bibi bchixjue' le'e da' ba bene' le'e yela' guac čhen' cont gonle da' quinga, da'nan' le gaclen bene' na' bibi gwčhixjwlene'.

⁹ Bitw gua'le mechw de oro, de plata o de cobre šlac co'ole nez. ¹⁰ Na' neca gua'le bzod, o yeto xcamisle, neca gua'le yel, na' neca goxe'le xis da' gwčhiše'le. Ca' nac le'e chonle xšinan' zaca'le par gon' bene' da' ye'ej da' gagwle gan' seła' le'ena'.

¹¹ Na' gate'tez ciuda o yež ga žinle, le nab še zoa to bene' güen bene' yebede' gwlebe' le'e ližen'. Na' še gwlebe' le'e, na'teze soale. Cate'ch žin ža šejle ga yoble, cana'ch yeza'le. ¹² Na' cate' žinle liže'na', le gwguape' tiox, na' le nabaže' soa cueze' binlo len yichjlažda'ogüe'. ¹³ Na' še nita' bene' chesaclaže' yesezoa yesebeze' binlo len yichjlažda'ogaquen', na' gac can' gwnabaže'le par yesezoa yesebeze' binlo. Perw še nono zoa bene' chesaclaže' yesezoa yesebeze' binlo len yichjlažda'ogaque', bi gac dan' ba gwnabaže'len'. ¹⁴ Na' še zoa ga bi yosolebe' le'e neca yosozenague' čhele, cate' yeza'le na', le cuibe ni'alen' yo bište cont nachia' bi checa'ale čhegaque'. ¹⁵ Da' mal xen goson bene' ciuda Sodoma na' bene' ciuda Gomorra cani', perw da' li žia' le'e, cate' žin ža gac juisyw bene' ca' bi bosolebe' le'e ližen' yesa'le'chde' clel ca' bene' Sodomán' na' bene' Gomorran'.

Gac da' saca'zi'cho

¹⁶ Neda' seła' le'e šjatixjue'ele xtižan' len bene' ca' chesegue'ede' le'e. Zaca'leble ca' xila' dao' ben' chja'ac gan' že' beco'yo. Da'nan' cheya'la' gacle bene' yo'ochgua' xbab na' bene' xenlaže' len legaque'. ¹⁷ Le gwsaca' len bene' ca' chesegue'ede' le'e. Nita' bene' yesone' le'e lo' na' bene' gwnabia' ca' cont yesot yeseyine' le'e lo' yodao' čhegaquen'. ¹⁸ Nach lecze dan' chejnilaže'le neda' nita' bene' yeseče'əxoxje' le'e do' lao rey, do' lao nochle bene' gwnabia'. Na' can' güe'lenle' legaque' xtižan', lecze can' güe'lenle' xtižan' len bene' bi zjanaque' bene' Israel. ¹⁹ Perw cate' yesezene' le'e na' yeseče'e le'e lao bene'

ca', bi cuec yichjle nac yoži'ile xtiža'gaquen' o nacle nale. Lo hor na'teze Diosen' gwzejni'ide' le'e bin' cheyała' nale. ²⁰ Le gague le'eczen' nele, san Spiritw che Xacho Diosen' gonen ga nale bin' cheyała' nale.

²¹ 'Cana' bał benačh yesechje' yesone' bene' biše' golje' lo na' bene' yesote' legaque', na' nita' bene' yesone' xi'ingaque' lo na' bene' yesot' legacbe', na' nita' bene' yesone' xaxne'e lo na' bene' yesote' legaque'. ²² Yogo'ze bene' yesegue'ede' le'e dan' chejnilaže'le neda', perw note'tez le'e gwyo gwchejlaže'le cont bi cuejyichjle dan' chejnilaže'le neda' žinten gatle, nach šjayzoale len Diosen'. ²³ Še bene' že' to yež yosyolague' le'e, le yezateze na' yeyejle ga yoble. Bina' yeyož šjatixjue'ele xtižan' yogo' yež gan' že' bene' Israel ca' cate' yida' da' yoble, neda' naca' ben' gwseła' Diosen' golja' benačh.

²⁴ 'Ca nac cate' to bene' chsede' len to maestrw, bitw nacho naque' bene' blaoch ca maestroa'. Na' to mos bitw naque' blaoch ca xanen'. ²⁵ Con cheyała' čhazlaže' ben' chseda' še yežinlaže' gaque' ca maestrw che' na' cheyała' čhazlaže' mosen' še yežinlaže' gaque' ca xanen'. Neda' naca' Xanle, na' bene' chesegue'ede' neda' chesene' chona' txen len Beelzebú dan' nac xan yogo' da' xigüe', na' naquechxe yesene' che le'e nacle neda' txen.

Cheyała' žebcho castigw dan' gon Diosen' che bene' güen da' xinj
(Lc. 12:2-9)

²⁶ 'Bitw žeble bene' bite'teze da' yesonde' le'e, le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. ²⁷ Da' zan dan' chsed chlo'eda' le'e dan' bi chsed chlo'eda' yezica'chle bene'. Na' le'e le gwsed le gwlo'en yogo'lol' bene', na' le gon cont bene' zan yesejni'iden'. ²⁸ Bitw cheyała' žeble bene' ca' yesot le'e. Legaque' bitw gac bi yesonde' yichjlažda'olen'. Cheyała' žeble Diosen', le len' nape' yela' gwnabia' cont gwžiyae'e cuerp chelen' len yichjlažda'olen' lo yi' gabilen'.

²⁹ 'Nezecho byine dao' ca' bitw bi zjazaca'tecba', perw bitw nacho toba' gat sin cbi güe' Xacho Diosen' bitw'. ³⁰ Na' ca nac chio', chaquechgüe Diosen' chio' na' neztede' bał yiša' yichj to tocho žia. ³¹ Da'nana', bitw žeble, le zaca'chle clcl ca zan byin dao' ca'.

Cheyała' güe'cho diža' len bene' ye'cho legaque' nombia'czcho Jesucriston'
(Lc. 12:8-9)

³² 'Na' note'teze bene' še cho'e diža' len benačhen' che'ene' chejle'e chia', lecce ca' neda' gua' diža' len Xa' ben' zoa yaban' yapa'ne' bena' naque' neda' txen. ³³ Na' note'teze bene' še cho'e diža' len benačhen' che'ene' bitw chejle'e chia', lecce ca' neda' gua' diža' len Xa' ben' zoa yaban' yapa'ne' bena' bi naque' neda' txen.

Yesedile bene' neche dan' bid Jesúsén'
(Lc. 12:51-53; 14:26-27)

³⁴ 'Bitw gonle xbab bene' že' yežlio nga yesezoa yesebeze' binlo len lježgaque' na'a ba bida'. Bitw yesezoa yesebeze' binlo san yesedile'. ³⁵ Lagüe dan' ba bida' yesedil' bene' byo len xe' na' no'olen' len xne'e, na' yesedil' xo'oliž no'ole len le'. ³⁶ Bene' lo' yo'oze yesegue'e lježe'.

³⁷ 'Note'tez bene' še chaquechde' xe' o xne'e clcl ca chacde' neda', bitw zaque' gone' txen len neda'. Lecce ca' še chaquechde' xi'ine' clcl ca neda' bitw zaque' gone' txen len neda'. ³⁸ Na' note'teze' še bi chzenague' chia' lagüe' dan' chacde' yosochi yososaca' bene' le', bitw zaque' cont gaque' neda' txen še ca'. ³⁹ Note'teze bene' chacde' gone' cont bi či saque' o cont nono yesot le', benan'

cuiayi'. Na' note'teze bene' chzanlaže' cuine' saca'zi'e o gate' ne chia' neda, ba de yela' mban che' toli tocane.

Bene' ca' yesenita' mbalaz cate' yesyežine' yaba
(Mr. 9:41)

⁴⁰ 'Note'teze bene' chosolebe' le'e chosolebe' neda', lecze chosolebe' Dios ben' gwsele' neda'. ⁴¹ Na' note'teze bene' yebede' gwlebe' bene' cheso'e xtiža' Diosen', mbalaz soe' cate' yežine' yaban' lecze ca mbalaz soa ben' cheso'e xtiža' Diosen'. Na' mbalaz gac che bene' ca' cheson can' chazlaže' Diosen' caten' yesyežine' yaban'. Na' note'teze bene' yebede' gwlebe' legaque' da' chesone' can' chazlaže' Diosen', lecze mbalaz soe' caten' yežine' yaban'. ⁴² Note'teze bene' gwnežjue' la' to xiga'ze nis ye'ej bene' chejniłaže' neda', la' gwnežjuen' bene' bi naque' bene' blao, da' licze gona' cont soe' mbalaz caten' yežine' yaban'.

11

Juanna' gwsele' chope bene' zjanaque' txen len le' gan' zoa Jesúsen'
(Lc. 7:18-35)

¹ Cate' beyož ben Jesúsen' mandadw can' yeson bene' šižinw ca' gwleje' cont gosaque' le' txen, beze'e latjen'. Na' gwyeje' yež ca' zjachi' do na' jased jal'ede' xtiža' Diosen' len bene' ca' že'na'.

² Juanna' ben' bzoe' bene' nis, cana' ba die' ližya. Na' bende' diža' che yog' dan' chon Criston' ben' gwsele' Diosen' cont yedenabi'e. Nach Juanna' gwsele' chope bene' zjanaque' txen len le' gan' zoa Jesúsen', ³ jaseže'ne':

—¿Len' naco' ben' chbezto' seła' Diosen', še cheyala' cuezchto' yid bene' yoble'?

⁴ Nach Jesúsen' gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele.

⁵ Ba ble'ele chona' cont chesyele'e no bene' lchol, na' chesyeda no bene' zjanxinj ni'e. Na' lecze bene' gose'e yižgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen chia' len bene' yaše' ca'. ⁶ Mbalaz zoa bene' chejle'e chia' na' bi chdebde'.

⁷ Na' cate' besyeya'ac bene' ca' zjanaque' txen len Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿Chaque' quil ca'ale? Bi naque' ca'.

⁸ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' zjanyaz lache' šagüe' nite' yo'o güenchgua ca no liž bene' gwnabia'. ⁹ ¿Noxen' jale'ele? ¿to ben' choe' xtiža' Diosen'? Da' li cho'e xtiža' Dios, perw žia' le'e, zaca'che' ca note'teze bene' choe' xtiža' Diosen'. ¹⁰ Che benga nyojen le'e Xtiža' Diosen', žan:

Neda' Dios seła' to bene' cuialagüe' laguo' güe'e xtižon'
cont cate' šejo' ba zjanita' bene' yosozenague' chio'.

¹¹ Da' li žia' le'e notoch no beňach na' soa bene' naquech bene' blao ca Juanna' ben' bzoe' bene' nis. Perw na' note'tez bene' chzenague' che Diosen' cont nabia' Diosen' yichjlažda'ogüen', la'czla' naque' bene' la'zelagüe' bene' bibi zaca', ba chejni'ichde' chia' clel ca Juanna'.

¹² 'Gwzolaon caten' Juanna' gwduxjue'ede' xtiža' Diosen' na' bzoe' bene' nis na' chžinten na'a, bene' zan chesone' ga zelao chesezaquede' cont nabia' Diosen' yichjlažda'ogaque'. ¹³ Na' lecz gwzolaon cani'te bžinten cate' bla'

Juanna' gwɔɔɔɔɔɔ'ede' xtiža' Diosen', ley dan' bzoj da' Moisés na' dan' bosozoj yezica'chle bene' goso'e xtiža' Diosen' bzejni'in chio' che yela' gwnabia' che Diosen'. ¹⁴ Na' Xtiža' Diosen' dan' nyojen žan yid yeto bene' yedeyene' can' ben Elias ben' be' xtiža' Diosen' cani'. Che Juanna' žan ca', con še šejle'le. ¹⁵ Le'e žia nagle da' chene, le gwzenag xtiža'na'.

¹⁶ ¿No gwsaca'lebda' le'e zoale na'a? Gwsaca'lebda' le'e ca bidao' dan' bicze bi chlebe. Nacle ca bidaon' nita' gan' chac ya'a chese' lježbe'. ¹⁷ "Ba bcuežto' bžejo, neca bya'ale, na' ba biljaše'to', neca gwchežle." ¹⁸ Juan ben' bzo'e' bene' nis bide' laole nga, bitw gü'e'ej gwɔɔɔɔɔɔ'güe' can' chese'ej chesagw bene' yoble, nach gwnale che': "Yo'o yaz da' xigüen' yichjlažda'ogüe'." ¹⁹ Na' neda', Diosen' gwsele' neda' golja' benačh, na' chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw. Na' lecze žale chia' naca' xmigw bene' güechixjw ca' na' xmigw yezica'chle bene' güen da' xinj. Perw nacbia' yela' sina' che Diosen' dan' napt'o' naquen da' güen, le ba ble'eczele can' chon neto' napt'on'.

Yež ca' gan' bitw bosozenague' che Jesúsen'
(Lc. 10:13-15)

²⁰ Nach Jesúsen' be'e xtiža' bene' ca' že' yež ca' gan' bene' da' zan da' zaca' yesyebande', na' gwɔɔɔɔ' legaque' dan' bitw besyetingde' xtoła'gaquen'. Nach gwne':

²¹ —jNyaše'chguaze gac che le'e bene' Corazín! jNyaše'chguaze gac che le'e bene' Betsaida! Bene' ca' nita' Tiro na' Sidón ba besyetingde' xtoła'gaque' šaca' blo'egacda'ne' yela' guac chia' ca dan' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesache'e bene' ba boša' yichjlažda'ogaquen'. ²² Žia' le'e, saca'zi'chle clcl ca bene' že' Tiro na' Sidón cate' žin ža gac juisyw. ²³ Na' le'e nita'le Capernaum chonle xbab šeca Diosen' gone' gacxenchgualc cate' yežinle yaba gan' zoe'na'. Bi gone' ca', san sele' le'e lo yi' gabil. Šeca' bena' da' zaca' yesyebane bene' ca' gwnita' Sodoman' can' ba bena' laole nga, zesyetingde' xtoła'gaquen', na' ne' chi' ciudadan' šeca'. ²⁴ Žia' le'e, gałe'chle clcl ca bene' Sodoman' cate' žin ža gac juisyw.

Bene' ca' yesejnilaže' Jesúsen' nite' mbalaz
(Lc. 10:21-22)

²⁵ Nach Jesúsen' bol güiže' Diosen', gwne':

—Xa', le' naco' Xan yežlio nga na' Xan yaba, chnabi'o doxen. Na' chona' yela' choxcen chio' ba bzejni'ido' bal bene' diža' güen chio' quinga. Bzejni'ido' bene' ca' gosache'e cheseyažjde' no gwsed gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. ²⁶ Beno' ca' Xa', le' can' gwnalažo'.

²⁷ Na' gože' bene' ca' že'na':

—Xan' ba bene' lo na' gona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' noch no zjanita' bene' zjanombi'e Xan', ne neda' ca' zjanombi'e. ²⁸ Le'e chjxaque'laže'le na' chacyaše'laže'le da' chaquele nac gonle cont soale binlo len Diosen', chata'yoeda' le'e, le šejnilaže' neda'. Neda' gona' ga soale mbalaz. ²⁹ Le gwzenag chia' na' gwzejni'ichda' le'e. Neda' naca' bene' xenlaže' na' bene' šagüe' na' gona' ca' soale mbalaz lo' yichjlažda'olen'. ³⁰ Dan' žia' cheyala' gonle bitw naquen zed, na' can' chsed chlo'eda' bitw naquen zdebe.

12

Ža che Dios bene' ca' zjanaque' Jesúsen' txen goselechje' trignon' da' gosagüe' (Mr. 2:23-28; Lc. 6:1-5)

1 Ca tiempen' gozac to ža che Diosa' cate' Jesúsen' gwddie' len bene' ca' zjanaque' le' txen gan' nyaž trigw. Nach bene' ca' gosedone', na' goselechje' dao che trignon' cont gosagüe' xsenna'. 2 Na' besele'e bene' fariseon' can' gosone', na' gosi'e Jesúsen':

—Gwñašc žbixchen' bene' ca' zjanaque' le' txen chesone' žin da' bi de lsens goncho ža che Dios?

3 Na' Jesúsen' gože' legaque':

—žBina' gwlable can' ben da' rey Davin' to ža cate' le' na' bene' lježe' ca' gosedone'? 4 Gwyo'o Davin' ga nac liž Dios na' gwdagüe' yetextil da' nac che Dios da' bi chac gagw bene' bi nac bꝑoz, na' lecze bnežjue' che bene' zja'ac len le'. 5 Na' žbina' gwlable le'e ley dan' bzoj da' Moisés gan' žan bꝑoz ca' chesoncze' mandadw che yodao' blaon' yogo' ža che Diosen'? Na' bitw nacho zjanape' dola' dan' chesone' žin ža che Diosen'. 6 Žia' le'e, neda' zoa' nga zaca'cha' clel ca yodao' blaon'. 7 Xtiža' Diosen' dan' nyojen žan: “Chaclaža' yeyaše' yeži'ilaže' le bene', gague con gotle beyixe' par gonxenle neda'.” Šaca' chejni'ile bi zejenna' žan ca', bilja nale bene' quinga zjanape' dola', le bibi da' mal chesone'. 8 Žia' le'e, naquen' lo na' nia' bi da' nac güen goncho cate' nac ža che Diosen', neda' naca' ben' gwseła' Diosen' golja' beñach.

Bayac to bene' nxo'on šla'a taque'

(Mr. 3:1-6; Lc. 6:6-11)

9 Na' cate' Jesúsen' beze'e latjen', na' gwyo'e to lo' yodao' che chio' bene' Israel. 10 Na' lo' yodaon' zoa to bene' nxo'on šla'a taque', nach bene' fariseo ca' gose'e Jesúsen':

—žDe lsens yeyoncho bene' xinj ža che Diosen'?

Gose'ene' ca' cont de da' yosode'ede' yesagüe' xya.

11 Nach Jesúsen' gože' legaque':

—Še nita' xila' dao' chele na' lažo' toba' to lo' yechw zitjw ža che Diosen' cate' bi de lsens goncho žin, žcbi la' yebejteleba' lo' yechon' lo žana'? 12 Da'na'na' žia' le'e de lsens gaclencho bene' ža che Diosen'. Le zaca'ch to bene' clel ca to xila' dao'.

13 Nach Jesúsen' gože' ben' nxo'on taque'na':

—Bli naon'.

Na' blien' na' taquen' beyaquen binlo can' nac dan' yešla'a. 14 Nach bene' fariseo ca' besyežaše' yodaon' na' bosoxi'e nacle yesone' yesote' Jesúsen'.

To dan' bzoj da' Isaías che Jesúsen'

15 Goche'e Jesúsen' can' bosoxi'a bene' fariseo ca' na' gwze'e gwyeye' ga yoble. Bene' zan ja'aclene' le', nach beyone' yogo' bene' ca' chesacšene. 16 Na' bene' mandadw nono yesoe'lene' diža' non' beyon legaque'. 17 Bene' ca' cont goc can' ža Xtiža' Diosen' dan' bzoj da' Isaíasen', žan:

18 Bengan' naque' xmosa', ben' gwleja' cont gone' can' chazlaža'.

Chacchgüeda' le', na' chbeda' che'.

Na' neda' seła' Spiritw chian' soateze soan len le'.

Na' chixjue'ede' yogo'lol bene' can' chazlaža' yesone'.

19 Bitw gacyože' len bene', neca yosye'e,

na' neca nie' žižjo lo nez cont yesene bene' bin' že'.

20 Bi gwzoe' ca'ale bene' chesejnlaže' le' late' lasze.

Soe' gaclene' legaque'.

Nach žin ža gone' cont gac con da' zej to licha lo yežlion'.

21 Na' bene' že' yogo' naciõnna' yesebeze' gaclene' legaque'.

Gosene' Jesúsen' bebeje' da' xigüe' len yela' guac che Beelzebú

(Mr. 3:19-30; Lc. 11:14-23; 12:10)

22 Na' zoa to bene' lchol' na' neca goc nie', na' yo'o nyaz da' xigüe' yichjlažda'ogüe' na' jasesane'ne' lao Jesúsen'. Na' Jesúsen' bebeje' da' xigüen' yo'o nyaz yichjlaždao' ben' na' la' bele'etede' na' gocte bene'. 23 Na' yogo' bene' ca' besele'ede' can' goca' besyebanchgüede'. Nach gose'e lježe':

—¿Nac benga ben' chbezcho yide' lao diaža che da' rey David?

24 Perw cate' bene' fariseo ca' gosende' diža' quinga gosene':

—Bitwbi yela' guac nap benga. Le Beelzebú dan' nac xan da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

25 Gocbe'e Jesúsen' can' goson bene' fariseo ca' xbaden', nach gože' legaque':

—Note'teze gobiern še choje' chop šon cuen na' yeyoža' yesedile' legacze', cuiayi' gobierna'. Na' lecze še bene' že' bite'teze yež yesaque' chople na' yesedile' legacze', lecze bi sibia' yež chegaquen' še ca'. Na' še bene' lo' bite'teze yo'o yesechoje' chople na' yesedile' legacze', gague sša yesenite' txen. 26 Lecze ca' še Satanásen' yebejen yeto da' xigüe' yo'o nyaz yichjlaždao' bene', cuiayi' yela' chnabia' chen, le chdillen cuinen še ca'. 27 Le'e žale Beelzebún' chaclenen neda' cont chebeja' da' xigüe' ca'. Šaca' naquen can' žalen', lecze zejen Beelzebú dan' chnabia' da' xigüen' chaclenen bene' lježle chesyebeye' da' xigüe' zjajo'o zjanyaz yichjlaždao' bene'. Na' bene' lježe' ca'ze chosolo'e clen' chnele. 28 Spiritw che Diosen' chonen neda' yela' guac cont chebeja' da' xigüe' ca', na' da' chona' ca' chlo'en ba bžin ža nabia' Diosen' yichjlaždao' bene' yosozenag che'.

29 ¿Nac gac šo' bene' gwban liž to bene' gual na' que'e bi da' de che' še bi zgua'tec gwcheje' bene' guala'? Lete gone' ca' nach gac que'e bi da' de che'.

30 Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

31 Da'nan' žia' le'e, yogo' da' xinj da' chon beňach, na' yogo' diža' bya' dan' chesene' che Diosen', Diosen' yezi'xene' chen, perw note'teze bene' chne' yela' ya' che Spiritw che Diosen', gwbat yezi'xen Diosen' che'. 32 Na' note'teze bene' še ne' yela' ya' chia' neda' naca' ben' gwsela' Diosen' golja' beňach, Diosen' yezi'xene' che', perw note'teze bene' še ne' yela' ya' che Spiritw che Diosen', gwbat yezi'xen Diosen' che' na'a na' bate'teze.

Diža' da' güe'cho chlo'en bin' yo'o lo' yichjlažda'ochon'

(Lc. 6:43-45)

33 Ca' nac yag frut ca', yag dan' nac yag güen, frut güencze chbian, na' yag da' bi nac yag güen, lecze frut da' bi nac güen chbian. Con can' nac da' chbia to to yaguen' nezecho bi yaga'. 34 Na' ca'czen' nac len le'e nacchgual bene' zgot na' bene' gwxiye'. Bitw gac güe'le diža' šagüe' dan' nacle bene' laždao' xi'a. Le yogo'te diža' da' chchoj cho'achon', lo' yichjlažda'ochon' nan' za'aquen. 35 To bene' laždao' xilaže' cho'e diža' šagüe', le can' nac lo' yichjlažda'ogüe' nan' cho'e dižan'. Na' to bene' laždao' xi'a cho'e diža' xi'a, le can' ža lo' yichjlažda'ogüen'.

36 Na' žia' le'e, cate' žin ža gon Diosen' yesežaglao yogo' bene' cheson da' xinj toli tocaňe, cana' yogo'lo' bene' yosodie' cuent che yogo' diža' dan' ba goso'e

da' bitwbi zjazacan'. ³⁷ Na' con ca diža' dan' choe'le, Diosen' choglagüen' chele še naple doła' o še bi naple doła'.

Bene' bi bosozenag che Diosen' gosenabe' gon Jesúsen' to yela' guac
(Mr. 8:12; Lc. 11:29-32)

³⁸ Nach bał bene' ca' chososed chosolo'e dan' bzoj da' Moisés, na' bene' fariseo ca' gose' Je' Jesúsen':

—Maestrw, chaclaže'to' gono' to yela' guac da' le'eto' cont nezetoto' še da' licze Diosa' gwsele' le'.

³⁹ Nach Jesúsen' gože' legaque':

—Le'e zoale na'a nacchuale bene' laždao' xi'a na' ba gwlejiychjle Diosen'. Na' chnabe gona' yeto yela' guac da' le'ele cont nezele še Diosa' gwsele' neda', perw bi gona' can' chnablana', le ba ble'ele da' ca' chona'. Dan' gon Diosen' len neda' cont nezele le'na' gwsele' neda' naquen ca da' bene' len da' Jonás ben' be' xtižen' cani'. ⁴⁰ Cate' za' šej Jonásen' Nínive, Diosen' bene' cont to bel xen be yo'o lo' nesdaon' gwdebba' le' na' šone ža šone yel gwyo'e lo' le'eban'. Na' ca nac neda', gata' na' gaša', na' yeyoža' šo'a lo' ba šone ža šone yel. ⁴¹ Na' cate' žin ža gon Diosen' cont yogo' bene' cheson da' mal yesežaglagüe' toli tocañe, žana' bene' Nínive bene' ba gosat yedesecuiše' le'e mbanle na'a lao Diosen', le legaque' besyētinjde' xtołen' cate' da' Jonásen' gwđixjue'ede' xtiža' Diosen' len legaque'. Na' neda' zoa' nga naccha' bene' blao clal ca da' Jonásen', na' bitw chzenagle chia'. ⁴² Na' ľecze žana' cate' gon Diosen' cont yogo' bene' cheson da' mal yesežaglaogüe' toli tocañe, da' no'olen' gwnabia' bene' Seba ca' yedecuiše' le'e mbanle na'a. Le le'na' gwze'e Seba gan' nac zito'chgua na' bide' nga cont bzenague' diža' sina' dan' be' da' rey Salomón. Na' neda' zoa' nga naccha' bene' blao clal ca da' rey Solomónna', na' bitw chzenagle chia'.

Da' xigüen' cheyo'on da' yoble lo' yichjlaždao' bene'
(Lc. 11:24-26)

⁴³ Na' še to da' xigüe' da' yo'o nyaz lo' yichjlaždao' bene' yechojen, nach lažen nile nale yeyiljon ga soan mbalaz. Na' še bibi latje želen, nach nan: ⁴⁴ "Da' yoble šjayo'a lo' yichjlaždao' ben' gan' ba gwyo'a." Nach yeyejen da' yoble gan' zoa ben'. Cate' le'en bačh beyacde', na' ba zoache' binlo, na' gague no yo'o nyazech yichjlažda'ogüe' da' gwžon yeyo'on da' yoble, ⁴⁵ nach šjaytoben yegaže da' xigüe' da' zjanaquech mal ca len, na' txen yeso'on lo' yichjlažda'ogüen'. Na' še ba gosonen ca', na' gaquech mal che bena' clal ca goc che' cana'. Can' goc che bena', ľecze ca' gac che le'e mbanle na'a dan' nactecle bene' laždao' mal.

Xna' Jesúsen' len bene' biše' ca' besežine' ga zoe'
(Mr. 3:31-35; Lc. 8:19-21)

⁴⁶ Ne' choe'te Jesúsen' diža' len bene' quinga, cate' bžin xne'e len biše' ca'. Gosaclaže' yeso'e yeso'e'lene' le' diža' na' bene' zan nita' lagüe' na'ate. ⁴⁷ Bene' ca' že' na', toe' gože' Jesúsen':

—Xna'o len bene' bišo' ca' zjanite' chy'o'o na' chesaclaže' yeso'e'lene' le' diža'.

⁴⁸ Nach Jesúsen' gože' le':

—Že'nezele no nac xna'a na' no zjanac biše' ľježa'?

⁴⁹ Nach bli ne'e blo'e bene' ca' zjanaque' le' txen na' gože' bena':

—Bene' quinga zjanaque' xna'a na' zjanaque' biše' ľježa'. ⁵⁰ Le note'teze bene' chone' da' chnalaže' Xa' Diosen' ben' zoa yaban', bena' nac bene' biša', bene' zana', ľecze naque' xna'a.

13

Jempl che bene' goz trigon'
(Mr. 4:1-9; Lc. 8:4-8)

¹ Na' lo žana' gwzwa' Jesúsen' yo'o gan' zoen' jachi'e cho'a nisdaon'. ² Nach catec bene' zan juisyw besedobe' gan' chi'en' na' berten byen gwyo'e gwchi'e to lo' barcw. Na' yogo' bene' ca' besedoben' gosenite' cho'a nisdaon' ga nac yo biž. ³ Nach da' zan da' bsed blo'e Jesúsen' legaque' len jempl da' bi'e. Na' be'e to jempl, gwne':

—To bene' güen žin jeze' trigw, ⁴ na' šlac zej chose' trigon' late' biñ che trigw dan' chazen' jasechazen chanez, nach be ca' žia xil be chaš le'e yaba gosagwban'. ⁵ Yelaten' jasechazen ga nac lo yej ga bibi yotec zoa, na' da' nga byob blan' le bi jasechazen ga nac sitjw. ⁶ Perw na' cate' bla' gwbiža' na' bzejen len na' gosebižen, le gague zjajo'otec loenna' sitjw. ⁷ Yelaten' jasechazen ga nac lo yag yeše', na' yag yešen' gosecha'on na' bosololen len. ⁸ Perw na' yelaten' jasechazen ga nac yo šagüe' na' beselan'. Na' balen' gosebian to gayoa güeje to ton, na' yebalen' gosebian gayon güeje, na' yebalen' šichoa güeje. ⁹ Le'e žia nagle da' chene, le gwzenag xtižan'.

Jesúsen' be'e diža' bixchen' bzejni'ide' bene' jempl
(Mr. 4:10-12; Lc. 8:9-10)

¹⁰ Nach bene' ca' zjanaque' Jesúsen' txen gosebigue' lagüen', na' gose'ene':
—¿Bixchen' chsed chlo'edo' bene' quinga len jempl?

¹¹ Na' gož Jesúsen' legaque':

—Nono na' neze can' nac yela' gwnabia' che Diosen', na' ba chone' cont le'e chejnilaže'lene' nezenen. Perw bi chon Diosen' ca' len bene' bi chesacłaže' yesejnilaže'ne'. ¹² Note'teze bene' chosozenague' xtiža' Diosen', gwzejni'ich Diosen' legaque' cont šanch dan' yesejni'ide'. Perw na' note'teze bene' bi chosozenague', da' daon' ba zjanezde', yeca'a Diosen' len. ¹³ Da'n'an' chsed chlo'eda' bene' quinga len jemplen', le chesele'ede' dan' chona' perw bitw chesache'ede' bi zejen, na' chesende' xtižan' perw bitw chesejni'iden'. ¹⁴ Len bene' quinga ba chac can' bzoj da' Isaías, žan:

Da' li yenele, perw bitw šejni'ile bi zeje dan' yenelen'.

Na' da' li le'ele, perw bi gache'ele bi zejen dan' le'elen'.

¹⁵ Nacle bene' güedenag na' bač natcze yičhjlazda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtola'le cont yeca'an na' yocoba' yičhjlazda'olen'.

¹⁶ Perw le'e nacle neda' txen, leca mbalaz zoale dan' chle'ele da' ca' chona' na' chache'ele bi zejen, na' chzenagle xtižan' na' chejni'ilen. ¹⁷ Da' li žia' le'e, zan da' bene' ca' gosoe' xtiža' Diosen' cani' na' zan da' bene' ca' yezica'chle bene' bosozenag che Diosen' cani', gosaclaže'chgüe' yesele'ede' dan' chle'ele na'a, perw bitw gola' yesele'eden'. Na' gosaclaže'chgüe' yesende' dan' chenele na'a, perw bitw gola' yesenden'.

Jesúsen' bzejni'ide' bi zejen jempl che ben' goz trigon'
(Mr. 4:13-20; Lc. 8:11-15)

¹⁸ Na' le gwzenag, quinga zejen jempl che ben' goz trigon'. ¹⁹ Ca dan' byažen zejen xtiža' Dios da' chzejni'i che yela' gwnabia' che'. Na' biñ dan' beselažo' chanezen', zejen bene' ca' chesende' xtiža' Diosen' perw bi chesejni'iden'. Na' ca cheyoža' chžin gwxiyen' chebejen xtiža' Diosen'

lo' yichjlažda'ogaquen'. ²⁰ Na' biñ dan' beselažo' ga nac lo' yej na' bi ben loen, zjanaquen ca bene' la' chesyebetede' xtiža' Diosen' cate' chesenden', ²¹ perw zjanaque' ca da' bibi loe chontec, šložga chesejle'e che xtiža' Diosen', na' cate' chac bi da' mal čegaquen' o cate' chesegue'e bene' legaque' dan' chosozenague' xtiža' Diosen', la' chesebejyichjte' xtižen'. ²² Na' biñ dan' beselažo' ga nac lo' yag yeše', zejen ca bene' ca' ba zjanende' xtiža' Diosen', perw šlac zjambane' chesyelal chesyžejde' na' da' chesaclačže' yesen'i'e chziye'en legaque'. Yogo' da' qui bi choen' latje yega'an xtiža' Diosen' lo' yichjlažda'ogüen', na' da'nan' bi chesejnilaže' le' ca cheyała'. ²³ Na' biñ dan' beselažo' lo' yo šagüe' zejen ca bene' chesende' xtiža' Diosen' na' chesejni'iden' na' chosozenaguen'. Bałen gosebjan to gayoa güeje, na' yebałen gosebjan gayon güeje, na' yebałen šichoa güeje.

Jempl che trigon' na' yiže'

²⁴ Na' gozoe'len Jesúsen' bene' ca' yeto jempl, goze'e legaque':

—Yela' gwnabia' che Diosen' ben' zoa yaban' zaca'leben ca dan' goquen' cate' to bene' jeze' trigw lo' yežlio che'na'. ²⁵ Na' do šeže'le gwyej to bene' chgue'e le' šlac chesetas bene' ca' yezica'chle na' jeze' xsa yiže' gan' ba naz xan yežlion' trigon', nach beze'e. ²⁶ Na' to ši'ize trigon' len yiže' ca' beselan', na' trigon' gwzola' chbian. ²⁷ Na' bene' güen žin che xan yežlion', cate' gosache'ede' nach jaya'aque' gan' zoa xangaque' jasyeyeže'ne': "Bene', žgague biñ trigon' goz yežlio chion'? žBixchen' nchixen len yiže'?" ²⁸ Nach xangaquen' gože' legaque': "To bene' chgue'e neda' jen ca'." Nach xmosen' gose'ene': "žChe'ndo' lažo'to' yižen'?" ²⁹ Na' gože' legaque': "Bitw lažo'len. Le xož lažo'le lente trigon'. ³⁰ Jaseyenna'. Guac yesecha'on t xen. Na' cate' ba gole' yotoble cosešen', cana' gona' mandadw zgua'tec lažo'le yižen' na' gonlen manoj cont yeseyen. Nach šjaytoble trigon' co'ošagüe'len."

Yela' gwnabia' che Diosen' naquen ca biñ che xomdas

(Mr. 4:30-32; Lc. 13:18-19)

³¹ Nach gozo'e yeto jempl, gozne':

—Šanch bene' yosozenag che Diosen' cont nabi'e yichjlažda'ogaque'. Da'nan' yela' gwnabia' che Diosen' ben' zoa yaban' zaca'leben ca to biñ che xomdas dan' goz to bene' yežlio čen'. ³² Biñ che xomdasen' chnabia' nac da' dao' len biñ ca' chazcho. Perw na' cate' chlañ' chcha'ochen ca bichle yiže' cuan na' chaquen ca to yag cha'o, nach byin dao' ca' chjasen ližda'ogacba' lo' xozenna'.

Yela' gwnabia' che Diosen' naquen ca levadura

(Lc. 13:20-21)

³³ Nach gozoe' Jesúsen' yeto jempl, gozne':

—Yela' gwnabia' che Diosen' ben' zoa yaban' zaca'leben ca levadura dan' gwlec no'olen' len to rob yezj cont gwcha'o doxenen.

Jesúsen' bzejni'ide' bene' len jempl

(Mr. 4:33-34)

³⁴ Yogo' da' quinga bsd blo'e Jesúsen' bene' ca' besežag gan' zoe'na'. Bsd blo'ede' legaque' be'e jempl, bitwbi bzejni'ide' legaque' sin ca be'e jempl. ³⁵ Bene' ca' cont goc can' bzoj da' bene' be' xtiža' Diosen' cani', žan: Gwsed gwlo'egacda'ne' len jempl, na' yapegaca'ne' dan' nono na' neze da' ba ngaše' cate' gwxete yežlion'.

Jesúsen' bzejni'ide' bi zeje jempl che trigon' na' yiže'

³⁶ Nach beyoż bsed blo'e Jesúsen' bene' ca' zjaže' na', beze'e txen len bene' ca' zjanaque' le' txen jaya'aque' yo'o gan' nite'na'. Na' cate' ba besyeyo'e lo' yo'on' bene' ca' zjanaque' le' txen gosebigue' cuite'na' gose'ene':

—Bzejni'išque neto' bi zejen jempl che trigon' na' yixen'.

³⁷ Nach Jesúsen' gože' legaque':

—Quinga zejen: Diosen' gwsele' neda' golja' benačh na' zaca'lebda' ca ben' goze' biñ che trigon'. ³⁸ Na' doxen yežlio nga zaca'leben ca pedas yežlio gan' goze' trigon'. Na' bene' ca' chosozenague' che Diosen' cont nabi'e yichjlažda'ogaque' zaca'lebde' ca biñ che trigon'. Na' bene' ca' chosozenague' che Satanás dan' chnabia' da' xigüe' ca' zjazaca'lebde' ca xsa yixen'. ³⁹ Satanásen' zaca'leben ca bene' chxi'a ben' goze' xsa yixen'. Na' žan' gac juisyw zaca'leben ca žan' yosyotobe' trigon'. Na' angl ca' zaca'lebegaque' ca bene' ca' yosyotobe' cosešen'. ⁴⁰ Na' can' šey yixen' yosyotoben', can' gac che bene' ca' chosozenag che Satanásen' cate' žin ža gac juisyon'. ⁴¹ Diosen' gwsele' neda' golja' benačh na' cate' žin ža, neda' sela' angl chia' ca' cont yosyotobe' yogo' bene' ca' chesežo'oyele' bene' yoble yesone' da' mal na' lecze yosyotobe' yezica'chle bene' cheson da' mal. Na' angl ca' yesyebeje' legaque' cont bich yesenite' txen len bene' ca' chosozenague' che Diosen' cont nabi'e yichjlažda'ogaquen'. ⁴² Nach yesyesele' legaque' lo' yi' gabił gan' yeseye' toli tocanē. Na' yesebežyaše' yesagwxetje laye' tantw yesežaglaochgüe'. ⁴³ Cana'ch Xacho Diosen' gone' cont bene' ca' cheson da' güen nite' len le', le zjanaque' xi'ine' na' yesaque' ca be'ni' che gwbižen' cate' yesežine' yaban' gan' zoa Diosen' chnabi'e. Le'e žia nagle da' chene, le gwzenag xtiža'na'.

Jempl che mechw xen dan' ngaše' lo' yo

⁴⁴ Yela' gwnabia' che Diosen' ben' zoa yaban' naquen ca to mechw xen dan' ngaše' lo' yo. To bene' bželde' mechw xen da' ngaše' to lo' yežlio. Nach bocuašen' da' yoble lecze na'ze na' chebechgüede' beze'e jayete' yogo'lol bi da' de che' cont gwxi'e yežlion' gan' ngaše' mechua'.

Jempl che to perla da' zaca'chgua

⁴⁵ Na' yela' gwnabia' che Diosen' ben' zoa yaban', lecze zaca'leben ca da' nga goc. Zoa to comerciant bene' cha'o perla dan' zjanacchgua xdan. ⁴⁶ Na' bželde' to perla da' leca zacan'. Na' beyote' yogo'lol bi da' de che' na' gwxi'e perlan'. Ca'czen' zaca'lebe bene' ca' chesache'e zaca'chguan yosozenague' che Diosen'.

Jempl che yixjw bel

⁴⁷ Na' yela' gwnabia' che Diosen' ben' zoa yaban' zaca'leben ca da' nga goc. Gwnita' bał bene' gwxen bel na' bosozale' yixjw bel chegaquen' lo' nisdaon' na' gwxenen zan cuen bel. ⁴⁸ Nach cate' ba gwža' lo' yixjon', besyebujen' yo biž, na' gosebie' be ca' zjanac güen par yesagüe' na' gosegüe'eba' lo' žome. Na' be ca' bi zjanac güen, gosecho'one'ba'. ⁴⁹ Ca'czen gac che yogo' bene' cate' žin ža te che yežlion'. Angl ca' yesebeje' bene' mal ca' ladjo bene' ca' zjanaque' bene' güen lao Diosen' ⁵⁰ na' yosozale' legaque' lo' yi' gabił gan' yesebežyaše' na' yesagwxetje laye' dan' leca yesežaglagüe'.

Xtiža' Diosen' dan' byoj cani' len da' chsed chlo'e Jesúsen'

⁵¹ Nach Jesúsen' gože' bene' ca' zjanaque' le' txen:

—žZzejni'ile yogo' da' ca' ba blo'eda' le'e?

Nach gose'ene':

—Zzejni'iton'.

⁵² Nach gož Jesúsen' legaque':

—Note'tezle še chac chsed chlo'ele Xtiža' Diosen' dan' byoj cani', še lecze chzenagle can' chsed chlo'eda' che yela' gwnabia' che Diosen', nachen' zaca'leble ca to xan yo'o bene' nape' yogo'lol da' zaca' dan' chyažj chčhinde', balen zjanaquen da' cobe na' balen zjanquen da' gole.

Bene' yež Narzaret bi gosejle'e che Jesúsen'
(Mr. 6:1-6; Lc. 4:16-30)

⁵³ Nach cate' beyož be' Jesúsen' jempl ca', beze'e latjen' len bene' ca' zjanaque' le' txen ⁵⁴ jaya'aque' laže'. Na' jaysed jaylo'ede' bene' gualaž che' ca' lo' yodao' čhegaquen'. Na' leca besyebande' len xtižen' na' gose' lježe':

—¿Ga jasede' yela' sina? na' ¿nacxečen' chac chone' yela' guac ca'?

⁵⁵ Nombia'chone', le naque' xi'in ben' chonšagüe' yag. Na' xne'ena' lie' María, na' Jacobo, José, Simón na' Judas zjanaque' bene' biše'. ⁵⁶ Na' lecze bene' zane' ca' nite' lažcho nga. ¿Nacxe chaquen' cho'e diža' ca' na' chacte' chone' yela' guac?

⁵⁷ Na' dan' gosone' xbab nac Jesúsen' con to bene' gualaž čhegaque', bi gosaclaže' yesejle'e che'. Na' gož Jesúsen' legaque':

—Yogo'ze bene' chonla'ane' bene' choe' xtiža' Diosen', perw bene' gualaž che' na' bene' lo' yo'o che' bi chesonla'ane' le'.

⁵⁸ Na' to čhopze yela' guac ben Jesúsen' Nazareten' dan' bitw gosejle'e che'.

14

Quingan' goc gosote' Juan ben' bzoa bene' nis
(Mr. 6:14-29; Lc. 9:7-9)

¹ Na' ca tiempen' Herodes ben' naque' gubernador che distritw Galilean', bende' diža' ca nac yogo'lol dan' chon Jesúsen'. ² Nach gože' xmosé' ca':

—Bengan' da' Juanna', ben' bzoa bene' nis. Ba bebane' ladjo bene' guat ca', da'nan' chaque' chone' yela' guac.

³⁻⁴ Herodesen' gwne' ca' dan' bene' mandadw gosote' da' Juanna'. Quingan' goc: Herodesen' beque'e Herodías ca xo'ole' la'czla' Herodías naque' xo'ole bene' biše' Felipe. Na' Juanna' gože' Herodesen':

—Bi cheyala' soalen no'ol che bene' bišon'.

Na' dan' gož Juanna' Herodesen' ca', da'nan' Herodesen' bene' mandadw gosezene' juanna' na' bosocheje' ni'a ne'e len gden lo' ližya gan' gosegüe'ene'.

⁵ Herodesen' goclaže' gote' Juanna', perw bitwbi bende' le', le gwnežde' bene' zan chesejle'e Juanna' cho'e xtiža' Diosen', na' bžebe' bi yeson bene' ca'.

⁶ Perw na' cate' gosone' lñin' ža la Herodesen', bi' no'ol che Herodías bya'abe' lao bene' ca' ja'ac lñin'. Na' leca bebe Herodesen' can' bya'a no'ol güegon', ⁷ na' bzoe' Diosen' testigw che' gwnežjue'be' bite'teze nabebe' le'. ⁸ Na' gwlo'oyela' xna'ben' lebe' cont gožbe' Herodesen':

—Ben neda' to lo platw yichj Juan ben' chzoa bene' nis.

⁹ Ne late'ze bi gwyazlaže' rey Herodesen' gone' can' gož no'ol güegon' le', perw bačhle bzoe' Diosen' testigw che' lao bene' ca' jasa'ac lñin' gwnežjue'be' bite'teze nabebe' le', da'nan' benšaze' mandadw gac can' gwnežjue'be' le'. ¹⁰ Ca' goquen' bene' mandadw jasečogue' yen Juanna' lo' ližya gan' yo'ena'.

¹¹ Na' bosožie' yichjen' to lo platw cont bosonežjuen' no'ol güegon' na' lebe' bnežjwben' xna'be'.

¹² Nach bene' ca' zjanaque' txen len da' Juanna' jasyexi'e cuerp čhen' na' jasecušen'. Gwde na' ja'aque' gan' zoa Jesúsen' jaseže'ne' can' ba goquen'.

Bguagw Jesúsen' gayo' mil bene'
(Mr. 6:30-44; Lc. 9:10-17; Jn. 6:1-14)

¹³ Na' cate' bene Jesúsen' can' goc che da' Juanna', beze'e latjen' len bene' ca' zjanaque' le' txen na' besyeyo'e to lo' barcw par ja'aque' to latje daš na' nono nochle ja'aclen legaque'. Perw bene' ca' že' yež ca' zjachi' cho'a nesdaon' cate' gosende' ba zjada Jesúsen', na' gosa'ac lažgaque' ja'aque' yo biž jasešague' Jesúsen'. ¹⁴ Na' cate' bžin Jesúsen' cho'a nesdaon', ble'ede' nita' bene' zan na' beyaše' beži'ilaže'de' legaque'. Na' beyone' yogo' bene' ca' chesacšene. ¹⁵ Na' cate' ba chxa gwbž gosebiga' bene' ca' zjanaque' le' txen lagüen', na' gose'ene':

—Zoacho to latje ga bibi de, na' ba nac bagwže' par gagwcho xgüe. Bze bene' quinga diža' cont šjaya'aque' yež dao' ca' dan' zjachi' gała'ze šjasediljue' da' yese'ej yesagüe'.

¹⁶ Nach Jesúsen' gože' legaque':

—Bitw cheyała' šjaya'aque', san le'e güe'elne' da' yesagüe'.

¹⁷ Nach gose'ene':

—Chopga bel' ya'a chechon' de na' gayo'ga yetextil dao'.

¹⁸ Nach Jesúsen' gože' legaque':

—Le šjaxin' ni.

¹⁹ Nach ben Jesúsen' mandadw gosebe' bene' zan ca' lo yixyen'. Na' gwxi'e yetextil ca' gayo' na' bel' ya'a ca' chope, na' gwne'e yabale be'e yela' choxcen che Diosen', na' bzoxjen' be'en bene' ca' zjanaque' le' txen cont goseyisen' len to to bene' ca'. ²⁰ Na' yogüe' gosagüen' na' goseljde'. Na' bososše'e šižinw žome len yetextil bixjw len late' güeje bel' dan' bega'anna'. ²¹ Na' bene' ca' gosagw da' ca' zjanaque' ca do gayo' mil bene' byo, bi cuent no'ol ca' len bidao'.

Jesúsen' gwze'e lo nesdaon'
(Mr. 6:45-52; Jn. 6:16-21)

²² Gwde na' Jesúsen' bene' byen besyeyo'o bene' ca' zjanaque' le' txen lo' barcon' cont gosebialagüe' besyelaque' yešla'ale nesdaon' šlac bega'an le' besele' bene' ca' ližgaque'. ²³ Na' beyož besele' bene' ca' ližgaque', gwloe' to lo ya'a jal' güiže' Diosen' toze'. Na' cate' gol, toz Jesúsen' zoe' lo ya'an. ²⁴ Na' ca nac barcon' gan' zeseyo'o bene' ca' zjanaque' Jesúsen' txen, ba zejen do gacho' nesdaon' nžiga'ses nisen' len dan' chas chata' nesdaon', le ben' chechjen clele. ²⁵ Na' do šbal beyetj Jesúsen' ya'ana' na' gwze'e lo nesdaon' na' ba zejgale' gan' zja'aquen'. ²⁶ Nach cate' besele'ede' le' zeje' lo nesdaon' leca besežebe', na' bososye'e gosene':

—jše da' chda chelen' chle'echo!

²⁷ Na' la' bol' güižte Jesúsen' legaque', gože'ne':

—Le gonchach laže'le. Neda'na'. Bitw žeble.

²⁸ Nach Pedroa' gože'ne':

—Xanto', še da' li le'na', ben mandadw sa'a lo nesdaon' yida' gan' zon'.

²⁹ Nach gož Jesúsen' le':

—Da, Pedro.

Na' la' bchojte Pedroa' lo' barcon' gwzolao gwze'e lo nesdaon' zeje' gan' zoa Jesúsen'. ³⁰ Perw na' cate' goche'ede' chechjchgua ben', bžebe' na' gwzolao chebe' lo' nisen'. Nach bosye'e, gože' Jesúsen':

—Xana', bosla neda'.

³¹ Na' la' blite na' Jesúsen' bešue'ne', na' gože'ne':

—čBixchen' chac chopdo'? Gwyejle'ch chia'.

³² Nach cate' beyo'o Jesús'en' len Pedroa' lo' barcon', la' gwlezte be'na'. ³³ Na' bene' ca' že' lo' barcon' bosozoa xibe' lao Jesús'en' gosonxene'ne', gose'ene':
—Da' licze len' naco' doguale Xi'in Diosen'.

Jesús'en' beyone' bene' chesacšene ben' nita' Genesaret
(Mr. 6:53-56)

³⁴ Na' goselague' nisaon' na' besežine' yežlio gan' nzi' Genesaret. ³⁵ Na' cate' bene' Genesaret'en' besyeyombi'e Jesús'en', goseyise' diža' yogo' yež ca' dan' zjachi' gala'ze cont gosenezde' ba bžin Jesús'en' lažgaque'. Na' bene' ca' že' yež ca' goseče'e yogo' bene' chesacšene lao Jesús'en'. ³⁶ Na' goseneyoede' Jesús'en' gwnežjue' latje yesoxe' la'ch late'ze xni'a xen'. Na' yogo' bene' gosoxen' besyeyaquede'.

15

Diža' mal dan' chchoj cho'achon' chonen cont lažda'ochon' bi naquen xilaže' len Diosen'
(Mr. 7:1-23)

¹ Na' bal' bene' fariseo ca' na' bene' ca' chososed chosolo'e dan' bzoj da' Moisés'en' gosa'aque' Jerusalénna' na' besežine' gan' zoa Jesús'en', na' gose'ene':

² —¿Bixčhen' bene' ca' zjanaque' le' txen bitw zjana'ogüe' da' cheson bene' gol ca'? ¿Bixčhen' cbi chosyone'e zan ni'a cate' za' yesagüe'?

³ Nach Jesús'en' gože' legaque':

—Na' le'e žbixčhen' chbejyichjle cbi chonle can' ža Diosen' cheyala' goncho san chonxen costumbr čhelen'? ⁴ Diosen' none' mandadw can' goncho, gwne': "Le gap bala'an xaxna'le", na' "Note'teze' še chnešaše' len xaxne'e cheyala' gate'." ⁵ Perw le'e žale guaque ye' to bene' xaxne'e: "Bibi de gona' gaclena' le'e, le yogo' da' de čhia' ba bnežjuan' lo' na' Dios." ⁶ Na' žale bich bi cheyala' gwnežjue' xaxne'en še ca'. Na' dan' žale ca', chzoale ca'ale dan' ža Diosen' na' con na'ole costumbr gole che da' xozxta'ole ca'. ⁷ Le'e nacle bene' gwxiye'. Chonle cayanen' bzoj da' Isaías'en' čhele, gan' žan:

⁸ Bene' qui chesonxene' neda' len diža' cho'a,
perw bi chesonxene' neda' len lažda'ogaque'.

⁹ Bibi zejen dan' chesonxene' neda',

le dan' chososed chosolo'eden' naquen da' chnalaže' benačhze.

¹⁰ Nach Jesús'en' bozoł giüize' bene' ca' zjanžaguen' cont gosebigue' lagüen' na' gože' legaque':

—Le gwzenag da' nga nia' le'e na' le šejni'i. ¹¹ Bitw nacho dan' che'ej chagw benačhen' chonen cont lažda'ogüen' bi naquen xilaže' len Diosen'. Perw diža' mal dan' chchoj cho'e, lenna' chonen cont lažda'ogüen' bi naquen xilaže'.

¹² Nach gosebiga' bene' ca' zjanaque' Jesús'en' txen lagüen' gose'ene':

—¿Bi gočbe'edo' bene' fariseo ca' beseže'e cate' gosende' xtižo'na'?

¹³ Na' gož Jesús'en' legaque':

—Gwžin ža cate' Xa' Diosen' ben' zoa yaban' gwžiyaye'e yogo'loł bene' bi chosozenag čhe'. Gwžiyaye'e legaque' can' choncho cate' chlažo'cho yiže' ca' chesela'ac lo' yel. ¹⁴ Jasey bene' fariseo ca'. Zjanaque' ca' to bene' lchol' bene' če'nde' cue'e nez yeto bene' lchol'. Nezecho to bene' lchol' bitw gac cue'e nez yeto bene' lchol', le txen šjasebiže' to lo' yechw.

¹⁵ Nach Pedroa' gože' Jesús'en':

—Bzejni'išque neto' bi zejen can' gwnaon'.

16 Nach gož Jesúsen' legaque':

—¿Lencze le'e bitw chejni'ile da' quinga ba gwnia'? 17 ¿Bi nezele yogo' dan' che'ej chagw beñachen' cho'on lo' li'e na' chžin hor cheden? 18 Perw yogo' diža' dan' chesoe' benachen' chesechojen lo' yichjlažda'ogüen'. Na' še choe' bene' diža' mal, len chonen cont bi nac lažda'ogüen' xilaže' len Diosen'. 19 Le lo' yichjlaždao' benachen' nan' chchoj yogo' xbab mal cate' žan yesone' da' mal quinga: yesote' bene', yesata'lene' no'ol bi nac xo'olgaque' o bene' byo bi nac bene' chegaque', na' yesone' gwban, yeso'e diža' güenlaže' che lježgaque', na' yesene'e che bene'. 20 Xbab mal ca' chesonen cont bi nac laždao' bene' xilaže' len Diosen', gague dan' bi chone'e zan ni'a cate' za' gagüe'.

To no'ole bi naque' bene' Israel chejniłaže' Jesúsen'

(Mr. 7:24-30)

21 Beza' Jesúsen' latjen' len bene' ca' zjanaque' le' txen jaya'aque' distritw Galilea gala'ze gan' mbane ciuda Tiro na' ciuda Sidón. 22 Na' to no'ole zoa do na', ben' bi naque' bene' Israel, gwze'e laže' cont bžine' gan' zoa Jesúsen' na' jašague'ne'. Na' gwne' zižje, gože'ne':

—Xana', le' naco' xi'in diaža che da' rey David. Beyaše'sque neto'. To bi' no'ol chia' yo'o nyaz da' xigüe' yichjlažda'obe' na' leca chžaglaobe'.

23 Perw Jesúsen' bitw boži'e xtiža' no'olen'. Nach bene' ca' zjanaque' Jesúsen' txen gosebigue' cuite'na' na' gosata'yoede' le' gose'ene':

—Boži'išca no'olen', le con nagüe' chio' choł güiže' le' zižje cont gacleno'ne'.

24 Nach gož Jesúsen' legaque':

—Diosen' gwsele' neda' cont chaclena' bene' Israel gualaž checho na'ze, le legaque' zjazaca'lebe' ca xila' dao' be zjanacžeje.

25 Nach no'olen' gwbigue' bzoa xibe' lao Jesúsen', na' gože'ne':

—Xana', goclenšca neda'.

26 Nach gož Jesúsen' le':

—Bitw naquen güen yeca'acho yela' guagw che xi'incho na' gwnežjwchon gagw beco' ca'.

27 Nach gože'ne':

—Leczdo' Xana'. Perw beco' ca' guac yesagwba' bla'a dao' da' cheselažo' lo yo.

28 Nach Jesúsen' gože'ne':

—No'ole, leca chejniłažo' neda'. Guaclencza' le' can' chaclažon'.

Na' la' beyacte xi'in no'olen'.

Jesúsen' beyone' bene' zan bene' chesacšene

29 Beza' Jesúsen' latjen' len bene' ca' zjanaque' le' txen goso'e nezen' dan' chde gala'ze cho'a nisdao' Galilean'. Nach gosepe' to lo' ya'a jasechi'e lo ya'ana'. 30 Na' besežin bene' zan lo' ya'a gan' zoa Jesúsen' len bene' ca' zjanaque' le' txen. Zjanche'e no bene' nxinj ni'e, bene' lchoł, bene' bi chac nie', bene' bi zoa ni'a na'gaque', na' len bene' chese'e gwde gwdele yižgüe', na' bosonite' legaque' xni'a Jesúsen'. Na' Jesúsen' beyone' yogüe'. 31 Na' leca besyebane bene' ca' cate' besele'ede' can' besyene' bene' ca' bi gosac yesene, na' besyeyac bene' bi zjazoa ni'a na'gaque', na' besyeda bene' nxinj ni'e, na' besele'e bene' lchoł ca'. Nach gosonxene' Diosen' ben' chonxen chio' bene' Israel.

Jesúsen' bguagüe' tap mil bene'

(Mr. 8:1-10)

32 Gwde na' Jesúsen' goxe' bene' ca' zjanaque' le' txen na' gože' legaque':

—Cheyaše'da' bene' qui, le ba goc šone ža zjanite' nga len neda', na' bibi de da' yesagüe'. Na' bi chaclaža' yosa'ane' sin cbi yesagüe' cont bi yesečholde' chanez.

³³ Nach legaque' gose'ene':

—Gan' zoacho nga naquen to latje daš ga bibi de. ¿Gaxe želecho da' yesagw yogo' bene' quinga?

³⁴ Nach gož Jesúsen' legaque':

—¿Gaca' yetextilen' de chele?

Nach gose'ene':

—Gažga yetextil dao' zjade na' to čopga bel ya'a dao'.

³⁵ Nach Jesúsen' bene' mandadw yesebe' bene' zan ca' lo yon'. ³⁶ Na' gwxi'e yetextil ca' gaže na' len bel ya'a dao' ca', nach be'e yela' choxclen che Diosen', nach bzoxyen' bnežjuen' bene' ca' zjanaque' le' txen na' legaque' bosonežjue' che yogo' bene' nita' na'. ³⁷ Na' yogüe' gosagüe' goseljde'. Gwdena' bososše'e yegaže žome len late' güeje yela' guagw dan' bega'anna'. ³⁸ Na' bene' ca' gosagw yetextilen' len belen' nac tap mil bene' byo, na' bi cuent no'ole ca' len bidao' ca'. ³⁹ Nach beyož besela' Jesúsen' bene' ca' ližgaque', na' beyo'e to lo' barcw len bene' ca' zjanaque' le' txen na' ja'aque' distritw gan' nzi' Magdala.

16

Gosenabe' Jesúsen' gone' to da' yesele'ede' le'e yaba
(Mr. 8:11-13; Lc. 12:54-56)

¹ Na' goquen' bal bene' fariseo ca' na' bene' saduceo ca' gosebigue' gan' zoa Jesúsen', na' cont yesagüe' xya che' gosenabe' gone' to yela' guac da' yesele'ede' le'e yaban' cont yesežeзде' še da' licze Diosa' gwsele' le'. ² Nach Jesúsen' gože' legaque':

—Cate' chle'ele chexna le'e yaban' šeže'le nach žale: “Yeža'a gwxe dan' chexna le'e yaban'.” ³ Na' cate' chle'ele zete bejw xna le'e yaban' do cheni' nach žale: “Guac yejw zag, le ze bejw xna le'e yaban'.” Nacle bene' gwxiye', le nezele še guac yejw zag o še guac zeye' caten' chle'ele can' nac le'e yaban', perw bi chacbe'ele bi zejen da' ca' chon Diosen' tiemp nga zoacho na'a. ⁴ Le'e zoale na'a nachguale bene' laždao' xi'a na' ba gwlejyichjle Diosen'. Da'nan' chnabe gona' yeto yela' guac da' le'ele cont nezele še Diosen' gwsele' neda'. Perw bitw gona' can' chnaben', le ba ble'ele da' chona'. Dan' gon Diosen' len neda' cont nezele le'na' gwsele' neda' naquen ca dan' bene' len da' Jonás ben' be' xtiža' Diosen' cani'.

Nach beyož gwna Jesúsen' ca', beze'e len bene' ca' zjanaque' le' txen gan' nita' bene' ca'.

Dan' chsed chlo'e bene' fariseo ca' na' bene' saduceo ca' zaca'leben ca levadura

(Mr. 8:14-21)

⁵ Na' cate' besežine' yešla'a nisdao' Galilean', bene' ca' zjanaque' Jesúsen' txen gosache'ede' gosanlaže' yetextil da' yesagüe'. ⁶ Nach Jesúsen' gože' legaque':

—Le gon xbab, le gwsaca' len levadura che bene' fariseo ca' na' che bene' saduceo ca'.

⁷ Nach gose' lježgaque':

—Gwne' ca' le gague bi yetextilen' noa'chon'.

⁸ Na' Jesúsen' gocbe'ede' xbab dan' gosone', na' gože' legaque':

—¿Bixchen' chaczejlaže'le da' bibi yetextil de? ¿Bi chejle'le napa' yela' guac par gwguagua' le'e? ⁹ ¿Bina' šejni'ile? na' ¿ba gonlaže'le can' bguagua' gayo' mil bene' byo len gayo'ze yetextil dao'? na' lecze ¿bitw zalaže'le do yebał žome pedas yetextil botoble dan' becho'onen? ¹⁰ Na' ¿čhixe tap mil bene' byo ca' bguagua' len gaže yetextil dao'? ¿Zalaže'le yebał žome pedas yetextil can' botoble dan' becho'onen? ¹¹ ¿Bixchen' con benle xbab che yetextilen' cate' gwnia' le'e gwsaca'le len levadura che bene' fariseo ca' na' che bene' saduceo ca'?

¹² Nach bene' ca' zjanaque' Jesúsen' txen gosacbe'ede' gague be'e diža' che levadura dan' chosočhine' par chcha'o yetextilen' san be'e dižan' ca' cont bi yosozenague' che dan' chososed chosolo'e bene' fariseo ca' na' bene' saduceo ca'.

Pedroa' gwne' Jesúsen' naque' bene' gwsela' Diosen' cont nabi'e
(Mr. 8:27-30; Lc. 9:18-21)

¹³ Nach Jesúsen' len bene' ca' zjanaque' le' txen besežine' gała'ze to ciuda dan' nzi' Cesarea de Filipo. Nach Jesúsen' gože' bene' ca' gosa'aclene' le':

—Diosen' gwsele' neda' golja' benačh. Perw ¿bi chesena bene'? ¿non' naca' neda'? ¿Bi chesene'?

¹⁴ Na' gose'ene':

—Bałe' chesene' naco' da' Juan ben' bzoa bene' nis. Na' yebałe' chesene' naco' Elías ben' be' xtiža' Diosen' cani'. Na' yebałe' chesene' naco' da' Jeremías o yeto bene' be' xtiža' Diosen' cani'te.

¹⁵ Nach gože' legaque':

—¿Chixe le'e? ¿No žale naca'?

¹⁶ Nach Simón Pedroa' gože'ne':

—Len' naco' Cristo ben' gwlej Diosen' cont nabi'o, na' naco' dogualje Xi'in Dios, Dios ben' zoa toli tocañe.

¹⁷ Nach Jesúsen' gože'ne':

—Simón xi'in Jonás, mbalaz zo' dan' gwnao' ca'. Notno benačh bzejni'i le' nao' ca'. Toz Xa' Dios ben' zoa yaba, len' ba bzejni'iden' le'. ¹⁸ Na' neda' žia', len' lio' Pedro na' zeje dižan' yej. Na' ca' to bene' güen yo'o chbeje' yej gual cont gonen žin cate' cueque' len yo'on, ca'cze chbeja' le' gono' xšina', gaco' bene' nechw yotobo' bene' yesonxene' neda'. Na' bitwbi gac yeson da' xigüe' ca' yosolej yosošošjen bene' ca' yesonxene' neda'. ¹⁹ Na' gona' lo' nao' zgua'tec le' go'o xtižan' len bene' zan cont yosozenague' che Dios ben' zoa yaban' na' nabi'e yichjlažda'ogaque'. Na' lecze naquen lo' nao' yo'o bene' ca' yesonxene' neda' bica' da' ca' nac güen yesone' na' bica' da' ca' cbi nac güen yesone'. Na' Diosen' gwzejni'ide' le' naquen ye'gaco'ne' cont yežaguen len dan' ža Diosen'.

²⁰ Nach Jesúsen' gože' legaque' nono yes'e še naque' Cristo ben' gwlej Diosen' cont nabi'e.

Jesúsen' gwdixjue'ede' gate'
(Mr. 8:31-9:1; Lc. 9:22-27)

²¹ Na' žana' Jesúsen' gwzologüe' bzejni'ide' bene' ca' zjanaque' le' txen cheyala' šeje' Jerusalenna'. Na' gože' legaque' bene' gole blao ca' chesenabi'e naciön chechon', na' bxož gwnabia' ca' na' bene' ca' chososed chosolo'ede' dan' bzoj da' Moisés yosoči yososaque' le' na' yesote' le'. Perw yeyon ža yebane' ladjo bene' guat ca'. ²² Nach Pedroa' gwche'e Jesúsen' gan' nac lchojiže na' gwzologüe' be'lene' le' diža' gwdile' le', gože'ne':

—Xana', Diosen' gaclene' le'. Bitw gac čhio' ca' dan' žo' nga.

²³ Perw Jesúsen' gwyečhje' gwne'e Pedroa' gože'ne':

—¡Gwcuas ca'ale Satanás! Chgo'oyelo' neda' bi gona' can' nžia bia' Diosen' gona'. Bi nsa'o xbab che Dios, san nsa'o xbab che benach.

²⁴ Gwde na' Jesúsen' gože' bene' ca' zjanaque' le' txen:

—Note'teze bene' še chaclaže' gaque' neda' txen, cheyala' cuejyichj cuine' la'czla' žaglagüe' na' con gone' can' nĩa' neda'. ²⁵ Note'teze bene' chacde' gone' cont bi žaglagüe' o cont nono yesot le', benan' cuiayi'. Na' note'teze bene' chzanlaže' cuine' žaglagüe' o gate' ne chia' neda', ba de yela' mban che' toli tocañe. ²⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocañe? Le bi zoa nacle gon benachen' chixjue' cont gata' yela' mban che' toli tocañe. ²⁷ Diosen' gwsele' neda' golja' benach na' cate' yida' yežlio nga da' yoble nsa'a yela' zaca' juisyw che Xa' Diosen' na' nchi'a angl chia' ca', cana'ch gona' cont to to benachen' nite' mbalaz o yesezaca'zi'e neche da' goson to toe'. ²⁸ Na' da' li žia' le'e, balle nita'le nga na'a bina' gatle cate' žin ža le'ele neda' yida' gwlo'a yela' gwnabia' chian', neda' naca' ben' gwsele' Diosen' golja' benach.

17

Jesúsen' goque' ca to be'ni'
(Mr. 9:2-13; Lc. 9:28-36)

¹ Gwde xop ža Jesúsen' gwchi'e Pedroa' len Jacobo na' Juan bene' biše' Jacobo na' ja'aque' to lo ya'a sibe. Na' nono nochle ja'aclen legaque'. ² Na' lao legaque' bža' ca goc Jesúsen', cho'alagüen' goctiten ca gwbiž, na' xalanen' beyaquen šiš xila' ca be'ni'. ³ Na' concze besele'ede' da' Moisésen' len da' Elíasen' na' chosošalje' len Jesúsen'. ⁴ Nach Pedroa' gože' Jesúsen':

—¡xanto', leca güenna' zoacho nga! Še chaclažo', gonto' šone ranšw, to chio', na' to che Moisés, na' yeto che Elías.

⁵ Ne' choe'te Pedron' dižan' ca' cate' to bejw da' chactiten gweychjen legaque' na' ladjo bejon' gosende' gwna Diosen':

—Benga Xi'ina' ben' chacda'. Chbe chezaquelaže' chgüeda' che'. Le gwzenag che'.

⁶ Na' cate' bene' ca' nche'e Jesúsen' gosende' diža' ca' besežebchgüe', con gosaze' coscho'ale lo yon'. ⁷ Nach gwbiga' Jesúsen' gwxo'a ne'e yichjgaquen' na' gože'ne':

—Le yeyas. Bitw žeble.

⁸ Na' cate' besyečhis lagüen', noch no besele'ede' san toze Jesúsen' zie'.

⁹ Na' gwde na' šlac cheseyetje' lo ya'an Jesúsen' gože' legaque':

—Nono ye'le can' nac dan' ba ble'ele nga. Cate'ch ba bebana' ladjo bene' guat ca', neda' naca' ben' gwsele' Diosen' golja' benach, cana'ch güe'le diža' chen.

¹⁰ Nach bene' ca' zja'aclen Jesúsen' gose'ene':

—Bene' ca' chososed chosolo'e dan' bzoj da' Moisésen' chososedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' seļa' Diosen'. ¿Bixchen' chesene' ca'?

¹¹ Nach Jesúsen' gože' legaque':

—Da' licze zgua'tec yid da' Elíasen' na' yeyonšagüe' yogo'lol. ¹² Perw žia' le'e, Elías ba bide' na' bi gosache'e bene' še nac le'. Na' gosonde' le' con ca gosaclaže'. Na' ca'czen' yosoči yososaque' neda' naca' ben' gwsele' Diosen' golja' benach.

¹³ Nach bene' ca' zja'aque' len Jesúsen' gosache'ede' cho'e diža' che da' Juan ben' bzoe' bene' nis.

*Beyon Jesúsén' to bi' chazbe' šon**(Mr. 9:14-29; Lc. 9:37-43)*

¹⁴ Na' cate' besežine' gan' zjanžag bene' zan, to bene' bšague' Jesúsén' na' bzoa xibe' lagüe'na' gože'ne':

¹⁵ —Xana', beyaše'laže'sca xi'ina' nga. Chazbe' šon na' leca chžaglaobe' len len. Na' zan ni'a ba jačhazbe' lo yi' na' lecze zan ni'a ba blažo'be' lo nis.

¹⁶ Ba bedesana'be' lao bene' ca' zjanaque' le' txen, perw bitw gosaque' yesyeyone'be'.

¹⁷ Nach Jesúsén' gože' bene' ca' že'na':

—ǀLe'e bene' bi chejnilaže', chonchguale clele! ǀBatca' zelao na'lagua' le'e? Bedesan bidaon' ni.

¹⁸ Nach Jesúsén' bene' mandadw yechoj da' xigüen' yo'o nyazen yichjlaždao' bidaon' na' la' bechojten. Na' la' beyaquetebe'.

¹⁹ Na' gwde goc ca', bene' ca' zjanaque' Jesúsén' txen gosebigue' lagüen' cate' zoe' toze', na' gose'ene':

—ǀBixchen' bi goc neto' yebejto' da' xigüen'?

²⁰ Jesúsén' gože' legaque':

—Bitw goc yebejlen dan' bitw gwyejle'le Diosen' gone' yechojen. Xsa xomdasen' naquen da' dao' riz. Na' da' li žia' le'e, la'czla' dan' chejnilaže'le Diosen' naquen ca to xsa xomdas lagüe dan' bi chejnilaže'teclene', še šejnilaže'line', guaque ye'le ya'a nga: “Gwcuas nga, na' jayzoa na'ate”, na' gac can' nalen'. Bitw bi de dan' bi gac gonle con še chejle'le Bebeja' gone' gaquen. ²¹ Na' cont yebejle da' xigüe' ca' dan' zjanac ca dan' bebeja' yichjlaždao' bidaon'a', cheyala' gwyo gwcheyje gonle gwbas na' zoatezle yol güižle Diosen'.

*Da' yoble Jesúsén' gwdixjue'ede' gate'**(Mr. 9:30-32; Lc. 9:43-45)*

²² Na' šlac zjajda Jesúsén' len bene' ca' zjanaque' le' txen do gan' mbane distritw Galilea, Jesúsén' gože' legaque':

—Diosen' gwsele' neda' golja' benač, na' yosodie' neda' lo na' bene' chesegue'ede'nda', ²³ na' yesote'nda'. Perw na' yeyon ža yosban Diosen' neda' ladjo bene' guat ca'.

Nach bene' ca' zjanaque' Jesúsén' txen cate' gosende' xtiže'na' gosacyaše'chgüede'.

Jesúsén' gwdixjue' da' chosočixjue' che yodao'

²⁴ Na' cate' besyežine' Capernaum, bene' ca' chosočixjue' che gastw che yodao' blao che chio' bene' Israel ja'aque' lao Pedroa'. Na' gose'ene':

—ǀBi chyixjw maestrw chelen' da' cheyala' chixjue' che yodaon'?

²⁵ Nach gož Pedroa' legaque':

—Chyixjuen'.

Gwde gwna Pedroa' ca' gwyo'e lo' yo'ona'. Nach Jesúsén' la' gožtie' le':

—ǀBi xbab chono', Simón? Ca nac bene' gwnabia' ca' nita' yežlio nga, ǀnon' chacdo' chosočixjue'? ǀbene' gualaž che' o še bene' zito'?

²⁶ Nach Pedroa' gože'ne':

—Chosočixjue' bene' zito'.

Nach Jesúsén' gože' le':

—Bene' zjanaque' biše' lježe' bitwbi cheseyixjue'. Na' chio' naccho xi'in Dios ben' zoa yaba chnabi'e, bitw cheyala' chixjwcho che yodaon'. ²⁷ Perw cont nono yeson xbab chgue'echo yodao' blaon', na' chixjwcho. Gwyej cho'a nisaon', na' bzala' yixjw chion' na' bel nechw be seno', lo cho'aba'na' želdo'

to mechw. Na' yeyoxon' šjadixjo' c̄hechon'. Guaqueczen par šjadixjo' c̄he chopcho.

18

Gosacyož bene' ca' zjanaque' Jesúsen' txen noe' nacch blao

(Mr. 9:33-37; Lc. 9:46-48)

¹ Nachen' bene' ca' zjanaque' Jesúsen' txen gosebigue' cuite'na', na' gose'ene':

—¿No neto' gacchto' blao cate' Diosen' ben' zoa yaban' gone' cont nabi'o?

² Na' Jesúsen' goxe' to bidao' na' bzeche'be' gachol' legaque'. ³ Na' gože'ne':

—Da' li' žia' le'e, note'teže še bi gwša' xbab' chelen' cont gwzenagle' c̄he Diosen' ca' chon' to bidao' cate' chzenagbe' c̄he xaxna'be', gwbat' nabia' Diosen' ben' zoa yaban' yichjlažda'ole. ⁴ Na' note'teže bene' še yeyaque' ca' bidao' nga' na' gwzexjwlaže' lao Diosen', nach' gaque' bene' blao len' neda' cate' Diosen' ben' zoa yaba' gone' cont solao' nabi'a. ⁵ Note'teže bene' chone' güen len' to bidao' ca' bi' nga' neche' da' chejnilaže' neda', choncze' güen len' neda'.

Bitw cheyala' goncho cont gon bene' da' xinj

(Mr. 9:42-48; Lc. 17:1-2)

⁶ Note'teže bene' chon' cont lažo' to bene' za' gwzologüe' chejnilaže' neda' gone' da' xinj, yejni'acle' yosocheje' yene' to yiše xen' na' yosozale'ne' lo' nisdaon' clal' ca' da' gone' cont lažo' bene' yoble' gone' da' xinjen'. ⁷ Nyaše'chguaze' gac' c̄he benachen' da' zjade' da' zan' yežlio' nga' da' chesonen' cont yesone' da' xinj. Bia'cze' gata' dan' yeson' cont lažo' bene' yesone' da' xinj, perw' nyaše'chguaze' gac' c̄he bene' chon' cont lažo' bene' yoble' gone' da' xinjen'.

⁸ Na' da' li' žia' le'e, še' ni'a' na'len' chonen' cont gonle' da' xinj, cheyala' cuejyichjle' da' malen' chonle. Yejni'a' bibi' ni'a' na'len' soa' clal' ca' gonle' da' xinjen' len' len. Na' yejni'a' šjayzoale' len' Diosen' toli' tocañe' bi' zoa' šla'a' taca'len' o' nchog' šla'a' ni'alen' clal' ca' yeyejle' lo' yi' gabil' nya' cuerp' chelen'. ⁹ Na' še' yejlaolen' chonen' cont gonle' da' xinjen', cheyala' cuejyichjle' da' malen' chonle. Yejni'a' bibi' yejlaolen' cuia' clal' ca' gonle' da' xinjen' len' len. Na' yejni'a' šjayzoale' len' Diosen' toli' tocañe' zoa' šla'a'aze' yejlaole' clal' ca' yežinle' lo' yi' gabil' žia' chop' la'a' yejlaolen'.

Jempl' c̄he xila' be' gocžeje

(Lc. 15:3-7)

¹⁰ 'Bi' gonle' note'teže bene' chejnilaže' neda' ca' bene' bibi' zaca'tec, la'czla' bitec' zaque' len' benačh. Žia' le'e, angl' ca' chesape' legaque' lecze' nite' lao' Xa' Diosen' yaban' gan' zoe'na'. ¹¹ Na' ca' naca' neda', Diosen' gwsele' neda' golja' benačh' cont gwnežjua' yela' mban' toli' tocañe' c̄he bene' ba' zjambiayi'.

¹² '¿Bixe' chonle' xbab? Še' nita' to' gayoa' xila' c̄hele' na' yexjw' toba' žbi' yocua'anle' be' ca' yetaplalj' togalj' do' lo' ya'a' na'ze' na' šjaydiljwle' ben' bexjua'? ¹³ Na' da' li' žia' le'e, cate' yežezeleba' yebechle' dan' beželban' clal' ca' can' chebele' c̄he be' ca' taplalj' togalj' ben' bi' gosacžeje. ¹⁴ Ca'czen' naquen' len' bene' ca' chesejnilaže' neda' bene' ca' bitec' bi' zjazaque' len' benačhen'. Xacho' Diosen' ben' zoa' yaban' bitw' che'nde' cuiayi' ne' toe'.

Cheyala' yezi' xencho' c̄he bene' lježcho' bene' chesejnilaže' Diosen'

(Lc. 17:3)

¹⁵ Še' to' bene' lježle' gone' mal' contr' to' le'e, šejle' šje' elenlene' diža' chopzle' can' nac' dan' chonen' cont' yetinjden'. Na' še' gwzenague' diža' dan' šje' elenlenen',

yezoe' binlo len Diosen' da' yoble. ¹⁶ Perw še bi gwzenague' diža' dan' šje'elenlenen', güenč che'ele yeto o yechope bene' lježle cont yesaque' testigw ba gota'yoele ben' yoša' xbab chen'. ¹⁷ Na' še bitwczę gwzenague' chele, le güe' diža' can' chonen' lao yogo'le gan' chdop chžagle chonxenle Diosen'. Na' še nęca gwzenagcze' che yogo'le, cbich gonlne' cuent len le'e chdop chžagle chonxenle Diosen'. Perw le gon cuent naque' txen len bene' ca' bi chesejnlaže' Diosen', ca no bene' güechixjw bene' chesonchgüa da' xinj.

¹⁸ 'Da' li žia' le'e, naquen lo na'le ye'le bene' ca' yesonxene' neda' bica' da' nac güen yesone' na' bica' da' ca' bi nac güen yesone'. Na' Diosen' gwzejni'ide' le'e naquen ye'gaclene' cont yežaguen len dan' ža Diosen'.

¹⁹ 'Na' da' yoble žia' le'e, še chople nita'le yežlio nga gwxi'ale bin' nabele Diosen', Ūa' Diosen' ben' zoa yaban' goncze' dan' nabelenen'. ²⁰ Na' gan' nžag chope šonle chonxenle neda', zoacza' txen len le'e.

²¹ Nach Pedroa' gwbigue' gože' Jesúsen':

—Ūana', še bene' lježa' chone' da' mal contr neda', žbał ni'a cheyała' yezi'xena' che'? žzelo do gaž ni'a?

²² Nach Jesúsen' gože'ne':

—Žia' le', gague cheyała' yezi'xen che lježle zelao do gaž ni'a, san yogo'te ni'a cheyała' yezi'xen che lježle.

Jempl che ben' bi bezi'xene' che dan' čala' bene' lježe'

²³ 'Na' yela' gwnabia' che Diosen' ben' zoa yaban' zaca'leben ca da' nga goc. Zoa to bene' gwnabia' ben' chesala' xmosę ca' xmechue'. Na' goclaže' yebeje' cuent len legaque'. ²⁴ Na' cate' gwzolagüe' bezi'e cuent che to toe', da' nechw bžin to xmosę ben' čala' zan millón. ²⁵ Na' mosen' bitwbi xmechue' gota' par yonežjuen'. Da'nan' bene' gwnabian' bene' mandaw ta'ogaque' len xo'ole', len xi'ine' ca' na' len doxen da' zjade che' cont yeyaxjw dan' čale' čen'.

²⁶ Nach mosen' bzoa xibe' lao bene' gwnabian' gota'yoede' le' gože'ne': "Ūana', gwdapešca yela' chxenlaže' len neda', na' yeyona' doxen dan' čala' čion'."

²⁷ Nach bene' gwnabian' beyaše'de' le' na' bezi'xene' che doxen dan' čale' na' bsane' le'. ²⁸ Perw na' cate' bechoj mosen' liž xanen', la' bežagtie' yeto mos lježe' bene' čala' late' xmechue'. Nach la' gwñizte' yene' gože'ne': "Yeyono' dan' čalo' čhian' netec na'a."

²⁹ Nach mos lježen' la' bzoate' xibe' lagüen', gože'ne': "Gwdapešca yela' chxenlaže' čhia' na' yeyona' doxen dan' čala' čion'." ³⁰ Perw na' mos nechon' bitw bzenague' che mos lježen'. La' gwyejte' jene' mandaw goseyixjue'ne' ližya na' bi yechoje' še bina' yonežjue' dan' čale' čen'.

³¹ Na' mos ca' yezica'chle cate' besele'ede' can' ben' mos nechon', leca gosacde' zi'. Na' ja'aque' lao bene' gwnabian' jaseže'ne' yogo'loł can' goca'.

³² Nach bene' gwnabian' goxe' mos nechua' da' yoble lagüe'na', gože'ne': "Le' naco' to bene' xi'achgua. Neda' bezi'xena' čhio' doxen dan' čalo' čhian' dan' gota'yoedo' neda' yezi'xena' čhion'. ³³ žBixchen' bi beyaše'do' mos lježo' ben' čale' čion' can' beyaše'da' le'?" ³⁴ Na' bža'achgua bene' gwnabian' na' bdie' le' lo na' bene' goseyixjue'ne' ližya ga žaglaogüe', na' bi yechoje' še bina' yeyixjue' doxen dan' čale' čen'.

³⁵ Nach Jesúsen' gože' bene' ca' zjanaque' le' txen:

—Can' gon Ūa' Diosen' ben' zoa yaban' len note'tezle še bi chezi'xenle che lježe' do yichj do laže'le bite'teze dan' chesonde' le'e.

19

Bi cheyała' yela'acho len no'ol chechon' cont soalencho no'ole yoble
(Mr. 10:1-12; Lc. 16:18)

¹ Na' Jesúsen' cate' beyož gwne' da' ca' beze'e distritw Galilean' na' gwłague' yegw Jordánna' beyeje' gan' mbane distritw Judean'. ² Na' bene' zan ja'aclen le', na' beyone' bene' ca' chesacšene.

³ Na' bał bene' fariseo ja'aque' gan' zoe'na', le gosaclaže' yesebeje'ne' diža' da' yosočhine' cont gosozie'ne' xya čhoł, nach gose'ene':

—¿Guac to bene' nšagna' yele'e len xo'ole' še bite'teze dan' chone' cbi cholaže' bene' chen'?

⁴ Nach gože' legaque':

—¿Bina' gwłable can' nyoj Xtiža' Diosen'? Žan cate' gwxe yežlion' Diosen' bene' bene' nechw ca' to bene' byo na' to no'ole. ⁵ Na' gwna Diosen': "Da'nan' bene' byon' gwsane' xaxne'e cont soalene' no'ole čhen' na' chope' yesaque' ca toz bene'!" ⁶ Na' ca' bich yesac čhope' san toze'. Da'nan' bi cheyała' yesyele'e, le Diosen' ba bcode' legaque'.

⁷ Nach gose'ene':

—Še naquen ca' ¿bixčhen' ben da' Moisésen' mandadw cate' to bene' yele'e len no'ol čhen' cheyała' čhas to yiš da' gwnežjue' no'ol čhen' ga güen' diža' besyele'ena'?

⁸ Jesúsen' gože' legaque':

—Da' Moisésen' be'e latje yela'ale len no'ol chele lagüe dan' nacle bene' güedenag len Diosen'. Perw cate' Diosen' bene' bene' nechw ca' bitw načo goclaže' yesyele'e. ⁹ Žia' le'e, note'teze bene' chele'e len no'ol che' na' cheque'e no'ole yoble, len neztede' no'ol chen' bitw naque' to no'ole chzoa xtoe', toz ca da' xinjen' chone' ca nac dan' chon ben' chata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca da' xinj gone' ca nac da' chon bene' chata'lene' no'ol che bene' yoble.

¹⁰ Nach bene' ca' zjanaque' Jesúsen' txen gose'ene':

—Še can' naquen che bene' byo na' no'ole, güench nono gwšagna'.

¹¹ Jesúsen' gože' legaque':

—Gague yogo' bene' yesejni'ide' da' nga, šinze bene' ca' ba bzejni'i Diosen' legaque' bi zejen. ¹² Nita' bene' bi žan yosošagne'e dan' gosaljje' bi zjanya' cuerp che', na' lecze nita' bene' bi chosošagne'e lagüe dan' gosone bene' legaque' cont bi zjanya' cuerp čhegaque'. Na' lecze ca' nita' bene' cbi chosošagne'e lagüe dan' chesazlaže'che' yesone' xšin Diosen' ben' zoa yaban' chnabi'e. Le gwzenag che dan' ba gwnian' še ba ben Diosen' cont chejni'ilen.

Jasesane' bidao' lao Jesúsen'
(Mr. 10:13-16; Lc. 18:15-17)

¹³ Na' ja'ac bene' jasesane' bidao' lao Jesúsen' cont xoa ne'e yichjgache' na' nabe' lao Diosen' gaclene' legache'. Perw bene' ca' zjanaque' le' txen gosediłe' bene' ca' zjančhe'ebe'. ¹⁴ Nach Jesúsen' gože'ne':

—Le güe' latje yesid bidao' ca' lagua' nga, na' bi gwžonle, le bene' ca' zjanac ca bidao' quinga, legaque' chosozenague' che Diosen' ben' zoa yaba cont chnabi'e yichjlažda'ogaque'.

¹⁵ Na' beyož gwžoa na' Jesúsen' yichjgache' gwñabe' lao Diosen' gaclene'be', nach gwyje' ga yoble.

Beñe' güego' beñe' goc beñe' gwñi'a

(Mr. 10:17-31; Lc. 18:18-30)

¹⁶ Na' goquen', to beñe' güego' bžine' gan' zoa Jesúsen', na' gože'ne':

—Maestrw, le' naco' beñe' güen. ¿Bi da' güen cheyała' gona' cont gata' yela' mban chia' toli tocañe'?

¹⁷ Nach Jesúsen' gože'ne':

—¿Bixchen' žo' naca' beñe' güen? Toz beñe' güen zoa, na' len' naque' Dios. Perw na' še chaclažo' gata' yela' mban čhio' toli tocañe, cheyała' gono' can' non Diosen' mandadw goncho.

¹⁸ Nach gože' Jesúsen':

—¿Bica' da' ca'?

Nach Jesúsen' gože' le':

—Nono gotle, bi gata' lenle no'ol bi nac no'ol chele o beñe' byo beñe' bi nac bene' chele, bi cuanle, bitw güe'le diža' güenlaže' che beñe' lježle. ¹⁹ Le gap bala'añ xaxna'le, na' le gaque lježle can' chaque cuinle.

²⁰ Nach beñe' güegon' gože' Jesúsen':

—Yogo' loł da' quinga gwzolagua' chonczan' cate' ñe' nactia' bidao'. ¿Bixe dan' chyažjeh gona'?

²¹ Jesúsen' gože'ne':

—Še chaclažo' gaco' cayanen' chazlaže' Diosen', jayete' yogo' da' de čhio', na' da' le'edo' čhen bnežjon beñe' yaše'. Nach še gono' ca', cate' yežino' yaba gan' zoa Diosen', da' zaca'ch gata' čhio'. Na' še ba beyož beno' can' žia' le', nach sao' gaco' neda' txen.

²² Perw na' beñe' güegon' cate' beyož bende' diža' can' gož Jesúsen' le', beza'yaše', le beñe' gwñi'achgua goque'.

²³ Gwde na' Jesúsen' gože' beñe' ca' zjanaque' le' txen:

—Da' li žia' le'e, leca zdebe naquen to beñe' gwñi'a gwzenague' che Dios ben' zoa yaba cont Diosen' ñabi'e yičhjažda'ogüe'. ²⁴ Da' yoble žia' le'e, bedao'ch te to be xen be nzi' camello to lo' nag yeše' clel ca to beñe' gwñi'a gwzenague' che Dios cont Diosen' ñabi'e yičhjažda'ogüe'.

²⁵ Na' beñe' ca' zjanaque' Jesúsen' txen leca besyebande' cate' gosende' xtižen', nach gosene':

—¿Noxen' šjayzoa len Diosen' še ca'?

²⁶ Jesúsen' gwñe'e legaque', nach gože'ne':

—Bibi de da' gac yeson benačhen' cont šjasynite' len Diosen', perw bi zoa da' nacho da' bi gac gon Dios.

²⁷ Nach Pedroa' gože' Jesúsen':

—Neto' ba gwlejičhito' yogo' da' de čheto' cont nacto' le' txen. ¿Bi da' güen gata' čheto' dan' ba gwlejičhito' da' ca'?

²⁸ Jesúsen' gože' legaque':

—Da' li žia' le'e, Diosen' gwsele' neda' golja' benač na' cate' yocobe' yežlion', neda' cui'a ñabi'a güen juisyw can' chnabia' Dios ben' zoa yaba. Na' le'e šižinwle cue'le cuita'na' ñabia'le šižinw cuen beñe' ca' zjanaque' xi'in diaža che da' Israel. ²⁹ Na' note'teze beñe' ba gwlejičhje' liže', biše', zane', xaxne'e, xoc'ole', xi'ine' o yežlio che', dan' chzenague' chia', Diosen' gwnežjue' le' da' zaca'ch da' xench ca yogo' da' ca'. Na' lecze gata' yela' mban che' toli tocañe.

³⁰ Perw zan beñe' zjanaque' beñe' žialao ña'a, gwžin ža cate' yesaque' beñe' bzebe. Na' beñe' zjanaque' beñe' bzebe ña'a, gwžin ža cate' yesaque' beñe' žialao.

20

Jempl che bene' güen zin ca'

¹ Nach Jesúsen' gože' leaque': —Yela' gwnabia' che Diosen' ben' zoa yaban' zaca'leben ca da' nga goc. To bene' nape' to yežlio gan' že'chgua yag uvas. Na' gwze'e ližen' to zil do cheni' gwyeje' gan' chac ya'a jatiljue' bene' güen zin cont yesone' zin yežlio chen' žana'. ² Na' gosexenlaže' bene' güen zin ca' to denario chixue' to toe' con ca chac mosen' tža zin. Nach gwsele' leaque' gan' jasene' žinna'. ³ Na' do cheda ga gozeje' gan' chac ya'an, na' ble'ede' nita'ch bene' bibi zin de yesone'. ⁴ Na' gože' leaque': “Lencze le'e le šja'ac gan' že' yag uvas chian' le šjen zin na' chixjwcza' le'e ca cheyala'.” Nach ja'ac bene' ca'. ⁵ Na' da' yoble gwyeje' do guagwbiz na' do cheda šone. Bezle'ede' nita'ch bene' bibi zin chesone' nach gwsele' leaque' cont yesone' zin gan' že' yag uvas chen'. ⁶ Na' ca do cheda gayo' šeže'le gozeje' da' yoble ble'eczde' nita'ch bene' bibi zin chesone'. Na' gože' leaque': “¿Bixchen' bi gwyeje' zin?” ⁷ Nach gose'ene': “Notno gwne neto' šjento' xšine'.” Nach goze'e leaque': “Lencze le'e le šja'ac le šjen zin gan' že' yag uvas chian'. Na' chixjwcza' le'e ca cheyala'.” Nach ja'ac bene' ca'. ⁸ Na' cate' bžin hor bosa' xan yag uvasen' bene' güen zin ca', nach gože' mos blao chen': “Beyax bene' güen zin ca' cont chixjo'ne', solao chixjo' bene' ca' besela'ac bzebe, na' yeyože' len bene' ca' besela'ac da' nechw.” ⁹ Nach mos blaon' zgua'tec gwdixjue' bene' ca' gosezolagüe' gosone' zin cheda gayo' šeže'le tgüeje' denario to toe'. ¹⁰ Na' cate' gwdixjue' bene' ca' gosezolagüe' gosone' zin šezildao', gosacde' chixjoch' leaque' da' zčha'och dan' gosezolagüe' gosone' zin šezildao'. Perw tozcze can' gwdixjue' yogo'lo'te'. ¹¹ Na' cate' beyože' gosezi' laxjw bene' ca' gosezolao žinna' šezildao', gosadoe' diža' xan žinna'. ¹² Gose'ene': “Do ža bžaglaochguato' lo da' zeye' bento' zin chion'. Na' tozcze can' gwdixjo' neto' len bene' ca' besela' bzebe, len to hor güejgan' gosone' zin.” ¹³ Perw na' xan žinna' gože' toe': “Migw chia', bitwbi da' mal chona' len le'. ¿Gague gwxenlažo' to denario chixjua' to tole? ¹⁴ Laxjon' ba gwxi'o, guac yeyejo'. Chaclaža' gwnežjua' bene' ca' to denario güeje' con can' be'na' le'e la'czla' besela'aque' bzebe. ¹⁵ ¿Bixchen' chxi'o neda' neče' dan' naca' bene' šagüe'? Naquen lo na' gona' con ca' chaclaža' len da' de chia'.”

¹⁶ Nach Jesúsen' gože' bene' ca' bosozenag jemplen':

—Can' naquen, nita' bene' zjanaque' bene' bzebe na'a, perw lecze gwžin ža cate' leaque' yesaque' bene' žialao. Na' nita' bene' zjanaque' bene' žialao na'a, perw gwžin ža yesaque' bene' bzebe. Diosen' chaxe' yogo'lol bene' cont yesejle'e che', perw bał guen' chosozenague' che', na' legacze' chbeje' cont chesaque' xi'ine'.

Da' yoble chyixjue'e Jesúsen' gate'
(Mr. 10:32-34; Lc. 18:31-34)

¹⁷ Jesúsen' len yezan bene' zja'aque' Jerusalenna'. Na' šlac zjangüe'e nezen' gwlejiže' bene' šižinw ca' gwleje' cont zjanaque' txen len le' na' gože' leaque':

¹⁸ —Na'a ba zejcho Jerusalenna' gan' yesone' neda' lo na' bžox gwnabia' ca' na' lo na' bene' ca' chososed chosolo'ede' dan' bzoj da' Moisés, na' yesechoglagüen' chia' yesote' neda', neda' naca' ben' gwseła' Dios golja' be'nač. ¹⁹ Na' yesone'nda' lo na' bene' bi zjanaque' bene' Israel cont yesonle' chia', na' yesot yeseyine' neda', na' yesote'nda' yosode'e neda' le'e yag cruz, perw yeyon ža yebana' ladjo bene' guat ca'.

Xna' Jacobo na' Juanna' gwnabe' yesebe' xi'ine' ca' cuit Jesús'en gan' nabi'ena' (Mr. 10:35-45)

²⁰ Na' ja'ac xi'in Zebedeo, Jacobo len Juan, na' len xna'gaque' lao Jesús'en'. Na' xna'gaquen' bzoa xibe' lao Jesús'en' gože'ne':

—Chnabda' le' to goclen.

²¹ Nach Jesús'en' gože'ne':

—¿Bi goclen chaclažo' gona'?

Nach xna'gaquen' gože'ne':

—Chaclaža' gono' cont xi'ina' quinga yesebi'e šla'a güeje cuito'na' cate' žin ža nabi'o.

²² Jesús'en' gože' Jacobo na' Juanna':

—Le'e cabi nezele bi dan' chñable. ¿Gwčhejlaže'le tele yela' zi' yela' ya' ca dan' tia' neda' na' gac čhele can' gac čhia'?

Nach bosyoži'e xtižen' gose'ene':

—Gwčhejlaže'to'.

²³ Nach Jesús'en' gože' legaque':

—Da' licze tele yela' zi' yela' ya' ca dan' tia' neda' na' gac čhele can' gac čhian', perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Xa' Diosen' gaquen che'.

²⁴ Nach cate' yeši bene' ca' zjanaque' le' txen gosende' can' gosena bene' ca' čhope, beseloque' legaque'. ²⁵ Nach Jesús'en' goxe' yogüe' cont gosebigue' lagüen' na' gože' legaque':

—Nezeczzele bene' gwnabia' čhe to to nación na' bene' blao ca' chesone' byen chosozenag bene' čhegaque'. ²⁶ Perw bi naquen ca' len le'e. San note'tezle chaclaže'le gacle bene' blao, čheyała' gwzexjwlaže'le gac len bene' lježle. ²⁷ Na' še note'tezle chaclaže'le gacle bene' žialao, čheyała' gon cuinle ca xmos bene' lježle. ²⁸ Ca'cze naquen len neda' naca' ben' gwseła' Diosen' golja' benač. Gague za'a cont yesaclen bene' neda' san za'a cont gaclena' bene', na' chzanlaže' cuina' yesote' neda' neče xtoła' benačen'.

Jesús'en' bene' cont čhope bene' lčhoł besyele'ede' (Mr. 10:46-52; Lc. 18:35-43)

²⁹ Nach cate' besyeya'aque' ciuda Jericó, bene' zan zjasenagüe' Jesús'en' len bene' ca' zjanaque' le' txen. ³⁰ Na' čhope bene' lčhoł zjachi' chanez gan' zjayda Jesús'en'. Na' cate' gosacbe'ede' Jesús'en' zej gan' zjachi'ena' nach chososya'adie' gose'e le':

—Xanto', len' naco' xi'in diaža čhe da' rey Davin'. Beyaše'laže'šca neto'.

³¹ Nach bene' ca' chesyede gan' zjachi'ena' gosediłe' legaque' cont yesenite' šize. Perw na' gosen'e' zižjeh gose'ene':

—iXanto', len' naco' xi'in diaža čhe da' rey Davin', beyaše'laže'šca neto'!

³² Jesús'en' gwleze' gan' nite'na', nach goxe' legaque' gosebigue' lagüen'. Nach gože'ne':

—¿Bin' chaclaže'le gonda' le'e?

³³ Nach gose'ene':

—Xanto', chaclaže'to' yele'eto'.

³⁴ Jesús'en' beyaše'laže'de' legaque' na' gwdane' yejlaogaquen', nach la' besyele'etede', na' gosa'ogüe' le'.

21

Gosonxene' Jesús'en' cate' beyo'e Jerusalén
(Mr. 11:1-11; Lc. 19:28-40; Jn. 12:12-19)

¹ Na' cate' ba zoa yesežine' Jerusalénna' besežine' gan' chi' yež Betfagé, gan' zoa ya'a dan' nzi' Ya'a Olivos. Na' Jesús'en' gwsele' mandadw čhope beñe' ca' zjanaque' le' txen, ² gožgaque'ne':

—Le šja'ac yež dan' chi' gała'ze, na' cate' žinlen' na' yeželele to burr be no'ole da'ba' yag na' nche'te to xi'inda'oba'. Le sežgacba' na' le che'gacba' nga. ³ Na' še bi ye' beñe' le'e na' ye'lné: “Xanto'na' chyažjde' legacba'.” Na' la' yedyesantecze'ba' len le'e.

⁴ Goc yogo' da' qui cont goc can' bzoj to ben' bzoj Xtiža' Diosen' cani', gwne':

⁵ Gož beñe' ca' nita' Jerusalénna':

“Le na'šč, ba za' rey čhelen',

žie' čože' to burr dao', xi'in beyixe' be choa' yoa'.

Ze'e ca to beñe' bi naque' beñe' blaó.

⁶ Na' ja'ac beñe' ca' yež dao' dan' gož Jesús'en' legaque' ca', na' gosone' can' ben Jesús'en' mandadw. ⁷ Na' besyeče'e burroa' len xi'inba' lao Jesús'en' na' gosežoá no xagaque' čože'ban' na' gwžia Jesús'en' be daon' cont gweje' Jerusalénna'. ⁸ Na' beñe' zan gosonxene' Jesús'en' goseyixjw no xagaque' lo nez cont blej burron' len na' yebale' gosechogue' xoze' yag na' goseyixjuen' lo neza'. ⁹ Na' beñe' zjažialao na' lecze beñe' za'ac čože' bososye'e gosene':

—iLeca beñe' zaca' bengá nac xi'in diaža che da' rey David! iMbalaz ben' za' nga gwseła' Xancho Diosen' le' cont nabi'e! iLeca beñe' zaca' ben' zoa yaban'!

¹⁰ Na' cate' bžin Jesús'en' Jerusalénna' yogo' beñe' ca' že' ciudan' besyebande', na' gosene':

—¿No bengá bla' nga?

¹¹ Na' beñe' ca' nžag Jesús'en' bosyoži'e xtiža'gaque' gosene':

—Bengan' Jesús beñe' za' yež Nazaret gan' mbane distritw Galilea na' cho'e xtiža' Dios.

Jesús'en' bebeje' beñe' ca' cheson ya'a yodao' blaon'
(Mr. 11:15-19; Lc. 19:45-48; Jn. 2:13-22)

¹² Na' Jesús'en' gwyo'e chyó'o yodao' blaon' na' bešaše' yogo' beñe' ca' chesote' na' beñe' chesa'o na'. Nach bchixe' xmes beñe' ca' chosoša' mechw, na' yag ga chesebe' beñe' ca' chesote' ngolbex. ¹³ Na' gože' legaque':

—Nyojcze Xtiža' Diosen' žan: “Yesene' ližan' naquen to latje gan' yesoļ güiž beñe' neda’”, perw le'e chonlen ca to latje ga že' beñe' gwban.

¹⁴ Na' beñe' lčhoļ ca' na' len beñe' ca' nxiñj ni'e gosebigue' lao Jesús'en' šlac zoe' chyó'o yodaon'. Nach beyone' legaque'. ¹⁵ Perw na' bxož gwnabia' ca' na' beñe' ca' chososed chosolo'e dan' bzoj da' Moisés'en' leca beseže'e cate' besele'ede' yela' guac ca' dan' ben Jesús'en'. Na' lecze beseže'e cate' gosende' can' bososya'a bi' bixjw ca' chyó'o yodao' blaon', gosenabe': “Leca beñe' zaca' bengá nac xi'in diaža che da' rey David.” ¹⁶ Nach gose'e Jesús'en':

—¿Zendo' bin' gosena bidao' ca'?

Jesús'en' boži'en gože' legaque':

—Zenda'. ¿Biña' gwlable can' nyoj Xtiža' Diosen'?, žan:

Ba beno' cont bi' bixjw ca' na' len bi' ne' chesaže' chesonxembe' le'.

¹⁷ Na' bechoje' gan' nita' beñe' ca' na' beze'e ciudan'. Na' že'na' jayga'ane' Betania.

*Ben Jesúsen' cont gwbiž yag yixgüigw**(Mr. 11:12-14, 20-26)*

¹⁸ Na' zil beteyo besyeya'aque' Betanian' jaseya'aque' Jerusalenna' da' yoble. Na' šlac zjangüe'e nezen' gwdon Jesúsen'. ¹⁹ Na' ble'ede' to yag yixgüigw zoan cho'a nezen' na' jañe'e še žia yaguen' yixgüigw. Perw bibi bželde', con xlaguen' na'že žia. Nach gožen':

—Bich bi yixgüigon' cuio'.

Na' la' gwbižte yaguen'. ²⁰ Nach bene' ca' zjanaque' le' txen besyebande' cate' besele'ede' can' goquen', nach gose'ene':

—¿Nac goquen' la' gwbižte yaguen'?

²¹ Na' Jesúsen' gože' legaque':

—Da' li žia' le'e, še chejnilaže'le Diosen' na' bitw gačžejaže'le, guaque gonle can' ba benan' cont gwbiž yaguen'. Na' lecze ca' guac ye'le ya'a nga: “Gwcuase nga na' jaso a lo' nisdakon”, na' gac can' nalen'. ²² Na' še chejnilaže'le Diosen', bite'teze dan' nabelene' cate' yol güižlene', goncen' le'e.

*Yela' chnabia' che Jesúsen'**(Mr. 11:27-33; Lc. 20:1-8)*

²³ Nach Jesúsen' gozeje' yodao' blaon' da' yoble. Na' šlac chsed chlo'ede' bene' ca' že' na', bžoz gwnabia' ca' na' bene' gole blao ca' chesenabi'e nación chechon' gosebigue' cuit Jesúsen'. Nach gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chono' da' qui?

²⁴ Nach Jesúsen' boži'e xtiža'gaquen', gwne':

—Lecze de to da' nabda' le'e. Še yoži'ile xtižan' nach ni'a le'e bi yela' gwnabia' chonlendan'. ²⁵ Le našč neda': ¿non' gwsela' da' Juanna' bžoe' bene' nis? ¿Dios nan' gwsela'ne', še benachen'?

Nach legacze' gose' lježe':

—Še ye'chone' Dios gwsela' le', na' ye'e chio': “¿Bixchen' ca' gwyejle'le che'?”

²⁶ Na' bi gac ye'chone' benach gwsela' le', le yogo'te bene' že' nga chesejle'e Diosen' gwsela' da' Juanna' be'e xtiže'na', na' xož bi yesonde' chio'.

²⁷ Nach gose'e Jesúsen':

—Bi nezeto'.

Nach gože' legaque':

—Lecze neda' bi yapa' le'e bi yela' gwnabian' chonlenda' da' ca'.

Jempl che chope xi'in bene'

²⁸ Na' Jesúsen' gože' legaque':

—Le gon xbab bi zeje jempl nga: Gwzoo to bene' gwnita' chope xi'ine'. Na' gože' tobe': “Xi'ina', chaclaža' šejo' güen žin na'aža gan' že' yag uvas chia' ca'.” ²⁹ Nach xi'inen' gožbe' le': “Bitw ša'a.” Perw gwdele beyombe' xbab nach gwyejbe'. ³⁰ Nach gozeje' gan' zoa xi'inen' yeto, na' ježe'be' can' gože' bi' biše'ben'. Na' la' gožte bin' le': “Guaccze, na' ša'a.” Perw bitw gwyejbe'.

³¹ Gwnašč neda', ¿no bi' ca' chope ben can' gwналаže' xabe'?

Nach gose'ene':

—Bi' nechoa'.

Nach Jesúsen' gože' legaque':

—Ca'cze naquen. Na' da' li žia' le'e, bene' güechixjw ca' na' no'ole ca' chja'aclen note'teze bene' byo yobech yosozenague' che Diosen' cont nab'le yichjlažda'ogaque' clcl ca' le'e. ³² Ca' nac Juanna' ben' bžoe' bene' nis, bide' laolen' na' gwduxjue'ede' le'e naquen' cheyala' gonle cont yebe Diosen' le'e.

Perw bitw gwyejle'le che'. Na' bene' güechixjw ca' na' no'ole zle' ca' gosejle' che'. Na' cate' gocbe'ele bene' ca' ba gosejle'e che', bitw betinjele xtoła'le ca' cont šejle'le che dan' bsede da' Juanna'.

Jempl che mos mal ca'

(Mr. 12:1-12; Lc. 20:9-19)

³³ Le gwzenag yeto jempl nga. Gwzoa to bene' na' goze' to cue' xen yag uvas lo yežlio che' na' gwlo'en le'ej. Na' na'teze bene' to ga yesesie' uvasen' cont choj xisen'. Na' lecze bene' to da' sibe ca to campanaryw ga yesecua' bene' yosogüia yesene'e yag ca'.

'Na' bcua'ane' yežlion' lo na' bene' yesonši'e yag uvasen' na' gwze'e gwyeje' zito'. ³⁴ Cate' bžin ža yosyotobe' cosešen', gwsele' to chope xnose' gan' že' bene' ca' nac lo na'gaque' yag uvasen' cont šjasyexi'e to tlacw cosešen' dan' cheyala' si'e. ³⁵ Perw na' bene' ca' nac lo na'gaque' yag uvasen' gosezene' mos che' ca'. Goseyine' toe', na' yetoe' bosožie'ne' yej, nach yetoe' gosote'ne'. ³⁶ Nach gossela' xan yag uvasen' mos zanch clel ca' bene' ca' gwsele' da' nechw, perw lecze can' gosonde' bene' nechw ca', lecze ca' gosonde' legaque'.

³⁷ Nach gwdena' xan yežlion' gwsele' cuinze xi'inen', gocde' yesezi'e xtižen'. ³⁸ Perw na' bene' ca' nac lo na'gaque' yag uvasen' cate' besele'ede' xi'ine'na', nach gose' lježe': "Bengan' yega'anlene' yežlio nga cate' gat xen'. Le šo'o gotchone' cont yega'anlenchon." ³⁹ Nach gosezene'ne', besyebeje'ne' gan' že' yag ca' na' gosote'ne'.

⁴⁰ Beyož be' Jesúsen' jempl nga, gozne':

—¿Nacxe chaquele gon xan yežlion' len bene' ca' bocua'anlene' yag uvas chen' cate' yežin cuine'?

⁴¹ Nach bosyoži'e xtižen' gosene':

—Šeje' šjetoe' bene' mal ca', na' yodie' yežlion' lo na' bene' yoble bene' yeson güen yosyonežjue'ne' to tlacw cosešen' cate' žin ža yosyotoben'.

⁴² Jesúsen' gože' legaque':

—Ca'czen'. ¿Biña' gwlable ga nyoj Xtiža' Diosen', žan quinga?:

Yej dan' bi gosaclaže' bene' güen yo'o ca' yosočhine',

len ba naquen yej squin.

Da' nga ben Xancho Diosen',

na' naquen to da' yežejecho.

⁴³ Da'nan' žia' le'e, da' bi chzenagle che Diosen', cuejyichje' le'e na' cueje' bene' yoble bene' yosozenag che' cont nabi'e yichjlažda'ogaque'. ⁴⁴ Na' ca' nac yejen', note'teze bene' lažo' lo yeja' na' cue'žoše', na' note'teze bene' chiže' yeja' cate' lažon' na' gwšošen le'.

⁴⁵ Na' bžox gwnabia' ca' na' bene' fariseo ca', cate' gosende' jempl ca' dan' be' Jesúsen', gosacbe'ede' be'e diža' che' legaque' dan' bi chesejnilaže' le'.

⁴⁶ Nach gosaclaže' yesezene' le', perw besežebe' bi yesone bene' ca' nžague' legaque', le' yogüe' gosejle'e gwseła' Diosen' Jesúsen' cont cho'e xtiže'na'.

22

Jempl che ben' bene' lni cate' bšagna' xi'ine'

¹ Na' da' yoble bsd blo'e Jesúsen' bene' ca' len jempl, gozne':

² —Yeła' gwnabia' che Diosen' zaca'leben ca' da' nga goc. Gwzoa to bene' gwnabia' na' bene' gastw cate' bšagna' xi'ine'. ³ Na' cate' bžin hor solao lñin' gwsele' xnose' ca' cont jasexi'e bene' ca' ba bol güiže' šja'ac lñina', perw notno goclaže' šja'ac lñi chen'. ⁴ Nach gože' yeto xonj xnose' ca': "Le šjež bene' ca' ba

bol̄ güižan' ye'ln'e' ba bsini'a dan' gagwchona'. Ba betua' be dao' be chesane' na' ba bsini'a dan' gagwcho lō ln̄in'. Na' ye'ln'e' yeside' gagwcho dan' ba bsini'an'." ⁵ Perw bene' ca' ba gosata'yoede' cont šja'aque', bitw gosone' cuent dan' gose' mos ca' legaue'. Toe' gwyeye' jane'e' yežlio che', na' yetoe' gwyeye' jene' negosyw. ⁶ Na' yebale' gosenize' mos ca' gwsela' bene' gwnabian' na' gosonde' legaue' zi' na' gosote' legaue'. ⁷ Na' leca bž'a'a bene' gwnabian'. Na' gwsele' soldadw che' ca' jasete' bene' ca' gosot xmosen' na' bosozeye' lažgaquen'. ⁸ Nach bene' gwnabian' gože' xmosen': "Ba bsini'a dan' gagwcho lō ln̄in', perw bene' ca' ba bol̄ güiža' nacbia' bitw zjazaque' yeside'. ⁹ Le šja'ac le šjata yogo' nez na' ye'le yogo' bene' yežagle yeside' ln̄in'." ¹⁰ Na' mos ca' ja'aque' yogo' nez na' jasetobe' con yogo' bene' besežague', no bene' naque' bene' güen na' no bene' naque' bene' mal, cont beža' yo'o gan' chac ln̄in'.

¹¹ Perw cate' gwyo'o bene' gwnabian' jane'e' bene' ca' že'na' na' ble'ede' to bene' bi nyaze' lache' da' bnežjue' yesaze' lō ln̄in'. ¹² Nach gože' le': "Migw čhia', žnac goquen' gwyo'o nga bitw nyazo' lache' dan' beña' čhazo'?" Nach bena' bitw beželde' bi ye'ene'. ¹³ Nach bene' gwnabian' bene' mandadw yosočhej xmos'e' ca' ni'a na' bena' cont yesyebeye'ne' na' yesebeque'ne' gan' nac čhol, ga cuežyaše' na' gan' gagwxetje laye' tantw žaglagüe'. ¹⁴ Can' naquen, Diosen' chaxe' yogo' bene' cont yesejle'e' che', perw bal̄ guen' chosozenague' che' na' legacze' chbeje' cont yesaque' xi'ine'.

*Ca nac dan' cheyala' gaxjw
(Mr. 12:13-17; Lc. 20:20-26)*

¹⁵ Nach bene' fariseo ca' besežague' na' bosoxi'e' naclen' yesone' cont yesebeje' Jesúsen' diža' da' yosode'ede' cont yesagüe' xya che'. ¹⁶ Na' bene' fariseo ca' gosesele' bal̄ bene' zjanaque' txen len legaue' na' yebal̄ bene' chesone' txen len Herodesen' cont jaseže' Jesúsen':

—Maestrw, nezeto' zoatezo' cho'o diža' li. Na' nezeto' diža' li cho'o chsed chlo'edo' bene' can' chazlaže' Diosen' goncho. Na' bi chono' cuent bi ža bene', le toz can' chono' len note'teze bene'. ¹⁷ Da'nan' zedenabeto' le' cont nao' neto' can' chacdo' cheyala' gonto'. žNaquen binlo no chixjw da' cheyala' čhixjwcho lao ben' nac la'zelagüe bene' gwnabia' ben' chi' Roma, še bi?

¹⁸ Jesúsen' goche'ede' yela' xi'a čhegaquen', nach gože' legaue':

—žNacle bene' gwxiye'! žBixčhen' chaclaže'le yoslažo'le neda' len xtižan'?

¹⁹ Le gwlo'e neda' to mechw dan' chyixjwle che gobiernen'.

Nach goso'ene' to mechw dan' nzi' denario. ²⁰ Nach Jesúsen' gože' legaue':

—žNo lao dan' da' le'e mechw nga? na' žno la da' nyoj le'en ni'?

²¹ Nach goso'ene':

—Čhe César ben' nac la'zelagüe bene' gwnabia' ben' chi' ciuda Roman'.

Nach Jesúsen' gože' legaue':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

²² Nach cate' gosende' xtiža' Jesúsen' besyebande'. Nach besyeya'aque' gan' zoe'na'.

*Cate' yesyeban bene' guat ca'
(Mr. 12:18-27; Lc. 20:27-40)*

²³ Na' lo ža na'teze besežin bal̄ bene' saduceo gan' zoa Jesúsen'. Bene' ca' chesene' bene' guaten' bi yesyebane'. Nach gosenabde' le', goso'ene':

²⁴ —Maestrw, da' Moisésen' gwne': "Še to bene' byo nšagne'e na' gate' sin nono xi'ine' zoa, bene' biše' ben' ba goten' cheyala' yošagna'lene' no'ol güezeba'

cont yesenita' xi'in diaža che da' bišen'. ²⁵ Na' len neto' gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. Na' bene' gwchopen' bošagna'lene' no'ol güezeba'. ²⁶ Na' lecze gote' nono xi'ine' gwnita'. Lecze ca' goc len bene' gwyona', bžinten bene' gaža' yogo'lole' gosac che' ca'. ²⁷ Na' gwde gosat yogo'loł bene' ca', nach got len no'ola'. ²⁸ Na' cate' yesyebane' ladjo bene' guat ca', ĩnox bene' ca' soalene' no'ola' ca' xo'ole'?, le yoguen' bosyošagna'lene' le'.

²⁹ Na' gož Jesúsen' legaque':

—Clelen' chonle xbab dan' žale ca', le bi nezele can' ža Xtiža' Dios dan' nyojen, neca nombiale yela' guac chen'. ³⁰ Caten' yesyeban bene' guat ca', bich yosošagne'e, neca yosonežjo xi'ine' no'ol gwšagne'e, le yesaque' ca' angl bene' zjazoa yaba. ³¹ Na' ca' nac dan' yesyeban bene' guat ca', ĩbina' gwlabale da' nga can' nyoj Xtiža' Diosen'? Žan: ³² “Neda' naca' Dios ben' chonxen Abraham, ben' chonxen Isaac na' ben' chonxen Jacob”. Bene' guat ca' bi chesonxene' Diosen', san bene' zjamban.

³³ Na' bene' ca' zjanžaguen' besyebande' cate' gosende' diža' dan' bsed blo'ede' legaque'.

Dan' nac da' blaoch dan' ža Diosen' cheyała' goncho

(Mr. 12:28-34)

³⁴ Na' cate' gosene bene' fariseo ca' can' bzoaži Jesúsen' bene' saduceo ca', nach besedobe' jasa'aque' lagüen'. ³⁵ Na' to ben' nsedchgüe' ley dan' bzoj da' Moisés lecze goclaže' cueje' Jesúsen' diža' da' gwchine' contr le', gože'ne':

³⁶ —Maestrw, lo ley che Diosen', ĩnon' nacch da' žialao da' zjanyojen da' ža Diosen' cheyała' goncho?

³⁷ Nach gož Jesúsen' le':

—“Cheyała' gaguecho Xancho Diosen' con ca' zelao chejni'icho do yichj do laže'cho.” ³⁸ Lenña' naquen da' žialaoch na' da' blaoch lagüe da' ca' ža Diosen' cheyała' goncho. ³⁹ Na' da' gwchopen' zejgałan' ca', žan: “Cheyała' gague lježcho ca' chaque cuincho.” ⁴⁰ Choje da' ca' ža Diosen' cheyała' goncho chzejni'in chio' can' zeje doxen dan' bzoj da' Moisésen' na' dan' bosozoj bene' ca' goso'e xtiža' Diosen' cani'.

Criston' naque' xi'in diaža che da' rey David

(Mr. 12:35-37; Lc. 20:41-44)

⁴¹ Na' šlac ne' zjanžag bene' fariseo ca', ⁴² Jesúsen' gože' legaque':

—ĩBixe xbab chonle che Criston' ben' gwlej Diosen' cont yedenabi'e? ĩNo xi'in diaža che naque'?

Na' gose'ene':

—Xi'in diaža che da' rey Davin'.

⁴³ Nach Jesúsen' gože' legaque':

—Še ca' naquen, ĩbixchen' cate' da' David bzoje' can' blo'e Spiritw che Diosen' le', gwne' Criston' naque' Xane'? Quinga bzoje':

⁴⁴ Xancho Dios gože' Xanan':

“Gwche'edo' cuita' nga nabia'cho txen,

na' gona' cont yogo' no' chesegue'e le' yosozexjw yichje' yosozenague' chio'.” ⁴⁵ ĩNacxe gac nacho Criston' xi'in diaža che da' rey David? le' cuin Davin' gože' le': “Xana”.

⁴⁶ Na' notoch no' goc yosyoži'e xtižen'. Na' gwzolao žana' notoch no' besyeyaxje bi yesenabde' Jesúsen'.

23

Xtola' bene' fariseo ca' na' bene' ca' chososed chosolo'e leyna'
(Mr. 12:38-40; Lc. 11:37-54; 20:45-47)

¹ Nach Jesúsen' gwzola' be'e diža' len bene' ca' zjanaque' le' txen na' len bene' ca' zjanžague' gan' zoe'na', gwne':

² —Bene' ca' chososed chosolo'e ley na' bene' fariseo ca' ba zjanlane' xlatje da' Moisésen' cont chosozejni'ide' bene' ley che Diosen'. ³ Na' da'nan' cheyala' gwzenagle chegaque' cate' chosozende' le'e can' ža leyna', na' cheyala' gonle can' chosozejni'ide' le'e. Perw bitw gonle can' cheson legaque', le legaque' bitw chesone' dan' chesene' cheyala' gac. ⁴ Legaque' chosozanche' dan' ža leyna'. Chesonen' ca to yoa' da' nono soe gua' na' chesaclaže' gua' bene' yoble len na' bitw chesaclaže' yeso'en legaque'. ⁵ Ca nac bene' ca', yogo' dan' chesonen', chesonen' ga yesele'e bene' can' chesonen' contze yesonxene' legaque'. Chio' bene' Israel nchejcho caj dao' de yid do na'cho na' do loxgacho na' lo' caj dao'na' chgo'ošagüe'cho to pedas yiš gan' nyoj late' güeje Xtiza' Diosen'. Perw ca nac bene' ca' chososed chosolo'e ley che Diosen' na' bene' fariseo ca', zjanonche' caj dao' chegaque' da' xench ca yezica'chle bene'. Na' lecze chesone' lox xagaque' da' tonech clcl ca che bene' yezica'chle. ⁶ Chesyebede' chesebi'e gan' chesebe' bene' blao cate' chja'aque' gan' chac no lni na' cate' chja'aque' yodao' chegaque'. ⁷ Chesyebede' chesap bene' legaque' bala'an cate' chesyěžague' lagüe ya'a. Na' chesyebede' yese' bene' legaque' maestrw.

⁸ Perw žia' le'e, bi gonle byen ye' bene' le'e maestrw, le toz neda' Cristo naca' Maestrw chele. Na' yogo' le'e chejnlaže'le neda' nac biše' lježle tole yetole. ⁹ Na' lecze bitw gonxenle note'teze bene' blao ye'Ine': "Xato". Toze Diosen' ben' zoa yaba naque' Xacho. ¹⁰ Na' bitw güe'le latje ye' bene' le'e: "Xana", le toz neda' Cristo naca' Xanle. ¹¹ Še no le'e nacle bene' blaoch, cheyala' gwzexjw yichjle gaclen lježle. ¹² Le note'teze bene' chonxen cuine', Diosen' gone' cont si'e zto' lagüen'. Na' note'teze bene' chzexjwlaže' lagüen', Diosen' gone' cont gaxene'.

¹³ 'iNyaše'chguaze gac che le'e chsd chlo'ele ley dan' bzoj da' Moisésen' na' le'e bene' fariseo! Chziye'le bene' cont bi yosozenague' che Diosen', le bi chaclaže'le nabia' Diosen' yichjlažda'ogaque', na' lecze le'e bi chzenagle che Diosen' cont nabi'e yichjlažda'olen'.

¹⁴ 'iNyaše'chguaze gac che le'e chsd chlo'ele ley dan' bzoj da' Moisésen' na' le'e bene' fariseo! Chziye'le no no'ole güezebe cont checa'ale yo'o chegaque'. Na' cate' choj güižle Diosen', šša choe'le diža' cont yesaque bene' leca chonxenle'. Gacchle castigw clcl ca yezica'chle bene' güen da' xinj.

¹⁵ 'iNyaše'chguaze gac che le'e chsd chlo'ele ley dan' bzoj da' Moisésen' na' le'e bene' fariseo! iNacle bene' gwxiye'! Chejtez chejle chjatiljwle bene' zito' bene' yeson txen len dan' chsd chlo'elen'. Na' cate' chželelene' chzejni'ilne' cont yesaque' bene' xi'ach clcl ca le'e.

¹⁶ 'iNyaše'chguaze gac che le'e! iNacle ca bene' lchoj bene' chesacde' guac yesegüe'e nez bene' yoble! Žale note'teze bene' še ne': "Yodao' blaon' zoan testigw chia' gona' can' ba gwnia'", bitwbi zejen dan' chnen'. Perw še že': "Oro dan' de lo' yodaon' zoan testigw chia' gona' can' ba gwnia'", nach cheyala' gone' can' gwnen'. ¹⁷ iLe'e nacle ca to bene' lchoj na' bitw chejni'ile! Oron' bitec bi zacan'. Yodao'na' gan' yo'o oron' lenna' zaca'chen, le dan' yo'o oron' lo'ennan', da'nan' oron' naquen che Dios. ¹⁸ Na' lecze žale še to bene' že': "Mes gan' chosozeye' beyixe' ca' chesonxene' Diosen', zoan testigw chia' gona' can'

ba gwnia", bitwbi zejen xtižen'. Perw na' še že': "Dan' xoa lo mes lo' yodaon' zoan testigw chia' gona' can' ba gwnia", nachen' cheyala' gone' can' gwnen'.¹⁹ ¡Le'e nacle ca bene' lchol na' bitw chejni'ile! Dan' chosozeye' chesonxene' Diosen' bitec bi zacan'. Mes gan' chesexoe' dan' chosonežjue' Diosen', lenna' zaca'chen, le naquen che Dios.²⁰ Še bene' že': "Mes dan' zoa lo' yodaon' zoan testigw chia' gona' can' ba gwnia", lencze dan' xoa lo mesen' zoan testigw che'.²¹ Na' še bene' že': "Yodaon' zoan testigw chia' gona' can' ba gwnia", lecze zejen Diosen' naque' testigw che', le yodaon' naquen che Dios na' nan' zoe'.²² Na' še bene' že': "Yaban' zoan testigw chia' gona' can' ba gwnian", zejen Diosen' naque' testigw che', le nan' zoa Diosen' chnabi'e.

²³ ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! La'czla' chnežjwle Diosen' to part lao ši part che yixegüe, che oreg, che comin, na' che bichle cuan chele, bibi zejen dan' bitw chzenagle che da' ca' zjanac da' žialaoch dan' ža leyna'. Leyna' žan cheyala' gonle da' nac güen lao Diosen', na' cheyala' yeyaše'laže' ljež benačle na' cheyala' gonle can' ba gwlo'o cho'ale gonle. Da' ca' zjanaquen da' zejechen gonle, perw lecze bitw cheyala' cuejyichjle bi gwnežjwle da' ca' chnežjwle Diosen'.²⁴ ¡Nacle ca to bene' lchol bene' chesacde' guac yesegüe'e nez bene' yoble! Zaca'lebele ca to bene' chebej yogo' beb dao' riz da' nchixe da' che'eje' perw bitw chacbe'ede' še yo'o to da' xen juisyw da' zaca' yebeje'. Le chi' yichjle che da' ca' bitec bi zaca' da' ža ley chechon' cheyala' goncho, na' bi chonle da' ca' zjazaca'chguan.

²⁵ ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! Zaca'leble ca ye'en dan' chchin bene' na' chyibe' cožen' perw bi chyibe' lo'en. Chonle cont chesaque bene' nacle bene' güen, perw leca chzelaže'le bi da' de che bene' na' chbechgüele chca'alén.

²⁶ ¡Le'e bene' fariseo, nchol yichjlažda'olen! Le yetinje xtoła'le cont da' licze gacle bene' güen can' chaclaže'le yeson bene' xbab nacle. Nach gacle ca to ye'en dan' nyibe' cožen' na' lo'en.

²⁷ ¡Nyaše'chguaze gac che le'e chsed chlo'ele ley dan' bzoj da' Moisés na' le'e bene' fariseo! ¡Nacle bene' gwxiye'! Zaca'leble ca to ba dan' zjanone' xdanchgua lagüen perw lo'en že' žit che bene' guat na' chi'chgua da' zban.

²⁸ Chonle cont chesaque bene' nacle bene' güen, perw len yichjlažda'olen' nacle bene' gwxiye' na' bene' malchgua.

²⁹ ¡Nyaše'chguaze gac che le'e chsed chlo'ele ley da' bzoj da' Moisés na' le'e bene' fariseo! ¡Nacle bene' gwxiye'! Chonšagüe'le cho'a ba che da' bene' gosoe' xtiža' Diosen' cani', na' chonšagüe'le cho'a ba che yezica'chle bene' goson da' güen.³⁰ Na' žale: "Šaca' chio' ba zoacho ca tiemp che da' xoxxta'ocho ca', bitw bencho txen len legaque' cate' gosote' bene' ca' gosoe' xtiža' Diosen' cani'."

³¹ Perw na' yogo'lolte dan' chonle chlo'en tozce can' nacle len da' xoxxta'ole ca' bene' gosot da' bene' ca' gosoe' xtiža' Diosen' cani'.³² Le gwza'laošaze le gon bica'ch da' zgot dan' bitw goła' yeson da' xoxxta'ole ca'.

³³ 'Le'e nacchgualé bene' zgot na' bene' gwxiye'. Bitw gac yelale lao castigw dan' gon Diosen' le'e, le sele' le'e lo yi' gabilen'.³⁴ Na' da' gona', neda' sela' no bene' yeso'e xtiža'na' len le'e na' no bene' sina' na' nochle bene' yososedde' le'e xtižan'. Na' gotle bałe' gwda'gaclene' to le'e yag cruz, na' yebale' chinle do lo' yodao' chelen', na' yebale' gwlaglene' gate'toze yež šja'aque'.³⁵ Na' dan' gonle ca' gaple doła' che yela' got che yogo' bene' ca' goson da' güen, ben' gosot da' xoxxta'ole ca' gwzolaozen len da' Abel ben' naque' bene' güen lao Diosen' na'

beyožen len da' Zacarías xi'in da' Berequías. Zacaríasen' gosote'ne' do gan' zoa yodao' blaon' na' do gan' ze mes gan' chosozeye' beyix'e' chesonxene' Diosen'.
³⁶ Na' da' li žia' le'e, le'e mbanle na'a si'le castigw che yela' got che yogo' bene' ca' gosot da' xozxta'ole ca'.

Begüine' Jesúsen' che xtoła' bene' Jerusalén

(Lc. 13:34-35)

³⁷ Le'e bene' Jerusalén, chotle bene' ca' chsela' Diosen' cont chesoe'lene' le'e xtižen' ch'chellene' yej. Zan ni'a ba goclaža' yotoba' le'e ca to jed xcaca' ben' n'che' xi'in na' chyežba' legacba', perw bitw goclaže'le. ³⁸ Na' na'a ba gwlejičh Diosen' le'e. ³⁹ Na' žia' le'e, bich le'ele neda' na'a, perw cate'ch žin ža le'ele neda' yeto nach nale: "Mbalaz ben' za' nga nsel'a' Xancho Diosen' le' nabi'e".

24

Gwžin ža yosyočhinje' yodao' blaon'

(Mr. 13:1-2; Lc. 21:5-6)

¹ Na' ba cheza' Jesúsen' yodao' blaon' šeje' ga yoble cate' bene' ca' zjanaque' le' t'xen gosebigue' gan' zoe'na' na' gosezolağüe' goso'e diža' catec xdan nac yodaon' na' le'ceze ca' yo'o ca' zjanyechjen. ² Nach Jesúsen' boži'e xtiža'gaque' gwne':

—Ca nac yogo' da' quinga chle'ele, da' li žia' le'e, ne to yej da' zjancua' nga ca yega'an zjancua' cože' lježen. Yogon' yosyočhinje'.

Dan' gac cate' ba za' bagwze yeyož yežlio nga

(Mr. 13:3-23; Lc. 21:7-24; 17:22-24)

³ Na' ja'aque' Ya'a Olivos. Na' cate' Jesúsen' ba chi'e lo ya'an, bene' ca' zjanaque' le' t'xen gosebigue' lağüen' gose'ene' šižize:

—Che'neto' nao' neto' batcan' gac da' ca'. Na' žnac gac nezeto' cate' ba zoa bagwze yido' na' ba zoa yeyož yežlion'?

⁴ Nach Jesúsen' boži'e xtiža'gaquen' gwne':

—Le gwsaca' cont notno siye' le'e. ⁵ Le zan bene' yesaš yežlio nga bene' yesaclaže' yosolane' xlatja' nga. Na' yesene': "Nedan' Cristo ben' gwlej Diosen' cont nabi'e." Na' yeseziye'e bene' zan. ⁶ Na' yenele chac gwdile nile nale, na' yenele guac gwdile, perw bi žeble, le can' cheyała' gac. Perw gague lenna' n'acho ba bžin ža yeyož yežlion'. ⁷ Le yesedil to yež len yeto yež yoble na' to nación len yeto nación yoble. Na' cue' yižgüe', na' gata' gwbin na' zan cuen ga xo'chgua lo yežlion'. ⁸ Perw na' yogo' da' qui gac cate' za' solao gata' yela' zi'.

⁹ Nach bene' ca' že' yogo' nación yesegue'ede' le'e dan' chejnilaže'le neda' na' yesone' le'e lo na' bene' ca' chesegue'e le'e na' yososaca'zi'e le'e nach yesote' le'e. ¹⁰ Cana' bene' zan bene' ba chesejnilaže' neda' yesebejičhje' bich yesejnilaže' neda'. Na' legacteze' yesechje' yeson lježgaque' lo na' bene' da' chesegue'ede' legaque'. ¹¹ Na' bene' zan yesonlaže' yesene' xtiža' Diosen' cheseyixjue'ede' na' yeseziye'e bene' zan. ¹² Na' lağüe dan' šanch bene' ca' yeson da' malen', bene' zan juisyw bene' ba chesejnilaže' neda' bich yesacde' lježe'. ¹³ Perw na' note'tezle gwyo gwchejlaže'le cont bi cuejičhje dan' chejnilaže'le neda' žinten gatle, nach šjayzoale len Diosen'. ¹⁴ Na' šja'ac bene' doxen lo yežlion' yesejičhje'ede' diža' güen cont yeseneze benachen' cheyała' yosozenague' che Diosen' nach nabi'e yichjlažda'ogaque'. Na' cate' bene' že' yogo' nación ba zjanезде' da'na', cana'ch yeyož yežlion'.

15-16 'Da' Daniel ben' gwdixjue'ede' xtiža' Dios cani' bzoje' che da' zbranchgua da' gwxiñjen latje gan' chonxencho Diosen'. Na' cate' le'e le'ele ba zoa dan' gan' zoa yodao' blao, cana' bene' yesenita' distritw Judea cheyala' yosoxonje' šja'aque' do ya'adao'. (Bene' gwlaben' cheyala' šejni'iden'.) 17 Na' bene' chda do yichjo'o che ližen', bi yeyetje' yotobe' xšinlaze' že' ližen', con yoxonje'. 18 Na' bene' chda yiže' bi yeyej liže' šjayxi'e xalane'. 19 iNyaše'chguaze zjanac no'ol ca' zjanoa' xi'ñ na' no'ol ca' ne' chosoguaže' bidao' lo ža ca'! 20 Na' le nab lao Dios bi yažjen gwxonje cate' chac zag o lo ža che Dios. 21 Le yesaquen ža da' leca yesale' bene'. Cate' gwxete yežlion' na' ža na'aža nono na' gale' ca', neca žinlažen' yesale'de' ca' da' yoble. 22 Na' šaca' Xancho Diosen' bi yozaše' žan' yesac ca', notno yela, perw yozašen' neche chacde' bene' ca' chesejnilaže' le', bene' ba gwleje' zjanaque' xi'ine'.

23 'Cana' še no ye' le'e: "Le na'šc, nga zoa Criston' ben' gwlej Diosen' cont nabi'e", o "Le na'šc, na' zoe'", ne ca'cze bi šejle'le. 24 Yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yela' guac da' yesele'e bene' na' bichle da' zaca' yesyebande' cont yeseziye'e legaque'. Na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. 25 Ba nezele can' gac, le ba gwdixjue'eda' le'e yogo' can' gac. 26 Na' še yese'e le'e: "Zoa Criston' latje dašen'", bitw gwzenagle chegaque', bitw šejle. Na' še yese'e le'e: "Zoa Criston' lo' yo'ona'", bitw šejle'le chegaque'. 27 Can' chac cate' chep yes chsenin' doxen le'e yaban' zejzenez, lecze can' gac cate' žin ža yida' da' yoble, Diosen' gwsela' neda' golja' benačh. Yida' zejzenez na' yogo'lo' bene' yese'ede' neda'. 28 Nga chonen che ben' že': "Gan' de be quat nan' chesežag sod ca'."

Can' gac caten' yid Jesucriston' da' yoble

(Mr. 13:24-37; Lc. 21:25-33; 17:26-30, 34-36)

29 'Na' cate' la' yeyošte saca'zi' benačhen', gwbižen' yeyaquen choł, na' bion' bich gwsenin'. Nach beljw ca' yeselažon' le'e yaban', na' yogo' da' chle'echo le'e yaban' yesaquen ca' chac yežlion' cate' chxo'. 30 Na' cana'ch bene' že' yežlion' yesele'ede' neda' naca' ben' gwsela' Diosen' golja' benačh za'a ladjo bejon' len yela' guac xen na' yela' bene' zaca' juisyw chia'. Na' bene' že' yogo' nación che yežlion' yesebežyaše', bene' bi gosejnilaže' neda'. 31 Na' caten' yida', to trompeta' cuežen žižje, na' sela' angl chia' ca' doxen yežlion' yosyotobe' bene' ca' ba gwleja' cont zjanaque' neda' txen gate'teze nite' doxen lo yežlio ga zelao nac zito'.

32 'Le gwzenag che jempl nga che yag yixgüigw: Cate' ba chzolao chebešjw yaguen' na' chelan' laga' che'eñ dao', chacbe'ele bačh zoa yela' timp yejon'. 33 Na' lecze cate' le'ele ba chac da' mal ca' ba gwnian', cana'ch nezele ba za' juisyw, ba zoa gala'. 34 Da' li žia' le'e, biña' yenit diaža che le'e nita'le na'a cate' ba goc yogo'lo' da' ca'. 35 Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

36 'Perw nono neze bi ža bi horen' gac ca', ne angl ca' nita' yaba, neca neda' naca' Xi'ñ Diosen' bi nežda'. Toz Xa' Dios neze.

37 'Diosen' gwsela' neda' golja' benačh, na' can' goc timp che da' Noé, lecze can' gac caten' neda' yida' da' yoble. 38 Bene' ca' gosenita' timp che da' Noén' gosenite' chese'ej chesagüe' na' chosošagne'e na' chosošague' na' no xi'ingaque'. Ne' chesonte' ca' caten' bžin ža gwyo'o Noén' lo' barcon'. 39 Bitw gosache'ede' bin' gac. Cate'ch goc yejw sio' juisyw na' bia' nisen' yogo'lole'

cana'ch gosacbe'ede'. Lecz can' gac, con cate'ch yida' da' yoble cana'chen' yesacbe'e bene' bin' gac. ⁴⁰ Quingan' gac caten' yida' da' yoble: Čhope bene' nite' do yiŕe', toe' yezi' yeca'a, na' yetoe' yocua'ana'. ⁴¹ Na' čhope no'ole nite' chesote', toe' yezi' yeca'a na' yetoe' yocua'ana'.

⁴² Da'nan' le soa le cueze, le bi nezele bi ŕa bi horen' yida' da' yoble, neda' naca' Xanŕe'. ⁴³ Le gon xbab čhe da' nga, ŕaca' neze xan yo'on' do bi hor lo yelen' ŕin bene' gwbanŕa' ližen', na'ze' cont bitw güe'e latje ŕo' ben' ližen' cuane' xšinlazen'. ⁴⁴ Da'nan' le soa le cueze batcan' yida' da' yoble, le cate' bi chonŕe' xbab yida', cana' yida', neda' naca' ben' gwseŕa' Diosen' golja' benačh.

Mos ben' chon güen, na' mos ben' bi chon güen
(Lc. 12:41-48)

⁴⁵ Note'tezle ŕe zoale lez bate'teze, zaca'leble ca to mos bene' naque' bene' sina' na' bene' chon da' cheyla' gone'. Na' ŕe to bene' mos chonchgüe' güen, nach xanen' cue'e lo ne'e ližen' cate' se'e cont mosen' gwnežjue' da' yesagw yogu' mos ca' cate' ba goŕe' yesagüe' tža tža. ⁴⁶ ŕe to bene' mosen' chontezze' can' gož xanen' le', mbalaz soe' cate' yežin xanen'. ⁴⁷ Da' li žia le'e, xanen' cue' lo na' mosen' yogu'loŕ da' de čhe'. ⁴⁸ Perw ŕe mosen' naque' bene' zgot na' gone' xbab ne': "Ba gwže xanan'". ⁴⁹ Nach solagüe' tiŕe' mos ca' yezica'chle na' ye'ej gagwŕate' len no bene' borrašw, ⁵⁰ nach xane'na' yežine' to ža senyale' le' to hor bi nachbe'ede'. ⁵¹ Na' dan' bi chon mosen' ca cheyla' gone', xane'na' čhinchgüe' le' ca gatte'. Gac čhe' can' chac čhe note'teze bene' gwxiye', čhjaya'aque' gabilen' gan' chesebežyaše' na' chesagwxejte ŕaye' dan' leca chesežaglagüe'.

25

Jempl čhe ŕi no'ole güego' ja'aque' to yela' güešagna'

¹ Nach Jesúsen' goze'e bene' ca' zjanaque' le' txen:

—Cheyla' soale lez batcan' yedenabi'a, can' gwŕnita' no'ole chesejni'i no'ol ca' za' gua'a diža' čhen'. Goc to yela' güešagna', na' nita' ŕi no'ol güego' zjanaque' migw čhe bene' ca' chosošagnan'. Na' zjanxobe' lintern čhegaque' ja'aque' jaseleze' yesyechoj bene' ca' liž no'olen' par ŕja'aque' liž bene' byon' txen. ² Na' gayo' no'ol ca' gosaque' bene' čhejni'i na' yegayoe' bibi xbab gosone'. ³ Cate' no'ol ca' bibi xbab goson gosa'ac liže', zjanxobe' lintern čhegaquen', perw bitw gosoxe' botey gan' yože set dan' yosochine' cate' yebiž dan' yože lo' lintern čhegaquen'. ⁴ Na' no'ol ca' chesejni'i, zjanxobe' lintern čhegaque' lente botey seten' dan' yosochine' cate' yebiž dan' yože lo' lintern čhegaquen'. ⁵ Na' bene' güešagna' ca' gosežede' na' no'ole ca' gosebeze' legaue' gosetase' šlac chesebeze'ne'. ⁶ Na' do čhel, to bene' gwne' zizje, gože' legaue': "Ba chesyechoj bene' güešagnan'. Le ŕo' ŕo' ŕjašagchone'!" ⁷ Na' cate' gože' legaue' ca', yogu' no'ol ca' gosezeche' na' gosečhogue' mešw dan' gwwey čhe lintern' na' bosyogualen' da' yoble. ⁸ Na' no'ol ca' bibi xbab cheson gose'e no'ol ca' yegayo': "ČBi gonŕe' late' dan' yože botey čhelen' neto'? le ba čhebiž četon'." ⁹ Nach no'ol ca' gose'e legaue': "Bitw gac gonŕo' late' čele, le dan' de četon' bitw gaquen' par yogu'cho. San le ŕja'ac le ŕjaxi' čhelen' ga čoten'." ¹⁰ Nach no'ol ca' bi gon xbab ja'aque' jasexi'e seta'. Na' šlac zja'aque' besyežin bene' ca' chosošagna' liž bene' byon'. Na' no'ol ca' gosaque' bene' čhejni'i, goso'e txen len bene' ca' chosošagnan' lo' yo'o gan' chesone' lnin'. Nach mos ca' bososeyjue' puerten'. ¹¹ Na' cate' besyežin no'ol ca' bi gon xbab, gosone'

cho'a puerten', gose'e ben' zoa lo' yo'on: "Beñe', gwsaljwšca puerta' cont šo'to'." ¹² Perw na' gože' legaque': "Da' li žia' le'e, bitw saljua' šo'le le bitw nombi'a le'e."

¹³ Nach gož Jesúsen' beñe' ca' zjanaque' le' txen:

—Ca'czen' cheyala' soale lez batcan' yedenabi'a, le bitw nezele bi ža bi hor yida' yežlio nga da' yoble, neda' naca' ben' gwsele' Diosen' golja' beñach.

Jempl che ben' bocua'anlene' xmose' ca' mechon'

¹⁴ 'Na' dan' yida' yežlio nga da' yoble yedenabi'a zaca'leben ca da' nga goc. To beñe' gwyeje' naciön zito'. Na' za' se'e goxe' mos che' ca' na' gwlo'e lo na'gaque' xmechue' cont gosone' delgens. ¹⁵ Toe' bocua'anlene' gayo' mil. Na' yetoe' bocua'anlene' chop mil. Na' yetoe' bocua'anlene' to mil. Bnežjuen' legaque' con ca ble'ede' da' chac yeson to toe'. Beyož bene' ca' na' gwze'e. ¹⁶ Na' ben' bocua'anlene' gayo' mil la' gwzolaote chone' delgens len mechon' na' bene' gan ľecze gayo' mil. ¹⁷ Lecze ca' ben' ben' bocua'anlene' čhope mil, na' bene' gan yečhope mil. ¹⁸ Na' ben' bnežjue' to mil gwyeje' jacuaše' xmechw xanen' to lo' yechw da' gwche'ene' lo' yo.

¹⁹ 'Goc šsa gwza' xan mos ca' cate' bežine', nach bene' mandadw ja'ac xmose' ca' lagüen' cont bosyodie' cuent. ²⁰ Mosen' ben' bocua'anlene' gayo' mil bžine' lagüen' na' gože'ne': "Xana', ni de da' gayo' mil dan' beño' neda'. Na' ba bena' gan yegayo' mil." ²¹ Na' xane'na' gože'ne': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' len', da'nan' gona' lo' nao' da' xench. Gwyo'o cont so' mbalaz len neda'." ²² Nach cate' bžin ben' bocua'anlene' čhope mil, bena' gože'ne': "Xana', ni de da' čhope mil dan' bocua'anleno' neda', na' ba bena' gan yečhope mil." ²³ Nach gož xanen' le': "Ba beno' da' güen. Naco' mos güen na' ba beno' ca' cheyala' gono'. Na' dan' beno' can' cheyala' gonon' len da' daon' bocua'anlena' le', da'nan' gona' lo' nao' da' xench. Gwyo'o cont so' mbalaz len neda'." ²⁴ Nach cate' bezžin ben' bocua'anlene' to mil, nach gože' xane'na': "Nga de xmecho' dan' bocua'anleno' neda'. Nežda' naco' to beñe' znia. Chelapo' da' gosaz beñe' yoble, na' chotoba' coseš ga goson beñe' yoble žin. ²⁵ Da'nan' gwya'a jačhe'ena' to yechw na' bcuaša' xmechon', le bžeba' še gwñitan'. Na' na'a bežišcan'." ²⁶ Nach xanen' gože' le': "iNaco' mos mal, na' naco' xagüed! Neždo' chelapa' ga gosaz beñe' yoble, na' chotoba' coseš ga goson beñe' yoble žin. ²⁷ Na' lagüe da' neždo' chona' ca' čbixchen' bi gwlejo' xmechuan' beñe' yoble cont yezi'an len yičhjen na'a ba bela'a?" ²⁸ Nach gože' xmose' ca' yezica'chle: "Yeca'ale mechon' dan' bocua'anlena' benga na' gwnežjwlen ben' ba noxe' ši mil. ²⁹ Can' naquen, note'teze beñe' chon güen len dan' chnežjo xanen' le', xanen' gwnežjochče' che', cont gata' da' zča'och che'. Perw na' note'teze beñe' bi chgone' žin dan' chnežjo xanen' le', yeca'a xanen' da' daon' noxe'na'. ³⁰ Na' ca' nac mos xagüed nga, le yebeje' le che'exoxje' gan' nac choł na' cuežyaše' na' gagwxetje laye' dan' ľeca žaglagüe'."

Can' gac cate' Jesúsen' gone' yela' justis che yogo' naciön

³¹ 'Diosen' gwsele' neda' golja' beñach, na' cate' yida' da' yoble nsa'a yela' zaca' juisyw chia' na' nchi'a yogo' angl chia' ca', cana'ch cui'a nabi'a güen juisyw can' chnabia' Dios ben' zoa yaba. ³² Na' yapa' yogo' beñe' che yogo' naciön ca' yeside' laguan'. Na' cate' ba nita' yogüe' na' la'ane' can' chon to beñe' güeye xila' cate' chebeje' partle xila' ca' na' partle šib ca'. ³³ Na' bene' ca' zjanac beñe' güen lao Diosen' dan' ba gosejnilaže' neda', gwnita' legaque' cuitan' šla'a ľicha. Perw beñe' mal ca', gwnita' legaque' cuitan' šla'a robes. ³⁴ Na'

neda' naca' rey yapa' bene' ca' nita' šla'a ličan': "Ba ben Xa' Diosen' cont le'e soale mbalaz. Le da nga cont gona' nabia'le txen len neda' can' ba nžia bia' Diosen' cate' gwxete yežlio. ³⁵ Gona' cont nabia'cho txen, le cate' gwdona' le'e benle dan' gwdagua'. Na' cate' gwbiłda' nis, le'e benle da' güe'aja'. Na' cate' goca' ca' bene' zito' le'e bleble neda' ližlen'. ³⁶ Na' cate' bi gota' da' čhaza', le'e benle da' gwyaza'. Na' cate' gocšenda', le'e bedetiple laža'. Na' cate' gota' ližya, le'e bedena'le neda'." ³⁷ Na' bene' güen ca' yes'e'e neda': "Xanto', čbaten' ble'eto' le' gwdono' na' bento' da' gwdago'? Na' čbaten' gwbiłdo' na' bento' da' güe'ajo'? ³⁸ Na' čbaten' goco' ca' bene' zito' na' blebto' le'? Na' čbaten' ble'eto' le' bi de da' čhazo' na' bento' da' gwyazo'? ³⁹ Na' čbaten' gocšendo' o goto' ližya na' bedena'to' le'?" ⁴⁰ Na' neda' naca' rey yape'gaca'ne': "Da' li žia' le'e, bene' ca' chesejnilaže' neda' zjanaque' ca' biša' na' ca' zana'. Na' yogo' ni'a cate' beyaše'laže' le' legaque', la'czla' bitec bi zjazaque' len benačhen', lencze nedan' beyaše'laže'le."

⁴¹ 'Nach bene' ca' nita' šla'a robesle, bene' mal ca', yape'gaca'ne': "Le cuas ca'ale. Ba žia' bia' čhele cuiayi'le yela' güen da' mal čhelen'. Le šja'ac lo yi' gabıl dan' bi cheyol, yi' dan' bxn Diosen' cont saca'zi' Satanás toli tocaņe len da' xigüe' ca' cheson xšinen. ⁴² Le šja'ac lo yi' gabıl en', le cate' gwdona' bitw benle dan' gagua'. Cate' gwbiłda' bitw benle da' ye'aja'. ⁴³ Cate' goca' ca' bene' zito' bitw bleble neda' ližle. Cate' bi gota' da' čhaza' bitw benle da' čhaza'. Cate' gocšenda' na' cate' gota' ližya, bitw bedena'le neda'." ⁴⁴ Nach legaque' lecze yosyoži'e xtizan' yesene': "Xanto', čbaten' bi beyaše'to' le' cate' gwdono' o gwbiłdo', o goco' bene' zito', o bi gota' da' čhazo', o gocšendo', o goto' ližyan'?" ⁴⁵ Na' yeyož yes'e'e neda' ca' nach yape'gaca'ne': "Lagüe' dan' bi beyaše'laže' le' bene' ca' chesejnilaže' neda', la'cze bibi zjazaque' len benačhen', da'nan' lencze nedan' bi beyaše'laže'le." ⁴⁶ Nach bene' mal ca' yesezaca'zi'e toli tocaņe. Perw bene' ca' chesone' güen lao Diosen' yesezoe' mbalaz toli tocaņe.

26

Bosoxi'e nac yesone' yesezene' Jesúsen' (Mr. 14:1-2; Lc. 22:1-2; Jn. 11:45-53)

¹ Cate' beyož be' Jesúsen' diža' ca', gože' bene' ca' gwleje' cont zjanaque' txen len le':

² —Ba nezele yečhope žazen' gała' lni pascw čechon'. Na' cana' gaca' lo na' bene' ca' cheseque'ede' neda' na' yesote' neda' yosode'e neda' to le'e yag cruz, neda' naca' ben' gwseła' Diosen' golja' benačh.

³ Nach bxož gwnabia' ca' na' bene' ca' chososed chosolo'e dan' bzoj da' Moisésen' na' bene' gole blao ca' chesenabi'e nación Israel čechon' bese-dobe' chy'o liž bxož blao ben' le' Caifás. ⁴ Na' chesejilwlaže' naclen' yesone' yeseziye'e Jesúsen' cont yesezene'ne' yesote'ne'. ⁵ Na' gosene':

—Bi senchone' lo lnin' cont ca' yesebec bene' žaš.

To no'ole bzoe' set zix yichj Jesúsen' (Mr. 14:3-9; Jn. 12:1-8)

⁶ Nach goquen' Jesúsen' len bene' ca' gwleje' cont zjanaque' txen len le' nite' Betania liž Simón ben' güe'le yižgüe' da' nzi' lepra. ⁷ Na' šlac chi' Jesúsen' cho'a mesen', bžin to no'ole noxe' to de yejese ga chož set da' chła' zix da' leca chzaca' la'ay. Na' no'olen' bzoačhochje' seten' yichj Jesúsen'. ⁸ Na' bene' ca' zjanaque' txen len Jesúsen' cate' besele'ede' can' ben no'olen' beseže'e na' gosene':

—¿Bixchen' con beditjde' set zix nga? ⁹ Ša no bete' len, yesonen mechw xen na' yosonežjuen' gaclenen bene' yaše'.

¹⁰ Jesúsen' gočbe'ede' bin' gosene' nach gože' legaque':

—¿Bixchen' chnele che no'olen'? Dan' bene' len neda' nga naquen güen.

¹¹ Le bene' yaše' ca' bate'teze nita'cze' len le'e, san nedan' bich soa' yesša len le'e. ¹² Dan' bguazje'nda' set zixen' bene' dan' cheyała' yesone' len neda' cate' gaša'. ¹³ Da' li žia' le'e, doxen yežlio gate'teze šjasedixje'e bene' diža' güen dan' chzejni'in chia', decze de yesene' can' ben no'ol nga, cont šjasyeze'ede'ne'.

Judas Iscariote bene' Jesúsen' lo na' bene' chesegue'ede' le'

(Mr. 14:10-11; Lc. 22:3-6)

¹⁴ Gwde da' quinga, Judas Iscariote ben' goque' txen len bene' šižinw ca' ben' gwlej Jesúsen' cont zjanaque' txen len le', gwyeje' jane'e bžoz gwnabia' ca'. ¹⁵ Na' ježe' legaque':

—¿Gaca'te' gonle neda' cont gwdia' Jesúsen' lo na'le'?

Nach bosoxi'a bene' ca' yosonežjue'ne' šichoa mechw plata na' bosonežjue'nen'. ¹⁶ Nach cana' Judasen' gwzologüe' gwdiljwlaže' nac gone' gwdie' Jesúsen' lo na'gaquen'.

Jesúsen' blo'ede' legaque' can' yesone' šjasyeza'laže' yela' got chen'

(Mr. 14:12-25; Lc. 22:7-23; Jn. 13:21-30; I Co. 11:23-26)

¹⁷ Na' bžin ža čala' lni caten' chesagüe' yetextil dan' bibi levadura yo'o, na' ža nechw che lnin' bene' ca' zjanaque' Jesúsen' txen ja'aque' gan' zoe' na' gose'ene':

—¿Gan' che'ndo' šjasini'ato' cont gagwcho xše' che pascon'?

¹⁸ Nach Jesúsen' gože' legaque':

—Le'e šja'ac ciudan' gan' zoa to bene' byo ben' nombia'cho na' ye'ln'e: "Maestron' že' ba zoa žin ža gac da' cheyała' gac che', na' ližo' nga che'nde' gagwleno'ne' xše' lni pascon'."

¹⁹ Nach bene' ca' gosone' can' gož Jesúsen' legaque', jasesini'e xše' že' lmina'.

²⁰ Na' cate' beyož gwxoa gwbiž, Jesúsen' len bene' šižinw ca' gwleje' cont zjanaque' le' txen gosebi'e cho'a mesen' gosagüe'. ²¹ Na' šlac chesagüen' gož Jesúsen' legaque':

—Da' li žia' le'e, to le'e gwdele neda' lo na' bene' ca' chesegue'e neda'.

²² Nach legaque' besyeyaše'laže'de', nach gosezologüe' tgüje tgüje' gosenabde' le' gose'ene':

—Xana', ¿nedan' gona' ca'?

²³ Nach gože' legaque':

—To ben' chagw len neda' txen toz lo' ye'en, le' gwdie' neda' lo na' bene' ca'. ²⁴ Na' gac chia' can' nyoj le'e Xtiža' Diosen', neda' naca' ben' gwseła' Diosen' golja' beňach, perw nyaše'chguaze nac ben' gwdie' neda' lo na' bene' ca'. Yejni'acle ša bi golje'.

²⁵ Nach Judasen' ben' za' gwdie' Jesúsen' lo na' bene' ca' gože'ne':

—Maestrw, ¿nedan' gwdia' le' lo na' bene' ca'?

Jesúsen' gože'ne':

—Le len'.

²⁶ Na' šlac chesagüen', Jesúsen' gwxi'e to yetextilen' na' beyož be'e yela' choxcen che Dios, bžoxjen' na' bnežjuen' bene' ca' zjanaque' le' txen, gože' legaque':

—Le gagon'. Lenna' cuerp čhian'.

²⁷ Nach be_xue' to vas gan' yože nis uvasen', na' beyož be'e ye_la' cho_xclen che Dios boznežjuen' legaque', goze'ene':

—Yogo'le, le ye'ej late' güeje dan' yože lo' vas nga. ²⁸ Da' nga xčhena' na' chzanlažan' laljen neche xtola' yogo'lol benach. Na' laljen cont solao gac da' cob dan' gwna Diosen' gone' gaclene' be_načhen'. ²⁹ Chnia' le'e, bich ye'ej'a' nis uvas na'a. Cate'ch žin ža ba zoacho txen gan' zoa Xa' Diosen' chnabi'e, cana' ye'ejan' da' yoble.

Jesúsen' gwne' Pedroa' bi chebe' še nombi'e le'
(Mr. 14:26-31; Lc. 22:31-34; Jn. 13:36-38)

³⁰ Na' beyož gosonxene' Diosen' len to da' gosole', nach gosa'aque' ja'aque' Ya'a Olivos. ³¹ Na' šlac zjangüe'e nezen' Jesúsen' gože' legaque':

—Na'aže' yogo'le cuejyichje neda' neche dan' gac čhian'. Le nyojczen le'e Xtiža' Diosen' žan: "Gota' be_ne' güeye' xilan' na' xila' ca' yesaslasba'." ³² Perw na' cate' yosban Diosen' neda' ladjo be_ne' guat ca', yobch yeya'a Galilea ca le'e.

³³ Nach Pedroa' gože' Jesúsen':

—La' yogo' be_ne' quinga yesebejyichje' le', neda' gwbat gona' ca'.

³⁴ Jesúsen' gože' le':

—Da' li žia' le', bi_na' cuež jean' na'aže' cate' gac šon ni'a bi chčhebo' še nombi'o neda'.

³⁵ Nach Pedroa' gwne':

—La'czla' še chonen byen guatlencza' le', gwbat nia' bi nombi'a le'.

Na' le_cze ca' yogo' be_ne' šižinw ca' zjanaque' Jesúsen' txen gosene' ca'.

Jesúsen' bo_l güiže' Diosen' to latje dan' nzi' Getsemani'
(Mr. 14:32-42; Lc. 22:39-46)

³⁶ Nach besežine' latje gan' nzi' Getsemani', na' Jesúsen' gože' be_ne' ca' zjanaque' le' txen:

—Ngaze le cue' šlac ša'a na'le šja_l güiža' Diosen'.

³⁷ Na' gwčhe'e Pedroa' len chop xi'in Zebedo, Jacobon' len Juanna'. Na' Jesúsen' gwzolao gocyashe'chgüede', na' benchgüe' xbab. ³⁸ Nach gože' legaque':

—Lo' yichjlažda'oguan' chacyashe'chgüeda', chacda' con gatzca' catequen' chžaglagua'. Nga le yega'an bi tasle, le na' txen len neda'.

³⁹ Nach Jesúsen' gwžialagüe' yelate' na' jačhaze' lo yon' cosčo'ale nach bo_l güiže' Diosen', gwne':

—Xa', še guac ten ca'ale, bešca cont bi saca'zi'a na' bi yesote'nda' can' ba zoa gaca'. Perw bi chnaba' gac da' nia' neda', san gac can' nao' le'.

⁴⁰ Nach beyeje' gan' nita' be_ne' ca' šone na' ble'ede' zjanite' chesetase'. Na' gože' Pedroa':

—ČNe šlož dao' ca goc cuejle bišgal len neda'? ⁴¹ Bi tasle na' le yo_l güiž Dios cont bi gon gwxiyen' le'e gan'. Nežda' che'nele na'zle len neda' perw bi chzoele.

⁴² Na' gosze'e gan' nite' na' da' yoble ja_l güiže' Diosen', gwne':

—Xa', še gac ten ca'ale, bešca cont bi saca'zi'a na' bi yesote'nda', perw gac con can' che'ndo' le'.

⁴³ Na' bezeje' gan' niten' na' da' yoble ble'ede' chesetase' le ba chesežode' yejlagüen' bišgal. ⁴⁴ Na' gwze'e da' yoble gan' nite'na' ja_l güiže' Diosen' da' gwyone ni'a, na' goznacze' da' yoble can' ba gwnen'. ⁴⁵ Na' bežžine' gan' nita' be_ne' ca' šone nach gože' legaque':

—Na'ach gwaque tasle na' yezi'laže'le. Ba gole gwde to bene' neda' lo na' bene' güen da' xinj ca', neda' naca' ben' gwsela' Diosen' golja' benach. ⁴⁶ Le chas. Le yeyo'o. Ba za' ben' gon neda' lo na'gaque'.

Judasen' bdie' Jesúsen' lo na' bene' chesegue'ede' le'
(Mr. 14:43-50; Lc. 22:47-53; Jn. 18:2-11)

⁴⁷ Ne' choe'te Jesúsen' dižan' ca' cate' bžin Judas ben' goque' txen len bene' šižinw ca' gwlej Jesúsen' cont zjanaque' le' txen. Na' zan bene' zja'ac len le' zjanoxe' no yag, no spada, bene' gosesela' bžox gwnabia' ca' na' bene' gole blao ca' chesenabi'e nación Israel chechon'. ⁴⁸ Na' Judas ben' bdie' le' lo na' bene' ca', gože' legaque' nac yesenezde' non' yesezene', gwne':

—Ben' gwnopa' xague', le'na' Jesús. Le sene'.

⁴⁹ Nach la' gwbiga'te' cuit Jesúsen', gože'ne':

—Patiox, Maestrw.

Na' bnop'e'ne'. ⁵⁰ Jesúsen' gože'ne':

—Migw chia', žbixchen' zao' nga?

Nach la' gosebiga'te' bene' ca' gosezene' Jesúsen' na' goseče'ene'.

⁵¹ Na' to ben' nac txen len Jesúsen' gwleje' spada čhen' na' gwđinen' mos čhe bžox blaon' gwčhogte' šla'a naugen'. ⁵² Nach Jesúsen' gože'ne':

—Bego'o spada čhion' lo' liženna', le' yogo' bene' chesote' bene' len spada, lece len chesatlene'. ⁵³ žBi nezdo' guac nabda' Xan' cont la' sela'te' angl zan juisyw bene' yesaclene' neda'? ⁵⁴ Perw še gona' ca' žnacxe' gac dan' cheyla' gac dan' nyoj Xtiža' Diosen' žan quinga gaquen'?

⁵⁵ Nach Jesúsen' gože' bene' ca' zjasezen le':

—žBixchen' nonle' neda' ca' to bene' gwban za'acle zedexi'le neda' len spada len yag? Yogo' ža gwchi'a chy'o yodao' blaon' bsed blo'eda' bene' že'na' na' bi gwzenle' neda'. ⁵⁶ Perw chac da' qui cont chac can' ža Xtiža' Diosen' dan' bosozoj da' bene' goso'e xtižen' cani'.

Nach yogo' bene' ca' zjanaque' Jesúsen' txen bosoxonje' gosebejyichje'ne'.

Goseče'e Jesúsen' lao bene' ca' chesenabia' nación Israelen'
(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Na' bene' ca' gosezen Jesúsen' goseče'ene' lao Caifás ben' nac bžox blao, gan' ba zjanžag bene' ca' chososed chosolo'e dan' bzoj da' Moisésen' na' len bene' gole blao ca' chesenabi'e nación chechon'. ⁵⁸ Nach Pedroa' na'ogüe' Jesúsen' zito' zito'le bžinte' liž bžox blaon', na' gwyo'e chy'ona' gwchi'e len bene' ca' chesape' yodao' blaon', le' goclaže' le'ede' naquen' zelao gac čhe Jesúsen'.

⁵⁹ Nach yogo' bžox gwnabia' ca' na' yezica'chle bene' gole blao ca' chesenabi'e nación chechon' cheseyiljwlaže' bi diža' güenlaže' yeso'e čhe Jesúsen' cont yesote'ne'. ⁶⁰ Perw goc sša bitw besyeželde' bi diža' güenlaže' yosode'ede' le' cont gosozie'ne' xya la'czla' bene' zan gosenite' gosene' diža' güenlažen' contr le'. Gwde na' besechoj yečhope bene' na' bedilen can' gosenen'.

⁶¹ Quinga gosene':

—Benga gwne': "Neda' guac yočinja' yodao' blao gan' chonxencho Diosen', na' šone žaze yeyonan'."

⁶² Nach gwzoža' bžox blaon' gože' Jesúsen':

—žBibi de bi nao' ca' nac da' nga chosocuiš bene' quinga le'?

⁶³ Bitwbi gwna Jesúsen'. Nach gož bžox blaon' le':

—Chnia' le' gwna neto' še le len' Cristo ben' nac dogualje Xi'in Diosen', ben' gwleje' cont yedenabi'e. Na' Diosen' ben' zoa toli tocanē cue'e da' balī še ledō' can' žon'.

⁶⁴ Jesúsen' gože'ne':

—Le can' žale nan' naca'. Diosen' gwsele' neda' golja' benačh. Na' chnia' le'e, gwžin ža le'ele neda' chi'a cuit Diosen' ben' nape la'zelagüe yela' guac xen, na' nabi'a txen len le', na' le'ele yetja' yaban' to lo' bejw.

⁶⁵ Cate' bene b̄xoz blaon' xtiža' Jesúsen', gwšo' gwčeza'te xen', le par le' da' mal juisyon' gwna Jesúsen' cui'e cuit Diosen' nabi'e. Nach gwne':

—Ba benecho n̄a'a ba gwne' che Diosen' dan' gwne' ca'. Noch no chyažje no gagw xya che'. ⁶⁶ ¿Nac žale che'?

Nach bene' ca' bosyoži'en gose'ene':

—Cheyalā' gate' dan' chon cuine' ca' Dios.

⁶⁷ Nach bosožī'e xene' cho'alao Jesúsen', na' gosebaže'ne', na' bale' gosegape' xague'na'. ⁶⁸ Nach gose'ene':

—Še len' naco' Criston', gwneya'ašč, gwna neto', ¿non' chgapa' le'?

Pedroa' bi gwchebe' še nombi'e Jesúsen'

(Mr. 14:66-72; Lc. 22:56-62; Jn. 18:15-18, 25-27)

⁶⁹ Na' šlac chac da' quinga, chi' Pedroa' chyo'ona', cate' bžin to no'ole güen žin che Caifásen', gože'ne':

—Lencze le' naco' txen len Jesús bene' Galilean'.

⁷⁰ Na' lao yogo' bene' ca' že' na', Pedroa' bitw gwchebe' še naque' txen len Jesúsen', na' gože' no'olen':

—Bi nezda' bi dižan' cho'o.

⁷¹ Gwde beyož gože' no'olen' ca' beyeje' cho'a puert na'le, na' bezle'e yeto no'ole güen žin̄na' le', na' goze'e bene' ca' že'na':

—Lecze len benga naque' txen len Jesús bene' Nazaretan'.

⁷² Da' yoble bitw gwchebe' še naque' txen len Jesúsen', nach gwne':

—Na' zoa Diosen' cue'e da' balī bitw nombi'a bena' žo' ca'.

⁷³ Na' goccze šlož, gosebīga' bene' ca' že'na' goseze'e Pedroa':

—Da' licze, naco' txen len legaque', le nacbīa' chnio' can' chesene bene' Galilea ca'.

⁷⁴ Nach Pedroa' čop šone ni'a gwne':

—Diosen' gone' ga saca'zi'a še chonlaža' dan' žia' bi nombi'a bena'.

Na' la' gwchežte to jea. ⁷⁵ Nach jayze'e Pedroa' can' gož Jesúsen' le': "Bīna' cuež jean' cate' gac šone ni'a bi chchebo' še nombi'o neda'." Nach beze'e leca gwchežyaše'.

27

Goseche'e Jesúsen' lao Pilaton'

(Mr. 15:1; Lc. 23:1-2; Jn. 18:28-32)

¹ Na' cate' gwyeni', yogo' b̄xoz gwnabia' ca' na' bene' gole blao ca' chesen-abia' nación chechon' besyedobe' na' gosečhoglagüen' yesote' Jesúsen'. ² Nach bosocheje'ne' na' goseche'ene' jasesane'ne' lo' na' gobernador Poncio Pilato.

Judasen' beyot cuine'

³ Na' Judasen' ben' bdie' Jesúsen' lo' na' bene' ca', cate' gocbe'ede' ba gosečhoglagüen' yesote' Jesúsen', betinjde' dan' bdie' le' lo' na' b̄xoz gwnabia' ca' na' bene' gole blao ca'. Nach gwyeye' laogaquen' par bonežjue' legaque' šichoa mechw platan'. ⁴ Nach gože' legaque':

—Malen' bena' bdia' lo na'len' to bene' bi nape' dola'.

Na' gose'ene':

—Bitwbi dola' nap neto' dan' beno' ca'.

⁵ Nach Judasen' bozale' mechw ca' lo' yodao' blaon', nach beze'e na' jaylo' o do yene' beyot cuine'.

⁶ Beyož beza' Judasen', bꞥoz gwnabia' ca' bosyotobe' mechon'. Na' gose' lježe':

—Bitw gac co'ochon lo' caj gan' yo'o mechw che yodaon', le naquen mechw dan' gwidxjwcho cont yega'a yela' mban che to bene'.

⁷ Na' bosoxi'e yesezi'e len mechon' to yežlio dan' de che to bene' güen yeso'. Na' gosezi'en par to capsantw ga yosocuaše' bene' zito'. ⁸ Na' yežlion' ne' nzin' Yežlio Chen ža na'aža, le gosezi'en len mechw dan' goseyixjue' cont gosote' Jesúsen'. ⁹ Can' goc cont goc can' bzoj da' Jeremías ben' be' xtiža' Diosen' cani', gan' žan: “Besyezi'e šichoa mechw platan', dan' gosena bene' Israel zaca' bena'.” ¹⁰ Na' gosezi'e yežlio che to bene' güen yeso', can' gwna Xancho Diosen' neda'.”

Bosocuiše' Jesúsen' lao Pilaton'

(Mr. 15:2-5; Lc. 23:3-5; Jn. 18:33-38)

¹¹ Na' goseče'e Jesúsen' lao gobernadoren' na' šlac zeche' lagüen', gbernadoren' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

¹² Na' cate' bꞥoz gwnabia' ca' na' bene' gole blao ca' chesenabia' nación chechon' bosocuiše' Jesúsen', bitw bi gwne'. ¹³ Nach Pilaton' gože'ne':

—¿Bi chendo' catec da' zan xya nga chesagüe' chio'?

¹⁴ Perw Jesúsen' ne to xtiže'na' bitw boži'e, na' bebanechgüe gobernadoren'.

Gosechoglagüen' yesote' Jesúsen'

(Mr. 15:6-20; Lc. 23:13-25; Jn. 18:38-19:16)

¹⁵ Na' gota' costumbr, gobernadoren' gwsane' to bene' de ližya cate' čala' lni pascw checho, con bene' yesenab bene' gualaž chechon'. ¹⁶ Na' ližya na' de to bene' chzechgua che' naque' bene' güen da' xinj, na' le' Barrabás. ¹⁷ Nach Pilaton' gože' bene' ca' zjanžaguen':

—¿Noe' bene' quinga chaclaže'le gwsana'? ¿Gwsana' Barrabás še Jesús nga ben' chesene' naque' Cristo ben' gwlej Diosen' cont yedenabi'e?

¹⁸ Gocbe'e Pilaton' dan' chesacxi'a bꞥoz gwnabia' ca' Jesúsen', da'nan' bosodie' le' lo ne'en.

¹⁹ Ca' čhi' Pilaton' gan' chone' yela' justisen', cate' bžin to rson da' gwseła' no'ol čhen', gože'ne': “Bitw bi gondo' bena', le bibi dola' nape'. Nže'e gwne'da'ne' yel na' bžaglaochgua' neche dan' chac che bena'.”

²⁰ Na' bꞥoz gwnabia' ca' na' bene' gole blao ca' chesenabi'e nación chechon' gosego'oyele' bene' ca' že'na' cont yesenabe' gwsane' Barrabásen' na' yesenabe' yesote' Jesúsen'. ²¹ Nach gobernadoren' gože' legaque' da' yoble:

—¿No bene' quinga chope chaclaže'le gwsana'?

Nach gose'ene':

—Barrabásna'.

²² Pilaton' gože' legaque':

—¿Bixe gona' len Jesús nga ben' chesene' naque' Cristo ben' gwlej Diosen' cont yedenabi'e?

Na' yogüe' gose'ene':

—jBde'e le'e yag cruz!

²³ Nach gož gobernadoren' legaque':

—¿Bixe da' xinj nonen'?

Na' legaque' da' yoble bososya'achgüe' gose'ene':

—jBde'e le'e yag cruz!

²⁴ Gocbe'e Pilaton' bicze bi gac gone'. Ba chyalach chesone' žaš juisyw. Nach gwsele' to bene' jaxi'e nis cont bone'e lao bene' ca' že'na' na' gože' legaque':

—Bibi da' xinj non benga. Bitw naquen xbagá' dan' gotlene', xbagá' le'e naquen še ba betwlene'.

²⁵ Nach yogo' bene' ca' gose'ene':

—Xbagá' neto' na' xbagá' xi'into' naquen che yela' got che benga.

²⁶ Nach bsan Pilaton' Barrabásen' can' gosenaben'. Perw na' bene' mandadw gosot goseyin soldadw che' ca' Jesúsen', nach bene' le' lo' na'gaque' cont yosode'ene' le'e yag cruzen'.

²⁷ Nach soldadw che gobernadoren' goseche'e Jesúsen' lo' yo'o che gobernadoren', nach bosyotobe' yogo' soldadw ca'. ²⁸ Na' goseyine' xalana' Jesúsen' na' bosoguacue'ne' to lache' xna ca dan' chesaz rey ca'. ²⁹ Na' gosone' to corona de xis yeše' bosozoen' yichjen', na' ne'e licha bosogoxe'ne' to xis. Na' bosozoa xibe' lagüen' par gosonle' che', nach gose'ene':

—jViva rey che bene' Israel!

³⁰ Nach bosoži'ene' xene', na' besyeque'e xis dan' noxen' na' bosozeten' yichje'. ³¹ Na' beyož gosonle' che', besyeque'e lache' xnan' dan' bosoguacue'nen' na' bosyoguacue'ne' xacze'. Nach goseche'ene' cont jasede'ene' le'e yag cruzen'.

Bosode'e Jesúsen' le'e yag cruzen'

(Mr. 15:21-32; Lc. 23:26-43; Jn. 19:17-27)

³² Nach besechoje' ciudan' na' besyežague' to bene' Cirene le Simón na' gosone' byen bosogüe'ene' yag cruz che Jesúsen'.

³³ Na' besežine' to latje gan' nzi' Gólgota, zeje diža' latje che žit yichj bene' guat. ³⁴ Na' bosonežjue' Jesúsen' vino da' nchixe to da' zla' par ye'ejen', perw le' con bnixen', bitw güe'ejen'.

³⁵ Na' cate' beyož bosode'ene' le'e yag cruzen', soldadw ca' gosone' rifa cate' besyele'e xalane' cont gota'bia' noe' yechelen'. Na' dan' gosone' ca' goc can' bzoj da' ben' be' xtiža' Diosen' cani', gwne': "Yesyele'e xalanan' na' yesezi' che che', yesonen' rifa." ³⁶ Nach gosebi'e gosape'ne'. ³⁷ Na' yichj yag cruzen' gan' de'ena' bosozoje' dan' bcuiš le', na' žan: "Benga Jesús rey che bene' Israel ca'."

³⁸ Na' lecze cana' bosode'e chope bene' gwban le'e yechope yag cruz. Toe' gwda' cuit Jesúsen' licha na' yetoe' cuite' robes. ³⁹ Na' bene' ca' gosede gan' da' Jesúsen' goson yichjlagüe' dan' leca besegue'ede' le', na' gosezi'diže' le', ⁴⁰ gose'ene':

—Len' gwnao' yochinjo' yodao' blaon' na' šone žaze yeyonon', bosla cuino'. Še len' naco' doguale Xi'in Diosen', beyetj le'e yag cruzen'.

⁴¹ Na' len' bxoz gwnabia' ca' na' len' bene' ca' chososed chosolo'e dan' bzoj da' Moisésen' na' len' bene' fariseo ca', na' len' bene' gole blao ca' chesenabi'e nación chechon', yogüe' gosezi'diže'ne' na' gosone':

⁴² —jYezica'chle bene' bosle' na' bi chac yosla cuine'! Še naque' rey che chio' bene' Israel, yeletj cuine' le'e yag cruzen' na'a na' šejle'cho che'. ⁴³ Le'

chejnlaže' Diosen', le gwne': "Dogualje Xi'in Dios neda'." iNa' le'echo yosla Diosen' le' na'a še chacde' le'!

⁴⁴ Na' bene' gwban ca' zjada' le'e yag cruzen' chop la'a cuiten', lece gosezi'diže' le'.

Can' goc cate' got Jesúsen'

(Mr. 15:33-41; Lc. 23:44-49; Jn. 19:28-30)

⁴⁵ Na' do guagwbiz doxen yežlion' goc chol bžinte cheda šone. ⁴⁶ Na' do cheda šone Jesúsen' bosye'e zižje gwne':

—Elí, Elí, ¿lama sabactani? (Zeje diža': Dios chia', Dios chia', ¿bixchen' ba gwlejjichjo' neda'?)

⁴⁷ Na' bal' bene' ca' zjanita' na' gosende' na' gosene':

—Le gwzenag, benga chol güiže' da' Elías ben' be' xtiza' Diosen' cani'.

⁴⁸ Nach la' bchojte to bene' gwyejse' jaxi'e to esponja na' bzažeden' vino zichj na' bzoen' to lao xis tone nach jažiguen' cho'a Jesúsen' cont xopen'. ⁴⁹ Na' yebale' gose'e bena':

—Cuezcho, yešč še güide Elíasen' yosle'ne'.

⁵⁰ Nach da' yoble Jesúsen' bosye'e zižje na' gote'. ⁵¹ Na' ca hora' lache' da' ze lo' yodao' blaon' bcheza' gacholen gwza'te yichjen bžinte che'e. Na' gwxo'chgua gosoxjte jej ca'. ⁵² Na' lece beseyaljo ba che bene' ba gosat. Na' zan da' bene' ca' gosejnlaže' Diosen' besyebane' ladjo bene' guat ca'. ⁵³ Nach caten' ba beban Jesúsen' ladjo bene' guat ca', besyechoje' lo' ba chegaquen' na' jaya'aque' jaselo'elagüe' ciuda Jerusalén. Na' zan bene' besele'ede' legaque'.

⁵⁴ Na' ca nac xan soldadw ca' na' bene' ca' nche'e, bene' nita' chesape' Jesúsen', cate' besele'ede' can' gwxo' na' bichle da' ca' goc, besěžbchgüe', na' gosene':

—Da' li le benga goc dogualje Xi'in Dios.

⁵⁵ Na' lece nita' zan no'ole ladjo bene' ca' na' goseze' zito' chesene'e can' chaquen'. No'ol ca' gosa'ogüe' Jesúsen' cate' beze'e distritw Galilean' par chesaclene' le' len bi da' chyažjde'. ⁵⁶ Na' len no'ol ca' María bene' Magdala, na' lece María ben' nac xna' Jacobo na' José, na' lece ca' xna' Jacobo na' Juan, xi'in Zebedeo.

Bosocuaše' Jesúsen'

(Mr. 15:42-47; Lc. 23:50-56; Jn. 19:38-42)

⁵⁷ Na' gwzoa to bene' gwni'a bene' ciuda Arimatea le' José na' ba gwzolao chzenague' che Jesúsen'. Na' cate' ba chxoa gwbiž ⁵⁸ Josén' gwyeye' lao Pilaton' jaynabe' cuerp che Jesúsen'. Na' Pilaton' bene' mandadw bosyonežjue'ne' cuerp chen'. ⁵⁹ Nach Josén' bego'o lo' ne'e cuerp che Jesúsen' na' blaže'ne' to lache' xen da' nyach. ⁶⁰ Na' gwlo'e cuerp chen' to lo' bloj cobe che' da' gwche'ene' le'e yej. Na' blöle' to yej xen cho'a blojen' cont bseyjon len. Nach beze'e. ⁶¹ Na' María bene' yež Magdalan' na' yeto María yoble jasechi'e cho'a blojen'.

Bosozoe' bene' chesape' gan' jasecuaše' Jesúsen'

⁶² Na' beteyo, gwde žan' caten' chososini'e par ža che Diosen', besedobe bhoz gwnabia' ca' na' bene' fariseo ca' na' ja'aque' gan' zoa Pilaton'. ⁶³ Na' gose'ene':

—Bene', ba jaysalaže'to can' gwna da' bene' gwxiyen' cate' ne' mbane', gwne': "Yeyon ža yebana' ladjo bene' guat ca'." ⁶⁴ Da'nan' gwsela'šca bene' šjasedape' cho'a blojen' gan' jasecuaše'nen' cont bi šja'ac bene' ca' gosaque' Jesúsen' txen šeže'le šjasyeleje' cuerp chen' na' yese'e bene' le' bebane' ladjo

bene' guat ca'. Le še yesaque bene' ba bebane' ladjo bene' guat ca', gonchen malech clél ca len diža' dan' gwdise' gwne' Diosen' gwsele' le'.

⁶⁵ Nach Pilaton' gože' bene' ca':

—Gona' le'e soldadw ca'. Le che'e cont yesape' ga zelao yesezoede'.

⁶⁶ Nach ja'aque' len soldadw ca' na' bosochiše' sey le'e yej dan' da' cho'a blojen', na' bosonite' soldadw ca' gosapen'.

28

Jesúsen' bebane' ladjo bene' guat ca'
(Mr. 16:1-8; Lc. 24:1-12; Jn. 20:1-10)

¹ Na' cate' beyechj ža che Dios, bał dmigw María bene' Magdala len María ben' yeto ja'aque' jasene'e gan' bosocuaše' Jesúsen'. ² Na' leca gwxo', le angl che Xanchon' betje' yaban', na' bžine' gwque'e yej dan' nseyjw cho'a blojen', na' gwchi'e lo yeja'. ³ Na' anglen' leca chactit cho'alagüen' cacze ga chep yes na' xalänen' naquen šiš xila' juisyw ca nac beye'. ⁴ Na' cate' besele'e bene' gop ca' le', leca gosexize' besežebe' na' gosebixe' gosatte' šlat. ⁵ Perw na' anglen' gože' no'ol ca':

—Bitw žeble. Neda' nezda' Jesúsen' ben' bosode'e le'e yag cruz nan' chey-iljwle. ⁶ Nono de nga. Ba bebane' ladjo bene' guat ca', can' gwnacze'. Na' le da, le na' latje nga gan' gosegüe'e cuerp chen'. ⁷ Bedao' le šjaya'ac le šjaydixjue'e bene' ca' zjanaque' Jesúsen' txen ye'gaclene' ba bebane' ladjo bene' guat ca'. Na' ye'gaclene' gwyobečh Jesúsen' yežine' Galilean' clél ca' legaque', na' Galilean' na' yesele'ede'ne'. Can' gwna Diosen' zedetixjue'eda' le'e.

⁸ Nach no'ol ca' la' besyeya'actie' cho'a blojen' do chesežebze' perw leca chesyebede', zjaya'acese' zjasyedixjue'ede' bene' ca' zjanaque' Jesúsen' txen can' goca'. ⁹ Na' šlac zjaya'aque' besyežague' Jesúsen' chanez. Nach bguape' legaque' tiox.

Na' no'ol ca' gosebigue' gan' zoa Jesúsen' bosozoa xibe' lagüen', na' goseyele' ni'e tantw besyebede', na' gosonxene' le'. ¹⁰ Jesúsen' gože' legaque':

—Bitw žeble. Le šjaydixjue'e bene' lježcho ca', cheyala' šjaya'aque' Galilean' cont yesele'ede' neda'.

Bene' gop ca' jasyedixjue'ede' bħoz ca' can' ba goca'

¹¹ Na' šlac zjaya'ac no'ol ca' ciudan', bał soldadw ca' bene' ca' gosape' gan' bosocuaše' Jesúsen' jaya'aque' ciudan' jasyedixjue'ede' bħoz gwnabia' ca' doxen can' ba goquen'. ¹² Nach besedobe bħoz gwnabia' ca' len bene' gole blao ca' chesenabia' nación chechon' na' bosoxi'e nac yesone' ca nac dan' gose' soldadw ca' legaque'. Na' bosonežjue' soldadw ca' da' zcha'o mechw.

¹³ Gose'e legaque':

—Še no nabe le'e bin' goquen', na' ye'gaclene' šeže'le šlac chtasle bene' ca' gosaque' le' txen besyebetje' cuerp chen' lo' blojen' na' besyeyo'en ga yoble. ¹⁴ Na' še gobernadoren' yende' diža' quinga, neto' šjašaljento'ne' cont bi že'e le'e na' cont bi gote' le'e.

¹⁵ Na' soldadw ca' gosezi'e mechon' dan' bosonežjue' legaquen', nach gosone' con can' gose'e legaque'. Na' ža na'aža yogo' can' gosena soldadw ca' ne' chesene' doxen gan' nita' bene' Israel' gualaž chechon'.

Jesúsen' gože' legaque' yeso'e xtiže'na' yogo' nación
(Mr. 16:14-18; Lc. 24:36-49; Jn. 20:19-23)

¹⁶ Nach beñe' ca' zjanaque' Jesúsén' txen, beñe' ca' šnej, jaya'aque' Galilean' cont jasyešague' Jesúsén' to lo ya'a gan' gože' legaque' yesyežague'. ¹⁷ Na' cate' besele'ede' Jesúsén' gosonxene'ne'. Perw bia'cze to chope' gosacžejlaže' še le'na'. ¹⁸ Nach gwbiga' Jesúsén' gan' nite'na' na' gože' legaque':

—Ba ben Diosen' lo na' doxen yeļa' chnabian' dan' de yaban' na' yežlion'. ¹⁹ Da'nán' le šja'ac le šjased le šjalo'e beñe' ca' že' yogo'loł nación cont yesejni-laže' neda'. Na' le gwzoe' nis cont yosolo'e le chesejni-laže' Xacho Diosen', na' chesejni-laže' neda' naca' dogualje Xi'ine', na' lencze Spiritw che'na'. ²⁰ Na' gwsed gwlo'elne' cont yesone' yogo'loł dan' ba bena' mandadw gonle. Neda' zoacza' len le'e yogo' ža, na' ca'cze ne' soa' len le'e cate'ch te che yežlion'. Da' na'zen' chzoja' na'a.

DIŽA' GÜEN DAN' BZOJ SAN MARCOS

Juan ben' bzoa bene' nis gwđixjue'ede' diža' güen che Diosen' latje daš (Mt. 3:1-12; Lc. 3:1-9, 15-17; Jn. 1:19-28)

¹ Qui goc cate' gwxe xtiža' Jesucristo ben' nac dogualje Xi'in Dios.

² Da' Isaías ben' be' xtiža' Diosen' cani' bzoje' da' nga, žan:

Chselä' to bene' cuialagüe' laogun' güe'e xtižon',
cont ba zjanita' bene' yosozenague' čhio' cate' šejo'.

³ Beña' chne' zižje latje dašen' že':

“Le gonšagüe' yichjlažda'olen' cont gwzenagle che Xanchon' cate' yide';
le cuejyichj da' malen' chonle cont yichjlažda'olen' gaquen ca to nez da' ba
gosošagüe'.”

⁴ Ca' goquen', Juan ben' chzoa bene' nis bžine' latje dašen' na' gože' bene'
ca' besežag na' cheyala' yesyetinjde' xtola'gaque' na' yesezoe' nis cont nitlao
xtola'gaque'. ⁵ Zan bene' za'ac do distritw Judea na' ciuda Jerusalén
bosozenague' che diža' dan' chyixjue'ede'. Na' cate' gosexoadole' bi da' xinj
zjanone', Juanna' bzoje' legaque' nis lo' yegw Jordán.

⁶ Xalana' Juanna' goquen de yiša' xa camello na' da' bchej lsine' goquen de
yid, na' gwđagüe' biše'zo len šina' beser yixe'. ⁷ Na' gwđixjue'ede' bene' xtiža'
Diosen', gwne':

—Coža' na' za' za' to bene' zaca'che' ca neda', na' da' nacchgüe' bene' zaca', bi
zaca' gona' xmandadoe' lechja' no xele'. ⁸ Neda' ba bzoa' le'e nis, perw ben' za'
zan' gone' cont soa Spiritw che Diosen' lo' yichjlažda'olen' nabian' xbab chele.

*Jesúsen' gwzoe' nis
(Mt. 3:13-17; Lc. 3:21-22)*

⁹ Ca tiempa' Jesúsen' gwze'e lagüe yež Nazaret da' chi' ga mbane distritw
Galilea, na' Juanna' bzoje' le' nis lo' yegw Jordán. ¹⁰ Na' šlac chechoj Jesúsen'
lo' nisen', Jesúsen' ble'ede' byaljw yaban' gan' zoa Diosen', na' Spiritw che
Diosen' betjen jasoan len le', na' ca hora' Spiriton' naquen ca nac ngolbex.

¹¹ Na' gosende' gwne' Dios ben' zoa yaba gwne':

—Len' naco' Xi'ina' bene' chacchgüeda', na' chebe chezaque'laže'chgüeda'
čhio'.

*Satanásen' goclažen' co'oyelan' Jesúsen' cont gone' da' mal
(Mt. 4:1-11; Lc. 4:1-13)*

¹² Nach Spiritw che Diosen' benen cont la' gwyejte Jesúsen' latje daš. ¹³ Na'
gwzoe' latje dašen' čhoa ža ladjo be znia ca'. Na' Satanás dan' chnabia' da'
xigüe' ca' goclažen' co'oyelan' le' cont gone' da' mal. Nach beyoža' jasaclen
angl che Diosen' le'.

*Jesúsen' gwzolao chyixjue'ede' xtiža' Diosen' distritw gan' nzi' Galilea
(Mt. 4:12-17; Lc. 4:14-15)*

¹⁴ Beyož gosegüe'e Juanna' ližya, Jesúsen' beze'e beyeje' Galilea gan'
jatixjue'ede' diža' güen, gwne' Diosen' nabi'e yichjlaždao' bene' ca' yosozenag
che'. ¹⁵ Jesúsen' gwne':

—Ba bžin ža cate' Diosen' nabi'e yichjlaždao' bene' yosozenagüe' che'. Le
yetiņje xtola'len' na' le šejle' diža' güen che Diosen' da' chyixjue'eda'.

Jesúsen' goxe' tap bene' gw Xen beĴ šja'aclene' le' tXen

(Mt. 4:18-22; Lc. 5:1-11)

¹⁶ Jesúsen' chde' do cho'a nisdao' che Galilean' cate' ble'ede' čhope bene' gw Xen beĴ, Simón na' bene' biše' Andrés. Na' zjanite' chosozale' yixjw dan' chesezende' belen' lo' nisa'. ¹⁷ Na' gož Jesúsen' legaque':

—Le šo'o len neda'. Nacle bene' gw Xen beĴ na' chbejle belen' lo' nisen', perw na'a gona' cont gaxle bene' yesyechoje' lo da' malen'.

¹⁸ Nach la' bosocua' ante yixjw čhen' na' jasa'aclene' le'.

¹⁹ Na' Jesúsen' gwze'e yelate' na' ble'ede' Jacobon' xi'in Zebedeo na' len bene' biše' Juan, zjajo'e lo' barcw chesyeyonšagüe' yixjw čhegaquen'. ²⁰ Na' Jesúsen' lece goxe' legaque' šja'aclene' le' na' bosocua' ante Zebedeon' ben' nac xagaque lo' barcon' len bene' ca' chesaclen le', nach ja'aque' len Jesúsen'.

To bene' gwo'yo gwyaze' da' xigüen'

(Lc. 4:31-37)

²¹ Besežine' yež da' nzi' Capernaum, na' ža che Dios Jesúsen' gwo'e lo' yodaon' da' zoa na' na' gwzologüe' bsd blo'ede'. ²² Bene' ca' že' na' besyebande' can' bsd blo'ede', le can' bzejni'iden' nacbia' nezde' cayanen' nac xbab che Diosen', gague bzejni'ide' can' chosozejni'i ben' chosolo'e ley dan' bzoj da' Moisés. ²³ Na' lo' yodaon' zoa to bene' yo'o nyaze' da' xigüen', na' bosye'e gwne':

²⁴ —čBixčhen' chgoša' chlaže' čchio' len neto', Jesús bene' Nazaret? čZedežiayo'o neto'? Neda' nombi'a le' na' nezda' naco' bene' laždao' xilaže' juisyw bene' gwseĴa' Dios.

²⁵ Nach Jesúsen' gože' da' xigüen':

—iŠšago', bechoj lo' yichjlaždao' benga!

²⁶ Na' da' xigüen' benen cont gwčhoĴe bena', nach chosya'adiachguan bechojen lo' yichjlažda'ogüen'. ²⁷ Yogo' bene' ca' že' na' besyebande' na' gose' lježe':

—čBixen' chac? čBixe da' coben' chlo'e benga? iNacbia' nape' yela' chnabia' na' yela' guac, le da' xigüe' ca' chesonen da' že'!

²⁸ Na' ca' nac dan' ben Jesúsen' bedao'nez gos gwĴalje dižan' doxen lagüe yež ca' gan' mbane Galilea.

Jesúsen' beyone' taobi'in che Simón Pedro

(Mt. 8:14-15; Lc. 4:38-39)

²⁹ Cate' besyechoje' lo' yodaon', Jesúsen' len Jacobo na' len Juan ja'aque' liž Simón na' Andrés. ³⁰ Na' taobi'in che Simónna' die' che'ede' xĴa; na' gose' Jesúsen':

—Benga die' che'ede'.

³¹ Nach jabiga' Jesúsen' na' beXue' taquen' gwĴise'ne'. Na' la' beyactede', nach bsiqi'e da' gose'ej gosagüe'.

Jesúsen' beyone' zan bene' chese'ede'

(Mt. 8:16-17; Lc. 4:40-41)

³² Cate' ba gwXoa gwbižen' na' ba gwXin, jasesane' lao Jesúsen' zan bene' chese'ede' na' bene' zjajo'o zjanyaze' da' xigüen'. ³³ Na' do yež bene' besedop besežague' cho'a yo'o gan' zoa Jesúsen'. ³⁴ Na' Jesúsen' beyone' bene' chese'ede' gwde gwdele yižgüe' na' bebeje' zan da' xigüe' da' zjajo'o zjanyaz bene', perw bitw bi'e latje bi yesenan, le legaquen zjanezen non' nac le'.

Jesúsen' chyixjue'ede' xtiža' Diosen' Galilea

(Lc. 4:42-44)

³⁵ Šbał cate' ne' nac čholjesúsen' gwyase' na' gwze'e gwyeye' ga nono nla' na' boł güiže' Diosen'. ³⁶ Simón na' bene' lježe' ca' ja'aque' jasyediljue'ne'. ³⁷ Na' cate' besyeželde'ne' gose'ene':

—Yogo'ze bene' chesyeyiljue' le'.

³⁸ Perw Jesúsen' gože'ne':

—Le šo'o ga yoble ga nac gala'ze cont lecze šjatixjue'eda' xtiža' Diosen' na', le da'nan' ba gwza'a.

³⁹ Can' goc, Jesúsen' gwde' doxen gan' mbane Galilea gwdixjue'ede' xtiža' Diosen' to to yodao' che neto' bene' Israel, na' bebeje' da' xigüe' da' yo'o nyaz bene'.

Jesúsen' beyone' to bene' che'ede' lepra

(Mt. 8:1-4; Lc. 5:12-16)

⁴⁰ To bene' che'ede' yižgüe' dan' nzi' lepra jabigue' gan' zoa Jesúsen' na' bzoa xibe' gože'ne':

—Še chaclažo', guac yeca'o yižgüe' dan' che'edan'.

⁴¹ Na' Jesúsen' beži'ilaže'de' le' na' beḅue'ne' gwne':

—Chaclaža' yeyacdo'. Beyaque.

⁴² Cate' gwne' ca' la' bega'ate yižgüen' na' beyacde'. ⁴³ Nach Jesúsen' besele'ne' liže', bene' mandadw, gože'ne':

⁴⁴ —Notno yo'o can' ba beyona' le', con gwyej jaṇa' bḅoza' cont le'ede' bač beyacdo', na' bnežw da' cheyla' gwnežjo' dan' non Moisésen' mandadw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

⁴⁵ Perw ben' bi bchejde', yogo'ze bene' gože' can' goca'. Da'nan' Jesús'a' bich goc šeje' con ca nla'ze gate'teže yež, san con gwde' do yixe', na' bia'cze bene' za'ac yogo'ze yež jasene'e le'.

2

Jesúsen' beyone' to bene' bi chda šla'a ni'a ne'e

(Mt. 9:1-8; Lc. 5:17-26)

¹ Gwde to čop ža, Jesúsen' beyeje' da' yoble yež dan' nzi' Capernaum, na' bene' Capernaum ca' goseņezde' bežine' to yo'o ga ba gwzoacze'. ² Na' bedao'nez besežag bene' zan, nečach gosezaque' yesenite' lo' yo'ona' ne cho'a yo'on, nach Jesúsen' gwdixjue'ede' xtiža' Diosen' len legaque'. ³ Nach besežin xonj bene' cont jasesane' lao Jesúsen' to bene' xinj bene' bi chda šla'a ni'a ne'e; tap bene' zjano'ene'. ⁴ Perw bi chac yesežine' gan' zoa Jesúsen' catec chyi. Nach goseque'e tej dan' ncu'a' yichj yo'on na' beseletje' le' na'le to lo cam dao'.

⁵ Na' cate' Jesúsen' goche'ede' can' chesejnilaže'nen', gože' bene' güe'na':

—Xi'ina', ba beži'xena' xtołon'.

⁶ Bał bene' chososed chosolo'e ley dan' bzoj da' Moisésen' zjachi'e na', na' gosone' xbab: ⁷ “¿Bixčhen' chna benga ca? le chon cuine' ca Dios. Nono zoa bene' gac yezi'xene' xtoła' beṇač. Toz Diosen' gac yezi'xenen'.” ⁸ Perw Jesúsen' chache'eczede' can' nac xbab čhegaquen', na' gože' legaque':

—¿Bixčhen' chza'laže'le ca? ⁹ Še yapa'ne': “Ba beži'xena' xtołona", bi nezele še napa' yeła' gwnabia' cont yezi'xena' xtole'na', san še yapa'ne': “Gwyas, beyoa' xcamon", na' nacbia' še napa' yeła' guac gan' gwnian'. ¹⁰ Perw neda' naca' ben' gwseła' Dios golja' beṇač, gwlo'eda' le'e na'a zoa' yežlio nga napa' yeła' gwnabia' cont yezi'xena' xtoła' beṇač.

Nach gože' bene' xinja':

11 —Chapa' le', beyas, beyoa' xcamon' na' beyej ližo'.

12 La' beyaste bene' xinja' chesena'te bene' ca' nita'na' na' beyoa' xcamen'. Da'nan' yogo' bene' ca' besyebande' na' gosoe' yela' choxc̄len che Diosen', gosene':

—Biṇa' le'echo yela' guac dan' nac ca'.

Jesúsen' goxe' Leví cont gwejlene'ne'
(Mt. 9:9-13; Lc. 5:27-32)

13 Da' yoble gwwej Jesúsen' cho'a nisdao' na' bene' zan besedobe' gan' zeje' na' bsd blo'ede' legaque' xtíža' Diosen'. 14 Na' Jesúsen' gwdie' latje gan' chi' Leví xi'in Alfeo chchixjue' impuesto, na' cate' ble'ede' le' na' gože'ne':

—Da len neda'.

Nach gwzoža' Levín' na' gwejlene'ne'.

15 Na' gwdena' goquen' chi' Jesúsen' liž Levín' na' gü'e'ej gwdagwlene'ne' txen len zan bene' güechixjw na' len yebał bene' güen da' xinj, na' len bene' ca' zjanaque' Jesúsen' txen, le zan bene' zja'ac zjanao' le'. 16 Perw na' bene' ca' chososed chosolo'e ley dan' bzoj da' Moisés na' bene' fariseo ca' cate' besele'ede' che'ej chagüe' txen len bene' ca', gose'e bene' ca' zjanaque' Jesúsen' txen:

—¿Nacxečhen' ben' chsd chlo'e le'e che'ej chagwlene' txen bene' güechixjw na' yebał bene' güen da' xinj ca'?

17 Cate' Jesúsen' bende' can' gosene' na' gože' legaque':

—Bene' bi chesacšene bi cheseyažjde' bene' güen rmed. Bene' chesacšende', legaquen' cheseyažjde' bene' güen rmed. Gague bene' ba zjanaque' bene' güen len Diosen' zedeneyoeda' cont yesyetiñjde' xtolen', san bene' güen da' xinj. Legaquen' zjazaca'lebe' ca bene' cheseyažje bene' güen rmed.

Gosenabde' Jesúsen' bixchen' bene' zjanaque' le' txen bi chesone' gwbas
(Mt. 9:14-17; Lc. 5:33-39)

18 To ža cate' bene' ca' zjanaque' txen len Juanna' na' bene' zjanaque' txen len bene' fariseo ca' gosezoe' gwbas, bał bene' jasa'aque' jasenabde' Jesúsen': —Bene' ca' zjanaque' txen len Juanna' na' bene' ca' zjanaque' txen len bene' fariseo ca' chesone' gwbas, na' bene' ca' zjanaque' txen len le' bi chesone' gwbas. ¿Bixchen'?

19 Na' Jesúsen' gože' legaque':

—¿Guaque yesezoa gwbas bene' chaxe' to ga chac yela' güešagna' šlac ben' bšagnan' zualene' legaque'? Še zoa ben' bšagnan', bi gac yesone' gwbas. 20 Perw žin ža cate' bich zoe' len legaque', cana'ch yesone' gwbas. Na' ca'czen' naquen len neda' na' len bene' ca' zjanaque' neda' txen.

21 Nono zoa bene' yode'e to lache'exo' na' yezoen' to lache' cobe, le lache' coben' yebe' cate' chiben' na' šon' lache' golen', na' gan' žon'na' gacchen da' xen. 22 Neca zoa bene' chgue'e vino cobe lo' bzod yide'exo', le vino coben' chšon' yide'exon' na' chbiayi' vinon' len yida'. San chesegue'e vino coben' lo' yid cobe cont bibi gaquen.

Bene' ca' zjanaque' Jesúsen' txen chesalje' dao ža che Dios
(Mt. 12:1-8; Lc. 6:1-5)

23 To ža che Dios Jesúsen' gwdie' to ga nyaž trigw, na' bene' ca' zjanaque' le' txen gosezola'güe' chesalje' dao che trigon' šlac gosodie' gan' nyaženna'.

24 Nach bene' fariseon' gose'e le':

—Gwna'šc ¿bixchen' cheson bene' ca' zjanaque' le' txen žin da' bi cheyała' yesone' ža che Dios?

25 Na' Jesúsen' gože' legaue':

—¿Bina' gwable can' ben da' rey David to ža cate' le' na' bene' lježe' ca' gosedone'? 26 Gwyo'o Davin' ga nac liž Dios cate' da' Abiatar goque' bꝑox blao, na' gwdagüe' yetextil da' nac che Dios da' bi chac gagw bene' bi nac bꝑox, na' lecze bnežjue' che bene' zja'ac len le'.

27 Lecze gož Jesúsen' legaue':

—Diosen' gwleje' to ža cate' bi yeson benačhen' žin cont gaclenen benačh, gague gwleje' benačhen' cont yesonxene' ža čhen'. 28 Da'nan' naquen lo na' nia' bi da' nac güen goncho lente cate' nac ža che Dios, neda' naca' ben' gwsela' Diosen' golja' benačh.

3

Jesúsen' beyone' to bene' nꝑo'on šla'a taque'
(Mt. 12:9-14; Lc. 6:6-11)

1 Yeto ža che Dios Jesúsen' gwyo'e da' yoble to lo' yodao' che neto' bene' Israel na' ca hora' ba chi' to bene' nꝑo'on šla'a taque'. 2 Na' bene' ca' že' lo' yodao' na' chosogüia cheseñe'e Jesúsen' še yeyone' bena' žan' nac ža che Dios cont de da' yosode'ede' yesagüe' xya che'. 3 Nach Jesúsen' gože' ben' nꝑo'on taquen':

—Gwzoža' na' gwzecha nga.

4 Nach gwnabde' bene' ca' yezica'chle:

—¿Bi da' cheyala' goncho ža che Dios? ¿Goncho da' güen, še goncho da' mal? ¿Cheyala' yoslacho bene', še cheyala' gotchone'?

Perw na' legaue' gosenite' šižize. 5 Nach Jesúsen' gwne'e legaue', bže'e can' gosone' xbab, na' lecze gocyaše'laže'de' dan' bi gosejle'e che', nach gože' ben':

—Bli naon'.

Na' blien', na' taquen' beyaquen binlo. 6 Nach besyežaš bene' fariseo ca' na' gosezolağüe' chosoxi'e len bene' ca' zjada' Herodes naquen' yesone' yesote' Jesúsen'.

Zan bene' nita' cho'a nisdaon'

7 Nach Jesúsen' gwyeye' cho'a nisdaon' len bene' ca' zjanaque' le' txen, na' zan bene' Galilea ja'ac len le'. 8 Na' zan bene' za'aque' Judea, na' Jerusalén, na' Idumea, na' yešla'a yegw Jordán, na' gan' mbane Tiro na' Sidón goside' bedeseñe'e le' cate' gosenezde' yela' guac da' chonen'. 9 Da'nan' Jesúsen' gože' bene' ca' zjanaque' le' txen yeseyiljue' to barcw dao' gan' cuie' cont bi yosoči bene' ca' zjanžaga' le', 10 le' bene' zan ba beyone', na' bene' ca' ñe' chese'ede' chosožiga' lježe' nac gac yesoxe'ne'. 11 Na' bene' ca' zjajo'o zjanyaz da' xigüen' cate' chesele'ede' Jesúsen' chosozoa xibe' lağüen' na' da' xigüe' ca' chososya'an chese'en le':

—Len' naco' dogualje Xi'in Dios.

12 Perw Jesúsen' gwdile' legaquen na' bene' mandadw bi yesenan no nac le'.

Jesúsen' gwchie' bene' šižinw ca' gosaque' txen len le'
(Mt. 10:1-4; Lc. 6:12-16)

13 Beyoža' Jesúsen' gwlo'e to lo ya'a na' goxe' bal' bene' goclaže' šja'aclene' le', nach gosa'aque' ja'aque' gan' zoen'. 14 Nach gwleje' šižinw bene' yesenita' len le', cont sele' legaue' šjasedixjue'ede' xtižen'. 15 Na' bnežjue' legaue' yela' guac cont yeseyone' bene' güe' na' yela' gwnabia' cont yesyebeje' da' xigüe' da' yo'o nyaz bene'. 16 Šižinw bene' quin' gosac: Simón ben' lecze gože'ne' Pedro; 17 Jacobo len bene' biše' Juan bene' ca' zjanac xi'in Zebedeo, na' bsi'e

legaque' Boanerges, zeje diža' bene' zjanac ca yi' gwzio' cate' chašjw chtinen;
 18 nach Andrés, na' Felipe, na' Bartolomé, na' Mateo, na' Tomás, na' Jacobo
 xi'in Alfeo, na' Tadeo, na' Simón ben' gwde'e bene' ca' zjanzi' cananista, 19 na'
 Judas Iscariote ben' gwdechle bdie' Jesúsen' lo na' bene' ca' chesegue'ede' le'.

Gosene' Jesúsen' bebeje' da' xigüe' len yela' guac che Beelzebú
 (Mt. 12:22-32; Lc. 11:14-23; 12:10)

Beyoža' Jesúsen' len bene' ca' zjanaque' le' txen goso'e lo' yo'o gan' zoe' ca
 hora', 20 na' da' yoble besežagchua bene', neca goc yese'ej yesagw Jesúsen' len
 bene' ca' zjanaque' le' txen. 21 Na' cate' goseneze biše' ljež Jesúsen', ja'aque'
 cont yesyech'e'ene', le gosene' chactonte'.

22 Nach bene' ca' bososed bosolo'ede' ley dan' bzoj da' Moisés gosa'aque'
 Jerusalén na' ja'aque' distritw Galilea gan' chsed chlo'e Jesúsen' na' gose'e
 bene' ca' že'na':

—Benga yo'o nyaze' Beelzebú dan' chnabia' da' xigüe' ca', na' Beelzebún'
 chaclenen le' cont chebeje' da' xigüe' zjajo'o zjanyaz bene'.

23 Nach Jesúsen' goxe' bene' ca' na' bsd blo'ede'ne' gwne':

—¿Nac gon Satanás dan' chnabia' da' xigüe' ca' yebejen lecze da' xigüe'? 24 Še
 to gobiern choje' chop šon cuenle na' yeyoža' yesedile legacze', gobiernna' bi
 sibi'e. 25 Na' še bene' že' toz yo'o yesechoje' chople na' yesedile legacze', gague
 sša yesenite' txen. 26 Na' še Satanásen' len da' xigüe' chen yesechojen chople
 na' yesedilen, lecze bi sibian', san na' yeyož yedon.

27 Nono gac šo'e lo' yo'o che to bene' gual na' que'e bi da' de che' še cbi
 zgua'tec gwcheje' bene' gual na', lete gone' ca' nach gac que'e bi da' de che'.

28 Da' li žia' le'e, yogo' da' xinj da' chon benač na' yogo' diža' bya' da' yesene',
 Diosen' yezi'xene' chen še yesyetinjde'. 29 Perw note'teze bene' ne' yela' ya' che
 Spiritw che Dios, gwbat yezi'xen Diosen' che', san de dola' che' toli tocanē.

30 Gwne' ca' dan' gosene' che' yo'o nyaze' da' xigüe'.

Xna' Jesúsen' na' bene' biše' gosaxe'ne'
 (Mt. 12:46-50; Lc. 8:19-21)

31 Na' bžin xna' Jesúsen' len bene' biše', na' gosenite' chyo'ole gosaxe' le'.

32 Na' bene' ca' zjanita' cuit Jesúsen' gose'ene':

—Xna' o len bene' bišo' ca' zjanite' chyo'o na' chesyeyiljue' le'.

33 Nach Jesúsen' gože' legaque':

—¿Nezele non' nac xna' a na' no zjanac biše' lježa'?

34 Nach gwne'e bene' ca' zjachi' cuite'na', na' gwne':

—Bene' quin' zjanac xna' a na' zjanaque' biše' lježa'. 35 Le note'teze bene'
 chone' da' chna'laže' Dios, bena' nac bene' biša', bene' zana', lecze naque'
 xna'a.

4

Jempl che bene' goz trigo
 (Mt. 13:1-9; Lc. 8:4-8)

1 Yeto ža yoble gwzola' Jesúsen' chsed chlo'ede' cho'a nisaon', na' be-
 sežagchua bene' zan juisyw gan' chi'ena'. Na' da' besežagchua bene' zan,
 bnten byen gwyo'o Jesúsen' to lo' barcw dao' da' chda' lo' nisaon' cho'a
 yo bižen' na' gwchi'e lo'enna', na' yogo' bene' ca' gosenite' cho'a nisaon' ga
 nac yo biž. 2 Nach da' zan da' bsd blo'ede' legaque' len jempl da' bi'e. Na'
 bzejni'ide' legaque', gwne':

³—Le gwzenag da' nga: To bene' güen žin jeze' trigw. ⁴Na' šlac zeje' chose' trigon', late' biñ che trigw dan' chazen' jasechazen chanez nach be ca' žia xil be chaš le'e yaba gosagwban'. ⁵Yelaten' jasechazen ga nac lo yej, ga bibi yotec zoa, na' da' nga byob blan' le bi jasechazen ga nac sitjw. ⁶Perw cate' bla' gwbiža' na' bzejen len na' gwbižen, le gague yo'otec loenna' sitjon'. ⁷Yelaten' jasechazen ga nac lo yag yeše', na' yag yešen' gosecha'on na' bosoložen' len, na' bibi gosebjan. ⁸Perw na' yelaten' jasechazen ga nac yo' šagüe'. Da' nga beselan' na' gosecha'on na' leca güen gosebjan, balen gosebjan do šichoa güeje to ton, balen gayon, na' yebalen do to gayoa.

⁹Na' gože' legaque':

—Le'e žia nagle da' chene, le gwzenag xtiža'na'.

Bichen' bzejni'ide' bene' len jempl

(Mt. 13:10-17; Lc. 8:9-10)

¹⁰Gwdena' cate' ba besyeya'ac bene' zan ca', bene' ca' zjanita' gała'ze len le' na' len bene' šižinw ca' zjanaque' le' txen, gosenabde' le' bi zejen jempl dan' bi'en. ¹¹Na' gože' legaque':

—Nono na' neze can' nac yela' gwnabia' che Diosen', perw ba chone' cont le'e chejnilaže'lene' nezelen. Na' bene' bi chesaclaže' yesejnilaže' Diosen', choe'lengaca'ne' xtižen' len jempl. ¹²Chona' ca' cont yesele'ede' can' chonan' na' bitw yesache'ede' bi zejen, na' cont yesende' xtižan' na' bi yesejni'iden', na' neca yesyetiñjde', neca yezi'xen Diosen' xtožen'.

Jesúsen' bzejni'ide' bi zejen jempl che ben' ben goza'

(Mt. 13:18-23; Lc. 8:11-15)

¹³Nach gože' legaque':

—¿Bi chejni'ile jempl nga? ¿Nacxe gac šejni'ile jempl yoble da' güe'lena' le'e? ¹⁴Ben' ben goza' naque' ca' ben' choe' xtiža' Diosa'. ¹⁵Na' bal' bene' zjanaque' ca' biñ dan' beselažo' chanez, le chosozenague' cate' chas chlaljje xtiža' Diosen', na' ca' cheyoža' la' chžinte Satanásen' dan' chnabia' da' xigüe' ca' na' chebejen xtiža' Diosen' dan' ba yo'o yichjlažda'ogüen'. ¹⁶Yebal' bene' zjanaque' ca' biñ dan' beselažo' ga nac lo yej na' bi ben loen. Legaque' chesyebede' chosozenague' xtiža' Diosen', ¹⁷perw šložga chesezibi'e, na' cate' chesac bi da' mal čegaque' o bichle chesone bene' legaque' neče da' chosozenague' xtiža' Diožen', la' chesebejyichjten'. ¹⁸Na' yebale' zjanaque' ca' biñ dan' besego'onen ga nac lo yag yeše'. Chosozenague' xtiža' Diosen', ¹⁹na' šlac zjambane' chesyela' chesyeyejde', na' da' chesaclaže' yeseñi'e chziye'en legaque' na' chesezelaže' yogo'ze da' de yesata' čhe'. Yogo' da' qui bi choen' latje yega'an xtiža' Diosen' lo' yichjlažda'ogüen' na' da'nan' bi chesejnilaže' le' ca' cheya'la'. ²⁰Perw na' nita' bal' bene' chosozenague' xtiža' Diosa' na' chesejnilaže' le' do yichj do laže', bene' qui zjazaca'lebde' ca' biñ dan' beselažo' lo yo' šagüe'. Bal'e' zjanaque' ca' biñ dan' gosebjan šichoa güeje to ton, na' yebale' ca' da' ca' bexoen' gayon, o ca' no da' ca' bexoen' to gayoa güeje to ton.

Jempl che yi' dan' chguala'cho

(Lc. 8:16-18)

²¹Lecze gože' legaque':

—Cate' chguala'cho to yi' ¿gwdosa'chon to caj o gwzoachon xan cam? Bi choncho ca', san chguala'cho yin' na' chzoachon sibe cont gwseñin'. ²²Na' da' ngaše' chia' neda' na'a, lenna' gwlo'elaon, na' da' nono na' neze chia', žin ža yesenezden'. ²³Le'e žia nagle da' chene, le gwzenag xtižan'.

²⁴ Lecze gože' legaque':

—Le gwzenag da' quingan' da' chzejni'ida' le'e. Le con can' chonle len len, can' gon Diosen' len le'e. Na' gonchcze' cont soachle mbalaz da' chzenagle che'. ²⁵ Le še chzenagle xtižen' gwzejni'ichde' le'e, perw na' še bi chzenaglen, da' daon' ba nezele yeyanlaže' len.

Jempl che bin dan' chlan' na' chcha'on

²⁶ Lecze gwna Jesúsen':

—Yeł'a' gwnabia' che Diosen' zaca'leben ca dan' chac cate' to bene' chaze' bite'teze bin lo yo. ²⁷ Chjaytase' na' chebane' cheyase', chde ža yel, na' chla' dan' gozen' na' chcha'on, perw le' bi nezde' naquen' chac. ²⁸ Le to gualazze yežlio nan' chonen len, zgua'tec chla' lbe'edagüen', nach chlan' dao, na' cheyoža' chbian da' cheyał'a' cuian. ²⁹ Na' cate' ba goł dan' chbianna' na' chja'aque' chjasyexi'en, le ba bžin cho'a gwlap.

Jempl che bin che xomdas

(Mr. 13:31-32; Lc. 13:18-19)

³⁰ Nach lecze gwna Jesúsen':

—Gonchcho xbab bi ca da' zaca'lebe yeł'a' gwnabia' che Diosen' na' güe'cha' jempl cont nezele šanch bene' yosozenag che' cont nabi'e yichjlažda'ogaue'. ³¹ Naquen ca to bin che xomdas da' chyaž lo yo. Len chnabia' nac da' dao' len bin ca' chazcho lo yežlion'. ³² Perw cate' bač nyažen, chcha'on na' chaquen da' xench lao yiže' cuan ca', na' da' xenchgua chac xol che xozenna', na' lente byin dao' ca' chesyezi'laže'ba' lo xozenna'.

Jesúsen bgone' žin jempl

(Mt. 13:34-35)

³³ Can' blo'e Jesúsen' xtiža' Diosen' yogo' ni'a, bi'e zan jempl ca che ben' goza' na' che bin ca', con ga zelao goc gosejni'ide'. ³⁴ Bitwbi bzejni'ide' legaque' sin ca be'e jempl, nach cate' bich nita' bene' zan ca', bzejni'ide' bene' ca' zjanaque' le' txen bi zejen yogo' da' ca'.

Jesúsen' bebecžie' be' bdono' len nisdao'

(Mt. 8:23-27; Lc. 8:22-25)

³⁵ Leze lo žana' cate' gwxin, Jesúsen' gože' bene' ca' zjanaque' le' txen:

—Le šo'o laga'cho yešla'a nisdaon'.

³⁶ Nach bosyocua'añe' yezica'chle bene' ca' že' gan' ba bsed blo'ede' na' gosa'aque' lo' barcw daon' gan' ba yo'ocze Jesúsen'. Na' yebał bene' lecze ja'aclene' legaque' len yeto chop barcw dao'. ³⁷ Na' gwzolao gwyečhchgua to be' bdono' na' nisdaon' leze chas chatan', na' gwzolao cheyož nis lo' barcon'. ³⁸ Jesúsen' ba chtase' xante barcon' to lo xcogue' caten' goc ca'. Na' bosyosbane' le' gose'ene':

—iMaestro! žBibi de chza'lažon' še ba gwdebe nisdaon' chio'?

³⁹ Nach gwyas Jesúsen' na' gwdile' be' bdonon' na' gože' nisdaon':

—ižižize! ižižize!

Na' bebe'ži be' bdonon' na' beyata'ži nisdaon'. ⁴⁰ Nach Jesúsen' gože' bene' ca' zjanaque' le' txen:

—žBixchen' chžebtecle? žNacxečen' bi chejle'le chia'?

⁴¹ Legaque' besežebchgüe' na' gose' lježe':

—žNoxe benga? lente be' bdono' na' len nisdaon' chosozenaguen che da' že'.

5

Beñe' Gadara yo'o nyaze' da' xigüe'
(Mt. 8:28-34; Lc. 8:26-39)

¹ Besežine' šla'a nesdaon' gan' mbane Gadara, ² na' cate' bechoj Jesúsen' lo' barcon' to beñe' yo'o nyaz da' xigüen' bchoje' lo' capsantw na' jašague' le'. ³ Bena' ba zoacze' capsantw na'le na' nono chzoe goxe' le', ne len gden ca gosezoede' le'. ⁴ Da' zan ni'a bosocheje' ni'a ne'e gden, perw bia'cze gwčhoguen', con bzojx btinen', na' nono gwzoe le'. ⁵ Yogo' ža yogo' yel gwde' bosya'adie' do lo ya'a na' do ladjo ba ca' na' tža tža chone' zi' cuine' len yej. ⁶ Na' cate' ble'ede' Jesúsen' zito' gwyejseje' jazoa xibe' lagüen', ⁷ na' da' xigüen' benen cont bosya'adie' gože' le':

—¿Bixchen' chgoša' chlaže' chio' len neda', Jesús? Naco' dogualje Xi'in Dios beñe' nape la'zelagüe yela' chnabia' xen. Neče' Dios chneyoeda' le' bi gwsaco' neda'.

⁸ Da' xigüen' benen cont gwna ben' ca' dan' gož Jesúsen' len:

—Da' xigüe', bsan benga.

⁹ Na' gwnabe Jesúsen' len:

—¿Bi lio'?

Na' boži'in xtižen':

—Legión lia', le nac zanto'.

¹⁰ Na' goseneyoen Jesúsa' bi yeselen' zito' cate' yesyežašen' yichjlaždao' ben'.

¹¹ Na' gala'ze lo ya'ana' chesaš zan coš chesagwba'. ¹² Nach da' xigüen' goseneyoen le':

—Gwsela' neto' gan' nita' coš ca' na' ben latje šjajo'oto' lo' yichjlažda'oban'.

¹³ Nach Jesúsen' bnežjue' latje, na' besyechoj da' xigüen' lo' yichjlaždao' bena' na' jasyeyo'on yichjlaždao' coš ca'. Nac ca do chop mil cošen'. Na' besyeyetjses coš ca' le'e ya'a gan' nita'ban' na' jaselažo'ba' lo' nisdao' ga gosatba' gose'ejba' nis.

¹⁴ Nach beñe' ca' chosoyoe' cošen' bosyoxonje' jasyeyeže' beñe' lagüe yež len beñe' chaš yixe' can' goca'. Na' ja'ac beñe' jasene'e bixen' goc. ¹⁵ Cate' besežine' gan' zoa Jesúsen' besele'ede' ben' ba gwyo'o gwyaz da' xigüen', na' na'a ba chi'e nyaz xalane' na' ba bezoa yichjlažda'ogüen' binlo. Na' besežebe'. ¹⁶ Na' beñe' ca' besele'ede' can' goquen' gos'o'e diža' che dan' goc len ben' gwyo'o gwyaz da' xigüen', lez ca' dan' goc len coš ca'. ¹⁷ Nach gosezolagüe' gosata'yoede' Jesúsen' yeze'e lažgaquen'.

¹⁸ Na' cate' beyo'o Jesúsen' lo' barcon' ben' ba gwyo'o gwyaz da' xigüen' gota'yoede' Jesúsen' šejlene' le'. ¹⁹ Perw Jesúsen' bi be'e latje, san gože' le':

—Beyej ližo' na' jayež beñe' lo' yo'o chio' na' no beñe' migw chio' yogo' da' güen da' ba ben Xancho Diosen' len le' na' catec ba beyaše' beži'ilaže'de' le'.

²⁰ Na' beza' ben' na' gwzolagüe' cho'e diža' yež ca' gan' mbane distritw Decápolis yogo' can' ben Jesúsen' len le', na' yogo' beñe' gosene xtižen' besyebande'.

Bi' no'ol che Jairo, na' no'ol ben' gwdane' xa Jesúsen'
(Mt. 9:18-26; Lc. 8:40-56)

²¹ Cate' bežin Jesúsen' cho'a nesdaon' zeze'e lo' barcw daon' dan' zeza' šla'a nesdaon', beñe' zan ja'aque' gan' bežinen', na' Jesúsen' bega'ane' cho'a nisdao' na'ze. ²² Nach bžin to ben' nac beñe' gwnabia' che yodao' che yežna', lie' Jairo. Cate' ble'ede' Jesúsen' bzoa xibe' lagüen' ²³ na' gota'yoechgüede'ne' gože'ne':

—Xi'ina' no'ole ba chatbe'. Benšca goclen yo'o xoa taco' yichjbe' cont yeyaquebe' na' bi gatbe'.

²⁴ Nach Jesúsen' gwyejlene' le'. Na' bene' zan ja'acch, na' bosochichgüe' le'.
²⁵ Ladjo beñe' ca' len to no'ol che'ede', ba goc šižinw iz chzoe' gwbao'. ²⁶ Ba bžaglaochgüe' jen cuine' rmed len zan beñe' güen rmed ca', na' ba benditje' yogo' xmechue' da' de, perw bitwbi gwxi'czen, san chyala'len. ²⁷ Cate' bende' cheso'e xtižá' Jesúsen', no'olna' gwdie' ladjo beñe' ca' na' bžine' cože'le Jesúsen' na' gwdane' xen'. ²⁸ Le bene' xbab, gwne': "Con še ba gwdana' xen' nach yeyactecza'." ²⁹ Na' da' li cate' gwdane' xen' la' gwlezte gwbao' dan' zoen', na' no'olen' goche'ede' ba bega'a yižgüe' chen'. ³⁰ Na' Jesúsen' la' goche'etede' to beñe' ba beyacde' len yela' guac chen', nach gwyečhje' gwne'e beñe' ca' nita' cože'le, na' gwñabde' legaque':

—¿Non' gwdan xan'?

³¹ Nach beñe' ca' zjanaque' Jesúsen' txen gose'ene':

—Ba ble'eczedo' ca chosočhie' le', ¿bixchen' chñabo' non' gwdan xaon'?

³² Perw Jesúsen' chñe'e nile na'le cont le'ede' non' gwdan xen'. ³³ Nach no'olen' nezde' can' ba goc che' na' do chaž chžebe' gwyeje' jazoa xibe' lagüen' na' gože'ne' yogo' da' li. ³⁴ Na' Jesúsen' gože'ne':

—Xi'ina', ba beyacdo' dan' chejnilažo' neda'. Beyej binlo, na' bich bi gacdo' len yižgüe' chion'.

³⁵ Ne' choe'te Jesúsen' dižan' ca' cate' besežin beñe' gosa'ac liž xan yodaon', na' gosi'e xa bi' no'ol daon':

—Ba got bi' chion', ¿bixchen' choncho' zed Maestro nga?

³⁶ Perw Jesúsen' bi bene' cuent dan' chesena beñe' ca', na' gože' xan yodaon':

—Bitw žebo', con gwyejle' chia'.

³⁷ Na' bi bi'e latje šja'aclen beñe' zan le' gan' xoa bi' no'olen', san Pedro, Jacobo na' Juan beñe' biše' Jacobo, beñe' ca'ze ja'aclen le'. ³⁸ Na' cate' besežine' liž xan yodaon', ble'ede' ba chi' žaš chesosye'e chesebeže'. ³⁹ Nach gwyo'e na' gože' legaque':

—¿Bixchen' mbecle žaš chbežle? Bi no'ol daon' biña' gatbe', san chtasben'.

⁴⁰ Perw bosoxiže' gosonle' che'. Nach Jesúsen' bešaše' yogo'lole', na' gwče'e xaxna'be' na' beñe' ca' zja'aclen le' na'ze na' goso'e len le' gan' de bi' no'ol daon'.

⁴¹ Na' beñue' taca'ben' na' gože'be':

—Talita, cumi —zeje diža': Bi' no'ole, chapa' le' beban na' beyas.

⁴² Nach bi' no'ol daon' la' beyastebe' na' goc beza'be', le šižinw izegueben'. Na' beñe' ca' besele'e leca besyežejde' can' goca'. ⁴³ Perw Jesúsen' gože' legaque' nono yese'e ca', na' gože' legaque' yeso'e bi' no'ol daon' da' gagwbe'.

6

Jesúsen' bežine' distritw gan' chi' yež Nazaret (Mt. 13:53-58; Lc. 4:16-30)

¹ Na' beza' Jesúsen' na' bežine' laže', na' beñe' ca' zjanaque' le' txen ja'aclene' le'. ² Na' cate' bžin ža che Dios, Jesúsen' gwzologüe' bsd blo'ede' lo' yodaon'. Na' beñe' zan beñe' gosende' xtižen' besyebande' na' gosene':

—¿Nacxe chaquen' cho'e diža' ca'? ¿Bi yela' sinan' nezde'? na' žnacxečhen' chac chone' yela' guac ca'? ³ Benga chonšagüe' yag na' naque' xi'in María. Nombia'chwne' na' beñe' biše' Jacobo, José, Judas na' Simón, na' lecze beñe' zane' ca' nite' lažcho nga.

Na' da' zjanombi'ene' nan' bi gosaclaže' yesejle'e che'. ⁴ Nach Jesúsen' gože' legaque':

—Yogo'ze bene' chesonxene' bene' choe' xtiža' Diosen', perw bene' gualaž che', bene' biše' lježe' na' bene' lo' yo'o che' bi chosozenague' che'.

⁵ Na' ne to yela' guac ca' goc gone' na', lete gwxoα taquen' yichj to chop bene' güe' na' beyone' legaque'. ⁶ Na' bebande' dan' bi gosejle' bene' che'. Na' gwdechle gwda Jesúsen' bsed blo'ede' to to yež dao' ca' nita' gała'ze.

Jesúsen' gwsele' bene' ca' zjanaque' le' txen jasedixjue'ede' xtiža' Diosen'
(Mt. 10:5-15; Lc. 9:1-6)

⁷ Na' goxe' bene' šižinw ca' na' gwsele' chop güeje' to to yež, na' bnežjue'ne' yela' gwnabia' cont goc besyebeje' da' xigüe' lo' yichjlaždao' bene'. ⁸ Na' cate' za' yesa'aque' gože' legaque' bibi yesože' chanez, ne bzod, ne yetextil, ne mechw, con yesože' to xis da' yosočiše'. ⁹ Na' yosoleje' yel perw bi yesoe' yeto xcamise'. ¹⁰ Na' lecze gože' legaque':

—Cate' žinle to liž bene', na'ze yega'anle šlac zoale lagüe yeža', cate'ch yeza'le yeža' cana'ch yeza'le latja'. ¹¹ Na' še zoa ga bi yosolebe' le'e neca yosozenague' chele, cate' yeza'le na' le cuibe ni'alen' yo bište cont nachbia' malen' chesone' bi chosozenague' xtiža' Diosen'. Da' li žia' le'e cate' žin ža gac juisyw bene' ca' bi yosolebe' le'e yesacche' castigw clcl ca' bene' Sodoma na' bene' Gomorra.

¹² Nach gosa'aque', na' goseyixjue'ede' cheyała' yesyetinge xtoła' benachen'. ¹³ Leze besyebeje' da' xigüe' da' yo'o nyaz bene', na' zan bene' güe' goseyebe'ne' set na' besyeyacde'.

Gosote' Juan ben' bzoe' bene' nis
(Mt. 14:1-12; Lc. 9:7-9)

¹⁴ Na' ca' nac rey Herodes, gwnezde' can' chesone', le yogo'ze bene' gosende' can' ben Jesúsen'. Na' Herodesen' gwne':

—Juan ben' bzoe' bene' nisen' ba beban ladjo bene' guat ca'. Da'n'an' chaque' chone' yela' guac.

¹⁵ Yebałe bene' gosene':

—Naque' ben' be' xtiža' Diosen' cani', ben' le Elías.

Na' yebałe' gosene':

—Naque' con to bene' choe' xtiža' Dios ca' bene' ca' gosoe' xtiža' Diosen' cani'te.

¹⁶ Cate' Herodesen' bende' dižan' nac ca' na' gwne':

—Bengan' Juan ben' gwchogbi'an gosechogue' yene', na' na'a ba bebane' ladjo bene' guaten'.

¹⁷⁻¹⁸ Le Herodesen' beque'e Herodías na' gwzoalene' le' goque' xo'ole' la'czla' Herodíasna' naque' xo'ole Felipe biše'na'. Na' Juanna' gože' Herodesen':

—Bi cheyała' soalen' no'ol che' bene' bišon'.

Da'n'an' Herodesen' gwchogbi'en gosezene' Juanna' na' bosocheje'ne' len gden lo' yo'o ližya gan' gosegüe'ene'.

¹⁹ Can' goc Herodíasna' bgue'ede' Juanna' na' goclaže' gote'ne', perw bi goc.

²⁰ Le Herodesen' gwnezde' Juanna' naque' to bene' chon da' zej to licha na' to bene' yo'o lo' na' Dios, nachen' Herodesen' bžebe' Juanna' na' bi be'e latje bi gone Herodíasen' le'. Na' la'czla' bi gweyjni'iteque Herodesen' dan' bšalj Juanna', con bebede' bzenague' che'. ²¹ Perw Herodíasen' beyilwlaže' nac bene' cate' ben Herodesen' lni goła' ža le', bsiñi'e xše' da' gwdağüe' len bene' gwnabia' che' ca' na' no xan soldadw ca' na' nochle bene' blao že' distritw Galilean'. ²² Bi' no'ol che' Herodíasen' gwyo'obe' bya'abe' gan' gosagüe' xšen'

na' beca'a Herodesen' can' bya'aben', lez ca' ben' gosagw len le' xšen'. Na' reyna' gože' bi' no'ola':

—Gwnabe neda' con da' žan čhio' na' goṇan'.

²³ Na' lecze gože'be':

—Diosen' naque' testigw čhia' goṇa' le' con da' ṇabdo'nda', la' gašjo yež ca' gan' mbanda' čhnabi'a.

²⁴ Na' bechojbe' na' gožbe' xṇa'ben':

—¿Bi ṇabda'ne'?

Na' le' gože'be':

—Gwnab yichj Juan ben' chzoe' beṇe' nis.

²⁵ Na' la' beyo'otebe' gan' chi' reyna' na' gožbe'ne':

—Che'nda' netecṇa'a goṇo' neda' to lo' platw yichj Juan ben' chzoa beṇe' nis.

²⁶ Na' ne late'ze bi gwyazlaže' reyna' gone' can' gož no'ol güegon' le', perw bachle gwne' lao bene' ca' jasa'ac lṇin' Diosen' naque' testigw che' gwnežjue'be' bite'teze ṇabebe' le', da'n'an' bi bžone' gac dan' gwnabebe' le'.

²⁷ Nach la' gwsela'te reyna' to soldadw na' gože'ne' šjaxi'e yichj Juanna'. ²⁸ Na' gwyej soldadon' lo' yo'o ližyan' na' jačhogue' yen Juanna', na' bžie' yichje' to lo' platw jasanen' bnežjuen' bi' no'ola', na' bi' nga bnežjwben' xṇa'be'.

²⁹ Cate' goseṇeze beṇe' ca' zjanaque' txen len Juanna', jasexi'e cuerp čhen' cont bosocuaše'ne'.

Jesúsen' bguagüe' gayo' mil bene'

(Mt. 14:13-21; Lc. 9:10-17; Jn. 6:1-14)

³⁰ Beyoža' postlw ca' besyežague' len Jesúsen' na' gose'ene' bica' da' ba gose'ne' na' da' ba bosolo'ede'. ³¹ Na' Jesúsen' gože'ne':

—Le da, le šo'o ga nac lchojiže' yeži'laže'cho late'.

Gwne' ca' le chep chetj chac beṇe', neca chac latje yesagüe'. ³² Nach Jesúsen' len postlw che' ca' gosa'aque' ja'aque' legacze' to lo' barcw, ja'aque' ga nac lchojiže'. ³³ Perw zan bene' besele'ede' gosa'aque' na' besyeyombi'e Jesúsen', na' zan yež beṇe' ca' bosoxonjsese' na' byobch besežine' ca' Jesúsen'. ³⁴ Na' cate' Jesúsen' bchoje' lo' barcon' ble'ede' ba besežag beṇe' zan na' beyaše' beži'ilaže'de' legaque', le nite' ca' nita' no xila' be nono de gwyoeba'. Nach gwzolaogüe' bsed blo'ede' legaque'. ³⁵ Cate' ba zoa xṇin, beṇe' ca' zjanaque' le' txen gose'ene':

—Ba zoa xṇin, na' latj gan' zoacho nga naquen latj daš. ³⁶ Na' besela' bene' quinga cont šja'aque' ga že' beṇe' do ranšw na' do yež dao' ca' dan' nyečhj mbi'i šjasexi'e da' yesagüe', le bibi de yesagüe'.

³⁷ Na' Jesúsen' gože'ne':

—Le'e le güe'e da' yesagüe'.

Na' legaque' gose'ene':

—Bi de laxjwto' che čhop gayoa ža žin cont šjaxi'to' da' güe'to' legaque' yesagüe'.

³⁸ Jesúsen' gože'ne':

—¿Gaca' yetextilen' de chele? Le šja'ac le šjana'.

Cate' goseṇezde' na' gose'ene':

—De gayo' yetextil na' yechop beł ya'a.

³⁹ Nach gože' beṇe' ca' yesebi'e to xonj güeje' lo' yixyen'. ⁴⁰ Na' gosebe' to gayoa güeje' na' yebale' šiyon güeje'. ⁴¹ Nach Jesúsen' gwxi'e yetextil ca' gayo' na' beł ya'an čhope, na' gwne'e le'e yaba bi'e yela' choxclen che Dios na' bzoxje' yetextilen' bi'en beṇe' ca' zjanaque' le' txen cont goseyisen' len beṇe' ca'. Leze gwdise' beł ya'a ca' čhop lao yogo'loł beṇe' ca'. ⁴² Na' yogüe' gosagüen'

na' goseljde'. ⁴³ Beyoža' bososše'e yešižinw žome yetextil bixjw na' len late' güeje beļ da' bega'aŋ. ⁴⁴ Na' bene' ca' gosagw yetextilen' gosaque' gayo' mil bene' byo, bi cuent no'ol ca' len bidao'.

Jesúsen' gwze'e lo nis

(Mt. 14:22-27; Jn. 6:16-21)

⁴⁵ Gwdena' Jesúsen' bene' byen besyeyo'o bene' ca' zjanaque' le' txen lo' barcon' cont yesyelaga'zegue' nisdaon' na' yesežine' Betsaida, ślac le' za' chesele' bene' ca' žena' ližgaque'. ⁴⁶ Na' cate' beyož bzede' bene' ca' diža', gwyje' lo ya'an bol güiže' Dios. ⁴⁷ Na' ca' nac barcon', cate' goc čol ba zejen gachol nisdaon', na' toze Jesúsen' ne' zie' ga nac yo biž. ⁴⁸ Na' ble'ede' bi chac yosyose'en binlo, le ben' chečjen clele na' bi choen' latje sa' barcon'. Na' šbal beyetj Jesúsen' ya'ana' na' gwze'e lo nisen' ba zej gale' gan' zja'aquen', na' ba zoa teze' gan' zjaya'aquen' ⁴⁹ cate' besele'ede' le' chze'e lo nisen'. Na' gosacde' še da' chda chelen'. Na' bososye'e. ⁵⁰ Le yogüe' besele'ede'ne' na' besežebe'. Perw le' la' bol güižte' legaque', gože'ne':

—Le gončač laže'le; nedan', bitw žeble.

⁵¹ Nach gwyo'e lo' barcw gan' zjaya'ac bene' ca', nach gwche'ži ben'. Na' legaque' leca besyebande' na' besyežejde', ⁵² le bi gosejni'ide' dan' bene' yela' guac len yetextil ca', na' biŋa' yesejnilaže' le'.

Jesúsen' beyone' bene' güe' ca' že' Genesaret

(Mt. 14:34-36)

⁵³ Na' goselague' nisdaon' na' besežine' yežlio gan' nzi' Genesaret, na' bosočjeje' barcon' cho'a nisdaon'. ⁵⁴ Na' cate' beyož besyechoje' lo' barcon' bene' ca' la' besyeyombia'te' Jesúsen'. ⁵⁵ Na' ja'acsese' doxen gan' mbane Genesaret, na' do lo cam dao' zjanxoe' bene' güe' ca' jasesane'ne' gan' zjanezde' zoa Jesúsen'. ⁵⁶ Na' gate'teze gwyje' Jesúsen', do yiže', do yež, con goseyixjue' bene' güe' ca' do chanez na' gosenyoede' Jesúsen' gwnežjue' latje yesoxe' la'ch late'ze xni'a xen', na' yogo' bene' gosoxen' besyeyacde'.

7

Dan' chchoj lo' laždao' beŋačen' chonen cont laždagüen' bi naquen xilaže' len Diosen'

(Mt. 15:1-20)

¹ Nach bene' fariseo ca' na' len bene' ca' bososed bosolo'e dan' bzoj da' Moisés gosa'aque' Jerusalénna' na' ja'aque' gan' zoa Jesúsen'. ² Na' besele'ede' baļ bene' ca' zjanaque' Jesúsen' txen con gosagüe' neca bosyone'e zan ni'a can' chesacde' cheyaļa' yesone', na' da'nan' gosezi'diže' legaque'. ³ (Le bene' fariseo ca' na' yogo' bene' Israel gualaž četo' ca' chesonxene' costumbr ca' da' bosyocua'aŋlen da' xozxta'oto' ca' neto' bi yesagüe' še biŋa' yosyone'e zan ni'a. ⁴ Na' cate' yesyežine' lagüe ya'a, bi yesagüe' še biŋa' yosyone'e, na' da' zanch costumbr da' zjana'ogüe', ca no yeseyibe' xiga' ga chese'eje' nis, no yeso' xguague, no yeso' ya na' no xcame'.) ⁵ Nach bene' fariseo ca' na' bene' ca' bososed bosolo'ede' dan' bzoj da' Moísesen' gosenabde' le':

—čBixčen' bi cheson bene' ca' zjanaque' le' txen can' goson bene' gol ca'? san con chesagüe' sin cbi chosyone'e zan ni'a.

⁶ Jesúsen' gože' legaque':

—Chonle cayanen' bzoj da' Isaíasen' che le'e nacle bene' gwxiye' gan' bzoje', žan':

Bene' qui chesonxene' neda' len diža' cho'a,

perw bi chesonxene' neda' len lažda'ogaque'.

⁷ Bibi zejen dan' chesonxene' neda',

le dan' chososed chosolo'eden' naquen da' chnalaže' beñačze.

⁸ Bi chonle ca chnalaže' Dios, san na'ole can' ža beñačen' cheyala' gonle, chyible no yeso' xguague, no xiga' ga che'ejle nis, na' da' zanch da' chonle.

⁹ Qui gožč Jesúsen' legaque':

—Chbejyichjle da' non Diosen' mandadw gonle cont na'ole costumbr che beñač. ¹⁰ Da' Moisésen' gwne': "Le gap bala'an xaxna'le", na' "Note'teze' še chžia chnité' xaxne'e, cheyala' gate'." ¹¹ Perw le'e žale to bene' guac ye'e xaxne'e: "Bibi de gona' gaclena' le'e, le yogo' da' de chia' naquen Corbán" (zeje diža', ba bnežjuen' lo na' Dios). ¹² Na' žale cate' to bene' že' ba naquen lo na' Diosen' nach bich cheyala' gaclen xaxne'e. ¹³ Dan' žale ca' chzoale ca'ale dan' ža Diosen' na' con chonxenle costumbr gole che da' xozxta'ole ca'. Na' da' zanch dan' nac ca' chonle.

¹⁴ Da' yoble gox Jesúsen' bene' ca', na' gože' legaque':

—Yogo'le le gwzenag chia', na' le šejni'i. ¹⁵ Bite'teze da' ye'ej gagw beñačen', bi nacho len chonen cont lažda'ogüe' bi naquen xilaže' len Diosen'. Dan' chchoj lo' lažda'ogüen', lenna' chonen cont lažda'ogüe' bi naquen xilaže' len Diosen'.

¹⁶ Le'e žia nagle da' chene, le gwzenag xtiža'na'.

¹⁷ Cate' bsan Jesúsen' bich bšajljene' bene' ca' na' beyo'e lo' yo'o, nach bene' ca' zjanaque' le' txen gosenabde' le' bi zejen dan' gože' legaque'. ¹⁸ Na' Jesúsen' gože' legaque':

—¿Lecze len le'e bi chejni'ile? ¿Bi chejni'ile gague da' ye'ej gagw beñačen' chonen cont lažda'ogüe' bi naquen xilaže' len Diosen'? ¹⁹ Le da' che'ej chagw beñačen' gague cho'on lo' lažda'ogüen', san lo' li'en cho'on, na' chžin hor cheden.

Na' da' gwne' ca' zeje diža' bite'teze yela' guagw nacczen xilaže'. ²⁰ Na' lecze gwne':

—Xbab da' yo'o lo' yichjlaždao' beñačen', lenna' chonen cont lažda'ogaque' bi zjanaquen xilaže' len Diosen'. ²¹ Le lo' yichjlaždao' beñačen' chchoj xbab mal ca da' žan yesone' da' quinga: yesata'lene' no'ole bi nac xo'olgaque' o bene' byo bi nac bene' chegaque', gwzoo xtogaque', yesote' bene', ²² yesone' gwban, yesezelaže' gata' chegaque' da' de che bene' yoble, yesone' da' mal, yeseziye'e bene', yesone' bichle da' nac da' yela' zto', yesacxi'ede' bene', yesezeye'e che bene', yesaque' bene' ya'laže', yesone' xbab da' bi zaca'. ²³ Yogo' da' mal qui chesechojen lo' laždao' beñač na' chonen cont bi nac lažda'ogaque' xilaže' len Diosen'.

To no'ol zito' gwejnilaže' Jesúsen'
(Mt. 15:21-28)

²⁴ Na' beza' Jesúsen' na' gweyje' distritw gan' mbane ciuda Tiro na' ciuda Sidón. Na' gwyo'e to lo' yo'o na' goclaže' nono neze, perw bi goc gone' cont bi gosenezde'. ²⁵ Cate la' gwnezete xna' to bi' no'ole bi' yo'o nyazbe' da' xigüen', na' gweyje' na' bzoa xibe' xni'a Jesúsen'. ²⁶ No'olen' goque' bene' zito', no'ole Sirofenicia. Gweyje' gwnabde' Jesúsen' yebeje' da' xigüe' yo'o nyaz bi' no'ol chen'. ²⁷ Na' Jesúsen' gože'ne':

—Yogo'ze bene' zgua'tec chnežjue' da' chagw xi'ine'. Bi naquen güen yeque'e yela' guagw che xi'ine' na' gwnežjuen' yesagw beco' ca'.

²⁸ Na' no'olen' gože'ne':

—Leczedo' can' gwnaon' Xana', perw lecze guaque gagw beco' be chi' xan mes bla'a da' chlažo' lo yo.

²⁹ Nach Jesúsen' gože'ne':

—Nacczen can' gwnaon', guac yeyejo', ba bechoj da' xigüen' yo'o nyaz bi' no'ol chion'.

³⁰ Cate' bežin ližen' ble'ede' de bi' no'ol daon' to lo cam, na' ba bechoj da' xigüen' yo'o nyazbe'.

Jesúsen' beyone' to bene' cuež, bene' lecze bi goc nie'

³¹ Jesúsen' bezse'e gan' mbane Tiro na' gwdie' gan' nzi' Sidón na' yež ca' gan' mbane Decápolis, na' bežine' cho'a nisdao' che Galilea. ³² Na' jasesane' to bene' byo bene' cuež na' bi goc nie', na' gosenabe' xoa na' Jesúsen' yichje'. ³³ Nach Jesúsen' gwche'ene' late' lchojiže' ga nono bene' nita', na' bde xbene' lo' nague' na' bži'en xene' na' gwdane' ložen'. ³⁴ Nach gwne'e le'e yaba, bebande', na' gwne':

—¡Efata! —zeje diža': ¡Byaljo!

³⁵ Nach nag bena' besyeyaljon na' goc bende', na' lecze beyac ložen' na' goc gwnie' binlo. ³⁶ Na' Jesúsen' gože' bene' ca' nono yese'e ca', perw la'czla' gože' legaque' ca', nachle goso'e diža' can' goca'. ³⁷ Na' leca besyebande', na' gosene':

—Yogon' chone' binlo; chacte chone' cont chesyeyene bene' cuež ca' na' bene' ca' bi chac yeseñe' chesyen'e'.

8

Jesúsen' cho'e da' chagw tap mil bene'

(Mt. 15:32-39)

¹ Ca tiempa' besežagchgua bene' zan na' bibi de yesagüe'. Nach Jesúsen' goxe' bene' ca' gwleje' cont zjanaque' txen len le' na' gože' legaque':

² —Cheyaše'da' bene' qui, le ba goc šone ža zjanite' nga len neda' na' bibi de yesagüe'. ³ Še yesela'ne' ližgaque' na' biña' yesagüe', chanez yesego'one' yesečholde', le ba'le' za'aque' zito'.

⁴ Nach bene' ca' zjanaque' le' txen gose'ene':

—¿Nacxe goncho güe'chone' da' yesagüe' latje nga ga nono bene' nita'?

⁵ Na' Jesúsen' gwñabde' legaque':

—¿Gaca' yetextilen' de chele?

Na' legaque' gose'ene':

—Gažen.

⁶ Nach bene' mandadw yesebe' yogo'lol ben' nitan' lo yo, na' gwxi'e da' gaž yetextil ca' na' be'e yela' choxclen che Dios, nach bzojxen' bnežjuen' bene' ca' zjanaque' le' txen na' legaque' goseyisen' che yogo'lol bene' nita' na'. ⁷ Leze zjano'e to čop bel ya'a, na' Jesúsen' be'e yela' choxclen che Diosen' che bel ya'a ca' na' leze goseyisen' che yogo'lol bene'. ⁸ Na' yogüe' gosagüe' na' goseljde'. Gwdena' bososše'e yegaže žome len late' güeje yela' guagw da' bega'añ. ⁹ Bene' ca' gosagon' zjanaque' ca do tap mil bene'. Cate' ba besyedagüe', Jesúsen' gože' legaque': —“Nayežagcho”, ¹⁰ na' gwyo'e lo' barcon' len bene' ca' zjanaque' le' txen na' gwyeje' do gan' mbane yež da' nzi' Dalmanuta.

Bene' fariseo ca' gosaclaže' gon Jesúsen' to yela' guac da' yesele'ede' le'e yaba
(Mt. 16:1-4; Lc. 12:54-56)

¹¹ Na' bene' fariseo ca' gosezolagüe' chesedildže' len Jesúsen'. Na' da' gosaclaže' yesagüe' xya che' nach gosenabde'ne' gone' to yela' guac da'

yesele'ede' le'e yaba cont yesenezde' še da' licze Diosa' gwsele' le'. ¹² Jesúsen' bebanchgüede' na' gwne':

—Ba ble'ele chona' yela' guac. ¿Bixchen' chñable to yela' guac da' le'ele cont nezele še Diosen' gwsele' neda'? Da' li'zia' le'e, bitwbi gona' da' le'ele.

¹³ Nach bcua'añe' legaque' na' beyo'e lo' barcon' beze'e beyeje' yešla'a nisaon'.

Levadura che bene' fariseo ca'

(Mt. 16:5-12)

¹⁴ Bene' ca' zjanaque' Jesúsen' txen gosanlaže' yeso'e da' yesagüe', na' totec yetextil zjano'e lo' barcon'. ¹⁵ Na' Jesúsen' gože' legaque':

—Le gon xbab, le gwsaca' len levadura che bene' fariseo ca' na' len levadura che Herodes.

¹⁶ Nach gosenabe lježe' bixchen' gwne' ca', na' gose' lježe':

—Gwne' ca' le gague bi yetextil checho den'.

¹⁷ Jesúsen' gocbe'ede' xbab dan' chesone' na' gože'ne':

—¿Bixchen' chaczejlaže'le da' bibi yetextil de? ¿Biña' šejni'ile, neca chacbe'ele? ¿Nac chačh lažda'olen' bi chejle'le? ¹⁸ ¿Bi chle'ele len yejlaole, neca chenele len nagle? ¿Bi chjayze'ele? ¹⁹ Gwdisa' gayo' yetextil na' goquen che gayo' mil bene', na' ¿bi chjayze'ele yebałe žome goc da' becho'onen da' botoble?

Na' legaque' gosene':

—Šižinw žome becho'onen da' botobto'.

²⁰ —¿Chixe caten' gwdisa' gaže yetextilen' lao tap mil bene'? ¿Yebałe žome gwža'te dan' botoblen'?

Na' gosene':

—Gaže žomen'.

²¹ Nach gože' legaque':

—¿Biña' šejni'iczele na'a cho'a diža' che dan' chososed chosolo'e bene' fariseo ca'?

Jesúsen' beyone' to bene' lchol' bene' Betsaida

²² Gwdechle besežine' Betsaida na' jasesane' to bene' lchol' lao Jesúsen', na' gosata'yoede' le' yeyone' le'. ²³ Na' bežue' taca' bene' lchola' na' gwleje'ne' yež. Nach gwdebe' xene' yejlagüen' na' gwxoā taquen' yichje' na' gwñabde'ne' še chle'ede' late'. ²⁴ Bene' lchola' gwne'e na' gwne':

—Chle'eda' bene', na' chle'eda'ne' ca' yag, perw chesa'aque'.

²⁵ Nach Jesúsen' bežoa taque' yejlagüen' da' yoble, na' gwna'yane' ben' na' beyaque', bele'etede' yogo' binlo. ²⁶ Nach Jesúsen' besele' le' liže', gože'ne':

—Bi yeyo'o lagüe yežen', neca no yo'o da' nga.

Pedron' gwne' Jesúsen' naque' Cristo ben' gwlej Diosen' cont nabi'e

(Mt. 16:13-20; Lc. 9:18-21)

²⁷ Gwdena' gwyej Jesúsen' len bene' ca' zjanaque' le' txen yež dao' ca' zjachi' do ga mbane ciuda da' nzi' Cesarea de Filipino. Na' chanez gwñabde' bene' ca' zja'aclen le':

—¿Bi chesena bene'? ¿Non' naca' neda'?

²⁸ Legaque' gose'ene':

—Bałe' chesene' naco' Juan ben' bzoa bene' nis, yebałe' chesene' naco' Elías, na' yebałe' chesene' naco' yeto bene' be' xtíža' Dios cani'.

²⁹ Na' gwñabde' legaque':

—¿Chixe le'e? ¿no žale naca'?

Pedron' gože' le':

—Len' naco' Cristo ben' gwlej Diosen' cont nabi'o.

³⁰ Nach Jesúsen' gože' legaque' nono yese'e ca'.

*Jesúsen' gwduxjue'ede' gate'
(Mt. 16:21-28; Lc. 9:22-27)*

³¹ Na' gwzolao Jesúsen' bzejni'ide' legaque' can' gac chen', gože'ne':

—Da' zan da' saca'zi'a neda' naca' ben' gwsela' Diosen' golja' benačh. Na' bene' blao ca' chesenabia' naciön chechon' na' bꝑoz gwnabia' ca' na' bene' ca' chososed chosolo'e dan' bzoj da' Moisés bi yesele'ede' neda' güen da' bi chesejle'e chia', na' yesote' neda', perw gacch šone ža yebana' ladjo bene' guat ca'.

³² Da' nga gwnen' zaca'laon. Na' Pedron' gwche'e Jesúsen' ga nac lchojiže' na' gwzologüe' chdile' le' dan' gwne' ca'. ³³ Perw Jesúsen' gwyechje' na' gwne'e bene' ca' zjanaque' le' txen, na' gwđile' Pedron', gože'ne':

—¡Gwcuase ca'ale Satanás! Bi nsa'o xbab che Diosen' san nsa'o xbab che benačh.

³⁴ Nach Jesúsen' goxe' bene' ca' zjanaque' le' txen na' yezica'chle bene' na' gože'ne':

—Note'teze bene' še chaclaže' gaque' neda' txen, cheyala' chojyichj cuine', la'czla' saca'zi'e, na' gone' can' nia' neda'. ³⁵ Note'teze bene' chadce' gone' cont bi saca'zi'e o cont nono yesot le', benan' cuiayi', na' note'teze bene' chzanlaže' cuine' saca'zi'e o gate' ne' chia' neda' o neče xtiža' Diosen', ba de yela' mban che' toli tocañe. ³⁶ ¿Bixe zejenna' to bene' nabi'e doxen yežlion' na' cuiaye'e bi gata' yela' mban che' toli tocañe? ³⁷ Le bi zoa nacle gon benačhen' chixjue' cont gata' yela' mban che' toli tocañe. ³⁸ Bene' ca' ze' na'a bi chesejnilaže' Diosen' na' chesonchgüe' da' xinj. Na' note'teze bene' še cheto'ede' par ye'e lježe' chejnilaže' neda', na' še cheto'ede' par gwzenague' xtižan', leče ca' neda' yeto'eda' che' par nia' naque' neda' txen, neda' naca' ben' gwsela' Dios golja' benačh. Yeto'eda' che' cate' yida' da' yoble nsa'a yela' zaca' juisyw che' Xa' Diosen' na' nchia' bene' ca' zjanac angl che'.

9

¹ Lecze gož Jesúsen' legaque':

—Da' li žia' le'e, balle nita'le nga na'a biña' gatle cate' žin ža le'ele Diosen' gwlo'e yela' guac xen chen' can' chnabi'en'.

*Bša' Jesúsen' ca goque'
(Mt. 17:1-13; Lc. 9:28-36)*

² Gwde xop ža, Jesúsen' gwche'e Pedro, Jacobo na' Juan na' ja'aque' to lo ya'a sibe, na' nono nochle ja'ac len legaque'. Na' nite' besele'ede' bža' ca goc Jesúsen'. ³ Xalane' goquen da' šiš xila', gocen ca da' chactite; la' chibcho lache' yežlio nga bi yechojen gaquen šiš xila' catequen' goc xalanen'. ⁴ Na' concze besele'ede' da' Elías na' da' Moisés chosošalje' len Jesúsen'. ⁵ Nach Pedron' gože' Jesúsen':

—Maestro, įleca güenna' zoacho nga! Gonto' šone ranšw, to chio', to che Moisés, na' yeto che Elías.

⁶ Le bene' ca' zja'aclen Jesúsen' besežebchgüe', na' Pedroa' bi chache'ede' bin' ze'. ⁷ Nach gwche' to bejw gan' niten' gwyechjen' legaque', na' lo' bejon' gosende' gwna Diosen':

—Bengan' Xi'ina' bene' chacda'; le gwzenag che'.

⁸ Na' cate' gosene'e cue'ej cuiten' notno besele'ede', san toze Jesúsen' zie'.

⁹ Na' šlac chesyeyetje' lo ya'an, Jesúsen' gože' legaque' notno yesi'e ca nac dan' besele'eden'. Gože'ne':

—Cate'ch ba bebana' ladjo bene' guat ca', nedan' naca' ben' gwsela' Dios golja' beñač, cana' güe'le diža' čhen.

¹⁰ Da'nan' gosezoe' šize, nono gose'e ca', perw na' gosenabe lježe' bi zejen dan' gwne' yebane' ladjo bene' guat ca'. ¹¹ Nach gose'e Jesúsen':

—Bene' ca' chososed chosolo'e dan' bzoj da' Moisés chosedde' neto' chesene' zgua'tec da' Elías ben' gwzoa cani' cheyala' yide' da' yoble cate' za' yedenabia' ben' sela' Diosen'. ¿Bixchen' chesene' ca'?

¹² Na' boži'e xtižen':

—Da' liczen' zgua'tec Elíasna' yide' na' yeyo'e xneze yogo'lol da' de yežlio nga. ¿Nezele bin' ža gan' nyoj Xtiža' Diosen' chia' neda' naca' ben' gwsela' Dios golja' beñač? Žan saca'zi'a na' bene' zan bi yesejnilaže' neda'. ¹³ Na' žia' le'e, Elías ba bide' na' gosonde' le' con ca' gosaclaže', can' nyoj le'e Xtiža' Diosen' žan can' cheyala' gac če'.

Jesúsen' beyone' to bi' yo'o nyazbe' da' xigüe'

(Mt. 17:14-21; Lc. 9:37-43)

¹⁴ Gwdena' besyežine' gan' nita' yezica'chle bene' ca' zjanaque' Jesúsen' txen, na' besele'ede' bene' zan zjanita' zjanyechjde' legaque', na' len bene' ca' chososed chosolo'ede' dan' bzoj da' Moisés chesedilđize' len legaque'.

¹⁵ Na' cate' bene' ca' besele'ede' Jesúsen', yogüe' besyežejde' na' ja'acsese' bosoguape' le' tioux. ¹⁶ Nach gwnabde' legaque':

—¿Bin' chdildiža'le len bene' ca'?

¹⁷ Na' to bene' nchixe bene' ca' boži'e xtižen', gwne':

—Maestro, zedesana' bi' chia' nga, yo'o nyazbe' da' xigüe' na' benen cont bi chac nebe'. ¹⁸ Gate'teze chdabe' chzenen lebe' na' chcho'onen lebe' lo yo, na' chbia bžina' cho'abe' na' chagwxej laybe'. Na' ca' zej chedo fuerz chebe'. Na' ba gwnaba' lao bene' qui zjanaque' le' txen yesyebeje' da' xigüe' yo'o nyazbe', perw bitw gosaque'.

¹⁹ Na' Jesúsen' gože' bene' ca' že'na':

—¡Le'e bene' bi chejnilaže'! ¿Šna chyažjen soalena' le'e cont šejnilaže'le? ¿Batca' zelao na'lagua' le'e? Le yedesambe' nga.

²⁰ Na' jasesane'be', na' cate' da' xigüen' ble'en Jesúsen', benen gwyazbe' šon, na' gwbixbe' lo yo, chbix chtolbe' na' chbia bžina' cho'abe'. ²¹ Nach Jesúsen' gwnabde' xaben':

—¿Bal iz ba goc chache' ca'?

Na' xaben' gwne':

—Cate' nache' bida'ote gwzolao chache' ca'. ²² Na' zan ni'a da' xigüen' chžalan' lebe' lo yi' na' lo nis cont goten lebe'. Da'nan' še guac yeyono'be', beyaše'sque neto' na' beyombe'.

²³ Jesúsen' gože'ne':

—Cheyala' šejnilažo' neda', le yogo' da' chzelaže' bene' chesejnilaže' neda' chaquen.

²⁴ Nach xaben' gwne' zižje:

—¡Chejnilaža' le', goclen neda' šejnilaže'cha'!

²⁵ Na' cate' Jesúsen' ble'ede' chesežagchgua bene', gwdile' da' xigüen' gožen':

—Da' xigüe', le' chono' cont bi' nga bi chenebe' na' bi chac nebe', neda' žia' yechojo'. Bsan bi' nga, na' bich yeyo'o yichjlažda'oben'.

²⁶ Na' da' xigüen' benen ga bosya'abe' na' benen ga gwyazbe' ca yeto šon, nach bechojen. Na' bin' bega'aṅbe' ca bi' guat, na' zan bene' gosene' gotben'.

²⁷ Perw Jesúsen' beṅue' taca'ben' cont beyasbe', nach gwzechabe'.

²⁸ Nach cate' Jesúsen' gwyo'e to lo' yo'o, bene' ca' zjanaque' le' txen gosebeje' le' ca to lchojiže' na' gosenabde' le':

—¿Bixchen' bi goc neto' yebejto' da' xigüen'?

²⁹ Na' gože'ne':

—Cont yechoj da' xigüen' nac ca' cheyała' gonle gwbas na' soatezle yoł güižle Dios.

Da' yoble Jesúsen' gwne' gate'

(Mt. 17:22-23; Lc. 9:43-45)

³⁰ Cate' besyeya'aque' na', besyedie' distritw Galilea. Na' Jesúsen' goclaže' nono yeseneze, ³¹ le chzejni'ide' bene' ca' zjanaque' le' txen, che'e legaque':

—Nedan' naca' ben' gwsela' Dios golja' beṅač, yosodie' neda' lo na' bene' yesote'nda', perw yeyon ža yebana' ladjo bene' guat ca'.

³² Perw bi gosejni'ide' bin' gože' legaque', na' besežebe' yesenabde'ne'.

Gosedildiže' gosene' noen' nac bene' blaoch

(Mt. 18:1-5; Lc. 9:46-48)

³³ Na' besežine' ciuda da' nzi' Capernaum, na' cate' besežine' yo'o gan' zoa Jesúsen' gwṅabde' legaque':

—¿Bixchen' chdildiža'le chanez'?

³⁴ Perw con gosenite' šižize, le chanezan' gosedildiže' gosene' noen' nac bene' blaoch. ³⁵ Nach Jesúsen' gwchi'e na' goxe' bene' šižiṅw ca' zjanaque' le' txen, na' gože' legaque':

—Še no le'e chaclaže'le gacle bene' žialao, cheyała' gonle xbab bibi zaca'tecl, na' cheyała' gon cuinle ca xmos yogo' bene' lježle.

³⁶ Nach beṅue' to bidao' na' bzeche'be' gachol' legaque', na' gwlene'be' na' gože' legaque':

³⁷—Note'teze bene' chone' güen len to bidao' ca bi' nga neče da' chejniłaže' neda', choncze' güen len neda'; na' noteze' chon güen len neda', choncze' güen len Dios ben' gwsela' neda'.

Bene' bi chon chio' contr; txencza' chone' chio'

(Mt. 10:42; Lc. 9:49-50)

³⁸ Nach Juanna' gože'ne':

—Maestro, bežagto' to bene' cho'e lao' na' chebeje' da' xigüe' da' yo'o nyaz bene', na' bžonto' gone' ca, le bi chone' chio' txen.

³⁹ Na' Jesúsen' gwne':

—Bi gwžonle gone' ca, le gague zoa to bene' gone' yela' guac cho'e lan', yeyoža' ne' yela' ya' chia'. ⁴⁰ Le bene' bi chone' chio' contr; txencza' chone' chio'. ⁴¹ Chnia' le'e to da' zejen, note'teze bene' gone' le'e la' to xiga'ze nis da' ye'ejle neče chejniłaže' neda' na' neče nezde' le'e nacle txen len neda', Diosen' gone' cont soacze' mbalaz da' ba goclene' le'e.

Bitw co'yela'cho bene' gone' da' xinj

(Mt. 18:6-9; Lc. 17:1-2)

⁴² Note'teze bene' chon cont lažo' to bene' za' gwzologüe' chejniłaže' neda' gone' da' xinj, yejni'acle yosocheje' yene' to yiše xen na' yosozale'ne' lo' nisaon' clcl ca da' gone' cont lažo' bene' yoble gone' da' xinjen'. ⁴³ Na' še yena'len' chonen cont gonle da' xinj, cheyała' cuejyichjle da' malen' chonle. Yejni'a bibi na'le zoa clcl ca gonle da' xinjen' len len. Na' yejni'a šjayzoale

len Diosen' toli tocanē bi zoa šla'a taca'le clēl ca yeyejle lo yi' gabil' dan' bi cheyol chenit nya' cuerp chelen'. ⁴⁴ Na' gabilen' nēca chesat bzogan', nēca cheyol yin'. ⁴⁵ Na' še ni'alen' chonen ga gonle da' xinj, lecze cheyala' cuejyichjle da' malen' chonle. Yejni'a bibi ni'alen' zoa clēl ca gonle da' xinjen' len len. Na' yejni'a šjayzoale len Diosen' toli tocanē bi zoa šla'a ni'alen', clēl ca yeyejle lo' yi' gabil' dan' bi' cheyol chenit nya' cuerp chelen'. ⁴⁶ Na' gabilen' bzoga' ca' bi chesatba', nēca cheyol yin'. ⁴⁷ Na' še yejlaolen' chonen cont gonle da' xinj, cheyala' cuejyichle da' malen' chonlen'. Yejni'a bibi yejlaolen' žia clēl ca gonle da' xinjen' len len. Na' yejni'a šjayzoale len Diosen' toli tocanē zoa šla'aze yejlaole clēl ca yežinle lo yi' gabilen' žia chop la'a yejlaolen'. ⁴⁸ Ca nac gabilen', bi chesat bzogan', nēca cheyol yin'.

⁴⁹ Le dan' chyi chzaca'le yežlio nga chzejni'in le'e cont bi yeyejle lo yi' gabil. Na' da' chyi chzaca'le zaca'leben ca zede' da' cheyala' chixē' yezj yogo' ni'a cate' chjasesane' yezj lao Diosen'. ⁵⁰ Na' zeden' naquen güen, perw še bich bi zxi' naquen, žnacxe goncho cont yeyaquen zxi' da' yoble? Na' le'e cheyala' gwyo gwchejlaže' le dan' chyi chzaca'le na' cheyala' soale binlo tole yetole, na' še soale ca', zaca'leble ca to yela' guagw da' yo'o zede'.

10

Jesúsen' bzejni'ide' bi cheyala' yela'acho len no'ol checho (Mt. 19:1-12; Lc. 16:18)

¹ Jesúsen' beže'e Capernaum na' gwyejche' gan' mbane distritw Judean' na' yešla'a yegw Jordanna'. Na' da' yoble besežag bene' zan gan' zoen' na' lecze da' yoble bsd blo'ede' legaue' con can' choncze'. ² Nach bal bene' fariseo ca' ja'aque' gan' zoa Jesúsen' gosaclaže' yesebeje'ne' diža' da' yosočhine' cont yosožie'ne' xya chol, na' gosenabde'ne' še guac to bene' yele'e len no'ol che'.

³ Na' Jesúsen' boži'e xtižen', gwne':

—Ca nac dan' bzoj da' Moisésen', žnac bene' mandadw gonle?

⁴ Legaue' gosene':

—Moisésen' gwne' cate' to bene' yele'e len no'ol chen' cheyala' chas to yiš da' gwnežjue' no'ol che' ga güe'en diža' besyele'ena'.

⁵ Nach Jesúsen' gože' legaue':

—Moisésen' gwne' gac gonle ca' lagüe dan' nacle bene' güedenag len Diosen'.

⁶ Perw cate' gwxe yežlion', cate' bxe Diosen' yogo' da' de, bi goquen ca'. Le nyojen žan: "Bene' legaue', to bene' byo na' to no'ole." ⁷ "Da'nan' bene' byon' gwsane' xaxne'e cont soalene' no'ol chen', ⁸ na' chope' yesaque' ca toz bene'." Na' ca' bich yesac chope' san toze'. ⁹ Da'nan' bi cheyala' yesyele'e, le Diosen' ba bcode' legaue'.

¹⁰ Cate' besyežine' yo'o, bene' ca' zjanaque' le' txen da' yoble gosenabde'ne' bi zejen dan' ba gwne'. ¹¹ Na' Jesúsen' gože' legaue':

—Note'teze bene' chele'e len no'ol che' na' cheque'e no'ol yoble, chone' da' xinj, le toz ca naquen šaca' gata'lene' no'ol che bene' yoble. ¹² Na' še no'olen' chsane' bene' chen' na' cheque'e bene' yoble, lecze toz can' nac da' xinj da' chonan'.

Jesúsen' gwñabde' Diosen' gac güen che bidao' ca' besežag (Mt. 19:13-15; Lc. 18:15-17)

¹³ Nach jasesane' bi' bixjw lao Jesúsen' cont xoa ne'e yichjgacbe', perw bene' ca' zjanaque' le' txen gosedi'e bene' ca' zjanče'ebe'. ¹⁴ Na' cate' ble'e Jesúsen' can' gosonen' na' bže'e legaue' na' gože'ne':

—Le güe' latje yesid bidao' ca' lagua' nga na' bi gwžonle, le bene' ca' zjanac ca' bidao' quinga, legaque' chosozenague' che Diosen' cont chnabi'e yichjlažda'ogaque'. ¹⁵ Da' li žia' le'e, note'teze bene' cheyala' yosozenague' che Diosen' ca' cheson bidao' cate' chosozenagbe' che xaxna'be', le bene' bi yosozenague' ca', gwbat nabi'a' Diosen' yichjlažda'ogaque'.

¹⁶ Nach gwlene' to to bidao' ca' na' gwñabde' Diosen' gac güen chebe', gwxo'a taquen' yichjbe'.

To bene' güego' bšajlene' Jesúsen'

(Mt. 19:16-30; Lc. 18:18-30)

¹⁷ Cate' Jesúsen' gwze'e ngüe'e nez, chxonjses to bene' jazoa xibe' lagüen' na' gwñabde'ne'!

—Maestro, le' naco' bene' güen. ¿Bi cheyala' gona' cont gata' yela' mban chia' toli' tocañe'?

¹⁸ Jesúsen' gože'ne':

—¿Bixchen' žo' naca' bene' güen? Toze bene' güen zoa, na' len' Dios. ¹⁹ Le' nezdo' da' none' mandadw goncho: “Bi gata'lenle' no'ol bi nac no'ol chele o bene' byo bene' bi nac bene' chele; nono gotle; bi cuanle; bi güe'le diža' güenlaže' che bene' lježle; bi siye'le bene'; le gap bala'an xaxna'le.”

²⁰ Na' boži'e xtižen':

—Maestro, yogo' da' quinga chzenaga', gwzologua' chonczan' cate' ne' nactia' bidao'.

²¹ Jesúsen' gwne'e bene' güegon' na' chacde' le', na' gože'ne':

—Zoa to da' ne' chyažjen gono': šjayeto' yogo' da' de čio' na' da' le'edo' chen bnežjon bene' yaše'. Nach še gono' ca', cate' yežino' yaba gan' zoa Diosen' da' zaca'ch gata' čio'. Na' še ba beyož beno' can' žia' le', nach yo'o gaco' neda' txen la' saca'zi'o.

²² Na' cate' bene ben' dan' gwna Jesúsen', godce' leca zdebe naquen gone' can' gože'ne', na' beza'yaše', le bene' gwñi'achgua goque'.

²³ Nach Jesúsen' gwne'e do cue'ej cuite' na' gože' bene' ca' zjanaque' le' txen:

—Leca zdeb naquen to bene' gwñi'a gwzenague' che Diosen' cont Diosen' nabi'e yichjlažda'ogüe'.

²⁴ Na' bene' ca' zjanaque' le' txen besyebande' le' gwnen', perw Jesúsen' goze'e legaque'!

—Xi'ina', bene' chesacde' zaca'chgua yela' gwñi'a chegaquen', leca zdebe naquen yosozenague' che Diosen' cont nabi'e yichjlažda'ogaquen'. ²⁵ Bedao'ch te to be xen be nzi' camello to lo' nag yeše' clel ca to bene' gwñi'a gwzenague' che Dios cont Diosen' nabi'e yichjlažda'ogüe'.

²⁶ Cate' gosende' dan' gwne', leca besyebande' na' gose' lježe':

—¿Noxen' šjayzoa len Diosen' še ca'?

²⁷ Jesúsen' gwne'e legaque' na' gože'ne':

—Bibi de da' gac yeson benachen' cont šjasyenite' len Diosen', perw Diosen' guac gonen'; le bi zoa da' nacho da' bi gac gon Dios.

²⁸ Nach Pedron' gože'ne':

—Neto' ba gwlejiyichjto' yogo' da' de četo' cont nacto' le' txen.

²⁹ Jesúsen' boži'e xtižen':

—Da' li žia' le', note'teze bene' ba gwlejiyichje' liže', bene' biše', zane', xe', xne'e, no'ol che', xi'ine', o yežlio che' ne chia' neda' na' neche chzenague' xtižan', ³⁰ yežlio nga yonežjo Diosen' le' to gayoa ca'te'le, yo'o, biše', zane', xne'e, xi'ine' na' yežlio, la'czla' yesebe'na'ogüe' le'. Na' cate' yežine' yaban' gata' yela' mban' che' toli' tocañe. ³¹ Perw zan bene' zjanaque' bene' žialao na'a,

gwžin ža cate' yesaque' bene' bzebe; na' bene' zjanaque' bene' bzebe na'a, gwžin ža cate' yesaque' bene' žialao.

Da' yoble Jesúsen' gwne' yesote'ne'
(Mt. 20:17-19; Lc. 18:31-34)

³² Zjangü'e nez zja'aque' bso dan' zoa gala'ze Jerusalenna' na' Jesúsen' žialagüe' lao bene' ca' zjanaque' le' txen. Legaque' chesyebande' na' do chesežebze' zjana'ogüe' le'. Nach da' yoble Jesúsen' goxe' bene' šižinw ca' ca'ale ga nac lchojž'e na' gože' legaque' can' gac chen'. ³³ Gože'ne':

—Na'a ba zejcho Jerusalén gan' yesone' neda' lo na' bžoz gwnabia' ca' na' lo na' bene' ca' chososed chosolo'ede' dan' bžoj da' Moisés, na' yesečhoglagüen' chia' yesote' neda' na' yesone'nda' lo na' bene' bi zjanaque' bene' Israel, nedan' naca' ben' gwseła' Dios golja' benač. ³⁴ Yesezi'diže' neda', yesot yeseyine' neda', gosož'i'enda' xene', na' yesote' neda', perw yeyon ža yebana' ladjo bene' guat ca'.

Jacobo na' Juan gosenabe' to goclen lao Jesúsen'
(Mt. 20:20-28)

³⁵ Nach Jacobo len Juan, bene' ca' zjanac xi'in Zebedeo, gosebigue' cuit Jesúsen' na' gose'ene':

—Maestro, chaclaže'to' gono' to goclen da' nabto'.

³⁶ Na' gwñabe Jesúsen' legaque':

—¿Bi che'nele gona'?

³⁷ Na' gose'ene':

—Ben cont cue'to' šla'a güeje cuito'na' cate' solao nabi'o.

³⁸ Nach Jesúsen' gože'ne':

—Le'e cabi nezele bi dan' chñable. ¿Gwčejláže'le tele yela' zi' yela' ya' ca dan' tia' neda' na' gac chele can' gac chia'?

³⁹ Legaque' gose'ene':

—Gwčejláže'to'.

Na' Jesúsen' gože' legaque':

—Da' licze tele yela' zi' yela' ya' ca dan' tia' neda' na' gac chele can' gac čian'.

⁴⁰ Perw bi naquen lo na' nia' non' cue' cuitan' cate' žin ža nabi'a, san yesebe' bene' ba mbej Diosen' gaquen če'.

⁴¹ Cate' yeši bene' ca' zjanaque' le' txen gosende' xtiža'gaquen', beseloque' Jacobon' na' Juanna'. ⁴² Perw Jesúsen' goxe' yogüe' cont gosebigue' laogüen' na' gože' legaque':

—Nezeczle bene' zjambeje' cont chesenabi'e to to nación na' bene' blao ca' chesone' byen chosozenag bene' čegaque'. ⁴³ Perw bi naquen ca' len le'e. San note'tezle chaclaže'le gacle bene' blao, cheyala' gwzexjwlaže'le gaclenle bene' lježle. ⁴⁴ Na' note'tezle chaclaže'le gacle bene' žialao, cheyala' gon cuinle ca xmos yogo' bene' lježle. ⁴⁵ Le lencze neda', gwseła' Diosen' neda' golja' benač, gague za'a cont yesaclen bene' neda', san za'a cont gaclena' bene', na' gwnežjw cuina' yesote' neda' neče xtoła' benačen'.

Jesúsen' beyone' to bene' lchoł ben' gože' Bartimeo
(Mt. 20:29-34; Lc. 18:35-43)

⁴⁶ Nach besežine' Jericó. Na' cate' Jesúsen' ba beze'e ciudan' len bene' ca' zjanaque' le' txen na' len yezanch bene', do cho'a ciudan' chi' to bene' lchoł chanež chñabe' yosonežjo bene' le' con gaca' da' chesezande'. Bena' le' Bartimeo na' naque' xi'in to bene' le' Timeo. ⁴⁷ Na' bene' lchoła' cate'

gocbe'ede' gwde Jesús bene' Nazaret gan' chi'ena', gwzologüe' gwne' zižje gwne':

—¡Jesús, xi'in diaža che da' rey David, beyaše'laže'sca neda'!

⁴⁸ Bene' zan gosedi'e' le' cont bich yosye'e, perw bosya'adiache' gwne':

—¡Xi'in diaža che da' rey David, beyaše'laže'sca neda'!

⁴⁹ Nach Jesús'en gwleze' na' gwne':

—Le gaxe'.

Nach gosaxe' bene' lchola' na' gose'ene':

—Benchachlažo', gwzoža', le chaxe' le'.

⁵⁰ Nach gwcho'one' lache' da' nxo'a cože' na' bxite' jabigue' lao Jesús'en'.

⁵¹ Nach Jesús'en' gwñabde' le':

—¿Bi chaclažo' gonda' le'?

Bene' lchola' boži'e xtižen':

—Maestro, che'nda' yele'eda'.

⁵² Nach Jesús'en' gože'ne':

—Guac yeyejo'. Dan' chejniłažo' neda' ba beyac yejlagon'.

Na' la' bele'ete bene' lchola', na' gwda'ogüe' Jesús'en'.

11

Jesús'en' gwyo'e ciuda Jerusalén

(Mt. 21:1-11; Lc. 19:28-40; Jn. 12:12-19)

¹ Cate' ba zoa yesežine' Jerusalén, besežine' gan' zjachi' yež dan' zjanzi' Betfagé na' Betania na' gan' zoa ya'a da' nzi' Ya'a Olivos. Na' Jesús'en' gwsele' chop bene' ca' zjanaque' le' t xen mandaw, ² gožgaque'ne':

—Le šja'ac yež dan' chi' gała'ze, na' cate' žinlen' na' yeže'lele to burr dao' da'ba' yag be nono na' cuia. Le sežba' na' le che'ba' nga. ³ Na' še no chñab bichen' chonle ca', le ye'e: "Xanto' chyažjde'ba'", na' la' gwzantecze'ba'.

⁴ Nach gosa'aque', na' besele'ede' burron' da'ba' yag to cho'a yo'o cuit ga xoa to nez, na' goseseže'ba'.

⁵ Na' bal bene' ca' nita' na' gose'ene':

—¿Bixen' chonle? ¿Bixchen' chsežle burron'?

⁶ Nach bosyoži'e xtižen' can' gož Jesús'en' legaque', na' goso'e latje geseže'ba' cont goseče'eba'. ⁷ Nach goseče'e burron' lao Jesús'en' na' gosexo'a xagaque' cože'ban' na' gwžia Jesús'en' leba'. ⁸ Na' bene' zan gosonxene' Jesús'en' goseyixjw no xagaque' lo nez cont blej burron' len na' yebale' gosechogue' zoze' yag na' goseyixjuen' lo neza'.

⁹ Bene' zjažialao na' lecze bene' za'ac cože' gosezologüe' bososye'e, gosene':

—¡Leca zaca'chgua bengal! ¡Mbalaz ben' za' nga nse'la' Xancho Diosen' le' cont nabi'e! ¹⁰ ¡Mbalaz yela' gwnabia' che' da' nse'e, le' nabi'e ca da' xozxta'ocho David! ¡Leca zaca'chgua Dios ben' zoa yaban'!

¹¹ Can' goc, Jesús'en' gwyo'e Jerusalén, na' lecze gwyo'e chyo'o che yodao' blaon'. Na' beyož gwne'e yogo'lol da' de na', beyeje' Betania len bene' šižinw ca' ba gwleje' cont zjanaque' le' t xen, le ba zoa gal'.

Jesús'en' gwne' gacxi'a yag yixgüigw da' bibi žia

(Mt. 21:18-19)

¹² Beyechj ža cate' besyeya'aque' Betania, Jesús'en' gwdone'. ¹³ Na' zito' ble'ede' to yag yixgüigw da' žia laga', na' jane'e še žia yaguen' yixgüigw, na' bibi bželde', san laga'ze ca' da' žian, le gague canan' chesebia yixgüigon'. ¹⁴ Nach Jesús'en' bol güiže' yag yixgüigon', gožen':

—Noch no gagw da' chbio' le'.
Na' bene' ca' zjanaque' le' t xen gosende' can' gwnen'.

Jesúsen bešaše' bene' ca' cheson ya'a chyo'o yodaon'
(Mt. 21:12-17; Lc. 19:45-48; Jn. 2:13-22)

¹⁵ Gwdena' besežine' Jerusalén. Na' cate' gwoyo' Jesúsen' chyo'o yodao' blaon', gwzologüe' bešaše' bene' ca' chesote' na' bene' chesa'o na'. Na' bchixe' xmes bene' ca' chosoša' mechw na' yag ga chesebe' bene' ca' chesote' ngolbex. ¹⁶ Na' bi be'e latje yesešoa xnez bene' zjanao' yoa' chyo'o yodaon'. ¹⁷ Na' bsed blo'ede' bene' ca' že' na', gože'ne':

—Nyocze Xtiža' Diosen' žan: "Yesene' ližan' naquen latje gan' šja'ac bene' yogo' nación yosol güiže'nda'", perw le'e ba benlen ca to latje ga že' bene' gwban.

¹⁸ Na' bžoz gwnabia' ca' na' bene' ca' chososed chosolo'e dan' bzoj da' Moisés gosende' can' gwnen', na' goseyljwlaže' nacle yesone' yesote'ne'. Ba chesežebe' Jesúsen', le yogo' bene' besyežejde' can' bsed blo'eden'. ¹⁹ Perw na' cate' gol, Jesúsen beze'e ciudan'.

Gwbiž yag yixgüigon'
(Mt. 21:20-22)

²⁰ Beyečj ža šezil, gosodie' na' besele'ede' yag yixgüigon' ba gwbižen lente loen. ²¹ Nach Pedron' jayze'ede' na' gože' Jesúsen':

—Maestro, gwna' yag yixgüigw dan' gwnao' gacxi'an, ba gwbižen.

²² Jesúsen' boži'e xtižen':

—Le šejnilaže' Dios. ²³ Da' li žia' le'e, note'teze bene' ye'e ya'a nga: "Gwcuase nga na' jayzoa lo' nisdao'", še bi chacžejlaže' lo' yichjlažda'ogüe', san chejni-laže' Diosen', guacczen. ²⁴ Da'n'an' žia' le'e, yogo'te da' nable cate' chol güižle Dios, le šejle' guaueczen, na' le gaczen. ²⁵ Na' cate' chol güižle Dios, še zoa da' chac chele len bene' yoble, le yezi'xen che', cont lecze ca' Xacho Dios ben' zoa yaba yezi'xene' che xtoła'le. ²⁶ Perw še le'e bi yezi'xenle che bene', Xacho Dios bene' zoa yaba bi yezi'xene' che xtoła'le.

Yela' gwnabia' che Jesúsen'
(Mt. 21:23-27; Lc. 20:1-8)

²⁷ Nach ja'aque' Jerusalén da' yoble, na' šlac chda Jesúsen' chyo'o yodao' blaon' jasebiga' bžoz gwnabia' ca' na' bene' ca' chososed chosolo'e dan' bzoj da' Moisés na' len bene' gole blao' ca' chesenabi'e naciónna'. ²⁸ Na' gosenabde' le':

—¿Bi yela' gwnabia' napo' chono' da' qui? ¿No ben yela' gwnabian' cont chonon'?

²⁹ Jesúsen' boži'e xtižen', gwne':

—Leze de to da' nabda' le'e na' še yoži'ile xtižan', nach nia' le'e bi yela' gwnabia' chonlendan'. ³⁰ ¿No gwseła' da' Juanna' bzoe' bene' nis? ¿Dios nan' gwsele'ne' še beñachen'? Le yoži'i xtižan'.

³¹ Nach legacze' gose' lježe':

—Še ye'chone' Dios gwsele' le', na' ye'e chio': "¿Bixchen' ca gwwejl'e'le che'?"

³² Bi gac ye'chone' beñach gwseła' le'.

Gosene' ca' da' besežebe', le yogo'te bene' že' na' gosejl'e' Diosen' gwsele' da' Juanna' be'e xtiže'na'.

³³ Nach gose'e Jesúsen':

—Bi nežeto'.

Nach Jesúsen' gože' legaque':

—Lecze neda' bi yapa' le'e bi yela' gwnabian' chonlenda' da' ca'.

12

Jempl che bene' güen žin ben' gosaque' bene' mal

(Mt. 21:33-46; Lc. 20:9-19)

¹ Nach Jesúsen' gwzologüe' choe'lene' legaque' diža' chzoe' jempl, na' gože' legaque':

—Gwzoa to bene' goze' to cue' xen yag uvas na' gwlo'en le'ej. Na' bene' to ga yesesie' uvasen' cont choj xisen', na' bene' yeto da' sibe ca to campanario ga yesecua' bene' yosogüia yesene'e yag ca'.

'Nach bcua'ane' yežlion' lo na' bene' yesonši'e yag uvasen', na' gwze'e gweye' zito'. ² Na' cate' bžin ža yosyotobe' cosešen', gwsele' to xmose' lao bene' ca' nac lo na'gaque' yag uvasen' cont yosonežjue'ne' to tlawc coseš dan' yesyezi'en. ³ Perw na' bene' ca gosezene' mosen' gosot goseyine'ne', na' to ga'alze' bosyose'ene' bibi goso'ene'. ⁴ Nach xan yežlion' da' yoble gwsele' yeto xmose'; perw benga bosozie'ne' yej, gosone' güe' yichje' na' gosonde' le' zgot.

⁵ Nach xan yežlion' gwseła'che' yetoe', na' benga gosottecze'ne'. Gwdena' gwseła'che' bene' zan, na' bale' gosot goseyine' le' na' yebale' gosottecze'ne'.

⁶ 'Ne' zoa yeto bene' bina' sele', bena' xi'ine' bene' chacchüede', na' bzebe gwsele' le', le bene' xbab: "Yesezi'e xtižen'." ⁷ Perw bene' ca' gose' lježe': "Bengan' yega'anlene' yežlio nga cate' gat xen'. Le da gotchone' cont yega'anlenchon." ⁸ Na' gosezene'ne', gosote'ne', na' besyebeje' cuerp chen' gan' že' yag ca', bosozalen' ga yoble.

⁹ Nach Jesúsen' gwñabe':

—¿Bi chaquele? ¿Nacxe gon xan yežlion' len bene' ca' bocua'anlene' yag uvas chen'? Šeje' šjetoe' legaque', na' yodie' yežlion' lo na' bene' yoble.

¹⁰ '¿Bina' gwlable ga nyoj Xtiža' Diosen'? Žan quinga:

Yej dan' bi gosaclaže' bene' güen yo'o ca' yosochine', len ba naquen yej squin.

¹¹ Da' nga ben Xancho Dios, na' naquen to da' yežejecho.

¹² Nach gosaclaže' yesezene' Jesúsen', le gosache'ede' be'e jemplna' neche dan' bi chesejnilaže' le'. Perw besežebe' še bi yesone bene' ca' nžaguen' legaque', da'nan' bosocua'ane'ne' na' besyeya'aque'.

Ca nac che dan' cheyala' gaxjw

(Mt. 22:15-22; Lc. 20:20-26)

¹³ Gwdena' gosesele' bal bene' fariseo na' bal bene' ca' gosedá' Herodes cont yesebeje' Jesúsen' diža' da' yosode'ede' cont yesagüe' xya che'. ¹⁴ Bene' ca' ja'aque' na' gose'ene':

—Maestro, nezeto' zoatezo' cho'o diža' li na' bi chono' cuent bi ža bene', le toze can' chono' len note'teze bene'. Na' nezeto' diža' li cho'o chsed chlo'edo' bene' can' chazlaže' Diosen' goncho. Da'nan' zedenabeto' le' ¿naquen binlo no chixjo da' cheyala' chixjo che ben' nac la'zelagüe bene' gwnabia' ben' chi' Roma? ¿Gwdixjwton', še bi chixjwton'?

¹⁵ Jesúsen' goche'ede' gague do lažen' chese'ene' ca', san chesaclaže' yesonlede' le' len xtiža'gaquen', nach gože'ne':

—¿Bixchen' chaclaže'le yoslažo'le neda' len xtižan'? Le gon neda' to mechw cont na'an.

¹⁶ Na' goso'enen', na' cate' ble'eden' na' Jesúsen' gwñabde' legaque':

—¿No lao dan' da' le'e mechw nga? na' ¿no la dan' nyoj le'en ni?

Nach bosoyoži'en gose'ene':

—Che César ben' nac la'zelagüe bene' gwnabian' ben' chi' ciuda Roman'.

¹⁷ Nach Jesúsen' gože'ne':

—Le gwnežjo bene' gwnabian' da' nac che bene' gwnabia', na' le gwnežjo Dios da' nac che Dios.

Na' besyebande' can' boži'e xtižen'.

Gosenabde' le' bi zejen dan' yesyeban bene' guat ca'

(Mt. 22:23-33; Lc. 20:27-40)

¹⁸ Nach besežin bal bene' saduceos gan' zoa Jesúsen'. Bene' ca' chesene' bene' guaten' bich yesyebane'. Nach gosenabde' le', gose'ene':

¹⁹ —Maestro, da' Moisésen' bzoje' can' cheyala' goncho, gwne' še to bene' byo gate' na' chzeb no'ol chen' perw na' nono bi' güezeb chga'an, na' bene' biše' ben' ba got cheyala' yošagna'lene' no'ol güezeba' cont yesenita' xi'in diaža che da' bišen'. ²⁰ Gosenita' bene' gosac gaž biše'. Na' bene' nechua' bšagne'e, na' gote' nono xi'ine' gwnita'. ²¹ Na' bene' gwchopa' bošagna'lene' no'ol güezeba', na' lecze gote' nono xi'ine' gwnita'. Lecze ca' goc len bene' gwyona'. ²² Na' ca' goc gosedaš bene' gaža' bosošagna'lene' no'ola', na' ne toe' ca' gosezoa xi'ine' len le'. Gwde gosat yogo'lol bene' ca', ca' beyožen got len no'ola'. ²³ Gož neto', cate' yesyebane' ladjo bene' guat ca' žnox bene' ca' soalene' no'ola' ca' xo'ole'? le' yogo' bene' gaža' bosošagna'lene' le'.

²⁴ Nach Jesúsen' boži'e xtižen', gwne':

—Clelen' chonle xbab dan' žale ca', le' bi nezele can' ža Xtiža' Dios da' nyojen, neca nombia'le yela' guac chen'. ²⁵ Cate' yesyeban bene' guat ca' bich yosošagna' bene', neca yosonežjo xi'ine' no'ol gwšagne'e, le' yesaque' ca' angl bene' zjazoa yaba. ²⁶ Na' ca' nac dan' yesyeban bene' guat ca', žbiña' gwlaben gan' bzoj da' Moisés, can' gož Diosen' le' caten' bol' güiže'ne' to lo' yag yeše' dao' da' chey? Gože'ne': “Neda' naca' Dios ben' chonxen Abraham, ben' chonxen Isaac, na' ben' chonxen Jacob.” ²⁷ Bene' guat ca' bi chesonxene' Diosen', san bene' zjamban. Na' ca' nac le'e, leca' clelen' chonle xbab.

Da' nac da' žialao da' cheyala' goncho

(Mt. 22:34-40)

²⁸ Leze bžin to bene' bsed blo'ede' ley dan' bzoj da' Moisés, bene' bende' caten' chesežeše' len Jesúsen', na' nezde' boži'icze Jesúsen' xtiža'gaquen' binlo. Na' bena' gwñabde'ne':

—ŽNon' nacch da' žialao da' zjanyojen da' ža Diosen' cheyala' goncho?

²⁹ Jesúsen' boži'e xtižen' gože'ne':

—Da' nga nacch da' žialao lao yogo'lojen, žan: “Le gwzenag bene' Israel gualaž chia', toze Xancho Dios naque' bene' zaca' gonxencho. ³⁰ Da'n'an' cheyala' gaquecho Xancho Diosen' con ca' zelao chejni'icho, do yichj do laže'cho, do fuerz valor checho.” Lenna' naquen da' žialao lagüe da' ca' ža Diosen' cheyala' goncho. ³¹ Na' da' gwchopen' zejgalan' ca', gan' žan': “Cheyala' gaque lježcho ca' chaque cuincho.” Bich bi de da' že' cheyala' goncho da' zaca'ch ca' da' qui.

³² Nach ben' chsed chlo'e dan' bzoj da' Moisésen' gwne':

—Ca'yanen' naquen, Maestro. Da' licze can' gwnaon'. Toze Xancho Dios zaque' gonxencho', na' noch no' zoa bene' zaca'ch ca' le'. ³³ Na' še gaquecho Dios, con ca' zelao chejni'icho, do yichj do laže'cho, do fuerz valor checho, na' gaque lježcho ca' chaque cuincho, lenna' zaca'chen ca' yogo' da' choncho chotcho no' beyixe' na' chzeychoba' chonxencho Diosen'.

³⁴ Nach cate' goche'e Jesúsen' boži'icze' xtižen' to licha, gože'ne':
—Gague da' xen chyažjen cont nabdo' Diosen' nabi'e yichjlažda'oguoñ'.
Na' ne yetoe' bich beseyaxjde' bichle yesenabde' Jesúsen'.

Criston' naque' xi'in diaža che da' rey David
(Mt. 22:41-46; Lc. 20:41-44)

³⁵ Jesúsen' bsed blo'ede' chyo'o yodaon', gwne':
—¿Nacxechen' bene' ca' chososed chosolo'e dan' bzoj da' Moisés chesene'
Criston' ben' gwlej Diosen' cont yedenabi'e naque xi'in diaža che da' rey
David? ³⁶ Cuiñ Daviden' gwne' can' blo'e Spirítw che Diosen' le':

Xancho Dios gože' Xanan':

“Gwche'edo' cuita' nga nabi'acho txen,

na' gona' cont yogo' no chesegue'e le' yosozexjw yichje' yosozenague' chio'.”

³⁷ ¿Nacxe gac nacho Criston' naque' xi'in diaža che da' David? le' cuiñ Davin'
gože' le': “Xana”.

Na' zjanyanchgua bene' ca' chosozenag xtižen', na' besyebede' xtižen'.

Jesúsen' bcuiše' bene' ca' chososed chosolo'e ley dan' bzoj Moisés
(Mt. 23:1-36; Lc. 11:37-54; 20:45-47)

³⁸ Jesúsen' caten' chsed chlo'ede' legaque' gwne':

—Le gwsaca' cont bi gonle can' cheson bene' ca' chososed chosolo'e dan'
bzoj da' Moisés, le chesyebede' chesaše' zjanyaze' lache' ton, na' chesyebede'
chesap bene' legaque' bala'an cate' chesyezague' lagüe ya'a. ³⁹ Chesyebede'
chesebi'e gan' chesebe' bene' blao cate' chja'aque' yodao' na' cate' chac lñi.

⁴⁰ Legaque' chesegue'e yo'o che no'ol güezeb ca', na' cate' chosol güiže' Dios,
ssa cheso'e diža' cont yesaque' bene' leca chesonxene' Diosen'. Bene' can'
yesacche' castigw clal ca yezica'chle bene' güen da' xinj.

To no'ol güezebe be'e Diosen' xmechue'
(Lc. 21:1-4)

⁴¹ Na' šlac zoa Jesúsen' chyo'o yodaon', gwchi'e gala'ze gan' xoa caj gan'
chesegüe'e mechw che yodaon', na' chne'e can' chesego'o bene' mechw. Na'
zan bene' gwñi'a ca' chesegüe'e da' zcha'o mechw. ⁴² Ca' chac, cate' bžin to
no'ol güezebe bene' yaše', gwlo'e chop mechw dao' da' bibi zaca'tec. ⁴³ Nach
Jesúsen' goxe' bene' ca' zjanaque' le' txen na' gože'ne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch len
Diosen' clal ca yogo' bene' ca' chesego'o mechw lo' cajen', ⁴⁴ le yogo' legaque'
chesegüe'e da' checho'onen lo yela' gwñi'a chegaquen', perw no'ol nga, lo yela'
yaše' yela' zi' che' gwlo'e yogo' da' de che' da' chachanlende'.

13

Jesúsen' gwne' gwžin ža yosyočinje' yodao' blaon'
(Mt. 24:1-2; Lc. 21:5-6)

¹ Cate' cheža' Jesúsen' yodao' blaon' to bene' ca' zjanaque' le' txen gože'ne':
—¡Maestro, gwñna'šc catec xdan zjanac yej qui na' yo'o qui!

² Na' Jesúsen' boži'e xtižen', gože'ne':

—Ca nac yo'o xen qui chle'echo, žin ža cate' ne to yej da' zjancua' nga ca
yega'an zjancua' cože' lježen. Yogon' yosyočinje'.

Can' gac cate' ba zoa yeyož yežlion'
(Mt. 24:3-28; Lc. 21:7-24; 17:22-24)

³ Nach ja'aque' Ya'a Olivos gan' nla' yodao' blaon'. Na' cate' ba chi' Jesúsen' lo ya'an len Pedro na' Jacobo, na' Juan na' Andrés, bene' ca' zjanaque' le' txen, legaque' gose'ene' šižize:

⁴—Che'neto' nao' neto' batcan' gac da' ca'. ¿Nac gac ñezetot' cate' ba zoa gac yogo' da' ca'?

⁵Jesúsen' boži'e xtižen', gwne':

—Le gwsaca' cont nono siye' le'e. ⁶Le bene' zan yesaš yežlio nga yesaclaže' yosolane' xlatja' nga, yesene': “Nedan' naca' Cristo ben' gwlej Diosen' cont nabi'e.” Na' yeseziye'e bene' zan.

⁷'Na' cate' yenele chac gwdiŕe nile nale, o yenele guac gwdiŕe, bi žeble, le can' cheyaŕa' gac. Perw gague lenna' nacho ba bžin ža yeyož yežlion'. ⁸Le yesediŕ to yež len yeto yež yoble na' to naciŕn len yeto naciŕn yoble, na' zan cuen ga xo'chgua lo yežlion', na' gata' gwbin na' yesebec bene' žaš. Na' da' qui gac cate' za' solao gata' yeŕa' zi'.

⁹'Na' le gwsaca' can' gonle, le yesone' le'e lo na' bene' gwnabia' ca' cont yesot yeseyine' le'e lo' yodao' chegaquen', na' dan' chejnilaže'le neda' nita' bene' yesече'exoŕje' le'e no lao rey no lao nochle bene' gwnabia', na' can' güe'lenle legaque' xtižan'. ¹⁰Le za' te che yežlion', xtiža' Diosen' cheyaŕa' gas laŕjen doxen yežlion'. ¹¹Na' cate' yesezene' le'e na' yesече'e le'e lao bene' gwnabia' ca', bi cuec yichŕle nac yoži'ile xtiža'gaquen', neca gonlen xbab. San le na con da' ye' Diosen' le'e nale lo hor na'teze, le gague le'eczen' nele, san Spiritw che Diosen' gonen ga nale bin' cheyaŕa' nale. ¹²Cana' bal benach yesechje' yesone' bene' biše' golje' lo na' bene' yesot legaque', na' nita' bene' yesone' xi'ingaque' lo na' bene' yesot legacbe', na' nita' bene' yesone' xaxne'le lo na' bene' yesot legaque'. ¹³Yogo'ze bene' yesegue'ede' le'e dan' chejnilaže'le neda', perw note'tez le'e gwo gwchejlaže'le cont bi cuejyichŕle dan' chejnilaže'le neda' žin žate gatle, nach šjayzoale len Diosen'.

¹⁴'Da' Daniel ben' gwdixjue'ede' xtiza' Dios bzoje' che da' zbranchgua da' gwxinjen latje gan' chonxencho Diosen'. Na' cate' le'e le'ele ba zoa dan' gan' bi cheyaŕa' soan, cana' bene' yesenita' distritw Judea cheyaŕa' yosoxonje' šja'aque' do ya'adao'. (Bene' gwlaben' cheyaŕa' šejni'iden'.) ¹⁵Na' bene' chda do yichjo' che liže' žana', bi yeyetje' yotobe' xšinŕaze' ca' že' ližen', con yoxonje'. ¹⁶Na' bene' chda yiže' bi yeyej liže' šjayxi' xalane'. ¹⁷ŕNyaše'chguaze zjanac no'ol ca' zjanao' xi'in, na' no'ol ca' ne' chosoguaže' bidao' lo ža ca'. ¹⁸Le nab lao Dios bi yažjen gwxonje caten' chac zag, ¹⁹le yesaquen ža da' leca yesale' bene'. Cate' bxete Diosen' yežlio na' ža na'aža nono na' gaŕe' ca', neca žinlažen' yesale'de' ca' da' yoble. ²⁰Na' šaca' Xancho Diosen' bi yozaše' žan' yesac ca', notno yela, perw yozašen' neče chacde' bene' ca' chesejnilaže' le', bene' ba gwleje' zjanaque' xi'ine'.

²¹'Cana' še no ye' le'e: “Le na'šc, nga zoa Cristo ben' gwlej Diosen' cont nabi'e”, o “Le na'šc, na' zoe”, bi šejle'le. ²²Le yesaš bene' gwxiye' bene' yesaclaže' yosolane' xlatja' nga, na' yeson cuine' ca' bene' chesoe' xtiža' Dios. Na' yesone' yeŕa' guac da' yesele'e bene' na' bichle da' zaca' yesyebande' cont yeseziye'e legaque', na' len bene' ca' ba gwlej Diosen' zjanaque' xi'ine' yesaclaže' bene' gwxiye' ca' yeseziye'e šaca' gac yeseziye'e legaque'. ²³Perw ca' nac le'e, le gwzenag, le ba gwdixjue'eda' le'e yogo' can' gac.

*Can' gac cate' ben' gwseŕa' Diosen' golje' benach yide' da' yoble
(Mt. 24:29-35, 42-44; Lc. 21:25-36)*

²⁴ Perw ca nac ža ca' cate' yeyož gale'le can' gwnia', gwbižen' yeyaquen chol na' bion' bich gwsenin'. ²⁵ Na' beljw ca' yeselažon' le'e yaban', na' yogo' da' chle'echo le'e yaban' yesaquen ca chac yežlion' cate' chxo'. ²⁶ Nach bene' že' yežlion' yesele'ede' neda' naca' ben' gwsela' Diosen' golja' benach za'a ladjo bejon' len yela' guac xen na' yela' bene' zaca' juisyw chian'. ²⁷ Nach sela' angl chian' yosyotobe' yogo' bene' ca' ba gwleja' cont zjanaque' neda' txen gate'teze nite' doxen lo yežlion', ga zelao nac zito'.

²⁸ Le gwzenag che jempl nga che yag yixgüigon': Cate' ba chzolao chebešjw yaguen' na' chelan' laga' che'en dao', nezele ba za' lagüe ba. ²⁹ Na' lecze cate' le'ele ba chac da' mal ca' ba gwnia', cana'ch nezele ba za' juisyw, ba zoa gala'.

³⁰ Da' li žia' le'e, bina' yenit diaža che le'e nita'le na'a cate' yeyož gac yogo'lol da' ca'. ³¹ Le'e yaban' na' yežlion' yesede chen, perw ca nac xtižan', gague da' te cbi gac can' žanna'.

³² Perw nono neze bi ža bi horen' gac ca', ne angl ca' nita' yaba, neca neda' naca' Xi'in Diosen' bi nezda'. Toze Xa' Dios neze.

³³ Da'nan', le soa le cueze, le güia le na', na' le soateze yöl güižle Dios, le nono neze batcan' žin ža. ³⁴ Naquen ca nac che to bene' šeje' zito', na' cate' za' se'e choñ liž xlatje' lo na' bene' güen žin che', cho'e žin da' yeson to toe', na' chzoe' bene' chape' cho'a yo'ona'. ³⁵ Le soa le cueze ca bene' chesape' liže'na', le bi zjažezde' batcan' yela' xan yo'on, še cate' ba zoa gal, še chel, še cate' chbež jea, še cate' ba gwyeni'. ³⁶ Le xož yele'e zejzenez na' yedole'de' legaque' chesetase'. ³⁷ Da' nga žia' le'e leze žiczan' par yogo'lol bene'. Le soa le cuez batcan' žin ža.

14

Bosoxi'e yesezene' Jesúsen'

(Mt. 26:1-5; Lc. 22:1-2; Jn. 11:45-53)

¹ Yechop ža za' gala' pascw na' lni dan' chesone' caten' chesagüe' yetextil dan' bibi levadura yo'on. Na' bxož gwnabia' ca' na' bene' ca' chososed chosolo'e dan' bzoj da' Moisés cheseyiljwlaže' nac yesone' yeseziye'e Jesúsen' cont yesezene'ne' yesote'ne'.

² Perw gosene':

—Bi senchone' lo lnin' cont ca yesebec bene' žaš.

To no'ole bzoe' set zix yichj Jesúsen'

(Mt. 26:6-13; Jn. 12:1-8)

³ Na' goquen' Jesúsen' zoe' Betania liž Simón ben' güe'e yižgüe' da' nzi' lepra. Na' šlac chi' Jesúsen' cho'a mes, bžin to no'ole noxe' to de yejese ga chož set da' chla' zix, naquen dogualje da' bchoj lo yag yej da' nzi' nardo, na' zaca'chguan la'ay. Na' bzojje' gan' yož seta' na' bzoachochje' seta' yichj Jesúsen'. ⁴ Na' bal bene' ca' zjanita' na' bešeže'e, na' gose' lježe':

—¿Bixchen' benditjde' set zix nga? ⁵ Ša no bete' len güesonen ca no laxjw mos da' gone' gan tgüiz, na' gwnežjuen' gaclenen bene' yaše'.

Na' beseloque' no'ola'.

⁶ Perw Jesúsen' gwne':

—Jayen'. ¿Bixchen' chnele che no'olen'? Dan' bene' len neda' nga naquen güen. ⁷ Le bene' yaše' ca' bate'teze nita'cze' len le'e, na' guaque gonle len legaque' da' güen cate' žan chele, san neda' bich soacza' yesša len le'e. ⁸ No'ole nga bene' da' zelao gwzaque'de'. Ba bguazje' neda' set zix can' cheyala' yesone' len neda' cate' gaša'. ⁹ Da' li žia' le'e, doxen yežlio gate'teze šjasedixjue'e bene' diža' güen dan' chzejni'in chia', decze de šjasyeze'ede' can' ben no'ol nga.

Judas gwchoglaže' gwdie' Jesúsen' lo na bene' ca' chesegue'e le'
(Mt. 26:14-16; Lc. 22:3-6)

¹⁰ Nach Judas Iscariote, ben' goque' txen len bene' ca' šižinw ben' gwleje Jesúsen' cont zjanaque' le' txen, gweje' jane'e b̄ox gwnabia' ca' cont yosoxi'e nac gone' gwdie' Jesúsen' lo na'gaque'. ¹¹ Cate' gosende' xtiža' Judasen', besyebede' na' gose'ene' yeso'ene' méchw. Nach Judasen' gwzologüe' gwdiljwlaže' nac gone' gwdie' Jesúsen' lo na'gaque'.

Xše' dan' gosagüe' len Xanchon'

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Na' bžin ža čala' l̄ni caten' neto' bene' Israel chagwto' yetextil dan' bibi levadura yo'o. Naquen ža nechw čhe l̄ni pascw cate' chotto' xila' dao', cont šjajza'laže'to' can' bosla Diosen' da' xoxxta'oto' ca' lo na' bene' Egipto ca'. Na' bene' ca' zjanaque' Jesúsen' txen gosenabde' le':

—žGa che'ndo' šjasini'ato' cont gagwcho xše' čhe pascon'?

¹³ Nach gwsele' čhop bene' ca' na' gože'ne':

—Le šja'ac ciudan', na' yežagle to bene' byo no'e to che'e nis. Le šjlene', ¹⁴ na' gan' yežinen', le ye' xan yo'on: "Maestrona' že': Gonšco' to yo'o gan' gagwto' xše' ža l̄ni nga len bene' ca' zjanaque' neda' txen." ¹⁵ Nach gwlo'ede' le'e to cuart xen dan' zoa yichjen na'ale gan' de yogo' da' čhyažjecho. Na' le gwsini'a cont gagwcho na'.

¹⁶ Na' gosa'ac bene' ca' čhope, na' besežine' ciudan', na' yogo' can' gož Jesúsen' legaque' goc, na' bososini'e xše' že' l̄nin'.

¹⁷ Cate' beyož gwxxa gwbiž, bžin Jesúsen' len bene' šižinw ca' gwleje' cont zjanaque' le' txen. ¹⁸ Na' gosebi'e gosagüe' xše'. Na' šlac chesagüen', Jesúsen' gože' legaque':

—Da' li' žia' le'e, to le'e chagwle len neda' txen, gwdele neda' lo' na' bene' ca' chesegue'e neda'.

¹⁹ Nach legaque' besyeyaše'laže'de' na' gosezologüe' tgüeje tgüeje' gosenabde' le' gosene':

—žNedan' gona' ca'?

Na' yetoe' leze gwne':

—žNedan' gona' ca'?

²⁰ Na' Jesúsen' gože'ne':

—Ladjo le'e bene' šižinw, to bene' chagw len neda' txen toze lo' ye'eñ gon ca'. ²¹ Na' gac čhia' can' nyoj le'e Xtiža' Diosen', neda' naca' ben' gwseła' Diosen' golja' beňach. Perw įnyaše'čguaze nac ben' gwdie' neda' lo na' bene' ca'! Yejni'acle ša bi goljen'.

²² Na' šlac chesagüe', Jesúsen' gwxi'e to yetextilen', na' beyož be'e yela' choxcen čhe Dios, bzojxen', na' bnežjuen' legaque', gwne':

—Le gagon'. Len̄na' cuerp čhia'.

²³ Nach bexue' to vas gan' yože nis uvasen' na' beyož be'e yela' choxcen čhe Dios, be'en legaque', na' yogüe' gose'eje' late' güej dan' yože lo' vassen'. ²⁴ Na' gože' legaque':

—Da' ngan' xčhena' na' chzanlažan' laljen neče yogo'lol beňach. Na' laljen cont solao gac da' coben' da' gwna Diosen' gone' gaclene' beňach. ²⁵ Da' li žia' le'e, bich ye'eja' xis uvas na'a. Cate'ch žin ža ba zoacho txen gan' chnabia' Diosen', canan' ye'ejan' da' yoble.

Jesúsen' gwne' Pedroa' bi čebe' naque' le' txen
(Mt. 26:30-35; Lc. 22:31-34; Jn. 13:36-38)

²⁶ Beyož gosole' gosonxene' Diosen' nach gosa'aque' ja'aque' Ya'a Olivos.

²⁷ Nach Jesúsen' gože'ne':

—Na'aže' yogo'le cuejyichjle neda' neche dan' gac chian'. Le nyojczen le'e Xtiža' Diosen', žan: "Gota' bene' güeyoe xilan' na' xila' ca' yesas'lasba'." ²⁸ Perw cate' yosban Diosen' neda' ladjo bene' guat ca', yobch yeya'a Galilea ca' le'e.

²⁹ Nach Pedron' gože'ne':

—La' yogo' bene' quinga yesebejyichje' le', neda' bi gona' ca'.

³⁰ Perw Jesúsen' gože'ne':

—Da' li žia' le', biņa' cuež jean' čop ni'a na'aže' cate' gac šon ni'a bi chčhebo' še nombi'o neda'.

³¹ Perw Pedroa' do laže' gwne':

—La'czla' še chonen byen guatlencza' le', gwbat nia' bi nombia' le'.

Na' lecze ca' gosena' yogüe'.

Jesúsen' bol güiže' Xe' Dios Getsemani

(Mt. 26:36-46; Lc. 22:39-46)

³² Nach besežine' latje gan' nzi' Getsemani', na' Jesúsen' gože' bene' ca' zjanaque' le' txen, gože'ne':

—Ngaze le' cue'edo' šlac neda' šjel güiža' Dios.

³³ Na' gwche'e Pedro, Jacobo na' Juan, na' gwzolaon da' juisyw da' gocde' lo' yichjlažda'ogüen' na' benchgüe' xbab. ³⁴ Na' gože' legaque':

—Lo' yichjlažda'ogua' nga chacyaše'chgüeda', chacda' gatcza' catequen' chžaglagua'. Nga le' yega'an na' le' soa le' na' txen len neda'.

³⁵ Nach Jesúsen' gwžialagüe' yelate' na' jachaze' coscho'ale lo' yon' gwñabde' Dios še guac ten ca'ale bi gac can' ba zoa gac che'. ³⁶ Gože' Diosen':

—Xa', bibi de da' nacho da' bi chac gono'. Benšca cont bi saca'zi'a na' bi yesote'nda', perw bi chñaba' gac da' žia' neda', san gac da' nao' le'.

³⁷ Nach beyeje' gan' nita' bene' ca' šone, na' ble'ede' zjanite' chesetase'. Na' gože' Pedron':

—Simón čhtason'? ¿Ne šlož da'oze ca' goc cuejo' bišgal len neda'? ³⁸ Bi tasle, san le' yol güiž Dios cont bi gon gwxiyen' le'e gan. Da' li lo' yichjlažda'olen' chña'laže'le' gonle' da' nac binlo, perw cuerp chelen' bi chzoeczen.

³⁹ Nach gwyeje' da' yoble na' bol güiže' Dios na' da' yoble gože'ne' dan' ba gožcze'ne' tni'a. ⁴⁰ Nach bezyeje' gan' niten', na' da' yoble ble'ede' chesetase', le' yejlagüen' chesexa' chesežoden' bišgal. Na' bi besyežellaže' nac yosyoži'e xtižen'. ⁴¹ Na' da' gwyone ni'a gwyeje' na' bezžine' gan' nita' bene' ca' šone na' gože' legaque':

—¿Ne' chtasle? ¿Ne' chezi'laže'le? Ba goc. Ba gole' gon to bene' neda' lo' na' bene' güen da' xinj ca', neda' naca' ben' gwsela' Diosen' golja' beñach. ⁴² Le' chas, le' yeyo'o. Ba za' ben' gon neda' lo' na'gaque'.

Gosezene' Jesúsen' cont yeseche'ene' lao bene' gwnabia' ca'

(Mt. 26:47-56; Lc. 22:47-53; Jn. 18:2-11)

⁴³ Jesúsen' ne' choe'te' dižan' ca' cate' bžin Judas, na' zan bene' zja'aque' len le' zjanoxe' no yag, no spada, bene' goseseļa' bžox gwnabia' ca' na' bene' gole' blao ca' chesenabia' nación Israel cheton'. (Judasen' goque' to bene' šižinw ca' gwlej Jesúsen' cont zjanaque' le' txen.) ⁴⁴ Na' Judasen' ba gože' legaque' nac yesenezde' non' yesezene', gwne':

—Ben' gwnopa' xague', le' na'; le' sene' na' le' che'e.

⁴⁵ Na' cate' bžin Judasen' na' jabigue' gan' zoa Jesúsen' na' gože'ne':

—Maestro, Maestro.

Na' bnope'ne'. ⁴⁶ Nach gosezene' Jesúsen' cont yeseche'ene'.

⁴⁷ Perw to ben' zecha cuit Jesúsen' gwlej spada chen' na' gw dinen' mos che bꝑoz blaon' gwꝑhogte' šla'a nagen'. ⁴⁸ Nach Jesúsen' gože' bene' ca':

—¿Nonle neda' ca to bene' gwban za'acle zedeꝑi'le neda' len spada na' len yag? ⁴⁹ Yogo' žaze gwzoa' len le'e bsd blo'eda' bene' chy'o yodao' blaon', na' bi gwzenle neda'. Perw chac da' qui cont chac can' nyoj Xtíža' Diosen'.

⁵⁰ Nach yogo' bene' ca' zjanaque' Jesúsen' txen bosoxonje' gosebejyichje'ne'.

Bi' güego' bin' boxonj

⁵¹ Na' to bi' güego' na'obe' Jesúsen', na' nꝑoa cože'be' toze sávana. Na' bene' ca' ba gosezene' Jesúsen' ľecze gosēnize'be'. ⁵² Perw gwlejiꝑchjbe' sábanan' na' boxonjbe' ga'alyidbe'.

Goseche'e Jesúsen' lao bene' ca' chesenabia' nación Israelen'

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Nach goseche'e Jesúsen' lao bꝑoz blaon', na' besežag yogo' bene' ca' zjanac bꝑoz gwnabia', na' bene' gole blao ca' chesenabi'e nación cheton' na' bene' ca' bososed bosolo'ede' dan' bzoj da' Moisés. ⁵⁴ Na' Pedron' na'ogüe' Jesúsen' zito' zito'le bžintie' liž bꝑoz blaon' na' gwyo'e chy'ona' gwchi'e txen len bene' ca' chesape' yodao' blaon' boše'e cuine' cho'a yi'.

⁵⁵ Na' ca' nac bꝑoz blaon' na' yogo' bene' ca' chesenabia' nación cheton', besyeyiljwlaže' bi da' yesagüe' xya che Jesúsen' cont yesote'ne', perw bi besyeželden'. ⁵⁶ Na' zan bene' gosone' diža' güenlaže' che Jesúsen', perw bi gosene' toz ca' yesene'. ⁵⁷ Baľe' gosezože'e na' bososbague'ne' xya chol, gosene':

⁵⁸ —Neto' beneto' gwne': "Neda' yoꝑhinja' yodao' nga da' ben beꝑach, na' šone žaze yeyona' yeto yodao' da' bi gon beꝑach."

⁵⁹ Perw ne' ca' ca' gosene' toz ca' yesene'.

⁶⁰ Nach bꝑoz blaon' gwzože'e ladjo yogo'ľole' na' gwnabde' Jesúsen':

—¿Bi choži'o xtižen'? ¿Bi dan' chosožie' le' xya?

⁶¹ Perw Jesúsen' bitw bi gwne', bitw boži'e xtižen'. Na' bꝑoz blaon' da' yoble gwnabde' ľe', gwne':

—¿Naco' le' Cristo ben' gwlej Diosen' cont nabi'e, na' Xi'in Dios ben' chonx-encho?

⁶² Jesúsen' gože'ne':

—Le can' naca'. Na' le'ele neda' cate' ba chi'a šla'a licha che Dios ben' nac ľa'zelagüe bene' gwnabia', neda' naca' ben' gwseľe' golja beꝑach. Na' le'ele yetja' ladjo bejw dan' ze ľe'e yaban'.

⁶³ Nach bꝑoz blaon' gwꝑcheza' xalane' cont nachbia' bi beque'e can' gwna Jesúsen', na' gwne':

—Noch no chyažje bene' co' da' baľi. ⁶⁴ Le'e ba benele chne' che Dios dan' že' ca', chon cuine' ca' Dios. ¿Nacxe ža le'e?

Na' yogüe' gosene' nape' doľa' na' cheyala' gate'.

⁶⁵ Nach baľe' gosezolagüe' chosoži'ene' xene' na' bososeyjue' lagüen' len to lache' na' gosot goseyine' ľe', na' gosonle' che' gose'ene':

—jGwnašc non' chot le'!

Na' bene' ca' chesape' yodao' blaon' gosot goseyine' ľe'.

Pedron' bi gwꝑchebe' še nombi'e Jesúsen'

(Mt. 26:69-75; Lc. 22:56-62; Jn. 18:15-18, 25-29)

66 Pedron' chi'e chyo'o che'ejele, cate' bžin to no'ole güen žin che bχoz blaon'.
67 Na' cate' no'olen' ble'ede' le' chi'e choše'e cuine' cho'a yin', gwne'e le' na' gože'ne':

—Lencze le' naco' txen len Jesús bene' Nazaret.

68 Perw Pedron' bi gwchebe', gwne':

—Bi nombi'ane', neca nežda' bin' žo'.

Na' beyej Pedron' jayzie' cho'a puert na'le. Nach gwchež to jea. 69 Na' no'ol güen žinna' gwne'e le' da' yoble na' gože' bene' ca' nita' na':

—Benga naque' legaque' txen.

70 Perw le' da' yoble bi gwchebe' še naque' txen len Jesús'en'. Na' gocze štit da' yoble bene' ca' nita' na' gose'e Pedron':

—Da' licze, le' naco' txen len legaque', le naco' bene' Galilea, nacbia' chnio' can' chesene bene' Galilea ca'.

71 Nach Pedron' chop šone ni'a gwne':

—Diosen' gone' neda' castigw še chonlaža' žia' bi nombi'a bena'.

72 Na' cate la' gwchežte jean' da' gwchope. Nach jayze'e Pedron' can' gož Jesús'en' le': "Bina' cuež jean' chop ni'a cate' gac šon ni'a bi chebo' še nombi'o neda'." Na' cate' jayze'ede' can' gož Jesús'en' le', na' gwcheže'.

15

Goseche'e Jesús'en' lao Pilato

(Mt. 27:1-2, 11-14; Lc. 23:1-5; Jn. 18:28-38)

1 Ca gwyeni', bχoz gwnabia' ca' besežague' len bene' gole blao ca' cheseni'abi'e naciön cheton' na' len bene' ca' chososed chosolo'e dan' bzoj da' Moisés na' len yezica'chle bene' gwnabia' ca'. Na' bosocheje' Jesús'en' na' goseche'ene' jasesane'ne' lo na' Pilato ben' nac gobernador. 2 Pilaton' gwñabde'ne', gože'ne':

—¿Len' naco' rey che bene' Israel?

Jesús'en' boži'e xtižen', gwne':

—Can' gwnao'na', can' naquen.

3 Na' bχoz gwnabia' ca' da' zan da' bosocuiše'ne'. 4 Nach Pilaton' da' yoble gwñabde'ne', gože'ne':

—¿Bi choži'o xtiža'gaquen'? le da' zan da' chosocuiše' le'.

5 Perw Jesús'en' bitw bi gwne'. Na' Pilaton' bebande' che'.

Gosechogbi'en gat Jesús'en'

(Mt. 27:15-31; Lc. 23:13-25; Jn. 18:38-19:16)

6 Na' gota' costumbr, Pilaton' gwsane' to bene' de ližya caten' čala' lni pascw che neto' bene' Israel, con to bene' yesenab bene' gualaž cheton'.

7 To bene' lie' Barrabás na' len yexonj bene' gosot bene' cate' besyedabague' gobiernna' zjajo'e lo' ližya len nochle bene' güen da' mal. 8 Nach besežag bene' na' gosenabde' Pilaton' gwsane' to bene' con can' nac costumbr čegaquen'.

9 Na' Pilaton' boži'e xtiža'gaquen' gwne':

—¿Čaclaže'le gwsana' rey che le'e nacle bene' Israel?

10 Gwne' ca' le gocbe'ede' dan' chesacxi'a bχoz gwnabi'a ca' Jesús'en', da'nan' bosodie' le' lo ne'e. 11 Perw bχoz gwnabia' ca' bosota bosone' bene' ca' že' na' cont gosenabe' gwsane' Barrabás ben' de ližyan'. 12 Nach Pilaton' gwñabde' legaque':

—¿Bixe gona' len ben' žale nac rey che le'e nacle bene' Israel?

13 Legaque' bososya'adie' bosyoži'e xtižen':

—jBde'e le'e yag cruz!

14 Pilaton' gože' legaque':

—¿Bixe da' xinj nonen'?

Nach legaque' da' yoble bososya'achgüe' gosene':

—jBde'e le'e yag cruz!

15 Nach Pilaton', cont bega'ane' güen len bene' ca', bsane' Barrabásen' can' gosenabe'. Na' bene' mandawd gosot goseyin soldawd che' ca' Jesúsen', nach bene' le' lo na'gaque' cont yosode'ene' le'e yag cruz.

16 Nach soldawd ca' goseche'ene' yeto latje dan' zoa chyo'o che liž bene' gwnabian', na' bosotobe' yogo' soldawd ca', zjanac zane'. 17 Gosechize' Jesúsen' to lache' moradw, na' gosone' to corona de xis yeše' bosozoen' yichjen'. 18 Na' gosezolagüe' chesonle' che', chesosye'e:

—jViva, rey che bene' Israel!

19 Na' bosozete' yichjen' xis, bosoz'i'ene' xene', na' bosozoa xibe' gosone' ca' bene' chesonxen le'. 20 Beyož gosonle' che', besyeyine' lache' moradon' na' bosyoguacue'ne' xacze'. Nach goseche'ene' cont jasede'ene' le'e yag cruz.

Bosode'ene' le'e yag cruz

(Mt. 27:32-44; Lc. 23:26-43; Jn. 19:17-27)

21 Na' šlac zjanche'ene' gan' yesote'ne' besyežague' to bene' yež Cirene le' Simón, xa Alejandro na' Rufo, za' zeze'e yiže', na' bosogüe'ene' yag cruz che Jesúsen'.

22 Goseche'e Jesúsen' latje ga nzi' Gólgota, zeje dižan' Latje che Žit Yichj Bene' Guat. 23 Na' gosode'ene' vino da' nchixe to nechw da' nzi' mirra, perw Jesúsen' bi goclaze' ye'ejen'. 24 Nach bosode'ene' le'e yag cruzen'. Na' soldawd ca' gosone' rifa cate' besyele'e xalana' Jesúsen' cont bla' bi besyecheł to'e'.

25 Cheda ga šezille caten' bosode'ene' le'e yag cruz. 26 Na' yichj yag cruzen' bosozoe' dan' bosozoje' choen' diža' bixchen' gosote'ne'. Qui nyojen, žan: "Rey che Bene' Israel." 27 T xen len Jesúsen' leceze bosode'e le'e yag cruz yechope bene' gwban, toe' šla'a liča, na' yetoe' šla'a robes. 28 Na' da' gosone' ca', goc ca' nyoj Xtiža' Diosen', žan: "Gosone'ne' ca' bene' güen da' xinj."

29 Na' bene' gosede gała'ze gosezi'diže'ne', con chosota yichje' gosene':

—Le' gwnao' yochinjo' yodaon' na' šone žaze yeyontion'. 30 Bosla cuino' na' beyetj le'e yag cruz'a.

31 Lecze ca' bħoz gwnabia' ca' na' bene' ca' bososed bosolo'e dan' bzoj da' Moisés gosezi'diže'ne', na' gose' lježe':

—Bosle' bene' yoble, perw bi chac yosla cuine'. 32 Le'echone' yeyetje' na'a le'e yag cruzen', nach šejle'cho naque' Cristo ben' gwlej Diosen' cont nabi'e chio' bene' Israel.

Na' lente bene' ca' bosoda'lene' le' le'e yag cruz ca' gosezi'diže'ne'.

Can' goc caten' got Jesúsen'

(Mt. 27:45-56; Lc. 23:44-49; Jn. 19:28-30)

33 Cate' bžin guagwbiž, doxen yežlion' goc chol, bžinte cheda šone. 34 Na' ca' hora' Jesúsen' gwne' ziže gwne':

—Eloi, Eloi žlama sabactani? —zeje diža': Dios čhia', Dios čhia', ¿bixchen' ba gwlejyichjo' neda'?

35 Na' bał bene' ca' zjanita' na' gosende' na' gosene':

—Le gwzenag, chol güiže' da' Elías, ben' be' xtiža' Dios cani'.

³⁶ Nach to bene' ca' gwyesese' na' bzažede' to esponja vino zichj na' bzoen' to lao xis toņe nach jažiguen' cho'a Jesúsen' cont xopen', na' gwne':

—Cuezcho, yešque güid Eliásen' yeletje' le'.

³⁷ Nach Jesúsen' bosye'e zižje, na' gote'. ³⁸ Na' lache' da' ze lo' yodao' blaon' bcheza' gacholen, gwza'te yichjen bžinte che'e. ³⁹ Na' xan soldadw ca' zie' lao li' le bengan' goc dogualje Xi'in Dios.

—Da' li' le bengan' goc dogualje Xi'in Dios.

⁴⁰ Lecze bał no'ole zjanite' zito'le chesene'e. Na' len legaue' zjanita' María no'ole Magdala, na' Salomé, na' María xna' Jacobo bene' naše'te, na' lecze goque' xna' José. ⁴¹ No'ol qui gosa'ogüe' Jesúsen' na' gosaclene' le' cate' chsed chlo'ede' bene' ca' že' distritw Galilea. Na' yezanch no'ol zjanita' na', bene' ja'aclene' le' txen Jerusalén.

Bosocuaše' Jesúsen'

(Mt. 27:57-61; Lc. 23:50-56; Jn. 19:38-42)

⁴² Žana' goquen žan' bososini'e par ža che Dios cate' bi de lsens yesone' žin. Na' cate' ba chxoa gwbiž, ⁴³ to bene' le' José, bene' ciuda Arimatea, beyaxjde' gwyetje' lao Pilaton' na' jaynabe' cuerp che Jesúsen'. José goque' to bene' zaque' lao bene' ca' gosenabi'e nación Israel cheton', na' ba zoe' chbeze' batcan' solao nabia' ben' seła' Diosen'. ⁴⁴ Pilaton' bebande' dan' ba gote', na' goxe' xan soldadw ca' cont gwnabde' le' še da' li' ba gote'. ⁴⁵ Na' cate' xan soldadw ca' gože' le' le can' ba goc, Pilaton' bnežjue' latje beyoa' Josén' cuerp che' Jesúsen'. ⁴⁶ Nach Josén' gwzi'e to lache' xen, beletje' cuerp che' Jesúsen' na' bolazen' len. Na' la' jaselo'ote' le' to lo' bloj da' nche'ene' le'e yej xen, na' blole' to yej cho'a blojen' cont bseyjon len. ⁴⁷ Na' María no'ole Magdalan' len María xna' Josén' besele'ede' gan' bosocuaše'nen'.

16

Beban Jesúsen' ladjo bene' guat ca'

(Mt. 28:1-10; Lc. 24:1-12; Jn. 20:1-10)

¹ Cate' gwde ža che Diosen', María no'ole Magdalan', María xna' Jacobo, na' Salomé gosezi'e da' chla' zix cont šjaselo'en cuerp che' Jesúsen'. ² Na' šezilda' ža dmigw besežine' cho'a ban', cate' za' chla' gwbiž. ³ Na' za' yesežine' gose' lježe': —¿Noxe ca'a yej xen dan' da' cho'a blojen'?

⁴ Perw cate' besežine' na' gosene'e, besele'ede' yej xen dan' da' cho'a blojen' ba bga'an. ⁵ Nach gosoe' lo' blojen', na' besele'ede' chi' to bene' xcuide' šla'a liča, nyaze' to lache' toņ da' šiš. Na' besežebe'. ⁶ Na' bena' gože'ne':

—Bitw žeble. Cheyiljwle Jesús bene' Nazaret ben' bosode'e le'e yag cruz. Perw ba bebane'; notoch no nla' nga. Le na' gan' gosexo'e ne'. ⁷ Le šjaya'ac na' le ye' bene' ca' gosaque' le' txen, na' len Pedron', gwyobech Jesúsen' yežine' Galilea clcl ca' legaue'. Na' Galilean' na' yesele'ede' ne' can' gwnacze'.

⁸ Nach no'ol ca' chosyoxonsese' besyeya'aque' cho'a blojen', le chesexiztite' besežebe'. Na' notno gose'e ca', le besexožde'.

Jesúsen' blo'elagüe' María no'ole Magdala

(Jn. 20:11-18)

⁹ Beyož beban Jesúsen' ladjo bene' guat ca' šezilda' ža dmigw, Jesúsen' blo'elagüe' da' nechw len María no'ole Magdalan', ben' bebeje' gaž da' xigüe' yo'o nyaze'. ¹⁰ Na' María nga jatixjue'ede' bene' ca' ba gosanita' len le'.

Zjanita'yaše' na' chesebeže' cate' bžine'. ¹¹ Na' cate' gosende' be'e diža' mban Jesúsen' na' gosende' be'e dižan' can' ba ble'ede'ne', bi gosejle'e.

Jesúsen' blo'elagüe' len chop bene' ca' gosaque' le' txen
(Lc. 24:13-35)

¹² Beyož goc ca', chop bene' ca' gosaque' Jesúsen' txen zjangüe'e nez yixe' cate' Jesúsen' blo'elagüe' legaque', na' nža'le besele'ede'ne'. ¹³ Lecze legaque' ja'aque' jasedixjue'ede' bene' yezica'chle, perw neca gosejle'e chegaque'.

Da' bgon Jesúsen' yeson bene' ca' chsejnilaže'ne'
(Mt. 28:16-20; Lc. 24:36-49; Jn. 20:19-23)

¹⁴ Gwdena' bene' šnej ca' gwlej Jesúsen' cont zjanaque' le' txen zjachi'e cho'a mes chesagüe' cate' blo'elagüe' len legaque'. Na' gwdile' legaque' da' bi chesejnilaže' le' do yichj do laže' na' zjanaque' laždao' chach, le bi gosejle'e che bene' ca' besele'ede'ne' ba bebane' ladjo bene' guat ca'. ¹⁵ Na' gože' legaque':

—Le šja'ac doxen yežlio, na' le šjatixjue'e diža' güen chia' len yogo'lol bene'. ¹⁶ Bene' ca' yesejnilaže' neda' na' yesezoe' nis, gata' yela' mban chegaque' toli tocaņe. Perw bene' bi chesejnilaže' neda', yesebiaye'e. ¹⁷ Na' bene' ca' chesejnilaže' neda', yesyega'anlene' da' qui: Yeso'e la' na' yesyebeje' da' xigüe' yo'o nyaz bene'; yesenie' diža' cobe da' bi zjansede'; ¹⁸ na' še yesoçe' no bel znia, o še yeso'eje' da' nac venen, bibi yesacde'; na' lecze yesexoa taque' yichj bene' chese'e na' yesyeyacde'.

Begüe Jesúsen' yaba
(Lc. 24:50-53)

¹⁹ Beyož bšaljlene' legaque', Xancho Jesúsen' begüe' yaba, na' gwchi'e cuit Diosen' šla'a licha. ²⁰ Na' bene' ca' zjanaque' le' txen besežaše' na' jasedixjue'ede' diža' güen che' doxen. Na' cuin Xancho Jesúsen' goclene' legaque' gosone' yela' guac cont gosejle' bene' le' nac da' li dižan' goso'en. Da' na'zen' chzoja'.

DIŽA' GÜEN DAN' BZOJ SAN LUCAS

Da' nga bzoj Lucasen' par Teófilo

¹⁻⁴ Teófilo, naco' bene' zaca' na' chzoja' le' diža' quinga cont nezdó da' li ca nac da' ba bosozejni'ide' le' che da' ca' ba gosac. Bene' zan bach bosozoje' che Jesúsén', goso'e diža' che da' ca' bene', con can' bosozejni'i bene' ca' neto', bene' ca' besele'ede' can' gwzolaon cate' goljte Jesúsén'. Na' bene' ca' gosende' na' besele'ede' can' goquen' bososed' bosolo'ede' bene' yoble diža' güen che'. Na' neda' cate' beyož gwñabyoža' can' goquen' na' gwyazlaža' gwzozan' tcho'a cont nezdó, Teófilo.

To angl gwdixjue'ede' galje Juan

⁵ Ca tiemp caten' gwnabia' rey Herodes distritw gana' nzi' Judea, na' gwzóa to bxož che bene' Israel ca' bene' le Zacarías. Bene' žin len to xonj bxož bene' zjale Abías. Na' no'ol che Zacarías le Elisabet, na' naque' diaža che da' bxož Aarón. ⁶ Na' Zacarías len Elisabeten' zja'accze' to licha len Diosen' na' gosonyane' yogo'loł da' non Xancho Diosen' mandadw da'na' nyoj le'e ley che'na'. ⁷ Na' nono xi'ingaque' nita' neche Elisabeten' naque' no'ol güiž. Na' chopte' ba zjanaque' bene' gole.

⁸ Na' goquen' beyala' Zacaríasen' len bene' lježe' ca' bene' ca' zjanaque' bxož cont yesone' da'na' besyeyale' yesone' yesonxene' Dios. ⁹ Na' bxož ca' yogo' ni'a chesone' rifa cont chata'bia' noe' choj gwzeye' yal lo' yodao' blao čhegaque' gan' chesonxene' Xancho Diosen'. Na' bchoj Zacaríasen' caten' gosone' rifan' bzeye' yala' lo' yodao'na'. ¹⁰ Na' šlac bzeye' yala' gosenita' yogo'loł bene' zan ca' chy'ole bosol'güiže' Diosen'. ¹¹ Na' to angl bene' gwsela' Xancho Dios blo'elagüe' Zacaríasen', na' gwzecha angla' cuit mesa' lichale gan' chosozeye' yala'. ¹² Na' cate' ble'e Zacaríasen' anglen', benit bečhoł lo' yichjlažda'ogüe' na' bžebchgüe'. ¹³ Perw anglen' gože' le':

—Bitw žebo' Zacarías. Diosa' ba bzenague' che dan' gwñabdo'ne', na' no'ol čchio' Elisabeten' sane' to xi'ino', na' gwsio'obe' Juan. ¹⁴ Na' so' mbalaz na' yebedo' na' lecze bene' zan yesyebede' še ba goljbe'. ¹⁵ Gacbe' to bene' blao lao Diosen'. Bitw ye'ejbe' vino ne bichle da' chože' bene'. Na' cate' za' galjtebe' ba yo'o Spiritw che Diosa' lo' yichjlažda'obe' nabi'an lebe'. ¹⁶ Na' gombe' cont zan bene' Israel ca' yosoša' yichjlažda'ogüe' na' yesonxene' Xancho Diosen' can' cheyala' yesonxene' le'. ¹⁷ Na' cuialaobe' lao Xančhon', na' soa Spiritw che Diosen' len lebe' can' gwzoan len da' Eliásen', na' lecz ca' yela' guac che Diosen'. Na' bene' ca' bi nita' binlo len xi'ine' ca', gombe' ga yesenite' binlo len legacbe', na' bene' güedenag ca' gombe' yosozenague' che Diosen'. Gombe' cont yesenita' bene' yesonxene' Xančhon' cate' yide'.

¹⁸ Nach Zacaríasen' gože' anglen':

—¿Nac gac nežda' da' nga? Neda' naca' bene' gole na' lecz ca' no'ol ččian' ba naque' bene' gole.

¹⁹ Nach anglen' gože' le':

—Neda' naca' angl Gabriel bene' za' yaba. Zoa' len Diosen' na' chonxena'ne', na' gwsela' neda' zedetixjue'eda' le' diža' güen qui. ²⁰ Le' bi gac nio' na'a, le bi chejli' o'xtiža' nga. Cate' žin ža gac da' nga, cana' gac yenio' da' yoble. Na' da' li gwžin ža gac can' gwnia'.

²¹ Na' bene' ca' ze' chyo'ole chesebeze' Zacariásen' besyebande' da' gwžede' lo' yodao' blaona'. ²² Na' cate' bechoj Zacariásen', bene' seřw len ne'e da' bi goc nie'. Nach gosache'e bene' ca' ble'ebande' lo' yodao'na'.

²³ Na' cate' beyož bdelaze' dan' bene' řin lo' yodao'na', beyej liže'. ²⁴ Gwde na' no'ol che' Elisabeten' gwchendao' bidaon' lo' le'e. Na' gayo' bio' gwzoaze'.

²⁵ Na' gwne':

—Güenchguan' ba ben Xancho Diosen' len neda'. Ba břin řa beři'ilaže'de' neda', cont bich yeson benařha' xbab bibi zaca'.

To angl gwđixjue'ede' galje Jesucriston'

²⁶ Goc xop bio' noa' Elisabeten' bidaon', Diosen' besele' anglen' ben' le Gabriel, gwyeje' to yež da'na' nzi' Nazaret gan' mbane distritw Galilea.

²⁷ Gwsele' le' gan' zoa to no'ol güego' le' María. Na' Marían' napři'ichgua cuine'. Na' to bene' le' José bař naquen gwřagna'lene' le' cont gaque' xo'ole'. Na' Joséna' naque' diaža che rey David ben' gwzoa cani'. ²⁸ Na' břin to angl bene' za' yaban' gwyo'e gan' zoa María na' gože'ne':

—Patiox. Xancho Diosen' nři'ide' le' na' zoe' len le'. Na' gone' cont so mbalazch ca yogo'lol no'ole yezica'chle.

²⁹ Cate' ble'e Marían' anglen', bebanchgüede' ca nac diřan' dan' gože' le'. Na' bene' xbab bi zejen dan' gwne' caten' bguape'ne' tiox. ³⁰ Na' anglen' gože'ne':

—Bitw žebo' María, Diosen' nři'ide' le'. ³¹ Na'a gua' xi'ino' to bi' byo dao', na' sano'be', na' go'o labe' Jesús. ³² Na' Jesúsén' gaque' to bene' blao na' benařen' yososi'ene' Xi'in Dios, Dios ben' naque' la'zelagüe bene' blao. Na' Xancho Diosen' gone' cont nabi'e nación Israel chele ca gwnabia' da' xozxta'ogüe' rey David. ³³ Na' le' nabi'e nación Israelen' toli tocaņe, na' gwbat te yela' gwnabia' chen'.

³⁴ Nach gož Marían' angla':

—¿Nacxe gac sana' bdaon'? Bitw nřaga' bene' byo.

³⁵ Nach gož angla' le':

—Spiritw che Diosen' yiden gana' zo'na', na' yela' guac che Diosa' soan len le', Dios ben' naque' la'zelagüe bene' blao. Da'nán' bidaon' za' galje gacbe' lařdao' xilaže' na' yososi'ebe' Xi'in Dios. ³⁶ Na' bene' xna'o Elisabeten' lecze bař gwchendao' bidao' lo' le'e la'czla' ba naque' bene' gole. Ba goc xop bio' no'e to bi' byo dao', len gosene' naque' no'ole güiž. ³⁷ Bibi de da' nřacho da' cbi gac gon Dios.

³⁸ Nach gož Marían' anglen':

—Ni zoa' naca' xmos Xana' Diosen'. Gacřca řhia' con can' ba gwnao'.

Nach beza' anglen' gan' zoa Marían'.

Marían' jane'e Elisabeten'

³⁹ Gwde na' la' gwyejte Marían' to yež da' řia to lo ya'a gan' mbane distritw Judean'. ⁴⁰ Na' břine' liž Zacariásen'. Na' gwyo'e bguape' Elisabeten' tiox. ⁴¹ Na' cate' Elisabeten' bende' choł güiž Marían' le', nach gocbe'ede' chxite' chřia bidaon' lo' le'e. Na' Spiritw che Diosen' gwnabian' yichjlařdao' Elisabeten' ⁴² na' gwne' zižje da' bebecgüede', gože' Marían':

—Zo' mbalazch ca yogo'lol no'ole yezica'chle. Na' lecze bidaon' no'ona' soabe' mbalaz. ⁴³ Chebanda' le' naco' xna' Xana' zedena' o neda'. ⁴⁴ Con cate' benda' chguapo' neda' tiox, bidao' řhian' lecze bebebe', bxite' břiabe' lo' řian'. ⁴⁵ Zo' mbalaz da' gwyejli' o gac can' gwna xtiža' Diosen' dan' gož anglen' le'.

⁴⁶ Nach Marían' gwne':

Chonxena' Xancho Diosen' do yichj do lařa'.

47 Na' do yichj do laža' chebechgüeda' Dios ben' bebeje' neda' lo da' malen'.

48 Ba beyaše'de' neda' naca' xmore' la'czla' bibi zaca'.

Na' na'a bene' yesenita' toli tocañe yesene' neda' zoa' mbalaz.

49 Dios ben' chac chon da' nono gac gon ba bene' da' güen juisyw len neda'.

Toz len' naque' bene' laždao' xilaže' juisyw.

50 Na' note'teze bene' chesape' le' bala'an do yichj do laže', Diosen' cheži'ilaže'de' legaque'.

Cheži'ilaže'de' bene' že' na'a na' yeži'ilaže'de' xi'in diaža čhegaque' ca'.

51 Bač blo'e Diosen' beñačen' yela' guac čhe'.

Na' ba bolague' bene' ya'laže' ca'.

52 Ba bene' cont bene' gwnabia' ca' bich yesenabi'e.

Na' bene' bi naque' bene' blao, Diosen' ba bnežjue' latje yesaque' bene' blao.

53 Na' bene' chesedon, Diosen' ba bnežjue' legaque' da' zan da' güen.

Na' bene' gwni'a ca', ba bose'e legaque', bibi bonežjue' legaque'.

54 Nach ba goclene' chio' bene' Israel naccho ca' xmore'.

Ba blo'ede' bitw ganlaže' chio', san ba cheyaše' cheži'ilaže'de' chio'.

55 Ba bene' can' gože' da' Abraham len yezica'chle da' xozxta'ochó.

Na' soacze' yeyaše' yeži'ilaže'de' xi'in diaža čhe da' Abrahanna' toli tocañe.

56 Na' cate' ba goc šone bio' zoa' Marían' len Elisabeten', nach Marían' beyej liže'.

Gołje Juan bene' bzoe' bene' nis

57 Na' cate' bžin ža san Elisabeten', gwzane' bi' byo dao'. 58 Na' cate' goseneze bene' gualiž čhegaquen' na' diaža čhegaquen' Xancho Diosen' ba beyaše' beži'ilaže'de' Elisabeten', nach besyebchgüede' len le'. 59 Na' goc xono' ža gołjbe' na' jasezoe'be' señw dan' že' circuncisión can' gosone' len yogo' bi' byo dao' bi' gosaljbe' lo diaža čhe da' Abraham. Na' gosaclaže' si' labe' Zacarías can' le' xaben', 60 perw xna'be' gwne':

—Bi gac. Cheyala' si'be' Juan.

61 Na' legaque' gose'ene':

—Notno diaža čhele nita' bene' zjale ca', neca xozxta'ole.

62 Na' gosone' señw gosenabde' xaben' nac čhe'nde' si' labe'. 63 Nach bene' señw gwnabe' to yagla' dao' da' bzoje': “Si' labe' Juan.” Na' yogüe' besyebande'.

64 Beyož bzoje' da'na', la' gocte bene'ie', nach la' gwzolaote be'e diža' benxene' Diosen'. 65 Na' besyebane bene' gualiž čhegaquen'. Na' xtiža'gaquen' gos gwłaljlen doxen yež ca' zjachi' lo ya'ana' gan' mbane distritw Judean'. 66 Na' yogo'loł bene' gosende' dižan' gosone' xbab lo' yichjlažda'ogüe' čhe da' ca', na' gosone':

—¿Bixe gon bdao'na'?

Gosone' ca' le gosenezde' zoacze Xancho Diosen' len lebe'.

Diža' da' be' Zacarías

67 Nach gwnabia' Spiritw čhe Diosen' yichjlaždao' Zacaríasen', nach be'e xtiža' Diosen', gwne':

68 Chonxena' Xancho Dios ben' chonxen chio' bene' Israel.

Cheyaše' cheži'ilaže'de' chio' naccho nación čhe' na' ba chsele' bene' yebej chio' lo da' malen'.

69 Na' bena' bač za' cont yebej chio' lo da' malen', naque' bene' gwnabia' gual, na' naque' xi'in diaža čhe da' rey David ben' goc xmos Diosen'.

70 Chac can' gwna Diosen' len cho'a da' bene' ca' gwsele' cani', bene' gosac lo ne'e goso'e xtižen'.

71 Ba za' ben' gwne' yosle' chio' lo na' yogo' bene' chesegue'e chio'.

72 Chac can' gože' da' xoxxta' ocho ca' yeyaše' yeži' ilaže' de' legaue'.

Bi chanlaže', san chone' yogo' da' ba gwne' gone' gaclene' chio'.

73 Diosen' chone' can' gwlo' e da' bali lao da' xoxxta' ocho da' Abraham gože' ne' gacze can' gwnen'.

74-75 Gwne' yosle' chio' lo na' bene' chesegue'ede' chio'.

Nach gac lažda' ochon' xilaže' lao le' na' gonxenhone' sin cbi žebcho,

na' šejcho licha gonxenhone' šlac de yela' mban checho.

76 Nach Zacaríasen' gože' bdao' chen':

Bdao' chia', benač yesene' chio' naco' bene' choe' xtiža' Dios, Dios ben' naque' la' zelagüe bene' blao.

Yesene' ca' da' cuialaguo' lao Xanchon' na' go'o xtižen' cont nita' bene' yosozenague' che' cate' yide'.

77 Gwsed gwlo' edo' neto' can' chaclaže' Diosa' yebeje' chio' naccho nación che' lo da' mala' na' yezi' xene' xtoła' chon'.

78 Diosen' cheyaše' cheži' ilaže' de' chio',

le len' gwlo' e be' ni' che' lo' laždao' chio' benač.

79 Cue'e be' ni' che' lo' yichjlaždao' chio' naccho ca' bene' chaš ga nac choł, chio' chžebcho gatcho.

Na' gwzejni' ide' chio' benač naquen' soa cuezcho yežlio nga.

Can' be' Zacaríasen' xtiža' Diosen'.

80 Na' Juanna' zej chcha' obe' zejte chac yichjlažda' oben' can' chazlaže' Diosen'. Na' jasoe' latje daš. Na' ate zoe' cate' gwzologüe' gwduxjue'ede' xtiža' Diosen' len' bene' Israel ca'.

2

Caten' golje Jesúsen'

(Mt. 1:18-25)

1 Na' lecz šlac gwnabia' rey César Augusto, bene' mandadw gwyas to censo cont nezde' bal' bene' že' to to yež da' zjachi' doxen yežlio gan' chnabi'e. 2 Na' lecz cana' Cirenio naque' gobernador gan' nzi' Siria. Na' naquen da' nechw bchele' bal' bene' že' to to yež. 3 Na' yogo' loł bene' jaya' aque' lažgaque' jasyede cuent cuine' cont bosochele' le'. 4 Na' José naque' diaža che' da' rey David. Da' nan' beze'e Nazaret gan' mbane distritw Galilea, beyeje' yež Belén dan' nac laž da' rey David. Na' chi' yež Belén gan' mbane distritw Judea. 5 Beyeje' jayde cuine' cuent na' zenche'e no' ol che' Marían' perw biña' yeseca'a lježe'. Na' Marían' ba no'e bdao'. 6 Na' šlac nite' Belén bžin ža sane'. 7 Na' gwthane' bi' nechw, to bi' byo dao', na' btobe' be' lache' na' gwlo' ebe' ga chesagw beyixe', da' bich bi' latje yo'o mesónna' par legaue'.

Angl ca' bosozende' bene' güeyoe xila' ba golje Jesúsen'

8 Na' že' na' yiže' che' yež Belén na' ate že' bene' güeyoe xila' chesape' xila' chen'. 9 Na' to angl bene' gwseła' Xancho Diosen' bžine' gan' nita' bene' güeyoe xila' ca', na' be' ni' che' Xancho Diosa' gwyečhjen bsenin' gan' nite' na'. Na' besežebchgüe'. 10 Na' gož angla' legaue':

—Bitw žeble. Na' a chixjue'eda' le'e to diža' güen da' yesebechgüe yogo' loł bene'. 11 Na' aža lo yež che' rey David ba golje bena' gac yebeje' benačen' lo da' mal. Na' naque' Cristo, na' zeje diža' naque' ben' gwseła' Dios cont nabi'e, na' lecze naque' Xancho. 12 Cont yeželele bdao' na', quinga naquen: bdao' na' ba ntobe' be' lache' na' debe' gan' chesagw beyixe' ca'.

13 Beyoż gwna angla' ca' la' besežinte bene' zan angl gan' zoa angl nechua', za'aque' gan' zoa Diosen'. Na' chesonxene' Diosen' chesene':

14 ꞑChonxenko Diosa' ben' zoa yaba, na' lo yežlio yesezoa yesebez beṇachen' binlo, con bena' cheson can' chazlaže' Diosen'.

15 Na' cate' besyeya'ac angl ca' zjaya'aque' yaba, na' bene' güeyoe xila' ca' gose' lježe':

—Yeyejcho Belén šjayna'cho dan' ba goc can' nac dan' gwselā' Xancho' angl quinga bedesedixjue'ede' chio'.

16 Na' beseya'aces bene' güeyoe xila' ca' jaya'aque' Belén. Na' besyeželde' Marian' len Josén' na' len bdao'na'. Na' bdao'na' debe' gan' chesagw beyixe' ca'. 17 Beyoż besele'ede' can' ba goquen, na' gosoe' diža' che bdao'na' len bene' ca' yezica'chle ca' nac dan' gož anglen' legaque'. 18 Na' yogo'lol bene' ca' gosende' diža' dan' gosoe' bene' güeyoe xila' ca' besyebande'. 19 Na' lecze Marian' gwlo'o yichje' yogo'lol diža' dan' gosoe' bene' güeyoe xila' ca' na' bene' xbab lo' yichjlažda'ogüe' bi zejen. 20 Nach besyeya'ac bene' güeyoe xila' ca' chesonxene' Diosen'. Na' cheso'e diža' nacchgua Diosen' bene' güen da' ba goc yogo'lol da' ba gosende' na' besele'ede' dan' gož anglen' legaque'.

Diaža che Jesúsen' jasesane'be' lo'yodao' blaona'

21 Cate' goc xono' ža golje bdao'na' jasezoe'be' señw da'na' nzi' circuncisión, na' bososi'e labe' Jesús, can' ben anglen' mandadw cate' za' gua' Marian' lebe'.

22 Na' cate' gwde ba beyac Marian' xilaže' len bdao'na' con can' bzoj da' Moisésen', nach ja'aque' ciuda Jerusalén goselene'be' jasesane'be' lao Xancho Diosen'. 23 Gosone' can' nyoj ley che' dan' ža: “Yogo' bi' byo dao' bi' nechw cheyała' gacbe' lo' na' Dios.” 24 Nach gosonxene' Diosen', gosone' can' ža ley che Xancho Dios dan' žan: “Cheyała' gotle chop ngolbex o chope plomxtil.”

25 Na' Jerusalenna' gwzoa to bene' le' Simeón. Benan' gwyejcze' bene' da' güen lao Diosen' na' benxene' le', na' gwleze' batcan' yid Cristo ben' sela' Xancho Diosen' cont yebeje' bene' Israel ca' lo' da' mal. Na' Spiritw che Diosen' gwyo'on lo' yichjlaždao' Simeón, 26 na' bzejni'in le' bi gate' še biña' le'ede' Criston'. 27 Na' Spiriton' benen' cont gwyeje' yodao' blaona', na' zoe' yodao'na' cate' besežin xaxna' Jesúsen' zjano'ebe' cont yesone' len lebe' can' non ley chegaquen' mandadw. 28 Nach Simeónna' gwlene'be' nach benxene' Diosen', gože'ne':

29 Xana' Dios, bačh goc can' gwnaon'.

Beṇ latje yeyeda' binlo gana' zo'na', neda' naca' xmoso'.

30 Ba ble'eda' bena' zedyelej neto' lo' da' mal.

31 Naque' bene' gwnalažo' gwselo' neche yogo'lol benačh.

32 Na' cue'e be'ni' che' lo' yichjlaždao' bene' cbi zjanaque' bene' Israel.

Na' gaque' la'zelagüe bene' zaca' len neto' bene' Israel.

33 Nach xaben' len xna'ben' besyebande' ca' diža' chebe' dan' be' Simeónna'.

34 Na' Simeónna' gwnabde' Diosen' cont gac güen chegaque'. Na' gože' Marian': —Bene' Israel ca' yesejnilaže' xi'ino' nga yesenite' mbalaz, na' bene' Israel ca' cbi yesejnilaže'ne' bi yesenite' mbalaz. Zedelo'ede' beṇachen' can' chaclaže' Diosen' goncho, perw zane' bi yesejle'e che'. 35 Nach Diosen' gwlo'e non' chzenag che' na' non' cbi chzenag. Na' cacze chac ga chaz cwšiyw gac lo' yichjlažda'oguo'n' catequen' žaglaguo' len da' gac che'.

36 Na' lecze yodao' blaona' gwzoa to no'ole le Ana, na' cho'e xtiža' Diosen'. Naque' xi'in da' ben' le' Fanuel na' naque' diaža che da' Aser. Bšagne'e cate'

naque' no'ol güego', perw na' gaž izga gwzoalene' bene' che' na' gote', na' bga'ane' güezebe. Na' Anan' ba naque' to bene' gole, ³⁷ taplalj tap izde'. Bicze chechoje' yodao' blaona'. Leca chonxene' Xancho Diosen' do ža do yel, gwzoatie' tgüje bene' gwbas na' con gwzoachgüe' boļ güiže' Diosen'. ³⁸ Na' goquen' gwbiga' Anan' gan' zoa Josén' len Marian' lo' yodao'na' na' be'e yela' choxclen che Diosen' bač gwsele' Jesúsen'. Na' be'e diža' che Jesúsen' len yogo' bene' ca' že' Jerusalén ben' chesebeze' batca' seļa' Diosen' ben' yebeje' legaque' lo' da' malen'.

Jaya'aque' Nazaret

³⁹ Nach Josén' len Marian' cate' beyož gosone' yogo'loļ dan' non ley che Xancho Diosen' mandadw yesone', jaya'ac lažgaque' Nazaret gan' mbane distritw Galilea. ⁴⁰ Na' Jesúsen' zej chcha'ogüe' na' zej chčačhlaže'. Na' ca' zej chča'ogüe' na' zej chejni'ichde', na' Diosen' nži'ilaže'de'ne'.

Can' ben Jesúsen' chašil yodao' blaona'

⁴¹⁻⁴² Na' xaxne'e ca' yogüiz chja'aque' lni da' čala' Jerusalén chjaseze'ede' can' goc cate' Diosen' betue' bi' nechw che yogo' bene' Egipto na' bosle' bene' Israel. Šižinw ize Jesúsen' cate' goseche' xaxne'en le' ja'aque' lnin' Jerusalén. ⁴³ Na' cate' gwde lina' besyeya'aque', perw Jesúsen' bega'ane' ciuda Jerusalén. Na' xne'ena' len Joséna' bi gosache'ede'. ⁴⁴ Con gosacde' ba zjayde' txen len bene' ca' nžaggaque'. Na' tža nez ba gosa'aque' cate' gwzolao chesyeyiljue'ne' ladjo diaža čhegaque' na' no bene' xmgüe', ⁴⁵ perw bitw besyeželde' le'. Nach besyebi'e jaya'aque' Jerusalénna' da' yoble cont šjasyediljue' le'.

⁴⁶ Na' beyon žach besyeželde' Jesúsen' chašil yodao' blaona', chi'e gačol bene' ca' chososed chosolo'ede' dan' bzoj da' Moisés. Jesúsen' chzenague' xtiža'gaquen' na' zanen čnabde' legaque'. ⁴⁷ Na' yogo'loļ bene' ca' chosozenague' xtiža' Diosen' da' cho'e chesyebande' can' chejni'ide' na' can' choži'e xtiža' bene' ca' zjansed dan' bzoj da' Moisés. ⁴⁸ Na' cate' besele'e xaxne'en le', besyebande', na' xne'en gože' le'.

—Xi'indagua', žbixčen' chondo' neto' ca'? Xao' nga na' neda' ba gwdato' beyiljwto' le', na' da' juisyw ba ble'eto'.

⁴⁹ Jesúsen' gože' legaque':

—žBičen' beyiljwle neda'? žBi nezele liž Xa' ngan' cheyaļa' soa'?

⁵⁰ Perw xaxne'e bitw gosejni'ide' bi zejen dan' gože' legaque'.

⁵¹ Na' beyeje' yež Nazaret len xaxne'e bzenague' čhegaque'. Na' gwlec yichj xne'ena' yogo'loļ dan' goca'. ⁵² Na' ca' chac zej chejni'iche Jesúsen' na' zej gwcha'oche', na' Diosen' len benača' zej chesazlaže'che' le'.

3

Juan gwdixjue'ede' diža' güen che Diosa' (Mt. 3:1-12; Mr. 1:1-8; Jn. 1:19-28)

¹ Cate' lo iz šino' dan' čnabia' César Tiberio doxen ga mbane nación Roma, izna' goc Poncio Pilato gobernador che distritw Judea, na' goc Herodes gobernador che distritw Galilea. Na' bene' biše' Herodesen', ben' le Felipe, goque' gobernador che distritw Itorea na' che distritw Traconite. Na' goc Lisaniaš gobernador che distritw Abilinia. ² Nach lēcze izna' Anás na' Caifás gosacche' bxož blao che bene' Israel. Izna' Juan ben' naque' xi'in Zacarías gwzoe' to latje daš. Nach Diosen' be'lene' Juanna' diža'. ³ Na' Juanna' gwyeje'

yogo'loł yež dan' nita' gała'ze yegw Jordán, jatixjue'ede' yogo'loł bene' cheyała' yesyetinjde' xtoła'gaque' na' yesezoe' nis cont nitlao xtoła'gaquen'. ⁴ Juanna' bene' dan' bzoj da' Isaías ben' be' xtiža' Diosen' cani'te, gana' žan:

Bena' chne' zižje latje dašen', že':

“Le gonšagüe' yichjlažda'olen' cont soale gwzenagle che Xanchon' cate' yide', le cuejyichj da' malen' chonle cont yichjlažda'olen' gaquen ca to nez da' ba gosonšagüe'.

⁵ Gwžin ža cate' yogo' ya'a yegw ca' yesyeyaquen laše', na' no nez da' nacchgua bxoca' yesyeyaquen liča, na' no nez da' nžaš nche'ene yesyeyaquen ba'a.

⁶ Na' yogo'loł bene' yesache'ede' can' chaclaže' Diosen' yebeje' benačen' lo da' mal.”

⁷ Na' bene' zan ja'aque' gan' gwzoa Juanna' cont gwzoe'ne' nis. Na' Juanna' gože' legaque':

—Le'e nacchgualo bene' zgot na' bene' gwxiye'. ¿Cadaquele guac yelale lao castigw dan' seła' Diosen' caten' gone' yela' justis che benačen'? ⁸ Še da' li ba betinjele xtoła'le, cheyała' gonle da' nac güen cont yesache'e bene' ba boša' yichjlažda'olen'. Na' bitw gonle xbab gaquele Diosen' bitw gone' le'e castigw che xtoła'len' lagüe da' nacle xi'in diaža che da' Abrahanna'. Bitw nacho leca chyažje Diosen' le'e. Guac gone' cont yej quinga yesyeyaquen xi'in diaža che da' Abrahanna'. ⁹ Ca nac le'e, še bi chonle can' chazlaže' Diosen', zaca'leble ca to yag frut da' bibi chbia. Na' yogo'te yag frut da' bibi chbia, čog xan yaga' len na' gwzeyen'.

¹⁰ Nach bene' ca' chosozenag xtiže'na' gosenabde' Juanna', gose'ene':

—¿Bica' da' cheyała' gonto'?

¹¹ Na' gože' legaque':

—Ben' nape' čhope camis cheyała' gwnežjue' ton che bene' bi de che'. Na' lecze ca' che ben' de da' gagüe', cheyała' gwnežjue' che ben' bi de gagüe'.

¹² Na' cate' to čhope bene' güechixjw ca' jasebigue' cont gwzoa Juanna' legaque' nis, na' gose'ene':

—Maestrw, ¿bica' da' cheyała' gonto'?

¹³ Na' gože' legaque':

—Bitw gwčhixjwchle ca da' cheyała' yeseyixjue'.

¹⁴ Na' to čhope bene' ca' zjanac soldadw lecze gosenabde' le', gose'ene':

—¿Čhix neto'? ¿Bica'ch da' cheyała' gonto'?

Na' Juanna' gože' legaque':

—Bitw ca'ale da' de che bene', na' neca gonlaže'le len da' yosbague'le bene' cont ca'ale xmechwgaque'. Le gon banez len laxjwle.

¹⁵ Na' bene' ca' gosezoe' lez yid Cristo ben' naquen seła' Diosen' yedenabi'e, na' gosacde' še Juanna' naque' Cristo. ¹⁶ Na' Juanna' gocbe'ede' xbab čhegaquen' na' gože' yogo'lole':

—Neda' da' li chzoa' le'e nis, perw za' yid bena' gon cont soa Spiritw che Diosen' lo' yichjlažda'olen' nabian' le'e. Na' Spiriton' naquen ca yi', na' gwxi gwloan yichjlažda'ole. Bena' za' za' zaca'che' ca neda', na' da' nacchgüe' bene' zaca' bitw zaca' gona' xmandadoe' lečhja' no xele'. ¹⁷ Benan' gone' len benačen' can' choncho cate' chdecho trigon' lo' mner. Čtočbo trigon' čhgo'ošagüe'chon na' chzeycho yix beben'. Na' bene' chesejnilaže' Diosen', yotobe' legaque' cont šjasyenite' txen len le', na' bene' bi chesejnilaže' le', sele' legaque' lo yi' gabilen' dan' cbi cheyol cheniť.

18 Da' zanch da' gwna Juanna' gwdixjue'ede' legaque' diža' güen, na' gwneyoede' legaque' yesejle'en. 19 Nach Juanna' gwdile' gobernador Herodes ca nac da' mal da' bene' beque'e Herodías ca xo'ole', le Herodiasna' naque' xo'ole Felipe bene' biše' Herodesen'. Na' Juanna' lecze be'e diža' yogo'lol da' mal dan' ba ben Herodes. 20 Na' Herodesen', gualaz da' gwzenague' che Juanna', benche' yeto da' mal, gwlo'e Juanna' ližya.

Can' goc caten' gwzoo Jesúsen' nis

(Mt. 3:13-17; Mr. 1:9-11)

21 Nach šlac chzoa Juanna' bene' nis, bene' zan ja'ac cont bzoe' legaque' nis. Na' len Jesúsen' gwzoe' nis. Na' lo hora' Jesúsen' bol' güiže' Diosen' na' la' byaljwte yaba gan' zoa Diosen'. 22 Na' betj Spiritw che Diosen' bžinen gwzooan len le', na' ca hora' Spiriton' naquen ca to ngolbex. Na' gosende' gwne Dios ben' zoa yaban', gwne':

—Le' naco' Xi'ina' bene' chacchgüeda', na' chebe chezaquelaže'chgüeda' chio'.

Diaža che Jesúsen'

(Mt. 1:1-17)

23 Na' ca do šichoa ize Jesúsen' cate' gwzooane' bene' yogo'lol da' zedeyene'. Na' bene' ca' gwnita' na' gosone' xbab še naque' xi'in Joséna'. Josén' naque' xi'in Elí, 24 na' Elí naque' xi'in Matat, na' Matata' naque' xi'in Leví, na' Levína' naque' xi'in Melquí, na' Melquín' naque' xi'in Jana, na' Janan' naque' xi'in yeto ben' le' José. 25 Na' Joséna' naque' xi'in Matatías, na' Matatíasen' naque' xi'in Amós, na' Amósen' naque' xi'in Nahum, na' Nahunna' naque' xi'in Ešli. Na' Eslin' naque' xi'in Nagai, 26 na' Nagain' naque' xi'in Maat, na' Maata' naque' xi'in Matatías, na' Matatíasen' naque' xi'in Semei, na' Semein' naque' xi'in José, na' Josén' naque' xi'in Judá. 27 Na' Judán' naque' xi'in Joana, na' Joanan' naque' xi'in Resa, na' Resan' naque' xi'in Zorobabel, na' Zorobabelen' naque' xi'in Salatiel, na' Salatielen' naque' xi'in Neri, 28 na' Nerin' naque' xi'in Melquí, na' Melquín' naque' xi'in Adi, na' Adin' naque' xi'in Cosam, na' Cosanna' naque' xi'in Elmodam, na' Elmodanna' naque' xi'in Er. 29 Na' Era' naque' xi'in Josué, na' Josuéen' naque' xi'in Eliezer, na' Eliezeren' naque' xi'in Jorim, na' Jorinna' naque' xi'in Matat. 30 Na' Mataten' naque' xi'in Leví, na' Levín' naque' xi'in Simeón, na' Simeóna' naque' xi'in Judá, na' Judán' naque' xi'in José, na' Josén' naque' xi'in Jonán, na' Jonánna' naque' xi'in Eliaquim. 31 Na' Eliaquinna' naque' xi'in Melea, na' Melean' naque' xi'in Mainán, na' Mainánna' naque' xi'in Matata, na' Matatan' naque' xi'in Natán. 32 Na' Natánna' naque' xi'in David, na' Davida' naque' xi'in Isai, na' Isain' naque' xi'in Obed, na' Obedá' naque' xi'in Booz, na' Boozen' naque' xi'in Salmón, na' Salmónna' naque' xi'in Naasón. 33 Na' Naasónna' naque' xi'in Aminadab, na' Aminadaba' naque' xi'in Aram, na' Aranna' naque' xi'in Esrom, na' Esronna' naque' xi'in Fares. Na' Faresen' naque' xi'in Judá, 34 na' Judán' naque' xi'in Jacob, na' Jacoben' naque' xi'in Isaac, na' Isaquen' naque' xi'in Abraham, na' Abrahanna' naque' xi'in Taré, na' Tarén' naque' xi'in Nacor. 35 Na' Nacoren' naque' xi'in Serug, na' Seruga' naque' xi'in Ragau, na' Ragaun' naque' xi'in Peleg, na' Peleguen' naque' xi'in Heber. Na' Heberen' naque' xi'in Sala, 36 na' Salan' naque' xi'in Cainán, na' Cainánna' naque' xi'in Arfaxad, na' Arfaxaden' naque' xi'in Sem, na' Senna' naque' xi'in Noé, na' Noén' naque' xi'in Lamec. 37 Na' Lamequen' naque' xi'in Matusalén, na' Matusalénna' naque' xi'in Enoc, na' Enoca' naque' xi'in Jared, na' Jareden' naque' xi'in

Mahalaleel. Na' Mahalaleela' naque' xi'in Cainán, ³⁸ na' Cainánna' naque' xi'in Enós, na' Enósen' naque' xi'in Set, na' Seta' naque' xi'in Adán, na' Adánna' naque' xi'in Dios.

4

Satanásen' goclažen' co'oyelan' Jesúsén' cont gone' da' mal
(Mt. 4:1-11; Mr. 1:12-13)

¹ Na' Spiritw che Diosen' gwnabian' yichjlaždao' Jesúsén'. Na' Jesúsén' beze'e cho'a yegw Jordán, na' Spiritua' benen cont gwyeje' latje daš. ² Čhoa ža gwzoe' latje dašen' na' lao čhoa žan' bicze bi gwdagüe'. Na' cate' gwde čhoa žan' gwdone'. Na' Satanás dan' chnabia' da' xigüe' ca' goclažen' co'oyelan' le' cont gone' da' mal. ³ Nach gož Satanásen' le':

—Še le' naco' Xi'in Dios, gož yej nga yeyaquen yetextil.

⁴ Na' gož Jesúsén' len:

—Nyojcze Xtiža' Diosa' žan: “Gague yela' guagw na'zen' chyažje chio' benač cont gac bancho, san lecze chyažjecho yogo'lol diža' dan' ža Diosen'.”

⁵ Na' gwče' Satanásen' le' to lo ya'a sibe na' bedao'nez blo'en le' yogo'lol nación da' zjachi' yežlio. ⁶⁻⁷ Nach gožen le':

—Doxen yela' gwnabia' da' de yežlio nga naquen lo na' cont gwnežuan' con no che'nda'. Še le' gwzoa xibo' gonxeno' neda', nach gona' le' yela' gwnabia' che nación ca' zjachi' yežlio nga na' len yela' zaca' yela' xdan che nación ca'.

⁸ Nach Jesúsén' gože' Satanásen':

—Becuas ca'ale Satanás. Nyojcze Xtiža' Diosen' žan: “Cheyala' šejnilaže'cho Xancho Diosen' na' toz le' gonxencho.”

⁹ Nach Satanásen' gozče'en le' ciuda Jerusalén. Na' bcuen le' yichjo' yodao' blao gan' nac la'zelagüe sibe, na' gožen le':

—Še len' naco' dogualje Xi'in Dios, nga boslažo' cuino', ¹⁰ le' nyojcze Xtiža' Diosen', žan:

Sela' Diosen' bene' ca' zjanac angl che' yesaclene' le' na' yesape' le',

¹¹ yesoxe' le' cont bi čhego' no yej.

¹² Nach Jesúsén' gožen':

—Lecz ca' nyoj Xtiža' Diosen' žan: “Bitw goncho Xancho Diosen' prueba še lede' can' žen'.”

¹³ Beyož gota'bia' bi gwzoe' Satanásen' co'oyelan' Jesúsén' gone' da' mal, nach becuasen šlož len le'.

Jesúsén' gwzologüe' chyixjue'ede' diža' güen che Diosen' distritw Galilea
(Mt. 4:12-17; Mr. 1:14-15)

¹⁴ Nach Jesúsén' beyeje' distritw Galilea, na' yela' guac che Spiritw che Diosen' gwzoan len le'. Na' yogo'lol bene' že' yež ca' zjachi' doxen Galilea gosenezde' che Jesúsén'. ¹⁵ Na' Jesúsén' bsd blo'ede' legaque' lo' yodao' čhegaquen', na' yogo'lol bene' ca' gosonxene' le'.

Bežin Jesúsén' Nazaret

(Mt. 13:53-58; Mr. 6:1-6)

¹⁶ Na' bežin Jesúsén' yež Nazaret gan' gwcha'ogüe', na' gwyo'e yodao' ža che Dios can' ba yolagüe' chone', na' gwzechede' cont gwlabē'. ¹⁷ Na' ben' yo'lo ne'e yodao'na' bnežjue'ne' yiš da' ndobe gan' nyoj dan' bzoj da' Isaías ben' be' Xtiža' Diosen' cani'te. Na' Jesúsén' bzaše' yišen' na' beželde' ga nyojen žan:

¹⁸ Zoa Spiritw che Diosa' len neda',

na' Diosen' gwleje' neda' zedeya' diža' güen len bene' yaše'.

Na' gwsele' neda' zedeyena' cont yesyeyaclaže' bene' ca' chesacyaše'de'.

Na' za'a cont gwsana' bene' ca' zjade ližya.

Na' zedeyena' cont yesyele'e bene' lchoł.

Na' bene' chyi chzaca', zedeyena' cont noch no yosoči yososaque' legaque'.

¹⁹ Na' zedetixjue'eda' ba bžin ža gaclen Diosen' benačhen'.

²⁰ Jesúsen' botobe' yišen' na' bonežjuen' ben' yo'o lo ne'e yodaon' na' gwchi'e.

Na' yogo' bene' ca' nita' yodaon' la' goseña'tie' le'. ²¹ Nach gwzolao be'e diža' gwne':

—Ža na'aža ba chac can' ža Xtíža' Diosen' dan' ba benele nga.

²² Na' yogo' bene' ca' gosende' diža' dan' be'e besyebande' catec mba nac xtiža' Jesúsen'. Na' gosenie' güen che' na' gose' lježe':

—¿Gague benga xi'n Josén'?

²³ Nach gož Jesúsen' legaque':

—Ye'ljale neda' can' ža diža' dan' de: “Bene' güen rmed le', beyon cuino'.” Na' lecz ye'ljale neda': “Dan' chesene' beno' yež Capernaum da' bebane bene', lecz can' cheyała' gono' lažcho nga.”

²⁴ Nach goze'e legaque':

—Da' li chnia' le'e, bene' gualaž che note'teze bene' choe' xtiža' Diosen' bitw chesezi'e che'. ²⁵ Ca tiemp che da' Elías ben' be' xtiža' Diosen' cani', bibi yejw goc šon iz yo gašje na' goc gwbin juisyw chegaque' doxen gan' zelao mbane Israel. Naquen da' li gwnita' zan no'ol güezebe yež ca' gan' mbane Israel ca tiempa', ²⁶ perw Diosen' bi gwsele' Elíasen' cont gaclene' ne to bene' güezeb ca'. Gwsele' le' yeto yež yoble gan' nzi' Sarepta gan' mbane ciuda Sidón cont goclene' to no'ol güezebe. ²⁷ Na' lecz ca' tiemp che da' Eliseo ben' be' xtiža' Diosen' cani', gwnita' zan bene' Israel bene' gosacšene len yižgüe' da' nzi' lepra. Ne to legaque' bi beyon Eliseon'. Toz bene' zito' bene' Siria, ben' le' Naamán, beyon Eliseon'.

²⁸ Na' yogo' bene' ca' že' yodao'na' cate' gosende' dan' gwna Jesúsen' beseža'achgüe'. ²⁹ Na' la' besyezoža'te' na' besyebeje' Jesúsen' yežen', na' goseche'ene' to lo ya'a da' zoa gała'ze, gosaclaže' yososlazoe'ne' lo ya'a na'ate, ³⁰ perw bibi goc yesonde' le'. Con beza' Jesúsen' bedie' gachol gaque'.

Jesúsen' bebeje' da' xigüe' dan' yo'o yichjlaždao' bene'

(Mr. 1:21-28)

³¹ Na' jasoe' yež Capernaum gan' mbane Galilean', na' ža che Dios bsd blo'ede' bene' ca' že' lo' yodao'na'. ³² Na' bene' ca' besyebande' ca' nac dan' bsd blo'eden', le bzejni'ide' cacze to bene' nezde' cayažen' nac xbab che Diosen'.

³³ Lo' yodao'na' gwzoa to bene' yo'o nyaze' da' xigüen'. Na' bosye'e gwne':

³⁴ —¿Bixčhen' chgoša' chlaže' čhio' len neto', Jesús bene' Nazaret? ¿Zedežaiyo'o neto'? Neda' nombi'a le' na' nezda' naco' bene' laždao' xilaže' juisyw ben' gwseła' Diosen'.

³⁵ Nach Jesúsen' gwdile' da' xigüen' na' gožen':

—iŠšago! Bechoj yichjlaždao' benga.

Na' bchix da' xigüen' bena' gachol bene' ca' že'na' nach bechojen. Perw bitw benen le' zi'. ³⁶ Na' leca besyebane yogo' bene' ca', nach gose' lježe':

—¿Bixen' chac? ¿Bixe da' coben' chlo'e benga? Nacbia' nape' yela' chnabia' na' yela' guac, le chone' mandadw na' la' chechojte da' xigüe' da' yo'o nyaz bene'.

³⁷ Na' ca nac dan' ben Jesúsen' gos gwlaļje dižan' doxen lagüe yež ca' zjachi' do na'.

Jesúsen' beyone' taobi'in che Simónna'

(Mt. 8:14-15; Mr. 1:29-31)

³⁸ Na' cate' beze'e yodao' na', na' gwyeje' liž Simón. Na' taobi'in che Simónna' chačšende', yo'e da' la. Na' bosol güiže' Jesúsen' cont yeyone' le'. ³⁹ Na' Jesúsen' gwčeze' cuite' gan' die', na' bcheque' gwdile' da' lan' cont bechojen. Nach taobi'in che Simónna' la' gwyastie' na' bsini'e da' gose'ej gosagüe'.

Jesúsen' beyone' bene' zan

(Mt. 8:16-17; Mr. 1:32-34)

⁴⁰ Na' cate' ba chxoā gwbižen' goseche'e con yogo' bene' chese'e yižgüe' jasesane' legaque' lao Jesúсна'. Na' Jesúsen' gwxoā ne'e yichj to toe' na' beyone' legaque'. ⁴¹ Na' lecz ca' bebej Jesúsen' da' xigüe' da' yo'o yichjlaždao' bene' zan. Na' besyechojen gosēnen zīžje, gosēnan:

—Le' naco' Xi'in Dios.

Na' Jesúsen' gwdile' legaquen na' bitw be'e latje bi yesēnan, le gosēzen naque' Cristo ben' gwlej Diosen' cont yedenabi'e.

Jesúсна' gwde' doxen Galilean' bsd blo'ede'

(Mr. 1:35-39)

⁴² Na' beteyo cate' gwye'ni', beze'e na' beyeje' to latje ga nono nla'. Na' bene' ca' besyeyiljue'ne' na' ja'aque' gan' zoen'. Na' gosaclaže' yosozague' Jesúsen' cont bi yeze'e. ⁴³ Na' Jesúsen' gože' legaque':

—Lecz ca' bene' ca' nita' yež yoble cheyaļa' šjalo'eda'ne' cont yosozenague' che Diosen' na' nabi'e yichjlažda'ogaque'. Diosen' gwsele' neda' cont šjatixjue'eda' legaque' xtižen'.

⁴⁴ Ca' goquen', Jesúsen' gwde' to to yež che distritw Galilea na' bsd blo'ede' bene' ca' lo' yodao' čhegaquen'.

5

Gosezene' be zan belja'a

(Mt. 4:18-22; Mr. 1:16-20)

¹ Na' šlac zecha Jesúsen' cho'a nisdao' da'na' nzi' Genesaret, besežag bene' zan na' bosochite' Jesúsen' da' gosaclaže' yosozenague' xtiža' Diosen' dan' bi'e cho'a nisdān'. ² Na' Jesúsen' ble'ede' chope barcw dao' cho'a nisdān'. Na' bene' gwxen bel ca' ba besyežaše' lo' barcon' ba chesyeyibe' yixjw bel čhegaquen'. ³ Na' Jesúsen' gwyo'e lo' barcw che Simónna' na' gwñabde' le' bosožigue' barcon' yelate' lo' nisen'. Na' Jesúsen' gwchi'e lo' barcon' blo'ede' bene' ca' že'na'. ⁴ Cate' beyož bi'e dižan' na' gože' Simónna':

—Le gwžiga'ch barcon' yelate' gan' nac sitjw, na' le gwzala' yixjw čhelen' na' senle belen'.

⁵ Nach Simónna' gože' Jesúsen':

—Maestrw, ba bento' žin do yel na' ne to nono bdoļa'. Perw le' ba gwnao' yezolaoto', na' gwzala'to' yixjw ca' da' yoble.

⁶ Na' beyož bosozala' yixjw čhegaquen' zjanyicoco'ten belēn', yeleze ca' yesyecheza'ten. ⁷ Na' bene' ca' zjanita' lo' barcw che Simónna' gosone' señw gosaxe' bene' lježen' že' yeto lo' barcw yoble cont yesaclene' legaque' yesyebeje' yixjon'. Yelez ca' gwdebe nisen' chopte barcw ca' dan' gosegüe'e bel zan lo'enna'. ⁸ Nach Simónna', ben' lecz le' Pedro, cate' ble'ede' da'na' goquen' na' bzoā xibe' lao Jesúsen' gože' le':

—Xana', neda' naca' to bene' mal, bibi zaca' par so' nga len neda'.

⁹ Gwne' ca' le le' txen len bene' lježe' ca' že' lo' barcon' besyebanchgüede' da' gosezene' bel zanna'. ¹⁰ Lecz ca' besyebane xi'in ben' le Zebedeo, zjanac chop biše'tie', Jacobo len Juan. Bene' ca' chesone' žin len Simónna'. Nach Jesúsen' gože' Simónna':

—Bitw žebo'. Le' naco' bene' gwxen bel, na' chebejo' belen' lo' nisen'; perw na'a gona' cont gaxle bene' yesyechoje' lo da' malen'.

¹¹ Na' cate' besyežinlene' barcon' yo biž, nach gosebejyichje' barcon' len yogo' xšinlaže' ca' na' ja'aclene' Jesúsen'.

Jesúsen' beyone' to bene' che'ede' yižgüe' dan' nzi' lepra

(Mt. 8:1-4; Mr. 1:40-45)

¹² Na' šlac Jesúsen' zoe' to yež na' bžin to bene' che'ede' to yižgüe' dan' nzi' lepra. Na' bena' cate' ble'ede' Jesúsen', bzoa xibe' lagüe' na' boļ güiže'ne' gože'ne':

—Xana', še chaclažo', guac yeca'o yižgüe' dan' che'eda' nga.

¹³ Nach Jesúsen' bli ne'e na' gwxoen' yichje' na' gože' le':

—Chaclaža' yeyacdo'. Beyaque.

Nach la' bega'ate yižgüe' dan' che'eden'. ¹⁴ Nach Jesúsen' bene' mandaw gože' le' notno ye'e can' ba beyone' le'. Na' gože' le':

—Con gwyej ja'na' bxoza' cont le'ede' bačh beyacdo'. Na' bnežjo da' cheyaļa' gwnežjo' dan' non Moisésen' mandaw cont yeyaco' xilaže' len ley che Diosen'. Ben ca' cont yogo' bene' yesenezde' ba beyacdo'.

¹⁵ Na' tža tža gos gwłalje diža' ca' nac yeļa' guac dan' ben Jesúsen'. Na' besedob bene' zan cont bosozenague' xtiža' Jesúsen' na' cont beyone' legaque' len bite'teže yižgüe' da' chese'ede'. ¹⁶ Nach Jesúsen' bchoje' to ši'i güeje jal güiže' Diosen' to latje daš.

Jesúsen' beyone' to bene' bi chda šla'a ni'a ne'e

(Mt. 9:1-8; Mr. 2:1-12)

¹⁷ Nach to ža zoa Jesúsen' to yo'o gan' chsed chlo'ede' bene'. Na' gaļa'ze zjanita' zan bene' Israel bene' zjanzi' fariseo. Na' lecze zjachi' yeto cuen bene' ca' chososed chosolo'ede' dan' bzoj da' Moisés. Bene' ca' že'na' za'aque' yogo'loļ yež ca' gan' mbane distritw Galilea len distritw Judea, na' lecze bale' za'aque' ciuda Jerusalén. Na' bosozenague' diža' da' be' Jesúsen'. Na' yeļa' guac che Xancho Diosen' zoan len Jesús'a' na' beyone' bene' güe' ca'. ¹⁸ Na' besežin xonj bene' zjanlene' to bene' xinj, bene' bi chda šla'a ni'a ne'e, zjanxo'e' le' to ļ cam dao'. Na' gosacłaže' yesedie' šjasesane' le' lao Jesús'a'. ¹⁹ Na' da' že'chgua bene' zan bi goc latje yesedie' šjasesane' bene' güen' lao Jesúsen'. Nach bene' ca' gosepe' yichjo'ole gosesaljue' goseque'e tej na' beseletje'ne' len xcame'na' gachol bene' ca' že' lo' yo'ona' cont bžine' lao Jesúsen'. ²⁰ Cate' goče'e Jesúsen' gosejnlaže' le' na' gože' bene' güe'na':

—Xi'ina', ba bezi'xena' xtoļon'.

²¹ Na' bene' ca' chososed chosolo'e dan' bzoj Moisés'a' na' bene' fariseo ca' gosene':

—¿Non' chaque benga naque' chne' ca'? Chon cuine' ca Dios. Le nono zoa bene' gac yezi'xene' xtoļa' beñachen'. Toz Diosen' gac yezi'xenen'.

²² Jesúsen' goče'ede' ca' nac da' cheseza'laže' na' gože' legaque':

—¿Bičhena' chza'laže'le ca' lo' yichjlažda'ole? ²³ Še yapa'ne': “Ba bezi'xena' xtoļo'na'”, bi nezele še napa' yeļa' gwnabia' cont yezi'xena' xtoļe'na'. San še yapa'ne': “Gwyas na' gwda”, na' nacbia' še napa' yeļa' guac gac can' gwnian'.

²⁴ Na'ach gona' cont gacbe'ele napa' yela' gwnabia' cont yezi'xena' xtoła' beñaç, neda' naca' bena' gwseła' Diosen' golja' beñaç.

Nach gože' bene' xinja':

—Chapa' le' beyas, beyoa' xcamon', na' beyej ližo'.

²⁵ Nach la' beyaste bene' xinja', chesena'te bene' ca' nita'na'. Nach beyoa' xcamen' na' beze'e zjajda liže' chonxene' Diosen'. ²⁶ Na' yogo'loł bene' ca' že'na' besyebande' yela' guac che Jesúsen' dan' bene'na'. Nach gosonxene' Diosen', na' do chesežebe' gose' lježe':

—Da' yebanecho da' ca' ba ble'echo na'aža.

Jesúsen' gwleje' Leví cont goque' le' txen

(Mt. 9:9-13; Mr. 2:13-17)

²⁷ Gwdena' beza' Jesúsen' na' ble'ede' to bene' güeçhixjw bene' le' Leví, chi'e latje gan' chçhixjue'. Na' Jesúsen' gože' le':

—Da len neda'.

²⁸ Nach gwzoža' Levín' gwlejyichje' yogo' xšinłaze' na' gwyejlene' Jesúsen'.

²⁹ Nach Levína' bene' to lni xen ližen' par Jesúsen', na' ja'ac bene' zan bene' güeçhixjw ca' na' bene' yezica'chle' na' gosebe'lene' le' cho'a mesen' gosagüe'.

³⁰ Na' bene' ca' chososed chosolo'ede' dan' bzoj Moisésen' na' len bene' fariseo ca' gosacyožlene' bene' ca' zjanaque' Jesúsen' txen, gose'e legaque':

—¿Nacxeçhen' che'ej chagwle txen len bene' güeçhixjw na' yebałe bene' güen da' xinj ca'?

³¹ Jesúsen' gože' legaque':

—Bene' çbi chesacšene bitw cheseyažjde' bene' güen rmed. Bene' ca' chesacšene, legaquen' cheseyažjde' bene' güen rmed. ³² Gague bene' ba zjanaque' bene' güen len Diosen' zedeneyoeda' cont yesyetinjde' xtolen', san bene' güen da' xinj. Legaque' zjanaque' ca' bene' cheseyažjde' bene' güen rmed.

Gosenabde' Jesúsen' bixchen' çbi gwleje' tgüje ža gwbas

(Mt. 9:14-17; Mr. 2:18-22)

³³ Nach bał bene' gose'e le':

—Bene' ca' zjanaque' txen len Juan na' bene' zjanaque' txen len bene' fariseo ca' chesonchgüe' gwbas chosol güiže' Diosen'. Perw na' bene' ca' zjanaque' le' txen chese'ej chesagüe'. ¿Bixçhen'?

³⁴ Nach gož Jesúsen' legaque':

—¿Guac yesezoa gwbas bene' chaxe' to ga chac yela' güešagna' šlac ben' bšagnan' zoalene' legaque'? Bi gac. ³⁵ Perw žin ža cate' bich soe' len legaque', cana'ch yesone' gwbas. Na' ca'cze naquen len neda' na' len bene' ca' zjanaque' neda' txen.

³⁶ Na' Jesúsen' be'e jempl nga bzejni'ide' legaque':

—Notno zoa bene' çeza' xe' da' cobe na' yode'en de'exo'. Še gone' ca' gwžiyae'e xe' da' coben' na' xe' de'exon' bitw gac leben len lache' coben'. ³⁷ Na' naca' zoa bene' chgue'e vino cobe lo' bzod yide'exo', le' vino coben' chšon' yide'exon' na' laje vino na' yesebiayi' chopen. ³⁸ Cheyala' yesegue'e vino coben' lo' yid cobe cont bibi gaquen. ³⁹ Na' ca' nac bene' baç yolagüe' che'eje' vino golen', bitw ye'nde' ye'eje' vino coben', san že': “Vino golen' nacchen güen.”

6

Bene' ca' zjanaque' Jesúsen' txen goseleçhje' trigon' gosagüen' ža che Dios
(Mt. 12:1-8; Mr. 2:23-28)

¹ Na' to ža nac ža čhe Dios, Jesúsen' gwdie' gan' nyaž trigw len bene' ca' zjanaque' le' txen. Nach bene' ca' zjanaque' le' txen goselechje' trigon' na' gosexoben' gosagüen'. ² Na' besele'e bał bene' fariseon' can' gosone' na' gose'e le'gaque':

—¿Bichen' chonle da' bi de lsens goncho ža čhe Dios?

³ Na' Jesúsen' gože' le'gaque':

—¿Biña' gwlable can' ben da' rey David to ža cate' le' na' bene' lježe' ca' gosedone'? ⁴ Gwyo'o Davin' liž Dios na' jaxi'e yetextil da' nac čhe Dios da' bi chac gagw bene' bi nac bxož, na' gwdagüen', na' lecze bnežjue' čhe bene' zja'ac len le'.

⁵ Na' lecz ca' gwna Jesúsen':

—Naquen lo na' nia' bi da' nac güen goncho cate' nac ža čhe Dios, neda' naca' ben' gwsela' Diosen' golja' benačh.

Beyac to bene' nxo'on šla'a taque'
(Mt. 12:9-14; Mr. 3:1-6)

⁶ Na' yeto ža čhe Dios gozeje' lo' yodaon' na' bsed blo'ede' bene' ca' že'na'. Na' ladjo bene' ca' zjaže'na' yo'o to bene' nxo'on taque' liča. ⁷ Na' bene' ca' chososed chosolo'e dan' bzoj da' Moisés na' bene' fariseo ca' chosogüia chese'e Jesúsen' še yeyone' bena' ža čhe Dios cont de da' yosode'ede' yesagüe' xya čhe'. ⁸ Na' gočbe'e Jesúsen' can' chesone' xbaben', na' gože' ben' nxo'on taque':

—Gwžoža' na' gwzecha nga gachol.

Nach bena' bžine' gwzeche' lagüen'. ⁹ Na' Jesúsen' gože' bene' ca' že'na':

—¿Bi da' cheyala' goncho ža čhe Dios? ¿Goncho da' güen, še goncho da' mal? ¿Cheyala' yoslacho bene', še gwžiyi'chone'?

¹⁰ Jesúsen' gwne'e yogo'te ben' že'na', nach gože' ben' nxo'on taque':

—Bli naon'.

Nach blien' na' taquen' beyaquen binlo. ¹¹ Na' bene' ca' chososed chosolo'e leyna' na' len bene' fariseon' leca beseže'e na' gwzolao bosoxi'e nacle yesone' len Jesúsen'.

Jesúsen' gwleje' šiziw postlw
(Mt. 10:1-4; Mr. 3:13-19)

¹² Na' to ža gwyej Jesúsen' to lo ya'a jel güiže' Diosen'. Na' do yel be'lene' Diosen' diža'. ¹³ Na' cate' gwye'ni', goxe' bene' ca' zjanaque' le' txen, nach gwleje' šizinue' na' bsi'e le'gaque' postlw. ¹⁴ Bene' qui gwleje': Simón ben' bsi'e Pedro, na' bene' biše' Andrés, na' Jacobo, na' Juan, na' Felipe, na' Bartolomé, ¹⁵ na' Mateo, na' Tomás, na' Jacobo xi'in Alfeo, na' Simón ben nac cananista, ¹⁶ na' Judas bene' biše' Jacobo, nach Judas Iscariote ben' bdie' Jesúsen' lo na' bene' chesege'ede' le'.

Jesúsen' bzejni'ide' bene' zan
(Mt. 4:23-25)

¹⁷ Na' beyetje' lo ya'an len le'gaque' na' gwzeche' ga nac to laše' len bene' ca' zjanaque' le' txen. Na' lecze nita' bene' zan bene' za'ac doxen Judean', do ciuda Jerusalénna' na' do gan' mbane yež ca' zjanzi' Tiro na' Sidón. Na' Tiro len Sidón zjachin' cho'a nisdao'. Na' len bene' ca' nita' chosoznague' xtiža' Jesúsen' zjančixe bał bene' chese'e yižgüe'. Na' Jesúsen' beyone' le'gaque'. ¹⁸ Na' bene' ca' zjajo'o zjanyaz da' xigüen' yičhjlazda'ogaque', Jesúsen' bebejen'. ¹⁹ Na' yogo' bene' goseyiljue' nacle yesone' cont yeselapa' na'gaquen' le', le gosenezde' nape' yela' guac cont yega'a yižgüe' čhegaquen' še yeseche'ne'.

*Non' zoa mbalaz na' non' cbi zoa mbalaz**(Mt. 5:1-12)*

²⁰ Na' Jesüsen' gw̄lis lagüe' gw̄ne'e bene' ca' zjanaque' le' txen na' gože' legaque'.

—Mbalaz zoa le'e bene' yaše', le'e chzenagle che Diosen' cont chnabi'e yichjlažda'olen'.

²¹ 'Mbalaz zoa le'e chdonle na'a, gwžin ža cate' bich tonle.

'Na' mbalaz zoa le'e chbežle na'a, gwžin ža cate' gwxižle.

²² 'Neda' naca' ben' gwseła' Diosen' golja' beñač. Na' mbalaz soale še dan' chejnilaže'le neda' chesegue'e bene' le'e, na' chesyebile' le'e lo' yodao' chegaque', na' cheseneye'e chele, na' chesene' nacle bene' mal. ²³ Le yebchgüe cate' chac da' quinga, na' le soa mbalaz, le Diosen' gone' cont gacchgua da' güen chele cate' yežinle gan' zoe'na'. Can' chesonde' le'e, ca'czen' goson da' xozxta'ogaque' len da' bene' ca' goso'e xtiža' Diosen' cani'.

²⁴ 'Na' nyaše'chguaze nac le'e bene' gwni'a. Chac güen chele na'a, perw gague toli tocanen' gac chele ca'.

²⁵ 'Nyaše'chguaze nac le'e dechgua da' chagwle na'a. Gwžin ža cate' bich bi gata' chele.

'Nyaše'chguaze nac le'e chxižle na'a. Gwžin ža cate' yegüine'le na' cuežyaše'le.

²⁶ 'Nyaše'chguaze nac le'e chesonxen yogo'lol bene' le'e. Ca'czen' goson da' xozxta'ogaque', gosonxene' bene' ca' goseziye'e gosene' cheso'e xtiža' Diosen' cani'.

*Cheyala' gaquecho bene' chesegue'ede' chio'**(Mt. 5:38-48; 7:12)*

²⁷ 'Le'e chzenagle chia', cheyala' gaquele bene' chesegue'ede' le'e. Cheyala' gonle da' güen len bene' ca' chesegue'ede' le'e. ²⁸ Le nab cont bene' chesegue'ede' le'e nite' mbalaz. Le soa le nabe Diosen' gaclene' bene' chososaca'zi' le'e. ²⁹ Še to bene' chaze' šla'a xaga'le, le güe' dan' yešla'a. Še to bene' que'e xadon chele, le güe' latje lechje' len xcamisle. ³⁰ Note'teze bene' bi dan' nabde' le'e, le gwnežjon. Še to bene' que'e bite'teze da' de chele, bitw yenablen. ³¹ Con yogo' da' güen da' chaclaže'le yeson beñačen' len le'e, lecze ca' cheyala' gonle len legaque'.

³² 'Še chaquele šinze bene' chacde' le'e na' bi chaquele bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. ³³ Lecze še chonle da' güen len bene' ca' cheson da' güen len le'e na' bi chonle güen len bene' yoble, žbixchen' chaquele chebe Diosen' can' chonle? Ca'cze cheson bene' güen da' mal ca'. ³⁴ Še chbejle bi da' chbejle len bene' chaquele yesyeyonen' le'e, žbixchen' chaquele chebe Diosen' can' chonle? Ca'cze cheson bene' güen da' mal ca', chesebeje' bi dan' chesebej ležzgaque', na' nite' lez yosyonežjuen'. ³⁵ Perw na' le'e, le soa le gague bene' chesegue'ede' le'e, na' le soa le gon da' güen. Na' le soa le cuej bi dan' cuejle, perw bitw soale lez yesyeyonen'. Še gonle ca' dan' ba gwnia' le'e, gwlo'ele nacle xi'in Dios ben' nac la'zelagüe bene' blao, na' Diosen' güebi'icze' güen len le'e. Le'na' naque' bene' šagüe' len bene' ca' bi cheso'e yela' choxcen che' na' len yezica'chle bene' güen da' mal ca'. ³⁶ Na' ca' Xacho Diosen' ben' zoa yaba cheyaše' cheži'ilaže'de' yogo' beñačen', ca'cze cheyala' yeyaše' yeži'ilaže'le ljež beñačlen'.

*Bitw zaca'cho nacho bene' zjanape' dol'a'**(Mt. 7:1-5)*

³⁷ 'Bitw gonle xbab zaca'le nale bene' zjanape' dola'. Še nale che bene' zjanape' dola', ca'cze Diosen' ne' le'e nape dola'. Na' bibi yosbaga'le bene' cont Diosen' bibi yosbague'de' le'e. Le soa le yezi'xen che bene' cont Diosen' yezi'xene' chele. ³⁸ Le soa le gwnežjo bi da' gwnežjwle bene' na' Diosen' güeyoncze' chele. Bał bene' leca nala' chosochixe' bi dan' chesote', chosochiše' lao yagarm chęgaquen' na' chesebiben' na' chosozaoya'aten'. Ca'czen' cheyala' gonle gwnežjwle bi dan' cheseyažje bene' na' lecz ca' gon Diosen' len le'e.

³⁹ Nach Jesúsen' be'lene' bene' že'na' to jempl, gwne':

—¿Guaque to bene' lchol cue'e nez yeto bene' lchol? Bi gac. Le nezecho chopte' šjasebixe' to lo' yechw. ⁴⁰ Ca nac cate' to bene' chsede' len to maestrw, bi nacho naque' bene' blaoch ca maestra'. Na' la'czla' še ben' chseda' gwda' yichje' yogo'lol dan' blo'e maestron' le', bitw naque' bene' sina'ch ca maestra'.

⁴¹ ¿Bixchen' chna'le beb dao' dan' yo'o lo' yejlaol bene' lježle, na' bi chache'ele naquech beb xen dan' yo'o lo' yejlaolen'? ⁴² Na' še le'e yo'o to da' xen lo' yejlaolen' ¿nacxęchen' che'le bene' lježlen': "Ben yebeja' beb dao' dan' yo'o lo' yejlaguon'?" ¿Bene' güexoayag! Zgua'tec le yebej beb xen dan' yo'o lo' yejlaolen', nach le'ele binlo cont yebejle dan' yo'o lo' yejlaol bene' lježle.

Dan' choncho chlo'en bin' yo'o lo' yichjlažda'ochon'

(Mt. 7:17-20; 12:34-35)

⁴³ 'Bitw nacho to yag frut güen chbian frut da' bi nac güen, na' neca nacho dan' bi nac güen chbian da' nac güen. ⁴⁴ Con can' nac da' chbia to to yaguen' nezecho bi yaga'. Yag yeše' bitw chbian da'na' nzi' yixgüigw. Lecz ca' yag bisga'a bi chbian uvas. ⁴⁵ To bene' laždao' ži'ilaže' chone' da' güen, le ca ža lo' yichjlažda'ogüe' nan' chone'. Na' ben' chon da' mal, chone' ca' lagüe dan' chzenague' che laždao' xi'a che'na'. Na' yogo'te diža' dan' chchoj cho'achon', lo' yichjlažda'ochon' nan' za'aquen.

Chope bene' na' yo'o da' chon to toe'

(Mt. 7:24-27)

⁴⁶ ¿Bichen' che'le neda': "Xana'", na' bi chonle can' nona' mandadw? ⁴⁷ Na'a nia' nac zaca'lebe bene' nao' neda' na' chzenague' xtiža' na' chone' can' nona' mandadw. ⁴⁸ Naque' ca to bene' ben yo'o na' gwche'ene' sitjw gwleque' lene yo'on da' nac da' gual. Cate' betjchgua yegw gwyechjen liže'na', na' bitw bebixen cuiayin', le gwzoachachchguan. ⁴⁹ Na' yogo' bene' chende' xtiža'na' na' bi chone' can' žia'na' naque' ca yeto bene' ben yo'o, con benen' lo yo na'ze na' bibi lenen gwleque'. Na' cate' betjchgua yegw gwyechjen liže'na', na' bebixen gwžiayi'te yo'on.

7

Jesúsen' beyone' xmos to xan soldadw

(Mt. 8:5-13)

¹ Na' cate' beyož be' Jesúsen' diža' len bene' ca', beyeje' yež Capernaum. ² Na' zoa to xan soldadw bene' bitw naque' bene' Israel. Na' zoa to xmos'e' chacšengüede', na' yelez ba de' par gate'. Na' xan soldadon' chacchgüede' le'. ³ Na' cate' xan soldadon' bende' diža' che Jesúsen' gawsele' bał bene' gole blao che bene' Israel cont jasenabde' Jesúsen' šeje' liže' yeyone' xmos'e'. ⁴ Nach cate' besežine' gan' zoa Jesúsen', gosenabde' le' gaclene' xan soldadon'. Na' gose'e Jesúsen':

—Xan soldadon' naque' to bene' zaque' gacleno', ⁵ le chacde' chio' bene' Israel, na' le' bene' yodao' cheto' nga len xmechue'.

⁶ Nach gwyej Jesúsen' len legaue', perw za' yesežine' liže'na' cate' gwsela' xan soldadon' bal' bene' migw che' lao Jesúsen' na' gose'ene':

—Xan soldadon' že' bitw gwša'a yichjo' yido' liže'na', le nezde' bitw zaque' cont šo' liže'na'. ⁷ Da'nan' bitw beyaxjde' yide' nabde' le' gacleno'ne'. Con che'nde' gonšco' mandadw yeyaue' xmoše'na'. ⁸ Xan soldadon' že' zoa bene' chnabia' le' perw lecze nita' soldadw che' na' chnabi'e legaue'. Na' cate' che'e toe': "Gwyej", na' cheje', na' cate' che'e yetoe': "Da", na' chide', na' cate' che'e xmosen': "Da' nga gono'", na' chonen'. Na' nezde' con nao' yeyac xmoše'na' na' yeyacde'.

⁹ Na' Jesúsen' cate' bende' diža' dan' gose' bene' migw che' xan soldadon' le', bebande' na' beyechje' gože' bene' zan ca' zjanao' le':

—Žia' le'e ne toze bene' Israel bina' šejnilaže' neda' ca chejnilaže' benga bi naque' bene' Israel.

¹⁰ Nach jaya'ac bene' ca' gwsela' xan soldadon'. Cate' besyežine' liže'na' ba beyaque' xmosen'.

Jesúsen' bosbane' xi'in to no'ole güezebe

¹¹ Jesúsen' gwyeje' to yež dan' nzi' Nain len bene' ca' zjanaque' le' txen na' zan bene' yoble. ¹² Ba zja'aque' gala'ze par yesežine' cho'a puert che yežna' cate' besele'ede' chesechoj xonj bene' cho'a puerten' zjanlene' to bene' guat. Na' ben' goten' naque' bene' tliša', na' xne'en naque' no'ole güezebe. Na' bene' zan bene' lo yeža' zja'aclene' xna' bene' guaten'. ¹³ Na' cate' ble'e Xanchon' no'olen', beyaše'de' le' na' gože'ne':

—Bitw cuežo'.

¹⁴ Nach gwyeje' jaxoa ne'en lo yagla' gan' xoa bene' guata'. Nach bene' ca' zjanlen le' gosebeze'. Na' gože' bene' guata':

—Bene' güego', neda' žia', beyas.

¹⁵ Nach bene' guaten' gwchi'e na' gwzolağüe' benie'. Na' Jesúsen' beyone' le' lo na' xne'e. ¹⁶ Na' yogo'lol bene' ca' besežebe' dan' beban bene' guata' nach gosoxene' Diosen' gosene':

—Ba bla' to bene' blao ga zoacho, bene' choe' xtiža' Diosen', na' Diosen' ba gwsele'ne' cont gaclene' chio' naccho nación che'.

¹⁷ Ca nac dan' ben Jesúsen' gos gwlaļj diža' chen' doxen Judea na' yogo'lol yež ca' dan' zjanita' gala'ze.

Juanna' gwsele' chope ben' gosaque' le' txen gan' zoa Jesúsen' (Mt. 11:2-19)

¹⁸ Nach bene' ca' zjanaque' txen len Juanna' jaseye'lene' le' diža' yogo'lol ca nac dan' chon Jesúsen'. Nach gox Juanna' chope bene' ca' ¹⁹ nach gože' legaue':

—Le šja'ac gan' zoa Jesúsen' na' ye'ne': "žLen' naco' ben' chbezto' sela' Diosen' o še cheyaļa' cuezchto' yid bene' yoble?"

²⁰ Nach bene' ca' chope cate' besežine' gan' zoa Jesúsen' gose'ene':

—Juan ben' chzoa bene' nis gwsele' neto' laguo' nga nabeto' le' še len' naco' ben' chbezto' sela' Diosen' o še cuezchto' yid bene' yoble.

²¹ Šlacte ne' nita' chope bene' ca', Jesúsen' beyone' bene' zan bene' ca' chesacšene' na' bene' chese'ede' yižgüe' gual. Leczbe' bebeje' da' xigüe' da' zjajo'o zjanyaz yichjlaždao' bene' zan. Na' bene' cont besyele'e zan bene'

lchoj. ²² Nach Jesúsen' boži'e xtiža' bene' ca' gwseła' Juanna' lagüe'na', gože' legaque':

—Le šjaya'ac na' le šjayež Juanna' doxen da' ca' ba ble'ele na' da' ca' ba benele. Ba ble'ele chona' cont chesyele'e no bene' lchoj, na' chesyeda no bene' zjanxinj ni'e. Na' lecze bene' gose'e yizgüe' dan' nzi' lepra besyeyacde', na' chesyeyene no bene' cuež. Ba ble'ele bosbana' no bene' guat, na' ba benele choa' diža' güen len bene' yaše' ca'. ²³ Mbalaz zoa bene' chejle'e chia' na' bi chdebde'.

²⁴ Na' cate' besyeya'ac bene' ca' gwseła' Juanna', nach Jesúsen' be'lene' bene' ca' zjandoben' xtiža' Juanna', gože' legaque':

—¿Nacxe nac ben' jale'ele latje dašen'? ¿šayichj šayen chaque'? Bi naque' ca'. ²⁵ ¿Nac naque' caten' jale'elne'? ¿Nyaze' lache' šagüe'? ¿še bitw? le bene' ca' zjanyaz lache' šagüe' na' chesenite' chese'ej chesagwšagüe' na' chesone' legr, bena' nita' yo'o güenchgua, ca no liž bene' gwnabia'. ²⁶ ¿Noxen' jale'ele? ¿Naque' to bene' choe' xtiža' Diosen'? Da' li naque' to bene' choe' xtiža' Dios, perw chnia' le'e, zaca'che' ca note'teze bene' choe' xtiža' Dios. ²⁷ Che benga nyojen le'e Xtiža' Diosen' žan:

Neda' Dios seła' to bene' cuialagüe' laguo' güe'e xtižon'
cont cate' yido' ba nita' bene' yesonxene' le'.

²⁸ Chnia' le'e, notech no benach na' soa bene' naquech bene' blaoch ca Juanna'. Perw na' note'teze bene' gwzenague' che Diosen' cont Diosen' nabi'e yichjlažda'ogüe', la'czla' bi naque' bene' blao, gwžin ža cate' šejni'ichde' chia' cnel ca Juanna'.

²⁹ Ba bzoa Juanna' bene' zan nis na' len bał bene' güechixjw. Na' yogo' bene' ca' gosacbe'ede' Diosen' zejczje' to licha dan' gwsele' Juanna' jatixjue'ede' legaque' yesyetinjde' xtola'gaque'. ³⁰ Perw na' bene' fariseo ca' na' bene' ca' chososed chosolo'e dan' bzoj da' Moisés, goson yichjlaogaquen' cbi besyetinjde' xtola'gaquen' can' goclaže' Diosen'. Bi gosaclaže' gwzoo Juanna' legaque' nis. ³¹ Nach Jesúsen' gože' legaque':

—¿No gwsacalebda' le'e zoale na'a? ¿No chon can' chonlen'? ³² Nacle ca bidao' neče bicze bi de chlebele. Can' zjanac bidao' ca', cate' nita'be' gan' chac ya'a chese' lježbe': “Ba bcuežto' bžejo, neca bya'ale, na' ba biłyaše'to', neca gwchežle.” ³³ Juan ben' chzoa bene' nis bide' laole nga, bitw güe'ej gwdagwšagüe' can' chese'ej chesagw bene' yoble, na' neca güe'ejje' vino, nach gwnale che': “Yo'o nyaz da' xigüen' yichjlažda'ogüe'.” ³⁴ Na' neda', chle'ele che'ej chagua' can' chese'ej chesagw bene' yoble, na' žale chia' naca' bene' lia na' bene' borrašw, neda' naca' ben' gwseła' Diosen' golja' benach. Na' lecze žale naca' migw che bene' güechixjw ca' na' migw che nochle bene' güen da' xinj. ³⁵ Perw na' bene' chosozenag che Diosen' zjanape' to yela' sina' na' chesone' cont nachbia' Diosa' naque' la'zelagüe' bene' sina'.

Jesúsen' gweyje' liž Simón bene' fariseo

³⁶ To bene' fariseo goxe' Jesúsen' šeje' liže' cont yesagüe'. Na' bžin Jesúsen' liž bena' na' gwchi'e cho'a mesen'. ³⁷ Na' to no'ole lo ciudan', no'ole zle', gwnežde' bžin Jesúsen' liž bena'. Na' Jesúsen' len bene' ca' yezica'chle ba nite' cho'a mesen' cont yesagüe', cate' bžin no'olen'. Na' no'olen' noxe' to da' nac de yejese da' yože set da' la'zelaoze chla' zix. ³⁸ Na' jabigue' gala'ze xni'a Jesúsen' na' gwcheže' na' nis xčež chen' bžonen ni'a Jesúsen' gwbsisen. Na' bxie' ni'ena' len yiša' yichje' na' bnopen' na' gwdeben' set zixen'. ³⁹ Na' ben' goxe' Jesúsen' ližen', cate' ble'ede' can' chon no'ola' na' gocde': “Šaca' benga

naque' to bene' choe' xtiža' Dios, guache'ede' no'olen' chgan ni'ena' naque' no'ole zle'". ⁴⁰ Nach Jesúsen' gože'ne':

—Simón, de to da' che'nda' yapa' le'.

Nach Simónna' gože' Jesúsen':

—Gwnan Maestrw.

⁴¹ Jesúsen' gože'ne':

—Gwzoo to bene' na' nita' chope bene' chesale' xmechue'. Toe' chale' gayo' gayoa mechw da' nzi' denario, na' ben' yeto chale' šiyon mechw lecze denario.

⁴² Na' chopte bene' ca' ne toe' ca de chegaque' cont yeseyixjue' xyan'. Na' ben' gwlej mechon' gwlejyichje' dan' chesale' chen'. Gwnašc neda', čnoe' bene' ca' chope' gosacchde' che'?

⁴³ Nach Simónna' gože'ne':

—Šeca ben' goc xya chen' da' xench na' gwlejyichjen'.

Jesúsen' gože'ne':

—Da' li can' ba gwnao'na' naquen.

⁴⁴ Nach Jesúsen' gwyechje' gwne'e no'ola' na' gože' Simónna':

—čChle'edo' no'ole nga? Neda' ba gwyo'a ližo' nga na' bi beño' nis čhib ni'a, perw no'ole nga ba gwdibe' ni'an' len nis xchež chen' bxien' len yiša' yichje'. ⁴⁵ Bi bnopo' neda', perw na' no'ole nga cate' bla'atia' gwzolağüe' chnope' ni'a nga. ⁴⁶ Bi gwdebo' set yichja', perw no'ole nga ba gwdebe' set zix ni'a nga. ⁴⁷ Na' žia' le', xtole'na' gosaquen da' zan, perw ba bezi'xena' che'. Da'nan' chacchğüede' neda'. Bene' bi žinlaže' xtole'na' ca xtoła' no'ole nga, cate' yezi'xena' che' bitw gactecde' neda'.

⁴⁸ Nach gože' no'olen':

—Ba bezi'xena' xtoło'na'.

⁴⁹ Nach bene' ca' chesagw len Jesúsen' txen lo mesen' gwzolaoo chese' lježe':

—čNox benga chacde' le'na' chezi'xene' xtoła' benachen'?

⁵⁰ Nach gož Jesúsen' no'ola':

—Dan' chejnilažo' neda' da'nan' ba de yela' mban čchio' toli tocanē. Beyej to šagüe' to güen.

8

No'ol ca' gosaclene' Jesúsen'

¹ Na' gwdechle gwyej Jesúsa' zan ciuda na' zan yež jatixjue'ede' diža' güen, gwne' Diosen' nabi'e yichjlaždao' bene' yosozenague' che'. Na' zja'aclen bene' šižinw ca' le', bene' ca' zjanzi' postlw. ² Nach to xonj no'ole lecze zja'aclene' Jesúsen' bene' ca' ba beyone'. Bale' ba bebeje' da' xigüe' da' zjajo'o zjanyaz lo' yichjlažda'ogaque' na' yebale' ba beyone'ne' cate' gosacšende'. Na' toe' lie' María bene' Magdala, bebej Jesúsen' gaže da' xigüe' gwyo'o gwyz yichjlažda'ogüe'na'. ³ Nach lecze len ben' le Juana, xo'ole ben' le Chuza, na' Chuzan', gwyo'o lo' ne'e liž rey Herodes na' yežlio che' ca'. Na' lecze len ben' le Susana weyjejlene' Jesúsen', na' yezan bene' yezica'chle. Na' no'ol ca' bosochine' bite'teže da' gota' chegaque' cont bosonežjue' dan' byažje Jesúsen' len bene' ca' zjanaque' le' txen.

Jempl che bene' goz trigon'

(Mt. 13:1-9; Mr. 4:1-9)

⁴ Na' bene' zan besežag gan' zoa Jesúsen' bene' za'ac to to yež ca'. Na' be'e to jempl, gwne':

⁵ —To bene' güen žin jeze' trigw na' šlac zeje' chose' trigon' late' bin jasechazen do cho'a nezen', na' bosolej bosošošj bene' len, na' be žia xil be chaš le'e yaba gosagwban'. ⁶ Yelaten' jasechazen ga nac lo yej, na' cate' beselan' na' gosebizen, le gague bi gopa' den'. ⁷ Yelaten' jasechazen ga nac lo yag yeše', na' gosecha'on txen, na' bosolole' yag yeše' ca' len. ⁸ Perw na' yelaten' jasechazen ga nac yo šagüe' na' beselan', na' balen gosebian to gayoa güjeje.

Na' beyož be'e diža' quinga gwne' zižje gože' legaque':

—Le'e žia nagle da' chene, le gwzenag xtiža' na'.

Jesúsen' gwne' bixchen' bi'e jempl cate' bzejni'ide' bene'

(Mt. 13:10-17; Mr. 4:10-12)

⁹ Nach bene' ca' zjanaque' Jesúsen' txen gosena'bd'e' le' bi zejen jempl da' ba bi'e. ¹⁰ Na' gož Jesúsen' legaque':

—Nono na' neze can' nac yela' gwnabia' che Diosen'. Perw ba chone' cont le'e chejnilaže'lene' nezelen. Perw bene' bi chesaclaže' yesejnilaže'ne', chzejni'igacda'ne' len jempl. Chona' ca' cont yesele'ede' can' chonan' na' bitw yesacbe'ede' bi zejen, na' cont yesende' xtižan' na' bi yesejni'iden'.

Jesúsen' bzejni'ide' bi zejen jempl che bene' goz trigon'

(Mt. 13:18-23; Mr. 4:13-20)

¹¹ Na' ca nac jempl nga zejen quinga: Ca dan' byažen zejen xtiža' Dios. ¹² Na' bin dan' besego'onen chanezen', zejen bene' ca' chesende' xtiža' Diosen', perw na' chžin Satanás dan' chnabia' da' xigüe' ca' chebejen xtiža' Diosen' lo' yichjlažda'ogaque' cont bi yesejnilaže' le' na' bi gata' yela' mban čhegaque' toli tocame. ¹³ Na' bin dan' besego'on ga nac lo yej zjanaquen ca bene' chesyebede' xtiža' Diosen', perw zjanaque' ca to da' bibi loe chon, šložga chesejle'e che xtiža' Diosen', na' cate' chac bi da' mal čhegaque' la' chesebejyichjte' xtižen'. ¹⁴ Na' bin dan' besego'onen ga nac lo yag yeše', zejen ca bene' ca' ba gosende' xtiža' Diosen', perw šlac zjambane' chesela' chesyěžjde' na' chese'nde' yesen'i'e, na' chesede' chesontez'e' con da' žazen čhegaque'. Na' da' qui bi choen' latje yega'an xtiža' Diosen' lo' yichjlažda'ogaque' na' da'nan' bi chesejnilaže' le' ca cheya'la'. ¹⁵ Na' da' ca' besego'onen lo yo šagüen', zejen ca bene' cate' chesende' xtiža' Diosen' chesezi'en chesonen' čhegaque', na' chesejnilaže' le' do yichj do laže', na' chesechejde' bite'tez dan' chac čhegaque' cont chesone' can' che'ne Diosa'.

Jempl che yi' dan' chguala'cho

(Mr. 4:21-25)

¹⁶ Na' Jesúsen' gwne':

—Notno gwguala' to yi' na' gw dosen' to yeso', na' neca gwcuša'e' yin' xan xcame'. San chde'en le'e ze'e cont gwsenin' len yogo'lol bene' yeso'o lo' yo'o.

¹⁷ Le yogo'lol da' ngaše' chia' neda', lenna' gwlo'elaon, na' yogo'lol da' nono na' neze chia', žin ža yeseņezden' na' yesejni'iden'.

¹⁸ Le gwzenag da' quinga da' chzejni'ida' le'e, le note'teze bene' chzenague' xtiža' Diosen' gwzejni'ich Diosen' le', perw na' note'teze bene' bi chzenague', da' daon' chacde' ba nežde', yeca'a Diosen' len.

Xna' Jesúsen' len bene' biše' ca' besežine' gan' zoe'

(Mt. 12:46-50; Mr. 3:31-35)

¹⁹ Na' xna' Jesúsen' len bene' biše' ca' besežine' gan' zoa Jesúsen', gosaclaže' yeso'e, perw catec bene' zan že' gague goc latje yesežine' lagüe' na' ate. ²⁰ Na' to ben' ze na' gože' Jesúsen':

—Xna' o len bene' bišo' ca' zjanite' chyo' o na' chesaclaže' yedesene' e le'e.

²¹ Na' Jesúsen' gože' legaque':

—Bene' ca' chosozenag xtiža' Diosen' na' chesezi'e cho' alao xtižen', bene' can' zjanaque' xna' a na' biša'.

Jesúsen' bcueze' be' bdono' lo nisdao'

(Mt. 8:23-27; Mr. 4:35-41)

²² Na' goc to ža Jesúsen' gwyo'e to lo barcw len bene' ca' zjanaque' le' txen. Na' gože' legaque':

—Łaga' cho yešla' ale nisdaon'.

Nach bosose'e barcon'. ²³ Šlac zejen lo nisen' gwtas Jesúsen'. Nach gwzolao gwyechj to be' bdono' lo nisdaon', na' gwzolao cheyož nis lo' barcon'. Na' besexožde' yesebiaye'e. ²⁴ Nach bosyosbane' Jesúsen' gose'e le':

—iMaestrw! iMaestrw! Bačh chbiayi' cho.

Nach gwyase' na' gwdiłe' be' bdono' len nisdaon', na' la' gosebe' žiten. ²⁵ Na' gože' legaque':

—¿Nacxečen' bi chejle' le chia'?

Nach legaque' besežebe' len besyebande'. Nach gose' lježe':

—¿Noxe benga? lente be' bdono' na' len nisdaon' chosozenaguen che da že'.

To bene' Gadara yo' o nyaze' da' xigüe'

(Mt. 8:28-34; Mr. 5:1-20)

²⁶ Na' besežine' laž bene' Gadara ca', to yež da' chi' šla' a distritw Galilean', laga' cho nisdao'. ²⁷ Na' cate' bechoj Jesúsen' lo' barcoa', to bene' lo yežna' jašague' le'. Ba gwža yo' o nyaz da' xigüen' yichjlaždao' bena'. Na' ba chde' con gague bi xe' chazche', na' bich zoe' liže', con ba zoe' do capsantwle. ²⁸⁻²⁹ Na' bene' gualaž che' ca' bosochėje' ni' a ne' e len gden na' gosape' le'. Na' da' xigüe' ca' gosonen cont bzojx btüne' gdenŋa' zan ni' a. Na' gosonen cont gwyėje' ga nono bene' zjanla'. Na' bena' cate' ble' ede' Jesúsen' na' bzoa xibe' lagüen'. Na' bosye'e zižje gwne':

—¿Bixchen' chgoša' chlaže' chio' len neda', Jesús? Le' naco' dogualje Xi'in Dios ben' nape' la' zelagüe' yela' gwnabia' xen. Chŋeyoeda' le' bi gwsaco' neda'.

Gwne' ca' dan' ben Jesúsen' mandadw yechoj da' xigüen' yichjlažda' ogüen'.

³⁰ Nach Jesúsen' gože' da' xigüen' yo' o nyaz yichjlaždao' bena':

—¿Bi lio'?

Nach da' xigüen' gwnan:

—Legión lia'.

Gwnan ca' le' zjanaquen da' zan zjajo'on yichjlažda' ogüen'. ³¹ Nach da' xigüe' ca' gosata' yoen Jesús'a' bi yeselen' lo yi' gabil. ³² Na' to ya' a da' zoa gala' ze chesaš zan coš chesagwba'. Nach da' xigüe' ca' gosata' yoen Jesúsen' gwnežjue' latje šjaseyo'on yichjlaždao' coš ca'. Na' Jesúsen' bnežjue' latje.

³³ Nach besyechojen yichjlaždao' bena' na' jaseyo'on yichjlaždao' coš ca'. Na' besyeyetjes coš ca' le' e ya' a gan' nita' ba' na' jasełažo' ba' lo' nisdao' ga gosatba' gose' ejba' nis.

³⁴ Na' bene' ca' chosoyoe' cošen' besele' ede' dan' ba goquen' bosyoxonje' jasyeyeže' bene' lagüe yež len bene' chaš yixe', gose' e legaque' can' ba goquen.

³⁵ Nach ja' ac bene' jasene' e bixen' goc. Na' cate' besežine' gan' zoa Jesúsen' besele' ede' bena' ba gwyo'o gwyaz da' xigüen', na' a ba chi' e gala' ze cuit Jesúsen' nyaz xalane', na' ba bezoa yichjlažda' ogüe' bin lo. Na' besežebe'. ³⁶ Na' bene' ca' besele' ede' can' goquen' goso' e diža' che dan' goc che bena' gwyo'o

gwyaz yichjlažda'ogüe' da' xigüen' na' can' ba beyaque'. ³⁷ Nach yogo'loj bene' ca' že' gan' mbane yež Gadaran' jaseta'yoede' Jesúsen' yeze'e lažgaquen', le besežebchgüe'. Nach Jesúsen' beyo'e lo' barcon' cont yeze'e. ³⁸ Na' bena' beyaque cate' Jesúsen' bebeje' da' xigüe' ca' goso'o gosazen yichjlažda'ogüe', gota'yoede' le' gwnežjue' latje šejlene'ne'. Perw Jesúsen' bi be'e latje, san gože'ne':

³⁹ —Beyej ližo' na' jayež bene' lo' yo'o chio' yogo' da' güen da' ba ben Diosen' len le'.

Nach beza' ben' na' gwzologüe' cho'e diža' doxen yežen' yogo' can' ba ben Jesúsen' len le'.

Jesúsen' beyone' xi'in Jairo na' beyone' yeto no'ole bene' gwdane' xe'

(Mt. 9:18-26; Mr. 5:21-43)

⁴⁰ Na' cate' Jesúsen' bełague' nisdaon', bene' zan ba nita' chesebeze' le'. Chesyebechgüede' da' bežine' na'. ⁴¹ Na' bžin to bene' le' Jairo, ben' nac to bene' gwnabia' che yodao' che yežna'. Na' bzoa xibe' lao Jesúsen' gota'yoede' le' šejlene' le' liže', ⁴² le ba zoa gat bi' no'ol che'. Nache' bi' tliša', na' šižinw izguebe'. Na' šlac zej Jesúsen' len le', bene' zan gosebiadi'e le' na' bosochichgüe' le'.

⁴³ Na' len to no'ole ba goc šižinw iz chzoe' gwbaow' na' ba benditje doxen xmechue' len bene' güen rmed ca'. Na' notno goc gon le' rmed. ⁴⁴ Na' gwbiga' no'olen' čože' Jesúsen' na' gwdane' lox xen', nach la' gwlezte gwbaow' dan' zoen'.

⁴⁵ Na' gwna Jesúsen':

—¿Non' gwdan neda'?

Na' ne toe' ca' gosechebe' še ba gosegane' le'. Nach Pedron' len bene' ca' zja'aclen Jesúsen' gose'e le':

—Maestrw, bene' zan bene' za'ac nga chosochie' le' na' chosožigue' le' nile na'le. ¿Bixchen' chnabo' no gwdan xaon'?

⁴⁶ Nach Jesúsen' gože' le'gague':

—To bene' ba gwdane' neda'. Chacbe'eda' ba beyacde' len yela' guac chia'na'.

⁴⁷ Nach no'olen' cate' gocbe'ede' cbi bgaše' dan' benen', nach gwbigue' lao Jesúsen' do chaž chžebe' na' bzoa xibe' lagüe'na', be'e diža' lao yogo' bene' ca' že'na' bixchen' gwdane' le' na' can' goc la' beyactede'. ⁴⁸ Nach gož Jesúsa' no'ola':

—Xi'ina', ba beyacdo' dan' chejnilažo' neda'. Beyej binlo.

⁴⁹ Ne' choe'te Jesúsa' dižan' ca' cate' bžin to bene' gwza' liž Jairo ježe' le':

—Ba got bi' no'ol dao' chion'. Bich gondo' Maestroa' zed.

⁵⁰ Perw cate' bene' Jesúsen', na' gože' Jairo:

—Bitw žebo', con gwyejnilaže' neda' na' yeyaquebe'.

⁵¹ Na' cate' besežine' liž Jairona', Jesúsen' bi be'e latje yeso'o zan bene' ca' zja'aclen le', san Pedro, len Juan, len Jacobo, na' len xaxna' bi' guat na'ze goso'o. ⁵² Na' ba chi'chgua žaš na' yogo' bene' ca' že'na' chesebežchgüe'. Na' Jesúsen' gože' le'gague':

—Bitw cuežle. Biņa' gatbe', san chtasbe'.

⁵³ Na' bosoxiže' gosonle' che' da' zjaņezde' ba gotbe'. ⁵⁴ Perw Jesúsen' bexae' taca' bi' no'ol guaten' na' boł güiže'be' gože'be':

—No'ol dao', beyas.

⁵⁵ Nach bebambe', la' beyastebe'. Na' Jesúsen' bene' mandadw yeso'ebe' da' gagwbe'. ⁵⁶ Na' xaxna'be' besyebanchgüede'. Perw Jesúsen' bene' mandadw bi yeso'e diža' can' goca'.

9

Jesúsa' gwsele' bene' šižinw ca' jasedixjue'ede' xtižen'
(Mt. 10:5-15; Mr. 6:7-13)

¹ Jesúsen' botobe' bene' šižinw ca' gwleje' cont zjanaque' le' txen na' bnežjue' legaue' yela' gwnabia' na' yela' guac cont goc besyebeje' da' xigüe' lo' yichjlaždao' bene', na' lecze ca' besyeyone' bene' ca' chesacšene. ² Na' lecze bene' mandadw šjasedixjue'ede' Diosa' nabi'e yichjlaždao' bene' yosozenag che'. Na' bene' mandadw yesyeyone' no bene' güe'. ³ Na' gože' legaue':

—Bibi goxe'le tnez. Bitw goxe'le xis da' gwčhiše'le, neca gua'le bzod, ne yet, ne mechw, na' bitw gua'le yeto xcamisle. ⁴ Cate' žinle to liž bene', na'ze yega'anle šlac zoale lagüe yeža'; cate'ch yeza'le yeža', cana'ch yeza'le latja'. ⁵ Na' še zoa ga bi yosolebe' le'e, cate' yeza'le na', le cuibe ni'alen' yo bište cont nacia' malen' chesone' bi chosozenague' xtiža' Diosen'.

⁶ Nach bene' šižinw ca' ja'aque' to to yež, na' gate'teze ja'aque' jasedixjue'ede' diža' güen che Jesúsen' na' besyeyone' no bene' güe'.

Ba gosote' Juan ben' bzoa bene' nis
(Mt. 14:1-12; Mr. 6:14-29)

⁷ Na' gobernador Herodes goque' tole bende' yogo'lol da' güen da' chon Jesúsen'. Gocžejlaže', le bał bene' gose'e le' ba beban da' Juan ladjo bene' guat ca'. ⁸ Na' yebałe' gosene' šeca da' Elías ben' be' xtiža' Diosen' cani' ba bela' yežlio nga da' yoble. Yebałe' chesene' yeto bene' be' xtiža' Diosen' cani'te ba bebane' ladjo bene' guat ca'. ⁹ Na' Herodesen' gwne':

—Neda' bena' mandadw gosechogue' yen Juanna', perw žnoxen' chon da' güen ca dan' chesoe' bene' diža'?

Na' gwdiljwlaže' nacle gone' cont le'ede' Jesúsen'.

Bguagw Jesúsen' gayo' mil bene'
(Mt. 14:13-21; Mr. 6:30-44; Jn. 6:1-14)

¹⁰ Na' cate' besyežin postlw ca' gan' zoa Jesúsen' nach gose'e le' can' ba gosonen'. Na' gwčhi'e legacze' na' ja'aque' to latje gan' mbane yež Betsaida. ¹¹ Cate' gosache'e bene' ca' nita' gan' zoa Jesúsen' ba gosa'aque' len bene' ca' zjanaque' le' txen, nach zja'aque' zjana'ogüe' legaue'. Jesúsen' blebe' legaue' na' bsed blo'ede' legaue' Diosen' nabi'e yichjlaždao' bene' yosozenag che', na' beyonde' bene' ca' chesacšene.

¹² Cate' gwzolaog wxoa gwbižen', nach bene' šižinw ca' zjanaque' Jesúsen' txen gose'ene':

—Besela' bene' quinga cont šjaya'aque' ga že' bene' do ranšw na' do yež ca' dan' nyechj mbi'i cont yeseyiljue' ga yesetase' na' yeseyiljue' da' yese'ej yesagüe', le ca nac latje gan' zoacho nga, naquen to latje daš.

¹³ Perw na' gož Jesúsen' legaue':

—Le'e le güe'e da' yesagüe'.

Na' gose'e le':

—Gayo'ga yetextil na' yechopga beł ya'a de checho, lete še si'chon cont gaquen yesagw yogo'lol bene' quinga.

¹⁴ Gosene' ca' le' že' ca' gayo' mil bene' byo, bi cuent no'ol ca' len bidao'. Nach Jesúsen' gože' bene' ca' zjanaque' le' txen:

—Le gon mandadw yesebe' šiyon güej bene' ca'.

¹⁵ Nach gosone' mandadw gosebe' yogo' bene' ca', ¹⁶ na' Jesúsen' gwxi'e gayo' yetextilen' na' chope beł ya'ana', na' gwne'e yabale, be'e yela' choxclen che Diosen' na' bzoxjen' na' be'en bene' šižinw ca' cont goso'e che to to bene'

ca'. ¹⁷ Na' gosagüen' ca' goseļje'. Nach bososse'e šizıw žome len yetextil bixjw na' len late' güeje beļ da' bega'an.

Pedron' gwne' Jesúsen' naque' bene' gwsela' Dios
(Mt. 16:13-19; Mr. 8:27-29)

¹⁸ Na' gozac yeto, bene' ca' zjanaque' Jesúsen' txen zjanite' len le' lchojiže, na' Jesúsen' choļ güiže' Diosen'. Nach gože' legaque':

—¿Bi chesena bene'? ¿Non' naca' neda'?

¹⁹ Na' gose'e le':

—Baļe' chesene' naco' da' Juan ben' bzoe' bene' nis. Na' yebaļe' chesene' naco' Elías ben' be' xtiza' Diosen' cani'. Na' yebaļe' chesene' naco' yeto bene' be' xtiza' Diosen' cani' ben' ba' beban ladjo bene' guat ca'.

²⁰ Nach gože' legaque':

—¿Chixe le'e? ¿No žale naca'?

Na' gož Pedron' le':

—Len' naco' Cristo ben' gwlej Diosen' cont yedenabi'o.

Jesúsen' gwdixjue'ede' gate'
(Mt. 16:20-28; Mr. 8:30-9:1)

²¹ Nach Jesúsen' gože' legaque' nono yese'e naque' ben' gwlej Diosen' cont yedenabi'e. ²² Na' gože' legaque':

—Da' zan da' saca'zi'a, neda' naca' ben' gwsela' Dios golja' beņach. Na' bene' gole bla' ca' chesenabia' naci'ón chechon' na' b'xoz gwnabia' ca', na' bene' ca' chososed chosolo'e ley dan' bzoj da' Moisés, bi yesele'ede' neda' güen dan' bi goseļe'e chia', na' yesote'nda', perw yeyoņ ža yebana' ladjo bene' guat ca'.

²³ Nach gože' yogo' bene' ca' zjanaque' le' txen:

—Note'tez bene' še chaclaže' gague' neda' txen, cheyaļa' cuejyichj cuine' yogo' ža, la'czla' saca'zi'e, na' gone' can' nia' neda'. ²⁴ Note'tez bene' chacde' gone' cont bi saca'zi'e o cont nono yesot le', benan' cuiayi'. Na' note'teze bene' chzanlaže' cuine' saca'zi'e o gate' ne' chia' neda', ba de yela' mban che' toļi tocaņe. ²⁵ ¿Bixe zejenna' to bene' nabi'e doxen yežlion' še cuiaye'e na' bi gata' yela' mban che' toļi tocaņe? ²⁶ Na' note'tez bene' še cheto'ede' par ye'e lježe' chejnlaže' neda' na' še cheto'ede' par gwzenague' xtiza'n, lece' ca' neda' yeto'eda' che' par nia' naque' neda' txen, neda' naca' ben' gwsela' Diosen' golja' beņach. Yeto'eda' che' cate' yida' da' yoble nsa'a yela' zaca' juisyw chia' na' yela' zaca' juisyw che' Xa' Diosen' na' che' ben' zjanac angl che'. ²⁷ Da' li žia' le'e, balle nita'le nga' na'a biņa' gatle cate' žin ža le'ele gwlo'e Diosen' yela' gwnabia' chen'.

Jesúsen' goque' ca' to be'ni'
(Mt. 17:1-8; Mr. 9:2-8)

²⁸ Nag goc to xman gwna Jesúsen' ca', gweje' to lo ya'a jeļ güiže' Diosen' na' gwche'e Pedro len Juan len Jacobo. ²⁹ Na' šlac choļ güiže' Diosen' goc cho'alagüen' ca' da' bža'. Na' xaļanen' beyaquen šiš xila' na' goctiten. ³⁰ Na' lo hora' besežin chop bene' gan' zoa Jesúsen', toe' da' Moisés na' yetoe' da' Elías bosošaljlene' le'. ³¹ Goso'e diža' gosene' ba zoa gat Jesúsa' Jerusalén. Na' be'ni' che' Diosen' gwechjen bsenin' legaque'. ³² Na' Pedron' len bene' ca' yechope leca gosac ša tase' perw bi gosetase' na' bešele'ede' Jesúsen' chactit cho'alagüen' na' zeche' choe'lene' da' Moisés' len da' Elíasen' diža'. ³³ Na' cate' ba cheza' da' Moisés' len da' Elíasen', Pedroa' gože' Jesúsen':

—iMaestrw, leca güenna' zoacho nga! Gonto' šone ranšw, to chio', to che Moisés, na' yeto che' Elías.

Con gwne' ca' sin ca bene' xbab. ³⁴ Ne' choe'te Pedron' diža' cate' to bejw gwyechjen legaque' na' besežebe' lagüe dan' goc ca'. ³⁵ Na' lo' bejon' gosende' gwne' Diosen', gwne':

—Benga Xi'ina' ben chacda'. Le gwzenag che'.

³⁶ Na' cate' beyož gwna Diosen' ca', besele'ede' yetoze Jesúsén'. Na' ca' beyoža' bibi diža' gosoe'lene' bene' ca' yezica'chle can' nac dan' ba gosende' na' dan' ba besele'ede'. Con gosenita'teze' šižize.

Beyon Jesúsén' to bi' gwyo'o gwyaz da' xigüe'
(Mt. 17:14-21; Mr. 9:14-29)

³⁷ Na' beteyo cate' ba besyeyetje' ya'ana' bene' zan jasešague' legaque' gan' nite'na'. ³⁸ Na' toe' gwne' zižje, gože' Jesúsén':

—Maestrw, chata'yoeda' le' gaclenšco' xi'ina' nga. Nache' xi'ina' tliša'.

³⁹ Chniz da' xigüen' lebe' na' la' chgosya'aten lebe', chonen cont chazbe' šon na' cont chžia bžina' cho'abe' na' chonen lebe' zi', na' cane chsanen lebe'.

⁴⁰ Ba gota'yoeda' bene' ca' zjanaque' le' txen cont yesyebeje' da' xigüen' yo'o nyazbe', perw bitw gosezaque'de'.

⁴¹ Nach Jesúsén' gože' bene' ca' že' na':

—!Le'e bene' bi chejnilaže', chonchgual clele! žšna chyažjen soalena' le'e cont šejnilaže'le? žBatca' zelao na'lagua' le'e?

Nach gože' xa bidao'na':

—Ben bidao' chion' nile.

⁴² Na' šlac zjasane'be' lao Jesúsén', da' xigüen' benen cont gwyazbe' šon, na' bchix btole' lebe' lo yo. Na' Jesúsén' gwdile' da' xigüen' cont bechojen lo' yichjlažda'obe'. Nach beyaquebe'. Gwdena' beyone'be' lo na' xabe'. ⁴³ Na' yogo' ben' že'na' besyebande' cate' besele'ede' yela' guac che Diosen'.

Da' yoble Jesúsén' gwdixjue'ede' gate'
(Mt. 17:22-23; Mr. 9:30-32)

Na' besyebande' che yogo'lo' dan' chon Jesúsén', na' šlac nite' ca', Jesúsén' gože' bene' ca' zjanaque' le' txen:

⁴⁴ —Le gon cont diža' nga šo'on yichjlažda'ole, na' bi ganlaže'len. Neda' gaca' lo na' ben' chesegue'enda', neda' naca' ben' gwseła' Diosen' golja' benač.

⁴⁵ Perw legaque' bitw gosejni'ide' diža' dan' be' Jesúsén', le naquen ca to da' ngaše' len legaque'. Na' besežebe' yeseñabde'ne' bi zejen dan' gože' legaquen'.

Gosacyože' noe' nacch blao
(Mt. 18:1-5; Mr. 9:33-37)

⁴⁶ Na' bene' ca' zjanaque' Jesúsén' txen gosacyože' noe' nacch blao. ⁴⁷ Jesúsén' gocbe'ede' xbab dan' chesonen', na' bežue' to bidao' na' bzeche'be' cuite'na' ⁴⁸ na' gože' legaque':

—Note'teze bene' chone' güen len to bidao' ca' bi' nga neche' da' chejnilaže' neda', choncze' güen len neda'. Na' note'teze chon güen len neda' choncze' güen len Dios ben' gwseła' neda'. Na' note'tez le'e cate' chonle' xbab che cuinle' bibi zaca'tecle, canan' ba nacle bene' blao.

Bene' bi chon contr chio' txenczen' chone' len chio'
(Mr. 9:38-40)

⁴⁹ Nach Juanna' gože'ne':

—Maestrw, bežagto' to bene' cho'e lao' na' chebeje' da' xigüe' da' yo'o nyaz bene'. Na' bžonto' gone' ca', le bi chone' chio' txen.

⁵⁰ Nach Jesúsén' gože'ne':

—Bitw gwžonle gone' ca', le še to bene' bi chone' contr chio', txenczen' chone' len chio'.

Jesúsen' gwdile' Jacobo len Juan

⁵¹ Na' lagüe' ba zoa bagwze yezi' yeca'a Diosen' le', behoglaže' šeje' Jerusalén. ⁵² Na' gwsele' to chope bene' gosebialao lagüe'na'. Na' ja'aque' to yež gan' mbane distritw Samaria cont šjasesini'e gan' soa Jesúsen' len bene' ca' zjanaque' le' txen. ⁵³ Perw bene' Samaria ca' bi bosolebe' Jesúsen' len bene' ca' nžague', le gosache'ede' zja'aque' Jerusalén. ⁵⁴ Na' chope bene' ca' zjanaque' Jesúsen' txen, Jacobon' len Juanna', cate' besele'ede' can' goson bene' Samaria ca', nach gosenabde' Jesúsen':

—Maestrw, Źche'ndo' gonto' can' ben da' Elías ben' be' xtiža' Diosen' cani', nabeto' Diosen' sele' yi' gwzeyen bene' qui?

⁵⁵ Nach Jesúsen' gwyečhje' gwdile' legaue' gwne':

—Le'e bitw nezele non' chnabia' yichjlažda'ole. ⁵⁶ Neda' bitw za'a cont gwžaiya'a beňaç, san za'a cont gwnežjua'ne' yela' mban toli' tocañe, neda' naca' ben' gwseła' Diosen' golja' beňaç.

Nach ja'aque' yež yoble.

Can' gož Jesúsen' bene' ca' gosaclaže' yesaque' le' txen (Mt. 8:19-22)

⁵⁷ Šlac zja'aque' na', to bene' gože' le':

—Sa'lena' le' gate'teze šejo'.

⁵⁸ Nach gož Jesúsen' le':

—Nita' xišna' beza' na' lecz chesyežin xišna' be dao' ca' zjazoa xil be chaš le'e yaba, perw bibi xišna' neda' de ga yezi'laža', neda' naca' ben' gwseła' Diosen' golja' beňaç.

⁵⁹ Nach Jesúsen' gože' yeto bene':

—Yo'o len neda'.

Perw bena' gože' le':

—Xana', za' got xa'. Beňšca latje zgua'tec šjaycuaša'ne'.

⁶⁰ Na' gož Jesúsen' le':

—Bene' ca' zjanac yichjlažda'ogüe' ca che bene' guat, legaue' guaccze yosocuaše' yezica'chle bene' guat. Perw le', jatixjue'e bene' Diosa' nabi'e yichjlaždao' bene' yosozenague' che'.

⁶¹ Nach lecze yetoe' gože' Jesúsen':

—Sa'lena' le' Xana', perw zgua'tec šjayzenda' xaxna'a len diaža chia'.

⁶² Jesúsen' gože' le':

—Bene' ba gwzolaog nagüe' neda', še bi ze'e do yichj do laže', o še yo'o yichje' da' ba gwdele, bi zaque' gone' xšin Diosen'. Naque' ca to bene' chne'e coscože'le šlac chgua'añe' go'n.

10

Jesúsen' gwsele' gayonši bene' šjasedixjue'ede' xtiže'

¹ Na' gwdechle Xancho Jesúsen' gwleje' yegayonši bene' na' bene' mandadw yesebialagüe' šja'ac chope güeje' to to yež ga za' šej le'. ² Na' cate' za' yesa'aque' gože' legaue':

—Chyažje bene' zan yeseyixjue'ede' xtiža' Diosen', perw to chopga bene' nita' yeseyixjue'eden'. Na' bene' yosozenag che Diosen' zjazaca'lebe' ca to coseš xen da' chyažje yedobe. Da'n'an' le nabe Xancho Diosen' sela'che'

bene' yesaclene' chio' yotobcho coseš čhen'. ³ Le šja'ac, le neda' chsela' le'e šjatixjue'ele xtižen' len bene' ca' chesegue'ede' le'e. Zaca'leble ca xila' dao' ben' chja'ac gan' že' beco'yo. ⁴ Bitw gua'le bzod, ne mechw, ne yel, na' bi šele guaple bene' tiox bene' yežagle chanez. ⁵ Note'tez liž šo'le zgua'tec nale: "Čhnablaže'šca' soa cuezle binlo len xbab dan' yo'o lo' yichjlažda'ole, le'e nita'le nga." ⁶ Na' še zoa to bene' chaclaže' soa cueze' binlo len yichjlažda'ogüe'na', nach gac can' gwnablaže'le cont soa cueze' binlo; perw še nono zoa bene' chaclaže' soa cueze' binlo len yichjlažda'ogüe', bi gac dan' ba gwnablaže'len'. ⁷ Na' lo' yo'o na'teze yega'anle. Bitw tale to to yo'o. Le ye'ej le gagw bite'teze da' chesone' ye'ej gagwle. Ca to bene' güen žin cheyala' si' laxjue', lecz ca' le'e zaca'le yesone' da' ye'ej gagwle. ⁸ Na' cate' žinle to yež ga chesonxene' le'e, le ye'ej le gagwteze da' yesone' le'e. ⁹ Le yeyon bene' güe' bene' nita' yež gan' žinle, na' le' ye'e: "Ba bžin ža gwzenagle che Diosen' cont nabi'e yichjlažda'ole." ¹⁰ Perw na' cate' žinle to yež ga bi yosolebe' le'e, le šja'ac la cay na' le ye'e: ¹¹ "Bište che lažle nga da' žia ni'ato', cuibton' cont gwlo'eto' le'e malen' chonle bi chzenagle xtiža' Diosen' dan' choe'to'. Perw chyixjue'eto' le'e Diosen' chazlaže' gwzenagle che' cont nabi'e yichjlažda'olen'." ¹² Da' mal xen goson bene' ciuda Sodoma cani', perw žia' le'e, žan' gac juisyw bene' ca' bi bosolebe' le'e ližen', yesa'le'chde' clcl ca bene' Sodomān'.

Bene' ca' bi chosozenag xtiža' Jesúsen'

(Mt. 11:20-24)

¹³ Nach gozna Jesúsen':

—jNyaše'chguaze gac che le'e bene' Corazín! jNyaše'chguaze gac che le'e bene' Betsaida! Bene' ca' nita' Tiro na' Sidón ba' besyetinjde' xto'la'gaque' šaca' blo'egacda'ne' yela' guac chia' ca da' ba blo'eda' le'e. Na' bosose'e ca gosone' šaca' bena' ca', chesazlje' to lache' gasj da' naquen zeše' na' chosože'elja cuine' no de cont yesacbe'e bene' ba boša' yichjlažda'ogüen'. ¹⁴ Saca'zi'chle clcl ca bene' že' Tiro na' Sidón cate' žin ža gac juisyw. ¹⁵ Le'e nita'le yež Capernaum chonle xbab šeca Diosen' gončgüe' le'e yela' bala'an. Bi gone' le'e yela' bala'an san gone' le'e castigw to'li toca'ne dan' bi chejle'le chia'.

¹⁶ Nach Jesúsen' goze'e bene' gayonši ca':

—Bene' gwzenag xtiža'len' lecze gwzenague' xtiža'na', na' bene' gonzce yichjlagüe' bi gwzenague' xtiža'len', lecze bi gwzenague' chia' neda'. Na' bene' gonzce yichjlagüe' bi gwzenague' xtiža'na', lecze bi gwzenague' xtiža' Diosen' ben' gwsela' neda'.

Besyěžin bene' gayonši ca'

¹⁷ Bene' gayonši ca' cate' beyož jasedixjue'ede' xtiža' Jesúsen', besyěžine' gan' zoen' na' besyebegüede'. Nach gose'e Jesúsen':

—Xanto', chebechgüeto' can' goquen', le da' xigüe' ca' chosozenaguen čheto' cate' chonto' mandadw yesyechojen lo' yichjlaždao' bene' choe'to' lao'.

¹⁸ Na' gože' le'gaque':

—Ble'eda' bedao'nez gwnit yela' gwnabia' che Satanásen' dan' chnabia' da' xigüe' ca'. ¹⁹ Ba beña' le'e yela' guac cont gwlej gwšošje no be'lnia na' no bęjoni' na' cont soele Satanásen' bi gonen le'e gan. Na' bibi de da' gonen le'e zi'. ²⁰ Perw bi yebele neche da' xigüen' chosozenaguen chele, san le yebe da' ba bzoj Diosen' lala le'e libr gan' nyoj la yogo'lo' xi'ine' ca'.

Bebechgüe Jesúsen'

(Mt. 11:25-27; 13:16-17)

21 Za' beyoŕte gwna Jesúsen' ca' nach ben Spiritw che Diosen' cont be-bechgüede' na' boł güiže' Diosen', gwne':

—Xa', le' chnabi'o bene' ca' že' yaba na' yežlion'. Na' chona' yela' choxcen chio' ba bzejni'ido' bał bene'. Ba bzejni'ido' bene' ca' gosacbe'ede' cheseyažjde' no gwsed gwlo'e legaque'. Na' bitw bzejni'ido' bene' ca' cheson xbab zjanaque' bene' sina' na' bene' zjanejni'i. Beno' ca' Xa', le can' gwyazlažo'.

22 Nach gože' bene' ca' že'na':

—Xan' ba bene' lo na' chona' cont chombia' bene' le'. Le' nombia'yane' neda', na' neda' nombia'yana' le'. Na' bene' ca' ba gwleja' ba zjanombi'e Xan'. Na' nono nochle zjanombia' Xa' ne neda'.

23 Na' gwyechj Jesúsen' gwne'e bene' ca' zjanaque' le' txen na' gože' legaque':

—Mbachgua zoale chle'ele neda' na' chle'etele da' ca' chona'. 24 Na' chnia' le'e zan bene' ca' goso'e xtiža' Diosen' cani' len bene' zan rey gosaclaže' yesele'ede' dan' chle'ele na'a, perw bitw goła' yesele'eden', na' gosaclaže' yesende' dan' chenelen', perw bitw goła' yesenden'.

Jempl che to bene' güen, bene' Samaria

25 Na' gwwoža' to bene' nsedchgüe' ley dan' bzoj da' Moisés, goclaže' cueje' Jesúsen' diža' da' gwchine' contr le' na' gože'ne':

—Maestrw, žbi da' cheyała' gona' cont gata' yela' mban chia' toli tocaņe?

26 Na' gož Jesúsen' le':

—Žbi nyoj le'e leyna'? ŽNac žan?

27 Na' ben' chejni'ichgüe' leyna' boži'e xtiža' Jesúsen', gože' le':

—Ley che Diosa' žan: "Cheyała' gaquecho Xancho Diosen' con ca zelao chejni'icho, do yichj do laže'cho, do fuers valor checho, na' gaque lježcho ca chaque cuincho."

28 Nach gož Jesúsen' le':

—Da' licze can' ba gwnao'na'. Can' cheyała' gono' cont bano' toli tocaņe.

29 Na' bena' goclaže' gwlo'ede' choncze' can' ža leyna', na' gože' Jesúsen':

—ŽNon' nac bene' lježa' ben' cheyała' gacda'?

30 Na' Jesúsen' gože' le':

—To bene' beza' Jerusalén par yežine' yež Jericó, jasyxen bene' gwban le'. Na' goseyine' xałane' na' gosot goseyine' le'. Nach besyeya'aque' bosocua'ane' le' cacze to bene' guat. 31 Na' to bxož che bene' Israel ca' gwdie' lo neza', na' cate' ble'ede' bena' dena', nach gwcuase' to šla'ale neza' na' con gwdeze'.

32 Lecz ca' ben to diaža che da' bene' Levi' ca'. (Xi'in diaža che da' Levi' yo'o lo na'gaque' chesone' mandadw lo' yodao' blao.) Bena' zeje' tnez na' cate' ble'ede' ben' dena', na' gwcuase' to šla'ale neza' na' con gwdeze'. 33 Nach to bene' Samaria ngüe'e neza' nlague' xpurrue' na' bžine' gan' de' bena', perw na' le' cate' ble'ede' ben' beyaše'laže'. 34 Na' gwbigue' gan' de' na' bene' le' rmed, bšone' set len vino lao güe' che'na' na' bchejen' lache'. Na' božie' le' cože' xpurrue' na' beče'e le' ga zoa to mesón ga gwne'e le'. 35 Na' beteyo cate' beza' bene' Samaria, gwleje' mechw da' zaca' ca' chop ža žin na' bnežjuen' xan mesónna' ca' laxjue', na' gože' le': "Gwņa' bengā na' še žan bichle da' gono' gastw na' chixjuan' cate' zeza'a."

36 Beyož be' Jesúsen' diža' can' goc che ben' jasyxen bene' gwban ca', nach gože' bena' chsed chlo'e leyna':

—ŽNac chono' xbab? ŽNo bene' ca' šone' gocde'ne' ca' bene' lježe'?

37 Nach bena' chsed chlo'e leyna' gože' Jesúsen':

—Bena' beyaše' beži'ilaže'de' bena' jasyexen gwban ca'.
 Nach gož Jesúsen' le':
 —Lecze ca' cheyała' gono' le', yeyaše' yeži'ilaže'do' yogo'loł bene'.

Jesúsa' jane'e Marta na' María

³⁸ Na' gosego'ochē' nez na' besyežine' to yež ga zoa to no'ole lie' Marta, na' Jesúsen' gwyeje' liže'na'. ³⁹ Na' zoa to bile' le' María. Na' Marían' gwch'i'e cuit Jesúsen' bzenague' xtiže'na'. ⁴⁰ Perw na' Martan' belalchgüede' bsini'e da' yesagüe'. Na' gwyeje' lao Jesúsen' na' gože' le':

—Xana', ¿bi chacdo' median can' bcua'an bene' bilan' neda' toza' len mandadua'? Benšca mandadw gaclene' neda'.

⁴¹ Xancho Jesúsen' gože' le':

—Marta, ch'chgua yichjo' mandadua' na' chacžejlažo' dan' nyanchguan.

⁴² María nga ba gwleje' da' naquech da' güen. Ch'i'e chzenague' chia', na' notno gwžon gone' ca', le len da' nacch da' žialao da' cheyała' gonle.

11

Jesúsen' blo'ede' can' yosoł güiže' Diosen'

(Mt. 6:9-15; 7:7-11)

¹ Na' gwzoa Jesúsa' to latje chol güiže' Diosen'. Cate' beyož bol güiže'ne' to bene' ca' zjanaque' le' txen gože' le':

—Xanto', bzejni'i neto' nac cheyała' yol güižto' Diosen', can' bzejni'i da' Juanna' bene' ca' gosaque' txen len le'.

² Na' Jesúsen' gože' le'gaque':

—Cate' yol güižle Diosen', quinga nale:

Xato' bene' zoa yaba,
 chnabto' yogo'loł bene' yesonxene' le'.

Zelaže'to' nabi'o yichjlaždao' yogo' neto' benačh.

Gacšca can' chazlažo' yežlio nga can' chac yabana'.

³ Ca nac dan' che'ej chagwto' tža tža, benšca cheto' na'a.

⁴ Na' bezi'xenšca cheto', le lencze neto' chezi'xento' che ljež benačto' bite'tez da' chesonde' neto'.

Na' bitw go'o latje soa da' gwžigan' neto' gonto' da' mal,
 san bcuase bcue'ejšca neto' len da' mala'.

⁵ Nach gož Jesúsen' le'gaque':

—Le gon xbab še šejle liž bene' migw chele do chel na' ye'lnē: "Migw chia', benšca neda' šone yetextil. ⁶ Ba bla' to bene' migw chia' bene' za' zito', na' bibi de chia' da' gua'ane' gagüe'." ⁷ Na' chixe še migw chelen' yo'e lo' yo'ote yoži'e xtiža'len': "Bitw gondo' neda' zed, le ba nyeyjw cho'a yo'ona' ba deto' chtasto' len bi' cheto' ca'. Bi gac časa' goña' dan' chyažjdo'." ⁸ Chnia' le'e, la'czla' naque' migw chele, bitw ye'nde' chase' gone' dan' chyažjele, perw še gata'yoelne' sša na' čhasšaze' gone' bite'tez da' chyažjele. ⁹ Na' chnia' le'e, še žan bi da' chyažjecho, chnabchon. Še žan to da' chaclaže'cho želecho, chyljwchon. Še žan chaclaže'cho saljw bene' cho'a yo'o che', na' necho cho'a yo'on cont saljue'. Na' ca'cze cheyała' ye'le Diosen' cate' bi da' chyažjele o bi da' chaclaže'le gone'. ¹⁰ Na' note'tezle še bi da' nabelene', gončzen'. Na' še bi dan' che'nele gwzejni'ide' le'e, gwzejni'iczen'. Na' note'tezle še žan chaclaže'le gac to da' gac, yol güižle Diosen' can' chon to bene' chnie' cho'a yo'o, nach Diosen' gone' cont gacczen.

11 'Na' le'e nacle xa bidao', še xi'inle nabebe' le'e yetextil, ĩgwnežjwlebe' to yej? Na' še nabebe' le'e yid bel gagwbe' ĩgwnežjwlebe' to be xigüe'? 12 Na' še nabebe' le'e to žit gagwbe' ĩgwnežjwlebe' to bexjoni'? Cabi gonle ca'. 13 La' nacle bene' mal, nezczele gwnežjo xi'inle to da' güen. Nacchxe güen gon Xacho Diosen' ben' zoa yaba gwnežjue' Spiritw chen' soan lo' yichjlaždao' bene' chnab len.

Gosene' Jesúsen' bebeje' da' xigüe' len yela' guac che Beelzebú
(Mt. 12:22-30; Mr. 3:19-27)

14 Gwzoa to bene' gwyo'o gwyaz da' xigüe' yichjlažda'ogüe' na' benen cont bi goc nie'. Na' Jesúsen' bebeje' da' xigüe' lo' yichjlažda'ogüe' na'. Na' cate' bechoj da' xigüen', na' goc benie'. Na' bene' ca' že'na' besyebanchgüede'. 15 Perw bale' gosene':

—Beelzebú dan' chnabia' da' xigüe' ca' chaclenen le' cont chebeje' da' xigüe' zjajo'o zjanyaz yichjlaždao' bene'.

16 Na' yebale' cont gosagüe' xya che' gosenabde'ne' gone' to yela' guac da' yesele'ede' le'e yaban' cont yeseñezde' še da' licze Diosa' gwsele' le'. 17 Perw Jesúsen' gocbe'ede' xbab dan' gosone', na' gože' legaque':

—Ša to gobiern choje' chop šon cuen na' yeyoža' yesedile' legacze', gobiernā' bi sibi'e. Na' še bene' to lo' yo'o yesechoje' chople na' yesedile' legacze', gague šša yesenite' txen. 18 Na' še Satanásen' dan' chnabia' da' xigüen' len da' xigüe' chen ca' yesechojen chople na' yesedilen, lecze bi sibian', san na' yeyož yedon. Le'e chnale Beelzebún' dan' chnabia' da' xigüe' ca' chaclenen neda' cont chebeja' da' xigüe' zjajo'o zjanyaz yichjlaždao' bene'. 19 Šaca' naquen can' žalen', lecze zejen dan' chnabia' da' xigüe' ca' chaclenen bene' lježle ca' chesybeje' da' xigüe' zjajo'o zjanyaz yichjlaždao' bene'. Bene' lježle ca' yese'e le'e clelen' žale. 20 Neda' chebeja' da' xigüe' len yela' guac che Dios, na' dan' chona' ca' chlo'en ba bžin ža Diosen' nabi'e yichjlaždao' bene' yosozenag che'.

21 'Satanásen' naquen ca to bene' gual, na' neda' naccha' bene' gualch. Na' nezele cate' to bene' gual chape' ližen' len spada, bibi gac che da' de che'. 22 Perw cate' žin to bene' gualch ca le' na' tillene' le', nach ben' nac bene' gualch gon gan. Na' que'e spada che ben' da'na' zoe' lez gaclen le' na' ca'atie' bichle da' de che' na' chisen' len bene' migw che' ca'.

23 'Bene' bi chone' neda' txen, chone' contr neda'. Na' bene' bi chaclene' cont yosozenag bene' yoble chia', zeje diža' chone' par bi yosozenague' chia'.

Da' xigüe'na' yeyo'on da' yoble lo' yichjlaždao' bene'
(Mt. 12:43-45)

24 'Na' še to da' xigüe' da' gwyo'o gwyaz lo' yichjlaždao' bene' yechojen, nach lažen nile na'le yeyiljon ga soan mbalaz. Na' še bibi latje želen, nach nan: "Da' yoblecze šjajo'a lo' yichjlaždao' ben' gan' ba gwyo'a." 25 Nach yeyejen da' yoble gan' zoa ben'. Cate' le'en bač cheyone' güen, na' ba zoache' binlo, 26 nach šjajyoben yegaže da' xigüe' ca' da' zjanacch malech ca len, na' txen yeso'on lo' yichjlažda'ogüe'na'. Na' še bač goc ca', gacch mal che bena' clal ca dan' ba goc che' da' nechw.

Mbalaz nita' bene' ca' chosozenag xtiža' Diosen'

27 Šlac be' Jesúsen' diža' quinga, gwzoa to no'ole gachol bene' ca' že' gan' bsd blo'ede', na' no'ola' gwne' zižje, gože'ne':

—Mbalaz zoa no'ola' gwrxan le' na' bguaže' le'.

28 Perw na' Jesúsen' gože'ne':

—Nacchxe mbalaz nita' bene' ca' chosozenag xtiža' Diosen' na' chesone' can' žanna'.

Bene' bi chosozenag che Diosen' chesenabe' gon Jesúsén' to yelá' guac
(Mt. 12:38-42; Mr. 8:12)

²⁹ Na' bene' zan gosebigue' gosechjde' Jesúsén', nach Jesúsén' gwne':

—Le'e zoale na'a nacchguale bene' laždao' xi'a. Chñable gona' yeto yelá' guac da' le'ele cont nezele še Diosa' gwsele' neda', perw bi gona' ca dan' chñablana', le ba ble'ele da' ca' chona'. Lete gac chia' can' goc che da' Jonás ben' be' xtiža' Diosen' cani'. ³⁰ Na' ca dan' goc che Jonásen' blo'en bene' Níveve ca' Diosen' gwsele' le', ca'cze dan' gac chia' gwlo'en le'e zoale na'a Diosen' gwsele' neda' golja' benach. ³¹ Cate' žin ža gon Diosen' castigw che yogo'lol bene' cheson da' mal, da' no'olen' gwnabi'e bene' Seba ca' yedecuiše' le'e mbanle na'a. Le' gwze'e gan' nac zito'chgua na' bide' nga cont bedezenague' diža' sina' dan' be' da' rey Salomón len le', na' neda' zoa' nga naccha' bene' blaoch ca da' Salomon na' bitw chzenagle chia'. ³² Na' cate' žin ža gon Diosen' castigw che yogo'lol bene' cheson da' mal, lecze žana' yesyeban bene' Nínive ca' na' yosocuiše' le'e nita'le ža na'aža. Le legaque' besyetingjde' xtola'gaque' cate' da' Jonásen' gwdixjue'ede'ne' can' gwna Diosen'. Na' neda' zoa' nga naccha' bene' blaoch ca da' Jonása' na' bi chzenagle chia'.

Dan' bsed blo'e Jesúsén' naquen ca to yi'
(Mt. 5:15; 6:22-23)

³³ 'Notno gwguala' to yi' na' gw dosen' caj, na' neca gwcuasen' ga yoble ga nono le'e len, san chde'en le'e ze'e cont gwseñin' len yogo'lol bene' yeso'o lo' yo'ona'. ³⁴ Žia yejlaocho cont le'echo. Con še bibi chaquen chle'eczecho binlo. Perw še ncho'cho, bi chle'echo. Ca'czen' naquen len yichjlažda'ochon'. Še naccho bene' laždao' güen, yo'o be'ni' che Diosen' lo' yichjlažda'ochon'. Perw še naccho bene' mal, cho' nac yichjlažda'ochon'. ³⁵ Da'nán' le gon cont gacle bene' laždao' güen, na' šo' be'ni' che Diosen' yichjlažda'ole. ³⁶ Še nyeni' yichjlažda'olen' na' bibi da' mal yo'on, gwseñi'czen xnezele can' chseni' to yi' ga nac cho'.

Jesúsén' gože' bene' fariseo ca' zjanape' dolá' na' len bene' ca' chososed chosolo'e ley
(Mt. 23:1-36; Mr. 12:38-40; Lc. 20:45-47)

³⁷ Cate' beyož be' Jesúsén' diža' quinga, to bene' fariseo gwche'e le' liže' cont yesagüe'. Na' gwyo'o Jesúsén' liž bene' fariseon' na' gwchi'e cho'a mesen'. ³⁸ Na' bene' fariseon' bebande' ble'ede' bitw bona' Jesúsén' cate' za' gagüe' can' cheson legaque' chesacde' chebe Diosen' legaque' dan' chesone' ca'. ³⁹ Na' Xancho Jesúsén' gože' le':

—Le'e bene' fariseo nacle ca xiga' ye'en da' chchin bene' na' chyibe' cožen' binlo perw bi chyibe' do lo'en. Chonle cont chesaque bene' nacle bene' güen, perw chebele chca'ale bi da' de che bene' na' nacle bene' mal juisyw. ⁴⁰ Bicze bi chejni'ile. Chi' yichjle gacle xilaže' len cuerp chelen'. Lecz ca' cheyala' cue' yichjle gacle xilaže' len yichjlažda'ole, le Diosen' ben' bene' cuerp chechon' lecze bene' yichjlažda'ochon'. ⁴¹ Le yeyaše' bene' na' le gwnežjo bi da' cheseyažjde'. Še gonle ca', nacia' nacle bene' laždao' xilaže'.

⁴² 'Nyaše'chguaze gac che le'e bene' fariseo! La'czla' chnežjwle Diosen' to part lao ši part che yix'e'güej, che yej Santa María, na' che bichle cuan chele, bibi zejen dan' bi chonle bichle da' nac da' güen, na' da' bi chaquele Diosen'.

Da' nac da' žialao gonle, gonle da' nac güen na' gaquele Diosen'. Perw bi cuejyichjle gwnežjwle da' ca' chnežjwle Diosen'.

⁴³ 'iNyaše'chguaze gac che le'e bene' fariseo! Chzelaže'le cue'le lo' yodao' t xen len bene' blaoc ca', na' cate' chejle do gan' chac ya'a chaclaže'le yesonxen bene' le'e.

⁴⁴ 'iNyaše'chguaze gac che le'e chsed chlo'ele da' bzoj da' Moisés na' len le'e bene' fariseo! Chonle cont nachia' gan' xoa ba che bene' guaten', le ley chechon' žan zjanaquen zban na' bi cheyala' gwlejchon. Perw le'e nacle ca ba da' bi zjanachia'. Chosozenag bene' chele na' bi chesacbe'ede' nacle bene' laždao' zban.

⁴⁵ To bene' chsed chlo'e ley boži'e xtiža' Jesúsen', gože'ne':

—Maestrw, lagüe da' žo' da' quinga, chaqueton' zi'.

⁴⁶ Na' gož Jesúsen' legaque':

—Lecze ca' le'e chsed chlo'ele ley da' bzoj da' Moisés, i'nyaše'chguaze gac chele! Da' žale da' zan da' cheyala' yeson bene', chonle leyna' ca to yoa' da' nocze no do'e, to yoa' da' chaclaže'le yesoa' bene' yoble, perw le'e ne late'ze bi chaclaže'le gua'len.

⁴⁷⁻⁴⁸ 'iNyaše'chguaze gac che le'e chonšagüe'le cho'a ba che da' bene' ca' gosoe' xtiža' Diosen' cani! Chacle toze len da' xozxta'ole ca' ben' gosote' legaque'. Na' dan' chonle ca', zejen chazlaže'le dan' gosote' legaquen'.

⁴⁹ 'Da'n'an' Diosen' lao yela' sina' che' gwne' sele' bene' yesoe'lene' le'e xtižen' na' sele' postlw che' ca' len le'e. Na' gwne' gotle ba'e' na' gwchi gwsaca'le yebale'. ⁵⁰ Na' da' li ba chonle can' gwnen'. Da'n'an' si'le castigw che yela' got che yogo' bene' ca' gosoe' xtižen' gwzolaon caten' gwxete yežlion' chžinten ža na'aža. ⁵¹ Zan bene' gosot bene' yoble legaque' gwzolaozen len da' Abel ben' beyot da' biše' Caín le', na' beyožen len da' Zacarías ben' gosote' ladjo yodao' blaona' na' ladjo mes de yej dan' zoa chyo'o yodao' gan' chesote' beyixe' cont chesonxene' Diosen'. Na' le'e mbanle na'a si'le castigw che yela' got che yogo' bene' ca'.

⁵² 'iNyaše'chguaze nac le'e chsed chlo'ele ley che Diosen'! Bitw chzejni'ile bene' leyna' to licha can' naquen, neca chzenagle chen. Na' bene' chesaclaže' yosozenaguen', neca choe'le latje yosozenaguen'.

⁵³ Na' cate' beyož be' Jesúsen' diža' quinga, nach bene' fariseo ca' na' bene' ca' chososed chosolo'e ley gosacyožchgüe' len le'. Na' gosaclaže' yesebeje' le' diža' ⁵⁴ le gosaclaže' choj dižan' cho'e da' yosode'ede' yesagüe' xya che'.

12

Yela' güexoayag che bene' fariseo

¹ Na' goc zan mil bene' besežague' gan' zoa Jesúsen', catec bene' zan besežag bosolej bosošošjte ni'a lježe'. Na' Jesúsen' zgua'tec gwzologüe' be'e diža' len bene' ca' zjanaque' le' t xen, gože' legaque':

—Le gwsaca' len levadura che bene' fariseo ca'. Dan' cheseziye'e bene' cont yesacde' zjanaque' bene' güen zaca'leben ca levadura dan' chchixede' yetextil. Bitw gonle can' chesonen'. ² Le bitwbi de da' ngaše' da' nacho cbi gwlo'elaon, neca de da' nono na' neze da' nacho cbi yesenezden'. ³ Da'n'an' bite'teze da' gwnale bagaše'ze, bene' zan yesenden'. Na' dan' ba gwnale šižize lo' yo'o chelen', yogo'ze bene' yesenezden'.

*Non' cheyala' žebcho
(Mt. 10:28-31)*

⁴ 'Bene' migw chia', chyixjue'eda' le'e bitw žeble bene' ca' yesot le'e, le cate' ba gotle bich bi gac yesonde' le'e. ⁵ San zoa ben' cheyała' žeble, cheyała' žeble Diosen', le cate' bach beque'e yela' mban chele, lecze nape' yela' chnabia' cont yesele' le'e gabil. Da' yoble chnia' le'e, cheyała' žeble Diosen'.

⁶ 'Nezecho byin dao' ca' bibi zjazaca'tecba', perw na' Diosen' ne toba' bi chanlaže'. ⁷ Na' ca nac chio', da' leca chaque Diosen' chio' nezte'de' bal' yiša' yichj tocho žia. Da'n'an' bitw žeble, le zaca'ch le'e clel ca yogo' byin dao' ca'.

Cheyała' ye'cho bene' nombia'czcho Jesucriston'

(Mt. 10:32-33; 12:32; 10:19-20)

⁸ 'Na' chnia' le'e, note'tez bene' še cho'e diža' len benachen' che'ene' chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' neda' naque' neda' txen, neda' naca' ben' gwseła' Diosen' golja' benach. ⁹ Na' note'teze bene' še cho'e diža' len benachen' che'ene' bitw chejle'e chia', lecze ca' neda' gua'a diža' len angl che Diosen' bene' že' yaba yapegaca'ne' bena' bitw naque' neda' txen.

¹⁰ 'Na' note'teze bene' še ne' yela' ya' chia' neda' naca' ben' gwseła' Diosen' golja' benach, Diosen' yezi'xene' che' še yetinjde'. Perw note'teze bene' še ne' yela' ya' che Spiritw che Diosen', gwbat yezi'xen Diosen' che'.

¹¹ 'Na' cate' yeseche'exoxje' le'e lao bene' gwnabia' che yodaon' o lao justis o še lao nochle bene' gwnabia', bi cuec yichjle nac yoži'ile xtiža'gaquen' o še nacle nale. ¹² Lo hor na'teze gwzejni'i Spiritw che Diosen' le'e bin' cheyała' nalen'.

Bitw cheyała' cuec yichjcho tlaoze bi da' de checho

¹³ To bene' bchoje' ladjo bene' zan juisyw ben' zjanžag na', na' gože' Jesúsen': —Maestrw, gonšco' mandadw cont bene' bišan' gone' neda' bien che da' xaxna'to' da' cheyała' si'a.

¹⁴ Na' Jesúsen' gože' le':

—Bitw naca' neda' juez chele. Bi cheyała' gua' neda' laze da' de chele.

¹⁵ Nach gože' yogo' lol bene' ca' že'na':

—Le gwsaca' cont bi selaže'le bi da' gata' chele yežlio nga, la' de bi de checho o la' bibi de checho bi da' chyažj chchinecho, gague da' can' nac yela' mban checho.

¹⁶ Na' be'lene' legaque' to jempl, gwne':

—To bene' gwni'a gocchgua coseš che', ¹⁷ na' bene' xbab lo' yichjlažda'ogüe' gwne': “¿Nacxe gona'? Bich bi latje de ga gwže'šagua' coseš chian'.” ¹⁸ Nach gozne': “Quinga gona', yochinja' yo'o gan' že' coseš chia' quinga na' gona' yo'o xench. Na' gwže'šagua' cosešen' na' bichle da' de chia'.” ¹⁹ Na' lagüe ba de da' yažjda' da' zan iz, bich gona' žin. Ye'ej gagwteza' con da' chaclaža' na' gona' legr.” ²⁰ Perw Diosen' gože' bena': “Chono' xbab da' bibi zaca'. Na'aže' bžin hor gato', na' žnola lo' na' gac yogo' da' de chio'?” ²¹ Can' gac che note'tez bene' še con chbec yichje' tlaoze da' de che' šlac mbane' na' bi chone' da' chazlaže' Dios.

Diosen' chapši'e xi'ine' ca'

(Mt. 6:25-34)

²² Na' gož Jesúsen' bene' ca' zjanaque' le' txen:

—Da'n'an' žia' le'e, bi gacžejlaže'le bi da' gagwle šlac mbanle, na' lecze ca' bi gacžejlaže'le che xałana'le. ²³ Zaca'ch yela' mban chelen' ca yela' guagw. Lecze ca' cuerp chelen', zaca'chen ca xałana'le. ²⁴ Le gon xbab che bechj ca', bitw chesazba', bitw chesyelapba', neca zoa da'a xoa' chegacba', neca zoa ga ncu'a

no goš čhegacba' ga že' da' yesagwba', perw na' Diosen' chguagwcz'e'ba'.
 ¡Nacchle zaca' le'e ca be ca' zjažia xil! ²⁵ Na' ne tole bi gac yoston cuinle
 gašje metr še con cue' yichjle tonle. ²⁶ Nezele bitw gac yoston cuinle, na' neca
 naquen da' zaca'. Da'nana' bi gacžejlaže'le che bica'chle da' chyažjele.

²⁷ Le gon xbab ca' nac yej ca' da' zjaze yixe'. Chesecha'oczen, bibi žin
 chesonen, neca chesaljen do. Na' chnia' le'e, da' rey Salomón gocue' lache'
 güen juisyw, perw bitw bžinlaže' xalane'na' ca yela' xdan che yej ca'. ²⁸ Diosen'
 none' xdan da' ca' ze yixen' la'czla' to chop žaze nitan' na' chosozeyen'.
 ¡Nacchxe gon Diosen' len le'e gwleccze yichje' gone' yogo' da' chyažjele, le'e
 late' lasze chejle'le che! ²⁹ Da'nana' bitw güe'laže'le cont gata' da' ye'ej da'
 gagwle. Bitw gacžejlaže'le čhen. ³⁰ Beñe' ca' bi chesonxene' Diosen' con
 chesoe'laže' che bi da' gata' yese'ej yesagüe' na' che xalana'gaque'. Perw Xacho
 Diosen' nezcede' bi da' ca' chyažjele. ³¹ Cheyala' güe'laže'le gwzenagle che
 Diosen' cont nabi'e yichjlažda'olen', na' yogo' da' ca' chyažjele, goncze Diosen'
 len.

Da' zaca'ch gata' checho yežincho yaba
 (Mt. 6:19-21)

³² Bitw žeble la'czla' nac to chople. Diosen' chbede' chnabi'e yichjlaždao'
 le'e chzenagle che' na' chaclene' le'e. ³³ Le yeyote' da' de chele cont gata' da'
 gwnežjwle beñe' ca' cheseyažje. Še gonle ca', Diosen' gone' le'e da' zaca'ch na'
 da' cbi te čhen cate' yežinle yaba gan' zoe'na'. Na' bitw gac šo' beñe' gwban
 que'en, na' neca gac šo' be dao' gwžiaji' len. ³⁴ Gan' de dan' chaquele nan' zoa
 yichjlažda'olen'.

Cheyala' soa cuezcho batcan'yide Criston'yeto

³⁵⁻³⁶ Le soa le cueze batcan' yida' yeto. Le soa can' nita' beñe' chesape' liž
 xangaquen' šlac zeje' to yela' güešagna'. Zjanyaz xalana'gaque' na' čala' yi'.
 Nach cate' yežine' na' nie' cho'a yo'on, na' la' yesesaljwte' cont yeyo'e. ³⁷ Mba
 gac che beñe' ca' chesebeze' batcan' yežin xangaquen'. Še nite' chesebeze' le'
 caten' yežinen', nach gwsini'e da' yesagüe' na' cuine' gwnežjue' legaque' dan'
 yese'ej yesagüe'. ³⁸ Mba gac čhegaque' še chesebeze' batcan' yežine' la'czla'
 yežine' do chel o do šbal. ³⁹ Le gon xbab che da' nga. Šaca' neze xan yo'on baten'
 žin beñe' gwban liže'na', le gw'na'ze' cont bi güe'e latje šo' bena' liže'na' cuane'
 xšinlazen'. ⁴⁰ Le soa le cueze batcan' yida' da' yoble, le cate' bi chonle xbab
 yida', canan' yida', neda' naca' bena' gwsela' Diosen' golja' beñach.

Mos ben' chon güen, na' mos ben' bi chon güen
 (Mt. 24:45-51)

⁴¹ Pedroa' gože' Jesúsen':

—Xanto', ¿cho'o jempl nga par neto'ze o še par yogo'lol beñach?

⁴² Nach gož Xanchon' Pedroa':

—Naquen par note'tez beñe' še chone' can' chon mos blao ben' chejni'i,
 ben' chon can' cheyala' gone'. Ben' chon ca', co' xane' lo ne'e ližen' cont ne'e
 mos ca' yezica'chle. Na' gone' da' yesagw to toe' cate' žin hor yesagüe'. ⁴³ Še to
 beñe' mos chonteze' can' ben xanen' mandaw gone', mba soe' cate' yežin
 xanen'. ⁴⁴ Da' li chnia' le'e, xanen' cue'e lo na' mosen' yogo'lol da' de che'.
⁴⁵ Perw na' še mosen' gone' xbab na' ne': "Ba gwže xanan'", na' solagüe' got
 chine' mosa' yezica'chle na' ye'ej gagwxate' na' sožde', ⁴⁶ nach xane'na' yežine'
 to ža senyale' le' cate' bi gacbe'ede'. Na' da' bi chon mosen' can' cheyala' gone',

xane'na' got chinchgüe' le' na' gone' cont si'e castigw txen len yezica'chle bene' bi cheson can' cheyalá' yesone'.

⁴⁷ 'Na' mos ben' nac bene' güedenag, la'czla' ba nezde' can' che'ne xanen' gone', bi chone' ca'. Bi zoe' chbeze' batcan' yežin xanen', na' da'nan' xanen' got chinchgüe'ne'. ⁴⁸ Na' bene' bi nezde' bin' non xanen' mandadw gone' na' da'nan' chone' da' zaca' chine' le', na' xanen' bi chinteque' le' zi'. Note'teze bene' zjanye'chgua xbab, chese'go'o bene' lo' na'gaque' da' zan da' yesone', na' chonen byen yesone' yogo' da' ca' zjajo'o lo' na'gaque' yesone'.

Yesedil bene' neche da' bid Jesúsén'
(Mt. 10:34-36)

⁴⁹ Nach gwna Jesúsén':

—Dan' zedeyena' yežlio nga naquen ca to yi' da' cuec bene'. Na' yebeda' šaca' ba chi' yi'na'. ⁵⁰ Za'a cont saca'zi'a na' gata'. Na' chžaglagua' šlac chbeza' žin ža yeož gaquen. ⁵¹ ¿Chonle xbab bene' že' yežlio yesezoa yesebeze' binlo len lježgaque' na'a dan' ba bidan'? Chnia' le'e, bi yesezoa yesebeze' binlo len lježgaque' na'a ba bida', san yesedile' na' yosošaše'. ⁵² Quinga solao gac na'a, še žan nita' gayo' bene' to lo' yo'o, yesedil legacze', chope' contr šone' na' šone' contr chope'. ⁵³ Yesedil bene' byo len xi'ine' na' xi'ine' len le'. Na' yesedil no'olen' len xi'ine' no'ole, na' xi'ine' no'olen' len le'. Na' yesedil no'olen' len xo'oliže' na' xo'oliže' len le'.

Bitw gosacbe'ede' bi zeje da' ca' chon Diosen'
(Mt. 16:1-4; Mr. 8:11-13)

⁵⁴ Nach lecze gož Jesúsén' bene' ca' nita' na':

—Cate' chle'ele chi' bejw gan' chxoa gwbiža' na' žale: “Gac yejw”, na' chac ca'. ⁵⁵ Na' cate' chechj be' da' za' ži'le na' žale: “Guac zeye”, na' chac zeye'. ⁵⁶ Bene' gwxiye' le'e. Cate' chle'ele nac chac le'e yaban' na' lo' yežlion' nezele še gac yejw o še gac zeye'. ¿Bixčhen' bi chache'ele bi zejen da' ca' chon Diosen' tiemp nga zoacho na'a?

Cheyalá' goncho cont yezoacho binlo len bene' che'e chio' lao justis
(Mt. 5:25-26)

⁵⁷ ¿Bixčhen' bi chonle xbab cont nezele can' cheyalá' gonle? ⁵⁸ Cate' to bene' gonle xya che' na' che'e le'e lao justis, šlac ngo'ole nezen' le' yeyiljwlaže' nac gonle yezoale binlo len le' cont bi che'e le'e lao justisen'. Še bitw gonle ca', cate' žinle lao justisen' nach gone' le'e lo' na' bene' ca' yoseseyjue' le'e ližya. ⁵⁹ Chnia' le'e bitw yebeje' le'e še biña' chixjwle doxen da' čala'le.

13

Cuiayi'cho še bitw yetinjecho xtoła'chon'

¹ Na' len bene' ca' že'na' gwnita' bal bene' gosoe'lene' Jesúsén' diža', gose'ene' Pilaton' gwsele' soldadw che' ca' jasetue' to xonj bene' Galilea ca' na' bchixde' xčhengaquen' len che beyixe' ca' ba gosote' cont yesonxene' Diosen'. ² Nach boži'i Jesúsén' xtiža'gaquen' gože' legaque':

—¿Chonle xbab' gosac čhegaque' ca' lagüe dan' gosonche' da' malech clél ca' bene' Galilea ca' yezica'chle? ³ Chnia' le'e, bi naquen ca'. Še bitw yetinjele xtoła'le ca', lecze gwžin ža cate' cuiayi'le. ⁴ Nezele che bene' šino'šone' ca', šlac zjanite' yež Siloé gwbiže to campanaryw na' gwdenen legaque' na' gosate'. ¿Lecze chonle xbab goc ca' dan' zjanacche' bene' mal clél ca' bene' ca' zjaže'

Jerusalén? ⁵ Chnia' le'e, gague can'. Še le'e bi yetinjle xtoła'le, ľecze gwžin ža cate' cuiayi'le.

Jempl che yag yixgüigw da' bibi chbia

⁶ Na' be'lene' ľegaque' jempl nga, bzejni'ide'ne' cheyała' yesyetingde' xtoła'gaque', na' gože' ľegaque':

—To bene' zoa to yag yixgüigw che' gan' že' yag uvas che' ca'. Na' gwyeje' lo' yaguen' jaňe'e še de toga yixgüigw gagüe', perw bitw bi bželde'. ⁷ Na' gože' ben' chape' yag che' ca': "Ba chac šon iz chedena'a yag nga še chbian yixgüigw, perw bitw bi chbian. Gwchoguen, lažjw con zoan nľanen, na' neca bi chbiazen." ⁸ Na' gož ben' le': "Xana', jayenna', za' zoašazen yetgüiz, che'ena' xanenna' na' cuecan' yo beb. ⁹ Na' še cuian yixgüigw do yetgüiz, bitec da' güen, perw še bicze bi cuian, nach chogchon."

Jesúsen' beyone' to no'ole ža che Dios

¹⁰ Na' to ža che Dios bsed blo'e Jesúsen' bene' že' to lo' yodao'. ¹¹ Na' zoa to no'ole bene' ba goc šino'šone iz yo'o nyaz da' xigüen' yichľažda'ogüe'na'. Na' ben da' xigüen' cont bdohe cuerp che'na', na' gague gocch se' to ľicha. ¹² Na' cate' ble'e Jesúsen' le', goxe'ne' na' gože'ne':

—No'ole, na'a yeyacdo' yizgüe' chio' nga.

¹³ Na' gwxo'a ne'e cuerp che no'ola', na' ľa' bezete' to ľicha. Na' no'ola' benxene' Diosen'. ¹⁴ Perw na' bene' gwnabia' che yodao'na' bloque' da' beyon Jesúsen' no'ole güen' ža che Dios. Na' gože' bene' ca' nita' lo' yodaon':

—De xop ža cont gonľe žin. Le da lo ža ca' cont yeyone' yizgüe' chelen' perw bitw yidle ža che Dios cont yeyacle.

¹⁵ Nach Xancho Jesúsen' gože'ne':

—Bene' gwxiye' le' len bene' ľježo'. ¿Gague lo ža che Dios bia'cze chsežle go'ň chele o burr chele ga zjada'ba' chjasanľba' güe'ej nis? ¹⁶ No'ole nga naque' xi'ň diaža che da' Abraham, na' Satanásen' dan' chnabia' da' xigüe' ca' benen cont ba bdohe cuerp chen' šino'šone iz. Da'nana' nacczen ľicha ba beyona'ne' ža che Dios.

¹⁷ Cate' gwne' ca', bene' ca' chesegue'e le' gosacde' zto', perw yogo'loľ bene' ca' yezica'chle nita'na' besyebanchgüede' len yogo' dan' ben Jesúsen', ľe ľeca güen zjanac dan' benen'.

Yela' gwnabia' che Diosen' naquen ca bin che xomdas

(Mt. 13:31-32; Mr. 4:30-32)

¹⁸ Nach gwna Jesúsen':

—Na'a gwlo'eda' le'e cont nezele šanch bene' yosozenag che Diosen' cont nabi'e yichľažda'ogaque'. ¹⁹ Da'nana' yela' gwnabia' che Diosen' naquen ca bin che xomdas. To bene' gozen' na' cate' blan' gwcha'on goquen yag cha'o na' be ca' zjazoa xil goson ľižgacba' lo xoze' yaga'.

Yela' gwnabia' che Diosen' naquen ca levadura

(Mt. 13:33)

²⁰ Nach da' yoble gozne':

—Na'a nia' le'e yelate' nac nac yela' gwnabia' che Diosen'. ²¹ Naquen ca levadura dan' gwlec no'olen' len to rob yezj cont gwcha'o doxenen.

Cheyała' chiljwlaže'cho nac goncho cont soacho binlo len Diosen'

(Mt. 7:13-14, 21-23)

²² Na' gwda Jesúsen' bsed blo'ede' bene' ca' že' ciuda ca' na' yež ca' gan' bedie' cont bežine' Jerusalénna'. ²³ Na' to bene' gože' Jesúsen':

—Xanto', ¿con to chopze bene' šjasyenite' len Diosen'?

Nach Jesúsen' gože' legaue':

²⁴—Chnia' le'e, bene' zan chese'nde' yesenite' binlo len Diosen', perw gwžin ža cate' bich gac yesone' cont yesenite' binlo len le'. Da' nac žialao gonle, čhiljwlaže'le nac gonle cont soale binlo len Diosen' ²⁵ cont bi gone' len le'e ca ben to xan yo'o cate' bžin hor gwsejjuen'. Gwžože'e bseyjue', na' gwdechle besežin bene' bososiže' le'e puert che'na' na' bich gwsaljue' cont yeso'e. Na' gose'ene': "Gwsaljwšca cont šo'to'." Na' gože' legaue': "Bitw nombi'a le'e, neca nezda' ga za'acle." ²⁶ Can' gac che baļle. Nach solaole ye'ln'e: "Güe'ej gwdagwto' len le' na' bsd blo'edo' neto' la cay lažto'." ²⁷ Perw na' da' yoble ye'e le'e: "Bitw nezda' ga bene' le'e. Le šjaya'ac yogo' le'e bene' güen da' mal." Can' ye'e le'e. ²⁸ Na' le'ele Abraham na' Isaac na' Jacob na' yogo'lol bene' ca' gosoe' xtiža' Diosen' cani' nite' yaba gan' zoa Diosen' chnabi'e. Na' le'e bitw gac šo'l'ena'. Nach cuežyaše'le na' gagwxejte layle dan' leca žaglaole cate' gacbe'ele bich gac šo'le. ²⁹ Bene' zan bene' za'ac doxen yežlio yesyežine' yaba gan' zoa Diosen' chnabi'e na' yesebi'e cho'a mes yesagüe'. ³⁰ Nita' bene' zjanaque' bene' bzebe na'a perw gwžin ža cate' yesaque' bene' žialao. Na' nita' bene' zjanaque' bene' žialao na'a, perw gwžin ža cate' yesaque' bene' bzebe.

Begüine' Jesúsen' neche xtoła' bene' Jerusalén ca'

(Mt. 23:37-39)

³¹ Lo ža na'teže baļ bene' fariseo ca' besežine' gan' zoa Jesúsen' gose'ene':

—Cheyala' yoxonjo' nga gan' chnabi'a rey Herodes, le chaclaže' gote' le'.

³² Jesúsen' gože' legaue':

—Herodesen' naque' ca to beza' yela' gwxiye' čhen'. Le šja'ac na' ye'ln'e yeto chope žazen' soa' yebejcha' da' xigüe' ca' zjajo'o zjanyaz yichjlaždao' bene' na' yeyoncha' bene' chesačšene. Ba zoa yeyož gona' dan' cheyala' gonan'. ³³ Perw ca nac dan' chona' na'a gonchczan' gwxe güižj. Gague ngan' chesote' bene' ca' chesoe' xtiža' Diosen', san Jerusalén chesote' bene' ca'.

³⁴ Le'e bene' Jerusalén, chotle bene' ca' chesoe' xtiža' Diosen' na' ca nac nochle bene' ca' chsela' Diosen' len le'e, chčhellene' jej. Zan ni'a goclaža' yotoba' le'e ca to jed xcaca' be nche' xi'in na' chyežba' legacba', perw bitw goclaže'le. ³⁵ Na' na'a ba gwlejyichj Diosen' le'e. Na' chnia' le'e, bich le'ele neda' na'a. Cate'ch žin žana' nale: "Mbalaz ben' za' nga nsel'a' Xancho Diosen' le' cont nabi'e", cana'ch le'ele neda' da' yoble.

14

Jesúsen' beyone' to bene' de yi

¹ Na' to ža che Dios Jesúsen' gwyeye' jatagüe' liž to bene' fariseo ben' nac bene' blaο. Na' yezica'chle bene' fariseo ca' chosogüia chesene'e bixen' goncze' cont gata' da' yosode'ede' yesagüe' xya che'. ² Na' lagüe'na' zecha to bene' chacšene, de cuerp čhen' yi. ³ Na' gož Jesúsen' bene' fariseo ca' na' bene' ca' chososed chosolo'e ley dan' bzoj da' Moisés:

—¿De šsens len ley čhechon' yeyoncho to bene' güe' ža che Dios o še bitw bi šsens de?

⁴ Perw notno boži'i xtiže'na'. Nach Jesúsen' bexu'e na' bena' na' beyone' le', na' gože'ne':

—Guac yeyejo'.

⁵ Nach gož Jesúsen' bene' ca' že' liž bene' fariseon':

—Le'e še zoa to burr o to go'n̄ chele na' lažo'ba' to lo' yechw sitjw, ¿cabi la' yebejteleba' la'saze nac ža che Dios?

⁶ Na' nono goc yoži'i xtiža' Jesúsen'.

Beñe' ca' gosaxe' gan' chac güešagna'

⁷ Na' ble'e Jesúsen' can' cheson beñe' ca' gosaxe' liž beñe' fariseon', gosebeje' gan' zjachi' beñe' blao ca' cont gosebi'ena'. Na' Jesúsen' be'e to jempl, gože' legaque':

⁸ —Cate' to beñe' gaxe' le'e gan' chac güešagna', bitw cue'le gan' cheyała' cue' beñe' blao ca', le še cue'le na', guacte yid beñe' nacch beñe' blao ⁹ na' xan yo'ona' ye'e le'e: “Le soža' cont cue' benga.” Nach do chaquele zto' soža'le cue'le ga yoble len beñe' ca' bitec bi zjazaca'. ¹⁰ Na' cate' gan' gaxe' le'e cue'le len beñe' bitec bi zjazaca', na' cate' yid xan yo'ona' na' ye'e to tole: “Bene' migw chia', da cui'o len beñe' blao ca'.” Nach gacxenle lao beñe' ca' zjachi' len le'e cho'a mesen'. ¹¹ Le note'teze beñe' chonxen cuine', Diosen' gone' cont si'e zto' lagüen'. Na' note'teze beñe' chzexjwlaže' lagüen', Diosen' gone' cont gacxene'.

¹² Na' ľecze gož Jesúsen' ben' goxe' le' ližen':

—Cate' gono' to ľni na' gaxo' beñe' yesagüe' len le', bitw gaxo' beñe' biše' ľježo', beñe' migw chio' o beñe' zjanaque' beñe' gwñi'a. Legaque' ľecze yesaxe' le' ližgaquen', na' yesyegüe'e gwzon lagüe dan' ba goxgaco'ne' ližo'na'. ¹³ Cate' gono' to ľni gox beñe' yaše' na' bene' nchog no ni'a na'gaque', beñe' nxiñj ni'e, na' beñe' ľchol. ¹⁴ Še gaxo' legaque', Diosen' gone' so' mbalaz, le beñe' ca' bi gac yesyegüe'e gwzon chio'. So' mbalaz cate' Diosen' yosbane' le' ladjo beñe' guat ca' txen len yezica'chle ben' ja'ac to ľicha cate' gosebane'.

Jempl che to beñe' ben ľni xen

¹⁵ Na' to beñe' chi' cho'a mesen' txen len Jesúsen' bende' xtiže'na' na' gože'ne':

—Mbalaz soacho gagwcho lo ľni da' gac caten' ba chnabia' ben' seľa' Diosen'.

¹⁶ Nach Jesúsen' gwne':

—To beñe' bene' to ľni xen, na' goxe' beñe' zan šja'ac ližen' cont yesagüe'.

¹⁷ Na' cate' bžin hor yesagüe', na' xan yo'ona' gwsele' xmosen' cont šjatobe' legaque' yesagüe'. Na' cate' jañe'e to toe', gože' legaque': “Le šo'o, ba bsiñi'e dan' gagwchon'.” ¹⁸ Na' yogo'ľole' gose'e ben' bi zjazoe' latje šja'aque' gan' chone' ľnin'. Beñe' nechon' gwne': “Za' gwxia' to yežlio, na' cheyała' šjaña'an. Na' ye'šco' xanon' bitw gac yida'.” ¹⁹ Na' yetoe' gwne': “Za' gwxia' gayo' cue' go'n̄ na' na'a šjengaca'ba' prueba. Ye'šco' xanon' si'xene' chia', bitw gac yida'.” ²⁰ Na' yetoe' gože'ne': “Za' bšagna'. Da'n̄an' bitw gac yida'.” ²¹ Na' mosen' beyeje' na' jayeže' xanen' can' gose' beñe' ca' le'. Nach xan yo'ona' ben' chon ľnin' bže'e. Nach gože' xmosen': “Gwyej jata to to cay na' to to nez lo ciudad', na' gwtobo' beñe' yaše' na' beñe' nchog ni'a na'gaque' na' beñe' nxiñj ni'e, na' beñe' ľchol cont yeside' yesagüe'!” ²² Gwde bene' ca' nach gože' le': “Xana', ba jatoba' beñe' ca' ba gwnaon', na' ne' dechcze latje par beñe' yoble.” ²³ Nach xane'na' gože' le': “Bchoj lo' ciudad' na' gono' byen yesid ben' nita' chanez. Na' šjaxi'o beñe' ca' zjaže' yiže'. Gono' byen yeside' liža' nga yesagüe' cont yežan' bich bi latje šo'.” ²⁴ Na' ca' nac beñe' ca' goxa' da' nechw, bich gua' latje yesagw legaque' dan' ba bsiñi'ana'.”

Dan' cheyała' goncho cont gaccho txen len Jesucriston'

²⁵ Na' beñe' zan juisyw zjana'ogüe' Jesúsen', na' gwyečhje' gože' legaque':

26 —Note'teze bene' še chaclaže' šejnilaže' neda' na' gwzenague' chia', še bi gacchde' neda' clel ca xaxne'e, no'ol che', xi'ine', biše', zane', na' lente cuine', bi gac gone' neda' txen. 27 Na' note'teze bene' bi chzanlaže' cuine' saca'zi'e o gate' ne chia' neda', lecze bitw gac gone' neda' txen. 28 Še tole che'nele gonle to campanaryw, zgua'tec cue'le na' gonle xbab gwsaca'le ca do gaca' da' chyažjele cont gonlen, še gaque xmechwle cont yeyož campanaryw'. 29 Še bi gwchix gwtole xbab chelna' gaca'te' dan' chyažjele, cate' ba gwlecle lenenna' na' gacbe'ele bich bi mechw de cont yeyožen, na' yogo' bene' yesele'ede' lenenna' yesezi'diže' le'e, 30 yesene': "Benga gwzolao chone' to campanaryw perw bitw beyož xšinen'." 31 Na' še to rey chone' xbab tile' len yeto rey, lecze zgua'tec gwsaque' še gwzoede' len ši mil soldadw che' gone' gan yeto rey bene' nche' galje mil soldadw. 32 Na' še chacbe'ede' bi gone' gan, šlac ne' zoa ben' yeto, zito', sele' ben' šjasedie' xtižen' lao rey ben' yeto yeseñabe' yesyenite' binlo. 33 Ca' naquen len le'e, note'teize še bi cuejyichjle yogo'lo'bi da' de chele, bitw gac gonle neda' txen.

Cate' zeden' bich naquen zxi'
(Mt. 5:13; Mr. 9:50)

34 "Zeden' naquen güen, perw na' še bich naquen zxi', zñacxe goncho cont yeyaque' zxi' da' yoble? 35 Bibi zacan', ñeca gaclenen yežlio, ñeca gaquen par beb, lete cho'onchon. Le'e žia nagle da' chene, le gwzenag xtiža'na'.

15

Jempl che xila' ben' gocžeje
(Mt. 18:10-14)

1 Na' bene' güechixjw ca' na' yebale bene' güen da' xinj, yogüe' gosebigue' gan' zoa Jesúsen' cont gosende' xtiže'na'. 2 Na' bene' fariseo ca' na' bene' ca' chososed chosolo'e ley dan' bzoj da' Moisés gosezi'diže' le', gosene':

—Benga chlebe' bene' güen da' xinj ca' na' chagwlene' legaque'.

3 Nach Jesúsen' be'e to jempl, gože' legaque':

4 —Še nita' to gayoa xila' chele na' gacžeje toba', žbi yocua'anle be ca' taplalj togalj gan' že'ba' latje daša' na' šjaydiljwle ben' ba gocžejena' cont yeželba'?

5 Na' cate' yeželban' yebechgüele na' yexoalba' ya'axichjle yeyoa'lba'. 6 Na' cate' yežin ližle, gwtole bene' migw chele na' bene' gualiž chele na' ye'ln'e': "Le yebe len neda'. Ba bežel xila' chia' ben' gocžeje." 7 Chnia' le'e, gwbeche Diosen' txen len angl che' ca' cate' to bene' chon da' mal yetinjde' xtole' clel ca yesyebede' che taplalj togalj bene' zjanaque' bene' güen bene' bitw de xto'la'gaque' da' yesyetinjde'.

Jempl che mechw dan' gwnit

8 Na' le'e no'ole še de ši mechw plata chele na' še ñit ton, la' gwguala'tele to yi' na' gwloale lo' yo'o chele na' yeyiljwožlen cont yeželen. 9 Na' cate' yeželenna', na' yotoble no'ole migw chele ca' na' bene' gualiž chele na' ye'le legaque': "Le yebe len neda', le ba beželda' mechw chia' dan' gwnit." 10 Chnia' le'e lecze chesyebe chesyequae' angl che Diosen' bene' zoa yaba cate' to bene' chon da' xinj chetinjde' xtole'na'.

Jempl che ben' benditje xi'inen' xmechue'

11 Na' lecze gože' legaque':

—Gwzoa to bene' na' gwnita' chop xi'ine' bene' byo. 12 Na' bžin ža bene' xcuiden' gože' xen': "Xa', beñ neda' dan' cheyala' sia' da' de chio'." Nach

ˁen' bneʒjue' dan' cheyaˁa' si'en. ¹³ Goc to ˁhop ʒa nach bene' xcuiden' btobe' yogoˁloˁ bi da' de ˁhe' na' gwze'e gwyeje' naciˁn zito' na' zlez da' bi zaca' jene'. Na' benditjde' xmechue'na' zejlene' da' malen'. ¹⁴ Na' cate' beya xmechuen', goc to gwbin juisyw doxen naciˁnna', na' bich bi gota' xmechue' cont si'e da' ye'ej gagüe'. ¹⁵ Da'nan' gwyeje' gan' zoa to bene' naciˁnna' gwnabe' ʒin, na' bena' gwsele' le' yiˁe' ga ʒe' be zan xcoŝe' na' jayoe'ba'. ¹⁶ Na' catec gwdone' goclaʒe' gagüe' dan' chosoneʒjue' chesagw coŝ ca', perw neˁ len ca bosoneʒjue' le' gagüe'. ¹⁷ Na' beyone' to xbab ŝagüe', gwne': "Nita' mos zan ˁhe ˁan' na' dechgua da' chesagüe', na' neda' gatda' yela' chdon. ¹⁸ Yeza' nga na' yeya'a gan' zoa ˁa' na' yapa'ne' bena' da' mal lao Diosen' na' lao le', ¹⁹ na' bich zaca' gone' neda' cuent ca xi'ine', con ŝe gone' latje gaca' ca to xmose'." ²⁰ Nach beze'e beyeje' gan' zoa ˁen'. Na' zito'le za' yeʒine' cate' ble'e ˁen' le' na' beyaŝe'de' le' na' gwza'sese' jaŝague'ne'. Na' gwdele'ne' bnope'ne'. ²¹ Nach goʒ xi'ine'na' le': "ˁA, ba bena' da' mal lao Diosen' na' laguo' le'. Bich zaca' gono' neda' cuent ca xi'ino'." ²² Na' ˁe'na' goʒe' xmose' ca': "Le ŝjalej tgot lache' ŝagüe', le guacwben', na' le ŝjaxi' to niy na' le co'on xbembe', na' le ŝjaxi' ŝcue' yel na' gwdele'ni'abe'. ²³ Na' le ŝjaxi' go'n dao' ben' chane' na' le gotba' cont gagwchoba', le goncho ˁni. ²⁴ Xi'ina' nga ba bena'be' cuent ca to bi' guat, perw ne' zoabe' mbambe' na'a. Gwlejiˁhbe' chio', perw na'a ba bela'be'." Na' gosezolaogüe' chesone' ˁni.

²⁵ Na' xi'ine' bene' nechon' zeje' yiˁe' cate' beʒin xi'inen' yeto ben' benditje xmechuen', na' cate' zeza' ben' gwyej yiˁen', ba zoa yeʒine' liʒ ˁen' cate' bende' chosocueʒe' na' chosoye'e. ²⁶ Na' goxe' to mosen' na' gwˁabde' le' bixˁen' chesone' ˁni. ²⁷ Na' mosen' goʒe'ne': "Bi' biŝo'na' ba bela' na' ˁaon' ba betue' go'n daon' ben' chane'chgua da' bela'be' to ŝagüe' to ʒüen'." ²⁸ Nach xi'ine' nechua' bʒe'e na' bi goclaʒe' yeyo'e liʒ ˁen'. Na' bˁoj ˁen' na' gota'yoede' le' yeyo'e yo'o. ²⁹ Perw xi'ine' bene' nechua' goʒe' ˁen': "Zan iz ba ˁac zoa' nga chonteza' ʒin con can' ʒo' le', na' bina' gaca' bene' güedenag. Na' ne to ŝib dao' cana' goˁo' neda' cont gota'ba' gona' ˁni len bene' migw ˁhia' ca'. ³⁰ Na' na'a ba bela' xi'ino' nga benditjbe' yogoˁloˁ da' bneʒjo'be' gwdalembe' no'ole zle', na' beto' par lebe' go'n dao' ben' chane'." ³¹ Na' ˁe'na' goʒe'ne': "Xi'indagua', le' zoatezo' len neda', na' yogoˁloˁ da' de naquen chio'. ³² Perw cheyala' goncho ˁni nga na'a da' chbechgüecho ba bela' bi' biŝon', le ba bena'be' cuent ca to bi' guat, perw na'a zoabe' mbambe'; gwlejiˁhbe' chio', perw ba bela'be'."

16

Jempl ˁhe to mos blao ben' benditjde' da' de ˁhe ˁane'

¹ Nach goʒ Jesúsen' bene' ca' zjanaque' le' txen:

—Gwzoa to bene' gwˁi'na' na' gwzoa to mos blao ˁhe' ben' gwyo'o ˁo ne'e yogoˁloˁ da' de ˁhe'. Na' bene' gwˁi'ana' bende' rson xmose' blaon' ba benditjde' bi da' de ˁhe'. ² Na' ˁanan' goxe' le' na' goʒe'ne': "Ba benda' diʒa' can' chonon'. Cheyala' yodio' cuent yogoˁloˁ da' ba benditjedo' chia'. Bich gac gono' xŝinan' na'a." ³ Nach mosen' bene' xbaben': "¿Bixe gona' na'a? ˁanan' ba chologue' neda'. Bich gac gona' xŝinen', na' neca gac goncha' ʒin gual, na' gadca' zto' ŝe naba' carida. ⁴ Neza' bi gona' cont nita' bene' yeseˁe'e neda' cate' bich chona' ʒin ˁhe ˁanan'." ⁵ Nach goxe' yogoˁloˁ bene' ca' chesala' xmechw ˁane'na' tgüeje' na' goʒe' bene' nechw: "¿Gaca' ˁhalo' ˁhe ˁana'?" ⁶ Na' bena' goʒe'ne': "ˁala' ˁhe tap mil litrw set." Nach goʒ mos

blaona' le': "Bedao'nez gwche'edo' na' bzoj lo cuenten' bzoan cha'lo' che chop mil litrwze seten'." ⁷ Gwde na' gože' bene' gwchopen': "¿Gacan' cha'lo' che xanan'?" Nach bena' gože'ne': "Chala' che to mil rob trigw." Nach mosen' gože' bena': "Gwche'edo' na' bzoj lo cuent chio'na' bzoan cha'lo' che xono' gayoa robze trigon'." ⁸ Na' xan mos gwxiyen' gocbe'ede' xmosen' leca nye'e xbab da' beyiljwlaže' nacle gone' soe' binlo len lježe' bene' ca' chesala' che xanen'. Le bene' ca' zjachi' yichje' to zleze dan' chac lo yežlion' chesonchgüe' xbab nacle yesone' len dan' zjade chegaque', perw zan bene' ba zjajo'o be'ni' che Diosen' lo' yichjlažda'ogaque' bitw chesone' xbab naclen' yosochine' dan' de chegaque'.

⁹ Na' chnia' le'e, dan' de chele yežlio nga da' te chen', perw le gwchinen cont nita' migw chele. Na' cate' ba beya bi dan' de chele yežlio nga, nach nita' bene' yosolebe' le'e cate' yežinle yaba gan' soale toli tocañe.

¹⁰ Še to bene' chone' can' cheya'la' gone' len da' bibi zaca'tec, lecz ca' gone' len da' zaca'chgua. Na' bene' bi chone' can' cheya'la' gone' len da' bibi zaca'tec, lecz bitw gone' can' cheya'la' gone' len da' zaca'chgua. ¹¹ Še le'e bi chonle can' cheya'la' gonle len dan' de chele yežlio nga da' te chen', bitw gon' Diosen' le'e da' zaca'ch da' bi te che. ¹² Dan' de chele yežlio nga, che Diosen' gague chelen'. Na' še bitw chonle can' cheya'la' gonle len da' nac che', bitw gone' le'e da' zaca'ch da' bi te chen'.

¹³ Nono mos gac gone' žin len chop xane' to ši'ize, le še gone' ca', gue'ede' to xan žin'na' na' gacde' yetoe'; o gone' žin che toe' do yichj do laže' na' che ben' yeto gonen' do chža'alaže'ze'. Lecze ca' le'e, bitw gac gonle xšin Diosen' do yichj do laže'le na' gonte xšinle cont gacle bene' gwñi'a.

¹⁴ Na' lecze nita' bene' fariseo ca' chesende' xtiža' Jesúsen', na' gosezi'diže' le', le gosaclaže' yesaque' bene' gwñi'a. ¹⁵ Na' gož Jesúsen' legaque':

—Le'e chonle cont benachen' chesacde' chdaczle licha, perw Diosen' neze nle'ede' yichjlažda'ole, na' Diosen' chgue'ede' ba' da' chesaque benachen' zjanaquen da' žialao xen.

Ley che Diosen' na' bene' ca' chnabia' Diosen' yichjlažda'ogaque'

¹⁶ Na' gozna' Jesúsen':

—Gwzolaon cani'te bžinten cate' bla' Juanna' bedetixjue'ede' xtiža' Diosen', ley dan' bzoj da' Moisés len dan' bosozoj yezica'chle bene' gosoe' xtiža' Diosen' bzejyni' in chio' che Diosen'. Na' na'a gwzolaon len Juanna', ne' nita'cze bene' cheseyixjue'ede' Diosen' nabi'e yichjlaždao' bene' yosozenague' che'. Na' bene' zan cheseyiljue' nacle yesone' cont nabia' Diosen' yichjlažda'ogaque'.

¹⁷ 'La'czla' še yežlion' len da' ca' zjažia le'e yaban' yesede chegaquen, ca nac Xtiža' Diosen' dan' nyojen, ne late' daon' cbi te chen'.

Bi cheya'la' yela'acho len no'ol chechon' cont soalencho no'ole yoble
(Mt. 19:1-12; Mr. 10:1-12)

¹⁸ Note'teze bene' chele'e len no'ol che' na' cheque'e no'ole yoble chone' da' xinj, tozcze ca' naquen šaca' gata'lene' no'ol che bene' yoble. Na' note'teze bene' yošagna'lene' to no'ole bene' bela'a len bene' che', lecze tozcze ca' da' xinj gone' len dan' chon bene' chata'lene' no'ol che bene' yoble.

Bene' gwñi'a na' Lázaro

¹⁹ Nach gozna' Jesúsen':

—Gwzoa to bene' gwñi'a na' xdanchgua goc xa'lane'na', na' leca gwdagwšagüe' yogo' ža. ²⁰ Na' to bene' yaše' le' Lázaro, yogo' ža jasedixjue'

le' cho'a puert zaguan che bene' gwñi'ana' cont gwñabe' yosonežjue'ne' con gaca' da' chesezande'. Na' Lázaron' leca gwžia yežo' doxen cuerp chen'. ²¹ Na' catec gwdone' goclaže' gagüe' bla'a dao' yela' guagw da' beselažo' cho'a mes che bene' gwñi'an'. Na' beco' ca' ja'acba' jasele'eba' yežo' dan' gwžia cuerp che'na'. ²² Na' got bene' proben' nach angl bene' že' gan' zoa Diosen' besyezi' besyeque'e le' yaban' gan' zoe' na'a len da' xoxxta'ochó Abraham. Na' lecze got bene' gwñi'ana' na' bosocuaše'ne' ²³ na' beyeje' lo' yi' gabil'. Na' šlac chžaglagüe' na' gwłis lagüen' na' ble'ede' zito'le nita' da' Abraham len Lázaron' yabana'. ²⁴ Nach bene' gwñi'an' gwñe' zižje gwñe': "Xa' Abraham, beyaše'laže'šca neda' na' gwsela' Lázaron' cont yobise' loža' nga len late' nis da' gwłapa' xbene'na', le leca chžaglagua' lo' yi' nga." ²⁵ Perw na' Abrahanna' gože' le': "Xi'ina', bosa'laže' cate' gwbanó' yežlio zleze da' šagüe' da' güen gota' chio', na' Lázaro nga to zleze da' mal goc che'. Na' ba zoe' mbalaz nga na'a na' le' chžaglaguo'. ²⁶ Bi gac gona' can' chaclažon', le Diosen' bach nze' to bđinj xen ga nono gac te, cont nono gac sa' nga šeje' gan' zon', neca nono gac sa' gan' zon' na' yide' nga." ²⁷ Nach bene' gwñi'ana' gože' Abrahanna': "Bene' gol dao', chata'yoeda' le' gwsela'šca Lázaron' liž xan'. ²⁸ Nita' gayo' bene' biša' na' che'nda' šjatixjue'ede' legaque' nac yesone' cont Diosen' bi yesele' legaque' latje nga gan' yesežaglagüe'." ²⁹ Na' Abrahanna' gože' le': "Decze dan' bzoj da' Moisésen' na' dan' bosozoj yezič'chle bene' ca' gosó'e xtiža' Diosen' cani'. Cheyala' yosozenague' che da' ca' zjanyojen." ³⁰ Na' gože' Abrahanna': "Bitw, bene' gol dao'. Še to bene' yebane' ladjo bene' guat na' güe'lene' legaque' diža', nach yesyetinjde' xtoła'gaquen'." ³¹ Nach gož Abrahanna' le': "Še bitw chosozenague' che dan' bzoj da' Moisésen' na' dan' bosozoj yezič'chle bene' ca' gosó'e xtiža' Diosen', la'czla' še yeban to bene' ladjo bene' guat ca', bi yesejle'cze' che Diosen'."

17

Bitw cheyala' goncho cont gon bene' da' xinj
(Mt. 18:6-7, 21-22; Mr. 9:42)

¹ Na' gož Jesúsen' bene' ca' zjanaque' le' txen:

—Decze da' gonen cont lažo' bene' yesone' da' xinj, perw nyaše'chguaze gac che bene' chone' cont bene' yoble yesone' da' xinj. ² Yejni'a šaca' yosócheje' yene' to yiše na' šjasezale' le' lo' nisdao' clél ca' soe' gone' cont to bene' za' gwzolagüe' chejnilaže' neda' lažoe' gone' da' xinj. ³ Da'nán' le' gwsaca' cont bi gonle ga lažo' bene' gone' da' xinj.

'Na' še to bene' lježle gonde' le'e mal, le til'e' na' še gwš'e'e xbab na' ne' bich gone' ca', le yezi'xen che'. ⁴ La'czla' gaž ni'a lao tža gone' da' mal contr bene' lježen', še gaž ni'ate ne': "Ba betinjda' che dan' benan', bezi'xen chia'", na' cheyala' yezi'xene' che'.

Gosacłaze' yesejle'che' che Diosen'

⁵ Na' gose' postlw ca' Xancho Jesúsen':

—Gaclenšco' neto' cont šejle'chto' che Diosen'.

⁶ Nach gož Xanchon' legaque':

—Xsa yag xomdas naquen da' dao' riz, na' la'czla' dan' chejnilaže'le Diosen' naquen ca' to xsa xomdas lagüe' dan' bi chejnilaže'teclne', še šejnilaže'rne', guaque ye'le yag nga: "Gwcuase nga na' jayzoa lo' nisdan'", na' guaccze can' nalna'.

Dan' cheyała' yeson mos ca'

⁷Le'e še mos chelen' chgua'ane' go'ŋ, o še chyoe' xila', cate' chele'e güeyeban' bitw che'lnē': "Beyo'o ngale, gwche'edo' gaguo' xše'." ⁸San che'lnē': "Bsin'i'a da' ye'ej gagua' na' gonon'. Te yedaguan' nach gago'." ⁹Na' bitw cho'elne' yela' choxclen cate' ba bene' dan' gožlene'. ¹⁰Na' lecz ca' le'e, cate' ba benle yogo'lol dan' ža Diosen' gonle, cheyała' nale: "Bitw zaca'to' no gon yela' choxclen cheto' ca dan' ba bento', le bento' con da' cheyała'cze gonton'."

Jesúsen' beyone' ši bene' chese'ede' yižgüe' da' nzi' lepra

¹¹Na' zej Jesúsen' Jerusalénna' len bene' ca' zjanaque' le' txen na' gwddie' gan' ndil distritw Samaria len distritw Galilean'. ¹²Na' besežine' to cho'a yež dao' na' besechoj ši bene' chese'e yižgüe' da' nzi' lepra jasešague' Jesúsen'. Na' gosezie' zito' ¹³na' gosenē' zižje gosene':

—Maestrw Jesús, beyaše'laže' neto'.

¹⁴Na' Jesúsen' cate' ble'ede' legaque' na' gože'ne':

—Le šjaya'ac lao bχoz ca' cont yesene'e le'e še ba beyacle.

Na' goquen' lo neza' besyeyacde'. ¹⁵Nach toe' cate' gocbe'ede' bačh beyaque', na' bebi'e na' gwñie' zižje benxene' Diosen', ¹⁶na' bzoa xibe' lao Jesúsen' bi'e le' yela' choxclen. Ben' ben ca' naque' to bene' Samaria. ¹⁷Nach gwna Jesúsen':

—Beyona' ši bene'. ¿Gaŋxe bene' ca' yega? ¹⁸¿Toz bene' zito' nga bebi'e chonxene' Diosen'?

¹⁹Nach gož Jesúsen' bena':

—Bezoža' beyej to šagüe' to güen. Ba beyacdo' da' chejnilažo' neda'.

Yela' chnabia' che Diosen'

(Mt. 24:23-28, 36-41)

²⁰Na' bene' fariseo ca' gosenabde' le' batxen' yid ben' seła' Diosen' nabi'e nación Israelen'. Nach boži'i Jesúsen' xtiža'gaquen' gwne':

—Ca nac yela' gwnabia' che Diosen', bi naquen da' le'echo. ²¹Nono cheyała' güe' diža' ne': "Gwña' nga chnabi'e", o "Gwña' na' chnabi'e." Le ba zoe' len le'e na'a chnabi'e.

²²Nach gože' bene' ca' zjanaque' le' txen:

—Gwžin ža cate' nale: "Šaca' na'a ba chnabia' ben' gwsela' Diosen'", perw bitw gac can' nabaže'len'. ²³Yesenita' bene' yesi'e le'e: "Gwña'šc nga zoa ben' gwsela' Diosen'", o "Gwña'šc na' zoa ben' gwsela' Diosen'." Perw bitw ga'ole ben' yesi'e le'e ca'. ²⁴Can' chac cate' chep yes, chsenin' doxen le'e yaban' zejzenez, lecze can' gac cate' žin ža yida' da' yoble, neda' naca' ben' gwsela' Diosen' golja' benačh. Yida' zejzenez na' yogo'lol bene' yesele'ede' neda'. ²⁵Zgua'tec de da' zan da' cheyała' saca'zi'a na' bene' ca' že' na'a bitw yesejle'e chia'. ²⁶Lecz ca' goc ca' tiemp che da' Noé, lecze ca' gac cate' ba zoa žin ža yida' da' yoble, neda' naca' ben' gwsela' Diosen' golja' benačh. ²⁷Bene' gwnita' ca' tiemp che da' Noén' gosaše' gose'ej gosagüe' goso'elaže' bosošagne'e na' bosošague' na' no xi'in' che' cate' bžin ža gwyo'o Noén' lo' barcon'. Nach goc to yejwsio' juisyw. Na' gosebiayi' yogo' bene' ca' bi gos'o lo' barcon'. ²⁸Lecz ca' goc ca' tiemp che da' Lot, bene' Sodomán' gose'ej gosagüe' gosote' bi da' de čhegaque', na' gosezi'e bi da' beseyažjde', na' gosaz gosa'ane', na' goson liže'. ²⁹Perw na' žan' beza' Loten' Sodomán', Diosen' bene' cont byinj yi' na' azufre yaba na' gosebiayi' yogo'lolē'. ³⁰Can' gac cate' yida' da' yoble, neda' naca' ben' gwsela' Diosen' golja' benačh, na' yogo'lol bene' yesele'ede' neda'.

³¹ 'Na' ža caten' yida' še chda to bene' do yichjo'o che liže', na' xšinlaze' žen' lo' yo'o che', bi yeyetje' cont yotoben', con yoxonje'. Na' lecze ca' bene' chda do yixe', bitw gacde' yeyej liže'. ³² Le šjayza' laže' can' goc che no'ol che Loten'. ³³ Note' tez bene' chacde' gone' cont cbi saca' zie' o cont nono yesot le', bena' cuiayi'. Na' note' tez bene' chzanlaže' cuine' saca' zie' o gate' ne chia' neda', ba de yela' mban che' toli tocaņe.

³⁴ 'Chnia' le'e, quinga gac caten' yida' da' yoble. Chope bene' zjadie' chesetase' toz cam. Toe' yeca'a Diosen' na' yetoe' yega'an. ³⁵ Na' chop no'ole nite' txen chesote', toe' yeca'a Diosen' na' yetoe' yega'an. ³⁶ Na' chope bene' nite' do yixe', toe' yeca'a Diosen' na' lecze yega'an yetoe'.

³⁷ Cate' gosende' diža' nga gose'e le':

—¿Gan' gac da' qui, Xanto'?

Nach Jesúsen' gože' legaque':

—Nga chonen' che ben' že': "Gan' de be guat nan' chesežag šod ca'."

18

Jempl che to no'ol güezeb len to juez mal

¹ Na' be' len Jesúsen' legaque' to jempl bsd blo'ede' legaque' cheya' la' nita'teze' yesonchachlaže' yosol güiže' Diosen'. ² Na' gože' legaque':

—Gwche' to ciuda ga gwzoo to juez na' juezen' bi gwdape' Diosen' bala'an na' neca gwche'yichje' še chesazlaže' benachen' can' chonen'. ³ Na' ciudan' gwzoo to no'ol güezeb, na' goxjze cheje' lao juezen' na' che'e le': "Ben yela' justis chia' len bene' chgue'ede' neda'." ⁴ Ba goc sša bi chzenague' che', perw gwdechle bene' xbab, gwne': "Bitw chapa' Diosen' bala'an na' neca chi'yichja' še chesazlaže' benachen' can' chonan'. ⁵ Perw na' no'ol güezeb nga chone' neda' zed, na' na'a gaclena'ne' cont bich yide' yostoe' yela' chxenlaže' chia'."

⁶ Nach gož Xanchon' legaque':

—Le gon xbab che dan' gwna juezen' ben' bi zej to licha. ⁷ Nacchxe gon Diosen' gwzenagche' che bene' ca' ba gwleje' cont zjanaque' xi'ine', bene' ca' chosol güiže' le' do ža do yel. ¿Gwleze' sša cont yosle' legaque' lo' na' bene' ca' chese'gude' legaque'? ⁸ Chnia' le'e, Diosen' bedao'nez yosle' legaque' lo' na' bene' ca'. Perw cate' neda' yida' yežlio nga yeto, neda' naca' ben' gwse'la' Diosen' golja' benač, ¿ne' nita'ch bene' chesejnilaže' neda'?

Jempl che to bene' fariseo len to bene' güečhixjw

⁹ Gwnita' bal' bene' gosacde' zjanaque' bene' güen lao Diosen' neche da' chesone'. Bene' ca' chesacde' bene' ca' yezica'chle bibi zjazaque' len Diosen'. Na' Jesúsen' bi'e jempl nga da' bcuišen bene' ca', gwne':

¹⁰ —Chope bene' ja'ac yodao' blao jasel güiže' Diosen', toe' bene' fariseo na' yetoe' bene' güečhixjw. ¹¹ Bene' fariseon' gwzeze' bol güiže' Diosen' na' con chonxen cuine', gwne': "Dios, neda' chona' yela' choxlen chio' bitw chona' cana' cheson yezica'chle bene'. Bitw chca'a bi da' de che bene' yoble, na' bitw chona' bichle da' mal. Bitw chata'lena' no'ol bi nac no'ol chia', na' neca naca' bene' mal can' nac bene' güečhixjw ni. ¹² Chope ni'a to xman chona' gwbas, na' yogo'lo' da' chona' gan, chbecan' ši cuen na' chnežjua' to cuen che yodao'."

¹³ Na' bene' güečhixjon' gwzeteze' zito'le, neca cheyaxjde' lis lagüe' yabale. Nach chbaže' lcho'e gwne': "Dios, beyaše' laže' neda' naca' bene' güen da' xinj." Da'na'z da' gwna bene' güečhixjon'. ¹⁴ Na' chnia' le'e, Diosen' bezi'xene' che bene' güečhixjon' na' beyej liže' bibi xtole' gota'. Perw bi goc ca' len bene'

fariseon'. Le note'tez bene' chonxen cuine', Diosa' gone' cont si'e zto', na' note'tez bene' chzejwlaže' lagüen', Diosen' gone' cont gaxcene'.

Jasesane' bidao' lao Jesúsén'
(Mt. 19:13-15; Mr. 10:13-16)

¹⁵ Na' jasesane' bidao' lao Jesúsén' cont xoa ne'e yichjgache'. Na' cate' bene' ca' zjanaque' le' txen besele'ede' can' chesonen', gosedi'e' le'gaque'. ¹⁶ Perw na' Jesúsén' goxe' bene' ca' cont yeside' len bidao' chegaquen', na' gože' bene' ca' zjanaque' le' txen:

—Le güe' latje yesid bidao' ca' lagua' nga, bi gwžonle, le bene' ca' zjanac ca' bidao' quinga, le'gaque' chosozenague' che Diosen' cont chnabi'e yichjlažda'ogüe'. ¹⁷ Na' da' li žia' le'e, note'teze bene' bi yosozenague' che Diosen' ca' cheson bidao' quinga cate' chosozenagbe' che xaxna'be', gwbat nabia' Diosen' yichjlažda'ogaque'.

To bene' gwñi'a be'lene' Jesúsén' diža'
(Mt. 19:16-30; Mr. 10:17-31)

¹⁸ To bene' gwnabia' gože' Jesúsén':

—Maestrw, le' naco' bene' güen. ¿Bi cheyala' gona' cont gata' yela' mban chia' toli' tocaņe?

¹⁹ Nach Jesúsén' gože'ne':

—¿Bixchen' žo' naca' bene' güen? Toz bene' güen zoa, na' len' Dios. ²⁰ Le' nezdo' da' none' mandadw goncho: “Bi gata'lenle' no'ol bi nac no'ol chele o bene' byo bene' bi nac bene' chele. Nono gotle. Bi cuanle. Bi güe'le diža' güenlaže' che bene' lježle. Le gap bala'an xaxna'le.”

²¹ Na' gož ben' le':

—Yogo' lo' da' quinga gwzolagua' chonczan' cate' ne' nactia' bidao'.

²² Nach cate' bene Jesúsén' xtižen' na' gože'ne':

—Zoa to da' ne' chyažjen gono', jayete' yogo' da' de chio', na' mechw dan' le'edo' chen, bnežjon bene' yaše'. Yeyoža' šejnilažo' neda' na' yo'o gaco' neda' txen. Nach še gono' ca', cate' yežino' yaba gan' zoa Diosen' da' zaca'ch gata' chio'.

²³ Perw na' bena' cate' beyož bende' diža' dan' gož Jesúsén' le', go-cyaše'chgüede', le' bene' gwñi'achgua goque'. ²⁴ Na' Jesúsén' gwñe'e bene' gwñi'ana' na' gože'ne':

—Leca zdebe naquen to bene' gwñi'a gwzenague' che Diosen' cont Diosen' nabi'e yichjlažda'ogüe'. ²⁵ Bedao'ch te to be xen be nzi' camello to lo' nag yeše' clél ca' to bene' gwñi'a gwzenague' che Diosen' cont Diosen' nabi'e yichjlažda'ogüe'.

²⁶ Na' bene' ca' bosozenague' xtiže'na' gose'ene':

—¿Noxen' šjayzoa len Diosen' še ca'?

²⁷ Na' Jesúsén' gože' le'gaque':

—Da' bi gac gon benachen', bitw nacho bi gac gon Diosen' len.

²⁸ Nach Pedroa' gože' le':

—Neto' ba gwlejyichjto' yogo' da' de cheto' cont nacto' le' txen.

²⁹ Na' gož Jesúsén' le'gaque':

—Da' li žia' le'e, note'teze bene' ba gwlejyichje' liže', xaxne'e, biše', xo'ole' o xi'ine' neche chzenague' che Diosen' cont Diosen' chnabi'e yichjlažda'ogüe', ³⁰ yežlio nga yonežjo Diosen' le' da' nac da' zaca'ch, na' cate' yežine' yaban' gata' yela' mban che' toli' tocaņe.

Da' yoble gosyixjue'e Jesúsen' ba zoa gate'

(Mt. 20:17-19; Mr. 10:32-34)

³¹ Na' gwlejiže Jesúsen' bene' šižinw ca' gwleje' cont zjanaque' txen len le' na' gože' legaque':

—Na'a ba zejcho Jerusaléna' gan' gac yogo'lol dan' nyoj chia' dan' bosozoj da' bene' ca' gosoe' xtiža' Diosen' cani', neda' naca' bena' gwseja' Diosen' golja' benach. ³² Gaca' lo na' bene' ca' bi zjanac bene' Israel, na' yesezi'diže' neda', na' yesene' yela' ya' chia', nach yosoži'e xene' cho'alagua'. ³³ Yesot yeseyine' neda' na' yesote' neda', perw yeyon ža yebana' ladjo bene' guat ca'.

³⁴ Perw bene' ca' zjanaque' Jesúsen' txen bi gosejni'ide' dan' gože' legaque', le zjanchoł yichjlažda'ogüen', da'nan' bi gosejni'iden'.

To bene' lchol bene' Jericó bele'ede'

(Mt. 20:29-34; Mr. 10:46-52)

³⁵ Nach cate' ba zoa yežin Jesúsen' Jericó, to bene' lchol chi'e chanezen' chnabe' yosonežjo bene' le' con gaca' da' chesezande'. ³⁶ Na' bende' chesede bene' zan gan' chi'ena', na' gwnabe' bin' chac. ³⁷ Na' gose'ene':

—Jesús bene' Nazaret chdie' laguo' nga.

³⁸ Na' bosya'adie' gwne':

—Jesús, xi'in diaža che da' rey David, beyaše'laže'sca neda'.

³⁹ Nach bene' ca' zjažialao lao Jesúsen' gosedi'e bene' lchol'en', gose'e le' cheyala' soe' šize, perw nachle bosya'adiache', gwne':

—Xi'in diaža che da' rey David, beyaše'laže'sca neda'.

⁴⁰ Jesúsen' gwleze', nach bene' mandadw šjasexi'e bene' lchol'en' lagüe'na'. Na' cate' gwbiga' bene' lchol'en' lao Jesúsen', nach gože'ne':

⁴¹ —¿Bi chačlažo' gonda' le'?

Na' bene' lchol'en' gože'ne':

—Xana', benšca cont yele'eda'.

⁴² Jesúsen' gože'ne':

—Bele'e. Dan' chejnlažo' neda' bač beyac yejlagon'.

⁴³ Na' la' bele'ete bene' lchola' na' gwda'ogüe' Jesúsen' benxene' Diosen'. Na' lecze ca' yogo' bene' ca' bešele'ede' can' goquen' gosonxene' Diosen'.

19

Jesúsen' na' Zaqueo

¹ Nach Jesúsen' gwyo'e yež Jericó na' gwdeze' yešla'a ciudad'. ² Na' zoa to bene' le' Zaqueo. Naque' bene' gwnabia' che bene' güechixjw ca', na' naque' bene' gwni'a. ³ Gwdiljwlaže' naclen' gone' le'ede' Jesúsen', perw bitw goc, le gwnita' bene' zan len Jesúsen' na' Zaqueon' goque' to bene' bčhecw dao'.

⁴ Da'nan' gwza'sese' gwdie' lao bene' ca' cont gwyep'e to lo yag da' zoa gala'ze gan' te Jesúsen'. ⁵ Perw na' cate' bžin Jesúsen' xan yaguen', gwne'e lo yaguen' na' gože'ne':

—Zaqueo, bedao'nez beyetj. Cheyala' yega'ana' ližo' na'aže'.

⁶ Nach Zaqueon' beyetjsese' chebede'. Nach beče'e Jesúsen' liže'na' na' benxene' le'. ⁷ Perw na' bene' ca' zjanžague' len Jesúsen' cate' bešele'ede' can' goquen', yogüe' gosenie' che Jesúsen' gosene':

—Ba zeje' zjazoe' to liž bene' güen da' xinj.

⁸ Nach Zaqueon' gwzeche' na' gože' Xanchon':

—Xana', gašje dan' de chia' gwnežjuan' bene' yaše'. Na' dan' ba gwca'a che bene', gwziya'a legaque' cont goseyixwche' da' zcha'och ca dan' cheyala' yeseyixjue', yonežjwgaca'ne' tap ca'te'le.

⁹ Na' Jesúsen' gože'ne':

—Na'aža ba beñ Diosen' yela' mban chio' toli tocañe len che bene' lo' yo'o chio'. Na' da' li ba naco' xi'in diaža che da' Abraham lagüe dan' ba chejnilažo' Diosen' can' ben da' xozxta'och Abraham. ¹⁰ Ca nac neda', gwseła' Diosen' neda' golja' benach cont zedyediljua' note'tez bene' ba mbiayi', na' gwnežjua' legaque' yela' mban toli tocañe.

Jempl che ši bene' bnežjw xangaque' legaque' mechw xen

¹¹ Na' šlac ne' zjanžag bene' chosozenague' diža' dan' choe' Jesúsen', be'lene' legaque' to jempl, le ba nite' gala'ze Jerusalénna' na' gosacde' la' solaote nabi'e nación Israelen'. ¹² Nach gwne':

—To bene' blao gwyje' to yež zito' jene' dan' cheyala' gone' cont jaxi' lo ne'e nabi'e yež che', le gosebeje'ne' nabi'e yež chen' cate' yežine'. ¹³ Na' cate' za' se'e, gwleje' ši mos che' na' bnežjue' to toe' mechw xen. Nach gože' legaque': "Mechw nga gonele negosyw šlac bi zoa". ¹⁴ Perw bene' gualaž chen' besegue'ede' le', nach cate' beyož gwze'e, gosesele' bene' lao xane'na' ben' gwnabia'che' lao yogüe', jaseže'ne': "Bitw chaclaže'to' nabi'a' benga neto'." ¹⁵ Perw la'czła' bi gosaclaže' bene' gualaž chen', bia'cze gwxi' lo ne'e nabi'e. Nach cate' bežin lažen' da' yoble, bene' mandadw šja'ac xmose' bene' ši ca' lagüe'na', bene' ca' bocua'anlene' xmechuen'. Goclaže' nežde' gaca' gosone' gan len mechw dan' bocua'anlene' to toe'. ¹⁶ Bene' nechw bžine' lagüen' na' gože'ne': "Xana', xmecho' dan' bocua'anleno' neda' benen gan ši ca'te'le ca dan' bocua'anon'." ¹⁷ Nach xanen' gože'ne': "Ba beno' da' güen. Naco' mos güen. Beno' can' cheyala' gono' len da' daon' bocua'anlena' le', da'n'an' gona' cont nabi'o ši ciuda." ¹⁸ Na' bene' gwchopen' bžine' lao xanen' na' gože'ne': "Xana', xmecho' dan' bocua'anleno' neda' benen gan gayo' ca'te'le ca dan' bocua'anon'." ¹⁹ Nach gože' le': "Le' nabi'o gayo' ciuda." ²⁰ Nach bžin yetoe' lao xane'na' na' gože'ne': "Xana', nga de xmecho' dan' bocua'anleno' neda'. Ba blažechachan' bay nga. ²¹ Bžeba' le' dan' naco' to bene' znia. Chono' gan da' bi beno' žin na' chelapo' dan' gosaz bene' yoble." ²² Nach gož xanen' le': "Dan' ba gwnao' ca' chlo'en napo' doła'. Naco' mos mal. Chacdo' naca' to bene' znia, na' neždo' chona' gan da' bi bena' žin na' chelapa' dan' gosaz bene' yoble. ²³ Na' še neždo' chona' ca', žbichen' bi gwlejo' xmechuan' bene' yoble cont yezian' len yichjen na'a ba bela'a?" ²⁴ Nach gože' bene' ca' zjaze cuite'na': "Yeca'ale xmechuan' dan' bocua'anlena'ne' na' gwnežjwlen ben' ba noxe' ši ca'te' ca dan' bocua'anlena'ne'." ²⁵ Nach gose'e le': "Xanto', ba noxe'cze' ši ca'te' ca dan' bocua'anleno'ne'." ²⁶ Nach gož bene' gwnabian' legaque': "Chnia' le'e, ben' chon güen len dan' chnežjua'ne', gwnežjua'ne' da' zcha'och, perw na' bena' bi chgone' žin dan' chnežjua'ne', yeca'a da' daon' noxe'na'. ²⁷ Na' ca nac bene' ca' chesegue'ede' neda', bene' ca' bi chesacclaže' nabi'a'gaca'ne', le šjaxi'e na' gotlene' lagua' nga."

Gosonxene' Jesúsen' cate' beyo'e Jerusalén (Mt. 21:1-11; Mr. 11:1-11; Jn. 12:12-19)

²⁸ Na' cate' beyož be' Jesúsen' jempl nga nach gwze'e zeje' ciuda Jerusalén.
²⁹ Na' cate' ba zoa yesežine' yež ca' da' zjanzi' Betfagé na' Betania do gan' zoa

ya'a da' nzi' Ya'a Olivos, na' gwsele' chop bene' ca' mandadw ben' zjanaque' le' txen, ³⁰ gože' legaque':

—Le šja'ac yež dan' chi' gała'ze, na' cate' žinlen' na' yeželele to burr dao' da'ba' yag, be nono na' cuia. Le sežba' na' le che'ba' nga. ³¹ Še no nab bixčhen' chsežleba', na' ye'lnē: “Xantō' chyažjde'ba'.”

³² Nach bene' ca' gwsela' Jesúsen' gosa'aque' na' besele'ede'ba' da'ba' gan' gož Jesúsen' legaque' ca'. ³³ Nach šlac cheseseže'ba', xamba' ca' gose'e legaque':
—žBixčhen' le' gwzolaogosonxene' Diosen', zizže cheso'e diža' che yogo'lol yela'

³⁴ Nach bene' ca' gwsela' Jesúsen' gose'e legaque':

—Xanton' chyažjde'ba'.

³⁵ Nach goseche'eba' lao Jesúsen' na' gosexoaxagaque' cože'ban' nach bosožie' Jesúsen'. ³⁶ Na' šlac zeje' ngü'e nez bene' ca' zjanžag gosonxene'ne', na' goseyixjw no xagaque' lo nez cont blej burron' len. ³⁷ Nach ba zja'aque' gała'ze Jerusalénna' na' besežine' gan' yesyeyetje' Ya'a Olivos. Na' bene' ca' zja'aclene' le' gwzolaogosonxene' Diosen', zizže cheso'e diža' che yogo'lol yela' guac da' ba besele'ede' da' ben Jesúsen'. ³⁸ Nach gosene':

—jMbalaz rey chechon' ben' ba za' nga gwsela' Xancho Diosen' le' cont nabi'e! Cheyala' gonxencho Diosen' txen len bene' ca' nita' gan' zoe'na', le ba bene' cont benachen' gac yesyenite' binlo len le'.

³⁹ Na' len bene' zan ca' zja'aclene' Jesúsen' zja'ac bal bene' fariseo. Nach to chope' gose'e Jesúsen':

—Maestrw, ben mandadw len bene' ca' za'ac len le' txen cont yesenite' šize.

⁴⁰ Nach boži'i Jesúsen' xtiža'gaquen', gwne':

—Chnia' le'e, šaca' bene' quinga nite' šize, yej quinga yesosya'an yesonxen neda'.

⁴¹ Cate' bžine' gała'ze Jerusalénna', gwne'e ciudan', na' bene' xbab che bene' lo' ciudan' na' gwchežyaše', ⁴² na' gwne':

—Šaca' la'ch na'aža šejni'ile nac gonle cont soale binlo len Diosen', perw na'a ne' ngašen'. ⁴³ Gwžin ža cate' bene' ca' chesegue'ede' le'e yesone' to yež de yej da' šechjen ciudan' cont nono gac yoxonj. ⁴⁴ Na' yesote' le'e len xi'inle ca'. Na' yosyočinje' ciudan' na' yesoslase' yej ca'. Ca' gac lagüe da' bi chejle'le Diosen' ba gwsele' neda' laole nga.

Jesúsen' bebeje' bene' ca' cheson ya'a yodao' blaon'

(Mt. 21:12-17; Mr. 11:15-19; Jn. 2:13-22)

⁴⁵ Jesúsen' gwyo'e chy'o yodao' blaona' na' gwzolağüe' bešaše' bene' ca' chesote' na' bene' chesa'o na'. ⁴⁶ Na' gože' legaque':

—Nyojcze Xtiža' Diosen' žan: “Ližan' naquen to latje gan' yesol güiž bene' neda'”, perw le'e ba benlen ca to latje ga že' bene' gwban.

⁴⁷ Na' bsed blo'ede' bene' ca' že' yodao' blaona' yogo' ža. Na' bžox gwnabia' ca' na' bene' ca' chososed chosolo'e dan' bzoj da' Moisésen' na' nochle bene' blao che bene' Israel ca', goseyilwlaže' nacle yesone' yesote'ne'. ⁴⁸ Perw bi besyeželde' nacle yesone' le' neče yogo' bene' besyebechğüede' xtiže'na'.

20

Yela' gwnabia' che Jesúsen'

(Mt. 21:23-27; Mr. 11:27-33)

¹ To ža šlac chsed chlo'e Jesúsen' bene' ca' chy'o yodao' blaona' na' chyixjue'ede' diža' güen che Diosen', besežin bžox gwnabia' ca' na' len bene'

gol ca' chesenabi'e nacióŋna' na' beŋe' ca' chososed chosolo'e dan' bzoj da' Moisés. ² Na' gose'e le':

—Gwnaşc neto' bi yela' gwnabia' napo' chono' da' qui, na' no beŋ yela' gwnabian' cont chonon'.

³ Na' boži'e xtiža'gaquen', gwne':

—Łecze de to da' nabda' le'e. Le naşc neda' ⁴ ¿non' gwseła' da' Juanna' bzo'e' beŋe' nis? ¿Dios nan' gwsele'ne', še beŋachen'?

⁵ Na' łegacze' gose' lježe':

—¿Bi nacho? Še ye'chone' Dios gwseła' le', na' ye'e chio': “¿Bixchen' ca gwyejle'le che'?” ⁶ Na' bi gac ye'chone' beŋach gwseła' le', le yogo'te beŋe' že' nga chesejle'e Diosen' gwsele' da' Juanna' be'e xtiže'na', na' yosože' chio' yej še ye'chone' ca'.

⁷ Na' gose'e Jesúsen':

—Bi ŋezeto' non' gwseła' da' Juan.

⁸ Nach Jesúsen' gože' łegaque':

—Łecz ca' neda' bi yapa' le'e bi yela' gwnabian' chonłenda' da' ca'.

Jempl che mos mal ca'

(Mt. 21:33-44; Mr. 12:1-11)

⁹ Na' be'e jempl nga bzejni'ide' beŋe' ca' chosozenag che', gwne':

—To beŋe' gože' to cue' xen yag uvas na' bocua'anen' lo na' beŋe' ca' yesonen' žin na' gwze'e gwyeye' zito' na' jasoe' sša. ¹⁰ Cate' bžin ža yosyotobe' cosešen', nach gwseła' to xmore' lao beŋe' ca' nac lo na'gaque' yag uvasen' cont yosyonežjue'ne' to tlawc coseš dan' yesyezi'en. Na' beŋe' ca' nac lo na'gaque' yag uvasen' goseyine' mosen' na' to ga'alze bosyose'ene' bibi goso'ene'. ¹¹ Nach xan yežlion' gwsele' yeto mosen', na' łecze gosot goseyine' le' na' gosonde' le' zgot, na' to ga'alze bosyose'ene' bibi goso'ene'. ¹² Na' xan yežlion' gwseła'che' mos gwyone, na' łecze gosotlate'ne' gosone'ne' güe', na' besyebeje'ne' gan' že' yag uvas ca'.

¹³ Na' xan yežlion' gwne': “¿Nacxe gona'?” Nach beyone' xbab gwne': “Seła' xi'ina' ben' chacchgüeda', le šeca güesezi'e xtiža' le'.” ¹⁴ Perw beŋe' ca' nac lo na'gaque' yag uvasen' cate' besele'ede' xi'ine'na', gose' lježe': “Benga yega'anlene' yežlio nga cate' gat xe'. Łe da gotchone' cont yega'anlenchon.”

¹⁵ Nach besyebeje' le' gan' že' yag ca' na' gosote'ne'.

Nach Jesúsen' gwŋabde' beŋe' ca' zjanžaguen':

—¿Nacxe gon xan yežlion' len beŋe' ca' bocua'anlene' yežlio chen'? ¹⁶ Šeje' šjetue' łegaque' na' yodie' yežlion' lo na' beŋe' yoble.

Na' beŋe' ca' že'na' cate' gosende' diža' quinga dan' be' Jesúsen' gosene':

—jCatec da' mal juisyw dan' goc!

¹⁷ Na' Jesúsen' gwŋa'chgüe' łegaque' na' gwne':

—¿Bixe zejen da' nga nyojen le'e Xtiža' Diosen'? žan:

Yej dan' bi gosaclaže' güen yo'o ca' yosočhine', len ba naquen yej squin.

¹⁸ Na' ca' nac yejna', note'tez beŋe' lažo' lo yeja' na' cue'žošje', na' note'tez beŋe' chiže' yeja' cate' lažon' na' gwšošjen le'.

Ca nac dan' cheyala' gaxjw

(Mt. 21:45-46; 22:15-22; Mr. 12:12-17)

¹⁹ Na' beŋe' ca' chososed chosolo'e dan' bzoj da' Moisés na' bxož gwnabia' ca' la' besyeyiljwlaže'te nacle yesone' yesezene' Jesúsen', le gosache'ede' Jesúsen' be'e jemplna' ŋeche dan' bi chesejnilaže' le'. Perw bibi gosone', le

besežebe' bi yeson beṇe' ca' že'na' beṇe' chesejle'e che Jesúsen'. ²⁰ Da'nan' gesele' beṇe' yosogüia yesene'e Jesúsen' cont yesebeje'ne' diža' da' yosode'ede' cont yesagüe' xya che' lao gobernador ben' chnabia'. Gosacde' gone' xbab do laže'gaque' chosozenague' che'. ²¹ Nach gose'e le':

—Maestrw, nezeto' diža' da' cho'o na' da' chsed chlo'edo' beṇe' zejen to licha. Nezeto' toz can' chono' len note'tez beṇe'. Na' nezeto' diža' li cho'o chsed chlo'edo' beṇe' can' chazlaže' Diosen' goncho. ²² Na' da'nan' zedenabeto' le' čnaquen binlo no chixjo da' cheyała' čhixjwcho che ben' nac la'zelagüe beṇe' gwnabia' ben' chi' Roma, še bi?

²³ Na' goche'e Jesúsen' gague do lažen' chese'ene' ca', san chesaclaže' yesagüe' xya che xtižen'. Na' gože' legaue':

—¿Bixchen' chaclaže'le yoslaže'le neda' len xtižan'? ²⁴ Le gwlo'e neda' to mechw. ¿No lao dan' da' le'e mechw nga? na' ¿no la' dan' nyoj le'en ni?

Nach gose'ene':

—Che César ben' nac la'zelagüe beṇe' gwnabia' ben' chi' ciuda Roma.

²⁵ Nach gože' legaue':

—Le gwnežjo beṇe' gwnabian' da' nac che beṇe' gwnabia', na' le gwnežjo Dios dan' nac che Dios.

²⁶ Na' bi gosezaque'de' yososlaže' le' len xtižen' lao beṇe' ca' že'na'. Na' besyebande' can' boži'e xtiža'gaquen', na' bich bi gose'ene'.

Cate' yesyeban beṇe' guat ca'
(Mt. 22:23-33; Mr. 12:18-27)

²⁷ Na' lecze besežin bał beṇe' saduceo gan' zoa Jesúsen'. Beṇe' ca' chesene' beṇe' guaten' bi yesyebane'. Nach gosenabde' le', gose'ene':

²⁸ —Maestrw, da' Moisésen' bzoje' can' cheyała' goncho, gwne' še to beṇe' byo gate' na' chzeb no'ol čhen' perw na' nono bi güezeb chga'an, na' beṇe' biše' ben' ba gota' cheyała' yošagna'lene' no'ol güezeba' cont yesenita' xi'in diaža che da' bišen'. ²⁹ Na' gosenita' beṇe' gosac gaž biše'. Na' beṇe' nechua' bšagne'e, na' gote' nono xi'ine' gwnita'. ³⁰ Na' beṇe' gwchopen' bošagna'lene' no'ol güezeba', na' lecze gote' nono xi'ine' gwnita'. ³¹ Na' beṇe' gwyona' lecze bošagna'lene' no'olen', na' lecze ca' goc len le'. Na' ca' goc gosedaš beṇe' gaža' bosošagna'lene' no'ola', na' ne toe' ca' gosezoa xi'ine' len le'. ³² Gwde gosat yogo'lol beṇe' ca', nach got len no'ola'. ³³ Na' cate' yesyebane' ladjo beṇe' guat ca', čnox beṇe' ca' soalene' no'ola' ca' xo'ole'?, le yogo' beṇe' gaža' bosošagna'lene' le'.

³⁴ Na' Jesúsen' boži'e xtiža'gaquen', gože' legaue':

—Beṇe' ca' nita' lo yežlio nga chosošagne'e na' lecze chosošague' na' no xi'ingaque'. ³⁵ Perw na' beṇe' ca' chaque Diosen' zjzaque' cont yosbane' legaue' ladjo beṇe' guat ca' cont šjasyenite' len le' toli tocaṇe, caten' yesyežine' gan' zoa Diosen' bich yosošagne'e neca yosonežjo xi'ine' no'ol yosošagne'e.

³⁶ Bich yesate', le yesaque' ca angl ben' že' yaba, na' yesaque' xi'in Dios lagüe dan' ba bosban Diosen' legaue' ladjo beṇe' guat ca'. ³⁷ Na' lecze da' Moisésen' bzoje' che dan' chesyeban beṇe' guat ca'. Bzoje' can' gož Diosen' le' caten' boł güiže'ne' to lo yag yeše' dao' da' chey. Na' gwne' Xancho Diosen' naque' Dios ben' chonxen Abraham, ben' chonxen Isaac, na' ben' chonxen Jacob. ³⁸ Na' beṇe' guat ca' bi chesonxene' Diosen', san beṇe' zjzamban. Na' yogo' beṇe' ba gosejnilaže' Diosen', ne' zjzambane' cont chesonxene' le'.

³⁹ Na' bał beṇe' chososed chosolo'ede' ley dan' bzoj da' Moisés gose'e Jesúsen':

—Maestrw, binlo boži'o xtiža'gaquen'.

⁴⁰ Na' bich besyeyaxjde' bi yesenabde' le'.

Criston' naque' xi'in diaža che da' rey David

(Mt. 22:41-46; Mr. 12:35-37)

⁴¹ Jesúsen' gože' legaque':

—¿Nacxeçhen' chesena bene' Criston' ben' yedenabi'e naque' xi'in diaža che da' rey David? ⁴² Cuin Daviden' bzoje' Xtiža' Diosen' le'e libr da' nzi' Salmos, gwne':

Xancho Dios gože' Xanan':

“Gwche'edo' cuita' nga nabia'cho txen,

⁴³ na' gona' cont yogo' no chesegue'e le' yosozexjw yichje' yosozengue' chio'.”

⁴⁴ ¿Nacxe gac nacho Criston' naque' xi'in diaža che da' rey David? le' cuin Davin' gože' le': “Xana”.

Xtoła' bene' ca' chososed chosolo'e dan' bzoj da' Moisésen'

(Mt. 23:1-36; Mr. 12:38-40; Lc. 11:37-54)

⁴⁵ Bene' zan zjanžag chosozenague' cate' gože' bene' ca' zjanaque' le' txen:

⁴⁶ —Le gwsaca' cont bi gonle can' cheson bene' ca' chososed chosolo'e ley dan' bzoj da' Moisés. Legaque' chesyebede' chesaše' zjanyaze' lache' ton. Na' chesyebede' chesonxen bene' legaque' cate' chesyezague' lagüe ya'a. Chesyebede' chesebi'e gan' chesebe' bene' blao cate' chja'aque' yodao' na' cate' chac lni. ⁴⁷ Na' chesyegue'e yo'o che no'ole güezeb ca'. Na' cate' chosol güiže' Dios, sša cheso'e diža' cont yesaque bene' leca chesonxene' Diosen'. Bene' can' chesacche' castigw clcl ca' yezica'chle bene' güen da' xinj.

21

To no'ole güezebe bnežjue' Diosen' xmechue'na'

(Mr. 12:41-44)

¹ Šlac zoa Jesúsen' chyo'o yodao', gwne'e na' ble'ede' bene' gwni'a ca' gosego'o xmechwgaquen' lo' cajen' gan' chesegüe'e mechw che yodaon'. ² Na' lecze ble'ede' to no'ol güezebe bene' yaše' gwlo'e chop centav dao' che'na'.

³ Nach Jesúsen' gwne':

—Da' li žia' le'e, no'ol güezebe yaše' nga ba gwlo'oche' mechw da' zaca'ch clcl ca' yogo' bene' ca' yezica'chle. ⁴ Le yogo' legaque' chesegüe'e da' checho'onen lo' yela' gwni'a chegaquen', perw no'ol nga, lo' yela' yaše' yela' zi' che' gwlo'e yogo' da' de' che', yogo' da' chachbande'.

Gwžin ža yosyoçinje' yodao' blaona'

(Mt. 24:1-2; Mr. 13:1-2)

⁵ Na' bal' bene' ca' chesejnilaže' che dan' chsed chlo'e Jesúsen' goso'e diža' catec xdan nac yodao' blaona' dan' gosonen' de yej xdan da' zaque' na' yo'on bi da' bosonežjo bene'. Nach Jesúsen' gwne':

⁶ —Ca nac da' quinga chle'ele ngan', žin ža cate' ne to yej dan' zjancua' nga ca yega'an zjancua' cože' lježen. Yogon' yosyoçinje'.

Dan' gac cate' ba za' bagwze yeyož yezlion'

(Mt. 24:3-28; Mr. 13:3-23)

⁷ Na' gosenabde' Jesúsen' gose'ene':

—Maestrw, ¿do bat gac dan' žo' nga? na' ¿nac gac ñezeto' cate' ba zoa gac yogo' da' ca'?

⁸ Na' gwne':

—Le gwsaca' cont nono siye' le'e. Le bene' zan yesaš yežlio nga bene' yesaclaže' yosolane' xlatja' nga, yesene': "Nedan' Criston' ben' gwlej Diosen' cont nabi'a", na': "Ba za' gac juisyw." Perw le'e bitw gwzenagle xtiža'gaquen'.⁹ Na' cate' yenele chac gwdile nile na'le o yenele chi' žaš contr bene' ca' chesenabia', bi žeble, le zgua'tec da' quinga cheyala' gac. Perw gague lenna' nacho na'tec na'a yeyož yežlion'.

¹⁰ Nach gože' legaque':

—Na' yesedile to yež len yeto yež yoble na' to nación len yeto nación yoble, ¹¹ na' zan cuen ga xo'chgua na' zan latje lo yežlion' ga gata' gwbin na' cue' yižgüe', na' yesac yela' guac da' yesele'e bene' le'e yaban' da' zaca' yesyebande', na' yesেžebchga benachen' neče dan' chac.

¹² 'Perw za' gac yogo' da' quinga cate' yesezene' le'e na' yosoči yososaque' le'e na' yesone' le'e lo na' bene' gwnabia' che yodao' chelen', na' yeseyixjue' le'e ližya. Na' yesেche'xoxje' le'e do lao rey na' do lao nochle bene' gwnabia' dan' chejnilaže'le neda'. ¹³ Na' cate' gac da' quinga güe'le xtiža'na'. ¹⁴ Na' le gon xbab zoacza' chaclena' le'e, nach cate' gacle lo na' bene' ca' bi cuec yichjle nacle yoži'ile xtiža'gaquen', ¹⁵ le neda' gona' le'e xbab len yela' sina' chian' cont yoži'ile xtiža'gaque' sin cbi bi gac yesene'. ¹⁶ Na' balle xaxna'le na' bene' biše'le na' biše' lježle na' bene' migw chele yesechje' yesone' le'e lo na' bene' chesegue'e le'e. Na' yesote' balle. ¹⁷ Na' yogo'ze bene' yesegue'ede' le'e dan' chejnilaže'le neda'. ¹⁸ Perw chape Diosen' le'e na' bitw güe'e latje cuiayi'le, ¹⁹ na' gone' yela' mban chele toli tocane še soale gwyo gwchejle yogo'lol dan' yesonde' le'e.

²⁰ 'Na' cate' le'ele ba besela'ac soldadw zan cue'ej cuit Jerusalenna' ben' yesedillen le'e, canan' nezele ba zoa cuiayi' ciudan'. ²¹ Cana' bene' yesenita' Jerusalén cheyala' yosoxonje'. Na' bene' že' yezica'chle yež ga mbane Judea cheyala' šja'aque' do ya'adao'. Na' bene' yesenita' yixe', bi cheyala' yesone' xbab yesyeyo'e lo' ciuda. ²² Cana' gwnežjo Diosen' castigw che xtoła' bene' ca' že' Judean', cont gac can' nyojen le'e Xtiža' Diosen'. ²³ ¡Nyaše' zjanac no'ol ca' zjanoa' xi'in na' no'ol ca' ne' chosoguaže' bidao' lo ža ca'! Leca yesesaca'zi' bene' ca' že' doxen Judean', le Diosen' ža'achgüe' legaque'. ²⁴ Soldadw ca' yesote' bale' lo gwdile na' yebale' yesেche'xoxje' nación ca' dan' zjachi' doxen yežlion'. Na' bene' ca' bi zjanaque' bene' Israel yosyočinje' yo'o ca' dan' že' Jerusalenna' na' yosolej yosošjen'. Perw ba bžia' Diosen' bia' žin ža cate' bene' ca' bi zjanaque' bene' Israel bich yesenabi'e nación Israel.

Yid Jesucriston' da' yoble

(Mt. 24:29-35, 42-44; Mr. 13:24-37)

²⁵ 'Ca nac gwbiž, bio' na' beljw ca', gac da' yebanecho len legaquen. Na' bene' že' yežlion' yesaque' tole na' yesacžejlaže' catec sšag gon nesdaon' chas chata' gaquen. ²⁶ Na' bene' že' yežlio nga yesatte' šlat yesেžebchgüe' dan' gaquen, le yogo' da' chle'echo le'e yaban' yesaquen ca' chac yežlion' cate' chxo'. ²⁷ Na' cana'ch bene' že' yežlion' yesele'ede' neda' naca' ben' gwsela' Dios golja benač, za'a to lo' bejw len yela' guac xen na' yela' bene' zaca' juisyw chia'. ²⁸ Na' cate' solao gac da' quinga, le gonchach laže'le na' le yebe. Ba zoa žin ža yida' da' yoble yebaja' le'e lo da' malen'.

²⁹ Na' Jesúsen' be'lene' legaque' to jempl, na' gože' legaque':

—Le na'šc can' chon yag yixgüigw na' bite'teze yag yoble, ³⁰ cate' chle'ele ba chebian laga' che'eñ dao' nach nezele bač zoa yela' tiemp ba. ³¹ Ca'czen' cate'

le'ele ba chac da' mal ca' ba gwnia', cana'ch nezele ba zoa gwlo'e Diosen' yela' gwnabia' che'.

³² Da' li žia' le'e, bina' yenit diaža' che le'e nita'le na'a cate' yeyož gac yogo' lol da' ca'. ³³ Le'e yaba na' yežlion' yesede čhen, perw ca' nac xtižan', gague da' te cbi gac can' žanna'.

³⁴ Na' le gon xbab cont bi gacle bene' lia na' bene' borrašw na' cont bi soale yelal yežejele. Bene' ca' yesac bene' lia na' borrašw na' bene' ca' yesyelal yesyežejde' bi yesebeze' batcan' gac yogo' da' quinga. ³⁵ Na' toz can' gac che bene' že' doxen yežlion', yesac yogo' da' quinga cate' nono chon xbab. ³⁶ Perw yogo' ža le soa le cuz batcan' gac da' quinga na' le yol güiž Diosen' cont bibi gac čhele na' gac yedyesoale len neda' naca' ben' gwseła' Diosen' golja' benačh.

³⁷ Yogo' ža gwzoa Jesúsen' bsd blo'ede' bene' yodao' blao, na' yogo' že' beyeje' lo ya'a da' nzi' Ya'a Olivos. ³⁸ Na' yogo' zil besežin bene' zan bosozenague' che' šlac bsd blo'ede' legaque' chy'o' yodao' blao.

22

Bosoxi'e cont yesezene' Jesúsen'

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Na' ba zoa gała' lni pascw caten' chesagüe' yetextil da' bibi levadura yo'on. ² Na' bꝑoz gwnabia' ca' na' bene' ca' chososed chosolo'e ley dan' bzoj da' Moisésen' beseyiljue' nacle yesone' na' bi da' yosode'ede' cont yesezene' Jesúsen' na' yesote'ne', le besežebe' še cate' bi yesone yezica'chle bene' legaque'.

³ Nach Satanásen' dan' chnabia' da' xigüe' ca' gwyo'o gwyazen lo' yichjlaždao' Judas Iscarioten' ben' goque' txen len bene' šižinw ca' zjanaque' Jesúsen' txen, ⁴ na' gwyeje' jane'e bꝑoz gwnabia' ca' na' bene' gwnabia' che bene' ca' chesape' yodao'na' cont bosoxi'e nacle gone' gwdie' Jesúsen' lo na'gaque'. ⁵ Na' leca besyebede' na' gose'e le' yosonežjue'ne' mechw. ⁶ Na' Judasen' gwxenlaže' len legaque', na' gwzolagüe' gw diljwlaže' nacle gone' gwdie' Jesúsen' lo na'gaquen' cate' bi že' bene' zan.

Jesúsen' blo'ede' legaque' can' cheyala' yesone' šjasyeza'laže' dan' gaten'

(Mt. 26:17-29; Mr. 14:12-25; Jn. 13:21-30; I Co. 11:23-26)

⁷ Na' bžin ža gała' lni caten' chesagüe' yetextil dan' bibi levadura yo'o. Naquen ža cate' chesote' xila' dao' cont šjasyeza'laže' can' bosla Diosen' da' xozxta'ogaquen' lo na' bene' Egipto ca'. ⁸ Na' Jesúsen' gwleje' Pedroa' len Juanna' na' gože' legaque':

—Le šja'ac na' le šjasini'a dan' gagwcho lo lnin'.

⁹ Na' gose'ene':

—čGa che'ndo' šjasini'ato'?

¹⁰ Nach gože' legaque':

—Le šja'ac na' cate' ba gwyo'ole ciudan' na' yežagle to bene' byo no'e to che'e nis. Na' šejlenlne' na' gan' yežinen' ¹¹ le ye' xan yo'on': "Maestron' že': Gonšco' to yo'o ga gagua' xše' že' lni nga len bene' ca' zjanaque' neda' txen." ¹² Nach gwlo'ede' le'e to quart xen dan' zoa yichjen na' ale gan' de yogo' da' chyažjecho. Na' le gwsini'a cont gagwcho na'.

¹³ Na' gosa'aque' na' yogo' can' gož Jesúsen' legaque' goc. Nach bososini'e xše' že' lnina'.

¹⁴ Na' cate' bač gwchi'e cho'a mesen' len postlw che' ca', ¹⁵ na' gože' legaque':

—Leca gwzelaža' gagua' yela' guagw che lni nga len le'e na'a za' saca'zi'a na' gata'. ¹⁶ Chnia' le'e, na'a zelao gagan'. Cate'ch ba blo'e Diosen' yela' gwnabia' che'na', cana'ch gagan' da' yoble.

¹⁷ Na' gwxi'e vas gan' yože nis uvasen', na' beyož be'e yela' choxclen che Dios, nach gwne':

—Le sin', na' le ye'ej yogo'le late' gūeje dan' yože lo' vas nga. ¹⁸ Chnia' le'e na'a zelao che'eja' vino che uvasen'. Cate' ba blo'e Diosen' yela' gwnabia' che'na', cana'ch ye'ejan' da' yoble.

¹⁹ Nach gwxi'e yetextilen' na' be'e yela' choxclen che Diosen' na' bzojxen' na' bnežjuen' legaue'. Na' gože' legaue':

—Da' nga cuerp chia' chzanlaža' neche le'e. Quinga gonle cont šjayze'ele bi zejen len le'e dan' yesote' neda'.

²⁰ Na' lecze bexae' vassen' cate' ba beyož gosagüe' xšen' na' gože' legaue':

—Dan' yože lo' vas nga zejen da' cobe dan' gwna Diosen' gone' gaclene' le'e. Na' solao gone' can' gwne', le yesote' neda' na' gwlaļ xchenan' neche le'e.

²¹ Na' da' li ben' gwdie' neda' lo na' bene' ca' chesegue'e neda' nga chagwlene' neda' txen. ²² Na' gac chia' can' nžia bia' gac, neda' naca' bena' gwseļa' Diosen' golja' beṅach, perw nyaše'chguaze nac ben' gwdie' neda' lo na' bene' ca'.

²³ Nach gosezolagüe' gosenabe lježgaue' noen' gon da' malen' nac ca'.

Gosacyože' noe' nacch blaō

²⁴ Na' lecze gosezolagüe' gosacyože' noe' nacch blaō. ²⁵ Na' Jesúsen' gože' legaue':

—Nita' bene' gwnabia' che to to nación ca' na' chesone' byen chosozenag bene' chegaue', na' bene' gwnabia' ca' chesaclaže' yesoe' bene' diža' chegaue' zjanaque' bene' güenchgua. ²⁶ Perw le'e gague can' cheyaļa' gonle. Še no le'e nacchle bene' blaō, cheyaļa' gwzeṅjwlaže'le len bene' lježle na' gonle ca' bene' xcuide' ben' bibi na' neze. Na' še no le'e chnabia'le, cheyaļa' soale gaclen lježle. ²⁷ Le gon xbab noe' nacch bene' blaō, še bena' chi' cho'a mesen' o še xmosen' ben' chon mandadw che'. Nacia'cze ben' chi' cho'a mesen' naccze' bene' blaoch. Perw neda', zoa' cont gaclena' le'e la'cze naca' Xanle.

²⁸ 'Le'e biṅa' cuejyichjle neda' la'czļa' bene' zan ba chesegue'ede' neda'.

²⁹ Na' ca' nac Xan' ba none' chia' cont nabi'a txen len le', lecze neda' ba nona' chele cont nabia'le txen len neda'. ³⁰ Na' gona' cont ye'ej gagwle txen len neda' cate' yela'le gan' nabi'a, na' cue'le cuita'na' nabia'le šižinw cuen bene' ca' zjanaque' xi'in diaža che da' Israel.

Jesúsen' gwne' Pedroa' bi chebe' še nombi'e le'

(Mt. 26:31-35; Mr. 14:27-31; Jn. 13:36-38)

³¹ Nach Jesúsen' gwne':

—Simón, ben xbab chio', Satanásen' dan' chnabia' da' xigüe' ca' ba gwnaben gaco' lo ne'en cont gonen cuejyichjo' bich šejnilažo' neda'. Na' dan' gonen len le' naquen ca' dan' chon bene' caten' chdie' trigon' lo' rner. ³² Perw na' neda' ba gwṅaba' gaclen Diosen' le' cont bi cuejyichjo' dan' chejnilažo' neda'. Na' cate' ba betinjdo' xtolo'na', gono' chach laže' bene' lježo' quinga.

³³ Nach Pedroa' gože'ne':

—Ba bechoglaža' sa'alena' le', gague ližya na'ze, san gatlencza' le'.

³⁴ Na' Jesúsen' gože'ne':

—Pedro, žia' le', biṅa' cuež jean' na'aže' cate' gac šon ni'a bi chchebo' še nombi'o neda'.

Gwne' ba zoa yosoči yososaca' bene' leaque'

³⁵ Na' gože' bene' ca' zjanaque' le' txen:

—¿Byažjele bi da' byažjele cate' gwsela' le'e jatixjue'ele xtiza'na'? Gwsela' le'e sin čbi bia'le mechw, ne bzod, na' neca bia'le xelle.

Na' gose'ene':

—Bitw bi byažjeto'.

³⁶ Na' gože' leaque':

—Perw na'a še napple mechw, cheyala' gua'len, na' lecze ca' gua'le bzod. Na' še bitw bi spada čele de, le gote' xadon chelen' cont si'le to spada. ³⁷ Čhnia' le'e gonle ca', le gac chia' can' nyojczen le'e Xtiza' Diosen' žan: “Gosone'ne' ca' bene' güen da' xinj.” Na' cheyala' gac yogo'lol dan' nyojen.

³⁸ Nach gose'ene':

—Xanto', gwna'šc nga noa'to' čhope spada.

Na' gože' leaque':

—Güesaqueczen.

Jesúsen' chol' güiže' Diosen' latje gan' nzi' Getsemani'

(Mt. 26:36-46; Mr. 14:32-42)

³⁹ Nach gwze'e gwyeje' Ya'a Olivos can' ba yolagüe' chone', na' bene' ca' zjanaque' le' txen zjana'ogüe' le'. ⁴⁰ Nach cate' besyežine' latjen' na' gože' leaque':

—Le yol güiž Dios cont bi gon gwxiyen' le'e gan.

⁴¹ Na' gwle'e len leaque' zito' ca' gan' zelao žin to yej da' gwzala'cho, na' bzoa xibe' na' bol' güiže' Dios, ⁴² gwne':

—Xa', benšca cont bi saca'zi'a na' bi yesote'nda' še ca' chazlažo', perw bi čhna'ba' gac da' žia' neda', san gac can' nao' le'.

⁴³ Na' to angl bene' za' yaba blo'elagüe' le' na' be'e le' fuerz valor. ⁴⁴ Na' šlac čhžaglaochgüe' len yichjlažda'ogüe'na' gwzolao čhžaglaoche' chol' güiže' Diosen' beyaclojite' yes. Na' nis yes čhe'na' beyaquen ca' tlab'a' güeje' čhen dan' zjanaquen čelsoñ, besyeyinjen lo yo. ⁴⁵ Na' bezeche', na' beyeje' gan' nita' bene' ca' zjanaque' le' txen, ble'ede' zjanite' chesetase' dan' leca gosacyaše'chgüede'. ⁴⁶ Na' gože' leaque':

—¿Bixčhen' čhtasle? Le čhas, le yol' güiž Dios cont bi gon gwxiyen' le'e gan.

Gosezene' Jesúsen'

(Mt. 26:47-56; Mr. 14:43-50; Jn. 18:2-11)

⁴⁷ Ne' choe'te Jesúsen' diža' cate' besežin bene' zan ga'la'ze gan' zoen'. Na' ben' le' Judas, ben' goque' txen len bene' šižinw ca' gwlej Jesúsen' cont zjanaque' le' txen, žialagüe' laogaque'. Na' gwbigue' gan' zoa Jesúsen' na' bnop'e' xague', perw gague do lažen' bene' ca'. ⁴⁸ Na' Jesúsen' gože' le':

—Judas, ¿čhnopo' neda' cont gw dio'nda' lo na' bene' quinga? neda' naca' bena' gwsela' Diosen' golja' benač.

⁴⁹ Na' cate' bene' ca' zjanaque' Jesúsen' txen besele'ede' can' gac čhe'na' nach gose'ene':

—Xanto', ¿gwyinto' bene' quinga spada četon'?

⁵⁰ Na' toe' gw dinen' mos čhe bxož blaon', gwčhogtechgüe' nague' liča.

⁵¹ Perw Jesúsen' gože'ne':

—Bich gonle ca'.

Nach gw dane' nag mosen' na' beyone' le'. ⁵² Jesúsen' gože' bxož gwnabia' ca' na' bene' ca' česenabi'e bene' ca' česape' yodao', na' bene' gole blao ca' česenabia' nación Israelen' ben' zja'ac zjasexi'e le', gože'ne':

—¿Bix'chen' nonle neda' ca to bene' gwban za'acle zedexi'le neda' len spada na' len yag? ⁵³ Yogo' žaze gwzoa' len le'e chyo'o yodao' blaon' na' bitw gwzenle neda'. Perw na' ba bžin ža gonele neda' con can' chaclaže'le, na' ba bžin ža gac can' chaclaže' Satanásen' dan' chnabia' bene' ca' chesaš lo cholen'.

Pedroa' bi gwchebe' še nombi'e Jesúsen'

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Nach gosoxe' Jesúsen' na' goseche'ene' liž ben' naque' bžoz blao che nación Israelen'. Nach Pedroa' na'ogüe' Jesúsen' zito' zito'le. ⁵⁵ Na' bosoxene' yi' chyo'o che bžoz blaona' na' gosebi'e cho'a yi'na'. Na' gwche' Pedroa' len legaque'. ⁵⁶ Na' to no'ole güen žin ble'ede' chi'e cho'a yi'na' na' gwne'e le' na' gwne':

—Lecze len benga naque' txen len Jesúsen'.

⁵⁷ Perw Pedroa' bitw gwchebe' še nombi'e Jesúsen'. Gože'ne':

—No'ole, bitw nombi'ane'.

⁵⁸ Na' gocze šlož, yeto bene' ble'ede' Pedroa' gože'ne':

—Lenczo' naco' txen len bene' ca'.

Na' Pedroa' gože'ne':

—Bitw lena' len legaque'.

⁵⁹ Gwde to hor yetoe' gwne':

—Da' licze nac benga txen len Jesúsen', le naque' bene' Galilea.

⁶⁰ Na' Pedroa' gože'ne':

—Bene', bi nezda' bi dižan' cho'o.

Na' ne' choe'te Pedroa' dižan' ca', gwchež to jea. ⁶¹ Na' Xancho Jesúsen' gwychej' gwne'e Pedroa' na' jayze'e Pedroa' diža' dan' gož Xanchon' le' caten' gwne': "Bina' cuež jean' na'aže' cate' gac šone ni'a bi chebo' še nombi'o neda'."

⁶² Na' Pedroa' beze'e leca gwchežyaše'.

Gosezi'diže' Jesúsen'

(Mt. 26:67-68; Mr. 14:65)

⁶³ Na' bene' ca' goseche'e Jesúsen' gosezi'diže' le', na' gosot goseyine' le'.

⁶⁴ Na' bosocheje' to lache' lao Jesúsen' na' goseyine' le' na' gose'ene':

—Gwneya'ašč non' chyin le'.

⁶⁵ Na' zanch diža' da' gosene' gosezi'diže' Jesúsen'.

Goseche'e Jesúsen' lao bene' ca' chesenabia' nación Israelen'

(Mt. 26:59-66; Mr. 14:55-64; Jn. 18:19-24)

⁶⁶ Na' cate' gwyneni', bene' gole blao ca' chesenabia' nación Israelen' na' bžoz gwnabia' ca' na' bene' ca' chososed chosolo'e ley dan' bzoj da' Moisés be-sežague' na' gosone' mandadw gwyej Jesúsen' laogaque' gan' chesenabi'ena', nach gose'ene':

⁶⁷ —Gwnašč neto' še le' naco' ben' gwlej Diosen' cont nabi'o nación chechon'. Nach gože' legaque':

—Šaca' nia' le'e neda' naca' Criston' ben' gwlej Diosen' cont nabia' nación chechon', bitw šejle'le chia'. ⁶⁸ Na' šaca' bi nabda' le'e, neca yoži'ile xtižan', neca gwsanlenda. ⁶⁹ Neda' naca' ben' gwsela' Diosen' golja' benach. Na' na'a cui'a cuit Diosen' nabi'a txen len le', Dios ben' chnabia' doxen.

⁷⁰ Nach yogüe' yose'ene':

—¿Len' naco' dogualje Xi'in Diosen'?

Na' gože' legaque':

—Le can' žale nan' naca'.

⁷¹ Na' gosene':

—¡Noch no chyažje no gagw xya che'! Chio' ba benecho na'a chne' che Diosen' dan' že' ca'.

23

Bosocuiše' Jesúsen' lao Pilaton'

(Mt. 27:1-2, 11-14; Mr. 15:1-5; Jn. 18:28-38)

¹ Na' yogo'lol bene' ca' gosezože'e na' goseče'ene' lao Pilaton' ben' nac gobernador. ² Na' gwzolaos bosocuiše' Jesúsen' gosene':

—Ba gwchoglaoto' che benga cheyala' gate' dan' chde' chgo'oyele' nación Israelen' cont yesejle'e che' na' lecze chžone' chixjwto' da' cheyala' chixjwto' lao rey César. Na' lecze že' len' naque' Criston' ben' gwlej Diosen' cont nabi'e nación cheton'.

³ Nach Pilaton' gwnabde'ne' gože'ne':

—¿Len' naco' rey che bene' Israel?

Nach Jesúsen' boži'e xtižen', gwne':

—Can' gwnao'na', can' naquen.

⁴ Nach Pilaton' gože' bžox ca' len yogo'lol bene' ca' zjanžag lagüe'na':

—Bibi nla'lagüe' še bi doła' nap benga.

⁵ Perw na' gosenече', gosene':

—Chde' chgo'oyele' yogo' bene' že' distritw Judea nga yesejle'e dan' chsed chlo'ede'. Gwzolaogüe' bsd blo'ede' distritw Galilean' perw lencze nga bach chsed chlo'ede' na'a.

Pilaton' gwsele' Jesúsen' lao Herodes

⁶ Cate' bene Pilaton' can gosene', nach gwnabe' še Jesúsen' naque' bene' Galilea. ⁷ Na' cate' goče'ede' Jesúsen' ze'e Galilean' gan' chnabia' gobernador Herodes, na' gwsele'ne' lao Herodes, le ca hora' zoa Herodes Jerusalénna'.

⁸ Cate' Herodes ble'ede' le' bebede', le ba goc sša che'nde' le'ede' le'. Ba bende' xtiža' Jesúsen' na' zoe' lez le'ede' gone' to da' zaca' yebande'. ⁹ Nach da' zan da' gwnabde' Jesúsen', perw ne to xtižen' ca boži'i Jesúsen'. ¹⁰ Bžox gwnabia' ca' na' bene' ca' chososed chosolo'e ley dan' bžoj da' Moisés gosezeche' gała'ze na' bosocuiše'ne' len zan diža'. ¹¹ Na' Herodes len zan soldadw che' ca' gsezolaogüe' gosezi'diže'ne' na' gosonle' che'. Nach cate' beyož bosoguacue'ne' to lache' xdan juisyw, gosesele'ne' da' yoble lao Pilaton'. ¹² Na' žana' Pilaton' len Herodes gwzolaos gosaque' migw, la'czla' cate' za' gac ca' besegue'e lježe'.

Gosechoglagüen' gat Jesúsen'

(Mt. 27:15-26; Mr. 15:6-15; Jn. 18:39-19:16)

¹³ Nach Pilaton' botobe' bžox gwnabia' ca' na' bene' ca' chesenabia' nación Israelen' len yezan bene' yež, gan' chesone' yela' justisen'. ¹⁴ Nach gože' legaque':

—Le'e bedesanle benga lagua' nga, na' gwnale chde' chgo'oyele' bene' Israelen' yesone' contr gobiernna'. Neda' bach gwnabyožda'ne' lao le'e ca xyan' dan' chagwle che', ne to da' xinj ca chželda' še bi dan' none'. ¹⁵ Na' lecz ca' Herodes bitw bi xtole' bželde', na' besele' le' laoto' nga. Na' nachbia' bibi ben benga da' cheyala' gate'. ¹⁶ Na' na'a con gona' mandadw yeseyine' le' na' gwsana'ne'.

¹⁷ Gwne' ca', le yogüiz chsane' to bene' pres lo lni pascw chegaque'. ¹⁸ Na' yogo' bene' ca' že' bososye'e toz ca gosene':

—Chojtega benga gate' na' gwsano' Barrabásen'.

19 Na' Barrabásen' goseyixjue'ne' ližya da' bxie' gwdile lo' ciudan' na' goque' to bene' güet bene'. 20 Na' da' yoble Pilaton' gwñabde' legaque' še gwsane' Jesúsen', 21 perw bososye'e zižjeh gosene':

—¡Bde'e le'e yag cruz! ¡Bde'e le'e yag cruz!

22 Da' gwyon ni'a gož Pilaton' legaque':

—¿Bixe da' xinj nonen'? Ne to da' xinj bi chželda' še bi none' da' zaca' gate'. Na' gona' mandadw yeseyine' le' na' gwsana'ne'.

23 Perw gosone' byen bososye'e yelate' zižjeh gosenabe' gwde'ene' le'e yag cruz. Nach Pilaton' bzenague' čhegaquen' 24 na' gwčhoglagüe' che' gac can' gosenabde' le'. 25 Nach bsane' Barrabás ben' zjanyixjue' ližyan', ben' gosenabe' gwsane', la'czla' Barrabásna' goque' ben' bxie' gwdile na' bene' güet bene'. Na' Pilaton' bodie' Jesúsen' lo' na'gaque' cont yesone' len le' ca chesaclaže'.

Bosode'e Jesúsen' le'e yag cruz

(Mt. 27:32-44; Mr. 15:21-32; Jn. 19:17-27)

26 Na' šlac zjanče'ene' gan' yesote'ne' besyežague' to bene' yež Cirene le' Simón, za' zeze'e yiže'. Na' bosogüe'ene' yag cruz čhe Jesúsen' na' gwyetje' gwda'ogüe' Jesúsen'.

27 Na' bene' zan zjana'ogüe' le' na' zjalen zan no'ole. Na' no'ol ca' gwzola' bososye'e gosebeže' čhe'. 28 Na' Jesúsen' gwyechje' na' gože' legaque':

—No'ole Jerusalén, bitw cuežle čhia'. Yejni'a le' cuež čhele na' čhe xi'ñle.

29 Da' li gwžin ža cate' yesene': "Mbalaz nita' no'ole güiž no'ole cono gwxa' na' nono bguaze'." 30 Cana' yeseñablaže' yesebiže ya'a ca' cont čhenen' legaque'. Yeseñablaže' čhe' bđinj goten' legaque'. 31 Še yesot bene' neda' len bibi xtoła' de, jnacchxe yesonde' le'e nacle bene' güen da' xinj!

32 Na' lecze goseče'e chop bene' güen da' xinj cont bosode'e legaque' le'e yag cruz can' gosone' len Jesúsen'. 33 Na' cate' besežine' latje gan' nzi' Latje čhe Žit Yichj Bene' Guat, bosode'e Jesúsen' le'e yag cruzen'. Na' lecze bosode'e bene' mal ca' chop le'e yag cruzen' len le', toe' gwda' cuit Jesúsen' licha, na' yetoe' gwda' cuiten' robes. 34 Na' Jesúsen' gwne':

—Xa', bezi'xen čhe bene' quinga chesegue'ede' neda'. Gague zjanезде' bin' chesone'.

Na' gosone' rifa cate' besyele'e xałane' cont gota'bia' noe' yechelen. 35 Na' bene' zan besyežejde' le'. Na' bene' gwnabia' čhegaque' ca' gosonle' čhe', gosene':

—Yezica'chle bene' bosle'. Še da' li naque' Criston' ben' gwlej Diosen' yedeñabi'e, žbixčhen' bi chosla cuine'?

36 Nach soldadw ca' lecz ca' gosonle' čhe'. Gosebigue' gała'ze gan' zoa yag cruzen' na' bosonežjue'ne' vino zichj. 37 Nach gosene':

—Še len' naco' rey čhe bene' Israel, bosla cuino'.

38 Na' yichj yag cruz čhe'na' gwzoa to dan' nyojen, žan: "Bengan' rey čhe bene' Israel." Na' byojen diža' griego, diža' latín na' diža' hebreo.

39 Na' to bene' mal ben' da' le'e yag cruz cuit Jesúsen' lecze gwzi'diže'ne', gože'ne':

—Še le' naco' ben' gwlej Diosen' cont yedeñabi'o nación' chechon', bosla cuino' na' lecze bosla neto'.

40 Na' ben' yeto gwdile' bene' lježen' gože'ne':

—¿Bi chžebo' Diosen'? Chio' ba da'cho le'e yag cruz cont gatcho can' da' le',
 41 na' dan' gat chio' naquen licha cont si'cho castigw che xtoła'chon'. Perw
 benga, bitw bi doła' nape'.

42 Nach gože' Jesúsen':

—Jesús, šjayza'laže'go' neda' cate' žin ža nabi'o.

43 Na' gož Jesúsen' le':

—Da' li chnia' le', na'aža soaczo' len neda' gan' zoa Diosen'.

Can' goc caten' got Jesúsen'

(Mt. 27:45-56; Mr. 15:33-41; Jn. 19:28-30)

44 Na' cate' bžin guagwbiž goc chol doxen lo yežlion' bžinte do cheda šone.

45 Bitw bseni' gwbižen'. Na' ca nac lache' dan' ze lo' yodao' blaona', bcheza'
 gacholen. 46 Nach Jesúsen' bosye'e zižje gwne':

—Xa', chon cuina' lo nao', bezi' spiritw chia'na'.

Na' beyož gwne' ca' gote'.

47 Na' cate' ble'e xan soldadon' can' goquen', benxene' Diosen' na' gwne':

—Da' licze benga goque' bene' gwyej to licha.

48 Na' bene' zan bene' besežag besele'ede' can' goc na' yogo'lele'
 besyeya'aque' chesebaže' lcho'e gosacde' da' juisyw ba goc. 49 Na' yogo' bene'
 ca' zjanombia' Jesúsen', na' len no'ol ca' zjanao' le' caten' beze'e Galilean',
 gosezeche' zito'le besele'ede' da' ca' goquen'.

Bosocuaše' Jesúsen'

(Mt. 27:57-61; Mr. 15:42-47; Jn. 19:38-42)

50 Na' zoa to bene' ciuda Arimatea gan' mbane Judean' na' le' José. Naque'
 txen len bene' ca' chesenabia' nación Israel, na' naque' to bene' güen bene'
 zej to licha. 51 Ba zoe' chbeze' batcan' solao nabia' ben' sela' Diosen'. Bitw
 bene' txen len bene' ca' gosechoglagüen' yesote' Jesúsen'. 52 Bena' gwyeye'
 lao Pilaton' jaynabe' cuerp che Jesúsen'. 53 Na' beletje'ne' le'e yag cruzen' na'
 btobe' le' to lache' xen na' la' bcuaše'te' le' to lo' bloj da' nche'ene' le'e yej. Na'
 naquen to ba cobe ga nono na' yosocuaše'. 54 Na' yogo' da' ca' goc ža cate'
 chososiñi'e che ža che Dios. Na' ba bžin hor cate' cheya'la' yosocueze' bite'teze
 žin o mandadw da' chesone'.

55 Na' no'ol ca' za'aclene' Jesúsen' cate' gwze'e distritw Galilean' ja'aclene'
 Josén' cont besele'ede' ba che Jesúsen' gan' gwxa cuerp che'na'. 56 Nach
 gosa'aque' na' gosone' to da' chla' zix' da' yeseyebe' cuerp che Jesúsen'. Na'
 ža che Diosen' gosenita'cze can' ža ley chegaquen', bibi žin gosone'.

24

Jesúsen' bebane' ladjo bene' guat

(Mt. 28:1-10; Mr. 16:1-8; Jn. 20:1-10)

1 Bał dmigw ja'ac no'ol ca' da' yoble cho'a bloj gan' bosocuaše' Jesúsen' na'
 gosoxe' da' ca' ba gosone' da' chla' zix', na' yebał no'ole ja'aclene' legaque'.

2 Na' cate' besežine' na' besele'ede' ba bga'a yejen' dan' bosode'e cho'a blojen'.

3 Na' goso'e, na' bitw besyeželde' cuerp che Xancho Jesúsen'. 4 Šlac zjanite'
 chesyebande' che da' quinga, besele'ede' chope bene' zjazeera cuitgaquen'
 zjanyaze' lache' da' chactichgua. 5 Na' no'ol ca' besežebe' na' bosochegue'
 yichjgaquen' gosene'e lo yole. Nach bene' ca' gose'e no'ol ca':

—¿Bixchen' cheyljwle to bene' mban nga ladjo bene' guat? 6 Notoch no nla'
 nga. Ba bebane' ladjo bene' guat na' mbancze'. Le šjayza'laže' can' gwne' cate'

ne' zoale Galilean'. ⁷ Gwne' le' naque' ben' gwseła' Diosen' golje' benach. Na' gwne' cheyala' gaque' lo' na' bene' mal' ca' cont yesote' le' yosode'ene' le'e yag cruz, na' yeyon' ža yebane' ladjo bene' guat.

⁸ Na' no'ol' ca' jasyeze'ede' xtiže'na'. ⁹ Na' besyeya'aque' cho'a blojen' na' jasedixjue'ede' yogo' da' ca' len postlw' ca' šnej' na' len yezica'chle' bene' ca' nita' txen' len legaue'. ¹⁰ Na' no'ol' ca' jasedixjue'ede' postlw' ca' zjanaque' bene' quinga: María bene' Magdala, na' Juana, na' María xna' Jacobo, na' len yebale' no'ole. ¹¹ Na' postlw' ca' bitw' gosejle'e che' no'ol' ca', gosacde' chesenazen'.

¹² Perw' na' Pedroa' la' gwzoža'te' na' la' gwza'seste' bžine' cho'a blojen' na' bcheque' na' ble'ede' lache' ca' zjachin' lo' yo. Na' beze'e' bebanchgüede' che' da' ca' ble'ede'.

*Blo'elao Jesúsen' chop bene' ca' šlac zja'aque' Emaús
(Mr. 16:12-13)*

¹³ Na' lecze' ža dmigwna' chop bene' ca' gosaque' Jesúsen' txen' ja'aque' yež' dan' nzi' Emaús, do šnej' mil' metr' zito' par' Jerusalénna'. ¹⁴ Na' legacze' bosošalje' che' yogo' da' ca' ba goquen'. ¹⁵ Ne' chesone' xbab' na' ne' chesoe'te' diža' chen' cate' Jesúsen' gwbigue' len legaue' na' gwza'lene' legaue' txen, ¹⁶ perw' bitw' gosacbe'ede' noxen' zejlen' legaue'. ¹⁷ Nach gože' legaue':

—žBi dižan' choe'le' šlac' ngo'ole' nezen'? žBixčhen' chacyaše'le'?

¹⁸ Na' toe' le' Cleofas' boži'e' xtižen' gože'ne':

—žNacxe' chaquen' gwza'o' Jerusalén' na' biña' gacbe'edo' da' ca' ba goc' lo' ciudan'? žTozo' le' zo' Jerusalén' na' biña' gacbe'edo'!

¹⁹ Na' Jesúsen' gože' legaue':

—žBi goquen' žale' ca'?

Nach' gose'ene':

—Dan' goc' che' Jesús' bene' Nazaret. Goque' to' bene' gwseła' Dios' cont' be'e' xtižen', na' Diosen' len' benachen' besyebede' yela' guac' chen' dan' blo'e' na' diža' dan' be'e. ²⁰ Perw' na' bžoz' gwnabia' checho' ca' len' bene' ca' chesenabia' nación' chechon' gosone' le' lo' na' bene' ca' gosechoglagüe' che' cheyala' gate', na' bosode'e' le' le'e' yag' cruz. ²¹ Ba' goc' šone' ža' na'a' goc' da' quinga. Na' neto' gwzoato' lez' Diosen' gwsele' le' cont' yebeje' nación' checho' lo' da' malen'. ²² Na' no'ol' ca' zjanac' txen' len' neto', bale' goso'e' diža' da' chebaneto', ja'aque' cho'a' ban' be'e' ²³ na' bitw' besyeželde' cuerp' che'na'. Cate' besyela'aque' gosene' besele'eda'ogüede' angl' bene' gose'e' legaue' ba' bebane' ladjo' bene' guat' ca'. ²⁴ Na' lecze' to' chop' bene' byo' bene' ca' zjanaque' txen' len' neto' ja'aque' cho'a' ban' na' besele'ede' cayanen' gosena' no'ol' ca' naquen', perw' bi' besele'ede' Jesúsen'.

²⁵ Na' gož' Jesúsen' legaue':

—Nyaše'chguaze' le'e' bi' chejni'ile' na' bi' chejle'le' yogo' dan' bosozoj' bene' ca' gwseła' Diosen' goso'e' xtižen' cani'. ²⁶ žChaquele' bi' cheyala' gac' dan' ba' goca'? Cristo' ben' gwlej' Diosen' cont' yedenabi'e, benen' byen' gwzaca'zi'e' yogo' da' quinga' ba' goc', perw' yeyoža' la'laon' naque' bene' zaca' juisyw.

²⁷ Na' be'e' diža' len' legaue' bsed' blo'ede' legaue' yogo' dan' nyoj' che'na' le'e' Xtiža' Diosen', gwzolaoteque' len' dan' bzoj' da' Mois' na' len' dan' bosozoj' yezica'chle' bene' gwseła' Diosen' goso'e' xtižen' cani'.

²⁸ Na' besežine' gala'ze' yežen' gan' zja'aquen', na' Jesúsen' bene' ca' chon' bene' šejch' yelate' zito'ch. ²⁹ Perw' bene' ca' gosone' byen' yega'ane' len' legaue', gose'ene':

—Yega'an̄czo' len neto', le ba chaḷ na' ba nac bagwže' par šejo'.

Na' gwyo'e cont yega'an̄lene' legaque'. ³⁰ Na' šlac zjachi'e cho'a mesen' txen, Jesúsen' gwxi'e yetextilen' na' be'e yela' chox̄c̄len che Diosen' na' bzoxjen' bnežjuen' legaque'. ³¹ Cana'ch gosacbe'ede' le'na'. Na' šlac ne' nite' ca' con beñite'. ³² Nach gose' lježgaque':

—Leca bebe lažda'ochon' cate' be'lene' chio' diža' chanez na' bsd blo'ede' chio' can' nyojen che' le'e Xtiža' Diosen'.

³³ Na' la' besyeya'actie' jaya'aque' Jerusalénna' na' besyěžine' gan' zjandop zjanžag postlw ca' šnej len beñe' ca' yezica'chle. ³⁴ Na' beñe' šnej ca' gose'e beñe' ca' za' besyěžin:

—Da' licze ba beban X̄anchon'. Ba blo'elagüe' Simónna'.

³⁵ Nach beñe' ca' chop gose'e legaque' dan' goc šlac zjangüe'e nezen', na' gose'e legaque' besyeyombi'e le' cate' bzoxje' yetextilen' cont yesagüen'.

Jesúsen' blo'elagüe' beñe' ca' zjanaque' le' txen
(Mt. 28:16-20; Mr. 16:14-18; Jn. 20:19-23)

³⁶ Ne' cheso'e'te' dižan' ca', cate'cze gwzecha Jesúsen' gachol. Nach gože' legaque':

—Le soa binlo len xbab dan' yo'o lo' yichjlažda'olen'.

³⁷ Perw leca besežebe' na' besyebande', gosacde' še chesele'ede' b̄xin che da' beñe' guata'. ³⁸ Nach Jesúsen' gože' legaque':

—¿Biçhen' chacle tole? na' ¿biçhen' chonle xbab ca' lo' yichjlažda'olen'? ³⁹ Le na'šc ni'a na' nga cont gacbe'ele nedan'. Le can neda' cont gacbe'ele. Šaca' naca' beñe' guat, bi nac žit bela' chia' ca dan' chle'ele nga.

⁴⁰ Beyož gwne' ca', blo'ede' legaque' ni'a ne'e ca'. ⁴¹ Na' legaque' bina' yeyož yesejle'e catec chesyebande' na' catec chesyebede'. Nach Jesúsen' gože' legaque':

—¿De late' da' gagua'?

⁴² Nach bosonežjue'ne' late' yid beḷ gagüe' na' late' chixe beser da' yože šina'ba'. ⁴³ Gwxi'en na' gwdagüen' laogaquen'. ⁴⁴ Nach gože' legaque':

—Ba gwnia' le'e cate' ne' zoalena' le'e cheyaḷa' gac yogo'loḷ da' ca' bsi' Diosen' x̄neze zjanyoj chia' le'e ley dan' bzoj da' Moisés, na' le'e dan' bosozoj beñe' ca' goso'e xtiža' Diosen' cani', na' lecz ca' da' nyoj le'e Salmos ca'.

⁴⁵ Nach ben Jesúsen' cont gosejni'ide' da' ca' zjanyoj che' le'e Xtiža' Diosen'. ⁴⁶ Na' gože' legaque':

—Benen byen goc da' quinga cont goc can' nyojen žan neda' gata' na' yebana' ladjo beñe' guat yeyoñ ža, neda' naca' Cristo ben' gwlej Diosen' yedenabia'. ⁴⁷ Na' le'e cheyaḷa' güe'le xtiža'na' len beñe' že' yogo' nación. Solaotecle güe'len Jerusalén. Güe'le xtižan' nale cheyaḷa' yesyetinje benachen' xtola'gaquen' cont Diosen' yezi'xene' chegaque'. ⁴⁸ Le'e cheyaḷa' güe'le diža' che da' quinga ba ble'ele dan' ba goc chia'. ⁴⁹ Na' lecze sela' Spiritw che X̄a' Diosen' yedesoan len le'e can' gwnen'. Na' le yega'an̄ lo ciuda nga na'a cuezle goñ X̄a' Diosen' le'e yela' guac da' za' yaba.

Beyep Jesúsen' yaba
(Mr. 16:19-20)

⁵⁰ Na' Jesúsen' gwche'e legaque' ja'aque' gan' chi' yež dan' nzi' Betania na' gwliis ne'e gwñabde' Diosen' gone' cont nite' mbalaz. ⁵¹ Na' ca beyoža' beyepe' yaban'. ⁵² Na' beñe' ca' gosaque' le' txen besyega'añe' yešlož dao' gosonxene'

Jesúsen' nach jaya'aque' Jerusalénna', chesyebchgüede'. ⁵³ Na' gwnita'teze' lo' yodao' blaona' chesonxene' Diosen'. Da' na'ze chzoja' ña'a.

DIŽA' GÜEN DAN' BZOJ SAN JUAN

Jesucristo ben' nzi' Xtiža' Dios golje' goque' beṇač

¹ Cate' gwxe yežlion' ba zoacze ben' nzi' Xtiža' Dios. Zoe' len Diosen' na' lecze naque' Dios. ² Cate' gwxe yežlion' ba zoacze' len Diosen'. ³ Len' bene' yogo' beṇač, yogo' angl, yogo' da' ca' beyac da' mal, yogo' beyixe' na' bite'teže da' dech. Bibi de da' gwxe da' bi ben ben' nzi' Xtiža' Dios. ⁴ Le' nse'e yela' mban. Na' ben' ba zjanape' yela' mban toli' tocaṇe da' non'e', legaquen' ba yo'o be'ni' lo' yichjlažda'ogaquen'. ⁵ Ben' nzi' Xtiža' Dios bide' nse'e be'ni' che yichjlaždao' beṇač'en', na' la'czla' bene' zan bi gosejnilaže'ne' na' bi gwyo'o be'ni' čhen' lo' yichjlažda'ogaque', bi gosezaquede' yosocue'eje' be'ni' čhe'na'.

⁶ Gwzoa to beṇe' le Juan, na' Diosen' gwsele'ne'. ⁷ Juanna' ben' bzoe' beṇe' nis bedeye'e diža' čhe ben' nsa' be'nin', cont yogo' beṇač guac yesejnilaže'ne'. ⁸ Gague Juanna' nac beṇe' nsa' be'nin', san le' bedeye'e xtiža' ben' nsa' be'ni' čhe yichjlaždao' beṇač'en'. ⁹ Ba bžin ža be'ni' da' nac da' dogualje ba blan' yežlio nga, na' blan' cont gwsenin' lo' yichjlaždao' note'teže beṇe'.

¹⁰ Ben' nzi' Xtiža' Dios zoe' yežlion' cate' gwxteten. Na' la'czla' len' bene' yežlion' ben' že' yežlion' bi gosacbe'ede' non' naque'. ¹¹ Golje' ladjo neto' beṇe' gualaž čhe', perw zan neto' beṇe' gualaž čhe' bi gwyejle'to' čhen'. ¹² San balteže chio' gwyejle'cho čhe', chio' gwyejnilaže'chone', beṇe' cont naccho xi'in Dios. ¹³ Na' gague lagüe goljcho nita' xaxna'cho zjanaque' beṇe' bela' čhen ba naccho xi'in Dios. Na' gague lagüe to beṇe' byo gwzualene' to no'ole ba naccho xi'in Dios, na' gague lagüe beṇe' byon' goclaže' soa xi'ine' ba naccho xi'in Dios, san da' chejnilaže'chone', da'nan' non Diosen' chio' xi'ine'.

¹⁴ Jesucristo ben' nzi' Xtiža' Diosen' golje' goque' beṇač na' gwzoe' len neto'. Na' ble'eto' naque' beṇe' zaca' juisyw, le togue' naque' dogualje Xi'in Dios. Leca nži'ilaže'de' chio' beṇač na' bedezejni'ide' chio' diža' li čhe Diosen'.

¹⁵ Juanna' ben' bzoe' beṇe' nis be'e diža' čhe', gwne':

—Čhe bengan' bi'a diža' cate' gwnia: "Beṇe' za' za' zaca'che' ca neda', le ba zoacze le' cate' biṇa' soa' neda'."

¹⁶ Jesucriston' nži'ilaže'chgüede' yogo' chio' chejnilaže'chone' na' zoacze' chaclenchgüe' chio'. ¹⁷ Da' Moisésen' bzejni'ide' da' xozxta'o neto' beṇe' Israel ley čhe Diosen' na' chlo'en yogo'cho napcho dola', na' Jesucriston' bedelo'ede' nži'ilaže' Diosen' chio' beṇač na' bedezejni'ide' chio' diža' li čhe Diosen'. ¹⁸ Nono na' soa beṇe' ba ble'ede' Diosen'. Toz ben' nac dogualje Xi'in Dios beṇe' tliša' ba bzejni'ide' chio' beṇač can' nac yichjlaždao' Diosen', le čacchgüe Diosen' le'.

Juan ben' bzoe' beṇe' nis be'e xtiža' Jesúsen' (Mt. 3:11-12; Mr. 1:7-8; Lc. 3:15-17)

¹⁹ Beṇe' chesenabi'e nación Israel četon' beṇe' že' Jerusalén gososele' to čhope bžox na' yebaḷe beṇe' gosaljē lo diaža čhe da' Leví cont gosenabde' Juanna' non' naque'. ²⁰ Na' Juanna' bi bedi'ide', be'e diža' li gože' legaque':

—Gague nedan' Cristo ben' chbezcho sela' Diosen' yedenabi'e nación čechon'.

²¹ Nach gose'ene':

—¿Nox naco'? ¿Naco' da' Elías ben' be' xtiža' Diosen' cani'?

Na' gože' legaque':

—Bi naca' le'.

Nach gosenabde' le':

—¿Naco' ben' naquen yide' yedeye'lene' neto' xtiža' Diosen'?

Na' boži'en gwne':

—Bi naca'.

²² Nach da' yoble gosenabde' le':

—¿Non' naco'? cont ye'to' bene' ca' gosesele' neto'. ¿Bi ža togo' che cuino'?

²³ Nach Juanna' gože' legaque':

—Neda' naca' ben' chne zizje to latje daš, žia: “Le gwža' yichjlažda' olen' cont gwzenagle che Xanchon' cate' yide'”, can' gwna da' Isaías ben' be' xtiža' Diosen' cani'.

²⁴ Bene' ca' ja'ac lao Juanna', bene' fariseo ca' gosesele' legaque'. ²⁵ Nach gose'ene':

—¿Bixchen' chzo' bene' nis še bi naco' Criston' neca naco' Elíasen' na' neca naco' ben' chbezcho yedeye'e xtiža' Diosen'?

²⁶ Nach Juanna' gože' legaque':

—Neda' chzoha' bene' nis, na' gachol le'e ba zoa to bene' bina' gombia'le.

²⁷ Len' za' gwlo'elagüe' na' zaca'che' ca neda', na' da' nacchgüe' bene' zaca' bitw zaca' gona xmandadoe' lechja' no xele'.

²⁸ Yogo' da' quinga goquen gan' nzi' Betábara dan' chi' yešļa'a yegw Jordán gan' chzoha' Juanna' bene' nis.

Jesúsen' yeque'e xtola' benachen'

²⁹ Na' beteyo Juanna' ble'ede' zej Jesúsen' gan' zoen' na' gože' ben' chosozenag che':

—Le na' ben' za' nga, Diosen' ba gwsele'ne' cont yeque'e xtola' benachen'. Bena' zaca'lebe' ca xila' dao' ben' chot chio' bene' Israel cont Diosen' chezi'xene' xtola'chon'. ³⁰ Che len' bi'a diža', gwnia: “Ben' za' za' zaca'che' ca neda', na' le' ba zoacze' cate' bina' soa' neda'.” ³¹ Neda' bi gocbe'eda' non' naque' perw Diosen' bzejni'ide' neda', na' da'nan' zedezoa' bene' nis cont yogo' chio' bene' Israel gacbe'echo non' naque'.

³² Juanna' lecze gwne':

—Ble'eda' cate' betj Spiritw che Diosen' yaban' bžinen gan' zoa Jesúsen'. Bžinen ca to ngolbex na' bega'anen len le'. ³³ Neda' bi gocbe'eda' še Jesús nan' naque' ben' gwseļa' Diosen', nach Dios ben' gwsele' neda' chzoha' bene' nis gože'nda: “Le'edo' yetj Spiritw chia' na' yega'anen len bene' ba mbeja'. Len' naque' bene' gon cont soa Spiritw chian' lo' yichjlaždao' bene' na' nabian' legaque'.” ³⁴ Ba ble'eda' goc can' gwne' na' cho'a diža' le' bengan' Xi'in Dios.

Bene' nechw ca' gwlej Jesúsen' cont gosaque' le' txen

³⁵ Beteyo Juan ben' bzoa bene' nis zeche' da' yoble len yečhope bene' zjanaque' txen len le'. ³⁶ Na' cate' ble'ede' gwde Jesúsen', nach gože' bene' ca': —Le na' ben' gwseļa' Diosen' ben' zaca'lebe' ca xila' dao' ben' chot chio' bene' Israel cont Diosen' chezi'xene' xtola'chon'.

³⁷ Na' cate' bene' ca' čhope, ben' zjanaque' txen len Juanna', gosende' can' gwnen' nach ja'aclene' Jesúsen'. ³⁸ Nach beyečhj Jesúsen' na' gwne'e legaque' zjana'ogüe'ne', na' gože' legaque':

—¿Bi chaclaže'le'?

Na' gose'ene':

—Maestrw, žgan' zo'?

³⁹ Nach gože' legaque':

—Le šo'o na' le'ele.

Nach ja'aclene'ne' na' besele'ede' gan' zoen', na' besyega'anlene' le' žana', le ba nac bagwže', ca do cheda tap.

⁴⁰ Na ca nac bene' ca' chope' bosozenag xtiža' Juanna' na' gosa'ogüe' Jesúsena', toe' Andrés, bene' biše' Simón Pedro. ⁴¹ Na' Andrésena' za' gone' bichle da' za' gone' na' jel' güiže' Simón bišena' na' gože' le':

—Ba bežaglaoto' ben' chesene' Mesías, ben' ba gwlezcho yide' yedenabi'e nación Israel chechon'. —Na' Mesías zeje diža' Cristo.

⁴² Nach Andrésena' gwche'e bene' bišena' gan' zoa Jesúsena'. Na' cate' Jesúsena' ble'ede' Simónna' gože'ne':

—Len' Simón xi'in Jonás. Perw yososi' bene' le' Cefas. (Na' Cefas zeje diža' Pedro.)

Jesúsen' gwleje' Felipe na' Natanael cont bsed blo'ede' le'gaque'

⁴³ Beteyo Jesúsena' gwchoglagüen' yeyeje' Galilean' na' jañe'e Felipena' na' gože'ne':

—Yo'o len neda'.

⁴⁴ Felipena' goque' bene' Betsaida gan' nac laž Andrésena' len Pedron'. ⁴⁵ Nach Felipena' jañe'e Natanaelena' na' gože'ne':

—Bač ble'eto' ben' bzoj da' Moisésena' xtižena' le'e da' ca' gan' bzoje' ley chechon', na' lezce xtiže'na' bosozoj bene' ca' gosó'e xtiža' Diosena' cani'. Len' Jesús bene' Nazaret, ben' nac xi'in José.

⁴⁶ Nach Natanaelena' gože'ne':

—¿Bat benecho yesene' Nazaret na' choj bene' zaca'?

Nach gož Felipena' le':

—Yo'o cont le'edo'.

⁴⁷ Na' Jesúsena' ble'ede' bač zej Natanaelena' gan' zoe'na' nach gwne':

—Na' za' to bene' Israel gualaž chechon' bene' naque' bene' güen. Ne late'ze bi naque' bene' gwxiye'.

⁴⁸ Natanaelena' bende' xtiža' Jesúsena' na' gože'ne':

—¿Nac chac nombi'o neda'?

Na' Jesúsena' gože'ne':

—Ble'eda' le' ślac zechao' xan yag yixgüigw cate' za' ne Felipena' le'.

⁴⁹ Nach Natanaelena' gwne':

—Maestrw, len' naco' dogualje Xi'in Dios. Len' naco' ben' chbezto' seļa' Diosena' yedenabi'o nación Israel chechon'.

⁵⁰ Na' Jesúsena' gože'ne':

—¿Da' gwnia' ble'eda' le' xan yag yixgüigw nan' chejli'o chia'? Da' zaca'ch ca da' quinga za' le'edo'. ⁵¹ Da' li chnia', le'ele yabana' gan' zoa Diosena' gaquen ca to da' chyaljo na' bene' ca' zjanac angl che' chep chetj yesaque' yežlio gan' zoa' nga, le neda' naca' ben' gwseļa' Dios golja' benač.

2

Gota' to yela' güešagna' yež da' nzi' Caná

¹ Beyon ža gota' to yela' güešagna' yež da' nzi' Caná gan' mbane distritw Galilea. Na' xna' Jesúsena' gwyeje' liž ben' gan' gota' yela' güešagna'na'. ² Na' lezce gosaxe' Jesúsena' len bene' ca' zjanaque' le' txen cont ja'aque' gan' chac yela' güešagnan'. ³ Na' bebiž vino dan' chese'ej bene' ca' že'na', na' xna' Jesúsena' gože' le':

—Bich bi vino chegaque' de.

⁴ Na' gož Jesúsena' le':

—¿Bixchen' žo' ca'? le biña' žin hor gwlo'a non' naca'.

⁵ Na' xne'ena' gože' bene' ca' cheson mandadon':

—Le gon bite'tez da' ne'.

⁶ Na' nita' xop yeso' de yej ga chož nis da' chosochin bene' Israel gualaž cheto' ca' par chesa' cheseyib cuine' can' ža ley cheton'. Na' to to yej ca' chožen do xono' che'e o do ši che'e nis. ⁷ Nach Jesúsen' gože' bene' güen mandadw ca':

—Le yosša' yeso' yej ca' nis.

Na' yosegue'en nis goseža'ten. ⁸ Nach gože' legaque':

—Le gaše' laten' na'a na' le šjanežjon ben' yo'o lo ne'e lnin'.

Na' gosone' can' gwnen'. ⁹ Na' ben' yo'o lo ne'e lnin' con bnixen' bi nežde' gan' zan', con bene' ca' cheson mandadw na'ze gosenezde' nisen' beyaquen vino, le legaquen' gosaše' nisen'. Na' bena' bnixen' na' goxe' bene' byo ben' bšagnan', ¹⁰ na' gože'ne':

—Yogo'ze bene' chon lni chdie' vino güen da' chzaca' la'ay cate' chzolao lnin', na' cate' ba zjane'eje' da' zil nach cho'e legaque' da' corrient. San le' bzago' vino šagüen' chdion' na'a ba cheyož lnin'.

¹¹ Da' nga ben Jesúsen' yež Caná distritw Galilea goquen yela' guac nechw da' bene' cont blo'e naque' bene' zaca'chgua, nach bene' ca' gwleje' cont gosaque' le' txen gosejnilaže'ne'.

¹² Gwde na' Jesúsen' gwyeye' Capernaum len xne'e na' len bene' biše' ca', na' len bene' ca' zjanaque' le' txen, na' besyega'ane' na' chop šone ža.

Jesúsen' bebeje' bene' cheson ya'a chy'o'yodao' blao

(Mt. 21:12-13; Mr. 11:15-18; Lc. 19:45-46)

¹³ Na' ba zoa gala' lni che neto' bene' Israel da' nzi' pascw, nach Jesúsen' gwyeye' Jerusalén len bene' ca' zjanaque' le' txen. ¹⁴ Cate' bžine' chy'o'yodao' blaon' bene' zan' že' chesote' go'n na' xila' na' ngolbex, na' zjachi' bene' chosoše'e mechw. ¹⁵ Jesúsen' ble'ede' can' chaca' na' bene' to tašjw de do na' bčhinen' cont bebeje' yogo' bene' ca' že' chy'o'yodao'n, len xila' ca', len go'n ca', na' beslase' xmechw bene' chosoša' mechon' na' gwlo'oni'ane'e xmesgaquen'. ¹⁶ Na' gože' bene' ca' chesote' ngolbexen':

—Le yebej yogo' be qui nga. Bi gonle ya'a liž Xa' nga.

¹⁷ Nach bene' ca' zjanaque' le' txen jaseza'laže' can' nyoj Xtiža' Diosen' gan' žan: "Da' chi'chgua yichja' che ližon' chonten ga saca'zi'chgua'."

¹⁸ Na' ben' chesenabia' nación Israel cheton' gose'ene':

—¿Bi yela' guac gonon' da' le'eto' cont šejle'to' zaco' bebejo' bene' ca'?

¹⁹ Jesúsen' boži'e xtiža'gaquen' gwne':

—Le yočhiņj yodao' nga na' šone žaze yeyonan'.

²⁰ Nach bene' gwnabia' ca' gose'ene':

—Xopeyon iz byažjen gosone' yodao' nga, ¿chacdo' guac yeyonon' šone žaze?

²¹ Perw Jesúsen' bsaca'lebde' cuerp chen' yodao' cate' gwne' ca', na' legaque' gosone' xbab che yodao' na'zen' gwne' ca'. ²² Na' cate' bžin ža beyas bebane' ladjo bene' guat ca', bene' ca' zjanaque' le' txen jaseza'laže' can' gwnen' na' gosejle'e Xtiža' Diosen' dan' nyoj che' na' lecze gosejle'e xtiža' Jesúsen'.

Jesúsen' nežde' bin' yo'o lo' yichjlaždao' benačhen'

²³ Šlac gwzoa Jesúsen' Jerusalénna' lo lni pascon' bene' zan besele'ede' yela' guac ca' dan' benen' na' gosejle'e naque' bene' gwseła' Dios. ²⁴ Perw Jesúsen' bi ben cuine' lo na'gaque', le nombi'e yichjlaždao' benačhen'. ²⁵ Bi byažjde' no ye' le' xbab da' yo'o lo' yichjlaždao' bene' ca'. Le nežeczede' bin' yo'o lo' yichjlaždao' to to chio' benačh.

3

Jesúsen' len Nicodemo

¹ Na' gwzooa to bene' fariseo bene' le' Nicodemo. Goque' to bene' gwnabia' che nación Israel cheton'. ² Gwyeje' lao Jesúsen' šeže'le na' gože'ne':

—Maestrw, nezeto' Diosen' gwsele' le' cont chzejni'ido' neto', le nono gac gon yela' guac ca' dan' chonon' še bi' zoa Diosen' len le'.

³ Na' gož Jesúsen' le':

—Da' li' chnia' le', še non' bi galje yeto bi gac šjayzoe' gan' zoa Diosen' chnabi'e.

⁴ Nach gož Nicodemon' le':

—¿Nac gon to bene' galje' še' ba naque' bene' gole? ¿Guaquech yeyo'e lo' le'e xne'en' cont galje' yeto?

⁵ Na' Jesúsen' gozne':

—Chnia' le'e to da' zejen, še non' bi galje' len nis na' len Spiritw che Diosen', bi gac šjayzoe' gan' zoa Diosen' chnabi'e. ⁶ Bene' zjanaque' bela' chen chesenita' xi'ingaque' lecze bi' bela' chen. Na' Spiritw che Diosen' chnezjon yela' mban toli tocañe che bene' chesejnilaže' Diosen'. Da'nan' žacho chesalje' yeto. ⁷ Bi yebando' dan' gwnia' chonen byen yogo' bene' galje' yeto. ⁸ Cate' cate' chechj' be' chechjen gate'teze, na' chendo' cholyoyen perw bi nezdo' ga zan' na' neca nezdo' ga šejen. Ca'czen' naquen len yogo' bene' chon Spiritw che Diosen' cont chesalje' da' yoble. Bi chle'echo da' chon Spiriton' perw nacbia' ba bocoben yichjlažda'ogaque'.

⁹ Nach Nicodemon' gože'ne':

—¿Nacxe gac can' žo' nga?

¹⁰ Na' gož Jesúsen' le':

—Le' chsed chlo'edo' bene' Israel gualaž chechon' xtiža' Diosen', ¿bi chejni'ido' da' quinga? ¹¹ Da' li' neto' chyixjue'eto' da' nezeto' na' choe'to' diža' che da' ba ble'eto' na' bi chejle'le. ¹² Ba bia' diža' che dan' chac yežlio nga na' bi chejle'ele. ¿Nac gac šejle'le še nia' le'e da' chac yaban'?

¹³ Toze neda' naca' ben' gwsela' Diosen' golja' benačh za'a yaba na' noch no zoa no ba beyep yaba cont nezde' che Diosen'. ¹⁴ Na' can' goc latje daš cani' cate' gwliš da' Moisésen' be' de bronce bde'eba' to le'e yag, can' cheyala' gac yeselise' neda' to le'e yag, neda' gwsela' Diosen' golja' benačh. ¹⁵ Na' gac chia' ca' cont note'teze bene' yesejnilaže' neda' bi cuiaye'e san gata' yela' mban che' toli tocañe.

Chaque Diosen' benačhen'

¹⁶ Leca chaque Diosen' chio' benačh, na' gwsela' Xi'ine' bene' tliša' cont note'tez bene' chejnilaže'ne' bi cuiaye'e, san gata' yela' mban che' toli tocañe.

¹⁷ Na' Diosen' gwsele' Xi'inen' yežlio nga gague cont gwnežjue' castigw che xtoła' benačhen', san cont gwnežjue' yela' mban čegaque' toli tocañe.

¹⁸ Note'tez bene' chesejnilaže' Xi'in Diosen' bene' tlišan', bi yesezi'e castigw che xtoła'gaquen', perw bene' bi chesejnilaže'ne' ba nchoglaon čegaque' yezezaca'zi'e toli tocañe da' bi chesejnilaže' Xi'in Dios bene' tlišan'. ¹⁹ Na' can' naquen, bene' bi chesejnilaže' Xi'in Diosen' ba nchoglaon čegaque' yezezaca'zi'e toli tocañe. Nchoglaon yezezacazi'e, le ba bid Xi'in Diosen' nse'e be'ni' che yichjlaždao' benačhen' perw na' chesyebchde' dan' nac chol cllel ca be'ni' čhen', dan' chesone' da' malen'. ²⁰ Yogo' bene' cheson da' mal chesegue'ede' be'ni' čhen' na' bi chesazlaže' yosozenague' che' cont bi gwlo'elaon še chesone' da' mal. ²¹ San note'tez bene' cheson can' ža diža' li' che

Diosen', chesyebede' chosozenague' che Criston', le chlo'en zoacze Diosen' chaclene' legaque' cont chesone' can' ža diža' li čhen'.

Juan ben' bzoa bene' nis be'che' diža' che Jesúsen'

²² Gwde na' Jesúsen' len bene' ca' zjanaque' le' txen ja'aque' yež dao' ca' zjachi' gan' mbane distritw Judean'. Na' šlac gosonite' na' bosozoe' bene' nis. ²³ Na' Juanna' lecze bzoe' bene' nis yež gan' nzi' Enón da' chi' gala'ze Salim, le na' dechgua nis. Na' ja'ac bene' gan' gwzoen' cont bzoe' legaque' nis. ²⁴ Caten' bina' yesejixjue' Juanna' ližyan' goc ca'.

²⁵ Nach gwche' to žaš len bene' ca' zjanaque' txen len Juanna' na' yeto čhope bene' Israel' gualaž čheto' che dan' chesezoa bene' nis. ²⁶ Nach ja'aque' lao Juanna' na' gose'ene':

—Maestrw, ben' gwzoa len le' yešla'a yegw Jordánna', ben' cho'o xtižen', bačh chzoe' bene' nis na' yogo'ze bene' chja'aque' gan' zoe'na'.

²⁷ Nach Juanna' gože' legaque':

—Nono gaxcene' še bi gon Diosen' cont yesonxen bene' le'. ²⁸ Nezczele can' ba gwnian', bi naca' Cristo ben' chbezcho sela' Diosen' yedenabi'e čhio', san naca' ben' gwseła' Diosen' cont bia' xtižen' žialaole. ²⁹ Cate' chac to yela' güešagna', toz bene' byo ben' chšagnan' chzi'e no'olen'. Perw še zoa bene' migw che' len le' ža'na, chebede' cate' ben' chšagnan' že' zoe' mbalaz. Can' chac len neda', chbečgüeda' bene' zan chosozenague' che Criston'. ³⁰ Len' cheyała' šejch yesonxen bene' le' na' neda' cheyała' šejch yesanlaže' neda'.

Bene' za' gan' zoa Diosen'

³¹ Ca nac Cristo ben' za' gan' zoa Diosen', le' naque' bene' zaca'ch ca yogo'lol bene'. Yezica'chle benačh zjanaque' bene' che yežlio ngaze na' che yežlio ngaze cheso'e diža'. Perw na' Cristo ben' za' gan' zoa Diosen' zaca'che' ca yogo'lol bene'. ³² Le' cho'e diža' che da' ca' ba ble'ede' na' diža' da' ba bende' gan' zoa Diosen', na' nono chzenag xtižen'. ³³ Na' note'tez bene' chosozenag xtiža' ben' za' gan' zoa Diosen', nachbia' bena' neзде' Diosen' cho'e diža' li. ³⁴ Na' bena' gwseła' Diosen', bena' za' gan' zoe'na', len' cho'e xtiža' Diosen', le Spiritw che Diosen' zoan len le', na' cate' Diosen' čhone' Spiritw čhen' bi chyisen' late' güeje. ³⁵ Diosen' chacde' Xi'ine' Criston' na' ba bene' lo ne'e yogo'lol da' de yežlion'. ³⁶ Na' bene' ca' chesejnilaže' Xi'in Diosen' de yela' mban čhegaque' toli tocaņe, san bene' cheson güedenag len Xi'in Diosen', bi gata' yela' mban čhegaque', le Diosen' gone' cont yesezaca'zi'e toli tocaņe.

4

Jesúsen' be'e diža' len to no'ole Samaria

¹⁻³ Na' goquen' bene' zanch chosozenague' che Jesúsen' ca bene' chosozenag che Juanna', na' bene' zanch chesezoa nis len Jesúsen' ca bene' chesezoa nis len Juanna', la'czla' gague cuin Jesúsen' bzoe' bene' nis, bene' ca' zjanaque' le' txen gosonen'. Nach cate' Jesúsen' gwneзде' bene' fariseo ca' gosacbe'ede' bene' zanch zjana'ogüe' le', nach beže'e distritw Judean' na' beyeje' distritw Galilean' len bene' ca' zjanaque' le' txen.

⁴ Na' benen byen zjaya'aque' nez da' chde Samaritan'. ⁵ Ca' goquen' besežine' to yež da' nzi' Sicar lo distritw Samaritan'. Yežen' čhega'anen gala'ze gan' de yežlio dan' bnežjw da' Jacob da' xi'ine' José. ⁶⁻⁸ Na' žia to bej da' nachgwa sitjw da' nzi' Bej che da' Jacob. Ca do guagwbiž Jesúsen' ba chjaxaque'de' ngüe'e nezen' nach gwchi'e cho'a bejen'. Na' bene' ca' zjanaque' le' txen ba zja'aque'

lagüe yežen' zjasexi'e da' yesagüe' len le', cate' bžin to no'ole Samaria cho'a bejen' cont güe'e nis. Na' Jesúsen' gože'ne':

—Beñ late' nis ye'eja'.

⁹Na' no'ole Samaritan' boži'en gože'ne':

—¿Nacxechen' le' naco' bene' Israel chñabdo' neda' nis ye'ejo'? le no'ole Samaria neda'.

(Na' ca nac bene' Israel gualaž cheto' ca', bi chesene lježe' len bene' Samaria ca'.)¹⁰ Nach Jesúsen' gože'ne':

—Neda' ba goša' le': "Beñ late' nis ye'eja'", na' šaca' nezdó' da' chaclaže' Diosen' gone' le' na' šaca' chache'edo' non' naca' neda', ba gwñabdon' neda' na' ba bena' le' nis da' choñ yela' mban toli tocañe šaca'.

¹¹Na' no'olen' gože'ne':

—Bene', bi noxo' bi gaše'don' na' bej nga naquen sitjw. ¿Gaxe si'o nis da' choñ yela' mbanna' žo' ca'?¹² ¿Chacdo' zaca'cho' ca' da' xoxxta'ocho Jacob ben' bocua'an len neto' bej nga gan' güe'eje' len xi'ine' ca' na' len beyixe' che' ca'?

¹³Gož Jesúsen' le':

—Note'tez bene' ye'ej nis che bej nga bia'cze bilde' da' yoble.¹⁴ Na' note'tez bene' ye'ej nisen' gwnežjua'ne' neda', gwbatech bilđen' da' yoble, le dan' gwnežjua'nen' gaquen lo' lažda'ogüe' ca' to latje ga chaldi nis cont gata' yela' mban che' toli tocañe.

¹⁵Na' no'olen' gože'ne':

—Bene', beñ neda' nisen' žo' ca' cont bich bilđan' na' bich yida' dexian' nga.

¹⁶Jesúsen' gože'ne':

—Beyej jel güiž bene' chio' na' le da nga.

¹⁷Nach gože' Jesúsen':

—Notno bene' chia' zoa.

Na' Jesúsen' gože' no'olen':

—Ledo' can' gwnaon' nono bene' chio' zoa,¹⁸ le gayo' bene' chio' ba gwñita' na' bene' zoaleno' na'a gague naque' bene' chio'. Da' li can' ba gwnaon'.

¹⁹Na' gož no'olen' le':

—Bene', chache'eda' naco' to bene' chac chyixjue'ede' bi da' ža Diosen'.

²⁰Da' xoxxta'o neto' bene' Samaria gosonxene' Diosen' lo ya'an zoa nga, na' le'e nacle bene' Israel žale Jerusalenna' cheyała' gonxenchone'.

²¹Jesúsen' boži'en gože'ne':

—No'ole, gwyejle' chia', gwžin ža cate' bi gonen byen gonxenle Diosen' lo ya'a nga ne Jerusalenna'.²² Le'e nacle bene' Samaria bi nombia'yane'le Dios ben' chonxenle. Neto' bene' Israel nombia'to' Dios ben' chonxento', na' ladjo' neto' bene' Israel choj ben' yebej benachen' lo da' malen'.²³ Chžin ža na' na'a ba gole', cate' bene' yesonxene' Xacho Diosen' can' cheyała'cze yesonxene' le', gate'tez nite', lo' yichjlažda'ogaquen' yesonxene' bene' naque' dogualje Dios, le Xacho Diosen' cheyljue' bene' yesonxene' le' ca'.²⁴ Diosen' bi naque' bene' bela' chen, naque' spiritiw. Da'nan' bene' yesonxen le', lo' yichjlažda'ogaque' cheyała' yesonxene' bene' nac dogualje Dios.

²⁵Nach no'olen' gože'ne':

—Nezda' yid ben' ba gwlej Diosen' cont yedenabi'e chio', ben' nzi' Mesías o Cristo, na' cate' le' yide yedezejni'ide' chio' yogo' da' quinga.

²⁶Nach Jesúsen' gože' no'olen':

—Neda' choe'lena' le' diža' naca' ben' žo' ca'.

²⁷Ne' choe'lente Jesúsen' no'olen' dižan' cate' bene' ca' zjanaque' le' txen besyežine' cho'a bejen'. Na' besyebande' choe'lene' to no'ole diža', perw ne

toe' bi gosenabde'ne' bi dižan' choe'lene' no'olen' o bixčhen' chšaljlene' le'.
 28 Nach no'olen' bocua'an che'e nis čhen' na' beyeje' lo yežen' jayeže' bene'
 gualaž che' ca':

29 —Le šo'o le na' to bene' ba gože' neda' yogo'te da' ba bena'. Ćše bengan'
 Cristo ben' chbezcho yedenabi'e?

30 Na' besežaše' yežen' ja'aque' gan' chi' Jesúsen'. 31 Na' šlac zjajda no'olen',
 bene' ca' zjanaque' Jesúsen' txen gosata'yoede' le', chese'ene':

—Maestrw, gwdagw.

32 Na' Jesúsen' gože' legaque':

—Bi nezele de to yela' guagw čhia'.

33 Na' gose' lježe':

—ĆGague ba bedesesan bene' da' gwdagüe'?

34 Na' gož Jesúsen' legaque':

—Len neda' naquen ca to yela' guagw chona' can' chazlaže' Dios ben'
 gwsela' neda' cont gac yogo' da' chnalaže'. 35 Le'e žale: "Ne' dech yetap bio'
 cont yedobe cosešen'." Na' neda' čnia', le na' na' le'ele to coseš da' chyažje
 yedob na'a. 36 De da' goncho na'a cont bene' yosozenague' che Diosen' na'
 gata' yela' mban čhegaque' toli tocaņe. Na' bene' cheseyixjue'ede' xtiža'
 Diosen' na' lente bene' chesone' cont yosozenag bene' xtižen' txen yesenite'
 mbalaz. 37 Diža' nga naquen da' li, žan: "Bene' yoble chaz na' bene' yoble
 chelap." 38 Bač chsela' le'e šjaylaple gan' bi gozle, le le'e gonle cont yosozenag
 bene' xtiža' Diosen' dan' ba goseyixjue'e bene' yoble.

39 Na' ca nac bene' yež Sicar ga mbane Samaria, zane' gosejnilaže' Jesúsen'
 da' gosende' gwna no'olen': "Ba gože' neda' yogo' da' ba bena'." 40 Nachen'
 besežin bene' Sicaren' gan' chi' Jesúsen' gosata'yoede' le' yega'anlene' legaque',
 na' bega'ane' čhope ža. 41 Na' bene' zanch gosejnilaže' Jesúsen' cate' gosende'
 diža' da' be' cuine'. 42 Nach gose'e no'olen':

—Bač chejle'to' na'a, gague dan' bzenagto' xtižo' na'ze, san da' ba beneto'
 choe' cuine' dižan', na' nezeto' bengan' Cristo ben' gwlej Diosen' cont yebeje'
 benačhen' lo da' malen'.

Jesúsen' beyone' xi'in to bene' gwnabia'

43 Na' cate' goc čop ža, Jesúsen' len bene' ca' zjanaque' le' txen gosa'aque'
 jaya'aque' Galilea. 44 Le cuin Jesúsen' ba gwne' note'teže bene' cho'e xtiža'
 Diosen', bi chesonla'ancze bene' gualaž čhen' le'. 45 Na' cate' besežine' Galilean'
 bene' gualaž čhegaquen' bosolebe' Jesúsen' dan' ba besele'ede' yogo' da' güen
 da' bene' Jerusalenna' lo lnin', le lencze legaque' ja'aque' lnina'.

46 Na' gozej Jesúsen' yetn'a yež Caná dan' chi' distritw Galilea gan' bene'
 cont nisen' beyaquen vino. Na' yež Capernaum gwzoa to bene' gwnabia'
 bene' chon žin čhe rey, na' chacšenchgüe xi'ine'. 47 Ća bi'na' cate' bende' ba
 bežin Jesúsen' Galilean' zeze'e Judean', nach gwyeje' lao Jesúsen' gwneyoede'
 le' šeje' šjayene' xi'inen', le ba zoa gatbe'. 48 Na' Jesúsen' gože'ne':

—Še bi chle'ele yela' guac na' bichle da' zaca' yebanele, bi chejle'le čhia'.

49 Nach ben' chon žin čhe reyen' gota'yoede' le' gwne':

—Bene', yo'ošca šlac biņa' gat bi' čhian'.

50 Na' Jesúsen' gože'ne':

—Beyej ližo', bi gat bi' čhion'.

Nach gwyejle' bena' dan' gož Jesúsen' le' na' beze'e. 51 Ba zoa yežine' cate'
 jasešag xmore' ca' le' na' gose'ene':

—Ba beyac bi' chion'.

⁵² Na' gwnabde' legaque' bi hor gwzolao beša'alaže'be', na' gose'e le':

—Neje cheda to gwde guagwbiž bechojbe' da' lan'.

⁵³ Na' xaben' gočbe'ede' ca hor na'czen' gož Jesúsen' le' bi gat bi' chen'. Nach gwyejnilaže' Jesúsen', le' len yogo' bene' že' ližen'.

⁵⁴ Da' nga goc yela' guac gwchop da' ben Jesúsen' šlac beze'e Judean' na' bežine' Galilea.

5

Jesúsen' beyone' to bene' nat late' cuerp che'

¹ Na' gwde to tiemp bžin ža goc yeto lni che neto' bene' Israel Jerusalénna', na' Jesúsen' gwyeye'. ² Jerusalénna' gala'ze cho'a puert che ze'e da' nyečj ciudadan' dan' nzi' Puert che Xila' žia to ga chož nis da' nzi' Betesda, na' ze gayo' chalšil cue'ej cuite gan' chož nisen'. ³ Na' bene' zan bene' güe' zjadie' chalšil ca', no bene' lchoł, no bene' nxinj ni'e, no bene' natsi' late' güeje cuerp čhegaquen'. Zjadie' chesebeze' batcan' ta nisen'. ⁴ Le' tgüeje betj to angl na' bte' nisen', na' bene' nechw bene' cho'e lo' nisen' cheyož čhta anglen' len, cheyacde' bite'tez yižgüe' che'ede'. ⁵ Na' cate' bžin Jesúsen' na' de to bene' ba goc šino'šoņechoa iz chacšende'. ⁶ Na' Jesúsen' ble'ede' ben' na' gočbe'ede' ba chac šša de' ca', na' gože'ne':

—¿Chaclažo' yeyaco'?

⁷ Na' bene' güen' gože' Jesúsen':

—Bene', nono zoa no co' neda' lo' nisen' cate' chdan. Na' šlac zya'a cont šo'a, bene' yoble chyobde' četje' lo' nisen'.

⁸ Nach gož Jesúsen' le':

—Gwyas na' botobe xta'on na' gwda.

⁹ Na' la' beyacte bena' na' botob xte'en na' gwzolao chde'. Perw na' goquen to ža che Dios cate' bi de ľsens gon neto' bene' Israel žin. ¹⁰ Nach bene' gwnabia' che neto' bene' Israel gose'e bena' beyaquen':

—Ža che Dios na'a. Bi de ľsens yeyoa' xta'ona'.

¹¹ Na' gož ben' legaque':

—Bena' beyon neda' gože'nda': "Botobe xtaon' na' gwda."

¹² Nach gose'ene':

—¿Non' gož le': "Botobe xtaon' na' gwda"?

¹³ Na' ben' beyaquen' bi gwņezde' non' beyon le', le' Jesúsen' benite' ladjo bene' zan ca'. ¹⁴ Gwdechle Jesúsen' bedile' bena' beyaquen' lo' yodao' blaon' na' gože' le':

—Bač beyaco' na'a, na' cheyala' cuejyichjo' da' malen' bich gonon', cont bi gac čhio' to da' malech.

¹⁵ Nach beza' bena' jatixjue'ede' bene' gwnabia' che nación Israel čheton' gože' legaque' Jesúsna' ben' beyon le'. ¹⁶ Da'n'an' bene' gwnabia' ca' gwzolao gosebe'na'ogüe' Jesúsen' na' cheseyiljue' nacle yesone' yesote'ne' da' chone' yela' guac ca' ža che Dios cate' bi de ľsens gon neto' bene' Israel žin. ¹⁷ Na' Jesúsen' gože' legaque':

—Xan' zoacze' chelalde' bate'teze na' ľecze ca' neda'.

¹⁸ Da'n'an' goseyljwlaže'che' nacle yesone' yesote' Jesúsen', perw gague neče bi chone' can' ža ley gan' chgualan' che ža che Dios na'zen', san ľecze da' gwne' Diosen' naque' Xe', le' zejen toz ca' zaque' len Diosen'.

Yela' chnabia' da' nape Xi'in Diosen'

19 Na' gož Jesúsen' legaque':

—Chnia' le'e to da' zejen, bibi chac gona' to gualaza'. Con da' chle'eda' chon Xan', lenna' chona', na' bite'teze da' chon Xan', lenna' chona', le neda' naca' Xi'ine'. 20 Chaque Xan' neda' na' chlo'ede' neda' yogo' dan' chone'. Na' gwlo'ede' da' zaca'ch ca da' quinga da' gona' cont yebanele. 21 Ca Xa' Diosen' chosbane' bene' ladjo bene' guat ca', ca'cze chona' neda' naca' Xi'ine', chnezjua' yela' mban che note'tez bene' chbeja' cont gata' yela' mban chegaque'. 22 Na' Xan' bi chchoglagüe' che ne to bene' še nape' dola', san ba gwlo'e lo na' choglagua' che yogo' benach še non' nap dola'. 23 Xan' chaclaže' yogo' bene' yesonxene' neda' lecce can' chesonxene' le'. Na' bene' bi chonxen neda', ne Xa' Diosen' bi chonxene', le le'na' gwsele' neda'.

24 'Chnia' le'e to da' zejen, bene' chosozenag xtižan' na' chesejnilaže' Dios ben' gwseła' neda', de yela' mban chegaque' toli tocañe. Na' bi yesezaca'zi'e toli tocañe da' bi chesejnilaže'ne'. Bich zjanaque' ca bene' guat len yichjlažda'ogaquen' da' bi chosozenague' che Diosen', san ba bocobe' yichjlažda'ogaquen' neche ba chesejnilaže'ne'. 25 Chnia' le'e to da' zejen, gwžin ža cate' bene' zjanac ca bene' guat len yichjlažda'ogaque' yesende' xtiža' neda' naca' Xi'in' Dios, na' bene' yosozenag chia' gata' yela' mban chegaque' toli tocañe, na' bač chzolao chac ca' na'a. 26 Xa' Diosen' zoacze' toli tocañe na' chone' cont zjamban benachen', na' lecce ba bene' cont neda' naca' Xi'ine' zoa' toli tocañe na' chona' cont zjamban bene'. 27 Na' lecce ba bene' neda' yela' chnabia' cont nia' non' nap dola', le ba gwsele' neda' golja' benach. 28 Bi yebanele dan' chnia' nga, le gwžin ža cate' yogo'lol' neda' guat že' lo' ba yesende' cate' yol' güiža'ne'. 29 Na' bene' ca' goson da' güen šlac gosebane' yesyechoje' na' yesebane' toli tocañe. Na' bene' ca' goson da' mal šlac gosebane' yesyechoje' na' yesezaca'zi'e toli tocañe.

Jesúsen' bzejni'ide' nape' yela' chnabia'

30 'Bibi gac gona' to gualaza'. Chzenaga' bin' ža Xan' cont nia' che benachen' noe' nap dola'. Na' dan' nia' gac che to to bene' naquen da' cheyała' gac, le bi chi'yichja' gac dan' chnalaža'; san chi'yichja' gac can' chnalaže' Xan' ben' gwseła' neda'. 31 Šaca' toz neda' chgua'a da' bałi non' naca', bi naquen to da' šejle'le. 32 Perw zoa Xan' cho'e diža' li non' naca', na' nezda' diža' da' cho'e chia' naquen da' šejle'le. 33 Bač gwseła'le bene' lao Juanna' cont jasenabde' le' nac nac chia', na' Juanna' be'e diža' li non' naca'. 34 Perw neda' bi chyažjda' diža' da' güe' ne to benach chia'. San chnia' da' quinga cont le'e šejle'le chia' na' gata' yela' mban chele toli tocañe. 35 Juanna' goque' ca to yi' da' chseni'chgua dan' bzejni'ide' le'e che Diosen', na' šlož daon' bebele dan' bsd blo'eden'. 36 Na' de to da' choe' xtiža' da' zaca'ch ca diža' da' choe' Juanna' chia': chona' yogo'lol' da' ba gwlo'o Xan' lo na' gona', na' da' ca' chonan' choen' diža' le Xan' gwsele' neda'. 37 Nach Xan' ben' gwseła' neda' lecce cho'e xtižan', la'czła' bina' yenele can' chnen' na' bina' le'le can' naquen'. 38 Xtižen' bina' šon' lo' yichjlažda'olen', le bi chejnilaže'le neda' naca' ben' gwsele'. 39 Chsedyane'le gan' nyoj Xtiža' Diosen', le chaquele gaple yela' mban toli tocañe neche chsedlen. Na' da' ca' chsedlen' zjanyojen chesoan' xtiža'. 40 Perw bi chaclaže'le šejnilaže'le neda' cont gata' yela' mban chele toli tocañe.

41 'Na' neda' bi chyažjda' yesena benachen' naca' bene' zaca'. 42 Nombi'a le'e na' nezda' bi chaquele Diosen'. 43 Xan' ba gwsele'le neda' chona' con da' že', perw bi chejle'le chia'. Na' cate' za'ac bene' cheson con bi da' ža xbab chegacze', nachle chejle'le chegaque'. 44 ¿Nacxe gac šejle'le chia'? le chzelaže'le

yesena bene' chonle güen, na' bi chzelaže'le gonle cont toz Diosen' ne' chonle güen. ⁴⁵ Bi gonle xbab neda' gwcuiša' le'e lao Xan'. Da' Moisésen' chcuiše' le'e lagüen', le chsedchguale dan' bzojen' chaquele cont soale binlo len Diosen', perw bi chejle'le xtižen'. ⁴⁶ Šaca' chejle'le xtiža' da' Moisésen', chia' neda'czen' chejle'le še ca', le xtiža' nedan' bzoje'. ⁴⁷ Na' da' bi chejle'le dan' bzoj da' Moisésen', žnacxe gonle šejle'le bi dan' žia' le'e?

6

Jesúsen' bguagüe' gayo' mil bene'

(Mt. 14:13-21; Mr. 6:30-44; Lc. 9:10-17)

¹ Gozde goc ca' Jesúsen' gwyeje' yešla'a nisdao' che Galilea len bene' ca' zjanaque' le' txen. Na' nisdao' na' lecze nzin' Nisdao' Tiberias. ² Na' bene' zan zjanao' Jesúsen' da' ba besele'ede' yela' guac dan' chonen' cheyone' bene' güe' ca'. ³ Na' gwloe Jesúsen' to lo ya'a len bene' ca' zjanaque' le' txen na' gosebi'e. ⁴ Na' da' yoble ba zoa gala' lni che neto' bene' Israel da' nzi' pascw. ⁵ Na' cate' gwna' Jesúsen' ble'ede' bene' zan ba zjanao' le' na' gože' Felipen':

—¿Gaxe si'cho da' yesagw yogo' bene' quinga?

⁶ Gwne' ca' yešque bi na' Felipen', le Jesúsen' nezeczede' naquen' gone'. ⁷ Na' Felipen' gože'ne':

—Chop gayoa denario yetextilen' bi gaquen yesyechele to toe' ne late' güejen.

⁸ Na' yeto ben' naque' Jesúsen' txen le Andrés na' naque' bene' biše' Simón Pedro. Na' Andrésen' gože' Jesúsen':

⁹ —Nga zoa to bi' byo dao' na' de gayo' yetextil de cebada chebe' na' yechope bel ya'a. Perw žbi de gon da' quinga? le bene' zanna' že' nga.

¹⁰ Nach Jesúsen' gože' bene' ca' zjanaque' le' txen:

—Le ye' yogo'lole' yesebi'e.

Dechgua yixye latjen', na' gosebe' bene' ca' lo yixyena', ca do gayo' mil bene' byo, bi cuent no'ole len bidao'. ¹¹ Nach gwxi' Jesúsen' yetextil ca', na' beyož be'e yela' choxclen che Diosen' bnežjuen' bene' ca' zjanaque' le' txen cont goseyisen' len bene' ca' zjachi' na'. Na' lecz ca' bene' len bel ya'a ca'. Na' gosoe to toe' con ca'te'te' gosacłaže' gosagüe'. ¹² Na' beyož gosagüe' ca'te'te' goseljde', Jesúsen' gože' bene' ca' zjanaque' le' txen:

—Le yotobe da' ca' bega'an late' güeje cont bibi cuiayi'.

¹³ Nach bosyotobe' da' bixjw ca' dan' besyega'an lao gayo' yetextil ca' de cebad, na' goquen šižinw žome. ¹⁴ Cate' bene' ca' besele'ede' yela' guac dan' benen' nach gosene':

—Da' li bengan' choe' xtiža' Dios na' naque' ben' ba gwlezcho seła' Diosen' yežlio nga.

¹⁵ Na' cate' Jesúsen' gocbe'ede' ba zoa yeseče'exoxje' le' cont yesone' le' rey chegaque', nach gozže'e gožeje' ya'adaon' tože'.

Jesúsen' gwze'e lo nisdaon'

(Mt. 14:22-27; Mr. 6:45-52)

¹⁶ Cate' ba gwxin, bene' ca' zjanaque' Jesúsen' txen jaya'aque' cho'a nisdao'. ¹⁷ Na' besyeyo'e to lo' barcw zjaya'aque' ciuda Capernaum. Ba goł na' Jesúsen' biņa' yežine'. ¹⁸ Na' chas chata' chac nisdao' le' chechjhgua be'. ¹⁹ Ba goc sša zjaya'aque' len barcon' lo nisdao' cate' besele'ede' ba zjajda Jesúsen' cheze'e lo nisen' gala'ze gan' zej barcon'. Na' besežebe'. ²⁰ Na' gože' legaque':

—Nedan', bi žeble.

²¹ Nach chesyebede' besyegüe'ene' lo' barcon'. Na' la' besyežintie' ga nac yo biž cho'a nisaon' gan' zjaya'aquen'.

Beñe' zan chesyeyiljue' Jesúsen'

²² Na' beteyo beñe' zan beñe' ca' besyega'an yešla'a cho'a nisaon' gosache'ede' nono Jesúsen' nla' na' gosache'ede' bibi barcw yoble gota'ch san toga dan' besyeyo'o beñe' ca' zjanaque' Jesúsen' txen, na' zjanezde' Jesúsen' bi beyo'e len legaque' lo' barcon'. ²³ Nach besežin barcw da' za'ac ciuda Tiberias gala'ze gan' gosagüe' yetextilen' caten' beyož be' Xancho Jesúsen' yela' choxclen che Diosen'. ²⁴ Na' cate' gota'bia' nono Jesúsen' bežel gan' nite'na' nach besyeyo'e lo' barcw ca' ja'aque' Capernaum cont besyeyiljue' Jesúsen' do na'.

Yela' guagw da' chnežjon beñe' yela' mban toli tocañe

²⁵ Na' cate' beñe' zan ca' besyeželde' Jesúsen' yešla'ale nisaon' nach gose'e le':

—Maestrw, ¿batca' bla'o nga?

²⁶ Na' Jesúsen' gože' legaque':

—Chnia' le'e to da' zejen, cheyiljwle neda' neche dan' gwdagwle ca beljele na'zen', gague neche chejle'le chia' lagüe ba ble'ele yela' guac ca' ba benan'.

²⁷ Bi cheyala' cuecyichjle gata' da' ye'ej gagwle da' chbiayi', san cuecyichjle gata' da' gon' yela' mban chele toli tocañe. Diosen' gwsele' neda' golja' beñach na' neda' gona' to da' ye'ej gagwle cont gata' yela' mban chele toli tocañe. Na' Xa' Diosen' ba blo'e naca' ben' ba gwsele'.

²⁸ Na' gose'ene':

—¿Bi cheyala' gonto', cont yebe Diosen' neto'?

²⁹ Na' gož Jesúsen' legaque':

—Da' nga gonle cont yebe Diosen' le'e, šejnilaže'le neda' naca' ben' gwsele'.

³⁰ Na' gose'e Jesúsen':

—¿Bi yela' guac gono' še ca' cont le'eto' na' šejnilaže'to' le'? ¿Bi gono'? ³¹ Da' xoxxta'ocho ca' gosagüe' yela' guagw da' nzi' maná šlac gosenite' latje dašen', na' nyoj Xtiža' Diosen' čhegaquen', žan: "Yela' guagw da' za' yaban' be'e legaque' gosagüe'."

³²⁻³³ Nach Jesúsen' gože' legaque':

—Chnia' le'e to da' zejen, gague da' Moisésen' bnežjue' da' xoxxta'ocho ca' yela' guagon', san Xa' Diosen' bnežjuen' legaque'. Na' bi načo lenna' zan' yaba gan' zoe'na', san de to yela' guagw da' ba gwseła' Diosen' na'a da' za' yaban' na' betjen yežlion', na' chnežjon yela' mban che note'teze beñe' chesagw len.

³⁴ Nach beñe' ca' gose'e le':

—Beñe', beñšca neto' yela' guagon' žo' ca' gagwton' yogo' ža.

³⁵ Nach Jesúsen' gože' legaque':

—Neda' naca' yela' guagw da' chnežjon beñe' yela' mban toli tocañe. Note'teze beñe' yosozenag chia' na' yesejnilaže' neda', guata' da' chyažje yichjlažda'ogaque' toli tocañe. ³⁶ Na' ba gwnicza' le'e, la'czla' ba ble'ele neda' bi chejnilaže'le neda'. ³⁷ Yogo' beñe' chbej Xan' cont yesaque' neda' txen, chžin ža chesejnilaže' neda'. Na' note'teze beñe' chaclaže' šejnilaže' neda', bi gwsia'ne' ca'ale, san gaclena'ne' cont šejnilaže'nda'. ³⁸ Neda' za'a yaba na' betja' yežlion' gague cont gona' da' žan chia' san cont gona' can' chaclaže' Xan' ben' gwseła' neda'. ³⁹ Len' chaclaže' bi gua'a latje cuiayi' ne toze beñe' ba gwleje' cont yesaque' neda' txen. Nach cate' žin ža te che yežlion' cana' yosbangaca'ne' ladjo beñe' guat še ba gosate'. ⁴⁰ Xan' chaclaže' yogo'loł beñe'

yesejni'ide' non' naca' na' yesejnilaže' neda' cont gwnežjue' legaque' yela' mban toli tocanē, na' neda' yosbana' legaque' ladjo bene' guaten' še ba gosate' cate' žin ža te che yežlion'.

⁴¹ Na' zan bene' Israel gualaž cheto' legacze' besežeše' che dan' gwna Jesúsen': "Neda' naca' yela' guagw da' za' yaba." ⁴² Gosene':

—¿Gague bengan' Jesú xi'in José? Nombia'cho xaxna' benga. ¿Bi dižan' cho'e že' ze'e yaba betje' yežlio'?

⁴³ Nach Jesúsen' gože' legaque':

—Bich žešele chia'. ⁴⁴ Nono gac yesejnilaže' neda' še Xan' ben' gwsele' neda' bi gaclene' legaque' yesejnilaže', na' cate' žin ža te che yežlion' yosbana' legaque' še ba gosate'. ⁴⁵ Le'e gan' bosozoj bene' ca' goseyixjue' ede' xtiža' Diosen' cani' žan: "Yögüe' Diosen' gwsed gwlo'ede' legaque'." Na' yogo' no yesezeze can' ža Xan' na' yosozenague' cont yesone' can' že' na', lecz yesejnilaže' neda'.

⁴⁶ 'Bi nacho zoa bene' ba ble'ede' Xan'. Toza' neda' ba ble'eda'ne', le za'a gan' zoen'. ⁴⁷ Chnia' le'e to da' zejen, bene' chesejnilaže' neda', de yela' mban čhegaque' toli tocanē. ⁴⁸ Neda' naca' yela' guagw da' chnežjon yela' mban toli tocanē che benachen'. ⁴⁹ Da' xozxta'ocho ca' gosagüe' yela' guagw da' nzi' maná šlac gosenite' latje dašen', na' bia'cze gosat yogüe'. ⁵⁰ Neda' cho'a diža' che to yela' guagw da' za' yaban' na' bene' chagw len bi gate'. ⁵¹ Neda' naca' yela' guagw dan' za' yaban' dan' nsa' yela' mban toli tocanē. Bene' šejnilaže' neda', bane' toli tocanē. Na' yela' guagw da' chnežjua' cont gata' yela' mban che benachen' naquen cuerp chia'.

⁵² Nach bene' Israel gualaž cheto' ca' legacze' besežeše', gosene' che':

—¿Nacxe gone' gone' cuerp čen' gagwchon?

⁵³ Jesúsen' gože' legaque':

—Chnia' le'e to da' zejen, Diosen' gwsele' neda' golja' benach, na' še bi chagwle cuerp čian' na' še bi che'ejle xčhenan', bi de yela' mban čele toli tocanē. ⁵⁴ Bene' chesagw cuerp čian' na' chese'eje' xčhenan' de yela' mban čhegaque' toli tocanē, na' še ba gosate', cate' te che yežlion' yosbana' legaque' ladjo bene' guat ca'. ⁵⁵ Le cuerp čian' naquen dogualje yela' guagw, na' xčhenan' naquen dogualje da' ye'ejle. ⁵⁶ Bene' ca' chesagw cuerp čia' na' chese'eje' xčhenan' de yela' mban čhegaque' toli tocanē, na' zjanaque' txen len neda' na' neda' naca' txen len legaque'. ⁵⁷ Xa' Diosen' gwsele' neda' na' de yela' mban čia' da' naca' toze len le'. Na' ca'cze gac len bene' yesagw cuerp čian', yesenite' toli tocanē dan' zjanaque' txen len neda'. ⁵⁸ Cuerp čian' naquen yela' guagw da' za' yaba. Na' len bi naquen ca da' gosagw da' xozxta'ocho ca' latje dašen', le bene' gosagw len bia'cze gosate'. Na' bene' chesagw yela' guagw dan' žia' ca', yesenite' toli tocanē.

⁵⁹ Jesúsen' bsd blo'ede' da' ca' lo' yodao' che bene' Israel gualaž cheto' ca' da' zoa Capernaum.

Xtiža' Jesúsen' chnežjon yela' mban toli tocanē che bene' chosozenag čen

⁶⁰ Na' zan bene' ca' zjanao' Jesúsen', cate' gosende' da'na' chzejni'ide' legaque', gosene':

—Zdebečgua naquen goncho dan' chzejni'iden'. ¿Noxen' gac gon can' žen'?

⁶¹ Gocbe'e Jesúsen' chesenie' che' dan' bzejni'ide' legaque' da' ca', na' gozne':

—¿Bi chazlaže'le can' ba gwnian'? ⁶² ¿Nacxe nale cate' le'ele neda' yeyepa' gan' gwzoa' cana'? neda' naca' ben' gwsele' Diosen' golja' benach. ⁶³ Spiritw čian' chnežjon benachen' yela' mban, na' cuerp čian' bi gac gonen ca'. Diža'

dan' baçh bia' len le'e zjazacan' len yichjlažda'olen' cont banle toli tocañe še šejle'le chen. ⁶⁴Perw ñe' nita' balle bi chejle'le.

Jesúsen' gwne' ca' le goçbe'ede' cate' gosezolao bene' ca' gosedalene' le' noe' bi chesejle'e che' na' noe' gwdie'ne' lo na' bene' ca' cheseague'ede' le'. ⁶⁵Na' gozna' Jesúsen':

—Chac can' ba gwnian', nono gac šejnilaže' neda' še bi gaclen Xa' Diosen' le' cont šejnilaže'nda'.

⁶⁶Beyož bzejni'i Jesúsen' legaque' da' ca', zan bene' ca' ba chosozenag xtižen' gosebejyichje' bich bosozenaguen'. ⁶⁷Nach Jesúsen' gože' šižinw bene' ca' gwleje' cont gosaque' le' txeñ:

—¿Len le'e chaclaže'le yeyejle'?

⁶⁸Na' gož Simón Pedron' le':

—Xanto', noch no zaca' gwzenagto' xtižen'. Tozo' le' cho'o diža' da' chnežjon yela' mban che bene' chzenague' chen. ⁶⁹Neto' chejnilaže'to' le' na' nezeto' naco' Cristo ben' gwlej Diosen' cont ñabi'o, na' naco' dogualje Xi'in Dios, Dios ben' zoa toli tocañe.

⁷⁰Na' Jesúsen' gože' legaque':

—Ba gwleja' le'e šižinwle cont zoale len neda' na' nezda' tole chzenagle che gwxiyen'.

⁷¹Gwne' ca' che Judas Iscariote ben' naque' xi'in to bene' le' Simón, le gwnezde' Judasen' ba naquen gwdie' le' lo na' bene' ca' cheseague'e le', na' Judasen' naque' to bene' šižinw ca'.

7

Bene' biše' Jesúsen' bi gosejnilaže' le'

¹Gwde na' Jesúsen' gwdacze' bsd blo'ede' ben' že' distritw Galilean'. Bich goclaže' šejche' Judean', le bene' gwnabia' che nación Israel cheton' že' na' chesejiljue' nacle yesone' yesote'ne'. ²Na' ba zoa gala' lni che neto' bene' Israel da' nzi' Lni che Ranšw Yix. ³Na' bene' biše' Jesúsen' gose'ene':

—Bitw yega'ano' nga. San gwyej Judean' cont bene' ca' chosozenag chio' yesele'ede' yela' guac dan' chonon'. ⁴Note'teze bene' še chaclaže' yesacbe'e bene' naque' to bene' zaca', bi gone' yela' guac bagaše'ze. Še da' li chono' yela' guac, ben cont yesele'e yogo'lol bene' can' chonon'.

⁵Bene' biše' Jesúsen' gose'ene' ca', le ñe' legaque' bi gosejnilaže'ne'. ⁶Nach gož Jesúsen' legaque':

—Biña' žin ža ša'a, san le'e guac šja'acle bate'teze. ⁷Bene' ca' bi zjanombi'e Diosen' bi gac yesegue'ede' le'e, san cheseague'ede' neda', le chzejni'ida'ne' chesone' da' xinj. ⁸Le šja'ac lnin'. Neda' bi sa'a ña'a, le biña' žin ža chia'.

⁹Beyož gože' legaque' ca' bega'ane' Galilean' yeto çop ža.

Jesúsen' gwyeje' Jerusalén gan' yo'o lnin'

¹⁰Nach gwde gosa'ac bene' biše' ca' zja'aque' lnin' gwza' Jesúsen' len bene' ca' zjanaque' le' txeñ zja'aque' lnin', perw bi ja'aque' can' nla'ze san bagaše'ze. ¹¹Na' bene' gwnabia' che nación Israel cheton' že' Jerusalénna' besyeyiljue' le' lo lnin', chesene':

—¿Gañxe bena'?

¹²Na' bene' ca' zjandop zjanžag lo lnin' šižize goso'e diža' che Jesúsen', na' gague toze ca gosene'. Bañe' gosene': “Naque' bene' güen”, na' bañe' gosene': “Bi naque', chonlede' bene'.”

¹³ Na' goso'e diža' šižize *che* Jesúsen', *le* yogo'ze bene' chesežebe' bi yesone bene' gwnabia' ca' legaque' še yesache'ede' cheso'e diža' güen *che* Jesúsen'.

¹⁴ Na' do gašje zej *lnin'* cate' gwyej Jesúsen' gan' zoa yodao' blao *che* neto' bene' Israel na' gwzolao chsed chlo'ede'. ¹⁵ Na' besyebane bene' gwnabia' ca', gosene':

—¿Nacxeçhen' da' zan neze bengaa? *le* gague bi nseden'.

¹⁶ Na' Jesúsen' gože' legaque':

—Dan' chsed chlo'edan' bi naquen xbab *che*cza', san naquen xbab *che* bene' gwseła' neda'. ¹⁷ Note'tez bene' chesaclaže' yesone' can' chazlaže' Dios ben' gwseła' nedan', guache'ede' še dan' chsed chlo'edan' zan' *che* Dios o še naquen da' chaljlaže'za'. ¹⁸ Cate' to bene' chsed chlo'ede' xbab *che*cze', cheyiljue' nacle gone' cont gaxcene'. San cate' to bene' chaclaže' gaxcen bene' gwseła' le', nezecho xtižen' naquen da' *li* na' bi chiye'e.

¹⁹ 'Da' Moisésen' bene' le'e ley dan' nsedlen' perw *ne* tole bi chonle can' žanna'. ¿Bixçhen' cheyiljwle nacle gonle gotlenda'?

²⁰ Bene' ca' že'na' gose'ene':

—Yo'o da' xigüen', nan' chol' chñenošo'. ¿No chaclaže' got le'?

²¹ Jesúsen' gože' legaque':

—Toz yela' guac da' bena' ža *che* Dios cate' bi de *lsens* gon chio' bene' Israel žin, na' yogo'le chebanele. ²² Da' Moisésen' bene' mandaw soacho señw dan' že' circuncisión (la'czła' bi gwzolao seño'n len *le*' san len da' xozxta'ocho ca' bene' gwnita' cani'te), na' da'nan' chzoale bi' byo dao' ca' señwna' ža *che* Dios. ²³ Can' naquen, la'czła' še naquen ža *che* Dios, chzoale no bi' byo dao' señw cate' chaquebe' xono' ža cont chonle can' ža ley dan' bzoj Moisésen', na' ¿bixçhen' chža'ale neda' dan' ba beyona' to bene' güe' ža *che* Diosen'? ²⁴ Bi cheyala' yosbaga'le bene' *che* da' chle'ele chone', *le* bi nezele še chazlaže' Diosen' can' chone', san *le* nabyaņe' cont nezele bi ža Diosen', nachen' gache'ele non' cheyala' yosbaga'le.

Jesúsen' gwne' ze'e gan' zoa Diosen'

²⁵ Nach to çhope bene' Jerusalén ca' gosene':

—¿Gague benga ben' chesyeyiljue' cont yesote'ne'? ²⁶ *Le* na' can' cho'e dižan' lao yogo' bene' na' bibi chese'e *le*'. ¿Gague ba cheson bene' gwnabia' *che*cho xbab *le* naque' Cristo ben' chbezcho yedenabia'? ²⁷ Perw nezecho ga bene' benga, na' cate' yid Criston' nono yeseneze ga bene' *le*'.

²⁸ Jesúsen' chsed chlo'ede' chalšil *che* yodao' blao cate' gosene' ca'. Nach gwne' zižje gože' legaque':

—Chaquele nombia'le neda' na' chaquele nezele ga bene' neda'. Perw gague con za'a to gualaza'. Da' *li* zoa bene' gwsele' neda', na' le'e bi nombia'le'. ²⁹ Neda' nombi'ane', *le* za'a gan' zoen' na' *le*' gwsele' neda'.

³⁰ Na' da' gwne' ca' bal bene' gosaclaže'chgüe' yesezene' *le*', perw nono gwzen *le*' da' biņa' žin ža gague' lo na'gaquen'. ³¹ Na' bene' zan gosejle'e Jesúsen' naque' bene' gwseła' Dios, na' gosene':

—Cate' yid Criston' ¿gonche' yela' guac da' zaca'ch ca da' chon benga?

Bene' chesape' yodao' blaon' ja'aque' cont šjasexene' Jesúsen'

³² Bene' fariseo ca' gosende' diža' cheso'e bene' ca' *che* Jesúsen'. Da'nan' bosoxi'e len bene' ca' zjanac bçoz gwnabia' *che* nación Israel çeton' na' gosesele' bene' chesape' yodao' blaon' cont šjasexene' Jesúsen'. ³³ Nach Jesúsen' bsd blo'echde' bene' ca' že'na', gwne':

—Soacha' yeto tiemp dao' len le'e nach yeya'a gan' zoa ben' gwse^la' neda'.
 34 Na' yeyiljwle neda' na' bi yeželele neda', le gan' soan' bi gac yidle.

35 Nach bene' gwnabia' che nación Israel cheton' gose' lježe':

—¿Gan' chacde' yeyeje' ga bi yeželechone'? ¿Yeyeje' gan' zjanaslas bene' gualaž checho ladjo bene' griego ca' na' gwsed gwlo'ede' legaque'? 36 ¿Bi zejen dan' gwnen': "Yeyiljwle neda' na' bi yeželele neda' na' gan' soan' bi gac yidle"?

Jesúsen' be'e diža' che Spiritw che Diosen'

37 Ža cate' zelao chesone' lⁿin' naquen ža xench, na' Jesúsen' zeche' chsed chlo'ede' na' gwne' zižje, gwne':

—Note'tezle še lo' yichjlažda'olen' nacle ca bene' chbillaže', cheya^la' šejnilaže'le neda' na' gona' le'e yela' mban toli' tocanē, na' lenna' gaquen lo' yichjlažda'olen' ca to nis da' gwbat cheyo'ojen cont bich gacle ca to bene' chbillaže'. 38 Le'e chejnilaže'le neda', gac chele can' ža Xtiža' Diosen' da' nyojen, to da' güen juisyw gac lo' yichjlažda'olen' cont gacle ca to yežlio ga chaldi nis, gan' de zan yegw da' cheseyilen len.

39 Na' dan' gwna Jesúsen' ca' be'e diža' che Spiritw che Diosen' da' yedesoan lo' yichjlaždao' note'tezcho chejnilaže'chone'. Na' caten' gwne' ca' Spiriton' biⁿa' yedesoan lo' yichjlaždao' bene', le biⁿa' gac yogo' da' cheya^la' gac cont gacia' Jesúsen' naque' bene' zaca' juisyw.

Gosaque' chople neche Jesúsen'

40 Bene' ca' chosozenag xtiža' Jesúsen' ba^le' gosene':

—Da' li benga naque' ben' choe' xtiža' Diosen' ben' naquen yide'.

41 Na' yeba^le' gosene':

—Benga Criston' ben' naquen yedenⁿabia'.

Perw yeba^le' gosene':

—¿Bixe n^acho bene' Galilea ba gwlej Diosen' cont yedenⁿabi'e chio'? 42 Xtiža' Diosen' da' nyojen žan Criston' ben' yedenⁿabi'e choje' lo diaža che da' rey David na' gaque' bene' Belén gan' nac laž da' David.

43 Can' goc bene' ca' gosaque' chople neche Jesúsen'. 44 Na' ba^le' gosaclaže' yesezene'ne', perw nono gwzen' le'.

Bene' gwnabia' che nación Israelen' bi gosejle'e che Jesúsen'

45 Na' bene' chesape' yodao' blaon' jaya'aque' gan' nita' b^xoz gwnabia' ca' len bene' fariseo ca', le bene' can' gosesele' legaque' cont yesezene' Jesúsen'. Na' bene' ca' gose'e legaque':

—¿Bixchen' bi nche'elne'?

46 Na' bene' chesape' yodao' blaon' gose'ene':

—Biⁿa' yeneto' bene' cho'e diža' güen ca dan' choe' bena'.

47 Nach bene' fariseon' gose'e legaque':

—¿Lente le'e ba gwxiye'e? 48 Ne toz neto' nacto' bene' fariseo biⁿa' šejle'to' xtižen' na' n^eca bene' gwnabia' chechon', ne toze' biⁿa' šejle'e xtižen'. 49 Perw bene' quinga že' nga bi zjanombi'e ley dan' bzoj da' Moisésen' na' ba zjambi-aye'e, da'nⁿ chesejle'e xtižen'.

50 Na' Nicodemo ben' gwyej lao Ješusen' šeže'le naque' txen len bene' gwnabia' ca'. Na' Nicodemon' gože' legaque':

51 —Ley chechon' bi choen' latje chog^la^ocho che to bene' ba ben da' mal še biⁿa' güe'e diža' naquen' goc na' še biⁿa' nezecho bi dan' bene'.

52 Nach yezica'chle bene' gwnabia' ca' gose'e le':

—¿Leno' le' ba beyaco' bene' Galilea? Bsed Xtiza' Diosen' da' nyojen na' nezdo' ne to bene' choe' xtiza' Diosen' ca' na' choje' Galilean'.

⁵³ Nach besyeya'ac to toe' jaya'ac ližgaque'.

8

No'olen' besyedole'de' len xtoe'

¹ Na' Jesúsen' gweyje' ya'a da' nzi' Ya'a Olivos. ² Na' beteyo cate' gwyeni' gweyje' yodao' blaon' da' yoble na' yogo' bene' ca' že' na' gosebigue' lagüen' na' gwchi'e na' gwzologüe' chsed chlo'ede' legaque'. ³ Nach bene' chososed chosolo'e ley dan' bzoj da' Moisésen' na' bene' fariseo ca' jasesane' to no'ole bene' besyedole'de' len xtoe'. Na' bosozeche' le' gachol bene' ca' chosozenag che Jesúsen'. ⁴ Na' gose'e Jesúsen':

—Maestrw, no'ole nga ba bedole'to' delene' xtoe'. ⁵ Na' ley chechon' da' bzoj Moisésen' žan cheyala' gotcho no'ol ca' cheson ca' gwchelchone' yej. Na' ži bi žo' le'? žbix cheyala' gonechone'?

⁶ Gose'e Jesúsen' ca' da' gosaclaže' yesebeje' le' diža' da' yosochine' yesagüe' xya che'. Na' Jesúsen' con bcheque' bzoje' lo yon' len xbene'. ⁷ Na' bene' ca' gosone' byen gosenabchde' le' bi že'. Nach Jesúsen' bebe'šagüe' na' gože' legaque':

—Guaque con note'tezle bi de xto'la'le solaole gwchellene' yejen'.

⁸ Nach bcheque' da' yoble bzojche' lo yon'. ⁹ Na' bene' ca' zjanče' no'olen' cate' gosende' can' gož Jesúsen' legaque', zjanezde' lecze ba zjanoncze' da' xinj, nach tgüje tgüje' besyechoje' gwzolaotequen' len bene' golech na' bžinten len bene' xcuide'ch, nach bega'an yetoze no'olen' len Jesúsen' gan' že' bene' ca' chsed chlo'ede'. ¹⁰ Nach Jesúsen' bebe'šagüe' da' yoble na' ble'ede' noch no bene' ca' zjanla' na' gože' no'olen':

—No'ole, žgaŋxe bene' ca' chosocuiš le'? žNe toe' bi beŋ le' castigw?

¹¹ Na' no'olen' gože'ne':

—Ne toe', bene'.

Na' Jesúsen' gože'ne':

—Ne neda' bi gona' le' castigw. Beyej na' bich gono' da' malen'.

Jesúsen' nse'e be'ni' che yichjlaždao' benačh

¹² Jesúsen' gozo'e diža' da' yoble chzejni'ide' bene' ca' že' na', gwne':

—Neda' nsa'a be'ni' che yichjlaždao' benachen'. Bene' zjanaque' neda' txen bich zjanaque' ca' bene' yichjlaždao' lčhol bene' cheson da' xinj, san lo' yichjlažda'ogaque' naquen ca to da' yo'o be'ni'. Da'n'an' ba de yela' mban chegaque' toli tocaŋe.

¹³ Nach bene' fariseo ca' gose'e Jesúsen':

—Cho'o diža' che cuino' naco' bene' zaca', na' da'n'an' bi naquen to da' yesejle' bene'.

¹⁴ Na' gož Jesúsen' legaque':

—La'czla' cho'a diža' che cuina', xtižan' naquen da' li. Neda' nezda' gan' gwza'a na' gan' yeya'a, perw le'e bi nezele gan' za'a na' gan' yeya'a. ¹⁵ Le'e chosbaga'le neda' con can' chon benachen' xbab, san neda' nono chosbaga' bi da' yosbaga'. ¹⁶ Perw na' šaca' bi da' yosbaga' bene', gonan' ca' cheyala', le bibi de da' chona' to gualaza', san chona' dan' ža Xan' ben' gwse'la' neda'. ¹⁷ Ley chechon' dan' chsedlen' žan cheyala' šejle'cho cate' chedił diža' da' chesoe' chope testigw. ¹⁸ Na' nac chopto' choe'to' xtiža': neda' cho'a diža' che cuina' na' Xan' ben' gwse'la' neda' lecze cho'e diža' chia'.

19 Na' gose'ene':

—¿Gaxe zoa x̄aon'?

Na' gwna Jesúsen':

—Ne neda' ne X̄an' bi nombia'le. Šaca' nombia'le neda' lecze nombia'le X̄an'.

20 Diža' ca' b̄sed blo'e Jesúsen' cate' ze' gala'ze gan' chesegüe'e mechw lo' yodao' blao che neto' beñe' Israel. Na' nono gwzen le', le b̄ina' žin ža gaque' lo na' beñe' chesegue'ede' le'.

Jesúsen' gože' legaque' bi gac šjaya'aque' gan' yeyejen'

21 Nach Jesúsen' gože' legaque':

—Neda' yeya'a, na' yeyiljwle neda' perw bi gac yeyejle gan' yeya'an, le b̄ina' yetinjele x̄tola'len' cate' žin ža gatle.

22 Na' da' gwne' ca' beñe' gwnabia' che naci3n Israel cheton' gosene':

—¿Yeyot cuinen' že' gan' yeyejen' bi gac šejcho?

23 Nach Jesúsen' gože' legaque':

—Le'e nacle beñe' che yežlio nga na' chzenagle che dan' chnabia' yežlion', san neda' za'a yaba na' bi chzenaga' che dan' chnabia' yežlion'. 24 Da'n'an' gwnia' b̄ina' yetinjele x̄tola'len' cate' žin ža gatle. Le še b̄i šejle'le neda' naca' doxen can' gwnian', gatle b̄ina' yetinjele x̄tola'len'.

25 Nach gose'e Jesúsen':

—¿Nox naco' le'?

Na' gož Jesúsen' legaque':

—Zan ni'a ba gwnia' le'e non' naca'. 26 Ne' dech da' zan da' nia' cont gwzejni'ida' le'e nape dola'. Perw beñe' gwsela' neda' nezde' yogo'lo] na' cho'e diža' li, na' neda' choe'lena' beñachen' diža' da' ba benda' gwne'.

27 Beñe' gwnabia' ca' bi gosejni'ide' choe'lene' legaque' diža' che X̄e' Diosen'.

28 Nach Jesúsen' gože' legaque':

—Cate' ba gwde gwlisle neda' to le'e yag, neda' naca' beñe' gwsela' Diosen' golja' beñach, cana'ch gache'ele le naca' ben' ba gwnia' le'e, na' gache'ele bibi chona' to gualaza', san con da' bzejni'i X̄an' neda', lenna' žia'. 29 X̄an' ben' gwsele' neda' zoacze' len neda'. Na' bi chbejyichje'nda', le bate'teze chona' da' chazlaže'.

30 Na' šlac Jesúsen' choe'lene' beñe' ca' dižan' nach beñe' zan gosezolao chesejnilaže' le'.

Beñe' ca' chnabia' da' malen' yichjlažda'ogaquen'

31 Nach Jesúsen' gože' beñe' gualaž cheto' ca' bačh gosezolagüe' chesejni-laže'ne':

—Še soacze gon]e can' ba gwnian', gwlo'en da' li nacle txen len neda'. 32 Na' še soacze gon]e can' ba gwnian', nachen' šejni'ile diža' li čhian' na' gaclenen le'e cont yechojle lo na' da' chnabia' le'e.

33 Ba] beñe' ca' gose'e Jesúsen':

—Neto' nacto' diaža che da' Abrahanna' na' nono na' soa beñe' n̄abia' neto'. ¿Bixchen' žo' yechojto' lo na' da' chnabia' neto'?

34 Na' gož Jesúsen' legaque':

—Chnia' le'e to da' zejen, yogo' beñe' cheson da' xin] zjanaque' lo na' da' mal da' chnabian' legaque'. 35 Beñe' zoa liž x̄an xšine' bi naque' xi'in ben' gan' chone' žinna', san šlož güeje zoe' txen len legaque' len bi da' chesone'. San beñe' golje' txen len le', bate'teze zoe' len legaque'. 36 Neda' naca' dogualje Xi'in Dios na' guac gona' cont da' malen' bich n̄abi'an yichjlažda'olen' na' yechojle lo ne'en na' bich gaquen ca x̄an]e. 37 Nežda' nacle diaža che da' Abrahanna',

perw bia'cze cheyljwlaže'le nac gonle cont gotle neda'. Na' chonle ca' da' bi chzenagle xtižan'. ³⁸ Neda' cho'a diža' che da' ca' ba ble'eda' cate' zoa' cuit Xan', na' le'e lecze chonle da' ba benele gwna xalen'.

³⁹ Nach bene' ca' gose'e Jesúsen':

—¿Bixchen' žo' ca'? Neto' nacto' diaža che da' Abraham.

Na' gož Jesúsen' legaue':

—Šaca' nacle dogualje diaža che da' Abraham, gonle can' ben da' Abrahanna' šaca'. ⁴⁰ La'czla' ba bzejni'ida' le'e diža' li da' benda' gwna Diosen', bia'cze cheyljwlaže'le nac gonle gotle neda'. Da' Abrahanna' bi bene' can' chonlen'. ⁴¹ Toz can' chonle len xalen'.

Nach bene' ca' gose'e le':

—Toz Diosen' naque' Xato' na' bi chzenagto' che nochle bene'.

⁴² Jesúsen' gože' legaue':

—Šaca' Diosen' naque' xale gaquele neda', le neda' gwza'a gan' zoa Diosen'. Bi za'a nga to gualaza', Diosen' gwsele' neda'. ⁴³ ¿Bixchen' bi chejni'ile dan' chnia' le'e? Nežda' bi chejni'ile dan' bi chaclaže'le gwzenagle chia'.

⁴⁴ Satanás dan' chnabia' da' xigüe' ca' naquen xale, nachen' chebele chonle can' chnalažen'na'. Len ba naquen güet bene' cate' gwxxete yežlion'. Na' bi chzenaguen che diža' li, le diža' li bi yo'on lo' yichjlažda'ogüen. Cate' chnen diža' güenlaže' chnen con can' nac cuinen, le naquen güenlaže' na' yogo' diža' güenlažen' zan' len len. ⁴⁵ Na' neda', da' cho'a diža' li, bi chejle'le chia'. ⁴⁶ Bibi da' mal nona' na' da'nana' ne tole bi gac gwlo'ele še bi da' mal ba bena'. Neda' zoateza' cho'a diža' li, ¿bixchen' bi chejle'le chia'? ⁴⁷ Bene' ca' chon Diosen' legaue' cuent ca' xi'ine' chosozenague' xtižan'. Na' le'e bi chzenagle chen' da' bi nacle xi'ine'.

Ba zoacze Criston' cate' golje da' Abraham

⁴⁸ Nach bene' gwnabia' che nación Israel cheton' gose'e Jesúsen':

—Can' ba gwnaczto' nacia'cze naco' txen len bene' Samaria ca' na' yo'o to da' xigüe' lo' yichjlažda'oguo' chonen ga chol chñenošo'.

⁴⁹ Jesúsen' gože' legaue':

—Bi yo'o da' xigüen' lo' yichjlažda'ogua', san chonxena' Xan' na' le'e chñele chia'. ⁵⁰ Bi chyljua' no gonxen neda', perw zoa Xan' chaclaže' benachen' yesonxene' neda' na' Xan' choglagüen' chele naple doła' da' chñele chia'.

⁵¹ Chnia' le'e to da' zejen, note'teže bene' yosozenague' xtižan', guata'cze yela' mban che' toli tocaņe.

⁵² Nach da' yoble bene' gwnabia' ca' gose'e le':

—Nach beyož gwñezeteto' yo'o to da' xigüe' lo' yichjlažda'oguo' chonen ga chol chñenošo'. Ba got da' xozxta'ocho Abrahanna', na' len bene' ca' goso'e xtiža' Diosen' cani' lecze ba gosate', na' chñenošo' žo' bene' chosozenag xtižon' gata' yela' mban che' toli tocaņe. ⁵³ ¿Chacdo' zaca'cho' ca da' xozxta'ocho Abrahanna' len bene' ca' gosoe' xtiža' Dios bene' ba gosat? ¿Noxen' chacdo' naco'?

⁵⁴ Gož Jesúsen' legaue':

—Šaca' chonxen cuina' bibi zejen, perw Xan' ben' žale naque' Dios ben' chejni'laže'le chonxene' neda'. ⁵⁵ Le'e bi nombia'ln'e', san neda' nombi'ane'. Šaca' nia' bi nombi'ane' gaca' bene' güenlaže' can' naclena'. Perw neda' nombi'ane' na' chzenaga' xtižen'. ⁵⁶ Da' Abrahanna' ben' žale nac xozxta'ole bebecgüede' gwñezde' le'ede' ba za'a len benachen' na' zoe' mbalaz ba ble'eden'.

57 Na' gose' bene' blao che nación Israel cheton' le':

—Bina' gacdo' šiyon iz. Chnenošo' žo' ba ble'edo' Abrahanna'.

58 Jesúsen' gože' legaque':

—Chnia' le'e to da' zejen, ba zoacza' neda' cate' bina' galje Abrahanna'.

59 Nach gosenize' yej da' yosochele' le', perw Jesúsen' bcuaše' na' beze'e yodaon'. Neca gosache'ede' cate' bedie' ladjogaque'.

9

Jesúsen' bene' cont ble'e to bene' golje' nchole'

1 Txen zej Jesúsen' len bene' ca' zjanaque' le' txen cate' besele'ede' to bene' byo golje' nchole'. 2 Na' gose'e Jesúsen':

—Maestrw, ¿non' nap doła' golje benga nchole', še le' o še xaxne'en?

3 Na' Jesúsen' gože' legaque':

—Benga golje' nchole' gague da' nape' doła' na' gague da' zjanap xaxne'en doła', san golje' ca' cont le'ele can' chon Diosen'. 4 Cheyala' goncho xšin Dios ben' gwsela' neda' ślac ne' de latje. Gwžin ža bich gala' gonchon. 5 Ślac ne' zoa' yežlion' chgua'a be'ni' lo' yichjlaždao' benachen'.

6 Beyož gwne' ca' gwcho'on xene' lo' yon' na' bene' late' gona' len xene' na' gwdebe' gonan' yejlao bene' lchole'n'. 7 Nach gože' ben':

—Gwey jaydib yejlaguon' cho'a yel da' nzi' Yel Siloé.

(Na' Siloé zeje diža' Nsela'.) Na' gwyeje' na' beyib yejlagüen' na' cate' beze'e zjaye' da' chle'ede'. 8 Na' bene' gualiz che' na' nochle bene' ba besele'e le' yogo' ža cate' ne' nchole'n' gosene':

—¿Gague bengan' ba ble'echo chbe' chnabe' carida?

9 Na' bale' gosene':

—Le bengan'.

Na' yebale' gosene':

—Bi nac le' san yeto bene' yoblen', perw toz ca naque' len benga.

Perw ben' beyaquen' gože' legaque':

—Nedan'.

10 Na' gose'ene':

—¿Nac goquen' gwzolao chle'edo'?

11 Na' gože' legaque':

—To bene' le Jesús bene' late' gona' na' gwdeben' yejlaguan' na' gože'nda': "Gwey cho'a yel da' nzi' Yel Siloé na' jaydiben'." Na' gwya'a na' beyiban' na' gwzolao chle'eda'.

12 Nach gose' bene' ca' le':

—¿Ganxe bena'?

Na' gože' legaque':

—Bi nezda'.

Bene' fariseo ca' gosenabyože' nac goquen' ba chle'ede'

13 Nach goseche'e ben' goc lchole'n' gan' že' bene' fariseo ca'. 14 Nac to ža che Dios caten' Jesúsen' bene' gonan' dan' gwdebe' yejlao bena' cont ble'ede' na' bi de ľsens gon neto' bene' Israel žin ža che Diosen'. 15 Na' bene' fariseo ca' ľecze gosenabde' le' nac goquen' ba chle'ede'. Na' gože' legaque':

—Gwdebe' gona' yejlaguan' na' jaydiban' na' na'a ba chle'eda'.

16 Nach baľ bene' fariseo ca' gosene':

—Nezecho bi zoa Diosen' len bena' beyone' bene' lchole'n', le chone' da' bi cheyala' gone' ža che Diosen'.

Na' yebale' gosene':

—¿Nac gon to bene' güen da' xinj gone' yela' guac ca dan' ben benga?

Na' legacze' besechoje' chop cuen. ¹⁷ Na' da' yoble gose'e ben' golje' nchole':

—¿Bi žo' le' che ben' bene' cont chle'edo'?

Na' bena' gwne':

—Naque' to bene' choe' xtiža' Dios.

¹⁸ Na' bene' gwnabia' che nación Israel cheton' bi gosejle'e golje ben' nchole' na' na'a bach chle'ede'. Nach gosaxe' xaxne'ena'. ¹⁹ Na' gosenabde' legaque', gose'ene':

—¿Xi'inle benga ben' žale golje' nchole'? ¿Nacxe goquen' chle'ede' na'a?

²⁰ Xaxne'ena' gose'e legaque':

—Nezeto' bengan' xi'into', na' nezeto' golje' nchole'. ²¹ Perw bi nezeto' nac goquen' ba chle'ede' na'a, na' neca nezeto' non' ben cont ba chle'ede'. Ba zejcedede' iz, le nabe cuine' cont güe'e diža' naquen' goc.

²² Xaxne'en gosene' ca' da' chesežebe' bene' gwnabia' ca', le bene' gwnabia' ca' ba gosechoglagüen' bi yosolebe' lo' yodaon' note'teze bene' güe'e diža' chejle'e Jesús'en' naque' Cristo ben' chesebeze' yedenabi'e. ²³ Da'n'an' xaxne'en gosene': "Ba zejcedede', le nabe cuine'."

²⁴ Nach da' yoble gosaxe' ben' golje' nchole' na' gose'ene':

—Be' diža' li lao Diosen', le bi naquen' can' gwnao' bače. Nezeto' ben' gwnao' beyon le' naque' bene' güen da' xinj.

²⁵ Na' ben' beyac yejlagüen' gwne':

—Bi nezda' še naque' bene' güen da' xinj o še bi naque'. Da' nezda', goca' bene' lchol' na' na'a ba chle'eda'.

²⁶ Na' da' yoble gose'e le':

—¿Bi bende' le? ¿Nac benen' chle'edo'?

²⁷ Na' gože' legaque':

—Ba gwnicza' le'e na' bi chzenagle. ¿Bixchen' chaclaže'le yenian' da' yoble? ¿Len le'e chaclaže'le gwzenagle che'?

²⁸ Nach gosezi'diže' le', gosene':

—Le' naco' txen len le', san neto' nacto' txen len da' Moisés. ²⁹ Nezeto' Diosen' be'lene' Moisés'en' diža', perw benga bi nezeto' ga ze'e.

³⁰ Na' ben' golje' nchole' gože' legaque':

—iDa' zaca' yebanecho, bi nezele ga za' benga, na' bene' cont chle'eda'!

³¹ Nezecho Diosen' bi chzenague' che bene' cheson da' xinj, san chzenague' che note'tez bene' chejnilaže' le', bene' cheson can' chnalažen'. ³² Na' gwzolaoten cate' gwxe yežlion' biña' yenecho zoa bene' chac chone' cont chle'e bene' golje' nchole'. ³³ Šaca' bengan' bi ze'e gan' zoa Diosen' bibi gac gone'.

³⁴ Bene' fariseo ca' beselocchgüe' na' gose'e le':

—Len' goljtio' naco' bene' mal juisyw, ¿chacdo' zaco' gwseddo' neto'?

Na' besyebeje' le' lo' yodaon'.

Bene' ca' zjančhol'yichjlažda'ogaque'

³⁵ Jesús'en' bende' diža' che ben' beyac yejlagüen' can' goc che' ba besyebeje'ne' lo' yodaon' nach jašague'ne' na' gože'ne':

—¿Chejnilažo' Xi'in Diosen' ben' gwselen'?

³⁶ Na' gož ben' le':

—Bene', gwna neda' non', cont šejnilaža'ne'.

³⁷ Jesús'en' gože'ne':

—Nedan' ben' ba ble'eczedo' na' nedan' choe'lena' le' diža'.

³⁸ Nach bena' bzoa xibe' benxene' Jesúsén', gwne':

—Xana', chejnilaža' le'.

³⁹ Nach Jesúsén' gwne':

—Za'a yežlio nga cont gata'bia' non' nap doła' na' non' bi nap doła'. Zedeyena' cont bene' ca' bi chesejni'i bich yesaque' ca bene' lchol, na' zedeyena' cont bene' ca' chesacde' chesejni'ide' yesaque' ca bene' lchol len yichjlažda'ogaquen'.

⁴⁰ Nach ba|bene' fariseo ca' nita' ga|a'ze caten' gwne' ca' na' gosende' xtižen', gose'e Jesúsén':

—¿Chacdo' len neto' nacto' ca bene' lchol?

⁴¹ Nach Jesúsén' gože' legaque':

—Šaca' nacle ca bene' lchol, bibi xto|a'le de, san žale chejni'ile, na' da'nan' naple doła'.

10

Jempl che bene' güeye' xila' ca'

¹ Chnia' le'e to da' zejen, bene' bi cho'o lo' le'ej che xilan' gan' nac cho'a puerten' san chepe' ga yoble cont cho'e, benan' naque' bene' gwban. ² Ben' chsaljue' na' cho'e cho'a puerten', len' güeyoe' xilan'. ³ Na' ben' chap cho'a puert le'ej che xilan' chsaljue' puertan' cont cho'o ben' chyoeban'. Na' xila' ca' chosozenagba' xtiža' ben' chyoeban', le zjanombia'ba' ši'en cate' chaxe'ba' cho'e lagacha' cont chbeje'ba'. ⁴ Na' cate' ba gwleje' yogo'ba' lo' le'ejen', chbialagüe' laogacban', na' xila' che' ca' chesa'oba' le' da' zjanombia'ba' ši'en.

⁵ Bi chesa'oba' bene' yoble, san chosyoxonjba' dan' bi zjanombia'ba' ši'en.

⁶ Jesúsén' be'e diža' che bene' güeye' xila' ca' par bzejni'ide' bene' ca' že'na', perw bi gosejni'ide' bi zejen dan' gože' legaquen'.

Jésusen' zaca'lebd'e' ca to bene' chyoe' xila' chen' binlo

⁷ Nach Jesúsén' bsed blo'echde' legaque' yeto, gwne':

—Chnia' le'e to da' zejen, nedan' naca' ca cho'a puert gan' cheso'o xila' ca' lo' le'ej chegacban'. ⁸ Yogo' nochle bene' ba goside' cate' za' yida' neda', bene' bosozejni'ide' diža' güenlaže', guac nacho zjanaque' bene' gwban. Perw bene' chesejnilaže' neda' bi chosozenague' xtiža' bene' ca'. ⁹ Neda' naca' ca cho'a puert che le'ej che xila' ca'. Na' note'tez bene' yesejnilaže' neda', gata' yela' mban chegaque' to|li toca|ne na' soacza' gaclena' legaque' bite'tez da' cheseyažjde'.

¹⁰ 'Bene' ca' žia' bene' gwban chesaclaže' yesone' cont bene' ca' žia' zjanaque' xila' chia' yesebejyichje' xtižan' na' yosozenague' che legaque'. Na' še yosozenague' che legaque', yesebiaye'e. Na' neda' za'a chnežjua' yela' mban to|li toca|ne che bene' chesejnilaže' neda' cont nite' güenchgua. ¹¹ Neda' binlo chgüia chna'a bene' chesejnilaže'nda' ca chon to bene' güeye' xila' bene' chyoe' xila' chen' binlo. Na' da' nži'ida' legaque', da'nan' chzane cuina' gata' neche legaque'. ¹² Nita' bene' chesezi' laxjue' cont chosoyoe' xila' che bene'. Na' bene' chesezi' laxjue' chesebejyichje' xila' ca' cate' chesele'ede' za' beco'yo, le xila' ca' bi zjanacha' be chegaque'. Cheso'e latje chniz beco'yon' xila' ca' na' chesoslasba' legacba'. ¹³ Na' bene' bi zjanaque' xan xila' ca' chosoxonje' da' bi zjanži'ide' xilan', le bi zjanac xilan' be chegaque', san chosoyoeba' dan' chesezi' laxjuen'.

¹⁴ 'Neda' binlo chgüia chna'a bene' ca' chesejnilaže'nda', chona' ca chon to bene' chyoe' xila' chen' binlo. Na' nombi'a bene' ca' chesejnilaže' neda'

na' legaque' zjanombi'e neda'. ¹⁵ Nombi'a legaque' ca Xan' nombi'e neda' na' neda' nombi'a Xan'. Na' da' nzi'ida' legaque' chzane cuina' gata' neche legaque'. ¹⁶ Nita' bene' yoble bene' bi zjanaque' bene' Israel bene' yesejnilaže' neda'. Na' cheyala' šjatoba' legaque' cont yosozenague' chia', nach yesaque' toze len yezica'chle bene' ba chesejnilaže' neda' na' toz neda' gwgüia na'a yogo'lol'e'.

¹⁷ 'Chzane' cuina' yesot bene' neda', na' techle yebana' da' yoble. Na' Xan' chacchde' neda' le chazlaže' da' chona' ca'. ¹⁸ Nono checa'a yela' mban chian' san chzanlaže' cuina' gata'. Guac zane cuina' yesote'nda' na' lecz guac yeyas yebana' ladjo bene' guaten', can' non Xan' mandadw gona'.

¹⁹ Na' da' yoble bene' nación Israel cheton' besechoje' chople neche xtiža' Jesúsen'. ²⁰ Zane' gosene':

—Yo'o da' xigüen' yichjlažda'ogüe', nan' chol chñenoše'. ¿Bixchen' chzenagle xtižen'?

²¹ Na' yebale' gosene':

—Bene' yo'o da' xigüen' yichjlažda'ogüen' bi gac gwšalje' ca'. ¿Guac gon da' xigüe' cont le'e bene' lchol'?

Bene' gwnabia' che nación Israel besegue'ede' Jesúsen'

²² Na' cate' bžin ža gwyo'o Ini dan' chesone' chjasyeze'ede' žan' beyož besyeyone' yodao' blao che Diosen', ba bžin tiemp zag Jerusalénna'. ²³ Na' Jesúsen' chde' chašil che yodao' blaon' gan' nzi' Chašil che Salomón. ²⁴ Na' bene' gwnabia' che nación Israel cheton' gosechje' Jesúsen' na' gose'ene':

—¿Bixchen' chono' cont chacžejlaže'to' še naco' Cristo ben' chbezto' sela' Diosen' cont yedenabi'e nación chechon'? Še len' Criston', gwnatega neto' zaca'lao.

²⁵ Na' gož Jesúsen' legaque':

—Ba gwnia' le'e na' bi chejle'le. Da' ca' ba bena' len yela' guac che Xan' chlo'en naca' bene' gwsele'. ²⁶ Perw bi chejle'le chia' da' bi nacle txen len bene' chesejnilaže' neda', can' ba gwnicza' le'e. ²⁷ Nombi'a bene' chesejnilaže' neda', na' žia' legaque' xila' chia'. Legaque' chosozenague' chia' na' chesone' con can' chzejni'ida'ne'. ²⁸ Na' chnežjua' legaque' yela' mban toli tocañe na' gwbat yesebiaye'e na' nono gac yesyeca'a legaque' lo na'. ²⁹ Xan' ba gwleje' bene' ca' chesejnilaže' neda' cont chgüia chña'a legaque'. Na' nono gac yesyeca'a legaque' lo na' Xan', le nape' la'zelagüe yela' chnabia' xen. ³⁰ Neda' na' Xan' toz bene' nacto'.

³¹ Beyož gwne' ca' bene' gwnabia' ca' gosenize' yej cont yosocheleñen'. ³² Na' gož Jesúsen' legaque':

—Da' zan da' güen ba ble'ele bena' len yela' guac che Xan'. ¿Che nonna' chaclaže'le gwchelle neda' yej?

³³ Na' bene' gwnabia' ca' gose'e le':

—Gague che yela' guac ca' benon' gwchelto' le' yej san da' chñeya'o che Diosen'. Con benachze le' na' chon cuino' ca Dios.

³⁴ Na' gož Jesúsen' legaque':

—Nezeczzele can' nyoj Xtiža' Diosen' dan' nsedle gan' žan: “Neda' ba gwnia', le'e nacle ca neda' Dios.” ³⁵ Na' Xtiža' Diosen' da' nyojen gague da' te chen', na' lenna' žan Diosen' gwne' che bene' ca' bosozenag xtižen' cani' gosaque' ca le'. ³⁶ Diosen' gwleje' neda' cont gaclena' benachen' že' yežlio nga na' čnacxechen' ža le'e chñeya'a che Diosen' da' žia' naca' Xi'ine'? ³⁷ Še dan' chonan' bi chlo'en yela' guac che Xa' Diosen', bi cheyala' šejle'le chia' šeca'. ³⁸ Perw še chache'ele chona' da' zaca' len yela' guac che Diosen', cheyala' šejle'le len' gwsele' neda',

la'czla' bi chaclaže'le šejle'le xtižan'. Na' še šejle'le che da' ca' chonan', nachen' nezele zoa Xan' len neda' na' neda' zoa' len le', le toz bene' nacto'.

³⁹ Nach da' yoble gosaclačē' yesezene' Jesúsen' perw bitw bdole'.

⁴⁰ Jesúsen' beyeje' jayzoe' yešla'a yegw Jordanna' latje gan' gwzoa da' Juanna' šlac ne' chzoe' bene' nis. ⁴¹ Na' bene' zan ja'ac gan' gwzoe' cont bozozenague' xtižen' na' gosene':

—Da' Juanna' ne to yela' guac bi bene', perw yogo'lol dan' gwne' che benga naquen da' li.

⁴² Na' bene' zan gosejnilaže' Jesúsen' latje na'.

11

Can' goc cate' got Lázaro

¹⁻² Na' gwzoa to bene' gocšene bene' yež Betania le' Lázaro. Betania naquen laž María na' bene' bile' Marta, na' legaque' zjanaque' bene' zan Lázaron'. María nan' bzoe' to set zix ni'a Xancho Jesúsen' na' bosbiže' ni'en len yiša' yichje'. ³ Na' bene' zan Lázaron' gosesele' diža' gan' zoa Jesúsen', chese'e le':

—Xanto', bene' xmigo' Lázaron' ba chacšende'.

⁴ Cate' gwneze Jesúsen' chacšene Lažaron', na' gwne':

—Ca nac yižgüe' chen', bi che'eden' cont yela' goten' gonen le' gan, san che'eden' cont gacbe'ele catec bene' zaca' nac Diosen' na' gacbe'ele naca' bene' zaca'chgua, neda' naca' dogualje Xi'in Dios.

⁵ La'czla' Jesúsen' chacde' Martan' len bene' bilen' na' len Lázaron', ⁶ cate' gwneзде' chacšene Lázaron', bega'anche' yechope ža gan' zoen'. ⁷ Nach gože' bene' ca' zjanaque' le' txen:

—Le šo'o šejcho distritw Judean' da' yoble.

⁸ Na' gose'ene':

—Maestrw, bi ža na'zen' bene' gwnabia' che nación chechon' gosaclačē' yesote' le' yosochele' le' yej. ¿Da' yoble šejo' na'?

⁹ Jesúsen' gože' legaque':

—Lagüe žan' nsa' šižinw hor, na' bene' chda lagüe ža bi chčhegüe', le nseni' gwbižen' lo yežlion'. ¹⁰ Na' bene' chda ba goł chčhegüe', le nac chol.

¹¹ Gwde gwne' ca' nach gože' legaque':

—Bene' xmigwcho Lázaron' ba chtase' na' ša'a šjaysbana'ne'.

¹² Na' gose'ene':

—Xanto', še ba chtase' güeyacczede'.

¹³ Jesúsen' gwne' ca' dan' gwneзде' ba got Lázaron', na' bene' ca' zjanaque' Jesúsen' txen gosacde' še chtaszen'. ¹⁴ Nach Jesúsen' bochixgaten' bi zejenna' gwne' ca':

—Ba got Lázaron'. ¹⁵ Na' chebeda' bi gwzoa' na' šlac chacšende', cont gona' šejle'le chia'. Le šo'o šejcho gan' de'na'.

¹⁶ Nach ben' le' Tomás ben' bososi'e Tomás Cuaš gože' yezica'chle bene' ca' zjanaque' Jesúsen' txen:

—Le šo'o cont gatcho txen len Jesúsen' še yesote'ne'.

Jesúsen' že' chac chosbane' bene' guat

¹⁷ Na' ja'aque' Betanian' len Jesúsen', na' cate' besežine'na' bene' Betania ca' bosozende' le' ba goc tap ža bosocuaše' Lázaron'. ¹⁸ Betanian' chin' galaže' Jerusalénna' ca do gašw hor. ¹⁹ Na' bene' zan bene' gualaž chegaque' že' Jerusalénna' besežine' gan' zoa Martan' len Marían' cont yeso'e legaque' yela' chxenlaže' da' got bene' zangaquen'. ²⁰ Nach Martan', cate' gwneзде' Jesúsen'

ba bžine' cho'a yežen', na' gwze'e jašague'ne'. Na' Marían' bega'ane' yo'ona'.

²¹ Nach Martan' gože' Jesúsen':

—Xana', šaca' zo' nga caten' gocšene bene' zanan' bilja gote' šaca'. ²² Na' nezda' la'czla' ba gote', bite'tez da' nabdo' Diosen' gone', gonczen'.

²³ Nach gož Jesúsen' le':

—Güeban bene' zanon'.

²⁴ Nach Martan' gože'ne':

—Nezda' yebane' cate' yesyeban bene' guat ca' žan' te che yežlion'.

²⁵ Na' gož Jesúsen' le':

—Neda' chac chosbana' bene' guat ca' le nsa'a yela' mban toli tocañe. Da'nan' bene' ca' yesejnilaže' neda', la'czla' yesate', guata' yela' mban chegaque' toli tocañe. ²⁶ Na' note'tez bene' nite' chesejnilaže' neda', gwbat yesebiaye'e. ¿Chejli'o da' nga chnia' le'?

²⁷ Na' gož Martan' le':

—Xana', chejli'a naco' dogualje Xi'in Dios. Chejli'a naco' Criston' ben' ba gwlezto' sela' Diosen' yežlion' yedenabi'e.

Jesúsen' gwcheže' gan' bosocuaše' Lázaron'

²⁸ Beyož gwna Martan' ca' beyeje' jayeže' María bilen' šizize:

—Ba bla' Maestron' cho'a yežen' na' chñie' le'.

²⁹ Na' Marían' cate' bende' dan' gož Martan' le' la' gwza'te' na' gwyeje' gan' zoa Jesúsen'. ³⁰ Biña' žin Jesúsen' lagüe yežen' ca horen', ne' nga'ane' cho'a yežen' gan' jašag Martan' le'. ³¹ Na' bene' Jerusalén ca' nita' liž María, bene' cheso'e le' yela' chxenlaže' da' got bene' zanan', cate' besele'ede' gwza' Marían' nach gosa'aclene' le', gosacde' zeje' cho'a blojen' gan' ngaše' zjačeže'.

³² Na' Marían' cate' bžine' gan' zoa Jesúsen' na' ble'ede' le', la' bzoate xibe' lagüen', gože'ne':

—Xana', šaca' zo' nga caten' gocšene da' bene' zanan', bilja gote' šaca'.

³³ Na' cate' ble'e Jesúsen' chbež Marían' na' lecce chesebež bene' Jerusalén ca' za'aclene' le', da' juisyw da' goque Jesúsen' na' bžaglagüe' lo' yichjlažda'ogüen'.

³⁴ Na' gože' legaque':

—¿Ga bcuaše'lene'?

Na' gose'e le':

—Xanto', yo'o na' le'edo'.

³⁵ Na' gwchež Jesúsen'. ³⁶ Na' bene' Jerusalén ca' gosene':

—Le na' catequen' chacde' le'.

³⁷ Na' bale' gosene':

—Bengan' bene' ga ble'e bene' lcholen', na' šaca' gwzoe' nga caten' gocšene Lázaron', benlje' cont bi gote'.

Jesúsen' bosbane' Lázaron' ladjo bene' guaten'

³⁸ Na' da' yoble da' juisyw da' goque Jesúsen' lo' lažda'ogüen'. Na' gwyeje' gan' bosocuaše' ben'. Naquen to bloj na' da' to yej cho'enña'. ³⁹ Na' Jesúsen' gože' bene' ca':

—Le ca'a yejen'.

Na' Martan' bene' zan da' Lázaron' gože'ne':

—Xana', ba chla' ben' zigw, le bač goc tap ža gote'.

⁴⁰ Na' gož Jesúsen' le':

—Ba gwnia' le' še šejnilažo' neda' na' le'edo' nac Diosen' bene' zaca' juisyw.

⁴¹ Nach bene' ca' goseque'e yejen'. Na' Jesúsen' gwñe'e yabale na' gwne':

—Xa', choxcleno' ba bzenago' chia'. ⁴² Nezdá' yogo' ni'a chzenago' chia', perw zia' ca' cont bene' ca' že' nga yesejle'e len' gwsejlo' neda'.

⁴³ Beyož bol' güiže' Diosen', gwne' zižje, gwne':

—Lázaro, bechoj.

⁴⁴ Nach la' bechojte Lázaron' ndobyoy ni'a ne'en to cint de lache' na' to bay ndobe cho'alagüen'. Na' Jesúsen' gože' legaque':

—Le yozaše' lachen' na' le gwsane' yeyeje'.

Bosoxi'e yesezene' Jesúsen'

(Mt. 26:1-5; Mr. 14:1-2; Lc. 22:1-2)

⁴⁵ Na' zan bene' Jerusalén ca' bene' ja'aclene' Marían' besele'ede' yela' guac da' ben Jesúsen' na' gosejnilaže'ne'. ⁴⁶ Perw bal' bene' Jerusalén ca' ja'aque' lao bene' fariseo ca' na' jaseže' legaque' Jesúsen' bosbane' Lázaron'. ⁴⁷ Nach bxož gwnabia' ca' che neto' bene' Israel len' bene' fariseo ca' bosyotobe' yogo'lol' bene' ca' chesenabia' nación cheton'. Na' bosoxi'e gosene':

—¿Nac goncho? le yela' guac zan chon benga. ⁴⁸ Na' še nacho jayenna', yogo'ze bene' yesejnilaže'ne', na' yesid bene' nación Roma na' yeseque'e yodao' blao chechon' na' yosožiaye'e nación chechon'.

⁴⁹ Na' to bene' gwnabia' zoa ca horen' le' Caifás. Le' naque' bxož blao lo izen'. Na' gože' legaque':

—Le'e gague bi nezele. ⁵⁰ Na' bi chacbe'ele napan chio' cuent toz ben' gat, clev ca cuiayi' yogo'cho lente nación checho nga.

⁵¹ Gague con ca gwnalaže'ze Caifásen' gwne' ca', san da' naque' bxož blao iznan', Diosen' bene' ga gwne' ca' cont gwdixjue'ede' gat Jesúsen' neche nación cheton'. ⁵² Na' ca nac dan' gaten', gague gate' neche nación cheto' na'zen' san gate' cont yogo' bene' ba gwlej Diosen' yesaque' xi'ine' gate'teze nación, yesaque' txen yesejnilaže'ne'. ⁵³ Ca' goquen', žana' bene' gwnabia' ca' gosezolagüe' bosoxi'e nacle yesone' yesote' Jesúsen'.

⁵⁴ Na' da'nán' Jesúsen' bich gwdacze' con can' nla'ze gan' že' bene' gwnabia' che nación cheton'. Nach gwze'e distritw Judean' na' gwche'e bene' ca' zjanaque' le' txen to yež da' nzi' Efraín da' chi' gala'ze latje dašen', na' besyega'ane' na'.

⁵⁵ Na' ba zoa gala' lni pascw che neto' bene' Israel. Na' bene' zan bene' za'ac to to yež zja'aque' Jerusalénna' cate' za' gala'le lnin' cont yeson cuine' xilaže' can' za ley cheton'. ⁵⁶ Na' besyeyiljue' Jesúsen' do gan' zoa yodao' blaon' na' cate' bi besyeželde'ne' na' gose' lježe':

—¿Bi chaquele? ¿Güide' lni nga, še bi yide'?

⁵⁷ Gosene' ca' le bxož gwnabia' cheto' ca' na' bene' fariseo ca' ba gosechoguen' še note'tez bene' nezde' gan' zoa Jesúsen' cheyala' gwzende' legaque' cont yesezene' le'.

12

Marían' chgüe'e set zix ni'a Jesúsen'

(Mt. 26:6-13; Mr. 14:3-9)

¹ Na' yexop ža za' gala' lni pascon', Jesúsen' gwche'e bene' ca' zjanaque' le' txen yež Betanian' gan' zoa Lázaron' ben' bosbane' ladjo bene' guaten'. ² Na' bal' bene' Betanian' bosoxi'ni'e to xše' da' gwdagw Jesúsen' cont gosonxene'ne'. Na' Martán' bdie' yela' guagw na' Lázaron' gwche'lene' bene' ca' cho'a mesen' txen len' Jesúsen'. ³ Na' Marían', de ca do tya set zix che' da' zaca'chgua la'ay na' naquen dogualje da' bchoj lo yag yej da' nzi' nardo. Na' jabigue' gala'ze xni'a

Jesúsen' na' gwlo'e set zixen' ni'ena' na' beyoža' bosbižen' len yiša' yichje'. Na' doxen yo'ona' gwla'chguan ze set zixen'. ⁴ Na' Judas Iscariote xi'in to bene' le' Simón, le' naque' to bene' šižinw ca' zjanaque' Jesúsen' txen, na' len' ba naquen gwdie' Jesúsen' lo na' bene' ca' chesegue'ede' le'. Na' Judasen' gwne:

⁵ —¿Bixchen' bi bete' seten' na' gone' mechon' cont gaclenen bene' yaše'? le zacan' ca no laxjw mos da' gone' gan tgüiz.

⁶ Judasen' gwne' ca' gague da' beyaše'de' bene' yašen' san da' goque' bene' gwban. Len' bešue' mechw da' bosochin yogüe' na' gwlejlane' mechon'.

⁷ Nach Jesúsen' gože'ne':

—Bibi ye'lne', le ba bene' da' non gone' len neda' che ža cate' gaša'. ⁸ Bene' yaše' ca' nita'cze' len le'e bate'teze, san neda' bich soacza' yesša len le'e.

Bxoz gwnabia' ca' bosoxi'e yesote' Lázaron'

⁹ Na' bene' zan bene' Israel gualaž cheton' gosenezde' zoa Jesúsen' lagüe' yež Betanian' na' ja'aque', gague cont yesele'ede' Jesús na'zen' san da' gosaclaže' yesele'ede' lencze Lázaron' ben' bosbane' ladjo bene' guaten'. ¹⁰ Na' bxoz gwnabia' che nación Israel cheton' bosoxi'e lecze yesote' Lázaron', ¹¹ le bene' zan bene' Israel ba chesyecuase' len legaque' na' ba chesejnlaže' Jesúsen' dan' gosenezde' bosbane' Lázaron'.

Jesúsen' beyo'e ciuda Jerusalénna' da' yoble

(Mt. 21:1-11; Mr. 11:1-11; Lc. 19:28-40)

¹² Na' beteyo Jesúsen' len bene' ca' zjanaque' le' txen gosa'aque' Betanian' na' ja'aque' Jerusalén. Na' bene' zan chesežag Jerusalénna' da' ba zoa gala' lnin', na' zane' cate' gosenezde' zin Jesúsen' Jerusalénna', ¹³ besežaše' jaseleze' le' zjanoxe' no zin. Na' chesegüe'e lban' che', chesene':

—¡Leca bene' zaca' benga! Mbalaz ben' za' nga nselá' Xancho Diosen' le' cont nabi'e. ¡Mbalaz bene' naque' Rey che nación Israel chechon'!

¹⁴ Na' bžel to burr dao' be gwžia Jesúsen', na' goc can' nyoj Xtiza' Diosen' žan:

¹⁵ Le'e chonxenle Diosen' ciuda Jerusalénna', bi žeble;

le na', ba za' Rey chelen' žie' to burr dao'.

¹⁶ Na' bene' ca' zjanaque' Jesúsen' txen gague cate gosejni'ide' chac con can' bosozoj ben' goso'e xtiza' Diosen' cani'. Beyož got Jesúsen' na' goc yogo' da' ca' gosaquen' cont bla'lagüe le' Jesúsen' naque' bene' zaca' juisyw, cana'ch jasyeza'laže' diža' ca' da' zjanyoj che' Jesúsen' na' gosejni'iden'.

¹⁷ Bene' ca' besele'e cate' Jesúsen' bol' güiže' Lázaron' na' bosbane' le' cont bechoje' lo' ban' gosoe'lene' bene' ca' že' lo' ciudan' diža' can' goquen'. ¹⁸ Na' da'nan' bene' zan jaseleze' Jesúsen' da' ba gosende' diža' che' yela' guac dan' bene' bosbane' Lázaron'. ¹⁹ Nach bene' fariseo ca' gose' lježe':

—Ba chle'ele bibi chac bi goncho. Yogo'ze bene' ba chosozenague' che'.

To chope bene' griego gosenebe' yesoe'lene' Jesúsen' diža'

²⁰ Na' zjalen to chope bene' griego bene' ca' ja'aque' gosonxene' Diosen' lo lnin'. ²¹ Na' bene' ca' besežine' gan' zoa Felipen' ben' nac bene' Betsaida ga mbane distritw Galilean', na' gose'ene':

—Si'xenšco', chaclaže'to' güe'lento' Jesúsen' diža'.

²² Na' Felipen' gwyeje' ja'ne'e Andrésen' nach choptie' jaseže' Jesúsen' ca'.

²³ Nach Jesúsen' gože' legaque':

—Na'a ba bžin hor gac yogo'loł da' cheyała' gac cont la'lagüe naca' bene' zaca' juisyw. ²⁴ Žia' to da' zejen, še to trigon' bi yexinjen cate' lažon' lo yon', con chega'ancze tozen; perw še yexinjen na' yelan', da' zan trigon' gonen.

²⁵ Note'tez bene' con chi' yichje' gac güen chegaque' yežlio nga, bene' ca' yesebiaye'e. Na' note'teze bene' chesene' bibi nonen še bi gac chegaque' yežlio nga, šjasyezoe' len Diosen' toli tocanē. ²⁶ Na' note'tez bene' chesaclaže' yesone' xšinan', cheyala' yesejnilaže' neda' na' yosozenague' chia'. Na' gan' soa' neda' lecze na' yesezoa bene' ca' yeson xšinan'. Note'tez bene' yeson xšinan', Xan' gone' cont yesacxene'.

Jesúsen' gwdixjue'ede' yesot bene' le'

²⁷ 'Ba chžaglagua' lo' yichjlažda'oguan'. ¿Chaquēle nabda' Xan' yosle' neda' lo da' ca' ba zoa gac chia' na'a? Bitw gona' ca', le za'a cont gac chia' yogo' da' ca'.

²⁸ Nach bol güiže' Diosen', gwne':

—Xa', ben len neda' cont yesache'e bene' naco' bene' zaca' juisyw.

Beyož gwne' ca' na' gwne Dios ben' zoa yaban', gwne':

—Ba bena' len le' cont chesache'e bene' naca' bene' zaca' juisyw na' za' goncha' ca' yeto.

²⁹ Na' zan bene' ca' že' na' gosende' dan' gwna Diosen' na' gosene' gwzion' gwne. Na' yebale' gosene':

—To angl gwne' le'.

³⁰ Na' Jesúsen' gwne':

—Diosen' gwne' neda' zižje gague cont nezdā' neda' chzenague' chia' san cont neze le'e. ³¹ Ba bžin ža Diosen' chogbi'en' che bene' ca' bi chesejle'e chia'. Na' ba bžin ža Satanás dan' chnabia' da' xigüe' ca' na' dan' chnabia'te bene' ca' bi chosozenag che Diosen' solao nit yela' chnabia' chen. ³² Na' cate' yeselise' neda' to le'e yag, cana'ch gona' cont zan bene' že' doxen lo yežlion' yesejnilaže' neda'.

³³ Gwne' ca' cont gosenezde' yesot bene' le' yosode'ene' to le'e yag cruz. ³⁴ Na' bene' ca' že'na' clele gosejni'ide' dan' gwnen' na' gose'e le':

—Ba beneto' can' ža Xtiža' Diosen' da' nyojen, na' nezetō' žan Cristo ben' seła' Diosen' yedenabi'e nación chechon' soe' toli tocanē. Na' le' ¿bixchen' žo' naco' bene' gwseła' Dios goljo' benač na' žo' yesote' le' to le'e yag cruz še ca'? ¿Nox naco' šaca'?

³⁵ Nach Jesúsen' gože' legaque':

—Yešlož da'ozen' soa' len le'e, neda' nsa' be'ni' che yichjlažda'olen'. Le gwzenag chia' šlac ne' de latje šo' be'ni' chian' lo' yichjlažda'olen', cont bi cuiayi'lenle da' mal dan' chnabia' le'e. Ben' chda gan' nac chol bi chache'ede' gan' zeje'. Can' naquen len le'e. ³⁶ Le šejnilaže' neda' šlac ne' zoa' len le'e, cont šo' be'ni' chian' lo' yichjlažda'olen'.

Gwde gwna Jesúsen' ca' beze'e na' bcuaše'de' legaque'.

Zan bene' Israel bi gosejnilaže' Jesúsen'

³⁷ Na' la'czla' bene' Israel gualaž cheto' ca' besele'ede' ben Jesúsen' da' zan yela' guac, zane' bi gosejnilaže'ne'. ³⁸ Goc can' bzoj da' Isaíasen' ben' be' xtiža' Diosen' cani', gwne':

Xanto', nono chejle' diža' dan' chyixjue'eton', na' nono chesache'e blo'o yela' guac chion'.

³⁹ Bi goc yesejle'e, le goc chegaque' can' ža yeto dan' bzoj da' Isaíasen', žan:

⁴⁰ Diosen' bene' cont bi gosejni'ide' na' cont zjanaque' bene' güedena.

Ba bene' cont chesele'ede' na' bi zjanežde' bi zejen,

na' bi chesache'ede' lo' yichjlažda'ogaque' bi zejen dan' chlo'ede' legaque'.

Šaca' chesejni'ide' na' chesache'ede' bi zejen dan' chlo'eda' legaque',

ba besyetiņide' na' ba beca'a xtoła'gaquen' šaca'.

41 Da' Isaíasen' gwne' ca' da' ble'ebande' nac Jesúsen' bene' zaca' juisyw nach be'e diža' che'.

42 Na' la'czla' zanch bene' Israel gualaż cheto' ca' bi gosejnilaže' Jesúsen', bia'cze bene' zan na' len no bene' gwnabia' cheto' gosejnilaže'ne', perw bi goso'e diža' chesejnilaže'ne' le besežebe' bich yosoleb bene' fariseo ca' legaue' lo' yodaon'. 43 Gosacłaže'che' yesenite' binlo len benačen' clel ca yesenite' binlo len Diosen'.

Xtiža' Jesúsen' naquen da' žialao

44 Nach Jesúsen' gwne' zižje gože' bene' ca' že'na':

—Bene' chesejnilaže' neda' gague neda'zen' chesejnilaže' san lente Xan' ben' gwsela' neda'. 45 Na' bene' chne'e neda' chle'ede' bene' gwsela' neda'. 46 Neda' za'a yežlio nga chgua'a be'ni' lo' yichjlaždao' bene' ca' chesejnilaže' neda', cont bi yesenite' yesonche' da' malen'. 47 Na' note'tez bene' nezde' can' ba gwnian' na' bi chzenague' chia', gague neda' gwnežjua' castigw che xtolen', le bi za'a yežlion' cont gwnežjua' castigw che xtoła' benačen', san za'a cont gwnežjua' yela' mban toli tocanē che bene' yesejnilaže' neda'. 48 Perw de da' choglaon che bene' ca' bi chesejnilaže' neda' na' bi chosozenague' che dan' ba gwnian', xtižan' dan' ba bian', lenna' choglaon che bene' ca' zjanape' doła' cate' žin ža te che yežlion'. 49 Gague bia' diža' to gualaza', san Xa' ben' gwsela' nedan' none' mandaww bin' cheyała' nia' na' bin' cheyała' gwsed gwlo'eda'. 50 Na' nezda' dan' none' mandaww nia' nsan' yela' mban toli tocanē che bene' yosozenag' chen. Na' da' li, con can' ža Xan', can' choe'lena' le'e diža'.

13

Gwdib Jesúsen' ni'a bene' ca' zjanaque' le' txen

1 Na' Jesúsen' ba nezde' ba bžin ža yeze'e yežlion' na' yeyeje' gan' zoa Xe' Diosen', na' godce' yogo' bene' ba chejnilaže' le' lo yežlio nga. Da'nana' za' gala' lni pascon' bzejni'ide' bene' ca' zjanaque' le' txen, le chacyane'czede' legaue'.

2 Bač gwlo'o Satanásen' xbab lo' yichjlaždao' Judas Iscariote, ben' nac xi'in to bene' le Simón, cont gwdie' Jesúsen' lo' na' bene' ca' chesegue'ede' le'. Na' ba zjanite' chesagüe' xše'. 3 Na' Jesúsen' nezde' Xen' ba bene' cont nape' la'zelagüe yela' chnabia', na' nezde' gan' zoa Diosen' gwze'e na' gan' zoe' nan' yeyeje'.

4 Da'nana' gwzože'e cate' ba chesyedagüe' xše' na' gwlechje' xe' da' nyaze' cha'le na' gwxi'e to lache' da' bchej lsinen'. 5 Nach gwxi'e nis na' gwde'en to lo' ša' na' gwzologüe' gwdibe' ni'a bene' ca' zjanaque' le' txen ca to mos, na' bosbiže' ni'agaquen' len lachen' nchej lsinen'.

6 Na' cate' ba zoa chibe' ni'a Simón Pedro, Pedron' gože'ne':

—Xana', žle' chibo' ni'an'?

7 Na' Jesúsen' gože'ne':

—Dan' chona' nga bi chejni'idon' na'a, perw gwžin ža cate' šejni'idon'.

8 Na' gož Pedron' le':

—Gwbat gua'a latje chibo' ni'an'.

Jesúsen' gože'ne':

—Še bi chiban', bich gaco' txen len neda'.

9 Na' Pedron' gože'ne':

—Xana', gague ni'a na'zen' chibo' še ca', san doxena'.

10 Nach gož Jesúsen' le':

—Bene' noša' nazje', ni'e na'zen' chyažjen chibe', le doxen cuerp' chen' naquen xilaže'. Can' nac le'e, nac lažda'olen' xilaže', la'czla' gague yogo'le.

11 Jesúsen' gwne' non' gwde' le' lo na' bene' chesegue'ede' le'. Da'nan' gwne': "Gague yogo'le nac lažda'olen' xilaže."

12 Na' cate' beyož gwdibe' ni'a yogüe', nach beyaze' xe' dan' chaze' cha'le na' behi'e da' yoble cho'a mesen'. Na' gože' legaque':

—¿Chejni'ile bi zejen dan' ba bena' nga len le'e? 13 Le'e nsi'le neda' Maestrw na' Xanle, na' güenczen' žale, le can' naca'. 14 Na' neda' la'czla' naca' Xanle na' Maestrw chele, ba gwdiba' ni'alen' ca to mos, na' can' cheyala' gaclen lježe ca to mos. 15 Ba gwdiba' ni'alen' cont blo'eda' le'e cheyala' gonle can' ba benan'. 16 Chnia' le'e to da' zejen, note'teze mos bi naque' bene' blaoch ca xane', na' to bene' zej mandadw bi zaca'che' ca bene' gwseła' le'. 17 Še chejni'ile da' quinga na' gonle can' gwnian', nach soale mbalaz.

18 Bi žia' ca' che yogo'le. Nombi'a yichjlaždao' to to le'e ba gwleja' cont soale txen len neda'. Na' nezda' gac can' ža Xtiža' Diosen' da' nyojen žan: "Bene' gwdagw len neda' txen ba blej bšoše' neda'." 19 Chnia' le'e da' quinga cate' za' gac ca' cont cate' ba goc ca' soachachle šejle'le le naca' ben' gwseła' Diosen' can' ba gwnia' le'e. 20 Chnia' le'e to da' zejen, bene' ca' chosolebe' note'tez bene' chsela', neda'czen' chosolebe' še ca', na' bene' chosolebe' neda' lecze chosolebe' Dios bene' gwsele' neda'.

Jesúsen' gwne' toe' gwdie' le' lo na' bene' ca' chesegue'ede' le'

(Mt. 26:20-25; Mr. 14:17-21; Lc. 22:21-23)

21 Beyož gwna Jesúsen' ca' ba gwzolao chacyaše'chgüede' lo' yichjlažda'ogüen', na' bochixgaten' gwne':

—Da' li chnia' le'e, to le'e gwdelenda' lo na' bene' chesegue'e neda'.

22 Na' bene' ca' zjanaque' le' txen con chesena' cho'alo lježe' chesone' xbab che noen' gwne' ca'. 23 Na' toe' chi'e cuiten' dan' chaquechgüe' Jesúsen' le'. 24 Nach Pedron' bene' señw len bena' cont gwñabde' Jesúsen' no čhen' gwne' ca'. 25 Nach gwbigue' bago gože' Jesúsen':

—¿Non' gon ca'?

26 Na' gož Jesúsen' le':

—Bena' gwnežjua' late' yetextilen' cate' ba blo'ojan' lo' nis yela' guagon', le'na' gon ca'.

Nach blo'oje' late' yetextilen' lo' nis yela' guagon' na' bnežjuen' Judas Iscarote bene' nac xi'in to bene' le' Simón. 27 Na' beyož bnežjue' Judasen' yetextilen' la' gwyo'o gwyazte Satanás dan' chnabia' da' xigüe' ca' lo' yichjlaždao' Judasen'. Nach Jesúsen' gože' Judasen':

—Da' ba zoa gono' benen bedao'nez.

28 Na' ne to ben' zjachi' cho'a mesen' bi gosejni'ide' bixčhen' gože' le' ca'. 29 Ba le' gosacde' da' noxe' Judasen' bols mechon' Jesúsen' gože' le' šjaxi'e da' cheseyažjde' lo lñin' o šjanežjue' mechw da' chyažje no bene' yaše'. 30 Nach cate' beyož gwdagw Judasen' pedas yetextil dan' bnežjw Jesúsen' le', la' bchojte'. Na' ba nac ba goł gual.

To da' cobe da' non Jesúsen' mandadw goncho

31 Gwde bchoj Judasen', Jesúsen' gwne':

—Diosen' gwsele' neda' golja' benač na' na'a ba nla'laon naca' bene' zaca' juiyw, na' neda' lecze ba chlo'a Diosen' naque' bene' zaca' juiyw. 32 Na' dan' chlo'a naque' bene' zaca', lecze le' gwlo'e naca' bene' zaca', na' la' gontien' na'a. 33 Xi'inda'ogua', yešložga soa' len le'e. Na' yeyiljwle neda', na' chnia' le'e dan' goša' bene' gwnabia' che nación Israel chechon', bi gac sa'lenle neda'

gan' yeya'an. ³⁴ Na' to da' cobe ch'zia' bia' gonle, gaque lježle tole yetole. Can' chacda' le'e, lecz can' cheyała' gaque lježle tole yetole. ³⁵ Na' yeseneze yogo'lol beñe' nacle neda' txen še soaczele gaque lježle tole yetole.

Jesúsen' gwne' Pedron' bi chebe' nombi'ene'
(Mt. 26:31-35; Mr. 14:27-31; Lc. 22:31-34)

³⁶ Na' Simón Pedron' gože' Jesúsen':

—Xana', ¿gan' yeyejo'?

Na' gož Jesúsen' le':

—Gan' yeya'an bi gac sa'leno' neda' na'a, perw techle yido' ga'oguo' neda'.

³⁷ Na' Pedron' gože' le':

—Xana', ¿bixchen' bi gac sa'lena' le' na'a? Gwzanlaže' cuina' gata' še chonen byen cont gaclena' le'.

³⁸ Na' gož Jesúsen' le':

—¿Chacdo' gwzanlaže' cuino' gato' cont gacleno' neda'? Da' li chnia' le', cate' cuež jean' ba goc šon ni'a bi chchebo' nombi'o neda'.

14

Beñe' chesejnilaže' Jesúsen' lecze zjanombi'e Xe' Diosen'

¹ Bich gaczejlaže' le. Le šejnilaže' Diosen' na' lecze le šejnilaže' neda'. ² Da' zan yo'o da' že' gan' zoa Xa' Diosen'. Ba gwnia' le'e šaca' bibi latje de chele, san yeya'a šjajenšagua' yo'o che tole. ³ Na' cate' yeyož šjajenšagua' yo'o chele ca', cana'ch yida' da' yoble yeči'a le'e cont yedyezoale gan' šjajzoa' neda'. ⁴ Nezele gan' yeya'an' na' ba nezele nac gonle cont yežinle na'.

⁵ Na' gož Tomásen' le':

—Xanto', bi nezeto' gan' yeyejo'. ¿Nacxe gac nezeto' nac gonto' yežinto' na'?

⁶ Jesúsen' gože'ne':

—Neda' naca' nezen' na' nsa'a yogo' diža' li, na' toz neda' chac chnežjua' beñe' yela' mban toli tocañe. Ne toze beñe' bi yežine' gan' zoa Xan' še bi šejnilaže' neda'. ⁷ Še nombia'yane' le neda', lente Xan' ba nombia'le še ca'. Na' bač nombia'lna' na'a na' ba ble'elne'.

⁸ Na' gož Felipen' le':

—Ben cont le'eto' Xaon', lezen' chnabeto' le'.

⁹ Jesúsen' gože'ne':

—Felipe, sša xen ba gwzoa' nga len le'e na' ¿bina' gombi'o neda'? Note'tez beñe' ba ble'e neda' lecze Xan' ba ble'ede'. ¿Bixchen' chnabo' gona' cont le'ele Xan'? ¹⁰ ¿Bi chejli'o zoa' len Xan' na' le' zoe' len neda'? Diža' da' choa' len le'e bi choan' to gualaza'. Xa' nan' zoe' len neda' na' len' chone' cont choa' dižan' chaclaže' gua' na' chona' bi da' chaclaže' gona'. ¹¹ Le šejle' chia' zoa' len Xan' na' le' zoe' len neda'. Na' še bi chejle'le xtižan', le šejle' chia' dan' ba ble'ele chona' yela' guac. ¹² Na' chnia' to da' zejen, beñe' ca' chesejnilaže' neda', da' ca' chonan' lecze legaquen yesone'. Na' da' zaca'ch ca' da' ca' yesone', le yeya'a gan' zoa' Xan'. ¹³ Na' bite'teze da' nabele Xan' lagüe da' chejnilaže'le neda' naca' Xi'ine', gonan', cont gwlo'a nac Xan' beñe' zaca' juisyw. ¹⁴ Bite'tez da' nable gona' lagüe da' chejnilaže'le neda', neda' gonan'.

Jesúsen' gwne' sele' Spiritw che Diosen'

¹⁵ Še chaquele neda', gonle can' nona' mandaw. ¹⁶ Na' nabda' Xan' cont sele' Spiritw chen' soan len le'e toli tocañe na' gadlennen le'e. Na' Spiritw che Diosen' gwzejni'in le'e da' nac da' li. ¹⁷ Na' beñe' bi chesejnilaže' Diosen', Spiritw chen' bi gac soan len legaque', le bi chesele'eden' na' naca' chesejle'e

še zoan. San le'e nombia'len, le zoan len le'e na' gwžin ža yedesoan lo' yichjlažda'olen' nabian' le'e. ¹⁸ Bi yocua'ana' le'e ca bi' güezebe. Güidcza' yeto gan' zoale nga. ¹⁹ Yešlož bene' ca' bi chesejnilaže' Diosen' bich yesele'ede' neda', perw le'e gwle'eczele neda'. Na' da' zoa' toli' tocañe, da'nana' soale toli' tocañe. ²⁰ Na' cate' žin ža yedesoa Spiritw che Diosen' lo' yichjlažda'olen', cana'ch gacbe'ele neda' zoa' len Xan' na' le'e zoale len neda' na' neda' zoa' len le'e. ²¹ Bene' zjanezde' dan' nona' mandadw yesone' na' chesonen', bene' ca' chesacde' neda'. Na' bene' ca' chesacde' neda' lecze chaque Xan' legaque', na' neda' lecze soa' gacda' legaque' na' gona' cont yesombia'che' neda'.

²² Na' Judas (perw gague Judas Iscariote) gože'ne':

—Xanto', žbixchen' gono' cont neto' nezetu' zoaczo' len neto' na' bi gono' ca' len bene' bi chesejnilaže' Diosen'?

²³ Na' Jesúsen' gože'ne':

—Bene' chesacde' neda' chosozenague' xtižan', na' Xan' lecze gacde' legaque' na' neda' len xan' yedesoa' to' len legaque'. ²⁴ Bene' bi chesacde' neda' bi chosozenague' xtižan'. Na' diža' dan' chnian' bi cho'an to gualaza' san cho'a diža' da' ža Xan' ben' gwse'la' neda'.

²⁵ 'Da' quinga ba gwnia' le'e šlac ne' zoa' len le'e. ²⁶ Na' Xan' sele' Spiritw chen' soan lo' yichjlaždao' le'e chejnilaže'le neda' cont gac'lenen le'e. Na' Spiriton' gwzejni'in le'e yogo' da' cheya'la' nezele na' gonen cont šjajza'laže'le yogo' dan' ba gwnia' le'e.

²⁷ 'Na' hcua'ana' le'e na' chona' cont soa' cuezle binlo len xbab chelen'. Chac'laža' soa' cuezle binlo len xbab chelen' can' zoa' neda'. Nono' beñač gac gone' cont soa' cuezle binlo len xbab chelen' can' chac chona' neda'. Bi gacže'jaže'le, neca' žeble. ²⁸ Ba benele gwnia' yeya'a gan' zoa' Xan' na' yida' da' yoble gan' zoale nga. Na' ša chaquelenda' ca cheya'la', nach chebele dan' yeya'a gan' zoa' Xan', le Xan' zaca'che' ca neda'. ²⁹ Na' ba gwnia' le'e na'a bibi na' gac, cont soačhačhle šejnilaže'le neda' caten' gac ca'.

³⁰ 'Bich gua'a diža' zan len le'e, le ba za' Satanás dan' chnabia' da' xigüe' ca' na' dan' chnabia'te bene' ca' bi chesejnilaže'le neda', na' til'lenen neda', perw bi gonen neda' gan'. ³¹ Chona' con can' non Xan' mandadw cont neze beñačhen' chacda' Xan'. Le šo'o' na'a, ba gole šejcho.

15

Jesúsen' zaca'lebe' ca to yag da' chbia uvas

¹ 'Neda' zaca'leba' ca to yag da' chbia uvas. Na' Xan' zaca'lebe' ca bene' chonš'i' yaguen'. ² Na' le'e chejnilaže'le neda' zaca'leble ca xoze' yaguen'. Na' to to xoze' yaguen' da' bibi chbian, chchoguen'. Na' to to xozen' da' chbia uvasen' chpe'en cont chbiachen da' zanch. ³ Na' le'e ba nac'le ca to xozen' da' ba mpe'e, le bač chzenagle xtižan' dan' ba be'lena' le'e. ⁴ Le soačhač len neda' cont soačhača' len le'e. Can' nac xoze' yaguen' bibi chac cu'nan to gualazen še bi nca'an le'e yaguen', can' naquen len le'e, bi gacle can' chazlaže' Diosen' še bi soačhačhle len neda'.

⁵ 'Neda' zaca'leba' ca to yag da' chbia uvas na' le'e zaca'leble ca xozen'. Note'tezle še soačhačhle len neda' lecze soačhača' len le'e na' gacle can' chazlaže' Diosen', ca'aczen' nac che yag uvazen' dan' chbiachgua, le bibi gac gonle to gualazle. ⁶ Bene' bi zoačhače' len neda', gac che' can' chac len xoze' yag da' bibi chbia, le chesechoguen' na' chesebižen na' chžin ža chosotoben' chesadoen' yi' cont chesejen.

7 'Na' le'e še zoačhačhle len neda' na' zoačhačhle chzenagle xtižan', bite'tez da' chaclaže'le nabele Diosen', gonczen'. 8 Chacxen Xan' cate' zoale chonchguale dan' chazlažen', na' še chonle ca', yesacbe'e bene' da' li chejni-laže'le neda' na' chzenagle chia'. 9 Ca Xan' chacde' neda', lecz ca' neda' ba chacda' le'e. Le soa le gon can' žia' cont gacbe'ele chacda' le'e. 10 Še gonle can' nona' mandadw, nachen' gacbe'ele chacda' le'e, le neda' chona' dan' non Xan' mandadw na' chacbe'eda' chacde' neda'.

11 'Ba gwnia' le'e ca' cont soale mbalaz ca mbalazen' zoa' neda'. Chaclaža' soale mbalaz juisyw. 12 Na' da' nga nona' mandadw gonle, gaque lježle tole yetole can' chacda' neda' le'e. 13 Nono zoa bene' chaquech lježe' ca bene' chzanlaže' cuine' gate' neče bene' migw če'. Na' can' chona' neda'. 14 Na' le'e nacle migw chia' še chonle can' nona' mandadw. 15 Na' bich žia' nacle bene' güen žin chia', le to bene' güen žin bi nezde' yogo' da' chon xanen', san žia' nacle migw chia'. Le yogo' lo' da' ba benda' gwna Xan' ba bzejni' idan' le'e. 16 Gague le'e gwlejlē neda' naca' Xanle. Neda' gwleja' le'e cont chejni-laže'le neda'. Na' chsela' le'e cont šjenle can' chazlaže' Xan', na' gague da' te če da' ca' gonlen'. Na' yogo' lo' da' nabele Xan' gone' lagüe da' chejni-laže'le neda', gonczen'. 17 Da' nga da' chona' mandadw gonle, gaque lježle tole yetole.

Bene' bi chesejni-laže' Diosen' chesegue'ede' bene' chosozenag če Jesúsen'

18 'Še bene' bi chesejni-laže' Diosen' chesegue'ede' le'e, le gon xbab ba chesegue'eczede' neda' cate' za' yesegue'ede' le'e. 19 Ša nacle txen len bene' ca' bi chesejni-laže' Diosen', nachen' yesacde' le'e can' chesaque' bene' lježen' šaca'. Perw ba gwleja' le'e cont chzenagle chia'. Da'n'an' chesegue'ede' le'e da' bi nacle legaue' txen. 20 Le šjasa'laže' dan' gwnia' le'e: "Note'teze mos bi naque' blaoch ca xanen'." Bosochi bososaca' bene' neda', na' lecz ca' yesonde' le'e. Na' balze bene' bosozenague' xtižan', lecze balze' yosozenague' xtiža' len'. 21 Na' da' bi zjanombi'e Diosen' ben' gwseja' neda', da'n'an' yesonde' le'e yogo' da' ca', le chesegue'ede' le'e da' chzenagle chia'.

22 'Ša neda' bi bedezejni'ida' legaue', bi zjanape' do'la' da' chesegue'ede' neda' šaca'. Perw na'a bibi de da' yosode'ede' yesene' bi zjanape' do'la'. 23 Bene' chgue'ede' neda' lente Xan' chgue'ede'. 24 Ba bena' yela' guac da' nono nochle na' gon, na' šaca' bi besele'eden' bi zjanape' do'la' da' chesegue'ede' neda'. Perw ba besele'ede' da' ca' na' bia'cze chesegue'ede' neda' len Xan'. 25 Na' chac can' nyoj Xtiža' Diosen' dan' chososedē gan' žan: "Besegue'ede' neda' la'czla' bibi da' mal bena'."

26 'Ba gwnia' le'e se'la' Spiritw če Xa' Diosen' gaclenen le'e. Spiriton' san' gan' zoa Xan' na' gwzejni'in le'e diža' li chia' neda'. 27 Na' lecz ca' le'e cheya'la' güe'le xtižan', le ba gwzozale len neda' šlac ba gwduxjue'eda' xtiža' Xa' Diosen'.

16

1 'Ba gwnia' le'e yogo' da' ca' cont bi gacžejlaže'le. 2 Le yesyebeje' le'e lo' yodao' čhegaue' ca', na' gwžin ža cate' note'tez bene' yesote' le'e yesacde' chebe Diosen' dan' chesonen'. 3 Yesonde' le'e yogo' da' ca' le bi zjanombi'e Xan' neca neda'. 4 Žia le'e da' quinga cont cate' žin ža gac can' gwnian' nach šjaze'ele.

Da' chon Spiritw če Diosen'

'Bi gwnia' le'e yogo' da' ca' gac čhele cate' za' gwzozalo bzejni'ida' le'e xtiža' Diosen', le ne' zoacza' chaclena' le'e. 5 San na'a yeya'a gan' zoa Xan' ben'

gwseła' neda', na' ne tole bi chñabele neda' gan' yeya'a. ⁶ Na' ba chacyaše'le dan' ba gwnia' yeya'a. ⁷ Perw da' li napen le'e cuent yeya'a, le še bi yeya'a, Spiritw che Xa' Diosen' dan' gaclenen le'e bi yedesoa lo' yichjlažda'olen'. Na' yeya'a nach selan' len le'e. ⁸ Na' cate' yid Spiriton' gwzejni'in beñachen' zjanape' doła', na' gwzejni'in non' nac bene' güen len Diosen', na' gwzejni'in gata' castigw toli tocanē che bene' bi chosozenague' chia'. ⁹ Spiriton' gwzejni'in legaque' zjanape' doła' da' bi chesejnilaže' neda'. ¹⁰ Na' gwzejni'in legaque' non' nac bene' güen len Diosen', le yeya'a gan' zoa Xa' Diosen' na' le'e bich le'ele neda'. ¹¹ Na' gwzejni'in legaque' gata' castigw che xtoła'gaquen' toli tocanē, le Satanás dan' chnabia' da' xigüe' ca' na' dan' chnabia'te bene' ca' bi chesejnilaže' Diosen' ba nchoglaon chen gwnežjw Diosen' castigw chen toli tocanē.

¹² Ne' dech da' zan da' nia' le'e, perw naquen zdebe šejni'ilen na'a. ¹³ San cate' yedesoa Spiritw che Diosen' lo' lažda'olen' cont gwzejni'in le'e da' nac da' li, len gwsed gwlo'en le'e yogo' da' cheyala' nezele chia', le Spiriton' chnen diža' li. Bi güe'en diža' to gualazen, san güe'en bite'tez diža' da' chzene Xan' len, na' chixjue'en le'e bica' da' za' za'ac. ¹⁴ Spiriton' gonen cont gwlo'elaon naca' bene' zaca' juisyiw, le gwzejni'in le'e xtiža'. ¹⁵ Xan' ba bene' cont nezda' yogu' da' neze le', na' da'nān' gwnia' Spiriton' chixjue'en le'e xtižan'.

Jesúsen' gwne' šlože yesacyaše'de' na' techle yesyebede'

¹⁶ Šlož bi le'ele neda', na' te yešlož na' yezle'ele neda' da' yoble, le yeya'a gan' zoa Xan'.

¹⁷ Na' bałe bene' ca' zjanaque' Jesúsen' txen gose' lježe':

—¿Bi zejen dan' che'e chio' te yešlož na' bich le'echone' na' techle leczze yešlož na' yezle'echone' da' yoble? Na' ¿bi zejen dan' že' yeyeje' gan' zoa Xen'? ¹⁸ ¿Bi zejen dan' že' yešlož? Bi chejni'icho bin' že'.

¹⁹ Jesúsen' gocbe'ede' chesaclaže' yesenabde'ne' bi zejen, na' gože' legaque':

—¿Ba chñabe lježe bi zejen dan' gwnia': "Yešlož na' bich le'ele neda' na' techle leczze yešlož na' yezle'ele neda' da' yoble"? ²⁰ Da' li chnia' le'e ba zoa cuežle na' yegüine'le šlac bene' ca' bi chesejnilaže' Diosen' yesyebede'. Yeyaše'laže'le, perw šložzen' na' techle yebele. ²¹ Cate' chzan no'olen' chžaglagüe' šlac chaque' bes che yela' sanña'. Na' cate' ba golje bda'ona' bich chone' xbab che dan' bžaglagüen', le chbede' ba golje yeto beñach yežlio nga. ²² Lecze ca' le'e ba chacyaše'le na'a, perw cate' yežagcho da' yoble soachle mbalaz na' nono gac yeca'a yela' chebe chelen' lo' yichjlažda'olen'.

²³ Na' cate' ba bžin ža šjayzoa' da' yoble gan' zoa Xan', cana'ch bich yažjele bi nable gwzejni'ida' le'e. Da' li chnia' le'e, da' chejnilaže'le neda' bite'tez da' nabele Xan', gončen' le'e. ²⁴ Ža na'aža bibi na' nabele Xan' ye'Ine' chñablen da' chejnilaže'le neda'. Na' na'a le nabe Xan' bi da' nabelene' ye'Ine' ca', na' gone' can' nabelenen' cont soale mbalaz juisyiw.

Criston' ba bene' cont yenit yela' chnabia' che gwxyien'

²⁵ Da' zan ba gwnia' le'e len jempl. Gwžin ža cate' bich gwzejni'ida' le'e len jempl, san gua'a diža' da' šejni'ile cate' gwzejni'ida' le'e che Xan'. ²⁶ Na' cate' ba bžin žana', cana'ch nabele Xan' bi da' nabelene' ye'Ine' chñablen da' chejnilaže'le neda'. Na' bi yažjen nabda' Xan' gaclene' le'e. ²⁷ Le cuinčen Xan' chacde' le'e dan' chaquele neda' na' chejle'le gwsele' neda'. ²⁸ Gan' zoa Xa' Diosen' gwza'a na' ba bida' yežlio nga. Na' na'a yeza' yežlio nga na' yeya'a gan' zoa Xan'.

²⁹ Nach gose'ene':

—Baçh cho'o diža' da' chejni'to' na' bi cho'o jemplw. ³⁰ Ba chache'eto' nombi'o yogo' xbab çe beñaçhen'. Ba nezedo' bi chesaclaže' bene' yesenezde' cate' biña' yesenaben'. Da'nan' baçh çejele'to' zao' gan' zoa Diosen'.

³¹ Na' gož Jesúsen' legaue':

—¿Ba çejele'le ña'a? ³² Ba bžin ža na' ña'a ba gole' gaslasle. To tole ca'a xnez çe chele na' gwcua'anle toza'. Perw bi zoa' toza', le zoa Xan' len neda'. ³³ Ba gwnia' le'e ca' cont soa cuezle binlo len xbab çeche, le çejeñilaže'lenda'. Yežlio nga saca'zi'le, perw bi gacžejaže'le, neda' ba bena' cont yenit yeļa' chnabia' çe gwxiyen' dan' zoa ña'a chnabian' yežlio nga.

17

Jesúsen' gwñabde' Diosen' gaclene' bene' ca' zjanaque' le' txen

¹ Beyož gwna Jesúsen' da' ca' nach gwne'e yabale na' gwne':

—Xa', ba bžin hor gac chia' dan' ba bžio' bia' gac. Ben cont nacia' nedan' Xi'ino' naca' bene' zaca' juiyw cont neda' gona' ga gacbia' le' naco' bene' zaca' juiyw. ² Ba beño' neda' yeļa' chnabia' lao yogo' beñaçh cont chnežjua' yeļa' mban toli tocane çe yogo' bene' ca' ba gwlejo' chesejnilaže' neda'. ³ Na' bene' ca' zjanape' yeļa' mban toli tocane zjanombi'e le', le tozon' zaco' gonxento', na' lecz zjanombi'e neda' Jesucristw bene' gwseło'.

⁴ Lo yežlion' ba bena' cont nacia' naco' bene' zaca' juiyw, le ba beyož bena' yogo'lol da' gwlo'o lo na' gona'. ⁵ Na' ña'a Xa', ben cont la'laon naca' bene' zaca' juiyw cate' yela'a gan' zon', doxen can' blo'elaon cate' gwzoa' len le' cate' za xete yežlion'.

⁶ Ba gwlejo' bał beñaçh chesejnilaže' neda', na' baçh blo'eda' legaue' can' naco' na' can' chonon'. Zjanaque' xi'ino' na' beno' cont chesejnilaže' neda' na' chesone' can' žon'. ⁷ Na' ba zjañezde' yogołol da' chona' na' yogo' diža' da' choa' zjanaquen chio' le'. ⁸ Le ba be'lena' legaue' diža' dan' ba bzejni'ido' neda' na' ba bosozenague' çhen, na' ba chesache'ede' da' li gwza'a gan' zon', na' chesejele'e le len' gwseło' neda'.

⁹ Chnaba' gacleno' legaue'. Bi chnaba' gacleno' yogo' beñaçh, san gacleno' bene' ca' gwlejo' chesejnilaže'nda' le ba zjanaque' lo nao'. ¹⁰ Na' yogo' bene' chesejnilaže' neda' lecz chesejnilaže' le'. Na' ca'cze naquen, note'tez bene' zjanaque' xi'ino' lecz zjanaque' xi'ina', na' bene' ca' chesejnilaže'nda' chosolo'e naca' bene' zaca' juiyw.

¹¹ Na' ña'a bich soa' yežlio nga, perw bene' quinga chesejnilaže' neda' nita'cze' yežlio nga, na' neda' ba zeza' gan' zo'na'. Xa', naco' la'zelagüe bene' laždao' xilaže', na' chnaba' gwçhino' yeļa' chnabia' chio' cont gwcuas gwcuizo' da' malen' len legaue' cont nita'cze' yesaque' toze len lježgaue', ca chio' naccho toze. ¹² Šlac ba gwzoa len legaue', neda' ba bçhina' yeļa' chnabia' çhion' cont bcuas bcuiža' da' malen' len legaue'. Da'nan' ñe toe' bi gwžiai', con toz ben' ba naquen cuiaye'e cont gac doxen can' ža Xtizo' dan' nyojen.

¹³ Na' ña'a ba zeza' gan' zon', na' šlac ñe' zoa' yežlio nga cho'a diža' quinga cont bene' qui nita'chgüe' mbalaz ca mbalazen' zoa' neda'. ¹⁴ Neda' ba be'lena' legaue' xtižon', na' bene' ca' bi chesejnilaže' le' chesege'ede' legaue' dan' bi chesone' txen len legaue', ca' neda' bi naca' txen len bene' ca' bi chesejnilaže' le'. ¹⁵ Na' ca nac bene' ca' chesejnilaže' neda', bi chnaba' yeca'o legaue' lo' yežlio nga, san chnaba' gacleno'ne' cont Satanás dan' chnabia' da' xigüe' ca' bi siye'en legaue'. ¹⁶ Legaue' bi zjanaque' txen len bene' bi chesejnilaže' le', ca neda' bi naca' txen len bene' bi chesejnilaže' le'. ¹⁷ Ben cont bene'

ca' chesejnilaže' neda' yesaclaže' yesone' con da' žo', le ba zjanombi'e diža' li chio'. Yogo' da' ba bzejni'ido' legaque' naquen da' li. ¹⁸ Len' gwseło' neda' yežlion' cont ba bia' xtižon', na' lecze ca' chsela' legaque' yeso'e xtižan'. ¹⁹ Chzanlaže' cuina' chona' con da' žo' le' cont yesaclaže' yesone' con can' žo' da' zjanombi'e diža' li chion'.

²⁰ Na' bi chnaba' gacleno' legacze', san lecze gacleno' bene' ca' yesejnilaže' neda' cate' yesende' diža' dan' yesoe' bene' quinga. ²¹ Xa', ben cont yogo'lole' yesaque' toze len lježgaque' na' yesaque' txen len chio', ca le' naco' toze len neda' na' neda' naca' toze len le'. Ben cont yeyož yesaque' toze len chio' na' len lježgaque' cont bene' ca' bi chesejnilaže' le' yesacbe'ede' len' gwseło' neda'. ²² Na' yela' bala'an' dan' nono' neda' ba bnežjuan' legaque' cont zjanaque' toze len bene' lježe' ca' chio' naccho toze. ²³ Legaque' zjanaque' txen len neda' na' neda' naca' txen len le' cont yogo'cho gaccho toze. Gaccho toze cont bene' ca' bi chesejnilaže' le' yesacbe'ede' len' gwseło' neda' na' yesacbe'ede' chacdo' bene' ca' can' chacdo' neda'.

²⁴ Xa', chacdo' neda' cate' biņa' xe yežlio nga na' nono' neda' bene' zaca' juisyw. Na' chaclaža' bene' quinga gwlejo' chesejnilaže' neda' yedyesenite' len neda' gan' yedyesoan' cont yesele'ede' naca' bene' zaca' juisyw. ²⁵ Xa', naco' la'zelagüe bene' chon da' zej to licha. Na' ca' nac bene' ca' bi chesejnilaže'nda', lecze bi zjanombi'e le', perw neda' nombi'a le', na' bene' ca' ba gwlejo' cont chesejnilaže' neda' zjanezde' len' gwseło' neda'. ²⁶ Na' ba bzejni'ida' legaque' can' nacon' na' can' chonon', na' za' gwzejni'ichda' legaque', cont yesacbe'ede' chacdo' legaque' can' chacdo' neda', na' cont neda' soacza' len legaque'.

18

Judasen' bdie' Jesúsen' lo' na' soldadw ca' (Mt. 26:47-56; Mr. 14:43-50; Lc. 22:47-53)

¹ Beyož gwna Jesúsen' da' ca', gwzale'ne' bene' ca' zjanaque' le' txen ja'aque' šla'a Yegw Cedrón gan' gota' to le'ej ga goseze zan yag olivos. Na' goso'e lo' le'ejen'. ² Na' Judasen' ben' ba naquen gone' Jesúsen' lo' na' bene' ca' cheseque'ede' le' lecze nombi'e latjen', le zan ni'a Jesúsen' len bene' ca' zjanaque' le' txen ba besedobe' na'. ³ Ca' goquen' bžin Judasen' na' nche'e xonj soldadw na' yexonj bene' chesape' yodao' blaon' bene' gosesełe' bxož gwnabia' ca' na' bene' fariseo ca' cont yesezene' Jesúsen'. Zjanxobe' no lintern na' zjanoxe' no yi' yech na' zjanałe' spada. ⁴ Jesúsen' ba nežde' yogo'lol da' za' gac che', na' bchoje' jašague' legaque' na' gwne':

—¿Non' cheyljwle?

⁵ Na' gose'ene':

—Cheyljwto' Jesús bene' Nazaret.

Na' gož Jesúsen' legaque':

—Nedan'.

Na' Judasen' ben' ba naquen gone' Jesúsen' lo' na'gaquen' zelene' legaque'.

⁶ Cate' Jesúsen' gože' legaque': "Nedan", la' besyebiga'te' cosxanle na' jasechaze' lo' yon'. ⁷ Na' da' yoble Jesúsen' gože' legaque':

—¿Non' cheyljwle?

Na' legaque' gose'ene':

—Cheyljwto' Jesús bene' Nazaret.

⁸ Na' Jesúsen' gwne':

—Ba gwnia' nedan'. Na' še nedan' cheyiljwle, le güe' latje šjaya'ac bene' quinga.

⁹ Gwne' ca' cont goc can' ba gwdixjue'ede' caten' gwne': "Ne to bene' ca' ba gwlej Diosen' chesejnilaže' neda' bi yesebiaye'e." ¹⁰ Na' Simón Pedron' no'e to spada na' goljen' gwдынen' mos che b̄xoz blaon' gwchogtechgüe' nague' līcha. Na' mosen' le' Malco. ¹¹ Na' Jesúsēn' gože' Pedron'.

—Bego'o spada chion' lo' ližen'. ¿Chacdo' bi cheyała' gac da' ba nžia bia' Xa' Diosen' gac chia'?

Goseche'e Jesúsēn' lao ben' le' Anás

(Mt. 26:57-58; Mr. 14:53-54; Lc. 22:54)

¹² Nach soldadw ca' len xangaque' na' len bene' chesape' yodao' blao che nación Israel cheton' gosezene' Jesúsēn' na' bosocheje'ne'. ¹³ Na' goseche'ene' da' nechw lao Anás ben' naque' xta'obi'in che Caifás. Na' Caifásēn' goque' b̄xoz blao che nación Israel cheton' lo' izen'. ¹⁴ Na' Caifásna' ben' gože' bene' gwnabia' cheton' nāpen legaque' cuent toz ben' gat clel ca cuiayi' yogüe'.

Pedron' bi gwchebe' naque' Jesúsēn' txen

(Mt. 26:69-70; Mr. 14:66-68; Lc. 22:55-57)

¹⁵ Simón Pedron' len yeto bene' naque' Jesúsēn' txen gosa'ogüe'ne'. Na' nombia' ben' nac b̄xoz blao ben' yeto. Da'nan' goc gwyo'e len Jesúsēn' chyo'o che b̄xoz blaon'. ¹⁶ Na' Pedron' bega'ane' do cho'a puerten'. Nach ben' yeto, da' nombia' b̄xoz blaon' le', gwyeye' na' be'lene' diža' bi' no'olen' chap cho'a puerten' cont gwlo'obe' Pedron'. ¹⁷ Nach bi' no'olen' chape cho'a puerten' gožbe' Pedron':

—¿Gague leno' le' chzenago' dan' chsed chlo'e bengā?

Na' Pedron' gwne':

—Bi lena' neda'.

¹⁸ Bene' güen' žin ca' na' bene' ca' chesape' yodao' blaon' ba gosebeque' to yi' ya'alj, le chac zag, na' zjazeche' cho'a yin' cont chesyeže'ede'. Na' Pedron' ze' len legaque' cho'a yin' cheže'ede'.

Gosenabde' Jesúsēn' che dan' chsed chlo'eden'

(Mt. 26:59-66; Mr. 14:55-64; Lc. 22:66-71)

¹⁹ Na' ben' nac b̄xoz blaon' gwñabde' Jesúsēn' che bene' ca' chosozēnag che dan' chsed chlo'eden' na' che da' ca' chzejni'iden'. ²⁰ Na' Jesúsēn' gože'ne':

—Ba bi'a diža' doxen latje lagüe. Zan ni'a bsd blo'eda' lo' yodao' checho ca' na' chyo'o yodao' blaon' gan' chesežag yogo' bene' gualaž chechon'. Bibi diža' gwnia' bāgaše'ze. ²¹ ¿Bixchen' chñabdo' neda'? Gwñabe bene' ca' gosende' dan' bsd blo'edan'. Legaque' zjānežde' bi dižan' bia'.

²² Beyož gwna Jesúsēn' ca', to ben' chape yodao' blaon' zie' na', na' gwdape' xāguen', gože'ne':

—¿Ca' choži'o xtīža' ben' nac b̄xoz blaon'?

²³ Jesúsēn' gwne':

—Še bi da' mal ba gwnia', be' diža' che bi da' malen' ba gwnia', na' še gwnia' güen, ¿bixchen' chgapo' neda'?

²⁴ Nach Anásēn' bdie' Jesúsēn' ncheje' lao Caifásēn' ben' nac b̄xoz blaon'.

Da' yoble Pedron' bi gwchebe' še naque' txen len Jesúsēn'

(Mt. 26:71-75; Mr. 14:69-72; Lc. 22:58-62)

²⁵ Na' Pedron' zie' cho'a yin' cont cheže'ede' na' bene' ca' nita'na' gose'ene':

—¿Gague lenczo' len' chzenago' dan' chsed chlo'e bengā?

Na' bi gwchebe', gwne':

—Bi lena' neda'.

²⁶ To xmos b̄x̄o blaon' naque' biše' l̄jež ben' gw̄chog Pedron' naguen', na' l̄e' gože' Pedron':

—¿Gague ble'eda' le' len Jesúsen' l̄o' le'ej gan' ze yag olivos?

²⁷ Na' Pedron' da' yoble bi gw̄chebe', na' l̄a' gw̄chežte to jea.

Goseče'e Jesúsen' lao Pilaton'

(Mr. 27:1-2, 11-14; Mr. 15:1-5; Lc. 23:1-5)

²⁸ Na' do cheni'las bene' gwnabia' ca' gosebeje' Jesúsen' gan' zoa Caifásen' na' goseče'ene' gan' zoa gobernador Pilato ben' chon yela' justis. Na' legaque' bi goso'e len Jesúsen' yo'o gan' zoa Pilaton', l̄e can' nac costumbr cheton' bi chac yesagüe' xše' l̄ni pascon' še yeso'e gan' že' bene' bi zjanac bene' Israel.

²⁹ Da'nan' Pilaton' bchoje' na' gože' legaque':

—¿Bi ben benga? ¿Bi xya chagwle che'?

³⁰ Na' bene' gwnabia' ca' gosene':

—Šaca' benga bi naque' bene' güen da' xin̄j bi bdeto'ne' l̄o naon'.

³¹ Na' gož Pilaton' legaque':

—Le yeče'e, na' l̄e gon yela' justis che' can' ža ley chelen'.

Nach bene' gwnabia' che nación Israel cheton' gose'ene':

—Bi de l̄sens gotto' bene'.

³² Da' gosone' ca' goc can' gwna Jesúsen' caten' bzejni'ide' nac yesone' yesote'ne'. ³³ Nach Pilaton' beyo'e yo'ona' na' goxe' Jesúsen' na' gože'ne':

—¿Naco' le' Rey che bene' Israel ca'?

³⁴ Jesúsen' gože'ne':

—¿Con da' goljlažon' ch̄nabo', še bene' yoble gose'e le' ca'?

³⁵ Pilaton' gože'ne':

—¿Chacdo' naca' neda' bene' Israel? Bene' Israel gualaž chio' na' b̄x̄o gwnabia' chele ca' bosodie' le' l̄o na' nga. ¿Bi da' xin̄j benon'?

³⁶ Jesúsen' gože'ne':

—Yela' chnabia' chia' nža'le naquen len yela' chnabia' che bene' chesenabi'e yežlio nga. Šaca' yela' chnabia' chia' naquen che yežlio nga na' šaca' nabi'a nación ca' že' yežlio nga, bene' ca' chosozenag chian' gosedi'le' cont bi goca' l̄o na' bene' gwnabia' che nación Israel cheton' šaca'. Perw yela' chnabia' chian' bi naquen che yežlio nga.

³⁷ Nach Pilaton' gože'ne':

—¿Na' len' naco' rey še ca'?

Na' gwna Jesúsen':

—Da' l̄i can' žon', naca' rey na' ba bida' yežlio nga cont gwzejni'ida' benachen' diža' l̄i na' yogo' bene' chesone' txen len diža' l̄i chosozenague' chia'.

³⁸ Nach gož Pilaton' le':

—¿Bi dan' diža' l̄i?

Gosechoglagüen' yesote' Jesúsen'

(Mt. 27:15-31; Mr. 15:6-20; Lc. 23:13-25)

Beyož gwna Pilaton' ca' na' bezchoje' yeto ši'i gan' že' bene' gwnabia' che nación Israel cheton' na' gože' legaque':

—Bibi n̄la'lagüe še bi da' xin̄j non benga. ³⁹ Perw na' de costumbr chele gwsana' to bene' de ližya l̄o l̄ni pascon'. ¿Chaclaže'le gwsana' benga naque' Rey che le'e bene' Israel?

⁴⁰ Nach bososye'e gosene':

—Bi gwsano' bena'. Barrabás na' gwsano'.

Na' Barrabásen' naque' to bene' gwban.

19

¹ Nach Pilaton' bene' mandadw goseyine' Jesúsén'. ² Na' soldadw ca' gosone' to corona de xis yeše' na' bosozoen' yichj Jesúsén' na' bosoguacue'ne' to lache' moradw ca' da' chosočhin no rey. ³ Nach gosonle' che', gosene':

—¡Viva Rey che bene' Israel!

Na' gosegapa'chgüe' xague'.

⁴ Nach Pilaton' bchoje' da' yoble na' gože' bene' gualaž četo' ca' že' na':

—Cueja'ne' da' yoble cont nezele bibi da' xinj chželda' še bi da' none'.

⁵ Na' bechoj Jesúsén' chyo'ona', na' zoa corona de xis yešen' yichje' na' ne' nyaze' lache' moradon'. Na' Pilaton' gože' le'gaque':

—Le na', nga ze ben'.

⁶ Na' bħoz gwnabia' ca' na' bene' chesape' yodao' blaon' cate' besele'ede' Jesúsén' na' bososye'e zan ni'a gosene':

—¡Bde'e le'e yag cruz! ¡Bde'e le'e yag cruz!

Nach Pilaton' gože' le'gaque':

—Le'e le' che'e na' le' gwde'e le'e yag cruzen', le' neda' bibi da' xinj cheželda' še bin' none'.

⁷ Na' bene' gwnabia' ca' che' nación Israel četon' gose'e le':

—De to ley četo' da' žan cheyała' gate' da' že' naque' Xi'in Dios, le' con to benachzen' naque'.

⁸ Ba chžeb Pilaton' can' ba chaquen', na' cate' bende' xtiža'gaquen' bžebche'.

⁹ Na' beyo'e yo'o gan' zoe' da' yoble, nche'e Jesúsén', na' gože' Jesúsén':

—¿Ga bene' le'?

Na' Jesúsén' bi boži'e xtižen'.

¹⁰ Nach Pilaton' gože'ne':

—¿Bi choži'o xtižan'? ¿Bi nezdo' napa' yela' chnabia' cont gwsana' le' na' napa' yela' chnabia' cont čhogbi'an yosode'e le' le'e yag cruz?

¹¹ Jesúsén' gože'ne':

—Bibi yela' gwnabia' napo' šaca' Diosen' bi nonen' le'. Da'nan' bene' bdie' neda' lo' naon' napche' dola' ca' le'.

¹² Nach Pilaton' beyiljwlaže' nacle gone' gwsane' Jesúsén'. Perw bene' gwnabia' che' nación četon' bososye'e gosene':

—Še gwsano' benga, contr rey che' nación Roman' chono' še ca', le' note'tez bene' že' naque' rey chone' contr rey César.

¹³ Nach Pilaton', beyož bende' xtiža'gaquen', gwleje' Jesúsén' chyo'ona' na' lecze bchoj le' na' gwch'i'e gan' chone' yela' justisen', to latje da' nzi' Gan' Nagw Jey, na' diža' hebreo nzin' Gabata. ¹⁴ Do guagwbiz ža cate' za' solao In'i pascon' Pilaton' gože' bene' gwnabia' četo' ca':

—Le na', nga zoa rey čelen'.

¹⁵ Nach da' yoble gosezolagüe' bososye'e gosene':

—¡Cheyała' gate'! ¡Bde'e le'e yag cruz!

Nach Pilaton' gože' le'gaque':

—¿Rey čele' nga gona' mandadw yosode'e le'e yag cruz?

Nach bħoz gwnabia' ca' gose'ene':

—Gague rey četo' benga. Toze César naque' rey četo'.

¹⁶ Nach Pilaton' bdie' Jesúsén' lo' na'gaque' cont te'e le'e yag cruzen'. Nach gosa'aque' Jerusaléna' goseče'e Jesúsén' cho'a ciudad'.

*Bosode'e Jesúsen' le'e yag cruz**(Mt. 27:32-44; Mr. 15:21-32; Lc. 23:26-43)*

¹⁷ Na' Jesúsen' zeje' no'e yag cruz chen' na' besežine' to latje nzi' Latje che Žit Yičhj Bene' Guat, na' diža' hebreo nzin' Gólgota. ¹⁸ Na' soldadw che gubernadoren' bosode'ene' le'e yag cruzen', na' lecze bosode'e yechope bene' le'e yechope yag cruz cuiten' na' Jesúsen' gwyo'e gachol bene' ca' chope'. ¹⁹ Na' gubernador Pilaton' bene' mandadw byoj diža' da' gwda' yičhj yag cruz che Jesúsen'. Na' bosozojen' žan: "Jesús bene' Nazaret, Rey che bene' Israel". ²⁰ Bosozojen' diža' hebreo, diža' griego na' diža' latín. Na' zan bene' Israel gualaž cheto' bosolaben', le gan' gwda' Jesúsen' le'e yag cruzen' naquen gala'ze ciuda Jerusalénna'. ²¹ Nach bžox gwnabia' ca' na' yezica'chle bene' gwnabia' che nación Israel cheton' gose'e Pilaton':

—Bi gwzojo' "Rey che bene' Israel", san bzoj: "Le' gwne' naque' rey che bene' Israel."

²² Na' Pilaton' gwne':

—Da' bena' mandadw bosozoje', ba nyojenna'.

²³ Nach soldadw ca', beyož bosode'e Jesúsen' le'e yag cruzen', goseque'e xalana' Jesúsen' na' besyele'en gosebejen' tap cuenle na' tgüejen gosezi' to toe'. Na' lecze goseque'e yeto xe' da' naquen to güelize, na' bibi dia chen de. ²⁴ Na' gose' lježe':

—Bi gwzoxjchon san gonchon rifa cont nezecho no yechelen.

Na' dan' gosone' ca' goc can' nyoj Xtiža' Diosen', žan: "Besyele'e xalanan' legacze', na' gosone' rifa lache' dan' chazan'."

²⁵ Na' do gala'ze yag cruz che Jesúsen' zecha Marían' ben' nac xna' Jesúsen' na' bene' bile xne'ena', na' María bene' naque' no'ol che Cleofas na' María bene' naque' bene' Magdala. ²⁶ Na' cate' Jesúsen' ble'ede' zecha xne'en gala'ze len to bene' naque' le' txen, bene' chaquechgüe Jesúsen' le', nach gože'ne':

—Bena' gague' ca xi'ino'.

²⁷ Nach gože' bena':

—Bži'ilaže' xna' nga ca xnao'.

Na' žana' gwque'ene' bene'ne' ca bene' lo' yo'o.

*Can' goc caten' got Jesúsen'**(Mt. 27:45-66; Mr. 15:33-41; Lc. 23:44-49)*

²⁸ Gwde na' Jesúsen' ba nežde' bačh goc yogo' da' cheyała' gac. Nach cont goc can' ža yelate' Xtiža' Diosen' da' nyojen gwne':

—Chbilda' nis.

²⁹ Na' de late' vino zičhj da' yože' to lo' xguag dao'. Na' to bene' bžaže'de' vino zičhjen' to esponja bzoen' to lo' xis da' že' hisopo na' gwłisen' blapen' cho'a Jesúsen'. ³⁰ Na' beyož gwzop Jesúsen' vinon' na' gwne':

—Bačh goc yogo'lol' da' cheyała' gac.

Nach bcheque' yičhjen' gote'.

To soldadw godoe' lanza cuit le'e Jesúsen'

³¹ Na' yeteyo gaquen ža che Dios na' ža lni xen, da'nan' bene' gwnabia' che nación cheton' jasenabde' Pilaton' gone' mandadw yeseyišjw soldadw che' ca' ni'a bene' ca' zjada' le'e yag cruzen' cont yob yesate' na' yesyeque'e legaque' le'e yag cruz ca', le bi gosacłaže' yeseda'ch bene' ca' le'e yag cruzen' ža che Dios.

³² Nach soldadw ca' ja'aque' jasedišjue' chope la'a ni'a ben' gwda' šla'a cuit Jesúsen'. Na' lecze ca' gosone' len ben' gwda' le'e yag cruzen' cuiten' yešla'a.

³³ Na' cate' besežine' gan' da' Jesúsen', besele'ede' ba gote' na' bich goseyišjue' ni'e ca'.

³⁴ Perw to soldadon' godoe' lanza cuit le'e Jesúsen', na' la' bchojten chen len nis. ³⁵ Neda' ble'eda' can' goquen' na' nežda' cho'a diža' li. Na' cho'a diža' li can' goquen' cont lencze le'e šejle'le. ³⁶ Na' goc da' ca' len Jesúsen' cont goc can' ža Xtiža' Diosen' da' nyoj che', žan: "Ne to žit yo'e bi yeseyišjue'!" ³⁷ Na' yeto da' žan: "Yesene'e ben' ba bosozie' güe'."

Bosocuaše' Jesúsen'

(Mt. 27:57-61; Mr. 15:42-47; Lc. 23:50-56)

³⁸ Beyož goc yogo' da' ca', José bene' nac bene' ciuda Arimatea janabde' Pilaton' gwnežjue' lsens yeque'e cuerp che Jesúsen'. Na' Pilaton' be'e lsens. Nach Josén' gwyeje' na' beque'e cuerp che Jesúsen'. Josén' ba chejnilaže' Jesúsen' perw chejnilaže'ne' bagaše'ze da' chžebe' bene' gwnabia' čheto' ca'. ³⁹ Na' len Josén' lecze gwyej Nicodemo ben' ba gwyej gan' zoa Jesúsen' šeže'le. Na' Nicodemon' no'e to da' chla' zix da' none' len yal dan' že' mirra, na' len to bište dan' že' aloes, ca do šona roben'. ⁴⁰ Nach bosyočhele' cuerp che Jesúsen' to lache' xen na' len dan' chla' zixen', ca' chon neto' bene' Israel cate' hcuaše'to' bene' guat. ⁴¹ Na' gała'ze latje gan' bosode'e Jesúsen' le'e yag cruzen' gota' to le'ej ga goseze yag. Na' na' za' gosče'ene' to bloj cont yosočhin' ca to ba, na' nono bene' guat na' šo' lo'enna'. ⁴² Ža caten' got Jesúsen' naquen ža caten' chososi'ne' che ža che Diosen'. Na' da' chesacbyende' yosocuaše'ne', da'nan' jase'lo'e Jesúsen' lo' bloj coba', le naquen gała'ze.

20

Jesúsen' bebane' ladjo bene' guaten'

(Mt. 28:1-10; Mr. 16:1-8; Lc. 24:1-12)

¹ Na' bal dmigw María bene' Magdalan' gwyeje' cho'a blojen' gan' bosocuaše' Jesúsen' na' ble'ede' ba bga'a yejen' dan' bosode'e cho'a blojen'. ² Nach beza'sese' beyeje' gan' zoa Simón Pedron' len yeto bene' naque' Jesúsen' txen, na' gože' legaque':

—Ba besyebeje' Xanchon' lo' blojen' na' bi nežeto' ga besyeyo'ene'.

³ Nach Pedron' na' ben' yeto gosa'aque' ja'aque' cho'a blojen'. ⁴ Choptie' goseza'sese' perw ben' yeto gwza'sesche' ca Simón Pedron' na' byobech bžine' cho'enna' ca le'. ⁵ Na' bcheque' gwne'e lo'enna' na' ble'ede' lache' ca' zjachin' lo yo perw bi gwyo'e. ⁶ La' bla'te Simón Pedron' na' le' gwyo'e lo' blojen' na' lecze ble'ede' lache' ca' gan' zjachin'na'. ⁷ Na' bay dan' bosoguazje' yichjen' bi chin' gan' chi' lache' ca', san ndoben chin' šla'ale. ⁸ Nach lencze ben' yeto gwyo'e, le bina' šo'e la'czla' byobech bžine' cho'enna', na' ble'ede' can' naquen na' gwyejle'e. ⁹ Le biņa' yesejni'ide' Xtiža' Diosen' da' nyojen žan cheyala' yebane' ladjo bene' guaten'. ¹⁰ Na' besyeya'aque' jaya'aque' yo'o gan' nite'na'.

María bene' Magdalan' ble'ede' mbancze Jesúsen'

(Mr. 16:9-11)

¹¹ Na' Marian' bega'ane' na' gwzeche' gała'ze cho'a blojen' chbeže'. Na' ne' chbežte' ca' bcheque' gwne'e lo' blojen'. ¹² Na' ble'ede' čhope angl bene' zjanyaz lache' šiš zjachi'e lo' blojen', toe' chi' zej yichjle na' yetoe' chi' zej xni'ale gan' gota' cuerp che Jesúsen'. ¹³ Nach gose'e no'olen':

—čBixchen' chbežo' no'ole?

Na' boži'en gože' legaque':

—Ba besyeyo'e Xanan' na' bi nezda' gale jasesane'ne'.

¹⁴ Beyož gwna' Marían' ca' gwyeçhje' ble'ede' zecha Jesúsen' cožen', perw bi gocbe'ede' še naque' le'. ¹⁵ Na' gož Jesúsen' le':

—¿Bixchen' chbežo', no'ole? ¿Non' cheyiljo'?

Marían' bene' xbab še ben' chape' yaguen' nach boļ güiže' le', gože'ne':

—Bene', še len' beyo'one' ga yoble, gwna neda' gale jaysano'ne' cont yeyoa'ne'.

¹⁶ Jesúsen' gože'ne':

—¡María!

Na' Marían' gwyeçhje' da' yoble na' gože'ne':

—¡Raboni! —naquen to diža' hebreo na' zejen Maestrw.

¹⁷ Jesúsen' gože'ne':

—Bi goxo' neda', le bina' yeyepa' gan' zoa Xan'. Beyej len yezica'chle bene' ca' ba bosozenag xtižan' bene' ca' zjanaque' ca biše' zana', na' gožgaque' yeyepa' gan' zoa Xan' ben' lecz naque' Xale. Naque' Dios ben' chonxena' na' lecze naque' Dios ben' chonxenle.

¹⁸ Nach beza' María bene' Magdalan' na' jaydixjue'ede' yezica'chle bene' ca' chosozenag xtiža' Jesúsen' le' ba ble'ede' Xanchon'.

Bene' ca' zjanaque' Jesúsen' txen besele'ede' mbancze'

(Mt. 28:16-20; Mr. 16:14-18; Lc. 24:36-49)

¹⁹ Na' cate' ba goc choļže' dmigon', bene' ca' zjanaque' Jesúsen' txen zjandop zjanžague' lo' yo'o na' zjanseyjwkie' puert ca' da' besežebe' bene' gwnabia' che nación Israel cheton'. Nach Jesúsen' ble'e na' gwze' gachol legaque'. Na' gože' legaque':

—Le soa binlo len xbab da' yo'o lo' yichjlažda'ole.

²⁰ Beyož gwne' ca' na' blo'ede' legaque' taque' ca' na' cuit le'ena'. Na' besyebede' cate' besele'ede' le' naque' Xanchon'. ²¹ Na' gozne' da' yoble:

—Le soa binlo len xbab da' yo'o lo' yichjlažda'olen'. Can' gwseļa' Xan' neda' yežlio nga bia' xtižen', lecze ca' neda' chseļa' le'e güe'le xtižan'.

²² Beyož gwne' ca' blobe' legaque' na' gože' legaque':

—Le si' Spiritw che Diosen'. ²³ Bene' ca' yesyetinje xtoļa'gaquen', nable yeļa' chnabia' ye'ine' ba gwnitlaon, na' nable yeļa' chnabia' cont ye'le bene' bi yesyetinje xtoļa'gaquen' bitw nitlaon.

Tomás ble'ede' mban Jesúsen'

²⁴ Na' Tomás ben' bososi'e Tomás Cuaš lene' len bene' šižiņw ca' ba goseda-lene' Jesúsen', na' bi gwzoe' cate' Jesúsen' bedyelo'elagüe' legaque' že' dmigon'.

²⁵ Na' bene' ca' yezica'chle gose'ene':

—Ba ble'eto' Xanchon'.

Na' Tomásen' gože' legaque':

—Bi šejli'a mbancze' še bi le'eda' yiž che claven' le'e taque' ca' na' gwzebe xbenan' gan' gwdebe clav ca' na' gwzebe na'an cuit le'en.

²⁶ Gozde' to xman zjanite' lo' yo'on da' yoble na' zoa Tomásen' len legaque'. Na' da' yoble nyeyjw puert ca', cate' bezla' Jesúsen' na' gozzeche' gachol legaque'. Na' gwne':

—Le soa binlo len xbab da' yo'o lo' yichjlažda'olen'.

²⁷ Nach gože' Tomásen':

—Gwna' lo' taca' quinga na' bzeben xbenon'. Na' bzebe naon' cuit li'a nga cont šejli'o. Na' bich gaco' bene' bi chejle', san šejli'o.

²⁸ Nach Tomásen' gože'ne':

—ǰxana' na' Dios chia'!

²⁹ Na' Jesúsen' gože' Tomásen':

—Tomás, ba chejli'o da' ba ble'edo' neda'. Mbalaz bene' ca' ba chesejle'e la'czla' bina' yesele'ede' neda'.

Da' quinga zjanyojen cont šejle'cho Jesúsen' naque' bene' gwsela' Dios

³⁰ Da' zan yela' guac ben Jesúsen' da' besele'e bene' ca' zjanaque' le' txen da' bi nyojen nga. ³¹ Perw zjanyoj da' quinga cont šejle'le' Jesúsen' naque' Cristo ben' gwlej Diosen' cont nabi'e na' naque' Xi'in Dios, na' cont gata' yela' mban toli tocane chele da' chejnilaže'lene'.

21

Jesúsen' blo'elagüe' gaže bene' ca' zjanaque' le' txen

¹ Gwdechle yeto ža yoble Jesúsen' bozlo'elagüe' bene' ca' zjanaque' le' txen cho'a nisdao' da' nzi' Nisdao' Tiberias. Quinga goc: ² Txen nite' Simón Pedron' len Tomásen' ben' bososi'e Tomás Cuaš, na' Natanael bene' yež Caná gan' mbane Galilean', na' chope xi'in Zebedeo na' yechope bene' ca' zjanaque' Jesúsen' txen. ³ Na' Simón Pedron' gože' legaque':

—Ša'a gwxen beļ da' yoble.

Na' gose'e le':

—Lecze sa' neto'.

Nach gosa'aque' ja'aque' cho'a nisdao' na' goso'e to lo' barcw. Na' nocze no beļ beseželde' že'na'. ⁴ Na' do ba zoa šeni' besele'ede' zecha Jesúsen' cho'a nisdao', perw bi gosache'ede' še Jesús nan'. ⁵ Nach Jesúsen' gože' legaque':

—Bene' migw chia' žnono beļ chdole'le'?

Na' gose'ene':

—Nono chdole'to'.

⁶ Nach gože' legaque':

—Le gwzala' yixjw beļ chelen' cuit barcon' lichale na' senlba'.

Nach bosozala' yixjw beļ chegaquen', na' tantw be zan besedola', bi gosezoede' yosyocuen' lo' barcon'. ⁷ Nach ben' chaquechgüe Jesúsen' le', gože' Pedron':

—Xancho nan'.

Na' cate' gože' Simón Pedron' Xancho nan', la' beyacwte Pedroa' xalanen', le gague bi nyaze' cha'len' chone' žinna', na' la' bxite'te' lo' nisen' cont byob bežine' gan' zoa Jesúsen'. ⁸ Na' yezica'chle bene' ca' zja'aclene' barcw daon' zjanxobe' yixjw gan' že' beļ ya'a ca'. Bi naquen zito' cho'a nisdao', ca do yeto gayoa metrže. ⁹ Na' cate' besyežine' cho'a nisdao' besele'ede' chi' yi' ya'alj na' xoa beļ ya'a lagüenna' na' len yetextil. ¹⁰ Na' Jesúsen' gože' legaque':

—Le yeyoxe' ngale to chope beļ ya'a ca' za' gwxenle'.

¹¹ Na' Simón Pedron' gwyeje' jaxi'e yixjw beļen' gan' chi' barcon' na' bexoben' ga nac yo biž. Žen' to gayoa ši'ineyon beļ xen, perw bi bcheza' yixjon' la'czla' be zan gwže' lo'enña'. ¹² Na' Jesúsen' gože' legaque':

—Le da gagwle xsil.

Na' ne toe' bi besyeyaxjde' ye'ene': “žNo le'?", le ba gosache'ede' naque' Xancho'. ¹³ Jesúsen' gwbigue' na' gwxi'e yetextilen' na' bnežjue' che to toe' na' lecze ca' bene' len beļ ya'an.

¹⁴ Da'na' goc da' gwyon ni'a blo'elao Jesúsen' bene' ca' zjanaque' le' txen gwde bebane' ladjo bene' guaten'.

Jesúsen' be'lene' Simón Pedron' diža'

15 Na' cate' besyedadgüe', Jesúsen' gože' Simón Pedron':

—Simón xi'in Jonás, ¿chaquechdo' neda' clev can' chesaque bene' quinga neda'?

Pedron' boži'en gože'ne':

—Xana', neздо' chacda' le'.

Jesúsen' gože'ne':

—Bsed blo'e bene' ca' za' gwzolao chesejnilaže' neda', bene' ca' zjanac ca me' xila' chia'.

16 Na' da' gwchop ni'a gože' le':

—Simón xi'in Jonás, ¿chacdo' neda'?

Na' da' yoble gwna Pedron':

—Xana', le' neздо' chacda' le'.

Jesúsen' gože'ne':

—Bgüia gwña' bene' ca' chesejnilaže' neda', bene' ca' zjanac ca xila' chia'.

17 Da' gwyon ni'a gož Jesúsen' le':

—Simón xi'in Jonás, ¿chacdo' neda'?

Na' Pedron' gocyaše'de' dan' gož Jesúsen' le' ca' da' gwyon ni'a, na' gože' le':

—Xana', le' neze nle'edo' yogo lo. Neздо' chacda' le'.

Jesúsen' gože' le':

—Bsed blo'e bene' ca' chesejnilaže' neda', bene' ca' zjanac ca xila' chia'.

18 Da' li chnia' le', cate' goco' bene' güego', cuino' gwyaz xalanon' na' gwejejo' con ga žan chio'. Perw cate' gaco' bene' gole, gwli naon' na' bene' yoble chize' xalano' na' yeche'e le' ga bi chaclažo'.

19 Gože'ne' ca' cont gwneзде' can' gacxen Diozen' len da' gac che' cate' žin ža gate'. Na' gwde gwna Jesúsen' can' gac che Pedron' nach gože'ne':

—Con gwejnilaže' neda' na' bzenag chia'.

Can' gwna Jesúsen' che ben' chachgüede'

20-22 Na' yeto bene' naque' Jesúsen' txen na'ogüe' legaque'. Na' beyechj Pedron' na' ble'ede' le' na' gože' Jesúsen':

—Xana', ¿nac gac che benga?

Jesúsen' gože'ne':

—Še chaclaža' ne' zoacze' cate' yida' yeto ¿bin' chacžejlažo'? Con gwzoateze gwejnilaže' neda' na' bzenag chia'.

Ben' gwne' ca' naque' ben' chaquechgüe Jesúsen' na' ben' gwche' cuit Jesúsen' txen cate' gosagüe' xše' žen' cate' za' gac Jesúsen' lo na' bene' ca' chesegue'ede' le'. Na' cana' bena' gwñabde'ne': "Xana', ¿noxen' gwdie' le' lo na' bene' ca'?"

23 Na' dan' gož Jesúsen' Pedron': "Še chaclaža' ne zoacze' cate' yida' yeto ¿bin' chacžejlažo'?", da'nan' gwditj diža' len bene' ca' chsejnilaže' Criston' gosene' bi gat bena'. Perw Jesúsen' gague gože'ne' bi gate', san gože'ne': "Še chaclaža' ne' zoacz benga cate' yida' yeto, ¿bin' chacžejlažo'?"

24 Nedan' neзда' can' goc yogo' da' quinga na' da'nan' ba bia' diža' chegaquen na' ba bzojan'. Na' lecze le'e nezczele choa' diža' li.

25 Na' da' zanch da' ben Jesúsen' da' bi zjanyojen, le ša zjanyoj yogon' tgüeje tgüejen, libr zan juisyw yesaquen še ca'.

Da' na'ze chzoja' na'a.

DA' GOSON POSTLW CA'

Jesúsen' gwne' sele' Spiritw che Diosen'

¹ Teófilo, ca nac dan' bzoja' da' nechw, bzoja' yogo'loł da' ben Jesúsen', na' lecze bzoja' yogo' dan' bsed blo'ede' cate' gwzolaote' bsed blo'ede' ² žinten cate' beyepe' yaba. Šlac bsed blo'ede' gwleje' postlw che' ca', na' Spiritw che Diosen' bzejni'in Criston', na' Criston' gože' legaque' nac yesone'. ³ Nach gwde gosot bene' mal ca' Jesúsen' na' gwde bebane' ladjo bene' guaten' nach jalo'elagüe' postlw che' ca'. Na' da' zan da' bene' cont gosenezde' mbanczen'. Na' gwdalene' legaque' čhoa ža na' bzejni'ide' legaque' can' chnabia' Diosen'.

⁴ Na' šlac ne' zoa Jesúsen' len postlw che' ca' gože' legaque' cbi yesyežaše' ciuda Jerusalénna'.

—Le yega'an le cueze gac can' gwna Xa' Diosen' gac, ca dan' bzejni'ida' le'e.

⁵ Da' zaque' ben Juan da' bzoe' bene' nis, perw yeto čhope ža da' zaca'ch gac čhele dan' yedesoa Spiritw che Diosen' lo' yichjlažda'olen' nabi'an le'e.

Jesúsen' beyepe' yaban'

⁶ Na' ža na'teze šlac ne' zjandop zjanžague' len Jesúsen' gose'ene':

—Xanto' žba bžin ža gono' cont yechoj nación Israel chechon' lo na' bene' zito' ca'?

⁷ Jesúsen' gože' legaque':

—Bitw naquen nezele bi ža bi hor gon Xacho Diosen' da' ca' toze' ba bžie' bia' gone'. ⁸ Perw na' cate' yedesoa Spiritw che'na' len le'e, gaclenen le'e len yela' guac čenna' cont güe'le xtižan' ciuda Jerusalén ni, na' doxen ga mbane distritw Judean', na' distritw Samarian', na' doxen yežlion'.

⁹ Beyož gwna Jesúsen' ca', chesena'te bene' ca' chesejnilaže' le', beyepe' yaba to lo' bejw na' bich besele'ede' le'. ¹⁰ Na' ne' chesena'te bene' ca' le'e yaban' gan' besele'ede' beyepe', cate'cze gosache'ede' ba zjazeča čhope angl len legaque' bene' zjanyaz lache' šiš. ¹¹ Na' bene' ca' čhope gose'e legaque':

—Bene' Galilea, žbixchen' čna'le le'e yaban'? Can' ble'ele beyep Jesúsen' yaban' caten' bechoje' ladjwlen', can' le'eczele yide' da' yoble.

Gosebeje' Matías cont goque' postlw laz Judasen'

¹² Na' nite' ya'a dan' nzi' Ya'a Olivos na' jaya'aque' Jerusalénna'. Jerusalénna' naquen gala'ze con ca'te' de lsens yesa'aque' ža čhe Dios can' ža ley che bene' Israel ca'. ¹³ Na' cate' besyežine' Jerusalénna' postlw ca' šnej na' bene' ca' zjanžague' gosegüe' gan' nite'na' lo' cuart zoa yichjen'. Postlw ca' šnej bene' quinga: Pedro, Jacobo, Juan, Andrés, Felipe, Tomás, Bartolomé, Mateo, Jacobo xi'in Alfeo, na' Simón ben' chon txen partid dan' nzi' cananista, na' Judas ben' nac bene' biše' Jacobon'. ¹⁴ Na' gosenita'teze postlw ca' šnej chosoł güiže' Diosen' txen len bene' ca' zjanaque' biše' Jesúsen' na' len María xna' Jesúsen' na' len yezica'chle no'ol ca' zjanžag.

¹⁵ Na' ca hora' Pedroa' zeche' ladjo to gayoa galje bene' chesejnilaže' Jesucriston' cont be'lene' legaque' dižan', na' gože' legaque':

¹⁶ —Bene' migw, Spiritw che Diosen' benen cont rey David bzoje' na' be'e diža' che Judasen' ben' gwčhe' bene' ca' gosezen Jesúsen' gan' jasešague' le'. Na' benen byen goc can' nyoj Xtiža' Diosen'. ¹⁷ Judasen' goque' txen len neto' na' bene' txen len neto' yogo'loł dan' gwyo'o lo na'to' bento'. ¹⁸ Na' gosezi'e

late' yežlio len mechw dan' gwxi' Judasen' bene' da' malen' bdie' Jesúsen' lo na' bene' ca'. Perw na' blažoe' cosyichj gan' goładite' na' gošj li'ena', doxen xjaloen' bchoj. ¹⁹ Yogo' bene' že' Jerusalénna' goseņezde' can' goc chen' na' da'nan' bososi'e yežlion' Acéldama na' xtiža'gaque'na' zejen Yežlio Chen. ²⁰ Goc can' nyoj to salmo žan:

Liže'na' gaquen to yo'o daš, nono soa na'.

Na' ľecze nyojen žan:

Na' te bene' yoble yołane' žin dan' bene'.

²¹ 'Na' nga nita' bene' ba gosone' txen len chio' šlac gwďalen Xancho Jesúsen' chio'. ²² Ba gosone' txen gwzolaoten cate' da' Juan bzoe' le' nis bžinten caten' beyepe' yaban', na' cheyala' cuejcho toe' gone' txen len neto' postlw güe'to' diža' can' beban Xancho Jesúsen' ladjo bene' guat ca'.

²³ Na' gosebeje' čhope bene', toe' José ben' le Barsabás, na' ľecz le' Justo, na' ben' yeto Matías. ²⁴⁻²⁵ Nach bosol' güiže' Diosen' gose'ene':

—Xanto', le' nombi'o yichjlažďao' yogo'loł bene'. Lao bene' ca' čhope blo'ešca neto' noe' ba gwlejo' cont gaque' postlw na' gone' xšimon' txen len neto'. Le ca nac Judasen', gwlejyichje' dan' ngo'o lo ne'e gone' na' ba zjayde' gan' naquen yeyeje' yela' güen da' mal che'na'.

²⁶ Nach gosone' rifa cont goseņezde' non' ba gwlej Diosen' na' Matíasen' bchoje' na' gosone' le' cuent len postlw ca' yešnej.

2

Can' goc cate' bla' Spiritw čhe Diosen'

¹ Na' bžin ža ľni dan' že' Pentecostés, na' postlw ca' na' yogo'loł bene' ca' ba gosejnilaže' Jesúcrison' zjandop zjanžague' toze latje. ² Na' zejzenez goc to sšag le'e yaban' ca' sšag čhe to be' bdono' gual na' nenxeje lo' yo'o gan' zjachi'ena'. ³ Na' besele'ede' gała'ze yichj to toe' gosezoa tgüeje yi' beł da' čala'nin. ⁴ Ca' goc jašo'o Spiritw čhe Diosen' lo' yichjlažďao' to toe', na' Spiriton' benen cont gosezolagüe' goso'e gwde gwdele diža' da' gosejni'i bene' zito' ca'.

⁵ Na' ca tiempen' bene' zan bene' Israel že' Jerusalénna' bene' chesonxene' Diosen', za'aque' doxen yežlion'. ⁶ Na' cate' gosende' chac sšaguen' gan' že' postlw ca', zan bene' Israel ca' besežague', na' ľeca besyebande', le to to postlw ca' bosozejni'ide' ľegaque' len diža' da' chesejni'i to toe'. ⁷ Bi gosejni'ide' bin' chac na' besyebande' gosene':

—¿Gague bene' distritw Galilea bene' quinga? ⁸ ¿Nacxečen' to tocho chenecho cheso'e diža' can' chesoe' bene' gualaž čhecho diža'? ⁹ Bałcho naccho bene' nación Partia, na' bałcho bene' nación Media, na' bałcho bene' nación Elam, na' bałcho bene' distritw Mesopotamia. Na' yebałcho bene' distritw Judea, na' yebałcho bene' distritw Capadocia, yebałcho bene' distritw Ponto, na' yebałcho bene' distritw Asia, ¹⁰ yebałcho bene' distritw Frigia na' bene' distritw Panfilia, na' yebałcho za'cho nación Egipto, na' yebałcho za'cho yež ca' zjachi' Africa do te ciuda Cirene. Na' chio' naccho cuent len bene' nación Roma, bałcho goljcho naccho bene' Israel na' yebałcho ben cuincho txen len bene' Israel. ¹¹ Na' bałcho naccho bene' yež ca' zjachi' Creta na' bene' distritw Arabia. Na' gate'tez bene' naccho, yogo'cho chenecho chesoe' bene' distritw Galilea quinga xtiža'chon' da' chaccho, cheso'e diža' čhe da' zan da' ba ben Diosen' da' zaca' yebanecho.

12 Na' yogo' beṇe' ca' besedobe' chosozenague' besyebande' na' gosaczejlaže' bin' chac, na' zane' gosene':

—¿Bi zejen dan' chaquen'?

13 Na' yebaḷe' gosene'e' e' gosene':

—¡Beṇe' quinga chesezožde'!

Diža' dan' be' Pedroa' len beṇe' Israel ca' besežag

14 Na' Pedroa' gwzeche' lao ben' zjandop zjanžague' txen len postlw ca' yešnej na' be'e diža' zižje gwne':

—Le'e beṇe' Judea na' note'tezechle zoale ciuda Jerusalén ni, che'nda' gwzenagle chia' na' gonle xbab che da' za' ni'a le'e. 15 Bene' lježa' quinga bitw chesezožde' can' chaquele, le ne' nac tempran. 16 Ba chac can' bzoj da' Joel ben' be' xtiža' Diosen' cani' bzoje' dan' gwna Diosen', žan:

17 Cate' ba zoa žin ža cont yeyož yežlion',

neda' Dios gona' cont Spiritw čhian' yedesoa' len beṇe' že' doxen yežlion'.

Na' gona' cont xi'inle ca' yeso'e xtiža'na',

na' bene' byo xcuide' ca' yesele'edagüede' bi da' gona',

na' güe'lena' beṇe' byo gol ca' diža' lo bišgal čhegaquen'.

18 Na' yogo' beṇe' ca' chesejnilaže' neda', beṇe' byo na' no'ole,

yedesoa Spiritw čhian' len legaque' cont yeso'e xtižan'.

19 Gona' cont yesele'e beṇačhen' da' zaca' yesyebande' le'e yaban' na' lagüe yežlion',

na' gona' yela' guac chia'na' len chen, len yi' na' len žen da' nac ca bejw.

20 Bich gwseñi' gwbižen', na' bio'na' yeyaquen xna ca chen

cate' za' žin ža yida' da' yoble gwnežjua' castigw čhe yogo' beṇe' cbi chesejni-laže'nda', neda' naca' Xanle.

Žana' gaquen to ža žialao xen.

21 Nach note'tez beṇe' yesenabe' gaclena' legaque',

neda' naca' Xanle yebeja' legaque' lo da' malen'.

Can' gwna Diosen'.

22 Na' le'e beṇe' Israel gualaž chia', le gwzenag chia'. Jesúsen' ben' nac beṇe'

yež Nazaret, Diosen' blo'ede' naque' beṇe' zaque'. Diosen' bene' cont Jesúsen'

bene' yela' guac na' bichle da' zaca' yebanecho can' nezečzelen'. 23 Lo yela' neze

čhe Diosen' bin' za' gac, bi'e latje gwzenle Jesúsen' na' bdelene' lo na' beṇe'

mal ca' gosote'ne' bosode'ene' le'e yag cruzen'. 24 Perw na' Diosen' bečhis

bosbane'ne' ladjo beṇe' guat ca', le bi gwzoe yela' goten' naban' le'. 25 Quinga

bzoj da' rey David xtiža' Jesúsen' cani'te, žan:

Nezda' Xana' Diosen' zoe' len neda' do ža do yel,

na' zoe' chaclene' neda' cont bi chžeba'.

26 Da'na'na' zoa' mbalaz na' choa' diža' leca chebeda'.

Na' lecze chebeda' nezda' yečhis yosbane' neda' ladjo beṇe' guat ca' cate' ba gota'.

27 Dios chia', nezda' bi yocua'ano' neda' gan' že' beṇe' guat ca',

neca go'o latje gožo' cuerp čhia'na', neda' naca' xi'ino' na' nac lažda'oguan' xilaže'.

28 Ba blo'edo' neda' can' soa cueza' mbalaz.

na' mbalaz soa' dan' soaleno' neda'.

Beyož gwna Pedroa' ca' nach gože' legaque':

29 —Beṇe' Israel, nezecho da' xoxxta'ocho rey David gote' na' bosocuaše' le'.

Na' nombia'cho ba gan' bosocuaše' le'. 30 Na' da' rey Davin' be'e diža' can'

bzejni'i Diosen' le' na' gwneзде' gwlo'o Diosen' da' bałi gague da' te bi gac can' gwne'. Gwneзде' gon Diosen' cont Criston' galje' lo diaža che' na' nabi'e naci6n Israelen' can' gwnabia' le'na'. ³¹ Diosen' bene' cont da' rey Davin' gwneзде' can' gaquen' na' da'nan' be'e diža' che Criston' ben' ba gwsela' Diosen' cont nabi'e. Gwne' Criston' yebane' na' bi yega'ane' gan' že' bene' guat ca' na' neca gožo' cuerp che'na'. ³² Na' Diosen' bechis bosbane' Jes6sen' ladjo bene' guat ca', na' yogo' neto' choe'to' diža' nezeto' beyas bebane'. ³³ Na' Diosen' len yela' guac che'na' bene' cont beyep Jes6sen' gan' zoe'na' na' chnabi'e txen len le'. Na' Diosen' bnežjue'ne' Spiritw che'na' can' gwne'. Na' Jes6sen' ba bene' yela' guac nga da' ba benele na' da' ba ble'ele. ³⁴ Gague da' rey Davin' beyep yaban', san da' David bzoje' che Jes6sen' gwne':

Ʋancho Diosen' gože' Ʋanan':

"Gwche'edo' cuita' nga nabia'cho txen,

³⁵ na' gona' cont yogo' no chesegue'e le' yosozexjw yichje' yosozenague' chio'."

³⁶ Da'nan' yogo' chio' bene' Israel cheyała' nezecho Jes6sen' ben' betwle bda'ne' le'e yag cruz, Diosen' gwleje'ne' cont naque' Ʋanchon' na' naque' Cristo, zeje diža' naque' ben' gwsela' Diosen' nabi'e naci6n chechon'.

³⁷ Na' cate' bene' ca' zjanžaguen' gosende' xtiža' Pedroa', da' juisyw da' gosacde' lo' lažda'ogaquen', nach gose'e Pedroa' na' len yezica'chle postlw ca':

—Bene' gualaž, žbin' cheyała' gonto'?

³⁸ Nach Pedroa' gože' legaque':

—To tole cheyała' yetinjele xtoła'le ca' na' soale nis dan' ba chejnilaže'le Jesucriston', na' Diosen' yezi'xene' chele na' gone' le'e Spiritw che'na' soan lo' yichjlažda'olen'. ³⁹ Ʋancho Diosen' gone' note'tezle Spiritw che'na' can' ba gwne', le'e na' xi'inle ca' na' note'tez bene' zito', le chnežjuen' yogo' bene' chbeje' cont yesaque' lo' ne'e.

⁴⁰ Nach Pedroa' be'lene' legaque' diža' zan, na' gwneyoede' legaque' gwne':

—Le yechoj ladjo bene' mal quinga bene' cbi zjanombia' Dios.

⁴¹ Ca' goquen' bene' ca' gosejle'e diža' dan' be' Pedroa' gosezoe' nis. Na' lo žana' šon' mil bene' gosejnilaže' Jes6sen' na' gosaque' txen len yezica'chle bene' chesejnilaže' le'. ⁴² Yog6e' gosenita'teze' bosozenague' dan' bososed bosolo'e postlw ca' legaque'. Na' gosaque' toze len yezica'chle bene' gosejnilaže' Jes6sen' na' gose'ej gosag6e' txen na' gosenite' bosol g6iže' Diosen' txen.

Can' goson bene' ca' gosejnilaže' Criston' da' nechw

⁴³ Na' yogo'ze bene' besyebande' can' goson postlw ca' da' zan da' g6en da' zaca' yebanecho len yela' guac che Diosen'. ⁴⁴ Na' bene' ba chesejnilaže' Jes6sen' gosaque' toze na' gosone' toze yogo'loł da' zjade čegaque'.

⁴⁵ Na' gosote' yežlio na' bichle da' zjadede' na' mechw dan' besele'ede' čhen goseyisen' lao yogo'lole' con da' beseyažje to toe'. ⁴⁶ Na' tža tža besedop besežague' yodao' blaona' na' lecze do laže' gose'ej gosag6e' txen liž to togaque' na' gosenite' mbalaz. ⁴⁷ Gosenita'teze' gosonxene' Diosen'. Na' gosazlaže' bene' yezica'chle can' gosone'na'. Na' tža tža Ʋancho Diosen' bene' cont gosanch bene' ca' gosejnilaže' Jesucriston'.

3

Beyac to bene' nxinj ni'e

¹ Na' to ža Pedroa' na' Juan ja'aque' yodao' blaona' do cheda šone, hor cate' bene' Israel ca' chosol g6iže' Diosen' yogo' ža. ² Na' gwzoa to bene' nxinj ni'e

ca goljte' na' yogo' ža gosebec bene' le' cho'a puert che yodao'na', puert dan' nzi' Puert Xdan, cont gwṇabe' mechw lao bene' ca' chja'ac yodao'na'. ³ Nach cate' bžin Pedroa' len Juan yodao'na' na' ben' nxinj' ni'ena' bol' güiže' legaque' yosonežjue'ne' mechw. ⁴ Nach Pedroa' len Juanna' gosebeze' na' gosena' chgüe' le' na' Pedroa' gože'ne':

—Gwṇa' neto'.

⁵ Na' bena' bene' xbab yosonežjue'ne' mechw. ⁶ Perw Pedroa' gože'ne':

—Bibi mechw chia' de da' goṇa' le', perw zoa to da' gona' gaclena' le': len yela' guac che Jesucriston' bene' naque' bene' yež Nazaret, chona' mandadw gwzoža' na' gwda.

⁷ Na' Pedroa' beṅoe' ne'e liča na' bsože'ene', na' gocte gwzeche' na' ni'ena' la' besyeyacten da' gual na' lecž ca' bečj' ni'e ca'. ⁸ Na' cate' gobče'ede' ba besyeyac ni'en', bxite' yela' chbe che'. Na' gwyo'e chašil che yodao'na' len legaque' chxite' na' cho'e yela' choṅclen che Diosen'. ⁹ Na' bene' ca' že' chašilen' besele'ede' can' chde' chxite' cho'e yela' choṅclen che Diosen'. ¹⁰ Na' besyeyombi'e le' naque' ben' chbe' chṇab mechw yogo' ža cho'a puert che yodao'na', puert dan' nzi' Puert Xdan, na' leca besyebande' da' ba beyac ni'ena'.

Pedroa' be'e xtiža' Diosen' chašil yodaon'

¹¹ Na' gosenite' chašil da' nzi' Chašil che da' Salomón dan' ze gan' zoa' yodao'na'. Na' ben' beyac ni'ena' bi bsane' Pedroa' len Juanna'. Nach yogo' bene' že' yodaon' besežagsese' chašila' cont jasene'e ben' beyaquen', le besyebanchgüede'. ¹² Na' cate' Pedroa' ble'ede' ba zjanžag bene' zan gan' nite'na' nach be'lene' legaque' diža', gože' legaque':

—Le'e bene' gualaž chia' bene' Israel, žbixčhen' chebanele? ¿Chaquele len yela' guac četon' bento' cont beyac benga? ¿še chaquele beyaque' dan' chonchguato' can' chazlaže' Diosen'? Bi naquen ca'. ¹³ Dios ben' gosonxen da' xozxta' ocho Abraham, Isaac na' Jacob, blo'e nac Xi'ine' Jesúsen' bene' zaca' juisyw. Perw le'e bdele Jesúsen' lo na' justis ca' cont gosote'ne' na' bžonle cate' Pilaton' goclaže' gwsane'ne'. ¹⁴ Can' benle len Jesúsen' la'czla' naque' bene' laždao' xilaže' juisyw na' naque' la'zelagüe bene' chon da' güen. Nach gwṇable bosan Pilaton' to bene' güetw bene' na' bi gwṇable yosane' Jesúsen'. ¹⁵ Na' ca' nac Jesúsen' ben' bxe yela' mban toli' tocane, le'na' betwle, perw na' Diosen' bečhis bosbane' le' ladjo bene' guat ca'. Neto' ble'eto'ne' na' choe'to' diža' ba bebane' ladjo bene' guat ca'. ¹⁶ Na' chle'ele benga cbi goc se'e na' nombia' lne', na' na'a ba beyac ni'ena' len yela' guac che Jesúsen' ben' chejnilaže'to'. Le da' chejnilaže'to' Jesúsen', da'n'an' besyeyacšagüe' ni'a benga na' ba chle'ele can' beyaquen'.

¹⁷ Bene' migw, nežda' le'e na' bene' gole blao čele ca' betwle Jesúsen' lagüe bi gwyejni'ile Diosen' gwsele'ne'. ¹⁸ Na' da' benle ca', goc can' gwna Diosen' gac, da' bene' mandadw bosozoj da' bene' ca' goso'e xtižen' cani', bosozoje' che Criston' ben' gwlej Diosen' cont nabi'e. Bosozoje' che' gosene' yosochi yososaca' bene' le'. ¹⁹ Da'n'an' le yeyonšca xbab chele na' le yetinj'e xtola' len' cont Xancho Diosen' gwṇitlagüen' na' gone' ga soale mbalaz. ²⁰ Nach Xancho Diosen' sele' Jesúsen' yežlio nga yetni'a, ben' gwleje' cani'te cont naque' Cristo čecho. ²¹ Perw chonen byen yega'an Jesucriston' yaban' na'a, na' cate' žin ža gon Diosen' cont yežlio nga yeyaquen da' cobe, cana' yide' yeto. Ca' gosena bene' gwleje' cani' cont goso'e xtižen'. ²² Da' Moisésen' be'lene' da' xozxta' ocho diža', gože' legaque': “Xancho Diosen' sele' yeto bene' gualaž čechon' cont

güe'lene' le'e xtiže'na' can' gwsele' neda'. Ćhe bena' gwzenagle bite'tez ne'.
 23 Na' Diosen' gone' yesebiayi' yogo' bene' ca' cbi yosozenague' Ćhe bena'
 selen', na' bich yesenite' txen len bene' ca' chesonxene' le'." Can' gož Moisésen'
 da' xozxta'ocho ca'.

24 Ćlec' ca' yogo'loł bene' goso'e xtiža' Diosen' cani', gwzolaozen len da'
 Samuel na' yogo' bene' ca' gosedeĆh, goso'e diža' Ćhe da' ca' ba Ćhac tiemp
 na'a. 25 Le'e nacle xi'in diaža Ćhe da' bene' ca', na' dan' gož Diosen' legaque'
 gone', na' dan' gože' yezica'Ćhle xozxta'ole ca', lec'z naquen Ćhe le'e. Gože' da'
 Abrahanna': "To bene' galje lo diaža Ćhio' gone' cont bene' že' doxen yežlion'
 nite' mbalaz." 26 Da'n'an' cate' Diosen' bosbane' Xi'ine' Criston' ladjo bene'
 guat ca', zgua'tec gwsele'ne' lao Ćhio' bene' Israel da' goclaze' gaĆlene' Ćhio'
 cont to toĆho yetin'jeĆho xtola'Ćhon'.

4

Pedroa' na' Juanna' nite' lao bene' gwnabia' ca'

1 Ne' Ćhesoe'lente Pedroa' na' Juanna' bene' ca' diža' cate' besežin bal
 bĆoz Ćhe bene' Israel ca', na' bene' gwnabia' Ćhe ben' Ćhesape' yodao' blao
 Ćhegaque'na' na' bene' saduceo ca' bene' cbi Ćhesejle'e še yesyeban bene' guat
 ca'. 2 Bene' ca' Ćheseze'e Ćhe dan' Ćhososed Ćhosolo'e Pedroa' len Juanna', le
 Ćhesene' nezeĆho gwžin ža cate' yesyeban bene' guat ca' da' beban Jesúsen'.
 3 Na' bene' blao ca' gosezene' Pedroa' len Juanna' na' goseyixjue' legaque' ližya
 do yel, le ba Ćhxin na' bi gola' yesone' yela' justis Ćhegaquen' ca' Ćheyla' že'na',
 san bosocuezen' beteyoch. 4 Na' ca' nac bene' ca' gosende' Ćhesoe' Pedroa'
 na' Juanna' xtiža' Diosen', zane' gosejnilaže' Criston', na' txen len bene' ca' ba
 gosejnilaže'ne' cana', gosac do gayo' mil bene' byo cbi cuent no'ole.

5 Na' beteyo bene' gwnabia' Ćhe bene' Israel ca', bene' gole blao ca' na'
 bene' bososed bosolo'e ley dan' bzoj da' Moisés, besedop besežague' Ćhuda
 Jerusalénna' 6 len Anás ben' naqueĆh bĆoz blao, na' len Caifás, na' Juan, na'
 Alejandro na' nochle bene' zjanaque' biše' ljež ben' naqueĆh bĆoz blaon'.
 7 Na' gosone' mandadw jasexi'e Pedroa' na' Juanna' na' cate' ba zžazie'
 laogaquen' gosenabde' legaque':

—¿No beŋ lens Ćhele cont beyonle bene' nxinjen'? o ¿no yela' guac Ćhe
 bĆhinle beyonlene'?

8 Na' Spiritw Ćhe Diosen' dan' yo'o lo' yičhilaždao' Pedroa' benen cont gože'
 bene' ca':

—Le'e bene' gwnabia' na' bene' gole bene' blao Ćhe nación Israel ĆheĆhon',
 9 Ćhñable nac bento' da' güen beyonto' bena' nxinj ni'ena'. 10 Le'e na' yogo'
 bene' gualaž Ćheyla' nezele Jesucriston' ben' naque' bene' Nazaret bene' yela'
 guac Ćhe' cont beyacšagüe' benga. Le'e betwle Jesucriston' bda'ln'e to le'e yag
 cruz, perw Diosen' beĆhis bosbane'ne' ladjo bene' guat ca'. 11 Bi gwyejle'le
 Ćhe Jesucriston', da'n'an' zaca'leble ca' bene' Ćheson yo'o bene' bi Ćhesazlaže'
 yej güen da' ba naquen yej squin Ćhe yo'ona'. 12 Toze Jesucriston' guac gone'
 Ćhio' yela' mban toli toĆane, na' noch no zoa doxen lo yežlion' bene' gac gone'
 yela' mban toli toĆane Ćhe Ćhio' beĆaĆh.

13 Besyebane bene' gwnabian' can' boži'i Pedroa' na' Juanna' xtiža'gaquen'
 sin cbi besežebe', le nacbia' zjanaque' bene' yiže' na' bi zžansedteque'. Nach
 gosacbe'ede' legaquen' ba gosedalene' Jesúsen'. 14 Na' dan' zecha ben' beyaque
 ni'ena' txen len Pedroa' na' Juanna', bi besyežele bene' gwnabian' bi yesene'

čhegaque'. ¹⁵ Nach bene' gwnabian' besyebeje' postlw ca' chyo'ole šlac bosoxi'e legacze' nacle yesone'. ¹⁶ Na' bene' gwnabian' gose' lježgaque':

—¿Bi goncho len bene' quinga? Yogo' bene' že' ciuda Jerusalén ni zjaņezde' gosone' to yela' guac xen na' bi gac ye'cho bene' bi gosone' yela' guaquen'. ¹⁷ Letechoze goncho cont cbi gaslas diža' dan' cheso'ena'. Da'nan' cheyla' ye'cho legaque' gata' castigw čhegaque' še yesoe'che' xtiža' Jesúsen'.

¹⁸ Nach gosaxe' Pedroa' na' Juanna' da' yoble na' gose'e legaque' bich yeso'e diža' che Jesúsen' na' noch no yososed yosolo'ede'. ¹⁹ Nach Pedroa' na' Juanna' bosyoži'e xtižen' gose'e legaque':

—Le gon xbab če da' nga, ¿chaquele chaclaže' Diosen' gwzenagto' chele o še chaclaže' gwzenagto' če le'? ²⁰ Bi gac cuezt'o bich güe'to' diža' če da' ba ble'eto' na' ba beneto'.

²¹⁻²² Na' da' zan da' gose' bene' gwnabia' ca' legaque' cont yosošebe'ne'. Perw na' bi beseželde' nacle yesone' legaque' castigw, le bene' zan chesonxene' Diosen' dan' beyac bena' len yela' guac che Diosen'. Ba gwđie' čhoa iz na' ca goljte' bi goc se'e. Nach bososane' Pedroa' na' Juanna'.

Gosenabde' Diosen' gaclene' yeso'e xtiže'na' sin cbi yesežebe'

²³ Na' Pedroa' len Juanna' cate' bososan bene' gwnabian' legaque' jaya'aque' gan' nita' yezica'chle bene' chesejnilaže' Criston' na' gosoe'lene' legaque' diža' yogo'loł can' gose' bχoz gwnabia' ca' na' bene' gole blao ca' legaque'. ²⁴ Na' cate' gosende' dan' gose' Pedroa' len Juanna' legaque', toze can' gosone' xbab na' bosol güiže' Diosen', gosene':

—Xanto' Dios, len' beno' yaban' na' yežlion' na' nisdaon'. Len' beno' benač na' be ca' chesaš na' bica'chle da' zjade, na' len' chnabi'o doxen. ²⁵ Na' le' beno' cont da' rey David bzoje' diža' quinga dan' gož Spiritw chion' le', žan: Bene' ca' cbi zjanaque' bene' Israel chesase' contr le', Xanto' Dios, perw bicze gac can' chesone' xbab en'.

²⁶ Bene' gwnabia' che nación ca' na' che yež ca' txen zjanaque' chesone' contr le' Xanto' Dios, na' contr Xi'ino' Criston' ben' gwseło' cont nabi'e.

²⁷ Na' Xanto' Dios, naquen da' li rey Herodes na' Poncio Pilato na' bene' cbi zjanaque' bene' Israel gosaque' txen len bene' Israel ca' lo ciuda nga. Na' yogüe' gosone' txen cont gosote' Xi'ino' Jesúsen' ben' nac bene' laždao' xilaže' juisyw, ben' gwlejo' cont nabi'e. ²⁸ Gosone' can' gwčhogbi'o gac dan' bžio' bia' cani'te. ²⁹ Na' na'a Xanto', gwņa can' cheson bene' gwnabia' ca', le chesaclaže' yosošebe' neto' bene' güen žin čhio'. Na' goclen neto' cont bi žebto' güe'to' xtižo'na'. ³⁰ Na' cate' güe'to' xtižo'na' blo'ešca yela' guac če Xi'ino' Jesúsen' bene' laždao' xilaže' juisyon' cont gac yela' guac, na' yesyeyac no bene' chesacšene na' gac bichle da' yesyebane bene'.

³¹ Na' cate' beyož bosol güiže' Diosen', Diosen' bene' gwxo' gan' zjandop zjanžague'na' na' Spiritw če'na' gwzoachguan len legaque', nach goso'e xtiža' Diosen' sin cbi besežebe'.

Gosone' dan' zjade čhegaque' toze

³² Na' yogo' bene' ca' gosejnilaže' Criston' toz ca gosac yičhlažda'ogaque'. Na' yogo' bi da' zjade čhegaque' gosonen' toze, na' nono gwna: “Čhia' da' nga”, o “Čhia' da' na”, le naquen che yogo'loł gaque'. ³³ Na' postlw ca' len yela' guac xen če Diosen' bosozejni'ide' bene' Jesúsen' bebane' ladjo bene' guat ca'. Na' Diosen' goclenčgüe' legaque' len bi dan' gosone'. ³⁴ Na' bibi goc falt bi da' beseyaže bene' gosejnilaže' Criston', le bene' zjanape' no yežlio o no yo'o

gosoten'. Na' mechw dan' besele'ede' che to ton³⁵ bosonežjuen' postlw ca', na' postlw ca' goseyisen' len bene' beseyažjiden'.³⁶ Can' ben to bene' Chipre bene' le José. Naque' xi'in diaža che da' Levin' na' postlw ca' bososi'ene' Bernabé, zeje diža' ben' cheyonxenlaže' bene'.³⁷ Joséna' bete' to yežlio che' na' mechw dan' ble'ede' chen bnežjuen' postlw ca'.

5

Da' mal dan' goson Ananías na' Safira

¹ Na' zoa to bene' le Ananías na' no'ol che'na' Safira, na' gosote' to yežlio chegaquen'. ² Perw na' legacze' bosoxi'e yosonežjue' late'ze mechw dan' besele'ede' chen na' yese'e postlw ca' doxenenna'. Nach gwyej Ananíasen' na' bnežjue' postlw ca' mechon'. ³ Nach Pedroa' gože'ne':

—Ananías, žbixchen' bzenago' che Satanás dan' chnabia' da' xigüe' ca' na' chacdo' xoayago' Spiritw che Diosen'? Chi'o neto' choño' doxen mechon' dan' ble'edo' che yežlion', len ba gwlo'ošagüe'le laten' par cuinle. ⁴ Chio' yežlion' cate' biña' goton', na' chio' mechon' dan' ble'edo' cate' beton' na' zaco' cont beno' da' chaclažo' len len. žBixchen' benle da' malen' nac ca'? Gague contr neton' ba benle benlaže'le, san contr Diosen'.

⁵ Nach Ananiasen' cate' bende' xtiža' Pedroa' to gwbižze' na' gote'. Na' yogo' bene' ca' gosende' diža' can' goquen' besežebchgüe'. ⁶ Na' besežin to chope bene' xcuide' gan' gwbiž da' Ananíasen' na' bosyochele' cuerp chen' to lache' na' besyeyo'ene' ga bosocuaše'ne'.

⁷ Na' gwde do šon hor gote' cate' bžin no'ol che'na' na' gwoy'e lo' yo'on sin chi neže' bin' ba goc che bene' chen'. ⁸ Na' Pedroa' gože'ne':

—žTo ca'te' ble'ele che yežlion'?

Na' Safiran' gože'ne':

—To ca'te'ten'.

⁹ Nach Pedroa' gože' no'olen':

—žBixchen' goco' toze len bene' chion' chaquele gonle Diosen' prueba še lede' can' že' bi cheyala' xoayagcho? Cho'a puert nga zjazecha bene' ba bosocuaše' bene' chio'na' na' na'a yeso'e le'.

¹⁰ Na' la' gwbižte Safiran' lao Pedroa' na' gote'. Na' cate' goso'o bene' xcuide' ca' lo' yo'ona' besele'ede' ba gote' nach goso'ene' jasecuaše'ne' cuit da' bene' che'na'. ¹¹ Na' yogo' bene' chesejnilaže' Criston' besežebe' can' goquen' na' lecze besežeb yezica'chle bene' gosende' diža' can' goquen'.

Gosone' da' zan yela' guac

¹² Na' postlw ca' gosone' da' zan yela' guac na' bichle da' besele'e bene' da' zaca' yesyebande'. Na' bene' ca' chesejnilaže' Xancho Jesucriston' chesedop chesežague' txen chašil che yodao' blaona' gan' nzi' Chašil che da' Salomón. ¹³ Na' yezica'chle bene' ca' že' Jerusalénna' gosapchgüe' legaue' bala'an, la'czla' besežebe' yesaque' txen len legaue'. ¹⁴ Perw na' zane' gosejnilaže' Xanchon' na' gosaque' txen, zan bene' byo na' no'ole. ¹⁵ Na' cate' no bene' gosacšende' goseyixjue' legaue' tnez do lo cam do lo yagla', gosebeze' te Pedroa' cont yesechele' bxin che' na' yesyeyacde' še bi yizžüen' chese'ede'. ¹⁶ Na' bene' ca' že' yež da' zjachi' gala'ze ciuda Jerusalénna' ja'aque' zjanche'e bene' chesacšene' na' bene' zjajo'o zjanyaz da' xigüe'. Na' yogo'lole' besyeyacde'.

Bene' saduceo ca' goseyixjue' Pedroa' len Juanna' ližya

17 Nach ben' nacch bꝛoz blao na' yezica'chle bene' saduceo bene' cbi chesejle' yesyeban bene' guat, besegue'ede' postlw ca'. 18 Na' gosezene'ne' na' goseyixjue' legaque' ližya. 19 Na' to angl bene' za' gan' zoa Xancho Diosen' bžine' ližyan' šeže'le na' gwsaljue' puert ca' na' bebeje' legaque'. Na' gože' legaque':

20 —Le šja'ac yodao' blaona' na' le güe' diža' len ben' chesežagna' naquen' yesone' cont gata' yela' mban chegaque' toli tocane.

21 Nach dan' gosende' can' gož anglen' legaque', ja'aque' yodao' blaona' cate' gwyeni' na' bososed bosolo'ede' ben' zjanžag na'.

Na' ben' nac bꝛoz blao len bene' gole blao ca' chesenabia' nación Israelen' besedobe' cont bosoxi'e, nach gosone' mandadw šjasexi'e postlw ca' gan' zjade' ližyan'. 22 Na' cate' ben' chesap yodaon' besežine' ližyan' gague no postlw ca' zjanla' na' jaya'aque' lao bene' gwnabia' ca' jasyedixjue'ede'.

23 Gose'e bene' ca':

—Nyeyjwꝓhach ližyan' na' lecze na' nita' soldadw ca' cho'a puerta' chesapen' perw cate' gwsaljwto' puerten' gague no postlw ca' že' lo' ližyan'.

24 Na' ben' nacch bꝛoz blao na' bene' gwnabia' che ben' chesap yodaon' na' bꝛoz gole blao ca' cate' gosende' rsonna' besyebande', gosene':

—¿Nac gac da' nga na'a?

25 Na' šlac chesacže'laže', bžin to bene' gože' legaque':

—Bene' ca' gwdixjwle ližyan' zjaze' chašil che yodao' blaona' chososed chosolo'ede' bene'.

26 Nach bene' gwnabia' che ben' chesap yodaon' len bene' gop ca' jasa'aque' jasexi'e postlw ca' diža' šagüe'. Bi gosone' znia len legaque' da' besežebe' bene' chosozenag xtiža' postlw ca' še yosožie' legaque' yej. 27 Na' cate' besežin postlw ca' lao bene' gwnabia' ben' nita' chosoxi'a, nach ben' nacch bꝛoz blao gože' legaque':

28 —Ba bento' mandadw bi güe'le diža' che Jesúsen' na' bich gwsed gwlo'ele bene' xtižen', na' ba gwdisle xtiže'na' doxen ciuda Jerusalenna'. Na' ba chosbage'le neto' žale betwto'ne'.

29 Nach Pedroa' na' postlw ca' gose'e legaque':

—Nacchen da' žialao xen gwzenagto' che Diosen' cled ca' che benach. 30 Le'e betwle Jesúsen' bda'ln'e' to le'e yag cruz, perw Dios ben' chonxencho na' ben' gosonxen da' xoxxta'ocho ca' bechis bosbane'ne' ladjo bene' guat ca'.

31 Na' na'a Diosen' ba bnežjue'ne' yela' bala'aṅ xen na' yela' gwnabia' xen cont chnabi'e na' chnežjue' yela' mban toli tocane che bene' chesejnilaže'ne'. Na' le'na' chazlaže' gaclene' yogo' chio' bene' Israel yetinjecho xto'la'chon' nach yezi'xene' chechon'. 32 Neto' nezeto' can' ben' Diosen' len Jesúsen' na' choe'to' diža' chen, na' lecze Spiritw che Diosen' choen' diža' che Jesúsen' lo' yichjlažda'oton', le Diosen' ba gwsele' Spiritw chen' zoan lo' yichjlaždao' bene' chosozenag che'.

33 Na' beseža'achgua bene' gwnabia' ca' cate' gosende' can' gož Pedroa' legaque' na' gosaclaže' yesote' postlw ca'. 34 Perw gwzoo to bene' fariseo len legaque' bene' le Gamaliel. Chsed chlo'ede' bene' ley dan' bzoj da' Moisésen' na' gosapchgua bene' le' bala'aṅ. Na' Gamalielen' gwzeche' na' bene' mandadw yesechoj postlw ca' chy'ole šlac güe'lene' bene' ca' že'na' diža'. 35 Na' gože' bene' ca' že'na':

—Bene' gualaž, cheyala' goncho xbab nac goncho len bene' quinga cont goncho da' nac güen. 36 Le yosa'laže' can' goc cate' bchoj ben' le Teudas gwne'

naque' bene' zaque'. Na' do tap gayoa bene' bosozenag che' na' gosaque' le' txen. Perw na' bžin ža gosot bene' le' na' besyeyaslas ben' gosaque' le' txen, gague bi gocch yesone'. ³⁷ Na' gwdechle ca tiempen' bosochēle' bal bene' že' to to yež, bchoj to bene' distritw Galilea ben' le Judas na' bene' zan gosaque'ne' txen. Na' lecze bžin ža gosote'ne' na' bene' ca' gosaque' le' txen lecze besyeyaslasē'. ³⁸ Na' da'nan' žia' le'e can' chacda' cheyała' goncho, jaseye bene' quinga, bibi gonecho legaque'. Le še chososed chosolo'ede' xbab chegacze', yeniten. ³⁹ Na' še dan' chososed chosolo'ede' naquen che Dios, bibi gac goncho cont cbi gaslasen. Cheyała' gwsaca'cho cont bi tilencho Diosen'.

⁴⁰ Na' gosazlaže' bene' gwnabia' ca' can' gož Gamalielen' legaque'. Nach gosaxe' postlw ca' na' goseyine' legaque' na' gosone' mandadw bich yososed yosolo'ede' che Jesúsen' bate'tezechle. Nach bososane' legaque'. ⁴¹ Na' ca' nac postlw ca', cate' besyehoje' gan' gota' yela' güexian', chesyebede', le Diosen' be'e latje bosochi bososaca' bene' legaque' neche dan' chososed chosolo'ede' che Jesúsen'. ⁴² Na' yogo' ža bososed bosolo'ech postlw ca' che Jesucriston' do liž bene' na' cate' chja'aque' yodao' blaona'.

6

Bene' ca' chesejnilaže' Criston' gosebeje' gaže bene' goson žin bixjw

¹ Na' ca' tiempen' zej chanch bene' ca' chesejnilaže' Jesucriston' na' bene' ca' cheso'e diža' griego gwzolao chesežeše', chesene' no'ol güezeb ca' nchixē legaque' bi chesezi'e lebe len no'ole güezeb ca' cheso'e diža' hebreo cate' cheseyise' dan' chese'ej chesagw to togaque'. ² Nach postlw ca' šižinw bosyotobe' yezica'chle bene' ca' chesejnilaže' Jesucriston' na' gose'e legaque'.

—Bi naquen güen neto' gwsanto' bich gwsed gwlo'eto' bene' xtiža' Diosen' cont chisto' dan' yese'ej yesagw bene'. ³ Da'nan' bene' migw, le cuej gaže bene' lježle, bene' zoachgua Spiritw che Diosen' len legaque', bene' zjanac bene' sina' na' bene' cheson da' güen, na' le gon lo na'gaque' yeseyise' dan' yese'ej yesagw bene' ca'. ⁴ Na' neto' soateze soato' yol güižto' Diosen' na' gwsed gwlo'eto' bene' xtižen'.

⁵ Na' gosazlaže' yogo' bene' ca' na' gosone' can' gose' postlw ca' legaque', na' gosebeje' to bene' le Esteban bene' chejnilaže' chgua Diosen' na' zoachgua Spiritw che Diosen' len le'. Na' lecze gosebeje' Felipe, na' Prócoro, na' Nicanor, na' Timón, na' Parmenas, na' Nicolás bene' ciuda Antioquía ben' bene' txen len bene' Israel. ⁶ Na' bosozoe' legaque' lao postlw ca' na' postlw ca' bosol güiže' Diosen' chegaque' na' gosexo'a na'gaquen' yichj bene' ca' cont gosezi' lo ne'e žin dan' yesonen'.

⁷ Na' bene' zanch gosende' xtiža' Xancho Jesucriston', na' zan bene' Jerusalénna' gosejnilaže'ne' na' lecze zan bžox' bosozenague' na' gosejle'e xtiže'na'.

Gosezene' Esteban

⁸ Na' Estebanna' gwzoachgua yela' guac che Diosen' len le' na' Diosen' goclenchgüe' le'. Da'nan' bene' yela' guac na' bichle da' zaca' yesyebane bene' lao bene' ca' že' na'. ⁹ Na' zoa to yodao' dan' chesene' Yodao' che Bene' ca' Bich Zjanaque' Esclavos. Bene' ca' chesedop chesežag yodao'na' za'aque' ciuda Cirene na' ciuda Alejandría na' distritw Cilicia na' distritw Asia. Na' bal bene' ca' gwzolao gosacyože' len Estebanna', ¹⁰ perw na' bi besyeželde' nac yosyoži'e xtižen', le Spiritw che Diosen' bnežjon le' yela' sina' na' bzejni'in le' bin' gwne'. ¹¹ Nach gosego'oyele' to chop bene' cont goso'e diža' güenlaže'

che', gosene' Estebanna' gwneye'e che da' Moisésen' ben' bzoj ley che bene' Israel ca'. Na' lecze gosene' Estebanna' gwne' diža' ya' che Diosen'. ¹² Na' bene' ca' gosacyože' che Estebanna' bosota bosone' bene' lo ciuda na' bene' gole blao che bene' Israel ca' na' bene' ca' chososed chosolo'ede' ley dan' bzoj da' Moisésen' cont gosaque' toze. Na' ja'acese' gan' zoa Estebanna' na' gosezene'ne' na' goseche'ene' gan' že' bene' ca' chesenabia' nación Israelen'. ¹³ Na' goseyiljue' bene' goso'e diža' güenlaže' bene' gosene' che':

—Benga bicze šize zoe' chne' diža' bya' che yodao' blao che Diosen' nga na' ley dan' bzoj da' Moisés. ¹⁴ Ba beneto' že' Jesús ben' naque' bene' yež Nazaret yochinje' yodao' blaona' na' yoše'e costumbr checho dan' ben da' Moisés mandadw na' ocho.

¹⁵ Na' yogo' bene' ca' zjachi' gan' chesone' yela' justisen' gosene'e cho'alao Estebanna' na' besele'ede' chactiten ca' cho'alao angl.

7

Choe' Estebanna' diža'

¹ Nach ben' nacch bxož blaona' gože' Estebanna':

—¿Naquen can' chesena bene' quinga?

² Na' Estebanna' gože' legaque':

—Le'e bene' gole na' note'teze bene' gualaž, le gwzenag chia' len to chop da' nia' le'e. Diosen' ben' nac la'zelagüe bene' zaca' blo'elagüe' da' xozxta'ocho Abraham cate' gwzoe' distritw Mesopotamia cate' za' šjasoe' ciuda Harán.

³ Na' Diosen' gože'ne': “Bchoj lažo' na' gwlejiyichj bene' biše' lježo' na' gwyej jasoa latje gan' gwlo'eda' le'.” ⁴ Beyož gož Diosen' Abrahanna' ca', nach Abrahanna' bchoje' gan' že' bene' Caldea ca' na' jasoe' Harán. Na' bžin ža got da' xe'na' na' gwdechle Diosen' gwche'e da' Abrahanna' gan' zoacho nga.

⁵ Diosen' bi bnežjue' da' Abrahanna' yežlio gaquen che', ne late' da'ozen', san gwne' gaquen che xi'in diaža che' cate' ba gote', la'czla' nono xi'ine' na' soa cate' gož Diosen' le' ca'. ⁶ Nach Diosen' gwne' šjasenite' laž bene' zito' tap gayoa iz ga yesaque' esclavos na' yesežaglaochgüe'. ⁷ Nach Diosen' lecze gože'ne': “Neda' gwnežjua' castigw che nación gan' yesone' xi'in diaža chio' ca' esclavos na' gona' cont yesyechoje' naciónna' na' yeside' yesonxene' neda' nga.” ⁸ Nach Diosen' gože' Abrahanna' gone' güen len xi'in diaža che'na'. Na' bene' mandadw soa Abrahanna' to señw dan' že' circuncisión, le' na' len bene' byo ca' zjanaque' diaža che', cont gacia' le chesejle'e che dan' gwna Diosen'. Da'na'na' cate' golje xi'ine' Isaaquen' bzoe'be' señw to xmanzebe', na' lecze can' ben da' Isaaquen' cate' gol je xi'ine' Jacob. Na' ca'cze ben da' Jacoben' len da' xi'ine' ca' šižinw, bene' ca' gosac šižinw diaža che bene' Israel.

⁹ Na' xi'in da' Jacoben' ben' le José, bene' biše' ca' gosacxi'ede' le' na' gosote'ne' gosezi' bene' nación Egipto le'. Perw Diosen' gwzoe' len Josén'.

¹⁰ Na' goclene'ne' len yogo' lo' da' bžaglagüe'. Na' Diosen' bene' cont da' faraón ben' chnabia' Egipton' bebede' Josén' na' gocbe'ede' naque' bene' sina'. Na' da'nana' faraónna' gwleje' le' cont goque' gobernador che nación Egipton' na' bene' lo ne'e ližen' na' yežlio che'na'.

¹¹ Na' goc gwbin doxen Egipton' na' lecze can' goc gan' nzi' distritw Canaan na' da' xozxta'ocho ca' bi beseželde' da' yesagüe' na' besežaglaochgüe'.

¹² Perw na' bžin ža da' Jacoben' bende' diža' de trigw Egipton' na' gwsele' da' xozxta'ocho ca' jasexi'en da' nechw. ¹³ Na' bechop ni'a ja'aque' cate' ben Josén' ga besyeyombia' bene' biše' ca' le', nach gwneze faraónna' can' nac

diaža che Josén'. ¹⁴ Na' Josén' bene' mandadw šjasexi'e xagaque' Jacoben' na' yogo'loł biše' lježe' ca', zjanaque' ca do gayonšino' bene'. ¹⁵ Can' goc gwyej Jacoben' jasoe' Egipton' na' Egiptona' gote', na' lecz na' gosat xi'ine' ca' bene' ca' gosac xozxta'ocho. ¹⁶ Na' gwdechle besyeyo'e žit benat čhegaquen' na' jasecuše'ne' to lo' bloj ba da' gosone' yež gan' nzi' Siquem. Da' Abrahanna' gwxai'e ban' cani'te che xi'in da' Hamor gwdixjuen' mechw.

¹⁷ 'Na' cate' ba zoa žin tiemp gwnežjo Diosen' legaue' yežlio can' gože' Abrahanna', ba zej chan bene' Israel ca' že' laž bene' Egipto ca'. ¹⁸ Na' ca' chac beža' rey che Egipton' na' rey coben' bi gwnežde' can' goclen Josén' nación chen'. ¹⁹ Na' rey nga gwdiljwlaže' bi da' mal bene' len da' xozxta'ocho bene' Israel ca' na' bene' mandadw šjasecho'on xi'ingaque'na' cont yesatbe'. ²⁰ Na' ca' tiempen' golje da' Moisésen' na' bebe Diosen' lebe', na' xaxna'be' bososcha'ogüe'be' šone bio'. ²¹ Perw na' bžin ža jasecho'onšaze'be' na' xi'in faraónna' to no'ole beželde'be' na' beyo'ebe' liže' boscha'ogüe'be' ca' xi'ine'. ²² Ca' goquen' bsed da' Moisésen' tcho'a yela' sina' che bene' Egipto ca' na' bene' da' zaca' na' be'e diža' da' zaca'.

²³ 'Na' čhoa ize da' Moisésen' cate' gwnan šjane'e bene' Israel gualaž che' ca'. ²⁴ Na' jale'ede' to bene' Egipto chči chsaque' to bene' Israelen'. Nach da' Moisésen' betue' bene' Egipton', boži'e da' malen' bende' bene' gualaž che'na'. ²⁵ Bene' xbab godce' yesache'e bene' gualaž che' chaclen Diosen' le' cont yosle' legaue' lo' na' bene' Egipto ca', perw bi gosacbe'ede'. ²⁶ Na' beteyo gosedił chopze bene' Israel. Na' bžin da' Moisésen' godce' gone' cont yesenite' binlo, na' gože' legaue': "žBixčhen' chdillen lježe le'e nacle bene' gualaže?" ²⁷ Nach ben' nap dol'a'na' bžigue' da' Moisésen' ca'ale gože'ne': "žNo gwna le' gaco' bene' gwnabia' cont gono' yela' justis čheto'na'?" ²⁸ žLez chaclažo' goto' neda' can' beto' bene' Egipton' neje?" ²⁹ Na' cate' bene' da' Moisésen' can' gož bena' le' nach bxonje' jasoe' nación gan' nzi' Madián la'czla' naque' bene' zito' len bene' ca'. Na' bšagne'e na' gwnita' čhope xi'ine'.

³⁰ 'Na' goc čhoa iz zoe' na', cate' to angl bene' gwseła' Dios blo'elagüe' le' latje dašen' gała'ze Ya'a Sinaí, yo'o anglen' to lo' yi' beł chdoljen to lo' yag xis yeše'. ³¹ Na' cate' ble'e da' Moisésen' can' chaquen' bebande' nach gwbigue' yelate' cont ble'ešagüe'de' na' bende' choł güiž Xancho Diosen' le', che'ene': ³² "Neda' naca' Dios ben' chonxen Abraham, ben' chonxen Isaac, na' ben' chonxen Jacob." Nach da' Moisésen' gwzize' catec bžebe', gague cheyaxjde' ne'e. ³³ Na' gož Xančhon' le': "Gwlečhj xelo'na' cont gapo' neda' bala'an, le' latje gan' zechao'na' naquen' chia'. ³⁴ Neda' ba ble'eda' yela' yaše' yela' zi' da' čde nación chia' Israelen' bene' že' Egipton' na' ba benda' ca' chesonyaše'. Da'na'na' gaclena' legaue'. Beda'na' cont seła' le' Egipton'."

³⁵ 'Diosen' gože'ne' ca' la'czla' bene' Israel ca' cbi gosezi'e čhe', gose'e Moisésen': "žNo gwna le' gaco' bene' gwnabia' cont gono' yela' justis čheto'?" Diosen' gwsele' da' Moisésen' cont gwnabi'e da' xozxta'ocho ca' na' cont bebeje' legaue' lo' na' bene' Egipto ca', na' angl che Diosen' ben' ble'e da' Moisésen' lo' yi' beł gwzoe' goclene'ne'. ³⁶ Na' da' Moisésen' bebeje' legaue' Egipton' gan' bene' zan yela' guac na' bichle da' zaca' yebane' bene', na' lecz ca' bene' cate' besežine' Nisdao' Xnan' na' šlac gosenite' latje dašen' čhoa iz. ³⁷ Na' da' Moisésnan' gože' da' xozxta'ocho ca': "Xancho Diosen' sele' yeto' bene' gualaž čhechon' cont güe'lene' le'e xtiže'na' can' gwsele' neda'. Čhe benan' gwzenagle." ³⁸ Da' Moisésen' gwzoe' len da' xozxta'ocho ca' latje dašen', na' lo

Ya'a Sinaín' to angl bene' gwseła' Diosen' gože' le' diža' da' zjansa' yeła' mban, na' bzoje' dižan' par chio'.

³⁹ 'Perw na' da' xozxta'ocho ca' zan las bi bosozenague' che da' Moisésen', bosozoe'ne' to šla'ale. Gosaclaže' šjaya'aque' Egipton'. ⁴⁰ Na' šlac zej da' Moisésen' lo Ya'a Sinaí, gose'e bene' biše' Aarónna: "Ben da' le'echo da' šejnilaže'cho na' da' cuialao laoch tnez. Le ca nac Moisésen' ben' bebeb chio' Egipton', nono neze bin' ba goc che'." ⁴¹ Nach gosone' to me' go'n dao' de oro na' gosote' no beyixe' gosonxene' me' daon', na' gosone' lni che bena' gosone' len ni'a na'gaque'. ⁴² Da'nan' Diosen' gwlejiyichje' nación Israelen' na' be'e latje gosejnilaže' gwbiž, bio', na' beljw. Na' da' nga nyojen len dan' bosozoj da' bene' ca' goso'e xtiža' Diosen' cani', žan:

Le'e bene' Israel, gague nedan' benxenle caten' betwle beyixe' latje dašen' lao choa iz.

⁴³ Benle no da' benxenle, na' bia'le yodao' da' chacte chedobe gan' benxenle dan' nzi' Moloc,

na' bia'le beljon' benxenle dan' nzi' Renfán.

Na' dan' ba gwlejiyichje' neda', da'nan' cueja' le'e gan' zoalen' na' seła' le'e nación zito' do gan' nzi' Babilonia.

⁴⁴ 'Na' šlac chesaše' latje dašen', da' xozxta'ocho ca' gosone' to yodao' da' chacte chedobe gan' že' yej ta'a gan' nyoj ley chegaque'na'. Na' gosonen' con can' gož Diosen' da' Moisésen' na' con can' blo'ede' le'. ⁴⁵ Nach cate' da' Josué gwche'e legaque' gan' ben Diosen' cont goseque'e yežlio che bene' zito' ca', lecze goso'e yodao' da' chacte chedobe. Na' ne' bosochine' yodaon' bžintem tiemp che da' rey David. ⁴⁶ Na' Diosen' bebede' da' rey Davin', na' da' Davin' goclaže' gone' to yodao' che Diosen', Dios ben' lecze benxen da' Jacoben' cani'te. ⁴⁷ Perw na' da' xi'ine' Salomón benen'. ⁴⁸ Na' Diosen' ben' chnabia' doxen, bi nacho zoe' lo' yo'o da' chon benachen', san chac can' gwna Diosen' dan' bzoj to bene' be' xtiže'na' cani', žan:

⁴⁹ Neda' zoa' yaba chnabia',

na' guac gona' con bi chazlaža' lo yežlion'.

Na' ¿chaquele gonle to liža'na'?

Neda' bi chyažjda' yo'o ga yezi'laža'.

⁵⁰ Neda' bena' yogo'te da' zjade.

⁵¹ 'Dan' bi chzenagle, dan' bi chejle'le lo' lažda'olen' nacchgualē bene' güedenag can' gosac da' xozxta'ocho ca'. Bicze chzenagle che Spiritw che Diosen'. ⁵² Da' xozxta'ocho ca' lecze bosochi bososaque' bene' ca' goso'e xtiža' Diosen' cani', na' gosote' legaque' caten' goso'e diža' can' seła' Diosen' Xi'ine' ben' nac bene' güen juisyw. Na' cate' bide', le'e bdelne' lo na' bene' ca' gosote'ne' na' le'e napple doła' dan' gosote'nen'. ⁵³ La'czła' nombia'le ley dan' bosonežw angl ca' da' Moisésen', bi chzenagle chen.

Gosote' Estebanna'

⁵⁴ Na' cate' Esteban' gože' legaque' ca', beselocchgüe' gosagwxejte laye'.

⁵⁵ Perw na' Esteban' gwzoachgua Spiritw che Diosen' len le', bcos lagüen' gwne'e yabale na' ble'ede' chac to be'ni' gual gan' zoa Diosen' na' ble'ede' zecha Jesúsén' cuit Diosen' chnabi'e t xen len le'. ⁵⁶ Nach Estebanna' gwne':

—Le na'šc nla'xeje yaban' na' nla' Jesúsén' ben' golje' benach zeche' cuit Diosen' chnabi'e t xen len le'.

⁵⁷ Nach bene' ca' zjanžaguen' leca beseloque' na' bososya'adie' na' bososejw naggaque'na' na' to ši'ize ja'acsese' gan' ze Estebanna'. ⁵⁸ Nach

gosebeje' Estebanna' cho'a yež na' bosožie'ne' yej. Na' bene' ca' bosožie' le' yejen' bosonežjue' xagaque' da' zjandobe' to bene' xcuide' bene' le Saulo cont gapan'. ⁵⁹ Na' šlac chosožie' Estebanna' yej, Esteban' boļ güiže' Diosen', gwne':

—Xana' Jesús, bezi' neda' yaban'.

⁶⁰ Nach bzoa xibe' lo yon' na' gwne' zižje, gwne':

—Xana' bi gono' cuent xtola' bene' quinga dan' chesote' neda'.

Na' beyož gwne' ca', gote'.

8

Saulo bchi bsaque' bene' chesonxen Jesucriston'

¹⁻² Na' ca' nac Saulon', gwyazlaže' dan' gosote' da' Estebanna'.

Na' bene' ca' chesejnilaže' Jesucriston' ciuda Jerusalénna' jasecuša'e' da' Estebanna', na' gosebežhgüe' che'. Na' gwde gosote' da' Estebanna' gosezlagüe' bosochi bosoaque' bene' ca' chesodop chesežag chesonxene' Jesucriston' Jerusalénna', na' yogo' bene' ca' chesonxen Jesucriston' besyeyaslase', ja'aque' yež ca' zjachi' do distritw Judean', do distritw Samaria, perw gague len postlw ca'. ³ Na' Saulon' gwzologüe' cheje' liž to to bene' ca' chesonxen Jesucriston' chjaxebe' no bene' byo na' no no'ole cont chche'e' legaque' ližya.

Bene' ciuda Samaria gosende' diža' güen che Jesucriston'

⁴ Na' bene' ca' chesonxen Jesucriston' ben' besyeyaslase' ja'aque' doxen, jasedixjue'ede' xtiža' Jesucriston'. ⁵ Na' ben' le Felipe bžine' ciuda Samarian' na' be'e' diža' che Jesucriston'. ⁶ Na' cate' gosende' xtižen' na' besele'ede' yela' guac dan' bene' len legaque', bene' zan besedobe' bosozenague' che'. ⁷ Bebeje' da' xižüe' ca' zjayo'o zjanyaz yichjlaždao' bene' zan, na' cate' besyechojen chososya'adian. Na' zan bene' natzi' late' güeje cuerp chegaque' na' beyone' legaque', lecze beyone' no bene' nxinj ni'e. ⁸ Na' besyebchgüe' bene' ca' že' ciudan'.

⁹ Na' lo ciudan' zoa to bene' guaža' bene' le Simón. Da' zan da' bene' da' besyebane bene' Samarian' gwziye'e' legaque' gože'ne' naque' bene' zaque'.

¹⁰ Na' šlac bene' da' ca', yogo' bene' lo ciudan' bosozenague' che' tcho'a, no bene' gole' ca' lente no bi' xcuide' ca', gosene' che':

—Le bezan' nse'e' yela' guac xen che Diosen'.

¹¹ Zan iz bosozenague' che', le gwziye'e' legaque' len yela' guaža' che'na'.

¹² Perw cate' Felipen' gwdixjue'ede' diža' güen che Jesucriston' len legaque' na' bzejni'ide' legaque' che yela' chnabia' che Diosen', zane' gosejle'e' che' na' gosezoe' nis, bene' byo na' no'ole. ¹³ Na' lencze Simón gwyejle'e' che' na' gwzoe' nis na' gwzolaogüe' gwdalene' Felipen', na' bebande' ca' nac yela' guac ca' dan' chon Felipen' na' yezica'chle da' zaca' yebanecho.

¹⁴ Na' postlw ca' nite' ciuda Jerusalénna' gosende' bene' ca' že' ciuda Samaria ba chosozenague' xtiža' Diosen', nach gosesel'e' Pedroa' len Juanna' Samarian'. ¹⁵⁻¹⁶ Na' cate' besežine'na' bosol güiže' Diosen' gosenabde'ne' soa Spiritw chen' lo' yichjlaždao' bene' Samaria ca', le ca' hora' biņa' soan lo' lažda'ogaque' la'czla' ba gosezoe' nisen' dan' chesejnilaže' Xancho Jesúsen'. ¹⁷ Nach gosexo'a na' postlw ca' yichjgaque' cont gwzoa Spiriton' lo' yichjlažda'ogaquen'.

¹⁸ Na' ble'e' Simón can' cheson postlw ca' chesexo'a ne'e' yichj bene' cont chzoa Spiriton' len legaque', na' bšabde' legaque' mechw. ¹⁹ Gože' legaque':

—Le gon cont neda' gac xo'a na'a yichj note'teže' bene' na' soa Spiriton' len legaque' can' chon le'e.

²⁰ Nach Pedroa' gože'ne':

—Cuiayo'o len xmechon' dan' chono' xbab guac si'o len mechw da' chon Diosen'. ²¹ Bi zaco' gono' da' nga chonto', le yichjlažda'oguo' naquen mal lao Diosen'. ²² Da' cheyała' gono', betinje da' malen' chono' na' gwṇab goclen lao Diosen' cont yezi'xene' chio' ca nac xbaben' yo'o lo' yichjlažda'oguo'. ²³ Nachbia' da' mal dan' yo'o lo' yichjlažda'oguo'n' chnabi'an le' na' ngo'on le' nez malen'.

²⁴ Nach Simónna' boži'e xtižen' gože' le':

—Le nab goclen lao Xancho'n' cont ne to da' mal dan' baḥ gwnao' nga bi gac chia'.

²⁵ Na' Pedroa' len Juanna' cate' beyož goseyixjue'ede' xtiža' Diosen' lo' ciuda Samarian' na' beyož goso'e diža' can' ba goclen Xancho Jesucriston' legaque', nach jaya'aque' Jerusalenna'. Na' šlac zjaya'aque'na' goseyixjue'ede' xtiža' Xancho Jesucriston' len bene' ca' že' yezica'chle yež ca' gan' mbane distritw Samaria.

Felipe na' bene' Etiopía

²⁶ Nach Xancho Diosen' gwsele' to angl bene' gože' Felipe:

—Gwey gan' xoa nez dan' chetj Jerusalenna' na' chden latje dašen' chžinen yež dan' nzi' Gaza.

²⁷ Nach Felipe gwlo'e nezen', na' šlac zeje' ble'ede' to bene' nación Etiopía zeyo'e to lo' carret zeze'e gweyje' Jerusalenna' jenxene' Diosen'. Le' naque' to bene' blao na' ba none' le' capar cont gone' xšin no'ole gwnabia' che bene' Etiopía ca', šo'o lo' ne'e mechw che'. Na' no'ole gwnabian' le' Candace. ²⁸ Na' ben' yo'o lo' carreten' chlab'e libr dan' bzoj da' Isaiasen' ben' be' xtiža' Diosen' cani'. ²⁹ Nach Spiritw che Diosen' gožen Felipen':

—Jayxen carreten' na' gwejlene' txen.

³⁰ Nach gwza'ses Felipen' cont jayxene' carreten' na' cate' bžine' gała'ze bende' chlab ben' libr dan' bzoj da' Isaiasen'. Nach gože'ne':

—Čhejni'ido' dan' chlabo'na'?

³¹ Na' bene' Etiopían' boži'e xtižen' gože' Felipen':

—ČNacxe gac šejni'ida' da' ngan', le gague no nla' no gwzejni'ide' nedan'?

Nach gota'yoede' Felipen' cont gwyo'e lo' carreten' gwche'lene'ne'.

³² Na' gan' chlabe'na' nyojen žan:

Ca to xila' be nxob bene' cont gote'ba',
na' ca to xila' dao' be bi chosya'a cate' chšibe'ba',
can' bene', bibi gwne' caten' gosezi' gosebague'ne'.

³³ Na' gosone' le' ca to bene' bibi zaca'.

Na' bi gosone' yela' justis che' ca cheyała' gaquen.

Na' nono diaža che' nita', le goseque'e yela' mban che' lo yežlio nga.

³⁴ Nach bene' Etiopían' gože' Felipen':

—Benšca goclen gwna neda' no čhen' ža ben' bzoj Xtiža' Diosen' ca', čche cuinen' že' ca' o še che bene' yoble?

³⁵ Nach Felipen' gwzolağüe' bzejni'ide' bi zejen dan' chlab bene' Etiopían', gože' le' diža' güen che Jesúsen'. ³⁶ Na' ca' chac, besežine' ga žia nis, nach bena' gože' Felipen':

—Nga žia nis, čcbi gac soa' nisen' na'a?

³⁷ Nach Felipen' gože'ne':

—Še chejniłažo' Jesucriston' do yichj do lažo', guac so' nisen'.

Nach gwne':

—Chejli'a Jesucriston' naque' xi'in Diosen'.

³⁸ Nach bene' mandadw bcueze' carreten' na' betj Felipen' len bene' Etiopían' jasežo'e lo' nisen' cont Felipen' bzoe'ne' nis. ³⁹ Na' cate' besyechoje' lo' nisen', Spiritw che Diosen' la' beche'eten Felipen' ga yoble, na' bich ble'e bene' Etiopían' le'. Na' mbalaz beza' ben' beyo'e lo' carreten'. ⁴⁰ Nach Felipen' bžine' yež dan' nzi' Azoto na' gwzologüe' gwdixjue'ede' diža' güen che Jesucriston' to to yež da' zjachi' gal'a'ze ga gwdie' bžinte' Cesarean'.

9

Diosen' bocobe' yichjlaždao' Saulon' (Hch. 22:6-16; 26:12-18)

¹ Na' Saulon' con chdacze' cho'e diža' can' chaclaže' gote' bene' chesejnilaže' Xancho Jesucriston' na' chdacze' cheyljwlaže' nacle gone' gote' legaque'. Na' da'nan' Saulon' gwyeye' lao bžoz blao che bene' Israelen', ² na' gwñabde'ne' gwzoje' to yiš da' goxe' yosolab bene' že' to to yodao' nita' ciuda Damasco cont yesenezde' nape' yela' gwnabia' sene' bene' ca' ba chesejnilaže' Jesucriston' na' gwcheje' legaque' cont che'e legaque' ciuda Jerusalénna' la'czla' bene' byo o la' no'ole. ³ Cate' beyož bnežjue'ne' yišen' gwlo'e nez, na' ba zoa žine' ciuda Damascon' cate' zejenez to be'ni' da' za' yaban' gwyechjen le'. ⁴ Na' gwbiže' lo yon'. Na' bende' che' to bene' le':

—Saulo, žbixchen' chchi chsaco' neda'?

⁵ Na' Saulon' boži'e xtižen' gože' le':

—žNo le' bene'?

Nach bena' gože'ne':

—Nedan' Jesús ben' chchi chsaco'. Na' dan' chgue'edo' neda', chone zi' cuino' can' chac che to go'ñ be chlibe lo ya dan' zoa lo carroš cheba'.

⁶ Na' do chaž chžebze' gože' le':

—Xana' Jesús, žbin' chaclažo' gona'?

Nach Xanchon' gože'ne':

—Beyas na' gwyey ciuda Damascon' na' zoa to bene' ye'e le' da' cheyala' gono'.

⁷ Na' bene' ca' zja'aclen Saulon' benit bechol gosac lo' yichjlažda'ogaque'na' catec besežebe' dan' goquen', le gosende' ši'i bene' perw nono besele'ede'.

⁸ Nach beyas Saulon', perw cate' beža' lagüen' con bich ble'ede'. Nach bene' ca' nžague'na' gosoxe' ne'e gosęche'ene' Damascon'. ⁹ Na' šone ža gwzoe' sin cbi ble'ede' na' bi gü'e'ej gwdagüe'.

¹⁰ Na' zoa to bene' chejnilaže' Xancho Jesucriston' Damascon' bene' le Ananías, na' Ananíasen' ble'edagüede' Xanchon'. Na' Xanchon' gože'ne':

—Ananías.

Na' boži'e xtižen' gwne':

—Nga zoa', Xana'.

¹¹ Nach Xanchon' gože'ne':

—Gwzoža' na' gwyey liž Judas dan' zoa cay dan' chesene' Nez Licha, na' nabo' to bene' le Saulo, to bene' ciuda Tarso. Ba chol güiže' neda'. ¹² Na' ba bena' cont ble'edagüede' le' gwyo'o gan' zoe'na' na' gwxo'a nao' yejlagüe'na' cont yele'ede'.

¹³ Nach Anaiásen' boži'e xtižen' gože' le':

—Xana', ba benda' bene' zan cheso'e xtiža' bena', ca nac da' mal juisyw ba bene' Jerusalén len bene' ca' ba gwlejo' cont zjanaque' lo nao'. ¹⁴ Na' chesene' ze'e nga noxe' yiš che bžoz gwnabia' ca' cont sene' yogo'lol'neto' chejnilaže'to' le'.

15 Nach Xancho Jesucriston' gože' Ananíasen':

—Gwyej, le ba gwleja' Saulon' cont šjazejni'ide' xtiža' len bene' cbi zjanac bene' Israel na' len rey chegaque' ca', na' lente le'e nacle bene' Israel. 16 Na' gwlo'eda'ne' ca' nac da' yaše' da' zi' da' gac che' dan' gwzenague' chia'.

17 Nach Ananíasen' gwyeje' gan' zoa Saulon' na' gwyo'e lo' yo'ona' na' gwxo'a ne'e yejlao Saulon', gože'ne':

—Bene' migw Saulo, Xancho Jesús'en' ben' blo'elagüe' le' tnez gan' za'ona' ba gwsele' neda' zedena'a le' cont yele'edo' na' soa Spiritw che Diosen' len le'.

18 Nach la' besyeyinje da' ca' že' lo' yejlagüen', zjanaquen ca' yid bdi'ej, na' la' bele'etede'. Nach gwzože'e cont gwyeje' gan' gwzoe' nisen'. 19 Ca beyoža' gwdagüe' na' beyaclaže'. Na' bega'ane' Damascon' yeto chop ža len bene' ca' chesejnilaže' Xanchon'.

Saulon' be'e xtiža' Diosen' Damascon'

20 Na' la' gwzolaote gwyeje' to to yodao' be'e diža' che Jesús'en', gwne' len' naque' Xi'in Diosen'. 21 Na' yogog' bene' ca' chesende' xtiže' dan' cho'ena' besyebande' na' chese' lježe':

—¿Gague bengan' chda chonit cholane' bene' ca' chesejnilaže' Jesús'en' ciuda Jerusalénna'? na' ¿gague da' na'czen' bide' nga na'a cont gwcheje' bene' ca' na' šjasane' legaque' lao bxo'z gwnabia' ca'?

22 Na' Saulon' tža tža Diosen' goclene'ne' cont be'e diža' che Jesús'en' tcho'a, gwne' Jesús'en' naque' ben' gwseła' Diosen' cont nabi'e. Na' bene' Israel ca' že' Damascon' bi beseželde' bin' yesene', le gosache'ede' dan' che'e legaque' naquen da' li.

Saulon' bi goque' lo na' bene' ca' chesegue'ede' le'

23 Na' cate' ba goc šša choe'len Saulon' bene' Damasco ca' xtiža' Jesucriston' nach bosoxi'a bene' Israel ca' yesote'ne'. 24 Na' gosenite' chesape' to to cho'a puert che ze'ena' dan' nyečhj ciudan' cont yesezene' Saulon' yesote'ne' bate'teze choje', perw na' Saulon' gocbe'ede' ba zjachi'na'ogüe'ne'. 25 Na' bene' ca' chesejnilaže' Jesucriston' besyeletje'ne' le'e ze'e dan' nyečhj ciudan' šže'le besyegüe'ene' to lo' žome cont goc bechoje' lo' ciudan'.

Gwyej Saulon' Jerusalénna'

26 Nach beze'e beyeje' Jerusalén. Na' cate' bežin Saulon' ciuda Jerusalénna' goclaže' gone' txen bene' ca' chesejnilaže' Jesucriston', perw yogolole' be-sežebe' le', bi gosejle'e še da' li ba chejnilaže' Jesucriston'. 27 Nach Bernabé gwche'e Saulon' ja'aque' gan' že' postlw ca' na' be'lene' legaque' diža' can' goc ble'e Saulon' Xancho Jesús'en' šlac ngüe'e nez zeje' Damascon' na' can' goc Xanchon' be'lene' Saulon' diža'. Na' lecze gož Bernabén' legaque' Saulon' ba be'e xtiža' Jesús'en' Damascon' sin cbi bžebe'. 28 Nach postlw ca' gosejle'e can' goc che Saulon', na' gwzolao gwdalen Saulon' bene' ca' chesejnilaže' Jesucriston' Jerusalénna'. 29 Na' sin cbi bi chaž chžebe' gwzolagüe' chzejni'ide' bene' Israel ca' diža' che Xancho Jesús'en', con bene' chesac diža' griego. Bene' byen bzejni'ide' legaque' xtiža' Diosen', perw na' legaque' gosaclaže' yesote'ne'.

30 Na' cate' bene' ca' chesejnilaže' Jesucriston' Jerusalénna' gosache'ede' ba zjachi'na'ogüe' yesote'ne', nach goseče'ene' ja'aque' ciuda Cesarea na' besyesele'ne' ciuda Tarso.

31 Na' bene' ca' chesedop chesežague' chesonxene' Jesucriston' doxen distritw Judean', distritw Galilean' na' distritw Samaritan' gosenite' binlo, noch no bosochi bososaca' legaque', na' gosenita'čhače' gosejnilaže' Xancho

Jesúsen' na' bosozenague' che' do yichj do laže'gaque'. Na' Spiritw che Diosen' benen cont gosacchach laže'gaque' na' benen cont gwyane'.

Beyac ben' le Eneas

³² Ca nac Pedroa' cheje' to to yež gan' že' bene' ca' ba gwlej Diosen' cont zjanaque' lo ne'e chjane'e legaque'. Na' to ža gwyeye' jane'e bene' ca' že' yež dan' nzi' Lida. ³³ Na' yež Lidan' jati'e to bene' le' Eneas. Ba chac xono' iz de' che'ede', natzi' late' cuerp che'na'. ³⁴ Nach gož Pedroa' le':

—Eneas, Jesucriston' cheyone' le'. Gwyas na' btob xcamo'na'.

Nach la' gwyaste bena'. ³⁵ Na' yogo'lol bene' že' Lidan' na' bene' že' yež dan' nzi' Sarón besele'ede' bena' ba beyacde' na' gosebejyichje' costumbr chegaque' cont gosejnilaže' Xancho Jesucriston'.

Dorcas bebane' ladjo bene' guat ca'

³⁶ Na' ca tiemp na', to ciuda dan' nzi' Jope zoa to no'ole le' Tabita, na' diža' griego le' Dorcas. Na' chejnilaže' Jesucriston' na' zoe' chone' da' güen na' chaclene' no bene' yaše' bene' chyažj chchine'. ³⁷ Perw na' gocšene Dorcasen' na' gottechgüe', na' bosoguzje'ne' na' gosexoe'ne' to lo' cuart da' zoa yichj yo'o cha'te'. ³⁸ Na' gala'ze chega'an yež Lidan' len Jopen', na' bene' ca' chesonxen Jesucriston' Jopen' gosenezde' Pedroa' zoe' Lidan'. Nach gosesele' chope bene' jasata'yoede' Pedroa' gose'ene':

—Benšca goclen yo'o len neto' netec na'a.

³⁹ Na' Pedroa' la' gwza'te' gwyeye' len bene' ca'. Na' cate' besežine' Jopen', goseche'ene' lo' yo'o gan' xoa bene' guaten', na' la' gosebiga'te' yogo' no'ol güezebe lagüe'na' chesebeže' chosolo'ede' le' lache' dan' ben da' Dorcasen' šlac gwbane', no vestidw na' no camis. ⁴⁰ Nach Pedroa' bešaše' yogo'lol bene' ca' chy'ole na' bzoa xibe' bol güiže' Diosen'. Na' beyechje' chne'e cuerp che no'olen', na' gože'ne':

—Tabita, gwyas.

Nach la' beža'te' yejiao da' Dorcasen' gwne'e Pedroa' na' la' bebe'te'. ⁴¹ Nach Pedroa' bežue' ne'ena' bsože'e le', nach goxe' no'ole güezeb ca' na' yezica'chle bene' ca' zjanaque' lo' na' Diosen' na' blo'ede' legaque' ba beban Dorcasen'. ⁴² Na' yogo'lol bene' Jopen' gosende' can' goquen', na' bene' zanch gosejnilaže' Xancho Jesucriston'. ⁴³ Na' Pedroa' bega'ane' Jopen' zan ža, gwzoe' liž to bene' le' Simón, bene' chonšagüe' yid.

10

Pedroa' na' Cornelio

¹ Na' ciuda Cesareana' zoa to bene' le' Cornelio, naque' xan to gayoa soldadw, na' bosozoa la soldadw che' ca' Bene' Italia. ² La'czla' Cornelion' chi naque' bene' Israel, benxene' Diosen', na' lecze' ca' goson bene' lo' yo'o che', chesezoe' chesape' Diosen' bala'an. Na' Cornelion' chaclenteze' bene' Israel bene' chyažj chchine', na' zoateze' choł güiže' Diosen'. ³ Na' goc che', to ža do cheda šone' ble'dagüede' to angl bene' gwse'la' Diosen' gwyo'e gan' zoe'na', na' anglen' gože'ne':

—Cornelio.

⁴ Nach Cornelion' chna'chgüe' lao anglen' na' do chžebe' gože'ne':

—¿Bixen' Xana'?

Nach gož anglen' le':

—Diosen' nezde' can' zo' choł güižo'ne' na' chnežjo' dan' cheseyaže' bene' yaše', na' Diosen' chaclaže' gaclene' le'. ⁵ Da' nga gono' na'a, gwse'la' bene'

šjasexi'e to bene' zoa ciuda Jopen' bene' le Simón na' ľecze le' Pedro. ⁶ Zoe' liž to bene' chonšagüe' yid. Bena' ľecze le' Simón, na' liž ben' zoan cho'a nisdao'. Na' Simón Pedroa' ye'e le' bin' cheyała' gonó'.

⁷ Cate' beza' anglen' Cornelion' goxe' chope mos che' na' to soldadw bene' chaclen le', na' soldadoa' ľecze chonxene' Diosen'. ⁸ Na' Cornelion' bzejni'ide' ľegaque' yogo'ľolte can' goquen' nach gwseľe' ľegaque' Jopen'. Na' gosegüe'e nez zja'aque'.

⁹ Na' beteyo gała'ze ba zja'aque' za' yesežine' ciuda Jopen' cate' Pedroa' gwloe' yichjo'o che yo'o gan' zoe'na' ca do guagwbiz cont jel güiže' Diosen'. ¹⁰⁻¹¹ Na' šlac choe'lene' Diosen' diža' gwdonchgüe', con goclaže' gagüe' cate. Na' šlac chac dan' gagüe'na', ble'edagüede' le'e yaban' chetj to lache' xen na' nchej tap squinen na' chetjen gan' zoe'na'. ¹² Na' ľo'enna' zjaže' yogo' cuen beyixe' že' yežlion', be žia tap ni'a na', na' be chososa' že'eban' ľo yo, na' len be žia xil be chaš le'e yaba. ¹³ Nach bende' gož Diosen' le':

—Gwyas Pedro na' betw be ca' gwdagw.

¹⁴ Nach Pedroa' gože'ne':

—Bi gagua' ľegacba' Xana'. Ne tni'a biña' gagua' be zban zjanac ca', le cbi de ľsen len ley cheto'na' gagwto' ben' zjanac ca'.

¹⁵ Nach Diosen' gože' le' da' gwchope:

—Ben' bač gnwia' gago' bi nao' be zban zjanacba'.

¹⁶ Da' gwyon ni'a gož Diosen' le' ca' nach ľa' begüete lachen' le'e yaban'. ¹⁷ Šlac chacžejlaže' Pedroa' bi zejen dan' ble'edagüeden', besežin bene' ca' gwseľa' Cornelion' cho'a puert liž Simón ben' chonšagüe' yiden', le ba gosenabe' gan' zoa liže'na'. ¹⁸ Nach zižje gosenabe' še le na' zoa to bene' ľecze le Simón Pedro. ¹⁹ Na' Pedroa' ne' chone' xbab che dan' ble'edagüede', cate' gož Spiritw che Diosen' le':

—Simón, šone bene' cheseyiljue' le'. ²⁰ Gwzoža' na' beyetj cont šejleno' ľegaque', na' bi gacžejlažo' ľa'czľa' bi zjanaque' bene' Israel, le neda' gwseľa' ľegaque'.

²¹ Nach Pedroa' beyetje' jašague' bene' ca' gwseľa' Cornelion', nach gože' ľegaque':

—Nga zoa', nedan' Simón Pedro. ¿Bičhen' cheyiljwle neda'?

²² Nach gose' bene' ca' le':

—To xan soldadw bene' le' Cornelio gwseľe' neto'. Le' zejzce' chone' da' güen na' chonxene' Diosen' na' yogo'ľol bene' Israel ca' cheso'e xtiže' ca' bene' šagüe' naque'. To angl che Diosen' gože' le' yedenabe' šejo' liže'na' cont gwzenague' chio' še bin' yo'one'.

²³ Nach gwlo'o Pedroa' ľegaque' yo'o na' besyega'anlene' le' tže'. Nach beteyo Pedroa' gwyase' gwyejlene' ľegaque' na' gwche'e to chope bene' Jopen' bene' chesejnilaže' Jesuriston'.

²⁴ Na' beteyo cate' besežine' ciuda Cesarean', Cornelion' bač ntobe' biše' ľježe' len xmigüe' ba zjažie' liže'na' chesebeze' le'. ²⁵ Na' cate' bžin Pedroa' liž Cornelion' ľa' bchojte Cornelion' bšague'ne' na' bzoa xibe' lagüe'na' benxene'ne'. ²⁶ Na' Pedroa' bsože'e le', gože'ne':

—Bezoža'. Ľecze benač neda'.

²⁷ Na' ne' choe'lente' le' dižan' ca' cate' gwyo'o Pedroa' ľo' yo'on na' ble'ede' bene' zan ba že' ľo yo'ona'. ²⁸ Nach gože' ľegaque':

—Neczeze ley che neto' bene' Israel žan bi cheyała' šo'to' liž bene' bi zjanaque' bene' Israel, na' žan bi cheyała' gonto' txen len le'e bi nacle bene'

Israel. Perw baçh bzejni'i Diosen' neda' ñe to bene' chi cheyała' gona' xbab che' naque' bene' zban par šo'a liže'na'. ²⁹ Da'n'an' cate' bene' quinga bedesexi'e neda', bi gocčejlaža' še nacle gona', san ba bida' do yichj do laža', na' na'a chaclaža' nezda' ¿bixchen' gwnio' neda'?

³⁰ Nach Cornelion' gože'ne':

—Na'a chac tap ža do cheda šone zoa' sin chibi nagua', na' choł güiža' Diosen' liža' nga, cate' cze ble'eda' to bene' byo lagua'na' nyaze' to lache' da' chgo'oten be'ni'. ³¹ Nach gože' neda': “Cornelio, ca nac da' gwnabdo' Diosen', baçh bzenague' çhen, na' nezde' chnežjo' da' chyažj da' chçhine' bene' yaše'. ³² Na' na'a gwsela' to çhope bene' šjasexi'e to bene' zoa ciuda Jopen' bene' le Simón Pedro. Zoe' liž to bene' lecze le Simón, to bene' chonšagüe' yid. Liž ben' chonšagüe' yiden' zoan gala'ze cho'a nisdao'. Na' cate' la' Pedroa' ližo' nga nach güe'lene' le' diža'.” ³³ Nach la' gwsela'tia' bene' ca' bedesexi'e le', na' choçlenteco' baçh bido'. Na' nezcze Diosen' yogo'to' nita'to' nga gwzenagto' yogo'lołte dan' ba ben Diosen' mandadw nao'.

Pedroa' be'e diža' liž Cornelion'

³⁴ Nach Pedroa' gwzolağüe' be'e dižan' gwne':

—Da' li baçh nezda' nono nła' bene' nacho nzoa Diosen' le' to šła'aze. ³⁵ Gate'teze bene' nación con bene' chesonxen Diosen' do yichj do laže' na' chesone' da' güen, Diosen' chbede' legaque'. ³⁶ Diosen' gwdixjue'ede' neto' bene' Israel guac soato' binlo len le' še šejnilaže'to' Xi'ine' Jesucriston' bene' naque' Xan yogo'loł bene'. ³⁷ Nezele dan' ba goc doxen distritw Judean' dan' gwzolağo distritw Galilean' gwde gwdixjue'e da' Juanna' xtiža' Diosen' na' bzoe' bene' nis. ³⁸ Nezele Diosen' gwleje' Jesúsen' ben' naque' bene' yež Nazaret cont chaclene' chio' beñaçh, na' be'ene' Spiritw çhe'na' na' yela' chnabia'. Na' gwda Jesúsen' bene' da' güen na' beyone' yogo'loł bene' ca' chsaca'zi' Satanás dan' chnabia' da' xigüe' ca', le Diosen' zoe' len le'. ³⁹ Neto' nezeto' na' choe'to' diža' che yogo' da' güen da' ben Jesúsen' na' dan' bsed blo'ede' distritw Judean' na' ciuda Jerusalénna'. Na' choe'to' diža' can' gosote'ne' bosode'ene' to le'e yag cruz. ⁴⁰ Perw na' Diosen' beçhis bosbane'ne' ladjo bene' guat ca' beyon ža na' ben Diosen' cont Jesúsen' blo'elagüe' neto'. ⁴¹ Gague yogo'loł bene' besele'ede' Jesúsen' caten' bebane' ladjo bene' guat ca', perw Diosen' gwleje' neto' cont choe'to' xtiže'na' na' bene' cont ble'eto'ne'. Na' neto' güe'ej gwdagwlento'ne' txen gwde bebane' ladjo bene' guat ca'. ⁴² Jesúsen' bene' mandadw chixjue'eto' beñaçhen' Diosen' bzoe' le' gone' yela' justisen' len yogo' bene' zjamban na' len yogo' bene' ba gosat. ⁴³ Na' da' ca' bosozoj yogo' bene' goso'e xtiža' Diosen' cani'te zjanyojen chesenan note'tez bene' yesejnilaže' Jesucriston', Diosen' yezi'xene' xtoł'a'gague'na'.

Spiritw çhe Diosen' gwyo'on lo' yichjlaždao' bal'bene' bi zjanaque' bene' Israel

⁴⁴ Ne' cho'ete Pedroa' diža'na' cate' Spiritw çhe Diosen' gwyo'on lo' yichjlaždao' yogo' bene' ca' chosozenag diža' dan' cho'ena'. ⁴⁵ Na' bene' Israel ben' chesejnilaže' Jesucriston', bene' ca' zja'ac len Pedroa' liž Cornelion', besyebande' dan' gwyo'on Spiritw çhe Diosen' lo' yichjlaždao' bene' ca' chi zjanaque' bene' Israel. ⁴⁶ Gosache'ede' gwyo'on Spiritw çhe Diosen' lo' yichjlaždao' bene' ca' že' liž Cornelion', le gosende' gosonxen bene' ca' Diosen' goso'e diža' da' bi gosejni'ide' na' lecze gosonxene' Diosen' len xtiža'gague'na'. ⁴⁷ Nach Pedroa' gože' bene' Israel ca' nžaguen':

—Bibi de da' gwžon yesezoa bene' quinga nisen', le nachbia' ba zoa Spiritw che Diosen' len legaque' can' zoan len chio'.

⁴⁸ Nach Pedroa' bene' mandadw gosezo'e' nis da' chesejnilaže' Jesucriston'. Na' gosata'yoede' le' cont bega'ane' yeto čhop ža.

11

Pedroa' gože' bene' Jerusalén ca' can' goquen'

¹ Na' postlw ca' na' yezica'chle bene' ca' že' distritw Judean' ben' chesejnilaže' Jesucriston' gosende' xtiža' bene' ca' bi zjanaque' bene' Israel lecze ba chosozenague' xtiža' Diosen'. ² Nach Pedroa' beze'e gwyejche' ciuda Jerusalénna' gan' nita' bene' Israel ben' chesejnilaže' Jesucriston' na' legaque' gosene'lagüe' che', ³ gose'ene':

—¿Bixchen' ba gwyejo' gan' že' bene' cbi zjanaque' bene' Israel na' jatagwleno' legaque'? Malen' ba beno'.

⁴ Nach Pedroa' gwzologüe' be'lene' legaque' diža' tcho'a yogo' dan' goc che', gože' legaque':

⁵ —Šlac zoa' ciuda Jopen' chol güiža' Diosen', ble'edagüeda' ca to lache' xen nchej dapte squin ca' chetjen le'e yaban' zan' gan' zoa'na'. ⁶ Na' gwña'yana' na' ble'eda' lo'enna' že' beyixe' ca' chaš yežlion' be žia tap ni'a na', na' ble'eda' be chososa' le'eban' lo'yo, na' be žia xil be chaš le'e yaba, na' bal be ca' zjanacba' be znia. ⁷ Na' benda' gož Diosen' neda': "Gwyas Pedro, na' betw be ca' gwdagw." ⁸ Nach boži'an gwnia': "Xana', bi gagua' legacba'. Ne tni'aze biña' gagua' be zban zjanac ca', le bi de lsens len ley cheto'na' gagwto' ben' zjanac ca'." ⁹ Na' da' gwčhop ni'a Diosen' gwne': "Be bač gwnia' gago' bi nao' zjanacba' be zban." ¹⁰ Šon ni'a gože' neda' ca' nach begüe lachen' le'e yaban'. ¹¹ Za' beyož ble'edagüeda' da'na' cate' besela'ac šone bene' byo gan' zoa'na' bene' za'ac ciuda Cesarean' chesyeyiljue'nda'. ¹² Na' Spiritw che Diosen' bzejni'in neda' cheyała' ša'alena' legaque' sin cbi gacžejaža', na' gwchi'a bene' lježcho quinga xop, gwyejto' Cesarean' bžinto' liž ben' le Cornelio na' gwyo'oto' ližen'. ¹³ Nach Cornelion' be'lene' neto' diža' can' blo'elao to angl le' liže'na' na' anglen' gože'ne': "Gwsela' bene' šja'ac ciuda Jopen' šjasexi'e to bene' le Simón Pedro. ¹⁴ Bena' ye'e le' len bene' lo' yo'o chio' nac gonle cont gata' yela' mban chele toli tocañe." ¹⁵ Nach cate' gwzologua' bia' dižan' len bene' ca' že' liž Cornelion', Spiritw che Diosen' gwyo'on lo' yichjlažda'ogaque'na' can' gwyo'on lo' lažda'ochon' cana'. ¹⁶ Nach jaysa'laža' xtiža' Xancho Jesucriston' can' gwne': "Da' zaque' ben Juan da' bzoe' bene' nis, perw da' zaca'che' gac chele cate' yedesoa Spiritw che Diosen' lo' yichjlažda'olen' nabi'an le'e." ¹⁷ Na' ba ben Diosen' cont zoa Spiritw che'na' lo' yichjlažda'ogaquen' dan' gosejnilaže' Xancho Jesucriston' can' ba bene' len chio' chejnilaže'chone', na' čnox naca' neda' gwžona' gon Diosen' dan' chaclaže' gone'?"

¹⁸ Na' ca beyož bosozenague' xtiža' Pedroa' bich bi gosene' che Pedroa' dan' gwyeje' liž Cornelion', san gosoe' yela' choxlen che Diosen', gosene':

—Na'a ba nezecho lecze len bene' ca' bi zjanaque' bene' Israel chazlaže' Diosen' yesyetinjde' xtola'gaque'na' cont gwnežjue' yela' mban čhegaque' toli tocañ.

Bene' ca' chesonxen Jesucriston' ciuda Antioquía gan' mbane Siria

¹⁹ Na' gwde gosot bene' Israel ca' Estebanna', gosezologüe' bosochi bososaca'chgüe' yezica'chle bene' ca' chesejnilaže' Jesucriston', nach bene'

ca' chesejnilaže'ne' gosaslase'. Baļe' ja'aque' do distritw Fenicia, na' yež ca' zjachi' to lo yežlio da' žia lo' nisaon' gan' nzi' Chipre na' do ciuda Antioquia ga mbane distritw Siria. Na' gan' zja'aquen' bososed bosolo'ede' con bene' zjanac bene' Israel xtiža' Jesúsen', bi bososed bosolo'eden' bene' cbi zjanaque' bene' Israel. ²⁰ Perw na' to čhope bene' Chipre na' bene' ciuda Cirene lecze bosoxnje' ja'aque' ciuda Antioquían', na' gosezolagüe' goseyixjue'ede' diža' güen che Xancho Jesucriston' len bene' ca' cbi zjanaque' bene' Israel. ²¹ Na' Xancho' goclene' legaque' len yela' guac che'na' na' bene' zan gosebejyichje' da' ca' chesejnilaže' na' gosejnilaže' Xancho'.

²² Na' cate' bene' ca' chesejnilaže' Jesucriston' ciuda Jerusalénna' gosende' can' ba chac ciuda Antioquían', nach bosose'e Bernabén' cont gweyje' Antioquían'. ²³ Na' cate' bžin Bernabén' Antioquían', ble'ede' da' li ba goclenchgua Diosen' bene' ca', na' bebechgüede'. Nach gwñeyoede' legaque' nita'čhache' yosozenague' che Xancho' do yichj do laže'. ²⁴ Bernabén' naque' to bene' güen, na' chejnilaže'chgüe' Jesucriston' na' Spiritw che Diosen' zoachguan len le'. Na' zanch bene' Antioquían' gosejnilaže' Jesucriston'.

²⁵ Gwde na' Bernabén' gwze'e zeje' ciuda Tarson' jaydiljue' Saulon', nach cate' beželde' le', gwčhe'ene' Antioquían'. ²⁶ Na' gosenite' Antioquían' tgüiz gosone' txen len bene' Antioquia ca' chesedop chesežag chesonxene' Jesucriston' na' bososed bosolo'ede' bene' zan. Na' Antioquia na'tequen' gwzolao bososi'e bene' ca' chesejnilaže' Jesucriston' bene' cristian da' chosozenague' che Criston'.

²⁷ Šlac nita' Bernabén' na' Saulon' lo ciuda Antioquían', besežin baļ bene' Jerusalén ben' chosozende' bene' bi dan' ba gož Diosen' legaque'. ²⁸ Na' cate' bene' ca' besežinna', toe' bene' le Agabo gwzeche' lao bene' ca' zjandop zjanžag chesonxen Jesucriston' be'e diža' can' ba bzejni'i Spiritw che Diosen' le', gwne' doxen yežlion' gata' to gwbin juisyw. Na' cate' bžin ža gwnabia' ben' le Claudio doxen gan' mbane nación Roman', cana' goc gwbinna' can' gwna Agabon'. ²⁹ Nach bene' ca' chesedop chesežag chesonxene' Jesucriston' Antioquían' bosoxi'e yosotobe' mechw cont yeseseļen' yesaclene' bene' lježgaquen' chesonxen Jesucriston' gan' mbane distritw Judean'. Na' bosoxi'e to toe' yosonežjue' gaca'te' da' gac yosonežjue'. ³⁰ Na' gosone' can' bosoxi'ena' nach goseseļe' Saulon' len Bernabén' distritw Judean' jasenežjue' mechon' bene' ca' chosogüia chesene'e bene' chesejnilaže' Jesucriston' ciuda Jerusalénna'.

12

Gosote' Jacobon' na' goseyixjue' Pedroa' ližya

¹ Na' ca tiempa' rey Herodes bchi bsaque' baļ bene' ca' chesonxene' Jesucriston'. ² Nach bene' mandadw gosote' Jacobo bene' biše' Juanna' len spada. ³ Na' gocbe'e rey Herodesen' chesyebe bene' Israel ca' dan' bene' mandadw gosote' Jacobon', nach bene' mandadw gosezene' Pedroa' cate' gola' lni cate' chesagüe' yetextil dan' bibi levadura nchixen. ⁴ Nach Herodesen' gwđixjue'ene' ližya na' gwseļe' šino'to soldadw bene' gosape' ližyan', tap güeje' do ža do yel. Herodesen' bene' xbab cueje'ne' ližyan' te lñin' cont gone' yela' justis che' lao bene' že' lo ciudan'. ⁵ Soldadw ca' gosapchgüe' Pedroa' šlac de' ližyan', perw na' ca nac bene' ca' chesejnilaže' Jesucriston', gosenabchgüede' Diosen' gaclene' Pedroa'.

Diosen' bebeje' Pedroa' ližyan'

⁶ Na' to že' ca gwexze ngüia Herodesen' cueje' Pedroa' ližyan' cont gone' yela' justis che', Pedroa' de' chtase' ladjo chope soldadw na' ncheje' chope gden, na' lecze nita'te soldadw bene' chesape' cho'a puert ližyan'. ⁷ Cate'cze zejzenez to angl bene' gwsela' Xancho Diosen' bžine' lo' ližyan' gan' de Pedroa' na' gwyeni' chgua lo' ližyan'. Anglen' bte' cuit le'e Pedroa' bosbane'ne', gože'ne':
—Netec na'a gwyas.

Na' la' besyeyžte gdenna' zjanchej na' Pedroa'. ⁸ Nach gož anglen' le':
—Bego'o xpanto' na' bolej xelon'.

Nach ben Pedroa' ca'. Nach gož anglen' le':
—Bechele xadon chio' na' beyo'o len neda'.

⁹ Nach bechoj Pedroa' zena'ogüe'ne' perw bi goebe'ede' še da' li anglen' chon ca' len le', con gocde' še chle'edagüede'. ¹⁰ Beyož besyedie' chop cuen gan' nita' soldadw ca' chesape' ližyan', besyěžine' gan' zoa puert zaguanna' dan' nac de ya gan' chesechoje' cont chja'aque' la cay, con to gualazze puerten' byaljon cont besyechoje', na' cate' ba gosa'aque' late' nach anglen' boca'ane' Pedroa' toze'. ¹¹ Cana'ch goebe'e Pedroa' da' li ba bechoje' ližyan', nach gwne':

—Ba cheyache'eda' da' licze Xana' Diosen' ba gwsele' angl che'na' na' bosle' neda' lo' na' Herodesen' na' bosle' neda' lo' yogo' da' ca' chesaque bene' Israel gualaž chia' ca' yesonde' neda'.

¹² Na' ne' chonte Pedroa' xbaden' ca', gwze'e gwyeye' liž María xna' Juan ben' lecze le Marcos. Na' liž Marían' zjandop zjanžag bene' zan chosol güiže' Diosen'. ¹³ Nach bsiže' cho'a puert zaguanna' na' la' bchojte to bi' no'ole le Rode ja'na'be' non'. ¹⁴ Na' cate' bžimbe' cho'a puerten' beyombia'be' ši'i Pedroa', na' tantw bebebe' bi gwsaljwbe' puerten' san beyeysesbe' gan' že' bene' ca' jayežbe' legaque' ba bla' Pedroa'. ¹⁵ Nach gose'ebe':

—¿Gague chactonto'na'?

Perw lebe' nezcebe' le'na'. Nach legaque' gose'ebe' naquen bxin che'.

¹⁶ Perw Pedroa' ne' chsižcze' cho'a puerten'. Nach ja'aque' gosaljue'. Cate'cze besele'ede' le'na' besyebande'. ¹⁷ Nach Pedroa' bene' señw len ne'e cont gosenite' šize bosozenague' be'e diža' can' goc bebej Xancho Diosen' le' ližyan'. Nach lecze gože' legaque' cheyala' yosozende' Jacobon' na' yezica'chle bene' lježgaque' can' ba goquen'. Nach beze'e zjayde' ga yoble.

¹⁸ Nach cate' gwyeni', yela' güeban juisyw gwnita' soldadw ca' na' goso'e diža', gosene':

—¿Bixen' goc len Pedroa'?

¹⁹ Nach rey Herodesen' bene' mandadw jasyediljue' Pedroa' na' gwñabde' soldadw gop ca' nac goquen' bele'. Perw soldadw ca' bibi rson bosonežjue'. Nach bene' mandadw gosote' soldadw ca'. Nach gwza' Herodesen' distritw Judean' jazoe' ciuda Cesarea.

Got rey Herodesen'

²⁰ Ca horan' Herodesen' chža'achgüe' bene' ciuda Tiro na' bene' ciuda Sidón ca'. Perw na' bene' ca' besyěžjde' yesezi'e da' yese'ej yesagüe' gan' chnabia' rey Herodesen'. Da'na'na' bosocode' ljež bene' Tiro na' bene' Sidón ca' cont jasenezjue' mechw che ben' nac lo' ne'e gan' mbane Herodes, ben' le' Blasto. Gosone' ca' cont Blaston' gwñe' čhegaque' lao reyen', le gosaclaže' gwzenag reyen' čhegaque' cate' šja'aque' lağüe'na' šjasenabe' yesenite' binlo len le'. ²¹ Nach rey Herodesen' bžie' bia' to ža gwtobe' legaque' cont güe'e diža' laogaque'na'. Na' cate' bžin žan', reyen' gwyaz xalane' dan' nac xdan dan'

chaze' cate' chone' yela' justis, nach gwchi'e xišne'e gan' chnabi'e na' be'e diža' lao bene' ca' že' žana'. ²² Nach bene' ca' bososye'e, gosene':

—Diosen' choe' diža', gague benačen'.

²³ Na' lo hora' gwsela' Xancho Diosen' to angl ben' ben cont gočšene reyen' gwže'e bzoga' lo' le'e na' gote'. Goc che' ca' dan' be'e latje gosonxen bene' le' gualaz da' yesonxene' Diosen'.

²⁴ Perw ca nac xtiža' Xancho Jesucriston' gos gwlaļjchguan.

²⁵ Na' Bernabén' len Saulon' beyož gosone' yogo' da' cheyala' yesone' ciuda Jerusalénna', nach besyeya'aque' jaya'aque' ciuda Antioquían'. Na' goseče'e to bene' le' Juan na' ľecze lie' Marcos.

13

Bernabén' na' Saulon' ja'aque' jasedixjue'ede' xtiža' Jesucriston' yež zito'

¹ Na' len bene' ca' chesedop chesežag chesonxene' Jesucriston' ciuda Antioquían' zjančixe bene' cheseyixjue'ede' bene' yoble bi da' che' Diosen' ľegaque', na' zjalen bene' chososed chosolo'ede' xtiža' Diosen'. Na' ľegaque' zjalie' Bernabé, na' Simón ben' zjansi'e bene' gasj, na' Lucio bene' ciuda Cirene, na' Saulo, na' Manaén. Na' Manaénna' bgole' txen len rey Herodes ben' gwnabia' distritw Galilea. ² Na' to ža bene' ca' chesejnilaže' Jesucriston' gosone' gwbas zjandop zjanžague' chesonxene'ne' cate'cze gož Spiritw che Diosen' ľegaque':

—Le cuej Bernabén' len Saulon' cont yesone' xšina' con gate'teze sela' ľegaque'. ³ Nach bene' ca' bosol güižche' Diosen' sin cbi zjane'ej zjanagüe', nach gosexoa na'gaque' yichj Saulon' len yichj Bernabén', gosone' ca' cont gosegüe'e xšin Diosen' lo' na'gaque'. Gwdena' bosose'e ľegaque'.

Postlw ca' goso'e xtiža' Jesucriston' Chipre

⁴ Nach Spiritw che Diosen' gwselan' Bernabén' len Saulon' yež gan' nzi' Seleucia. Na' Seleuciana' goso'e lo' barcon' cont besežine' Chipre. Na' Chipren' naquen to yežlio dao' dan' chi' lo' nisaon'. ⁵ Besežine' yež dan' nzi' Salamina gan' mbane Chipren' na' gosezolagüe' goseyixjue'ede' xtiža' Diosen' lo' yodao' che bene' Israel ca'. Na' zjanche'e Juan ben' ľecze le Marcos cont chaclene' ľegaque'. ⁶ Na' ca' gosaše' gosedie' doxen Chipren' besežine' yež gan' nzi' Pafos. Na' Pafosna' besežague' to bene' guaža' le Barjesús. Naque' bene' Israel na' chxoayague' že' chzende' bi dan' che' Diosen' le'. ⁷ Barjesúsen' naque' xmigw gobernador ben' le Sergio Paulo. Sergio Paulon' naque' to bene' chejni'ichgüe'. Na' le' goxe' Bernabén' na' Saulon', ľe godlaže' yosozende' le' xtiža' Diosen'. ⁸ Na' Barjesúsen' ľecze bososi'ene' Elimas, diža' griego zejen bene' guaža'. Le' godlaže' bi šejle' Sergio Paulo xtiža' Diosen' dan' choe' Bernabén' na' Saulon'. ⁹ Na' Spiritw che Diosen' zoachguan len Saulon' ben' ľecze le Pablo, nach bcos lagüen' gwna'chgüe' Elimasen'. ¹⁰ Nach gože'ne':

—Naco' xi'in Satanás dan' chnabia' da' xigüe' ca', yela' güexoayag chio' na' yela' bene' mal chio'. Bi chazlažo' bite'teze da' güen. ¿Bičhen' cbi chbezo' chžono' yosozenag bene' diža' li che Xanto' Diosen'? ¹¹ Da'nán' Xanto' Diosen' gone' castigw chio' na' čholo' to tiemp, bi gac le'edo' gwbiža'.

Nach la' gwčholtie', gwde ca to bejw lo' yejlagüe'na', nach gwzolagüe' chgan chtobe' cheyiljue' no goxe' ne'e cont cue' nez. ¹² Gobernadores' ble'ede' can' goquen' na' gweyile'e xtiža' Xancho Jesucriston', na' bebanchgüede' can' ža dižan'.

Pablon' na Bernabén' ja'aque' Antioquian' gan' mbane distritw Pisidia

¹³ Nach Pablon' len bene' ca' nżague'na' gosa'aque' yeż Pafosen', goso'e lo' barcon' cont beseżine' yeż gan' nzi' Perge gan' mbane distritw Panfilia. Na' Juan ben' lecze chese'e Marcos gwlejyichje' legaque' beyeje' Jerusalénna'.

¹⁴ Na' Pablon' len Bernabén' gosa'aque' yeż Perge na' beseżine' ciuda Antioquian' gan' mbane distritw Pisidia. Na' cate' bżin ża che Dios nach ja'aque' yodao' che bene' Israel ca' dan' zoa na' na' jasechi'e. ¹⁵ Na' ca' beyoż blab to bene' libr gan' nyoj ley che Diosen' len dan' bosozoj bene' ca' goso'e xtiża' Diosen' cani', bene' ca' chesenabia' lo yodao'na' gosesele' to bene' gan' chi Pablon' len Bernabén' na' goże' legaque':

—Bene' migw, še de bi diża' da' chaclaże'le güe'le neyoele bene' quinga, guac nalen na'a.

¹⁶ Nach Pablon' gwzechede' bene' señw len ne'ena' cont yosozenag bene' ca' zjachi'na', na' goże' legaque':

—Le gwzenag le'e bene' Israel na' nochle chonxenle Diosen'. ¹⁷ Dios ben' chonxen chio' bene' Israel gwleje' da' xozxta'ocho ca' na' goclene' legaque' cont yesaque' to yeż xen ślac gosenite' nación Egipto gan' gosaque' bene' zito'. Nach Diosen' bebeje' legaque' Egipton' len yela' guac chen'. ¹⁸ Na' Diosen' gwdape' yela' chxenlaże' choa iz len da' xozxta'ocho ca' ślac gosaše' latje dašen'. ¹⁹ Diosen' bonite' gaż yeż da' zjachi' gan' nzi' Canaán cont bneżjue' da' xozxta'ocho ca' yeżlio chegaquen'. ²⁰ Nach gwde na' Diosen' gwleje' tgüeje tgüeje juez cont gosenabi'e nación Israelen' lao tap gayoa yogaşe iz bżinte tiemp che da' Samuel ben' be'e xtiża' Diosen' cani'. ²¹ Nach tiemp che da' Samuel' da' xozxta'ocho ca' gosenabde' Diosen' gone' to rey bene' nabi'e legaque'. Na' Diosen' bneżjue' legaque' rey Saúl na' gwnabi'e legaque' choa iz. Saúl nan' goque' xi'in ben' le' Cis, na' goque' diaża che da' ben' le Benjamín ben' gwzoa cani'te. ²² Nach bżin ża Diosen' beque'e yela' gwnabia' che Saúlen' na' bzoe' ben' le David cont gwnabi'e. Na' gwne' che rey Davin': "Chbeda' David xi'in Isaínga, le chaclaże' chone' can' chazlażan' na' chzenague' bite'tez da' chapa'ne'." ²³ Nach na'a Diosen' ba gwsele' yeto bene' golje' lo diaża che da' rey Davin', ben' le Jesús. Ba gwsele' le' cont gone' chio' bene' Israel yela' mban toli tocaņe can' gwne' cani'. ²⁴ Na' cate' biņa' solao Jesús'en' gwsed gwlo'ede' bene', da' Juanna' gwdixjue'ede' len yogo' bene' Israel gualaż chechon' cheyala' yesyetinjde' xtola'gaque' na' yesezoe' nis. ²⁵ Na' cate' beyoż ben' Juanna' dan' yo'o lo ne'e gone', nach goże' bene' ca' chosozenag che: "¿Chonle xbab naca' neda' ben' chbezle sela' Diosen'? Bi naca' bena'. Za' yid bena', na' da' nachgüe' bene' zaca', bi zaca' gona' mandadw che' lechja' no xele'."

²⁶ Bene' migw, chio' naccho xi'in diaża che da' xozxta'ocho Abraham, na' nochle le'e chonxenle Diosen' txen len neto' bene' Israel, xtiża' Diosen' dan' ған gone' chio' yela' mban toli tocaņe naquen par chio'. ²⁷ Bene' ciuda Jerusalén ca' len bene' gwnabia' chegaque' ca' bi gosejli'e gwsela' Diosen' Jesús'en', na' bi gosejni'ide' da' ca' zjanyoj che' le'e libr dan' bosozoj bene' ca' goso'e xtiża' Diosen' cani' la'czla' chosolaben' lo' yodaon' yogo' ża che Dios. Na' dan' bi gosejni'ide', da'nana' gosechoglagüen' yesote' Jesús'en', nach goc can' nyoj che'. ²⁸ Na' la'czla' gosenezde' bibi da' mal non Jesús'en' cont yesote' le', gosenabde' Pilaton' gone' mandadw yesot soldadw che' ca' le'. ²⁹ Na' goc che Jesús'en' yogo' dan' nyoj che' le'e Xtiża' Dios dan' bosozoj bene' ca' gosenita' cani'. Na' beyoż gote'na' nach beseżin bene' besyeletje' cuerp che'na' le'e yag cruzen' na' bosocuaše'ne'. ³⁰ Na' gwdena' Diosen' bechis bosbane

le' ladjo bene' guata'. ³¹ Na' bene' ca' zjanaque' Jesúsen' txen cate' gwze'e distritw Galilea cont gwyeye' ciuda Jerusalén, legaque' besele'ede' Jesúsen' yezan ža gwde bebane' ladjo bene' guata', na' legaque' cheso'e diža' čhen' len yezica'chle bene' Israel.

³² Na' lencze neto' chyixjue'eto' le'e diža' güen cont nezele ba chac da' güen dan' gož Diosen' da' xozxta'ocho ca' cani'. ³³ Ba benen' len chio' naccho xi'in diaža che da' bene' ca', dan' bosbane' Jesúsen' ladjo bene' guaten'. Na' goc can' nyojen che' le'e libr dan' nzi' Salmos, na' salmo gwchopen' žan: "Le' naco' xi'ina'; na'aža ba blo'a zoaczo'." ³⁴ Na' Diosen' lecze bene' cont nyojen ga yoble che' dan' bosbane' le' ladjo bene' guaten' na' gwbat gožo' cuerp čhen', žan: "Gona' güen len le' dolol can' goša' rey Davin'." ³⁵ Na' nyoj yeto salmo žan: "Bi go'o latje nežo' cuerp čhian' neda' naca' ben' chacchüedo' na' ben' chon xšimon'." ³⁶ Wezcho da' rey Davin' gwnabi'e bene' Israel ca' gwnita' ca tiemp čhen' can' gwnalaže' Diosen' na' beyožen' gote' na' bgaše' len yezica'chle da' xozxta'ocho ca' na' lecze gožo' cuerp čhen'. ³⁷ Perw na' Diosen' bosbane' Jesúsen' ben' nyoj Xtizen' žan ca', na' bi gožo' cuerp čhen'. ³⁸ Na' cheyała' nezele bene' migw, Jesúsen' ben' choa' diža' che', chezi'xene' xtoła' note'tez bene' chejnilaže'ne'. ³⁹ Bi beyaccho bene' güen len Diosen' da' bi benyane'cho can' ža ley dan' bzoj da' Moisésen', perw note'tezcho chejnilaže'cho Jesúsen', len' ba cheyone' chio' bene' güen. ⁴⁰ Le gwsaca' cont bi gac čhele can' bosozoj bene' ca' goso'e xtiža' Diosen' cani', žan:

⁴¹ Cheyała' gonle xbab, le'e čhnelaole čhia', na' cheyała' yebanele, le gwžin ža cuiayi'le.

Neda' Dios gona' to da' yebanele šlac mbanle, to da' bi šejle'le la'czla' še no chixjue'e le'e can' gaca'.

⁴² Beyož bzejni' Pablon' bene' ca' že'na' nach besyechoje' lo' yodaon'. Nach bene' ca' ba goson cuine' bene' Israel gosata'yoede' Pablon' len Bernabén' yeside' ža che Dios xmanña' yeto cont yosozejni'ide' legaque' yelate' che da' ca' ba bosozejni'ide'. ⁴³ Nach bene' zan bene' Israel len zan bene' ca' ba goson cuingaque' bene' Israel zja'aclene' Pablon' len Bernabén'. Nach Pablon' na' Bernabén' gosene'yoede' legaque' cont nita'che' yesejnilaže'che' Diosen' ben' chaclen' legaque'.

⁴⁴ Na' cate' bežag xmanña' ža che Dios yogo'lołcze bene' lo' ciudan' besežag cont bosozenague' xtiža' Diosen'. ⁴⁵ Na' gwnita' bene' Israel bene' bi gosejle' che Jesúsen', na' cate' besele'ede' ba nac bene' zan chosozenague' che Pablon' na' gosacxi'ede' le' na' gosene'lagüe' che' na' gosezi'diže' le'. ⁴⁶ Perw na' Pablon' len Bernabén' bi besežebe' san gose'e bene' ca' že'na':

—Ba bento' can' gwnalaže' Diosen' na' zgua'tec bzejni'ito' le'e nacle bene' Israel gualaž četo'. Na' na'a dan' bi chaclaže'le gwzenagle, čhonle cont bi gon Diosen' le'e yela' mban toli tocañe. Da'nan' na'a gwzejni'ito' bene' ca' bi zjanac bene' Israel. ⁴⁷ Gonto' ca' neče Xanto' Diosen' bačh bene' mandadw gonton', le nyojen žan:

Bačh nzoa' le'e cont co'ole be'ni' čhian' lo' yichjlaždao' bene' ca' bi zjanac bene' Israel,

cont bene' ca' že' doxen yežlion' yesacbe'ede' guac nitlao xtoła'gaque'.

⁴⁸ Na' bene' ca' bi zjanac bene' Israel chesebede' beyož gosende' can' gwna Pablon', na' gosene' güenčgua nac xtiža' Diosen'. Na' yogo' bene' ca' ba gwlej Diosen' cont gata' yela' mban čhegaque' toli tocañe, legaque' gosejle'e xtiža' Diosen' dan' be' Pablon' len Bernabén'. ⁴⁹ Can' goc bene' ca' že' doxen

distritwna' gosende' xtiža' Xancho Jesucriston'. ⁵⁰ Perw ba| bene' Israelen' goso'e diža' len no'ol blao ca' gosonxen Diosen' na' len bene' gwnabia' blao ca' lo ciudan', na' bosoše'e xbab čhegaquen' cont gwzolao gosone' contr Pablon' len Bernabén' na' bich goso'e latje yesenite' doxen distriton'. ⁵¹ Nach Pablon' len Bernabén' cate' besyeya'aque' ciuda Antioquían' gosobebe ni'agaque' cont bežib yo bište dan' žianna'. Gosone' ca' cont bosolo'ede bene' ca' chesyebje legaue' malen' chesone' chosolague' legaue'. Nach jaya'aque' yež Iconio. ⁵² Na' mbalazchgua gwnita' bene' ca' chesonxen Jesucriston' ciuda Antioquían', na' Spiritw čhe Diosen' gwzoachguan len legaue'.

14

Pablon' len Bernabén' besežine' yež Iconio

¹ Na' goquen' Pablon' len Bernabén' besežine' yež Iconion' na' ja'aque' yodao' čhe bene' Israel. Na' cate' goso'e xtiža' Jesucriston', bene' zan bene' Israel ca' na' len zan bene' cbi zjanac bene' Israel gosejle'e čhe'. ² Perw na' gwnita' bene' Israel ca' bene' bi gosejle'e čhe Jesucriston', na' legaue' gosene'lagüe' čhe bene' ca' chesejnilaže' Jesucriston' na' gosone' cont bene' ca' bi zjanac bene' Israel gosezolagüe' besegue'ede' Pablon' len Bernabén'. ³ Perw na' Pablon' len Bernabén' besyega'añe' sša Iconion' cheso'e xtiža' Xancho Jesucriston' sin cbi besežebe'. Na' Xancho' blo'e le diža' lin' cheso'e chesene' Diosen' chacde' benachen', le be'e legaue' yela' guac cont gosone' da' zaca' yebanecho cont gosaclene' bene'. ⁴ Na' bene' ca' že' lo yežen' gosaque' čhople, ba|e' gosede'e bene' Israel ca' ben' bi gosejnilaže' Jesucriston' na' yeba|e' gosede'e Pablon' len Bernabén'. ⁵ Nach bene' Israel ca' gosone' yela' güexi'a len bene' ca' cbi zjanac bene' Israel na' len justis čhegaue' cont yesone' contr Pablon' len Bernabén' na' yosochele' legaue' yej. ⁶ Perw cate' gwneze Pablon' len Bernabén' dan' chesaclaže' yesone' len legaue', bosyoxonje' jaya'aque' yež Listra na' yež Derbe na' yezica'chle yež ca' zjachi' distritw dan' nzi' Licaonia. ⁷ Na' lecz goseyixjue'ede' xtiža' Xancho Jesucriston' len bene' ca' že' na'.

Bosožie' Pablon' yej šlac zoe' Listran'

⁸ Na' yež Listran' besežague' to bene' golje' nxinj' ni'e ca', cate' gocte' bidao' bi goc se'e. ⁹ Con chi'teze' chzenague' choe' Pablon' dižan'. Nach Pablon' gwne'e le' na' gočbe'ede' bena' chejle'e Diosen' nape' yela' guac cont yeyone' ni'en'. ¹⁰ Nach Pablon' bo| güiže'ne' gože' le' zižje:

—Gwzoža'.

Na' la' gwzoža'te' na' gwzolao chde'. ¹¹ Na' že' bene' zan chesene'e can' goquen' na' legaue' bososye'e gosene' diža' Licaonia:

—Xancho bene' ca' chejnilaže' cho ba gosetje' nga chesone' yela' guac, na' chle'etecho legaue' ca' benach.

¹² Gosene' Bernabén' naque' xangaue' ben' zjansi'e Júpiter, na' Pablon' naque' xangaue' ben' zjansi'e Mercurio. Gosene' ca' le Pablon' choe'che' dižan'. ¹³ Na' yodao' gan' chesonxene' xangaue' Júpiteren' zoan cho'a yež. Na' bxož čhe Júpiteren' jaxi'e go'ñ be ba zjanone' xdan zjanžie' legacba' corona yej. Nach bxoža' gwče'e bene' zan cho'a yežen' gan' zoa puert čhe ze'e dan' nyechj yežen' na' gocláže' yesote' go'nen' yesonxene' postlw ca'. ¹⁴ Na' Pablon' len Bernabén' cate' gosacbe'ede' can' yeson bene' ca', gosečheza' xagaue' dan' bi gosaclaže' yesonxen bene' ca' legaue'. Nach gosodie' gachol bene' ca' gose'e legaue' zižje:

15 —Bene', žbixchen' chonle ca'? Lecz beňach neto'. Za'to' cont chyixjue'eto' le'e cheyala' gwša' yichjlažda'olen' na' cuejyichjle costumbr quinga dan' bibi zaca' na' gonxenle Dios ben' zoa toli tocañe. Le' bene' yaban', yežlion', nisdaon', beňach, be ca' chesaš na' bite'tezechle da' chle'echo le'e yaban', lo yežlion' na' lo' nis. 16 Cani' Diosen' bi bžone' gon beňachen' bite'tez da' mal da' žan yesone'. 17 Perw zoacze' chone' da' güen len yogo' beňach cont yesenezde' zoe'naque' Dios. Chone' cont chac yejw cont chac dan' chazcho na' chata' da' che'ej chagwcho cont zoacho mbalaz.

18 Na' la'czla' Pablon' len Bernabén' gosene' yogo' da' ca', cañe gosezoede' bosožone' yesot bene' Lистра ca' go'ňna' yesonxene' legaue'.

19 Nach besežin bał bene' Israel bene' nita' yež Iconio na' ciuda Antioquía dan' chi' distritw Pisidian', na' bene' ca' gosego'oyele' bene' Lистра ca' cont gosaque'ne' txen bosochele' Pablon' yej. Na' cate' gosone' xbab bač gote' nach gosexobe' le' cho'a yeža' na' bosyocua'ane' le' na'. 20 Perw na' bene' ca' chesonxene' Jesucriston' besedobe' gan' de Pablon', nach Pablon' beyaše' beyeje' lo ciudan' da' yoble. Nach beteyo beza' Pablon' len Bernabén' jaya'aque' yež Derben'.

21 Nach cate' besežine' Derben' bosozende' bene' ca' že' na' diža' güen che Jesucriston', na' bene' zan gosone' txen len legaue' gosejle'e che Jesucriston'. Na' gwdena' gosa'aque' ja'aque' da' yoble Listran' na' Iconion' na' Antioquían'. 22 Na' to to yež gan' ja'aque' gosone' chač laže' bene' ca' chesonxene' Jesucriston' na' gose'e legaue' yesenite' yesonxene' le' do yichj do laže', na' gose'e legaue' da' zan da' gac da' saca'zi'cho šlac chbezcho yeyejcho yaban' gan' zoa Diosen' chnabi'e. 23 Na' to to yež ga besyedie' gosebeje' bene' yosogüia yesene'e yezica'chle bene' ca' chesonxene' Jesucriston'. Na' Pablon' len Bernabén', cate' za' yesa'aque' to to yež, gosone' gwbas na' bosol güiže' Diosen' gosenabe' gaclen Xancho Jesucriston' bene' ca' ba chesejnilaže' le'.

Pablon' len Bernabén' jaya'aque' Antioquía gan' mbane distritw Siria

24 Cate' gosa'aque'na' Pablon' len Bernabén' besyedie' distritw Pisidia na' besežine' distritw Panfilian'. 25 Na' goseyixjue'ede' xtíža' Jesucriston' yež Perge na' beyožen' jaya'aque' yež Atalia. 26 Nach Atalian' besyeyo'e lo' barcw jaya'aque' ciuda Antioquían' gan' mbane distritw Sirian'. Le' bene' Antioquíanan' gosesele' Pablon' na' Bernabén' cana'te na' gosenabde' Diosen' šejlene' legaue' na' gaclene' legaue' cont yosozejni'ide' bene' xtíže'na'. Na' na'a besyēžine' ba beyož gosone' dan' gosego'o bene' ca' lo na'gaque' yesone'. 27 Na' bosyotobe' bene' ca' chesonxene' Jesucriston' na' gose'ene' yogo'loł can' ben Diosen' len legaue' šlac zja'aque', can' goclene' legaue' cont zan bene' bi zjanac bene' Israel ba gwzoloa chesejnilaže' Jesucriston'. 28 Na' besyega'ane' Antioquían' sša len bene' ca' chesonxene' Jesucriston'.

15

Gosone' yela' güxi'a len bene' ca' že' ciuda Jerusalénna'

1 Na' šlac Pablon' len Bernabén' ne' nite' ciuda Antioquían' besežin to chope bene' za'ac distritw Judean' na' gosezolağüe' bosozejni'ide' bene' ca' chesonxen Jesucriston' na'. Gose'ene' yogo'loł bene' byo cheyala' yesezo' señw dan' že' circuncisión can' ža ley dan' bzoj da' Moisésen' cont gata' yela' mban chegaque' toli tocañe. 2 Na' Pablon' len Bernabén' gosacyože' len bene' ca' za'ac distritw Judea dan' chosozejni'ide' ca'. Nach bene' ca' chesonxene' Jesucriston' Antioquían' gosechoglağüen' šja'ac to chope' Jerusalén len

Pablon' na' Bernabén'. Šja'aque' šjasene'e postlw ca' že'na' na' len bene' ca' chosogüia chesene'e lježgaquen' cont yesone' yela' güexi'a len legaque' che dan' chosozejni'i bene' ca' za'ac distritw Judean'.

³ Nach bene' ca' chesedop chesežag chesonxene' Jesucriston' Antioquían' gosesele' legaque' Jerusalénna'. Na' bene' ca' zja'auen' gosedie' distritw Fenicia na' distritw Samaria. Na' yež ca' gan' že' bene' chesonxene' Jesucriston', bene' ca' zja'auen' gose'e legaque' zan bene' bi zjanac bene' Israel ba gosebejyichje' da' ca' gosejnilaže' do cana' cont chesejnilaže' Diosen'. Nach bene' ca' že' distritw Fenicia na' distritw Samaria besyebechgüede' gosende' dižan'.

⁴ Na' cate' Pablon' len Bernabén' besežine' Jerusalénna', bene' ca' chesedop chesežag chesonxene' Jesucriston', na' postlw ca' na' len bene' ca' chosogüia chesena' lježgaquen' besežague' bosoguape' legaque' tiox. Nach Pablon' len Bernabén' gose'e legaque' yogo'lol can' ba goclen Diosen' legaque'. ⁵ Nach nita' to čhope bene' Fariseo bene' ba chesonxene' Xancho Jesucriston', na' tgüeje tgüeje' gosezie' gosene':

—Note'tez bene' byo gonxene' Jesucriston' cheyla' soe' señw dan' nzi' circuncisión na' cheyla' gone' can' ža ley dan' bzoj da' Moisésen'.

⁶ Nach besedobe postlw ca' len bene' ca' chosogüia chesena' lježgaque', na' bosoxi'e še naquen can' chesena bene' ca'. ⁷ Ba chac sša cheso'e dižan' cate' gwzoža' Pedron' gože' legaque':

—Bene' migw, nezele ba goc zan iz Diosen' gwleje' neda' jatixjue'eda' diža' güen che Jesucriston' len bene' ca' bi zjanac bene' Israel cont gosejle'e che'. ⁸ Na' Diosen' nombi'e yichjlaždao' yogo'lol bene', na' cont nezecho chacde' bene' ca' bi zjanac bene' Israel can' chacde' chio' naccho bene' Israel, nacha' gwsele' Spiritw chen' gwyo'on lo' yichjlaždao' bene' ca' can' ba gwyo'on lo' yichjlažda'ochon'. ⁹ Toz ca' chon Diosen' len chio' na' len legaque', note'tezcho ba beya' beyibe' lažda'ochon' dan' chejle'cho che Jesucriston'. ¹⁰ Ba chonle' contr Diosen' dan' chaquele' gwchile' bene' ca' bi zjanac bene' Israel cont yesa'ogüe' costumbr che chio' bene' Israel. Nezele catec zdebe zjanaquen, ne chio' ne xozxta'ochó ca' bi goc yesone' yogo' can' ža diža' gol cheto' ca'. ¹¹ Bi cheyla' goncho ca', le nezecho note'tez naccho, Xancho Jesúsén' chone' yela' mban checho toli' tocañe dan' chacde' chio', gague neche dan' choncho can' ža ley che Moisés.

¹² Beyož gwna Pedroa' ca' nach bich bi gosena bene' ca', san yogüe' gosenite' šize bosozenague' xtiža' Pablon' len Bernabén'. Goso'e diža' can' bnežjo Diosen' legaque' yela' guac cont gosone' da' zaca' yebanecho gan' že' bene' ca' bi zjanac bene' Israel. ¹³ Na' beyož goso'e dižan' nach postlw Jacobo be'e dižan', gwne':

—Bene' migw, le gwzenag diža' nga gua'a. ¹⁴ Simón Pedro nga ba bzejni'ide' chio' can' ben Diosen' da' nechw len bene' bi zjanac bene' Israel cont blo'e chacde' legaque', ba gwleje' ba'e' cont zjanaque' lo' ne'e. ¹⁵ Na' dan' goc ca' chotilen da' ca' bosozoj bene' goso'e xtiža' Diosen' cani', le nyojen žan:

¹⁶ Tena' yida' da' yoble na' gona' cont nabia' xi'in diaža' che da' rey David, la'czla' na'a nono xi'in diaža' che' chnabia', na' gona' cont soa toe' da' yoble nabi'e.

¹⁷ Gona' ca' cont yogo' bene' bi zjanac bene' Israel guac yeseyiljue' nac yesone' yesenite' binjo len neda'.

Note'tez bene' nación guac yosol güiže' neda'.

¹⁸ Can' gwna Xancho Diosen' cani'te,

bene' cont gosenze bene' can' gaquen'.

¹⁹ Na' lagüe nyoj Xtižen' žan ca', chacda' neda' bi cheyała' gonecho zed bene' ca' bi zjanac bene' Israel bene' ba chesebejyichje' costumbr gole čegaque' na' chesonxene' Diosen'. ²⁰ Con gwzoycho ye'gacchone' bi yesone' txen len bi dan' cheson bene' dan' chesene' naquen' che l' gua'a l'saca' dan' chesonxene', neca yesata'lene' no' no'ol cbi nac no'ol čegaque' o bene' byo cbi nac bene' čegaque', neca yesagüe' be chesote' chosošoque' do l'ba'ba', neca yesagüe' chen che beyixe'. ²¹ Nabcho bi yesone' da' ca', le cani'te nita' bene' to to yež chosozejni'ide' ley čechon' dan' bzoj da' Moisésen' dan' žan bi goncho da' ca', na' chosolabe' leyna' yogo' ža che Dios.

²² Nach postlw ca' len bene' chosogüia chesene'e yezica'chle bene' chesonxene' Jesucriston', na' len bene' chesedop chesežag, gosazlaže' can' gwna Jacobon', na' bosoxi'e choj čhope bene' lježe' šja'aque' ciuda Antioquian' txen len Pablon' na' Bernabén'. Na' gosebeje' Judas ben' lecze gože'ne' Barsabás, na' Silas, ben' zjanac bene' blao len legaque'. ²³ Na' bosozoje' to cart da' gosoxe' bene' ca' žan:

“Neto' postlw, len bene' chosogüia chesene'e yezica'chle bene' chesonxene' Jesucriston', na' len yogo' bene' chesedop chesežag len neto', chgupto' le'e tiox le'e zoale Antioquian' na' distritw Siria na' distritw Cilicia. Bi nacle bene' Israel perw ba nac lježcho chonxencho Jesucriston'. ²⁴ Ba nezeto' to čhope bene' besechoj nga jja'aque' gan' zoalen' gosone' šejlaže'le len dan' bosozejni'ide', na' chacle tole dan' chesene' cheyała' soale señw dan' že' circuncisión na' cheyała' gonle yogo' bichle dan' ža ley dan' bzoj da' Moisésen'. Bi nezeto' gosa'aque' na' gague mandadw che neto' gose'e le'e ca'. ²⁵ Da'n'an' gwzoato' txen bento' yela' güexi'a gwlejt'o čhope bene' quinga chsel'a'to' gan' zoalen', txen len postlw Pablon' na' len Bernabén', bene' ca' čhaquehgüeto'. ²⁶ Nezeto' Pablon' len Bernabén' zan las ba ša' yesate' dan' cheso'e xtiža' Xancho Jesucriston'. ²⁷ Na' chsel'a'to' Judasen' len Silasen' cont yosozejni'ide' le'e diža' cho'a yogo' dan' bzojto' le'e cart nga. ²⁸ Chazlaže'to' can' bzejni'i Spiritw che Diosen' neto', na' da'n'an' bi gonto' mandadw bichle da' zdebe gonle san da' quinga chaqueto' chonen byen cbi gonlen. ²⁹ Bi gagwle yela' guagw dan' ba bosožie' lo l' gua'a l'sacan' chesonxenen', na' bi gagwle be ca' chesote' chosošoque' do l'ba'ba', bi gagwle chen che beyixe', na' bi gata'lenle no'ol cbi nac no'ol čhele o bene' byo ben' cbi nac bene' čhele. Na' še gwzenagle che da' quinga ba gwnato' bi gonle, güenna' chonle še ca'. Da' na'ze chzojto' le'e cart nga. Diosen' gaclenšque' le'e.”

³⁰ Can' goquen' bene' ca' chesonxene' Jesucriston' Jerusalénna' gosesele' bene' ca' čhope len Pablon' na' len Bernabén' gosa'aque' zja'aque' ciuda Antioquian'. Na' cate' besežine' Antioquian' bosotobe' bene' ca' chesonxene' Jesucriston' na' bosonežjue' legaque' carten' goseseła' bene' Jerusalén ca'. ³¹ Na' cate' bene' Antioquía ca' bosolaben' besyebede' ca' consejon' nyoj le'e carta'. ³² Na' Judasen' len Silasen' lecze gosaque' bosozende' bene' bin' ba gwna Diosen'. Nach gosoe'lene' bene' Antioquía ca' diža' zan gosone' čačh laže'gaque' na' gosaclene' legaque' cont gosonxenche' Jesucriston'. ³³ Gosenite' Antioquian' zan ža, nach cate' bžin ža šjaya'aque', bene' Antioquía ca' gose'e legaque': “Nayežagcho”, na' lecze gose'e legaque' yesyežine' Jerusalénna' to šagüe' to güen. ³⁴ Na' Silasen' bečhoglaže' yega'añe' Antioquian'. ³⁵ Na' Pablon' len Bernabén' gosenita'cze' Antioquian' na' txen len yezan bene' bosozejni'ide' bene' xtiža' Xancho Jesucriston'.

Pablon' gwyeye' da' yoble gan' ba jatixjue'ede' xtiža' Diosen'

³⁶ Nach cate' ba goc sša nite' Antioquían', Pablon' gože' Bernabén':

—Šejcho da' yoble yogo' yež ca' gan' ba jatixjue'echo xtiža' Xancho Jesucriston' šjana'cho nac cheson beņe' ca'.

³⁷ Nach Bernabén' goclaže' šja'aque' na' yeseče'e Juan ben' lecz le Marcos.

³⁸ Perw Pablon' gwne' bi gonen güen yeseče'ene' dan' gwlejšyichj Marcosen' legaue' cate' besežine' distritw Panfilian' na' bi benlene' legaue' xšin Diosen'.

³⁹ Cate' gota'bia' ne toe' bi goclaže' gac can' ža ben' yeto, nach besyele'e. Bernabén' gwze'e gwče'e Marcosen' na' gos'o' lo' barcw ja'aque' Chipren'. ⁴⁰ Na' Pablon' gwleje' Silasen' cont che'e le'. Na' beņe' ca' chesonxene' Jesucriston' Antioquían' bosol güiže' Xancho Diosen' gosenabe' gaclene' legaue' gate'tez šja'aque'. Nach Pablon' len Silasen' gosa'aque'. ⁴¹ Na' ja'aque' to to yež ca' zjachi' distritw Sirian' na' len distritw Cilician' gosone' čhač laže' beņe' ca' chesedop chesežag chesonxene' Jesucriston'.

16*Timoteon' gwzolağüe' chonlene' Pablon' na' Silasen' txen*

¹ Na' Pablon' len Silasen' besyežine' yež Derben' nach gwdena' besyežine' yež Listran'. Na' Listran' zoa to beņe' chonxene' Jesucriston' le' Timoteo. Xna' Timoteon' naque' beņe' Israel na' chonxene' Jesucriston', na' xen' naque' beņe' griego. ² Na' beņe' ca' chesonxene' Jesucriston' yež Listran' len yež Iconion' cheso'e diža' che Timoteon' chesene' zoacze' chone' da' güen. ³ Da'nan' Pablon' gwnabe' šejlen Timoteon' legaue', nach gwchi'ene' gan' bosozoe' le' señw dan' že' circuncisión. Bene' ca' le' yogo' beņe' že' na' gosenežde' xa Timoteon' bi naque' beņe' Israel na' Timoteon' biņa' soe' señon', na' lecze Pablon' goclaže' yega'ane' güen len beņe' Israel ca'. Cate' beyož bzo'e'ne' seňua' na' gosa'aque'. ⁴ Na' to to yež ga besežine' bosozende' beņe' ca' chesonxene' Jesucriston' can' nac yela' güexi'a' che postlw ca' len beņe' chosogüia chesene'e lježgaue' Jerusalénna' che da' ca' cheyla' yesone'. ⁵ Na' beņe' ca' chesedop chesežag chesonxene' Jesucriston' gosenita'čhače' gosejnilaže'ne' na' gwyanche' tža tža.

Pablon' ble'edagüede' to beņe' distritw Macedonia chata'yoede' le' šeje' laže'

⁶ Nach Spiritw che Diosen' bi ben' latje šjasedixjue'e Pablon' len Silasen' len Timoteon' xtiža' Diosen' yež ca' zjachi' distritw gan' nzi' Asia. Da'nan' gosodie' yež ca' zjachi' distritw ca' gan' nzi' Frigia na' Galacia. ⁷ Besežinte' gala'ze distritw gana' nzi' Misia na' gosone' xbab yeso'e distritw da' nzi' Bitinia, perw lez na' bi be' Spiritw che Jesús'en' latje šja'aque'. ⁸ Nach gosodie' gala'ze distritw Misian' na' besežine' ciuda dan' nzi' Troas dan' chi' cho'a nisdan'. ⁹ Nach že'na' Pablon' ble'edagüede' zecha to beņe' distritw Macedonia lağüe', che'e le': "Yo'o Macedonia cont gacleno' neto'." ¹⁰ Neda' Lucas gwzoa' len legaue' na' da' ble'edagüe Pablon' beņe' Macedonian', nach gwnežeto' chaclaže' Diosen' šjazeneto' beņe' Macedonia ca' diža' güen che Xancho Jesucriston'. Nach bsiņa' cheto' cont gwza'to' gwyejto' distritw Macedonian'.

Pablon' len Silasen' ja'aque' Filipos

¹¹ Na' cate' gwza'to' ciuda da' nzi' Troas dan' chi' cho'a nisdao' gwyo'oto' to lo' barcw zejto' licha gan' chi' to yežlio lo' nisen' dan' nzi' Samotracia, nach beteyo bžinto' yežen' dan' nzi' Neápolis. ¹² Nach gwza'to' Neápolis bžinto'

ciudan' nzi' Filipos gan' mbane distritw Macedonia na' bega'anto' to chop ža. Filipos naquen ciuda blaoch che distriton' gan' že' bene' Roma. ¹³ Na' cate' bžin ža che Dios bchojto' ciudan' na' gwyejto' cho'a yegw gan' chaqueto' chjasel' güiže' Diosen', nach gwche'to' na' be'lento' no'ol ca' ba zjandoben' diža' güen che Jesucriston'. ¹⁴ Toe' le Lidia naque' bene' Tiatira na' chote' lache' güen da' nac color moradw, na' chonxene' Diosen' do yichj do laže'. Xancho Diosen' bene' cont bzenague' che dan' bzejni'i Pablon' le'. ¹⁵ Nach le' len bene' lo' yo'o che' gosezo'e nis. Gwdena' gata'yoede' neto' gwne':

—Še chejle'le da' li ba chonxena' Xancho Jesucriston', le šo'o soale ližan'.

Nach gwyejto' jasoato' ližen', le bene' byen.

¹⁶ Na' to ža zejto' gan' chosol' güiže' Diosen' cate' bežagto' to no'ol güego' no'ole esclava. Yo'o nyaz da' xigüen' yichjlažda'oben' chonen cont chac chñeya'abe', na' gan xen chombe' par xambe' ca' chñeya'abe'. ¹⁷ Na' lebe' na'obe' neto' len Pablon' gate'tez zejto', na' chosya'abe' žabe':

—Bene' quinga chesone' xšin Diosen' ben' chnabi'e doxen, na' cheseyixjue'ede' le'e can' gata' yela' mban chele toli tocañe.

¹⁸ Ba chac zan ža chombe' ca' cate' goque Pablon' zed, na' gwyechje' gože' da' xigüen' yo'o lo' yichjlažda'oben':

—Len yela' chnabia' che Jesucriston' chnia' le' bechoj lo' yichjlaždao' bi'nga.

Na' la' bechojte da' xigüen' lo' yichjlažda'oben'.

¹⁹ Na' gwdena' cate' gosache'e xambe' ca' ba bechoj da' xigüen' lo' yichjlažda'oben' na' bich bi gan yesone' len lebe', nach gosezene' Pablon' len Silasen' na' jasesane' legaque' lagüe ya'a gan' že' bene' ca' chesenabia' ciudan'.

²⁰ Na' cate' besežine' gan' že' justis ca', gose'e legaque':

—Bene' Israel quinga chesaše' chesebeque' da' zed lo' ciuda nga. ²¹ Na' chosolo'ede' costumbr da' bi de šsens gao' chio' naccho bene' Roma.

²² Nach bene' ca' lo' ciudan' gosase' contr Pablon' len Silasen', na' bene' gwnabia' ca' gosone' mandadw goselechje' xagaque' cont goseyine' legaque' xis. ²³ Beyož goseyinchgüe' legaque' nach bosoži'e legaque' ližya, chese'e ben' chape' ližyan' gwna'yañe' legaque' cont bi yesyechoje'. ²⁴ Beyož gose'e le' ca', nach bži'e legaque' lo' quart ližyan' dan' zoa la'zelaoze gan' nac biže'te na' bchide' ni'agaquen' len yag dan' nzi' cepo.

²⁵ Ca' gosenita' Pablon' len Silasen' ca' do chel, chosol' güiže' Diosen' na' chesole' no himno chesonxene' Diosen', na' yezica'chle bene' ca' zjade ližyan' chosozenague'. ²⁶ Nach zejzenez leca gwxo' na' bsesechguan len yo'o ližyana'. Na' to ši'ize yogo' puert che ližyana' beseyaljon na' besyeyež yogo' gden ca' dan' zjanchej ni'a na' bene' ca' že' lo' ližyan'. ²⁷ Bosbanen ben' chape' ližyan' na' cate' ble'ede' ba zjanyaljo puert ca', la' goljite spada chen' cont yeyot cuine', le bene' xbab ba bosyoxonj yogo' bene' ca' zjade ližyan'. ²⁸ Nach Pablon' gože'ne' zižje:

—Bibi gone cuino'. Nga zoacze yogo'to'.

²⁹ Nach ben' chap ližyan' gwnabe' to yi', na' gwyo'osese' zjañe'e gan' de Pablon' len Silasen'. Do chxizze' bzoa xibe' lao bene' ca', le chžebchgüe'. ³⁰ Na' la' bebejte' legaque' lo' quart gan' zjajo'en', che'e legaque':

—¿Bi cheyal'a gona' cont gata' yela' mban chia' toli tocañe?

³¹ Nach gose'e le':

—Gwejnilaže' Xancho Jesucriston', le' na' bene' lo' yo'o chio', na' gata' yela' mban chele toli tocañe.

³² Nach ben' chape' ližyan' gwčhe'e legaque' ližen' na' gosoe'lene' le' len bene' lo' yo'o chen' xtiža' Xancho Jesucriston'. ³³ Nach ca hora' ben' chap ližyan' gwdibe' lo güe' che Pablon' na' che Silasen', na' gwdena' jasoe' nis len bene' lo' yo'o che' ca'. ³⁴ Nach ben' chape' ližyan' beče'e Pablon' len Silasen' liže' bgü'e'ej bguagüe' legaque'. Mbalaz zoe' ba chejnilaže' Diosen' txen len bene' lo' yo'o che'.

³⁵ Cate' ba gwyeni' bene' gwnabia' ca' gosesele' xa'ag jaseže' ben' chap ližyan' yosane' bene' ca' šjaya'aque'. ³⁶ Nach le' gože' Pablon':

—Bene' gwnabia' ca' bač gosesele' rson yosana' le'e. Guac yeyejle to šagüe' to güen.

³⁷ Nach Pablon' gože' xa'ag ca':

—Ba goseyine' neto' latje lagüe ya'a sin cbi gosone' yela' justis čheto' še bi nonto' na' gosegüe'e neto' ližya, len nacto' bene' nación Roma. ¿Na' chesone' xbab yosane' neto' šižize? Bi gac, san yesid cuine' yesyebetje' neto'.

³⁸ Nach xa'ag ca' jasyeyeže' bene' gwnabia' ca' can' gož Pablon' legaque'. Na' bene' ca' besežebe' cate' gosenezde' Pablon' len Silasen' zjanaque' bene' nación Roma. ³⁹ Nach bene' gwnabia' ca' ja'aque' gan' zjade Pablon' len Silasen' na' gosata'yoede' legaque' yesyezi'xene' can' ba goquen', na' diža' šagüe' gose'e legaque' yesyechoje' yesyeya'aque' lo' ciudan'. ⁴⁰ Nach bechoj Pablon' len Silasen' ližyan' na' ja'aque' liž Lidian' da' yoble, na' da' yoble gosone' chač laže' bene' ca' chesonxene' Jesucriston' na' beyožen' besyeya'aque'.

17

Bene' Tesalónica ca' gosone' contr Pablon'

¹ Cate' Pablon' na' Silasen' gosa'aque' ciuda Filipos nach ja'aque' yež da' nzi' Anfípolis na' len yež da' nzi' Apolonia na' besyēžine' to ciuda da' nzi' Tesalónica gan' zoa to yodao' che bene' Israel. ² Na' Pablon' ca' costumbr che' gwyeje' yodao' ža che Dios. Na' ca' goc, šone ža che Dios be'lene' legaque' diža'. ³ Bzejni'ide' legaque' gože'ne' bene' ca' goso'e xtiža' Diosen' cani' bosozoje' xtiža' Criston'. Gosone' ben' seļa' Dios yedenabi'e, cheyaļa' yosoči yososaca' bene' le' na' yesote'ne' na' techle yeyas yebane' ladjo bene' guat ca'. Gože' bene' Tesalónican':

—Jesúsen' ben' choa' diža' che', le'na' Criston' ben' gwselā' Dios cont nabi'e.

⁴ Nach baļ bene' Israel gosejle'e xtiža' Pablon' len Silasen' na' gosaque' txen len legaque', na' lecze zan bene' griego bene' chesonxen Diosen' na' zan no'ole blaō lecze gosejle'e. ⁵ Perw gwnita'ch bene' Israel bene' bi chesejle'e xtiža' Diosen'. Legaque' gosacxi'ede' Pablon' len Silasen' na' bosyotobe' xonj bene' mal bene' chesaš lagüe ya'a na' gosaque' txen gosone' cont gwche' žaš doxen ciudan'. Nach bene' že' lo' ciudan' ja'aque' liž ben' le' Jasón chesacde' yesyebetje' Pablon' len Silasen' liže'na'. ⁶ Cate' besežine' liž Jasónna', noch no' bene' ca' nita'. Nach cate' bi besyēželde' Pablon' len Silasen', na' gosoxe' Jasónna' len yebaļ bene' chesonxene' Jesuscriston' na' goseče'e legaque' lao bene' ca' chesenabia' ciudan', na' bososye'e gosone':

—Bene' ca' nita' liž benga chesaše' chesebeque' da' zed doxen, na' na'a ba besele'e gan' zoacho nga. ⁷ Jasón ni ba blebe' legaque' ližen', na' bi chesone' can' ža ley che César ben' nac la'zelagüe bene' gwnabia' chechon' chi' ciuda Roman', na' chesene' zoa yeto rey bene' le Jesús bene' nabi'e chio'.

⁸ Na' cate' gosende' diža'na', bene' lo ciuda ca' len bene' gwnabia' čhegaque' ca' gosebecche' žaš. ⁹ Nach Jasónna' len bene' lježe' ca' bosožie' mechw cont bene' gwnabia' ca' bososane' legaque', con še bich yesyežin Pablon' na' Silasen' lo ciudan', chesene'.

Pablon' len Silasen' ja'aque' yež Berea

¹⁰ Nach že'na' bene' ca' chesonxene' Jesucriston' lagüe ciuda Tesalónican' bosyose'e Pablon' na' Silasen' cont ja'aque' yež gan' že' Berea. Na' cate' besyežine' nach ja'aque' lo' yodao' che bene' Israel ca'. ¹¹ Na' bene' Israel ca' že' Berean' zjanacche' bene' šagüe' clel ca' bene' Israel ca' že' Tesalónican' na' besyebede' bosozenague' xtiža' Jesucriston' dan' bosozejni'i Pablon' len Silasen' legaque'. Na' tža tža besyeyiljue' gan' nyoj da' ca' bosozejni'i bene' ca', cont yesenezde' še le can' žan. ¹² Na' zane' gosejle'e xtiža' Xancho Jesucriston' na' lecze zan bene' griego ca' na' zan no'ole blao. ¹³ Nach bene' Israel ca' že' Tesalónican' bene' ca' cbi chesejle' che Jesucriston', gosende' diža' ba zoa Pablon' len Silasen' Berean' chosozejni'ide' xtiža' Diosen'. Nach gosa'aque' ja'aque' Berean' na' gosone' cont bene' Berea ca' lecz gosone' contr Pablon'. ¹⁴ Perw na' bene' Berea ca' chesejnilaže' Jesucriston' la' bososa'te' Pablon' gwyeje' cho'a nisdao'. Na' ca' nac Silasen' len Timoteon', legaque' besyega'ane' Berean'. ¹⁵ Na' to chop bene' Berean' ja'aque' jasesane' Pablon' ciuda dan' nzi' Atenas. Na' cate' besyeya'aque' jaya'aque' Berean' Pablon' gwsele' rson len legaque' cont Silasen' len Timoteon' lecz šja'aque' cate gan' zoe'na'.

Pablon' bsed blo'ede' bene' Atenas ca'

¹⁶ Na' Pablon' šlac zoe' ciuda Atenasen' chbeze' žin Silasen' len Timoteon', gocchgüe' tole lo' yichjlažda'ogüe' da' ble'ede' da' zan l gua'a lsaca' da' chesejnilaže' bene' ca'. ¹⁷ Da'nan' bzejni'ide' bene' Israel ca' lo' yodao' čhegaque'na' len yezica'chle bene' ca' chesonxene' Diosen'. Na' yogo' ža gwyeje' ga chac ya'a je'e xtiža' Diosen' len bene' ca' že'na'. ¹⁸ Nach bene' ca' že'na' gwzolao cheso'lene' le' diža'. Ba'le' chesejle'e dan' bzejni'i to bene' le' Epicuro, na' yeba'le' chesejle'e dan' bosozoj bene' ca' chesene' estoico. Na' ba'le' gosene':

—¿Bin'chon ža benga?

Na' yeba'le' gosene':

—Čacljede' gwzejni'ide' chio' che no bene' cobe bene' šejnilaže'cho.

Gosene' ca' le Pablon' ba bzejni'ide' legaque' xtiža' Jesúsen' na' ba be'e diža' Jesúsen' bebane' ladjo bene' guat. ¹⁹ Nach gosečhe'e Pablon' to latje dan' nzi' Areópago gan' chesedobe bene' blao čhegaque' cate' chosoxi'e bi da' chesone'. Nach gose'e Pablon':

—Če'neto' gwzejni'ido' neto' bi da' coben' dan' chsed chlo'edo'. ²⁰ Bina' yenetu' diža' can' nac dan' cho'o nga na' chaclaže'to' nezeto' bi zejen yogo' da' ca'.

²¹ Ca' nac bene' Atenas ca', de costumbr čhegaque' yogo' ža con chesaš' cheso'e diža' o chosozenague' che bi da' cobe da' de, na' lecz ca' cheson no bene' zito' že' Atenas.

²² Nach Pablon' gwzeche' gachol' legaque' gan' chesone' yela' güexi'a na' gože' legaque':

—Le'e bene' Atenas, chacbe'eda' leca chejnilaže'le zan l gua'a lsaca'. ²³ Cate' gwdia' tnez ble'eda' gan' chonxenle' zan l gua'a lsaca', na' ble'eda' to latje gan' nyojen žan: “Če Xancho ben' nono nombia'.” Na' ca' nac ben' chonxenle' sin cbi nombia'le', che benan' chyixjue'eda' le'e.

²⁴ 'Dios ben' ben yežlion' na' yogo' da' de lagüe yežlion', len' chnabi'e yaban' len yežlion'. Bi chyažjde' yo'o da' chon beṇachen' cont soe' len chio'. ²⁵ Bibi chyaže Diosen' gwnežjo beṇachen' le', na' bibi gac yesone' yesaclene' le'. Diosen' cho'e yela' mban che yogo' loḷ bene', cho'e legaque' biš grasyw na' cho'e legaque' yogo' bi da' zjanape'.

²⁶ 'Diosen' bene' bene' nechon', na' toz ca' nac yogo' beṇach xi'in diaža che'. Na' bsi'e xneze bat nita' to toe' na' ga yesenite'. ²⁷ Diosen' bnite' yogo' beṇachen' lo yežlion' cont yeseyiljue' nacle yesone' yesombi'ene' na' yesonxene'ne'. Na' da' li Diosen' bi zoe' zito' len to to chio'. ²⁸ Le' chone' cont zoacho mbancho na' chdacho. Nac da' li can' gosena to chope bene' poeta chele ben' goso'e diža' xdan, gosene': "Naccho diaža che Diosen'." ²⁹ Na' dan' naccho diaža che Diosen' bi cheyala' goncho xbab nac Diosen' ca' no l' gua'a lsaca' de oro, de plata o de yej. Chesaljlaže' beṇachen' chesone' da' ca'. ³⁰ Cani' Diosen' be'e latje goson beṇachen' con ca' gwna xbab chegaque' yela' cbi chejni'i chegaque', perw na'a Diosen' chone' mandadw yogo' loḷ bene' že' doxen yežlion' yesebejyichje' da' malen' chesonen'. ³¹ Diosen' chaclaže' cuejyichjcho da' malen', le ba mbeje' Jesucriston' gone' yela' justis che yogo' beṇach na' gwnežjue' castigw che yogo' bene' cbi chesejnilaže' le', na' Diosen' zejzce' to licha dan' gone' ca'. Na' Diosen' ba nžie' bia' bat gone' yela' justis che beṇach. Na' dan' bosban Diosen' Jesucriston' ladjo bene' guaten', nezecho Jesucristwnan' gone' yela' justis che beṇachen'.

³² Cate' bene' Atenas ca' beyož gosende' gwna Pablon' yesyeban bene' guat ca', baḷe' gosezi'diže' le' na' yebaḷe' gose'ene':

—Na' gwzenagto' xtižon' yeto ža yoble.

³³ Can' goc beza' Pablon' latje gan' že' bene' ca'. ³⁴ Perw baḷ bene' Atenas ca' gosaque' Pablon' txen na' gosonxene' Jesucriston'. Na' bene' ca' gosaque' Pablon' txen len to bene' byo le Dionisio na' yeto no'ole le Dámaris. Na' Dionisio' naque' txen len bene' gwnabia' ca' ben' cheson yela' güexi'a gan' nzi' Areópago.

18

Ca goc šlac zoa Pablon' Corinto

¹ Gwde goc da' ca', Pablon' beze'e ciuda Atenasen' na' gwyeje' ciuda gan' nzi' Corinto. ² Cate' bžine' Corinton' bežague' to bene' Israel le' Aquila bene' naque' bene' distritw Ponto, na' len no'ol che' ben' le Priscila. Za' besyežingale' Corinton' zeya'aque' nación Italia, le rey Claudio, ben' chnabia' ca' hora' doxen gan' mbane naciónna', bene' mandadw besyežaš yogo' bene' Israel ca' že' ciuda Roma. Nach Pablon' gwyeje' jaṇe'e Aquilan' len Priscilan'. ³ Xšingaque' naquen chesone' yo'o de lache', na' toze ca' nac xšin Pablon'. Nach bega'ane' gosonite' txen na' gosone' žinna' txen. ⁴ Na' yogo' ža che Dios Pablon' gwyeje' yodao' che bene' Israel ca' jazejni'ide' legaque' che Jesucriston', cont baḷ bene' Israel len baḷ bene' bi zjanac bene' Israel yesejnilaže'ne'.

⁵ Nach Silasen' len Timoteon' gwde gosa'aque' distritw Macedonian' bešežine' gan' zoa Pablon', na' cana'ch Pablon' bsane' xšinen' cont gota'ch latje gwduxjue'ede' xtiža' Jesús'en' na' bzejni'ide' bene' Israel ca' Jesucristwnan' naque' bene' chesebeze' sela' Diosen' yedenabi'e. ⁶ Perw bene' Israel ca' bešeže'e Pablon' na' bosožie' yela' ya' che'. Nach Pablon' gwšibe' xe'na' cont blo'e chbejyichje' legaque', gwne':

—Bibi doła' napa' dan' cuiayi'le toli tocane. Le'e nape doła'. Na' na'a šjased šjalo'eda' bene' ca' bi zjanac bene' Israel.

7 Nach bechoje' lo' yodao'na' na' beze'e bežine' liž to bene' le Justo. Justo na'na' zoe' chonxene' Diosen' na' liže' zoan cuit yodao'na'. 8 Na' to bene' le' Crispo naque' bene' gwnabia' che yodaon'. Na' Crispon' len yogo' bene' lo' yo'o' che' gosaque' txen chesejle'e che Xancho Jesucriston'. Na' yezan bene' Corinto gosejle'e cate' gosende' xtiža' Jesucriston' da' choe' Pablon' na' gosezoe' nis. 9 Na' goc to že' Pablon' ble'edagüede' Xancho Jesucriston', che'ene':

—Bi žebo' Pablo. Gwzoateze be' xtižan' na' bi so' šize. 10 Neda' zoa' len le' na' bi gona' latje no gone le' da' mal, le bene' zan že' lo' ciuda nga bene' chesonxene' neda'.

11 Ca' goquen' bega'an' Pablon' Corinton' tgüiz yogašje bsd blo'ede' legaque' xtiža' Diosen'.

12 Na' ca' tiempen' ben' le Galión naque' gobernador distritw gan' nzi' Acaya. Nach bene' Israel ca' nita' ciuda Corinto bene' cbi chesonxen Jesucriston' gosaque' toze gosone' contr Pablon'. Na' goseche'ene' jasesane'ne' gan' chon gobernadores' yela' justisen'. 13 Na' cate' besežine'na' gose'e gobernadores':

—Benga chde' chgo'oyele' bene' lo' yežen' yesone' bi da' cobe cont yesonxene' Diosen' na' da' chzejni'ide' goncho, bi zejen to li len ley chechon'.

14 Bach zoa ne Pablon' cate' gobernador Galiónna' gože' bene' Israel ca':

—Ca' nac xya dan' chagwle nga, šaca' naquen to da' xinj o to da' malchgua, gonan' yela' justis. 15 Perw naquen che diža', na' che bene', na' che ley chelen'. Da'nan' le gwy'e nacle gonle. Bi co'o' lo' na' gona' yela' justis che dan' nac ca'.

16 Nach bešaše' legaque' gan' chone' yela' justisen'. 17 Nach bene' ca' bi zjanac bene' Israel gosenize' Sóstenes ben' ba' nac bene' gwnabia' che yodaon', gosot goseyine' le' lao gobernador Galiónna', perw bena' bibi cuent bene' legaque'.

Pablon' beyeje' Antioquían' da' yoble

18 Na' bega'an'ch Pablon' ciuda Corinton' yezan ža' beyož goc da' ca', na' cate' beze'ena' gože' bene' ca' chesonxen Jesucriston': "Nayežagcho", nach beze'e txen len Priscilan' na' Aquilan'. Ja'aque' to yež da' nzi' Cencrea gan' bšib yichj Pablon' da' bach beyož bene' to da' gwlo'o' cho'e' lao Diosen' gone'. Na' beyožen' Pablon', Aquilan' na' Priscilan' besyeyo'e' lo' barcw da' zej nación Siria. 19 Na' cate' besyežine' ciuda Efeson' besyechoje' lo' barcon', na' Priscilan' len Aquilan' besyega'ane' Efeson'. Na' Pablon' gwyeje' yodao' che bene' Israel ca' je'lene' bene' ca' ba' zjandob na' xtiža' Dios. 20 Na' bene' ca' že' lo' yodaon' gosata'yoede' le' yega'an'che' len legaque', perw bi goclaže'. 21 Nach gože' legaque':

—Nayežagcho, le chonen byen soa' lni dan' šo' ciuda Jerusalénna', perw güidichza' deña'a le'e yeto še Diosen' gone' latje.

Nach beze'e ciuda Efeson' na' beyo'e' lo' barcon' zeyeje'. 22 Cate' bežine' ciuda Cesarean' bechoje' lo' barcon' na' gwyeje' Jerusalénna' na' bguape' tiox bene' ca' chesedop chesežag chesonxene' Jesucriston'. Nach beze'e beyeje' ciuda Antioquían'. 23 Gwde to tiemp zoe' Antioquían', nach gwze'e da' yoble gwyeje' to to yež dan' nita' distritw Galacia na' Frigia, bene' chach laže' bene' ca' chesonxene' Jesucriston'.

Apolos gwđixjue'ede' xtiža' Diosen' ciuda Efeson'

²⁴ Na' ca tiemp na' bžin to bene' Israel ciuda Efeson' bene' le Apolos. Naque' bene' ciuda Alejandría. Le' chac cho'e diža' güen lao yogo' bene', na' ba nsede' binlo doxen Xtiža' Diosen' dan' nyoj. ²⁵ Apolosen' chejle'e dan' bzejni'i Juanna' che Xancho Jesúsen' na' nezde' can' bzoe' bene' nis caten' besyetinjde' xtoła'gaquen'. Na' Apolosen' be'e diža' do yichj do laže' bzejni'ide' binlo che Jesúsen', la'czla' con dan' bsd blo'e da' Juan na'zen' nezde'. ²⁶ Nach Apolosen' gwzolao be'e diža' che Xancho Jesucriston' lo' yodao' che bene' Israel ca' sin cbi chaž chžebe'. Na' cate' Priscilan' na' Aquilan' gosende' can' chzejni'i Apolosen', legaque' gosebejiže' le' na' bosozejni'ichde' le' che Jesucriston' da' ca' bina' nezde'. ²⁷ Gwdena' cate' Apolosen' bene' xbab šeje' distritw gan' nzi' Acaya, bene' Efeso ca' chesonxen Jesucriston' gose'e le' chone' güen dan' šeje' na' bosozoje' to cart da' bexue' che bene' ca' chesonxen Jesucriston' distritw Acaya cont bene' ca' bosolebe' le'. Na' Diosen' nži'ilaže' bene' Acaya ca' na' ba goclene' zane' cont chesejnilaže' Xancho Jesucriston'. Na' cate' bžin Apolosen' Acayan' be'lene' legaque' diža' da' goclenchguan legaque'. ²⁸ Bzejni'ide' yogo'loj bene' gože'ne' clelen' cheson bene' Israel gualaż chen' bi chesejle'e che Jesúsen'. Bzejni'ide' legaque' can' nyoj Xtiža' Diosen' žan Jesúsen' naque' Cristo ben' chesebeze' yedenabi'e.

19

Šlac gwzoa Pablon' ciuda Efeson'

¹ Na' šlac zoa Apolosen' ciuda Corinto, Pablon' beze'e bedie' yež ca' zjachi' do ya'adao' na' bežinte' ciuda Efeson'. Efeson' bežague' bał bene' chesonxene' Jesucriston'. ² Na' gože' legaque':

—¿Zedesoa Spiritw che Diosen' lo' yichjlažda'olen' caten' gwzolao chejni-laže'le Jesucriston'?

Nach gose'e le':

—Bi nezeto' še zoa Spiritw che Diosen'.

³ Nach Pablon' gože'e legaque':

—¿Bi dižan' chejle'le da' gwzoale nisen' še ca'?

Nach gose'e le':

—Gwzoato' nis can' bzejni'i da' Juanna'.

⁴ Nach gož Pablon' legaque':

—Da' Juanna' bzoe' bene' nis cate' besyetinjje xtoła'gaque' na' lecze gože' legaque' cheyała' yesonxene' bena' za' seła' Diosen'. Na' da' gwne' ca' be'e diža' che Jesucriston'.

⁵ Beyož bosozenague' can' gwna Pablon' nach gosezoe' nisa' da' yoble cont bosolo'e da' li chesejnilaže' Xancho Jesúsen'. ⁶ Nach Pablon' gwzoa ne'ena' yichj to toe' na' Spiritw che Diosen' gwzoan lo' yichjlaždao' to toe', nach gose'ne' diža' da' cbi chesejni'ide' na' goseyixjue'ede' bi dan' gož Diosen' legaque'. ⁷ Na' yogo' bene' ca' zjanac ca do šižinue'.

⁸ Na' do šone bio' Pablon' bsd blo'ede' bene' ca' chesedop chesežag lo' yodao' che bene' Israel ca' dan' zoa Efeson'. Bi bžebe', na' bzejni'ide' legaque' na' gwneyoede' legaque' yeson cuingaque' lo na' Diosen' cont nabi'e legaque' len xbab chegaquen'. ⁹ Na' bchoj bał bene' güedenag bene' cbi chesejle'cze', na' lao bene' ca' že' yodao'na' gose'ne' diža' ya' che xtiža' Jesucriston' dan' chzejni'i Pablon'. Da'nan' Pablon' bechoje' gan' že' bene' ca' na' bebeje' ben' ba chesonxene' Jesúcriston' na' gwche'e legaque' gan' zoa to yo'o xen che to bene' le' Tiranno na' bzejni'ide' legaque' yogo' ža. ¹⁰ Na' gwzoa Pablon' chop iz

bzejni'ide' bene' ca', na' can' goc, yogo' bene' že' distritw Asia gosende' xtiža' Xancho Jesúsen', bene' zjanac bene' Israel lente bene' bi zjanac bene' Israel.
 11 Na' Diosen' bchine' Pablon' cont bene' yela' guac da' besyebanchgüe bene'.
 12 Na' jasesane' no bay no lache' da' ba bchelen Pablon' gan' zjade bene' güe' na' la' chesyeyactede' bi yizgüe' chese'ede', na' bene' ca' yo'o nyaz da' xigüe' yichjlažda'ogaque'na' lecze besyechojen.

13 Lecze chesaš bal bene' Israel chesyebeje' da' xigüe' da' zjajo'o lo' yichjlaždao' bene' na' gosaclaže' yosočhine' la Xancho Jesúsen' cont yesyebeje' da' xigüe' ca', nach gose'e da' xigüen':

—Len yela' chnabia' che Jesúsen' ben' choe' Pablon' xtiže'na' chonto' mandaw wechojle.

14 Na' zoa to bxož gwnabia' che bene' Israel le' Esceva, na' nita' gaže xi'ine'. Na' bene' quingan' bosočhine' la Jesúsen' gosaclaže' yesyebeje' da' xigüen'.

15 Nach goc to šlas chesone' ca' cate' to da' xigüen' boži'in xtižen', gožen legaque':
 —Nombi'a Jesúsen' na' ba benda' diža' che Pablon', perw bi nombi'a le'e cont šejli'a xtiža'len'.

16 Nach bena' yo'o nyaz da' xigüen' bxite' gwnize' bene' ca' betlate' legaque' na' gwcheze' xalana'gaque'. Nach bosyoxonje' liž bena' ga'alyide' na' bedo chen zjanaque' dan' bene' legaque' zi'. 17 Na' goslas diža' can' goquen' gosenezete yogo' bene' že' Efeson', bene' Israel lente bene' cbi zjanac bene' Israel. Nach yogüe' besežebe' na' gosacbe'ede' Xancho Jesúsen' naque' bene' zaque'.

18 Nach bene' zan ba chesejle'e xtiža' Xancho Jesúsen', na' zane' goşoadole' lao bene' ca' chesedop chesežag chesonxene' Jesucriston' cheso'e diža' che da' malen' ba gosone'. 19 Na' bene' ca' gosac bene' guaža' na' bene' güene ya'a bosyotob libr chegaquen' na' gosoxen' bosozeyen' lao bene' lježe' bene' chesonxene' Jesucriston'. Na' besyebeje' cuent ca do gaca'te' zaca' libr ca' na' bžinen šiyon mil mechw plata, na' to to mechw plata ca' zacan' do tža žin. 20 Can' goc, bene' zan gosende' xtiža' Xancho Jesucriston', na' gwyanch bene' bosozenague' che'.

21 Nach gwde goc da' ca' Pablon' bene' xbab yeyeje' Jerusalenna', na' goclaže' yedie' šjayne'e bene' ca' že' yež gan' mbane distritw Macedonia len Acaya. Nach bene' xbab yeyož yeyeje' Jerusalenna' lecze cheyala' šeje' ciuda Roma. 22 Na' gwleje' chope bene' chesonlene' le' xšin Diosen' na' gwsele' legaque' distritw Macedonian', zjale' Timoteo na' Erasto, perw na' le' bega'anche' distritw Asian' yeto chope ža.

Bene' ca' besegue'ede' Pablon' gosebecchgüe' da' zed ciuda Efeson'

23 Na' gwche' to da' zed gual ciuda Efeson', le nita' bene' beseže'e xtiža' Jesúsen' dan' bsed blo'e Pablon'. 24 Quinga goc: gwzoa to bene' le' Demetrio bene' chon yodao' dao' de plata da' naquen' ca nac yodao' gan' zoa xonax Diana ben' chesonxene'. Na' bene' ca' gosonlene' žinna' gosonchgüe' gan, le gwda'ochguan. 25 Nach btobe' bene' ca' goson žin txen len le' na' nochle bene' goson žin dan' nac ca', na' gože' legaque':

—Nezele ca nac žin dan' nlancho choncho nga, chonlenchon gan xen. 26 Na' ba beneczele na' ba ble'eczele can' chon to bene' le' Pablo chsed chlo'ede' bene' lo' ciuda Efeso checho nga na' lecze chsed chlo'ede' zan bene' že' doxen distritw Asia nga, che'e legaque' bibi zaca' l' gua'a l'saca' da' cheson benačhen' cont chesejnilažen'. Na' bene' zan ba chosozenague' che' na' chesebejyichje' dan' chejnilaže'cho. 27 Le gonšč xbab nacle goncho, le xož yesene' che žin dan' choncho nga, na' gague lezen, san lecz xož yesone' cont yodao' che xonax

Diana chechon' yega'anen ca to da' bibi zaca' na' len yela' chze na' yela' zaca' che xonaxen'. Na' nezele ca nac xonax Diana chechon', yogo'cze bene' distritw Asia nga na' bene' gate'tezechle chesonxene' le'.

²⁸ Beyoż gosende' xtiža' Demetrimon' beselocchgüe' na' bososye'e gosene':

—Leca bene' zaca' xonax Diana che chio' bene' Efeso.

²⁹ Nach gwche' da' zed doxen lo ciudan', na' gosaque' toze' jasenize' chope bene' distritw Macedonia bene' gosaque' txen len Pablon', toe' le Gayo na' yetoe' Aristarco. Na' gosexobe' legaque' besežine' gan' chesedobe yogo' bene' lo ciudan'. ³⁰ Na' Pablon' goclaže' šo'e gan' zjandobe bene' ca' cont güe'lene' legaque' diža', perw bene' ca' chesonxene' Jesucriston' lo ciudan' bi goso'e latje šo'e. ³¹ Bał bene' zjanaque' bene' gwnabia' distritwna' zjanac xmigw Pablon' na' lecze gosesele' rson gose'e Pablon' bi šeje' gan' zjandobe bene' ca'. ³² Na' bene' ca' zjandoben' gosone' sšag juisyw. Gwde gwdele bososya'a to toe'. Na' bene' zan bi zjaņezde' bichen' zjandobe'na'. ³³ Bene' Israel ca' bosozigue' to bene' le Alejandro lao bene' ca' že'na' cont be'lene' legaque' diža', na' bosozejni'ide' le' bin' cheyała' ne'. Na' Alejandron' gwłis ne'e cont gwnabe' nite' šize yosozenague' diža' dan' güe'e laogaquen' gwzoe' rson che bene' česejnilaže' Jesucriston'. ³⁴ Perw cate' besele'ede' le' gosacbe'ede' lecze naque' bene' Israel, na' besyezolagüe' da' yoble bososye'e, gosene':

—Bene' zaca' juisyw xonax Diana che chio' bene' Efeso.

Ca do chop hor bososye'e ca' da' bi chesonxen bene' Israelen' xonax chegaquen'.

³⁵ Na' bene' güezoj chegaquen' cane goc bebecžie' legaque'. Na' gože'ne':

—Le'e bene' gualaž, yogo' bene' že' doxen yežlion' zjaņezde' naquen checho gapši'icho yodao' che xonax Dianan'. Naque' bene' zaque', le l' gua'a lsaca' čhen' blažon' le'e yaba. ³⁶ Na' nono gac na da' yoble. Da'n'an' le soa šize na' bich gonle da' bi zejen. ³⁷ Na' ca nac bene' quinga nche'ele nga, bibi na' yesebane' lo' yodao' checho ca' na' neca nacho chosožie' yela' ya' che xonax Diana chechon'. ³⁸ Na' Demetrio nga len yezica'chle bene' lježe', še chac bi chac chegaque' len bene' yoble, nita' bene' gwnabia' chechon' cont yesone' yela' justis chegaquen', con šja'aque' yeso'e legaque' part še ca'. ³⁹ Na' še bichle da' chñable gac, cheyała' goncho to yela' güexi'a cont choglaon. ⁴⁰ Perw ca nac žaš da' nga chac na'a, xož бага'cho choncho contr gobiern can' že'cho nga, na' bibi de ye'gacchone' še yeseñabe' bixčhen' goc žaš da' nga chac na'a.

⁴¹ Beyoż gože' legaque' ca' bene' mandadw besyežaše'.

20

Pablon' gwyejche' distritw Macedonia na' nación Grecia

¹ Nach cate' beyoż gwche'ži da' zeden', Pablon' goxe' bene' Efeso ca' chesonxen Jesucriston' cont ja'aque' gan' zoe'na' na' bene' čačh laže'gaque' cont yesenite' yesejnilaže' Jesucriston'. Nach gože' legaque': "Nayežagcho", na' goseyela' lježe' na' beze'e beyeje' da' yoble distritw Macedonia. ² Na' gwdie' to to yež da' zjachi' gała'ze Macedonian' bene' čačh laže' bene' ca' chesonxene' Jesucriston', na' beyožen' gwyejche' nación da' nzi' Grecia. ³ Na' gwzoe' Grecian' šon bio'. Na' cate' bžin ža yeze'e, ba zoa yeyo'e lo' barcon' yeyeje' distritw Siria gan' nac laže' cate' gwnežde' zjachi'nao' bene' Israel ca' le'. Da'n'an' bene' xbab yeza' ni'e yedie' gan' mbane distritw Macedonia na'le. ⁴⁻⁵ Na' xonj bene' ja'aque' ciuda da' nzi' Troas gan' gosebeze' Pablon' len neda' Lucas, na' gosa'aclene' neto' distritw Asia. Quinga zjale bene' ca': Sópater,

beñe' yež Berea, na' Aristarco len Segundo ben' zjanac beñe' ciuda Tesalónica, na' Gayo beñe' yež Derbe, na' Timoteon' na' chope beñe' za'ac distritw Asia, Tíquico len Tróximo. ⁶ Na' gwde ĩnin' cate' chesagüe' yetextil da' bibi levadura nghixen, neda' len Pablon' gwza'to' Filiposen' na' goc gayo' ža cate' bžinto' ciuda Troas gan' ba nita' beñe' ca' chesebeze' neto', nach gwzoato' na'ze gaže ža.

Can' goc šlac zoa Pablon' Troas

⁷ Na' cate' bžin ža dmigw besedobe beñe' ca' chesonxene' Jesucriston' lo ciuda Troasen' na' gweyeto' güe'ej gwdagwto' txen len legaque', na' Pablon' bzejni'ide' legaque' xtiza' Diosen'. Na' dan' ba zoa yeza' Pablon' ca gwxeze nach be'e diža' bžinte do chel. ⁸ Na' yogo'to' ndop nžagto' to lo' yo'o de šon cuia, yo'oto' lo' cuarten' dan' zoa yichjen cha'te, na' zjaze da' zan yi' lámpara. ⁹ Na' to bi' güego' lebe' Eutico žiabe' cho'a ventan. Na' Pablon' ton' zej diža' dan' cho'ena' na' gwtas bi'na' gan' žiabe' cho'a ventanna'. Na' šlac chtasbe' blažo'be' lo yo che'ele. Nach cate' besyecose'be' bi' guat besyecose'. ¹⁰ Nach Pablon' betje' bžine' gan' jasyedixjue'eben' na' bcheque' lao bi' guata' gwdele'be'. Nach gože' beñe' ca':

—Bi žeble, mbanczbe'.

¹¹ Nach Pablon' begüe' da' yoble na' gosagüe' na' bezolagüe' cheyo'e diža' len legaque'. Ne' choe'te' dižan' ca' cate' gwyeni'. Nach beze'e. ¹² Nach bi'na' blažo' cho'a ventanna', beñe' ca' že'na' besyech'e'ebe' besyebchgüede' dan' mbanczbe'.

Gosa'aque' ciuda Troasen' na' ja'aque' ciuda Mileto

¹³⁻¹⁴ Nach bxi'ato' len Pablon' neto' hebialaoto' beyejto' lo' barcw bežinteto' ciuda gan' nzi' Asón na' Pablon' gwyazlaže'che' begüe'e nez bela'te' Asónna' cont gwyo'e lo' barcon' txen len neto'. Nach gweyeto' ciuda gan' nzi' Mitilene. ¹⁵ Bezsa'to' Mitilenen' na' beteyo bežinto' gala'ze to yežlio da' chi' lo' nisdan' gan' nzi' Quío. Na' gwde yeto ža bežinto' gan' chi' yeto yežlio lo' nisdan' da' nzi' Samos. Na' bechojto' lo' barcon' gweyeto' yež dan' nzi' Trogilio gan' bega'ant'o' tže' bezi'laže'to'. Nach beteyo bezyo'oto' lo' barcon' na' bežinto' ciuda Mileto. ¹⁶ Ca' bento' bi' gwdeto' ciuda Efeson', le Pablon' bi' goclaže' šede' yež ca' zjachi' do distritw Asian'. Chachyende' yob žine' Jerusalenna' še gala' soe' na' ža ĩni dan' nzi' Pentecostés.

Pablon' bšajlene' beñe' chosogüia chesene'e beñe' ca' chesonxen Jesucriston' Efeson'

¹⁷ Na' šlac zoato' ciuda da' nzi' Mileto Pablon' goxe' beñe' Efeson' beñe' chosogüia chesene'e yezica'chle beñe' ca' chesonxene' Jesucriston'. ¹⁸ Na' cate' besela'aque' Pablon' gože' legaque':

—Nezele can' bena' caten' gwzoo' distritw Asia gan' zoa lažlen', bena' da' güen šlac gwzoo' len le'e gwzolaotia' ža nechw žan' bžina' na'. ¹⁹ Gwzoo' bena' xšin Diosen' na' bi' benxen cuina'. Zan ni'a gwchežchgua' chele. Na' da' zan da' bosochi bososaca' beñe' Israel ca' neda'. ²⁰ Bzejni'ida' le'e yogo' dan' byažje šejni'ile, neca bezi'laža', bzejni'ida' le'e do gan' chdop chžagle na' len liž to tole. ²¹ Bzejni'ida' beñe' zjanac beñe' Israel gualaž chia' lente beñe' cbi zjanac beñe' Israel can' chaclaže' Diosen' yesyetinje xtola'gaquen' na' yesejnilaže' Xancho Jesucriston'. ²² Na' na'a yeya'a Jerusalén, le Spiritw che Diosen' chonen byen yeya'a, na' bi' nežda' bin' gac chia' yežina' na'. ²³ Con nežda' to to yež gan' ba bedia' Spiritw che Diosen' ba bzejni'in neda' doła' gata' ližya na' gac bichle

da' saca'zi'a. ²⁴ Perw bi chi' yichja' che da' ca' saca'zi'a. La'czla' še yesote' neda', chzanda' yeła' mban chia'. Toze da' chi' yichja' ša'lao gona' yogo' dan' gwlo' Xancho Jesucriston' lo na' gona', na' soa' mbalaz lo' yichjlažda'oguan' šlac chonan', le Xanchona' gwleje' neda' cont chyixjue'eda' diža' catequen' nži'ilaže' Diosen' benachen'.

²⁵ 'Ca nac le'e, ba bzejni'ida' le'e che yeła' chnabia' che Diosen', perw na'a ne tole bich le'ele neda'. ²⁶ Da'nan' chnia' le'e bibi doła' napa' še nole cuiayi'. ²⁷ Bač bzejni'ida' le'e yogo' dan' chaclaže' Diosen' nezele, bibi bcuaša'. ²⁸ Da'nan' cheyała' cuec yichjle che yogo'loł dan' ba bzejni'ida' le'e na' lecce ca' le gwsed le gwlo'e yezica'chle bene' chesedop chesežag chesonxene' Xancho Jesucriston' cont yosozenague' che dan' ba bzejni'ida'. Le gon ca' le Spiritw che Diosen' ba gwlejen le'e cont gwzejni'ile yezica'chle bene' chesonxene'ne'. Jesucriston' bnežjw cuine' bedelałj xchene' beque'e xtoła'chon' cont bozoe' chio' binlo len Diosen' da' yoble. ²⁹ Nezda' cate' bich zoa' len le'e yesela'ac bene' yese'nde' yesexoayague' le'e cont cuejyichjle bich gwzenagle che Jesucriston'. ³⁰ Ladjw le'e yesechoj bene' yososed yosolo'ede' diža' güenlaže' gualaz da' yososed yosolo'ede' diža' li. Yesone' ca' cont ga'ole dan' yososed yosolo'che legaque'. ³¹ Da'nan' le gwsaca' cont nono yesexoayag le'e. Na' le gon xbab, le šon izen' ba gwzoa' bzejni'ida' le'e na' gwneyoeda' le'e do ža do yel gwchežtia' chele.

³² 'Na' na'a bene' migw, Diosen' gaclene' le'e na' xtiže'na' gwzejni'ichen can' chacde' le'e. Na' xtiže'na' gaclenen le'e cont šjayzoalenle Diosen' txen len yezica'chle bene' ba gwlej Diosen' zjanaque' lo ne'e. ³³ Bi chzelaža' bi da' de che bene', neca chzelaža' xmechwgaque' na' neca xagaque'. ³⁴ Nezczele can' bena' žin cont bžel da' byažjda' len da' beseyaže bene' ca' gosenite' len neda'. ³⁵ Na' bena' žinna' ca' cont blo'eda' le'e cheyała' gaclencho bene' še bi cheseyažjde'. Na' šjasa'laže'le can' gwna Xancho Jesusen': "Mbalazech zoacho caten' chnežjwcho bi dan' chnežjwcho bene' clcl ca caten' chesone' chio' bi dan' chesone' chio'."

³⁶ Na' beyož be' Pablon' dižan' nach bzoa xiben' txen len yogo' bene' ca' na' bosol güiže' Diosen'. ³⁷ Na' yogo'lole' gosebeže' che Pablon' na' goseyele' le' na' bosonope' ne'ena'. ³⁸ Nach gosa'aque' len neto' bžinteto' gan' beyo'oto' lo' barcon'. Da' juisyw gosacde' dan' gože' legaque' bich yesele'ede' le'.

21

Pablon' beyeje' Jerusalén

¹ Beyož bze diža' lježto' len bene' ca' nach beyo'oto' lo' barcon' na' zjaydato' liča bžinteto' gan' chi' to yežlio lo' nisdaon' da' nzi' Cos, na' beteyon' bežinto' gan' chi' yeto yežlio lo' nisdaon' da' nzi' Rodas, nach bezsa'to' bežžinto' ciuda Pátara. ² Na' cate' bežinto' Pátaran' bželetyo' yeto barcw dan' chzan' šejen distritw Fenicia, na' beyo'oto' lo'enna'. ³ Na' ba zjaydato' lo' barcon' cate' ble'eto' yežlio dan' chi' lo' nisdao' dan' nzi' Chipre, chin' šla'a rovesle. Nach bedeto' zjaydato' gan' mbane distritw Siria. Nach cate' bežžinto' ciuda gan' nzi' Tiro besyeletje' yoa' da' zonsa' barcon' na' neto' bechojto' lo' barcon'. ⁴ Na' jaydiljwto' bene' ca' chesonxene' Jesucriston' Tiron' na' bega'anlento' legaque' to xman. Na' Spiritw che Diosen' bzenen legaque' cont gosata'yoede' Pablon' bi šeje' ciuda Jerusalénna'. ⁵ Perw na' cate' ba gwde to xman beza'to', na' yogüe' len xi'ingaque' len xo'olgaque' gosa'aque' len neto' cho'a yežen' na' bzoa xibto' len legaque' boł güižto' Diosen' cho'a nisdaon'. ⁶ Beyožen' bze diža'

lježto' na' gwdeła' lježto', nach beyo'oto' lo' barcon' na' legaque' besyeya'aque' zjaya'ac ližgaque'.

⁷ Na' beza'to' ciuda Tiron' bežinto' gan' že' ciuda Tolemada. Nach beyetjto' lo' barcon' jayna'to' bene' ca' chesonxene' Jesucriston' lo' ciuda Tolemaidan' na' bega'anlento' legaque' tža. ⁸ Na' beteyo beza'lento' Pablon' na' bežinto' Cesarean' na' jayga'anto' liž Felipe ben' naque' txen len bene' ca' yexop ben' chesaclene' postlw ca' len žin bixjw da' gota'. Na' Felipen' zoateze' cho'e diža' che Jesucriston'. ⁹ Felipen' nita' tap xi'ine' no'ol güego' na' chosozende' bene' bi dan' ba gož Diosen' legaque'. ¹⁰ Zan ža ba gwzoato' liž Felipen' cate' bla' to bene' distritw Judean' bene' le Agabo, lecze chaque' chzende' bene' bi dan' ba gož Diosen' le'. ¹¹ Nach Agabon' gwnabe' xpant Pablon' na' bchejen' ni'a ne'e, na' gože' neto':

—Spiritw che Diosen' ba bzenen neda' bene' Israel ca' že' Jerusalénna' yosocheje' ni'a na' ben' nac che' bant nga na' yesone' le' lo' na' bene' ca' bi zjanac bene' Israel.

¹² Cate' beyož beneto' can' gwna Agabon', neto' len bene' Cesarea ca' gota'yoeto' Pablon' bi šeje' Jerusalénna'. ¹³ Nach Pablon' gwne':

—Bi cuežle chia' o gonle ga soayaša'. Chzane cuina' yosocheje' neda' na' yesote' neda' Jerusalénna' dan' chyxjue'eda' xtiža' Xancho Jesusen'.

¹⁴ Na' cate' gocbe'eto' bibi gac gonto' cont cbi šeje' ciuda Jerusalénna', nach bich bi gožto'ne', con gwnato':

—Gac con can' ža Xanchon'.

¹⁵ Nach bsini'ato' beza'to' zjaydato' Jerusalén. ¹⁶ Na' to chope bene' Cesarean' bene' chesonxen Jesucriston' gosa'aque' txen len neto', na' goseche'e neto' liž to bene' le Mnasón. Bena' ba goc sša chonxene' Jesucriston'. Naque' bene' Chipre, perw ba zoa liže' Jerusalénna'. Na' ba bosoxi'e soato' liže'na'.

Pablon' bežine' Jerusalénna' jane'e Jacobon'

¹⁷ Na' cate' bežinto' ciuda Jerusalénna' bene' lježto' ca' že'na' besyebede' bosoguape' neto' tiox. ¹⁸ Na' beteyo gwyejlento' Pablon' jana'to' Jacobon', na' bžinto'na' ba zjandop zjanžag yogo' bene' blao ben' chosogüia chesene'e yezica'chle bene' ca' chesonxene' Jesucriston' na'. ¹⁹ Nach Pablon' bguape' legaque' tiox na' beyožen' be'lene' legaque' diža' doxen can' ba ben Diosen', le zan bene' bi zjanac bene' Israel ba chesonxene' Jesucriston' gan' ba gweje' je'lene' legaque' xtiža' Diosen'. ²⁰ Na' cate' bosozenague' dan' gož Pablon' legaque', nach gosoe' yela' choxcen che Diosen' na' gose'e Pablon':

—Bene' migw, nezdo' zan mil bene' Israel gualaž checho ca' ba chesonxene' Jesucriston' na' yogüe' chesacde' chonen byen goncho yogo' da' ca' zjanyoj le'e ley chechon' dan' bzoj Moisés. ²¹ Na' zane' ba zjanende' chsed chlo'edo' bene' Israel gualaž chechon' nita' laž bene' zito' bich cheyala' yesone' can' ža le'e ley chechon' na' bi yesezoa' xi'ingaque' ca' señw dan' že' circuncisión. ²² ¿Nacxe ye'to' legaque'? le zane' yesežag nga cate' yesende' bačh zo' nga da' yoble. ²³ Güen goncho quinga: nita' tap bene' nga bene' zoa to da' zjango'o cho'en lao Diosen' na' chesaclaže' yesone' can' gosenen'. ²⁴ Na' cheyala' chi'o legaque' yodao' blaon' na' gono'ne' txen chixjo' beyixe' ca' gwnežjwle bxozen' gote' cont yexi' yeyachle can' ža leyna'. Na' yeyožen' gac yosošib yichjgaque' can' zjango'o cho'en. Gono' ca' len legaque' cont yogo' bene' yesache'ede' bi chzo' ley chechon' to šla'ale can' chesenen', san chono' can' žanna'. ²⁵ Na' ca' nac bene' ca' bi zjanac bene' Israel bene' ca' chesonxene' Jesucriston' yež yoble, ba bzojto' legaque' can' nac yela' güexi'a chechon', gožto'ne' bi yesagüe'

yela' guagw dan' chesene' naquen che l gua'a lsacan' chesejnilaže' bene', na' bi yesagüe' chen, na' bi yesagüe' be chat chosošoque' lba'ba', lecze bi yesata'lene' no'ole bi nac xo'olgaque' o bene' byo bi nac bene' chegaque'.

Gosezene' Pablon' yodao' blaona'

²⁶ Beteyo gwza' Pablon' gwche'e bene' ca' tap cont yesyexi yesyeyache' yodao' blaona' can' ža' ley chegaque'na'. Nach Pablon' gwyo'e gana' zoa b̄xozen' gwdixjue'ede' le' bi ža yanen' yeyož yesaque' xi'laže' cont yosonežjue' beyixe' ca' gote' che to to legaque'.

²⁷ Bač zoa gac gaže ža chesone' can' ža leyna' cont chesyexi chesyeyache', nach gozej Pablon' lo' yodao' blaona'. Na' bal' bene' Israel ca' za'ac distritw Asian' besele'ede' le' lo' yodaon' na' gosego'oyele' bene' že' do na' cont yesezene' Pablon'. ²⁸ Bososya'adie', gosenē':

—Le'e bene' gualaž, le gon txe sencho benga. Chde' doxen chsed chlo'ede' contr yež Israel chechon', na' contr ley chechon' dan' bzoj da' Moisésen', na' contr yodao' checho nga. Na' na'a ba none' yeto da' mal juisyw contr yodao' dan' nac che Dios chechon', ba gwlo'e bene' bi zjanac bene' Israel lo'enna'.

²⁹ Gosene' ca' neče da' besele'ede' Pablon' lo' ciudan' chdalene' to bene' ciuda Efeso le' Tróximo, na' gosacde' še Pablonan' gwche'e le' lo' yodao'na', la'czla' bi bene' ca'.

³⁰ Na' gosonchgüe' to žašyey. La' besedobte bene' zan cho'a yodaon' na' goso'e lo' yodaon' gosenize' Pablon', besyebeye' le' na' la' bosyosejwte' puert ca'. ³¹ Na' ba zoa yesote' le' cate' gwneze ben' yo'o lo' ne'e soldadw che nación Roma ben' že' lo' ciudan'. Cate' gwneze' ba chac to žašyey juisyw doxen ciudan', ³² nach btobe' soldadw ca' len bene' gwnabia' chegaque' ca', na' gosa'aque' zja'acsesē' gan' chi' da' zeda'. Na' cate' bene' ca' chesote' Pablon' besele'ede' ba besežin soldadw ca' len bene' gwnabia' chegaque' ca', la' gosebezte' bich goseyine' Pablon'. ³³ Cate' ben' yo'o lo' ne'e yogo' soldadon' bžine' gan' že' bene' ca', na' bene' mandadw gosoxe' soldadw che' ca' Pablon' na' bosocheje' le' chope gden. Nach gwñabde' bene' ca' že'na' no nac Pablon' na' bi bene'. ³⁴ Na' bene' ca' že'na' bososya'adie', gwde gwdele chesena to toe'. Na' gwde cbi gwyejni'i ben' yo'o lo' ne'e soldadw ca' bin' chac catec sšag chesone', nach bene' mandadw goseče'e Pablon' cuartel. ³⁵⁻³⁶ Nach yogo' bene' ca' zjana'ogüe' legaque' chesosye'e zjambeque' to žaš juisyw. Na' cate' besežine' cho'a nepe' che cuartelen' goselen' soldadw ca' Pablon' neče dan' chesaclaže' bene' ca' yesenize' le', na' yogo' bene' ca' chesosye'e, chesene':

—Le gote'.

Pablon' be'lene' bene' zan ca' diža'

³⁷ Bač cheso'e lo' cuartelen' cate' Pablon' gože' ben' yo'o lo' ne'e soldadw ca':

—¿Goño' latje gua' to chope diža'?

Nach bena' gože'ne':

—¿Chaco' diža' griego? ³⁸ ¿Bi naco' bene' nación Egipto ben' gwda btob tap mil bene' güet bene' bat ngaze na' gwche'e legaque' latje dašen' gan' chesone' contr gobiernen'?

³⁹ Nach Pablon' gože'ne':

—Gague benan' neda'. Neda' naca' to bene' Israel na' ciuda blao gan' mbane distritw Cilician' dan' nzi' Tarso nac laža'. Ben goclen beñ latje güe'lēna' bene' quinga diža'.

⁴⁰ Nach bena' bnežjue' latje. Nach Pablon' gwzeche' lo nepen' bene' señw len ne'e cont bene' ca' že'na' gosenite' šize bosozenague' che'. Nach gwzolagüe' be'e diža' len legaque' diža' hebreo.

22

¹ Gože' legaque':

—Bene' gole len bene' xcuide', le gwzenag diža' dan' gua' laole nga.

² Na' cate' gosacbe'ede' chne' legaque' diža' hebreo gosenite' šize. Nach Pablon' gože' legaque':

³—Neda' naca' bene' Israel. Golja' ciuda Tarso gan' mbane distritw Cilicia, perw gwcha'ogua' ciuda Jerusalén ni. Na' bseda' len maestrw blao ben' le Gamaliel. Bzejni'ide' neda' doxen can' ža ley che da' xozxta'ocho ca'. Na' godca' chonchgua' can' chazlaže' Diosen', cayanen' chaque le'e za'acle nga na'a. ⁴ Na' bchi bsaca' zan bene' ca' chesejnilaže' Jesucriston', goclža' gotto' legaque'. Na' gwxena' no bene' byo na' no no'ole chesonxene' le' na' gwche'egaca'ne' ližya. ⁵ Bxoz ben' naquech bene' blao na' nochle bene' gole blao ca' chesenabia' nación Israel chechon' zjanezde' can' bena'. Legaque' gosone' yiš dan' beğua' gwy'a ciuda Damascon' gan' godca' sena' baltez bene' chesonxen Jesucriston' cont che'egaca'ne' Jerusalén ni par gonto'ne' castigw.

Pablon' cho'e diža' can' goc che' cate' Diosen' bocobe' yiçhjlazda'ogüe'

(Hch. 9:1-19; 26:12-18)

⁶ Na' šlac zya'a ciuda Damascon' ca do guagwbiž cate' to be'ni' gual da' za' yaba gwyechjen neda'. ⁷ Na' gwbiža' lo yon' benda' to bene' gože' neda': "Saulo, Saulo žbixchen' chçhi chsaco' neda'?" ⁸ Nach boži'a xtižen', goša'ne': "žNo le' bene'?" Nach gwne': "Nedan' Jesús bene' Nazaret na' neda' chçi chsaco'." ⁹ Bene' ca' zya'alena'na' besežebçgüe' besele'ede' be'nin', perw bi gosejni'ide' dan' gož Jesúsen' neda'. ¹⁰ Nach goša'ne': "žBin' cheyała' gona' Xana'?" Nach Xana' Jesúsen' gwne': "Beyas na' gwyetjeze ciuda Damascon', na' cate' žino'na' to bene' ye'e le' dan' cheyała' gono'." ¹¹ Na' gwçhola' catec gwna'chgua' be'nin', nach bene' ca' zya'alena' txen gosoxe'de' taca' cont bžinto' Damascon'.

¹² Na' to bene' le Ananías zoe' ciuda Damascon' ben' chonxene' Diosen' do yiçh do laže' na' chzenague' che yogo' ley dan' bzoj Moisésen'. Na' yogo'lol bene' gualaz checho ca' že'na' cheso'e xtiža' Ananiasen' naque' bene' chon da' güen. ¹³ Ananíasna' bide' gan' zoan' na' cate' ble'e nach gože' neda': "Saulo, bele'e." Na' beyož gwne' ca' la' bele'eteda' na' ble'eda' le'. ¹⁴ Nach gože' neda': "Dios ben' chonxencho na' ben' benxen da' xozxta'ocho ca', len' ba gwleje' le' cana'te cont neždo' can' chaclaže' gono', na' ba ble'edo' Xi'ine' ben' nac la'zelagüe bene' chon da' güen, na' ba bendo' xtiže'. ¹⁵ Nachen' go'o xtižen' len bene' zan bene' že' lo yežlion' gwzejni'igacdo'ne' da' ca' ba bendo' na' ba ble'edo'." ¹⁶ Na' lecz gož Ananíasen' neda': "žBiçhen' cuezo'? Yo'o so' nis. Na' nabdo' Xancho Jesucriston' cont yeya' yeyibe' yiçhjlazda'oguo' len da' malen'." Can' gože' neda'.

Diosen' gwleje' Pablon' cont be'e xtižen' len bene' ca' bi zjanaque' bene' Israel

¹⁷ Na' gwdena' beyeda' ciuda Jerusalén ni na' gwy'a lo' yodao' blaon' jel güiža' Diosen', na' šlac çhol güiža'ne' ble'edagüeda' Xancho Jesucriston'. ¹⁸ Na' Xancho' gože' neda': "Bi šedo' chojo' ciuda Jerusalén ni, le bi yosozenag bene' quinga xtižo' dan' go'o çhian'." ¹⁹ Nach goša'ne': "Xana', legaque' zjanezde' neda' gwy'a to to yodao' jet jatina' bene' ca' chesonxene' le' na'

bseyjwgaca'ne' ližya. ²⁰ Na' lec̄ naca' bene' ca' txen cate' gosote' Esteban ben' be' xtižon', na' neda' gwna'a xadon̄ che bene' ca' gosot le'." ²¹ Nach Xancho Jesucriston' gože' neda': "Bchoj na' sela' le' zito' go'o xtižan' len bene' ca' bi zjanac bene' Israel."

Pablon' len ben' yo'o lo ne'e soldadw ca'

²² Bene' ca' zjandoben', nga zelao bosozenague' xtiža' Pablon', beseže'e da' be'e diža' che bene' zito' bene' bi zjanac bene' Israel, nach gosezolagüe' chososye'e, chesene':

—Le got bena'. Bich cheyała' bane'.

²³ Bososya'adie' na' beselocchgüe' bosozala' xagaque' ca'ale na' gosaše' bište yon' bosozalen' lo be'. ²⁴ Cate' ble'e ben' yo'o lo ne'e soldadw ca' can' chesonen' nach bene' mandadw gosego'o soldadw ca' Pablon' lo' cuartelen' na' yeseyine'ne' cont güe'e diža' bi da' malen' ba bene'. Goclaže' nezde' bichen' bene' lo ciudan' chososya'adie' che'. ²⁵ Na' ba zjancheje' Pablon' cont yeseyine' le' cate' gože' to soldadw ben' zena' bene' chnabi'e lao to gayoa soldadw:

—Can' ža ley, bi de l̄sens chin̄le neda' sin cbi nezele še bin' nona', le neda' naca' bene' nación Roma.

²⁶ Beyož gože' bene' gwnabia' che soldadon' ca' la' gwyeyte ben' lao ben' yo'o lo ne'e yogo' soldadw ca', ježe'ne':

—Gwsaco' bin' gondo' ben' ba bdołan', le naque' bene' nación Roma.

²⁷ Nach ben' yo'o lo ne'e soldadw ca' gwyeyje' lao Pablon' gože'ne':

—Gwna neda' žle bene' nación Roma le'?

Nach Pablon' gože'ne':

—Bene' nación Roma neda'.

²⁸ Nach ben' yo'o lo ne'e yogo' soldadw ca' gože' Pablon':

—Mechw xen gwxaqueda' cont naca' cuent len bene' nación Roman'.

Nach Pablon' gože'ne':

—Neda' golja' naca' bene' nación Roma.

²⁹ Nach bene' ca' ba nita' cont yeseyine' Pablon' la' besyecuašte' cuiten', na' ben' yo'o lo ne'e yogo' soldadw ca' lec̄ze bžebe' dan' ba bcheje' Pablon' cont yeseyine'ne'.

Gosesel̄e' Pablon' gan' chosoxi'a bene' ca' chesenabia' Israelen'

³⁰ Nach beteyo ben' yo'o lo ne'e soldadw ca' gwseže' gden̄na' nchej Pablon'. Na' bene' mandadw besedobe b̄xoz gwnabia' ca' len yogo' bene' gole blao ca' chesenabia' nación Israelen' cont nezde' bi dan' chosocuiše' Pablon'. Na' cate' ba besedobe bene' ca' nach gwleje' Pablon' na' gwsele' le' gwzeche' laogaquen'.

23

¹ Nach Pablon' gwne'e bene' gole blao ca' chesenabia' nación Israelen' na' gože' legaque':

—Bene' migw, ža na'aža nezda' lo' lažda'ogua' ba bena' can' chazlaže' Diosen'.

² Nach Ananías ben' nacch b̄xoz blao bene' mandadw len bene' ca' zjaze cuit Pablon' yesebaže' cho'ena'. ³ Na' Pablon' gože'ne':

—jDiosen' gone' le' castigw, bene' güexoayag! Chi'o nga cont gono' yela' justis chia' can' ža ley chechon' na' chono' contr ley beno' mandadw yesebaže' choa'.

⁴ Bene' ca' že' gała'ze gose'e Pablon':

—Bi cheyała' yoži'o xtižen' ca', le naque' b̄xoz blao che Dios.

⁵ Nach Pablon' boži'en gwne':

—Beñe' migw, bi gwne'zda' še benga bꝁoz blaon'. Ne'zda' Xtiža' Diosen' dan' nyojen žan: “Bi yoži'ile diža' zi' len beñe' gwnabia' ċhelen'.”

⁶ Pablon' goċbe'ede' bene' ca' chesenabia' nación Israelen' zjanaque' ċhople. Bałe' chesejle'e can' ċhsed ċhlo'e beñe' ca' zjansi'e saduceo na' yebałe' can' ċhsed ċhlo'e bene' ca' zjansi'e fariseo. Nach Pablon' gože' beñe' ca' že'na':

—Beñe' migw, naca' beñe' fariseo, na' naca' xi'in beñe' fariseo. Na' zoa' nga ċhonle yela' justis ċhia' neċhe ċhejli'a yesyeban beñe' guat ca'.

⁷ Beyož gwne' ca' beñe' fariseo ca' len bene' saduceo ca' ben' zjandop zjanžag na' gosezolaġüe' ċhosošaše', na' beseċhoje' ċhople. ⁸ Le beñe' saduceo ca' chesene' bi yesyeban beñe' guat ca' na' bi chesejle'e nita' angl o nochle spiritw yoble. Na' beñe' fariseo ca' chesejle'e yesyeban beñe' guat ca' na' chesejle'e nita' angl na' nita' nochle spiritw. ⁹ Yogo' ben' že'na' ċhesosye'e ċhosošaše'. Nach to ċhope beñe' zjansed ley dan' bzoj Moisésen', ben' zjanac beñe' fariseo, gosezože'e gosone' Pablon' txen, gosene':

—Bibi da' mal non benga. Še no spiritw o no angl ba gwnelen le', bi cheyała' gonċho contr le', le' contr Diosen' gonċho še ca'.

¹⁰ Le'ca gwċhe' to žaš xen na' ben' yo'o lo ne'e yogo' soldadw ca' bžebe' še yosozoxj yosotine' Pablon'. Nach bene' mandadw besežin soldadw ċhe' ca' cont jasyeleje' Pablon' ladjo beñe' ca' na' besyeċhe'ene' cuartelen' da' yoble.

¹¹ Nach že' beteyon' Xanċho Jesucriston' bžine' gan' de Pablon' na' gože'ne':

—Bi žebo' Pablo. Can' ba bi'o xtižan' Jerusalén ni, le'cz ca' cheyała' go'o xtižan' ciuda Roma.

Bosoxi'e yesote' Pablon'

¹² Na' beteyo bał beñe' Israel besedobe' na' bosoxi'e yesote' Pablon'. Na' goseċhogbi'en, gosene':

—Diosen' goñe' ċhio' castigw še ye'ej gagwċho sin ċbiña' gotċho Pablon'.

¹³ Nde ċhoa beñe' bosoxi'e yesote' Pablon'. ¹⁴ Nach ja'aque' gan' že' bꝁoz gwnabia' ca' len beñe' gole beñe' blaoc ca' chesenabia' nación Israelen' na' gose'e leġaque':

—Baċh gwċhogbia'to' gon' Diosen' neto' castigw še ye'ej gagwto' sin ċbiña' gotto' Pablon'. ¹⁵ Na' le' yotobe lježle le' gon yela' güexi'a gwꝁe cont nabele ben' yo'o lo ne'e yogo' soldadw ca' cueje' Pablon' yide' laolen', gwde'ele za' yeyiljwyožeċhe bi da' xinj ba none'na'. Na' neto' cue'na'oto'ne' tnez gotto'ne' cate' za' le'e gan' nita'len'.

¹⁶ Na' zoa to bi' byo bi' nac xi'in beñe' zan Pablon' na' lebe' benebe' da'na' ċhesacde' yesonde' le'. Na' gwyejbe' cuartelen' jazenebe' Pablon'. ¹⁷ Nach Pablon' goxe' to beñe' ċhnabi'e to gayoa soldadw na' gože'ne':

—Ben goċlen gwċhe' bi' nga lao beñe' gwnabia' ċhelen'. De to da' ye'be' le'.

¹⁸ Beñe' gwnabia' ċhe soldadon' gwċhe'e bi'na' lao ben' yo'o lo ne'e yogo' soldadw ca' na' gože' le':

—Pablo ben' de ližya goxe' neda' na' gwñabe' goċlen lagua' cont zedesana' bi' nga laguon', že' de to da' ye'be' le'.

¹⁹ Nach ben' yo'o lo ne'e yogo' soldadw ca' beꝁue' na'be' gwċhe'ebe' to šla'ale gwñabde'be':

—¿Bi ċhe'ndo' nao' neda'?

²⁰ Nach bi'na' gožbe' le':

—Beñe' blaoc ċhe beñe' Israel gualaž ċheto' ca' ba bosoxi'e yesenabe' cuejo' Pablon' gwꝁe na' yosode'ede' selo'ne' gana' ċhesežag beñe' gwnabia'

čhegaquen' cont yeseyiljwyože' bi da' xinj non Pablon'. ²¹ Perw bi šejli'o čhegaque'. Nde čhoa bene' ca' yesebe'na'ogüe' Pablon' tnez cont yesote' le' na' ba gosečhogbi'en bibi yese'ej yesagüe' šlac biña' yesote'ne'. Na' ba chesebeze' gwzenago' čhegaque' cont cuejo' Pablon'.

²² Nach ben' yo'o lo ne'e soldadon' bose'e bi'na' na' gože'be':

—Gwsaco' bi go'o diža' che rsonna' ba bedesano' lagua' nga.

Gosesele' Pablon' lao gobernador ben' le Félix

²³ Nach ben' yo'o lo ne'e yogo' soldadw ca' goxe' chope bene' gwnabia' ben' chesenabia' to gayoa güeje soldadw na' bene' mandadw yososiñi'a čhegaque' cont šja'aque' ciuda Cesarea do cheda ga šeže'le na' yeseče'e čhop gayoa soldadw bene' yesa'ac ni'aze na' gayonši bene' yesebia cabayw na' yečhop gayoa soldadw bene' yesoxe' lanza. ²⁴ Lecze gože' legaque' chyažje cabayw be' cuia Pablon', le le'na' yeseče'e gana' zoa gobernadore' ben' le Félix, na' yesape' Pablon' cont bibi gac če' tnez. ²⁵ Nach bzoje' to cart če' gobernadore' da' bgoxe' legaque', žan:

²⁶ “Señor Gobernador: Neda' Claudio Lisias chzoja' le' gobernador Félix, nacteco' bene' blao, chguapa' le' tiox. ²⁷ Bene' Israel ca' ba gosezene' benga na' ba bosoxi'e yesote'ne', perw cate' gwnežda' naque' bene' nación Roma, gwy'a len soldadw chia' ca' jasla'ne' lo na'gaquen'. ²⁸ Na' cont nežda' bičen' chosocuiše' le', gwčhi'ane' gan' chosoxi'a bene' gwnabia' če' nación Israelen'. ²⁹ Nach gwnežda' chosocuiše' le' če' bize da' chesac če' len ley čhegaque' na', na' bi' nacho bi da' mal ba none' cont yesote' le' o cont gate' ližya. ³⁰ Perw na' ba gwnežda' ba bosoxi'a bene' Israel ca' yesote' le', da'nan' la' chsel'a'tia'ne' laguo' le' na' lecze bena' mandadw len bene' ca' chosocuiš le' šja'aque' laguo' na' yesene' bin' chesac čhegaque' len le'. Si'xenšco' yogo' da' quinga chneyoeda' le'. Claudio Lisias.”

³¹ Nach soldadw ca' gosone' can' ben bene' gwnabia' čhegaquen' mandadw, besyebeje' Pablon' na' šeže'le gosegüe'e nez len le' besežine' yež da' nzi' Antípatris. ³² Na' cate' gwyeni' besyebi'i soldadw ca' ja'ac ni'aze' jaya'aque' cuartelen' na' bene' ca' gosebia cabayon' ja'aclene' Pablon'. ³³ Na' cate' besežine' ciuda Cesarean' bosonežjue' gobernadore' carten' zjanoxe'na' na' lecze gosone' Pablon' lo ne'e. ³⁴ Na' gobernadore' cate' beyož blabe' carten' gwnežda' Pablon' ga bene' naque'. Na' cate' gwnežde' naque' bene' distritw Cilicia, ³⁵ nach gože'ne':

—Gwzenaga' bin' nao' cate' yesela'ac bene' ca' chosocuiš le'.

Nach bene' mandadw bososeyjue' Pablon' lo' yo'o gan' chbe' rey Herodesen' cate' chone' yela' justis.

24

Pablon' be'e diža' lao gobernador Félix

¹ Cate' bač goc gayo' ža zoa Pablon' ciuda Cesarean', nach bžin Ananías ben' nac bxož blaoch če' bene' Israelen' na' nče'e to čhope bene' gole blao čhegaque' na' len to bene' le Tértulo ben' chac chne' lao bene' gwnabia'. Na' ja'aque' lao gobernadore' gosagüe' xya če' Pablon'. ² Na' cate' jasexi'e Pablon', Tértulo' gwdağue' xya če', gože' gobernador Félixen':

—Si'xeno', señor gobernador, za'to' laguo' nga. Binlo' juisyw zoa nación čhechon' na' da' zan da' šagüe' ba chac da' chnabi'o neto'. ³ Gate'tez zoato' žato' choxcleno' can' chono'na', señor gobernador, catec chbeto' can' chnabi'ona'. ⁴ Na' cont bi goneto' le' bichle zed, chata'yoeda' le' gwzenago' šlož

dao' dan' zedenato' na'a. ⁵ Ben' ba goxo' laguo' nga, nezeto' naque' to bene' chbecchgua da' zed. Chde' doxen yežlion' chone' cont neto' bene' Israel chacto' chople. Na' naque' bene' blao len bene' ca' chesene' bene' nazareno lagüe cheseñilaže' Jesúš ben' nac bene' yež Nazaret. ⁶ Na' goclaže' gone' da' maljuisyw lo' yodao' cheton' na' da'nan' gwzento' ne' cont chogbia'to' che' con can' ža ley cheton'. ⁷ Perw na' gwyaz Lisiasen' ben' nac bene' gwnabia' che soldadw ca' na' beque'ene' lo na'ton'. ⁸ Na' gože' neto' cheyała' yidto' laguo' nga cont gwcuišto'ne'. Guac nabdo' Pablon' cuino' cont nezdo' nac da' li can' chcuisto'ne' nga.

⁹ Nach bene' Israel ca' za'aclene' Tértulon' gosaque' toze len le' gosene' le can' naquen. ¹⁰ Nach gubernadore'n bene' señw len Pablon' cont ne', na' Pablon' gwzologüe' gwne':

—Nezda' ba goc zan iz chono' yela' justis che nación ni, na' da'nan' chbeda' gwzoo' rson chian' laguon'. ¹¹ Na'a chac šižiñw ža gwy'a Jerusalénna' jexena' Diosen'. Na' guac nabdo' bene' ca' besele'e neda' še leca' naquen. ¹² Bi nacho besele'ede' chacyoža' len no bene' lo' yodao' blaon' ne lo' yodao' yoble o gate'teze lo ciudadan'. ¹³ Na' bibi gac yeson bene' quinga cont yosolo'e napa' dola' ca dan' chosocuiše' neda'. ¹⁴ Bi gwcuaša' diža', da' li chonxena' Diosen' ben' gosonxen da' xozxta'oto' ca', la'czła' chonxena'ne' can' cheson bene' ca' zjanao' da' cobe dan' bi chesazlaže' bene' quinga, na' chejli'a che yogo'loł Xtiža' Diosen' dan' nyoj le'e ley cheton' na' da' ca' bosozoj bene' ca' goso'e xtiža' Diosen' cani'. ¹⁵ Na' zoa' lez yosban Diosen' bene' ca' ba gosat, bene' güen lente bene' mal. Lenche bene' gualaž chia' can' nite' lez gon Diosen' ca'. ¹⁶ Da'nan' zoa' chi' yichja' chona' can' chaclaže' Diosen' neche nezda' lo' yichjlažda'ogua' bibi dola' napa' lao Diosen' ne lao benachen'.

¹⁷ “Ba goc zan iz zoa' zito' na' za' bela'a Jerusalénna' na'a cont bnežjua' mechw da' btoba' da' gaclenen bene' yaše' ca', na' lecz ca' jasana' yelaten' lo' yodao' blaon'. ¹⁸ Ca' goquen' zoa' lo' yodao' blaon' ba bexi beyacha' can' cheyała' gacto' cont chnežjwto' bi dan' chnežjwto' lao Diosen', cate' to chope bene' Israel za'ac Asia besele'e gan' zoa'na'. Na' bi nacho mbeca' žaš, neca' ndop nžaga' bene' zan. ¹⁹ Na' bene' ca' za'ac distritw Asian' cheyała' yesid cuine' yosocuiše' neda' laguo' nga še bi da' mal chesacde' chona'. ²⁰ Na' bene' quinga nita' nga guac yesene' še bi da' mal nona' caten' bosodie' neda' lao bene' ca' chesenabia' nación Israelen'. ²¹ Še toz dan' bi chesazlaže' dan' goše'gaca'ne' caten' zjandob bene' ca' chesenabia', gwnia': “Ca nac yela' justis chia' dan' chonle na'aža, chonlen dan' chejli'a gwžin ža yesyeban bene' ca' ba gosat.”

²² Gobernador Félixen' ba nezde' can' chosozejni'i bene' ca' ba chesejle' che Jesucriston', na' cate' bende' can' gwna Pablon', bich goclaže' gone' yela' justis che' ca hora', gwne':

—Cate' yid Lisiasen' ben' nac bene' gwnabia' che soldadw ca', cana' yeyož gwzenaga' can' nac dan' chagwle xya nga.

²³ Nach bene' mandadw beče' xan soldadon' Pablon' gan' die' ližyan' na' be'e latje gon Pablon' con bi chaclaže' gone', na' be'e latje jasena' bene' migw chen' le' jasesane' bi dan' byažjde'.

²⁴ Nach beza' gubernador Félixen' ciuda Cesarean', perw cate' gwde' to chope ža bežine' da' yoble nche'e no'ol che' ben' le Drusila. Na' Drusilan' naque' no'ole Israel. Nach gubernadore'n bene' mandadw gosaxe' Pablon' da' yoble na' bzenague' be' Pablon' diža' gwne' yogo'loł bene' cheyała' yeseñilaže' Jesucriston'. ²⁵ Nach Pablon' be'lenche' le' diža' can' cheyała' gagcho

bene' güen lao Diosen', na' can' gwsaca'cho cont bi goncho da' mal, na' lecze be'lene' le' diža' can' gon Diosen' cate' žin ža gone' justis che yogo' benach na' gwnežjue' castigw che yogo' bene' bi chesejnilaže' le'. Na' gobernador Félixen' bžebe' na' gože' Pablon':

—Da' na'ze gwzenaga' na'a, guac yeyejo'. Na' cate' nlatja' guaxcza' le' yeto.

²⁶ Gobernadores' godce' še gwnežjo Pablon' le' mechw cont yosane' le'. Da'nan' goxe' Pablon' güeltze be'lene' le' diža'. ²⁷ Ca' chac gwde chop iz nach yeto bene' yoble bene' le' Porcio Festo gwdie' blane' xlatje'. Na' Félixen' goclaže' yega'ane' binlo len bene' Israelen' cate' ba bechoje' gobernador, da'nan' bene' mandadw bega'an Pablon' ližyan'.

25

Pablon' bzoa rson che' lao gobernador Feston'

¹ Na' cate' bžin Feston' ciuda Cesarean' gan' nabi'e, gwzoe' šone ža na' gwze'e gweje' Jerusalenna'. ² Nach bžox gwnabia' ca' len nochle bene' blao che bene' Israel ca' ja'aque' jase'ne'e le' cont bosocuiše' Pablon'. ³ Na' gosata'yoede' Feston' gone' mandadw šjasesane' Pablon' Jerusalén. Gosata'yoede' le' gone' ca' le' gosaclaže' yesebe'na'ogüe' Pablon' cont yesote'ne' tnez. ⁴ Na' gobernador Feston' boži'e xtiža'gaque', gwne':

—Yega'anche' Cesarean' gan' die' ližyan' le' neda' bich chžeda' ša'a na'. ⁵ Na' le' cuej no bene' gwnabia' chele seła'le legaque' len neda' cont yosocuiše' le' lagua' gan' gona' yela' justis še bi da' xinj ba none'.

⁶ Nach gwzoa gobernadores' len legaque' Jerusalenna' do žono' o do ši ža na' gwdena' beze'e beyeje' Cesarean'. Na' beteyo gwchi'e gan' chone' yela' justisen' na' bene' mandadw gwvej Pablon' lagüen'. ⁷ Nach cate' bžin Pablon' lagüen' ba nita' bene' Israel ca' za'ac Jerusalenna' na' la' gosechjte' le' na' gosezologüe' bosocuiše' le' chesene' da' zan da' mal juisyw ba bene', perw bi blo'elao še diža' li cheso'e. ⁸ Nach Pablon' bzoa rson che', gwne':

—Bibi doła' napa' len ley che neto' bene' Israel ne len yodao' blao cheton' na' ne len rey César ben' chnabia' doxen nación Roman'.

⁹ Na' Feston' goclaže' yega'ane' binlo len bene' Israel ca', da'nan' gože' Pablon':

—¿Bi che'ndo' sao' Jerusalén gona' yela' justis chion' na'le che yogo' da' ca' chosocuiš bene' quinga le'?

¹⁰ Nach Pablon' gwne':

—Rey Césaren' ba nzoe' le' cont gono' yela' justis, na' cheyala' gac yela' justis chia' lagu' nga. Ca nac bene' Israel quinga, le' nezczedo' bibi da' xinj na' gona' len legaque'. ¹¹ Šaca' ba gwdapa' doła' o bichle da' ba bena' da' cheyala' gata', bi žia' bi gata'. Perw bibi nona' ca nac dan' chosocuiše' neda' nga, na' nono zaca' gwde neda' laogaque'na'. Da'nan' chnaba' tia' lao rey Césaren' cont gone' yela' justis chian'.

¹² Nach Feston' bene' yela' güexi'a len bene' gwnabia' che' ca' bi yesone' len Pablon' nach gože'ne':

—Ba gwñabo' tio' lao rey César na' lagüe' nan' šejo'.

Gobernador Feston' bdie' Pablon' lao rey Agripan'

¹³ Na' cate' ba gwde yeto chope ža, rey Agripan len no'ol che' ben' le Berenice besežine' Cesarean' bedeseguape' Feston' tiox. ¹⁴ Na' cate' gwneze gobernador Feston' nite' yezan ža, nach be'lene' rey Agripan' diža' che Pablon', gože'ne':

—Zoa to bene' nyixjw Félixen' ližya nga cate' bechoje'. ¹⁵ Na' cate' gwya'a Jerusalénna' b'ox gwnabia' ca' na' nochle bene' blao che bene' Israel ca' gosenabe' choglaguan' cont gaque' castigw. ¹⁶ Perw na' goše'gaca'ne' bi de costumbr che chio' bene' nación Roma gwdecho bene' yesaque' castigw še bi yesyediłlagüen' len bene' ca' chosocuiš le' cont yozozoa rson chegaque'. ¹⁷ Nach cate' besela'aque' nga beteyo la' gwche'tia' gan' chona' yela' justis na' bena' mandadw gosebeje' Pablon'. ¹⁸ Na' cate' bosocuiš bene' ca' le', ne toz da' mal dan' chacda' yosobague'de' le' bibi gosene'. ¹⁹ Dan' chac chegaque', bi chejniłaze' Pablon' can' chesejniłaze' legaque', na' cheso'e diža' che to bene' ba got, bene' le Jesús, na' Pablon' že' mbancze'. ²⁰ Cate' bich bi bežellaža' gona' ca dan' chesac chegaquen' na' goša' Pablon' še chaclaže' yodia'ne' Jerusalén cont gac yela' justis chen' che da' ca' chosobague'de' le'. ²¹ Nach Pablon' gwnabe' šeje' gone' yela' justis che' lao rey César Augusto, na' bena' mandadw beyeyjue' šlac gac gwdia'ne' lao rey Césarén'.

²² Nach rey Agripan' gože' Feston':

—Chaclaža' gwzenaga' can' choe' ben' dižan'.

Nach Feston' gože' le':

—Gwxe gwzenago' che' šeca'.

²³ Nach beteyo gosacxenchgua rey Agripan' len Berenice cate' goso'e gana' chi' gubernadoren', na' lecz zjachi' bene' ca' chesenabia' soldadw ca' na' yogo' no bene' blao che ciudan'. Na' gwdena' Feston' bene' mandadw jasexi'e Pablon'. ²⁴ Na' Feston' gwne':

—Rey Agripa, na' len yogo' le'e že'le nga len neto', ca nac benga ze laole nga, yogo' bene' Israel bene' že' Jerusalén len bene' že' Cesarea nga ba gose'e neda' benga naque' bene' mal na' yogo'cze' chesene' bi cheyała' bane'. ²⁵ Na' ba gwnabyoža' na' gota'bia' bibi none' da' zaca' choglaguan' che' gate'. Na' ba gwnabe' tie' lao rey César gone' yela' justis che', na' ba gwcheba' gwdia'ne' ciuda Roma na'ale gan' zoa rey Césarén'. ²⁶ Na' chacžejlaža', le bibi chežellaža' gwzoja' reyen' yapa'ne' bin' none'. Da'nan' bač gwleja'ne' laole nga, na' chbechgüeda' chbeja'ne' laguo' le' rey Agripa, cont yeyož gwzenagcho che' na' gata' bi da' gwzoja'. ²⁷ Chacda' bi naquen to liča seła'ne' Roman' sin cbi gwzoja' še bin' none'.

26

Pablon' bzoe' rson che' lao rey Agripan'

¹ Nach rey Agripan' gože' Pablon': —Guac nao' bi da' gaclenen le'.

Nach Pablon' gwłis ne'en lao bene' ca' gwzologüe' bzoo rson chen', gwne':

² —Chbechgüeda' rey Agripa, ba gosone' latje gua' diža' laguo' nga na'a ca nac dan' chosocuiš bene' Israel gualaž checho ca' neda'. ³ Le' nombi'o costumbr che chio' bene' Israel na' nezdo' can' chesacyož bene' gualaž checho ca' legacze'. Da'nan' chata'yoeda' le' gapšco' yela' chxenlaže' gwzenago' chia' nga.

Quinga ben Pablon' cate' bina' šejniłaze' Criston'

⁴ 'Yogo' bene' Israel gualaž chechon' zjanezde' can' ba gwzoo' chonxena' Diosen' cate' ne' nactia' bidao', caten' gwzoo' laža' lente caten' gwzoo' ciuda Jerusalén'. ⁵ Na' še chese'nde' yeso'e diža', lecze zjanezde' goca' txen len bene' ca' zjansi'e fariseo cate' nactia' bi' xcuide' na' bene' fariseo ca' chesonche' yogołoł costumbr gole can' nyoj ley chechon' cl'el can' cheson yezica'ch bene' Israel gualaž checho ca'. ⁶ Na' legaque' chesagüe' xya chia' neče chejli'a gwžin

ža cate' Diosen' yosbane' bene' guat ca' can' gože' da' xoxxta' ocho ca'. Neče da' nan' zoa' nga na'aža cont gac yela' justis chian'. ⁷ Bene' zan lo šižinw cue' chio' bene' Israel nite' chesebeze' batcan' yosban Diosen' bene' ca' ba gosat, can' že' gone'. Da' nan' chesonxene' le' do ža do yel. Lecz neda' zoa' lez gac ca', na' da' nan' bał bene' Israel gualaž chechon' chosocuiše' neda' nga rey Agripa. ⁸ Na' le'e chi'le chzenagle chia', žbixchen' chaquele nono šejle' dan' yosban Diosen' bene' ca' ba gosat?

Caná Pablon' bgue'ede' bene' chesejnilaže' Criston'

⁹ 'Caná neda' godca' cheyała' gue'eda' bene' ca' chesonxen Jesús ben' nac bene' Nazaret, na' da' zan benchgua' contr legaque'. ¹⁰ Bene' zan bene' chesejle' che Jesús'en' Jerusalénna' gwdixjua' ližya, gwdapa' yiš dan' bosozoj bžoz gwnabia' ca' cho'en diža' napa' yela' gwnabia' cont gona' ca'. Na' cate' gosechoglagüe' yesote' no bene' ca', goca' toze can' bosoxi'e yesone'. ¹¹ Na' zan las gwya'a to to yodao' jasaca' legaque' cont yesebeyičhje' bich yesonxene' Jesús'en'. Na' catec bgue'eda' legaque' gwya'a yež zito' jalagšiba' legaque'.

Da' yoble Pablon' cho'e diža' can' goc che' cate' Diosen' bocobe' yichjlažda'ogüe'

(Hch. 9:1-19; 22:6-16)

¹² 'Can' goc to ža cate' zya'a ciuda Damascon', noža' yiš che bžoz gwnabia' ca' dan' žan gwči gwsaca' bene' ca' chesonxene' Jesús'en'. ¹³ Ca do guagwbiž zya'a ngua'a nezen' señor rey, cate'cze ble'eda' to be'ni' juisyw da' za' le'e yaba, chseni'chen ca gwbižen', na' gweychjen neda' len bene' ca' zya'alena' txen. ¹⁴ Na' yogo'to' gwbižto' lo yon', na' neda' benda' to bene' chne' diža' hebreo gwne': "Saulo, Saulo žbixchen' chchi chsaco' neda'? Dan' chondo' neda', chone zi' cuino' ca chon to go'ñ be chlibe lo ya dan' zoa lao carros čheban'." ¹⁵ Nach bol güiža'ne', goža'ne': "žNo le' bene'?" Nach Xana' Jesús'en' boži'en, gwne': "Neda' Jesús na' neda' chchi chsaco". ¹⁶ Beyas, le bach blo'elagua' le' na' ba gwleja' le' gono' xšina' na' go'o diža' che da' nga ba ble'edo' na' che bichle dan' za' le'edo' da' za' gwlo'eda' le'. ¹⁷ Na' na'a sela' le' gan' že' bene' ca' bi zjanac bene' Israel. Na' bi gona' latje no got le', ne bene' Israel gualaž chio' ca' na' ne bene' bi zjanac bene' Israel. ¹⁸ Chsela' le' gan' že' bene' bi zjanac bene' Israel na' gwzejni'ido'ne' cont yesebeyičhje' da' malen' zjanone' na' yesone' da' güen. Chaclaža' yesyechoje' lo na' Satanás dan' chnabia' da' xigüe' ca' na' yosozenague' che Diosen' cont nitlao xtoła'gaque', na' lecze chaclaža' yesaque' txen len nochle bene' chesejnilaže' neda' bene' ba zjanac lo na' Diosen'."

Pablon' bsed blo'ede' bene' xtiža' Criston'

¹⁹ 'Ca' goc chia' rey Agripa, bzenaga' ca dan' gož Jesús'en' neda' zoe' yaban' caten' ble'edagüeda'ne' tnez. ²⁰ Zgua'tec jazejni'ida' bene' ca' že' ciuda Damasco xtiže'na' na' gwdechle jazejni'ida' bene' ca' že' Jerusalénna' len bene' že' doxen distritw Judean', goše'gaca'ne' cheyała' yesebeyičhje' xtoła'gaque' na' yosozenague' che Diosen' na' yesone' da' güen cont gacbia' ba gosebeyičhje' da' malen'. Can' bzejni'ida' bene' Israel gualaž checho ca' lente bene' ca' bi zjanac bene' Israel. ²¹ Na' neče dan' chona' ca', bene' gualaž checho bene' chesege'ede' neda' gosezene' neda' yodao' blaon' na' gosacłaže' yesote' neda'. ²² Perw na' Diosen' zoe' chaclene' neda', na' da' nan' zoacza' cho'a xtižen' ža na'aža len yogo'lolle že'le nga, le'e nacle bene' blao lente le'e bi nacle bene' blao. Bi nacho bichle chzejni'ida' bene' da' bi bzoj da' Moisés'en' len

yezica'chle ben' goso'e xtiža' Diosen' cani'. ²³ Gosene' Criston' ben' za' seļa' Diosen' saca'zi'e na' gate' na' gaque' bene' nechw yebane' ladjo bene' guat ca'. Na' lecz gosene' le'na' gwzende' bene' Israel len bene' bi zjanac bene' Israel can' cheyaļa' yesone' cont šo' be'ni' che' lo' yichjlažda'ogaque'.

Pablon' goclaže' šejnilaže' rey Agripan' Jesucriston'

²⁴ Ca' cho'e dižan' cate'cze gobernador Feston' gwne' zižje gože'ne':

—iChactonton' Pablo! Dan' ba bsedteco' nan' bač chactonto'.

²⁵ Nach Pablon' gože' gubernadoren':

—Bi chactonta' señor gobernador, san diža' lin' cho'a, diža' da' zaca' gwzenago'. ²⁶ Na' rey Agripa nga nombi'e da' quinga choa' diža' chen, da'nan' bi chžeba' choa' diža' lagüe' nga. Nežda' chache'ede' choa' diža' li, le dan' goc che Jesúsen' bi nacho goquen bagaše'ze. ²⁷ Le' rey Agripa, čhejli'o da' ca' bosozoj bene' ca' goso'e xtiža' Diosen' cani'? Nežda' chejli'on.

²⁸ Nach rey Agripan' gože' Pablon':

—čChacdo' bedao' co'oyelo' neda' cont šejnilaža' Jesucriston'?

²⁹ Nach Pablon' gože'ne':

—Chnaba' lao Diosen' žin ža cate' le' len yezica'chle bene' že' nga šejnilaže'le Jesucriston' can' chejnilaža'ne', še yob o še ne' chžach, perw cbi gata'le ližya can' dia' neda'.

³⁰ Beyož gwna Pablon' ca' bezoža' rey Agripan' len no'ol chen' Berenice, na' len gobernador Feston' na' len bene' ca' gosebe' len legaque'. ³¹ Nach cate' ba besyeyo'e ga yoble, rey Agripan' na' gobernador Feston' gose' lježe':

—Bi nacho ba non benga da' zaca' gate' o da' zaca' chixjwchone' ližya.

³² Nach rey Agripan' gože' Feston':

—Šaca' bi gwñabe' tie' lao rey Césaren' cont gac yela' justis che'na' guac yosanhone'.

27

Goseše'le' Pablon' ciuda Roman'

¹ Na' cate' bosoxi'e yesesele' Pablon' distritw Italia gan' chi' ciuda Roman', nach gwlo'e Pablon' len yezica'chle pres ca' lo' na' to xan soldadw bene' le Julio. Na' Julion' naque' txen len soldadw ca' ben' zjansi'e Batallón che Augusto. Na' neda' Lucas gwzoa' len Pablon'. ² Nach gwyo'oto' to lo' barcw da' za' ciuda da' nzi' Adramitio cont žinen distritw Asia, beža'to' ciuda Cesarean'. Na' za'len Aristarcon' neto'. Naque' bene' ciuda Tesalónica dan' chi' distritw Macedonia. ³ Nach ža beteyo bžinto' ciuda da' nzi' Sidón. Na' xan soldadw ben' le' Julio bencze' güen len Pablon', be'e latje gwyeye' gan' že' bene' migw che' ca' cont bosonežjue' le' bi dan' byažjde'. ⁴ Na' cate' bechojto' ciuda Sidónna' beža'to' bedeto' gaļa'ze gan' nļa' yežlio dan' chi' lo' nisdao' dan' nzi' Chipre. Chehjchgua be' clele ca' horen', na' yežlion'a' bcue'ejen neto' len be'na'. ⁵ Na' beyož gwđeto' lo' nisdao' dan' de gaļa'ze gan' zjambane distritw Cilicia na' distritw Panfilia, nach bžinto' ciuda dan' nzi' Mira dan' chi' gan' mbane distritw Licia.

⁶ Na' ciuda Miran' xan soldadon' bželde' yeto barcw da' za' ciuda Alejandría da' za' šej distritw Italia, na' bene' mandadw gwyo'oto' lo'en txen len Pablon'.

⁷ Nach gwža'to' zejto' lo' nisen' da' yoble. Zan ža zejto' šolaže', cane bžinto' gwđeto' ciuda gan' nzi' Gnido. Na' dan' ne' chehčj ben' clele gan' zejton', da'nan' bi goc šejto' liča, nach gwca'ato' zejto' hcue'ej cuinto' len yelate' yežlio dan' nga'an lo' nisdaon' dan' nzi' Creta, gan' bitec gwyechj be', na'

gwdeto' gala'ze gan' zoa to ya'a da' nzi' Salmón. ⁸ Na' zejto' gala'ze ga zoa yo biž hcue'ej cuinto', cane bžinto' gan' nzi' Buenos Puertos gala'ze yež dan' nzi' Lasea.

⁹ Goc zan ža zejto' ca' na' bačh chžebto' šjažiyi' cuinto' lo' nisaon', le ba bžin tiemp zag cate' chečhjchgua be'. Nach Pablon' gwneyoede' bene' ca' yesebeze' na'ze. ¹⁰ Gože' legaque':

—Le'e bene' le'e chsa'le barcon', ba chacbe'eda' can' zejcho nga cane chac chzan', xož cuiayi' barcon' len yoa' chelen', na' lente chio' yo'ocho lo' barcon' xož cuiayi'cho.

¹¹ Nach xan soldadw ca' bzenagche' che xan barcon' na' che ben' chsa' len clel ca che Pablon'. ¹² Le bi nac latje güen cho'a nisdao' gan' zooton' ga'anto' tiemp zaguen', na' gwyan bene' ca' gosacde' cheyala' sa'to' šejto' še gonen žinto' Fenice gana' soato' šlac te da' zaguen'. Fenice naquen to yež ga chac cho'o barcw gan' mbane Creta na' bi chactec zag, le šla'ale nla' ga chla' gwbiž na' šla'ale ga chxoa gwbiž.

To be' gual gwyechjen lo nisaon'

¹³ Cate' gwzolao chečhj to be' goł dan' za' che'elle na' bene' ca' chososa' barcon' gosacde' guac šja'acche' gan' gosaclaže', nach gozsa'to' zejto' lo nisen' da' yoble to lcue'ej che Cretan'. ¹⁴ Gague goc šša cate' ba chac to be' gual da' nzi' Noreste chečhjchguan clele gan' zej barcon'. ¹⁵ Na' chžiga'chguan barcon'. Bibi goc yesone' cont šejchto'. Na' btoblaže'to' gwžiga' ben' barcon' len neto' con can' chečhjenna'. ¹⁶ Nach bžinto' to lcue'ej yežlio da' nga'an lo' nisen' dan' nzi' Claudia, gan' bitec chečhj be'. Na' barcw cha'o gan' yo'oton' nxoben to barcw dao' da' chon žin choslan bene' cate' chac bi da' chac che barcw xenna'. Na' cane goc bocueto' barcw daon' lo' da' cha'ona'. ¹⁷ Beyoža' bchejto' barcw cha'ona' do gual cont gwlo'oto' fuers čen. Na' besežebe' gaga' barcon' to latje gan' nac yox da'na' nzi'in Sirte, nach bosolejte' lache' xen dan' chonen cont chžiga' ben' barcon'. Nach con zejto' lo nisen' con gan' gwyej barcon'. ¹⁸ Beteyo ba chož nisen' lo' barcon' da' chečhjchgua ben', nach gosešaše' yoa' dan' nsa' barcon' gwzolao bosozala'šazen' lo' nisen'. ¹⁹ Na' ža gwyone goclento' legaque' bzala'to' xšinlaz barcon' lo' nisen'. ²⁰ Zan ža bi blo'elao gwbižen' na' šeže'le bibi beljw ble'eto', do ža do yel goc yejw na' gwyechj be', na' bich gwzoato' lez yelato'.

²¹ Bačh goc šša bi chagwto', nach Pablon' gože' bene' ca':

—Le'e bene', chac quinga dan' bi bzenagle chia' caten' gwnia' le'e bi sa'cho Cretan', na' dan' bi bzenagle chia', ba gwžiyi' yoa' che barcon' len xšinlazen.

²² Perw na'a bi soayaše'le, ne tole či cuiayi' yela' mban chele, san barcw ngazen' cuiayi'. ²³ Neda' chonxena' Diosen' na' ba ben' cuina' lo ne'e, na' le' ba gwsele' to angl bene' blo'elagüe' neda' nže'e. ²⁴ Nach angla' gože' neda' diža' nga: "Bi žebo' Pablo. Cheyala' žino' lao rey César ben' čhi' ciuda Roma, na' da'nan' yelao', bibi gac chio', na' lez yosla Diosen' yogo' bene' ca' že' lo' barcon'." ²⁵ Na' dan' gwna anglen' ca', bene', le yebe. Nežda' Diosen' gone' gac dołol can' gož anglen' neda'. ²⁶ Da' gac checho yecho'onen chio' yo biž da' nga'an late' lo' nisen'.

²⁷ Na' cate' ba goc žta'gwbiž zejto' lo nisen' nžiga' ben' neto' nile nale lo nisaon' dan' nzi' Adria, nach ca do chel bene' ca' zjansa' barcon' gosacbe'ede' ba zejto' gala'ze yo biž. ²⁸ Nach beselejte' to plom lo' nisen' cont bosochixe' ca do gaca'te' sitjw nac nisen'. Beyož bosochixen'na' gosenezde' goquen šino'tchoa metr. Nach gosezdie' yelate' na' bosozchixen' da' yoble na' ca horen' goquen

gažechoa metr. ²⁹ Na' besežebe' šjati'i barcon' yej lo' nisen', nach beseletje' tap ya xen dan' že' ancla, bosočejen' xan barcon' cont gosoxen' len, na' do chesežebeze' chesebeze' batcan' šeni'. ³⁰ Nach bene' ca' zjansa' barcon' gosaclaže' yosyoxonje'. Besyeletje' barcw dao' dan' ncu' xina' barcon', con bosode'ede' yeseletje' ancla ca' dan' ncu' lagüen'. ³¹ Nach Pablon' boł güiže' xan soldadw ca', gože'ne':

—Še bene' quinga bi yesyega'ane' lo' barcw nga, bi yelacho.

³² Nach soldadw ca' gosečogue' don' zjanca' barcw daon' bososanen' lo' nisa'.

³³ Do šbal Pablon' gwzolao gwneyoede' yesagw bene' ca' že' lo' barcon', gože' legaque':

—Ba chac žta'gwbiž zoale bi chtasle na' bi che'ej chagwle. ³⁴ Chata'yoeda' le'e le gagw cont soale binlo, le ne tole ca cuiayi'.

³⁵ Beyož gwne' ca' bexue' to yetextil, be'e yela' choxclen che Diosen' lao yogo' neto' že'to' lo' barcon' na' gwxi'e to pedasen' gwdagüen'. ³⁶ Nach yogo'to' bebeto' na' lecz gwzolaoto' gwdagwto'. ³⁷ Čhop gayoa gayonšino'to' nacto' že'to' lo' barcon'. ³⁸ Na' beyož gwdagwto' ca beljeto', nach trigon' da' ne' nga'añch lo' barcon', gosebejen' bosozalen' lo' nisdakon' cont barcon' bich goctequen zi'i.

Goxj barcon'

³⁹ Cate' gwyeni' bi zjanombi'e yežlion' gan' besežinen', perw besele'ede' de to latje ga žia nisen' šize na' cho'enna' nac laše' lo yox. Nach gosaque' toze gosaclaže' yesone' cont žin barcon' šjačen' laše' lo yoxen'. ⁴⁰ Na' gosečogue' do che ancla ca', gosebejyichjen' lo' nisen'. Lecze goseseže' do dan' bosočeje' yag dan' chsa' barcon' licha na' goselise' lache' dan' zoa yichj barcon' cont bžiga' ben' len, nach zja'aque' cho'a yo bižen'. ⁴¹ Na' gosedie' ga chedił nisdakon' len yeto da' yoble, na' jačhaz lagüe barcon' lo' yoxen', bich goc tan. Na' nisen' gwzolao bzoxxjen barcon' catec fuers nsan'. ⁴² Nach soldadw ca' gosaclaže' yesot' pres ca' cont bi yeseyele' nisen' na' yosyoxonje'. ⁴³ Perw xan soldadw ca' goclaže' yosle' Pablon', da'n'an' bžone' yeson soldadw ca' can' chesaclaže' yesonen'. Bene' mandadw len pres ca' še noe' chac chyela' nisen' zgua'tec legaque' yesexite' lo nisen' cont yesyechoje' yo biž. ⁴⁴ Na' bene' mandadw bene' ca' bi chac yeseyela' nis yosochine' no yagla' o bichle xšinlaz barcon' cont yesyežine' lo yo. Na' can' gosone' na' yogüe' besyežine' lo yo bižen'.

28

Dan' goc che Pablon' šlac zoe' Malta

¹ Cate' bechojto' lo' nisdakon' bžinto' yo bižen', bene' ca' že'na' gose'e neto' ba bžinto' gan' nzi' Malta, naquen to yež dan' chi' to lo yežlio da' nga'anen lo' nisdakon'. ² Na' bene' ca' že'na' gosaque' bene' šagüe' len neto', bosoxene' to yi' xen na' goxe' yogo'to' gan' nite'na', le ba chac yejw na' chacchgua zag. ³ Nach Pablon' btobe' xonj xis bcue'en lo yin', cate' bchoj to bel be nac venen lo xis ca' gwdi'ınba' ne'e goła'ditban'. ⁴ Na' besele'e bene' Malta ca' nala'dit belen' na' Pablon', na' gose' lježe':

—Benga naclje' bene' güet bene'. Da'n'an' la'czla' bele' lo' nisen', Diosen' bi güe'e latje banche'.

⁵ Nach Pablon' con gwžib ne'ena' lo yin' na' bexope belen', na' bibi godce'.
⁶ Yogo' bene' ca' chesebeze' batcan' solao gata' ne'en yi o batca' gate'. Gosebeze' sša na' besele'ede' bibi godce'. Nach gosone' xbab yoble, gosene' naque' to bene' šejnilaže'cho.

⁷ Na' bene' gwnabia' che doxen Malta le' Publio na' yežlio che' zjaden gała'ze latje gan' bžinton', na' blebe' neto', gwzoato' ližen' šone ža. ⁸ Na' xa Publion' chacšenčgüede' yo'e da' la na' che'ede' yiž chen. Nach Pablon' gwyo'e gan' de'na' bol' güiže' Diosen', nach gwxoā ne'en yichj bene' güen' na' beyaque'.
⁹ Beyožen' jasexi'e yezica'chle bene' lagüe yeža' bene' chese'ede' yižgüe' na' gwnabde' Diosen' yeyone' legaue', na' lecze besyeyaque'. ¹⁰ Na' da' zan da' güen goson bene' ca' len neto'. Na' cate' bžin ža beza'to' bosyoži'e lo' barcon' yogo' da' ca' chyažjeto'.

Pablon' bžine' ciuda Roman'

¹¹ Bega'anto' Malta šon bio', nach gwza'to' zejto' lo nisen' yo'oto' to lo' barcw da' za' ciuda Alejandria da' gwlezen latjen' šlac gwde da' zaguen'. Na' mben le'e barcon' l' gua'a lsaca' che bene' ca' le' Cástor na' Pólux. ¹² Na' bžinto' ciuda dan' nzi' Siracusa gan' bega'anto' šone ža. ¹³ Nga gozza'to' cont bžinto' yež da' nzi' Regio. Na' bega'anto' tža. Nach gwzolao chechj be' dan' za' che'e'lle, na' beza'to' da' yoble beteyo bezžinto' ciuda da' nzi' Puteoli na' bechojto' lo' barcon'. ¹⁴ Nga bežagto' bene' lježto' chesonxene' Jesucriston' Puteoli na' gosenabe' gwzoato' len legaue' to xman. Na' gwdena' gwza' ni'ato' zejto' Roman'. ¹⁵ Na' cate' za' žinto' ciuda Roman' gosenēze bene' lježto' že' Roman' ba zoa žinto', na' bale' bedeseleze' neto' latje gan' nzi' Šone Tiend na' yebale' lagüe ya'a dan' nzi' Che Apio. Cate' ble'e Pablon' legaue' be'e yela' choxclen che Diosen' na' gwbede' lo' yichjlažda'ogüe'. ¹⁶ Na' cate' bžinto' Roman', xan soldadw ca' bene' yezica'chle pres ca' lo na' bene' gwnabia' che soldadw ca' nita' na', perw be'e latje gwzoa Pablon' toze' ga yoble na' con gwzoa to soldadw gwdape' le'.

Pablon' be'e xtiža' Jesucriston' Roman'

¹⁷ Beyon ža bžinto', Pablon' goxe' bene' blao che bene' Israel ca' že' ciuda Roman'. Na' cate' beyož besedobe'na' gože' legaue':

—Bene' migw, bene' gualaž checho ca' že' ciuda Jerusalén gosezene' neda' gosone' neda' lo na' bene' gwnabia' che nación Roman', la'czla' bibi bena' contr bene' gualaž ca' na' ne' contr costumbr che da' xoxzta'ochon'. ¹⁸ Nach bene' gwnabia' che nación Roman' gosenabyože' na' gosaclaže' yososane' neda' cate' gosache'ede' bibi nona' da' zaca' yesote'nda'. ¹⁹ Nach bene' gualaž ca' že' Jerusalēna' bosožoncze' yososane' neda'. Da'nān' gwnaba' tia' lao rey Césaren' cont gac yela' justis chia'. Perw bi nacho gagua' xya che bene' gualaž checho da' gosonde' neda' ca'. ²⁰ Da'nān' zoa' nga bačh goxa' le'e cont le'eda' le'e na' güe'lēna' le'e diža'. Na' ncheja' gden ni' neče' dan' zoa' lez yosban Diosen' bene' ca' ba gosat, cacze zan chio' bene' Israel zoacho lez.

²¹ Nach bene' ca' gose'ene':

—Bibi cart na' la' laoto' nga dan' za' distritw Judean' da' bosozoj bene' Jerusalén ca' güen' diža' še bin' chac len le', na' nono bene' gualaž na' la' bene' ne' mal chio'. ²² Perw zachlaže'to' yeneto' go'o diža' che dan' chejli'o che Jesúsēn', le' nezeto' doxen chesene' che le'e chejle'le' che'.

²³ Na' bosozie' bia' to ža cont šjasene'e le' da' yoble, na' cate' bžin žan' bene' zan ja'aque' gan' zoen'. Nach Pablon' be'lēne' legaue' diža' do ža. Be'e

diža' che dan' cheyala' gwzenagcho che Diosen' ben' chnabia' doxen, na' bzejni'ide' legaque' da' ca' zjanyoj le'e ley dan' bzoj Moisésen' na' len dan' bosozoj yezica'chle bene' goso'e xtiža' Diosen' cani' che Jesucriston', cont yesejle'e che'. ²⁴ Na' bal' bene' ca' gosejle'e xtižen' da' be'e na' yebale' bi gosejle'en'. ²⁵ Dan' bi gosone' toz ca yesone' xbab, gwzolao besyeya'aque'. Nach Pablon' gože' legaque':

—Dan' gož Spiritw che Diosen' da' Isaíasen' dan' bzoje' che da' xoxxta' ocho ca' naquen da' li, žan:

²⁶ Gwey' gož bene' gualaž chio' ca' xtižan':

Da' li yenele, perw na' bitw šejni'ile bi zeje dan' yenelen'.

Na' da' li le'ele, perw bi gacbe'ele bi zejen dan' le'elen'.

²⁷ Nacle bene' güedenag na' bach natcze yichjlažda'olen'.

Bi chazlaže'le gwzenagle dan' chenele na' dan' chle'ele;

con nacle bene' güedenag.

Šaca' bi nacle bene' güedenag, šejni'ile bi zejen dan' chenele na' dan' chle'ele.

Nach yetinjele xtoła'le cont yeca'an na' yocoba' yichjlažda'olen'.

²⁸ Che'nda' nezele ba gwzolaon na'a Diosen' chsele' bene' cheseyixjue'ede' xtižen' len bene' bi zjanac bene' Israel cont yosozenague' che' na' gata' yela' mban chegaque' toli tocaņe.

²⁹ Beyož gwna Pablon' ca', bene' Israel ca' besyežaše' chesacyožchgüe' che dan' gwnen'.

³⁰ Na' chop iz nya' gwzoa Pablon' ciuda Roman' to yo'o ga chyixjue', na' blebe' yogo'lol' bene' jasene'e le'. ³¹ Na' bzejni'ide' legaque' Diosen' chnabi'e doxen, na' lecz bzejni'ide' che Xancho Jesucriston'. Nono bžon gwzejni'ide' bene', na' be'e xtiža' Diosen' con can' goclaže'.

CART DAN' BZOJ POSTLW SAN PABLO CHE BENE' CA' ŽE' ROMA

¹ Neda' Pablo chzoja' le'e. Chona' bite'tez dan' ža Xancho Jesucriston'. Diosen' gwleje' neda' cont naca' postlw che', na' gwsele' neda' cont chyixjue'eda' diža' güen che'. ² Diosen' ba gwzologüe' bzende' benachen' diža' güen che', bene' cont gwnita' bene' goso'e xtižen' cani' na' bozozojen'. ³ Na' diža' güen che Diosen' chzejni'in chio' che Xi'ine' Xancho Jesucriston'. Len' golje' benach lo diaža che da' rey David. ⁴ Na' Spiritw che Diosen' blo'en Xancho Jesucriston' naque' dogualje Xi'in Dios na' nape' yela' guac, le Jesucriston' bebane' ladjo bene' guat ca'. ⁵ Na' neto', da' chejnilaže'to' Xancho Jesucriston', Diosen' bene' da' güenchgua len neto', le gwleje' neto' na' gwsele' neto' chyixjue'eto' xtižen'. Na' gwsele' neto' chyixjue'eton' cont šanch bene' yesejnilaže'ne' na' yosozenague' che'. Na' Xancho Jesucriston' soe' blaoch cate' bene' že' yogo' naciön yosozenague' che Diosen'. ⁶ Can' naquen, Diosen' ba gwleje' le'e cont nacle lo na' Jesucriston'.

⁷ Chzoja' da' nga par yogo' le'e že'le Roman' le'e ba mbej Diosen' cont nacle lo ne'e. Diosen' chacde' le'e. Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'olen'.

Pablon' goclaže' šjane'e bene' ca' chesejnilaže' Jesucriston' ciuda Roma

⁸ Zgua'tec ni'a le'e Jesucriston' zoe' chaclene' neda' cont choa' yela' choxclen che Diosen' par yogo' le'e, le bene' ca' že' doxen lo yežlion' cheso'e diža' can' chejnilaže'le Criston'. ⁹ Nezcze Diosen' yogo' ni'a cate' chol güiža'ne' chnaba' gaclene' le'e. Naque' ben' chejnilaža' do yichj do laža' na' chona' xšinen' choa' diža' güen che Xi'ine' Jesucriston'. ¹⁰ Chnaba' lao Diosen' gone' latje yedena'a le'e še ca' chnalaže' gona', le ba chac šša zelaža' yida'. ¹¹ Chaclaža' yedena'a le'e na' gwzejni'ichda' le'e cont soachachle šejnilaže'le Diosen'. ¹² Na' le'e len neda' soacho gonchachlaže' lježcho dan' chejnilaže'cho Jesucriston'.

¹³ Bene' migw, che'nda' nezele zan ni'a ba goclaža' yida' yedena'a le'e, perw biña' gac yedena'a le'e. Chaclaža' yida' gona' xšin Diosen' gan zoale cont šanle gwzenagle che Jesucriston' ca ba goc yezica'chle yež ga ba gwya'a. ¹⁴ Nežda' cheyala' gua' diža' güen che Jesucriston' len yogo'lol bene', bene' že' ciudan', na' bene' že' yixe', na' bene' chesac letr na' bene' cbi chesac letr. ¹⁵ Da'nan' che'nchgüeda' gua' xtižen' len le'e že'le Roman' can' ba bian' ga yoble.

Diža' güen che Jesucriston' nsan' yela' guac che Diosen'

¹⁶ Bi cheto'eda' gua' diža' güen che Jesucriston', le xtižen' nsan' yela' guac che Diosen' cont bene' chesejle' chen gata' yela' mban chegaque' toli tocañe. Nsan' yela' guac len neto' bene' Israel, na' lecze len le'e bi nacle bene' Israel. ¹⁷ Na' diža' güen che Jesucriston' chzejni'in chio' še bene' yesejnilaže' Jesucriston', Diosen' gone' legaque' bene' güen, na' bi de bichle da' gac goncho cont gaccho bene' güen len le'. Can' nyoj Xtiža' Diosen' žan: "Diosen' že' bene' chejnilaže' le' naque' bene' güen len le' na' gata' yela' mban che' toli tocañe."

De xtola' benachen'

¹⁸ Diosen' zoe' yaban' na' ba blo'ede' benachen' toli tocañe yesesaca'zi' yogo' bene' cbi chesejnilaže' le' na' chesone' da' xinj. Na' da' chesone' da' xinjen' bi

chesaclaže' yesombia' beñe' yoble diža' li che Diosen'. 19 Na' Diosen' gone' yesezaca'zi'e, le ba zjañezde' zoe' da' ba blo'ede' legaque' can' ba benen'. 20 Bi chle'echo can' nac Diosen', na' bi chle'echo can' zoe' chnabi'e, perw nezecho de yela' guac che' can' bene' bxie' yežlion', na' yogo' beñach chesele'ede' da' ca' ba bene'. Da'nan' bibi de da' yosode'e beñachen' yesene' bi zjañezde' še zoe'. 21 La'czla' zjañezde' zoa Diosen', bi chesonxene' le', neca cheso'e yela' choxlen che'. Xbab čhegaquen' bibi zacan' na' zjančoļ yichjlažda'ogüen' yela' bi chejle' čhegaquen'. 22 Chesene' zjanaque' beñe' sina' perw chesone' xbab da' bibi zaca'. 23 Chosozoe' Diosen' to šla'ale la'czla' naque' la'zelagüe' beñe' zaca' na' zoe' toļi tocañe. Na' gualaz le', chesejnilaže' no l' gua'a lsaca' che beñach beñe' te che, na' no l' gua'a lsaca' che be zoa xil, che be žia tap ni'a na'ba' na' che no be xigüe'.

24 Da'nan' Diosen' ba gwlejšyichje' legaque' cont chesone' da' xinj can' ža lo' lažda'ogaquen', na' bale' ba chesonchgüe' da' nac yela' zto' len cuerp čhegaquen' toe' len yetoe'. 25 Diosen' gwlejšyichje' legaque' cont chesone' yela' zto', le legaque' gosebejšyichje' diža' li che Diosen' na' chesejle'e che da' güenlaže'. Chesejnilaže' da' ca' ben Diosen' na' bi chesejnilaže' Dios ben' čhejala' šejnilaže'cho na' gonxencho toļi tocañe. Ca'czen' gacšca.

26 Da'nan' Diosen' gwlejšyichje' legaque' cont chesone' yela' zto' con da' žan lo' yichjlažda'ogaque'. Can' chac, nita' no'ole beñe' bich chesone' can' čhejala' yeson no'olen', san cheseque'e ljež no'olgaque' cont chesone' len legaque' da' bi čhejala' yesone'. 27 Na' nita' beñe' byo beñe' bitw chese'nde' yesenita'lene' no'ole, san chesezelaže' ljež bene' byogaque' nach cheseca'a lježe' cont chesone' yela' zto'. Na' dan' ba chbiayi' cuerp čhegaquen', naquen castigw da' čhejala' yesezi'e yela' güen da' xinj čen'.

28 Bi chesaclaže' beñachen' yosozenague' che Diosen', da'nan' ba gwlejšyichje' legaque' len xbab mal čhegaquen'. Da'nan' nite' chesone' da' bi čhejala' yesone'. 29 Chesonchgüe' yogo' da' xinj. Beñe' byo chesata'lene' no'ole bi nac no'ol čhegaque', na' no'olen' chesata'lene' bene' byo bi nac bene' čhegaque'. Chesexi'e beñe'. Chesezelaže' bi da' de che beñe'. Zjanaque' beñe' xi'a juisyw, chesegue'e lježe', chesot lježe', chesedile', cheseziye'e, zjanacchgüe' bene' güedenag, na' chja'aque' chjaseleje' diža' che bene'. 30 Chesene' mal che beñe' yoble, chesegue'ede' Diosen', na' bibi bala'añ chesezoe' beñe' yoble. Chesa'laže'. Chesonxen cuine' cheso'e diža' zjanaque' beñe' güen. Chesaljaže' bichle da' mal da' yesone'. Bi chosozenague' che xaxñe'e. 31 Bi chesejni'ide'. Bi chesone' da' ba gosene' yesone'. Bi chesacde' beñe' yoble. Bi chesezi'xen che lježe' na' bi chesyeyaše' lježe'. 32 Zjañezde' Diosen' že' toļi tocañe yesezaca'zi' ben' cheson da' ca'. Na' la'czla' zjañezde' can' že', con nita'cze' chesone' da' xinjen' na' chesyebede' cate' beñe' yoble chesone' can' cheson legaquen'.

2

Diosen' zejcz'e to liča da' chone' castigw che xtoļa'chon'

1 Še nacho che beñe' yoble da' xinjen' chone', bibi zaca' ye'cho Diosen' gague bi xtoļa'cho de, note'tez naccho. Cate' chnecho che da' chon beñe' yoble, na' cheyechjen chio', le toz can' choncho len da' cheson legaque'. 2 Nezecho še choncho da' xinj ca' nac da' ca' ba gwnian', Diosen' gone' cont saca'zi'cho che xtoļa'chon' na' zejcz'e to liča da' gone' ca'. 3 Čhaquele Diosen' bi gone' da' saca'zi'cho cate' chnecho che da' xinj da' chon beñe' yoble na' chontecho can'

chesone'na'? Bi cheyala' gaquecho bi gone' da' saca'zi'cho, le goncen'. ⁴ ¿Bi chache'ele Diosen' nacchgüe' bene' šagüe' na' bene' xenlaže' len chio' napcho dola' na' chone' ca' cont gache'echo da' xinjen' choncho na' yetinjechon? ⁵ Le'e bi chetinjele xtoła'len' nacle bene' yid, na' chonle cont Diosen' ža'ache' le'e na' gonche' ga saca'zi'le cate' žin ža' chogbi'e che benachen'. Cana' gwlo'e zejze' to liča can' chogbi'en saca'zi' to to benač che xtoła'gaquen'. ⁶ Na' cana' to tocho saca'zi'cho o gone' ga gac güen čhecho con ca nac da' ba bencho. ⁷ Na' še cheyljwlaže'cho nac goncho cont šjayzoacho len Diosen' toli tocañe, na' cont yebe Diosen' chio', na' cont gone' gacchcho bene' zaca', soacho goncho da' güen bite'teze da' gwžaglačo. Nach Diosen' gone' cont bancho toli tocañe. ⁸ Na' še zoacho choncho con da' chazlaže'cho na' bi chzenagcho diža' li čhe Diosen', san zoacho chzenagcho čhe da' malen', Diosen' ža'ayichje' chio' na' gone' ga saca'zi'cho toli tocañe. ⁹ Yogo' benač bene' chon da' xinj saca'zi'e na' žaglagüe', zgua'tec žagla'o neto' bene' Israel na' tech yezica'chle bene'. ¹⁰ Yogo'cho še choncho da' güen, Diosen' gone' cont šjayzoacho mbalaz len le' na' gone' cont gacxencho, na' gone' cont soacho binlo len xbab dan' yo'o lo' yichjlažda'ochon'. Zgua'tec gone' ca' len neto' nacto' bene' Israel, na' techle gone' ca' len le'e bi nacle bene' Israel.

¹¹ Toz ca chon Diosen' len yogo'loł benač. ¹² Bene' bi zjanombi'e ley dan' bzoj da' Moisésen' na' chesone' da' xinj, Diosen' gone' yesebiaye'e gague lagüe dan' bi zjanombi'e leyna', san lagüe dan' zjañezde' chesone' da' xinj. Na' bene' zjanombi'e leyna' na' chesone' da' xinj, Diosen' gone' ga yesebiaye'e da' bi chesone' can' žanna'. ¹³ Gague con yenecho can' ža leyna' cont Diosen' ñe' naccho bene' güen len le', san goncho can' žanna', nach Diosen' ñe' naccho bene' güen len le'. ¹⁴ Bene' bi zjanac bene' Israel na' bi zjanombi'e ley dan' bzoj Moisésen', tgüje lo' lažda'ogaquen' chonen cont chesone' da' güen can' ža leyna' cheyala' yesone', na' la'czla' bi zjanombi'e leyna' dan' zoa yichjlažda'ogaquen' chžian bia' yesone' da' güen, naquen ca to ley len legaque'. ¹⁵ Nachbia' zjañezde' lo' lažda'ogaque' cheyala' yesone' da' ca' nžia bia' leyna' yesone', le chesone' late' güejen. Na' zjañezde' lo' yichjlažda'ogaquen' še da' chesone' naquen güen o še naquen mal. ¹⁶ Can' gac caten' žin ža Diosen' gone' lo' na' Jesucriston' choglagüen' čhe to tocho ca nac xbab čhechon' da' ba bencho na' bichle da' ba bencho bagaše'ze še naquen güen o še naquen mal. Can' chnia' cate' chyixjue'eda' diža' güen čhe Jesucriston'.

Bene' Israel bi chesone' can' ža' leyna'

¹⁷ Na' le'e nacle bene' Israel gualaž chia', šeca chonle xbab zoale binlo len Diosen' da' nsedle ley dan' bzoj Moisésen', na' šeca cha'laže'le dan' nombia'le Diosen'. ¹⁸ Nezele bin' chazlaže' Diosen' na' chache'ele bin' nac da' güen na' bin' nac da' mal, le nsedle xtižen'. ¹⁹ Chaquele zaca'le cont co'ole be'ni' lo' yichjlaždao' bene' bi nombia' Diosen'. ²⁰ Na' chaquele guac gwzejni'le bene' cheson clele nac cheyala' yesone', na' chaquele guac gwsed gwlo'ele bene' cobe xtiža' Diosen', le nombia'le diža' li čhen' na' len nsan' doxen da' cheyala' nezele. ²¹ Le'e chsed chlo'ele bene' yoble, čbixchen' bi chsed chlo'e cuinle? Le'e žale bi cheyala' no cuan, čbixchen' chbanle? ²² Le'e žale nono gata'len no'ole bi nac no'ol che', na' no'olen' bi gata'lene' ben' bi nac bene' che', čbixchen' chonle da' che'le bene' bi gone'? Le'e chgue'ele l' gua'a lsaca' da' chesejnilaže' bene' čbixchen' chjalanle bi da' de lo' yo'o gan' že' l' gua'a lsaca' ca'? ²³ Cha'laže'le da' nsedle ley da' bzoj Moisésen', perw chzoale Diosen' to šla'ale da' bi chonle

can' ža leyna'. ²⁴ Chac can' nyoj Xtiža' Diosen' žan: "Da' chonle da' xinj, bene' bi zjanac bene' Israel chesene' mal che Diosen'."

²⁵ Še choncho can' ža leyna' zaca'czen dan' ba gwzoacho seřw lo cuerp chechon' da' zejen chio' bene' Israel naccho yež che Diosen'. Perw še bi choncho can' ža leyna', bibi zejen da' ba gwzoacho seřw dan' nzi' circuncisión. ²⁶ Bene' bi naque' bene' Israel bi zoe' seřua', na' še chone' can' ža ley che Diosen', Diosnan' ne' naque' txen len chio' zoacho seřua'. ²⁷ Na' bene' cheson can' ža leyna', la'czla' bi zjanaque' bene' Israel na' bi zjazoe' seřw dan' nzi' circuncisión lo cuerp chen', chesone' cont nacbia' de xtoła' le'e nsedle leyna' perw bi chonle can' žanna'. ²⁸ Bi nacho nacccho dogualje bene' Israel da' na'ocho costumbr che nación chechon' na' dan' zoa seřw lo cuerp chechon'. ²⁹ Naccho dogualje bene' Israel gague dan' choncho can' ža leyna' da' nyojen, san da' chejnilaže'cho Diosen' do yichj do laže'cho na' ba be'cho latje bocobe Spiritw che Diosen' yichjlažda'ochon'. Da'n'an' Diosen' güe'e diža' güen checho, la'czla' še notno chne güen checho.

3

¹ ¿Bi da' güen da' chga'añ che chio' bene' Israel da' goljcho lo diaža che da' xoxxta'ochon' še ca'? ¿Bi da' güen da' chga'añ da' ba zoacho seřw da' nzi' circuncisión? ² Da' xen da' chga'añ. Na' da' blaoch da' chga'añ, Diosen' bnežjue' da' xoxxta'ocho ca' Xtižen' da' nyojen par yogo' beñačh. ³ Na' la'czla' zan bene' gualaž checho bi gosejle'e chen, bi nacho Diosen' bi gone' güen can' gwne' gone' len chio' naccho nación che'na'. ⁴ Goncze' con can' že'na'. Yogo' ni'a Diosen' chne' diža' li, la'czla' še žin ža cate' yogo'lol bene' yesene' diža' güenlaže'. Chac can' nyoj Xtiža' Diosen' žan: Le' gwlo'edo' beñačen' le cho'o diža' li. Na' ca' nac bene' ca' cheson xbab bi chono' can' žon', yesache'ede' chonczo' can' žo'na'.

⁵ Bał bene' chesene' cate' choncho da' xinj chlo'en ca' bene' güen nac Diosen', na' chesene' Diosen' bi zeje' to li še chone' cont saca'zi'cho che da' xinj dan' chonchon'. ⁶ Clelen' chesone' xbab. Šaca' Diosen' bi chone' da' zej toli, bi gac gone' yela' justis che chio' beñačh. Perw gonczen'.

⁷ Na' nita' bał bene' chesone' xbab clele, chesene': "Cate' choe'cho diža' güenlaže' chlo'en ca' bene' güen juisyw nac Diosen' da' cho'e pur diža' li. Da'n'an' bi cheyala' ne' napcho dola' cate' chonlaže'cho." ⁸ Lecze chesonlaže' bał bene' chesene' neda' bzejni'ida' guaque goncho da' mal cont gac da' güen. Da' cheyala'cze gon Diosen' cont sacazi' note'tez bene' ža ca'.

Yogo'cho napcho dola' lao Diosen'

⁹ ¿Bixen' ša? ¿Naquech chio' bene' Israel bene' güenčh ca' bene' bi zjanac bene' Israel? Bi naccho ca'. Ba bzejni'ida' toz ca' nac che chio' bene' Israel len che bene' bi zjanaque' bene' Israel, yogo'cho de xtoła'cho. ¹⁰ Na' Xtiža' Diosen' nyojen žan:

Nono zoa bene' zej to licha, ne toe'.

¹¹ Nono nla' bene' chejni'i cont gwzenague' che Diosen', nono nla' bene' cheyiljue' le'.

¹² Yogo' beñačh ba zjanque'e nez mal. Yogüe' ba zjanaque' ca' to da' bibi zaca'. Ne to nono zoa bene' chone' da' güen.

¹³ Len xtiža'gaquen' cheseřoayague' bene'.

Ca zban chļa' cho'a ba che bene' guat še bi nyeyjon binlo, ca' zban chļa' xtiža'gaquen'.

Na' ca venen che bel znia nac xtiža'gaquen' da' cheso'e.

¹⁴ Pur diža' mal diža' bya' že' cho'agaquen'.

¹⁵ Con bize da' chosode'ede' cont chesote' bene'.

¹⁶ Gate'teze chja'aque' zjanse'e yela' yaše' yela' zi' ca nac da' chesone'.

¹⁷ Bi chesezoe' binlo len lježe'.

¹⁸ Bi chesežebe' Diosen' len bi da' mal chesone'.

¹⁹ Na' nezecho Diosen' bene' chio' bene' Israel ley chen'. Da'n'an' ne tocho bi chac nacho bibi xtola'cho de, le bi choncho can' žanna'. Nachen' Diosen' že' si'cho castigw che xtola'chon', con can' že' che yogo' benach, le yogüe' bi chesone' can' ža ley chen'. ²⁰ Bi nacho zoa bene' naque' bene' güen len Diosen' da' chone' yogo' da' ža leyna', le notno chon ca'. Leyna' chlo'en chio' naccho bene' güen da' xinj.

Bene' šejnilaže' Jesucriston' gaque' bene' güen len Diosen'

²¹⁻²² Na' na'a Diosen' ba blo'e can' goncho cont gaccho bene' güen len le', na' bich bi že' che da' ca' ža leyna' cheyala' goncho, san že' cheyala' šejnilaže'cho Jesucriston' cont gaccho bene' güen len le'. Doxen Xtiža' Diosen' dan' nyojen cani'te chzejni'in cheyala' šejnilaže'cho Jesucriston' cont gaccho bene' güen. Na' toz can' chon Diosen' len yogo'lol benach. ²³ Le yogo'cho ba bencho da' xinj, na' ne tocho bi naccho bene' güen can' chaclaže' Diosen' gaccho. ²⁴ Perw na' Diosen' nži'ilaže'de' chio', na' gague bi chzi'e par že' naccho bene' güen len le', le Cristo Jesús'en' ba bnitlagüe' xtola'chon'. ²⁵ Diosen' gwsele' Jesucriston' bnežjw cuine' gosote'ne' neche xtola' benach. Na' note'teze bene' yesejnilaže'ne' nitlao xtola'gaque'. Diosen' gwsele'ne' cont nachia' zeje' to licha da' gwdape' yela' chxenlaže' bezi'xene' xtola' bene' ca' gwnita' cani' bene' gosejnilaže'ne'. ²⁶ Na' lecze gwsele'ne' cont nachia' zeje' to licha da' že' che yogo' chio' chejnilaže'cho Jesús'en' naccho bene' güen.

²⁷ Bi cheyala' gonxen cuincho güe'cho diža' naccho bene' güen. Šaca' choncho doxen dan' ža leyna' zaca' gonxen cuincho güe'cho diža' naccho bene' güen, perw nono chon can' ža leyna'. Con da' chejnilaže'cho Jesucriston', da'n'an' zaca' cont yeyaccho bene' güen len Diosen'. ²⁸ Can' naquen, note'tez bene' chejnilaže' Jesucriston', Diosen' že' naque' bene' güen len le' da' chejnilaže'ne', gague lagüe dan' chone' can' ža leyna'.

²⁹ ¿Chaquale Diosen' naque' Dios che chio' naccho bene' Israel ngaze? Lecze naque' Dios che bene' bi zjanac bene' Israel. ³⁰ Le toze Diosen' zoa na' len' že' che yogo'cho naccho bene' güen len le' con še chejnilaže'cho Jesucriston', na' toz can' chone' len chio' zoacho señw dan' že' circuncisión na' len bene' cbi zjazoa señwna'. ³¹ ¿Chaquale choncho leyna' ca to da' bibi zaca' da' žacho cheyaccho bene' güen len Diosen' cate' chejni'laže'cho Jesucriston'? Bi chonchon ca to da' bibi zaca', san chlo'echo naquen da' zaca'chgua.

4

Can' ben da' Abraham

¹ Na' le'e bene' gualaž chia' len le'e bi nacle bene' Israel, da' xozxta'oto' Abraham ¿bixe nacho che'? ² Šaca' Abrahanna' bene' doxen can' ža leyna', zaca' gonxen cuine' da' naque' bene' güen, san bi bene' doxen can' žanna' na' bibi gota' da' zaca' gonxen cuine' lao Diosen'. ³ Quinga ža Xtiža' Diosen' da'

nyojen: "Abrahanna' gwejnilaže' Diosen' na' da'nan' Diosen' gwne' naque' bene' güen len le'." ⁴ Cate' to bene' chone' žin, chone' gan laxjue' na' xan žinna' bi chone' to goclen cate' chnežjue' laxjuen'. ⁵ San to goclen chon Diosen' že' che chio' chejnilaže' chone' naccho bene' güen len le', le bi choncho da' güen. Choncho da' xinj, na' Diosen' chnitlagüe' da' xinj chechon' še chejnilaže' chone'. ⁶ Lecz da' Davin' be'e diža' ca mba chzoa ben' chnitlao Diosen' xtolen' na' bibi cuent chone' še ba ben ben' da' güen o ba bene' da' mal. ⁷ Bzoy Davin' da' nga žan:

Mba zoacho še ba bezi'xen Diosen' che da' xinj da' ba bencho.

Mba zoacho še ba bñitlagüe' xtol'a'chon'.

⁸ Mba zoacho še Diosen' že' checho bibi xtol'a'cho de.

⁹ ¿Chaquale neto'zen' zoato' señw dan' že' circuncisión gac soato' mba can' gwne'?' Gague neto'zen'. Lencze le'e bi zoale señw dan' že' circuncisión guac soale mba. Nezecho Diosen' gwne' da' Abrahanna' naque' bene' güen len le' da' gwejnilaže'ne'. ¹⁰ Gwne' che da' Abrahanna' naque' bene' güen len le' cate' biña' soe' señw dan' že' circuncisión, gague beyož gwzoen'na' gwne' ca'. ¹¹ Na' gwdechle gwzoe' señwna' cont gwnezde' Diosen' bñitlagüe' xtol'e' da' ba chejnilaže'ne'. Na' da'nan' Abrahanna' naque' xoxxtao' yogo' bene' chesejnilaže' Diosen' cont nitlao xtol'a'gaquen' la'czla' bi zjazoe' señwna'. ¹² Na' lecze naque' xoxxtao' neto' bich bi xtol'a'to' de da' chejnilaže'to' Diosen', neto' zoato' señw dan' že' circuncisión. Perw gague naque' xoxxta'oto' da' zoato' señwna', san da' chejnilaže'to' Diosen' can' gwejnilaže' da' Abrahanna' le'.

Diosen' bene' güen len da' Abrahanna' da' gwejnilaže'ne'

¹³ Diosen' gože' da' Abrahanna' gone' cont le' len bene' za' yesalje lo diaža' chen' yesac chegaque' doxen yežlion'. Gož Diosen' da' Abrahanna' ca' da' gwejnilaže'ne'. Da'nan' gwna Diosen' naque' bene' güen gague da' bene' can' ža leyna'. ¹⁴ Šaca' ža Diosen' con bene' yeson doxen can' ža leyna' yesac chegaque' yežlion', bibi zaca' šejnilaže'cho Diosen' šeca', na' bibi zejen da' gwne' gone' güen len bene' za' yesalje lo diaža' che da' Abrahanna'. ¹⁵ Na' leyna' nsan' castigw che benachen', le bi chesone' can' žanna. Šaca' bibi ley de da' gwžian bia' bi da' cheyala' gon chio' benač, bibi xtol'a'cho de šeca'.

¹⁶ Can' naquen, note'teze bene' chesejnilaže' Diosen', none' legaque' ca xi'in diaža' che da' Abrahanna', na' Diosen' gone' cont legaque' yesac chegaque' yežlion' can' gože' da' Abrahanna'. Gague neto'zen' nombia'to' ley da' bzoy da' Moisésen' gac cheto' yežlion'. Na' nacczen da' li gon Diosen' güen len note'tez bene' chejnilaže'ne'. Na' gone' ca' cont gacbia' to goclen chone' len bene' ca' chesejnilaže'ne' can' gwejnilaže' da' Abrahanna' le'. Na' da' non Diosen' cuent Abrahanna' naque' ca xoxxtao' yogo' chio' chejnilaže'chone', ¹⁷ chac can' gože' da' Abrahanna' gwne': "Ba nzoa' le' gaco' xoxxtao' bene' še' nación zan." Dios ben' gwejnilaže' da' Abrahanna' nape' yela' guac cont yosbane' bene' guat, na' chac chone' cont gac da' biña' gac.

¹⁸ Abrahanna' bi gwnezde' nac gac can' gwna' Diosen' gac, san con gwzoe' gweyje'le' che Diosen' na' gwzoe' lez gon Diosen' cont nita' bene' zan xi'in diaža' che'. ¹⁹ Gwzoacze' gweyje'le' can' gož Diosen' le' la'czla' ba naque' bene' gole par soa xi'ine', le ba zejgale' to gayoa iz, na' no'ol che' Sara naque' bene' güiž. ²⁰ Gwzoateze' gwejnilaže' Diosen' na' bi goczejaže' len da' gož Diosen' le' gone', san gwzoachače' gwejnilaže'ne' na' benxene'ne'. ²¹ Abrahanna' gwnezde' Diosen' nape' yela' guac cont gone' can' gwne'. ²² Da'nan' Diosen' gwne' naque' bene' güen da' gwejnilaže'ne'.

23 Na' dan' nyojen žan Diosen' gwne' naque' bene' güen da' gwejnilaže'ne', gague nyojen ca' che Abraham na'zen'. 24-25 Lecze nyojen che yogo'cho, le Diosen' lecze že' naccho bene' güen len le' da' chejnilaže'chone'. Cont gwñitlagüe' xtola'chon' Diosen' gwsele' Xancho Jesucriston' bnežjw cuine' gosote' le'. Na' Dios ben' chejnilaže'cho bečhis bosbane'ne' ladjo bene' guat ca' cont beyone' chio' bene' güen.

5

Zoacho binlo len Diosen' da' chejnilaže'cho Jesucriston'

1 Na' ca nac chio', da' ba chejnilaže'cho Xancho Jesucriston', Diosen' ba gwne' naccho bene' güen len le', na' lecze da'nan' ba zoacho binlo len le'. 2 Da' chejnilaže'cho Jesucriston', Diosen' zoacze' nži'ide' chio'. Na' chebecho nezecho gone' soacho mbalaz juisyw can' zoa le' cate' šjayzoacho txen len le'. 3 Na' lecze chebe chezaque'cho cate' chzaca'zi'cho, le nezecho še gonxenlaže'cho cate' chzaca'zi'cho, nach gwyo gwčejechcho cate' de bichle da' saca'zi'cho. 4 Na' še chonxenlaže'cho cate' chzaca'zi'chon', chlo'en zoachachcho chejnilaže'cho Diosen'. Na' še zoachachcho chejnilaže'chone', nezecho šjayzoacho txen len le'. 5 Na' dan' zoacho lez šjayzoacho txen len Diosen', bi nacho naquen to da' güenlaže' chaquecho gac checho ca'. Le Diosen' ba gwsele' Spiritw čhen' zoan len chio' na' čñen lo' lažda'ochon' žan chacchgüe Diosen' chio'.

6 Chio' benač naccho bene' güen da' xinj na' bibi chac goncho cont yezoacho binlo len Diosen', perw bžin ža cate' Diosen' gwsele' Criston' bnežjw cuine' gote' neče chio' napcho doła'. 7 Nono zoa bene' gwnežjw cuine' yesot bene' le' neče bene' yoble, la'czla' še nac ben' bene' güen, o še gwchojlja tgüej bene' yeyaxjde' gwnežjw yela' mban che' yesote'ne' gualaz to bene' šagüe'. 8 San Diosen' blo'ede' chacchgüede' chio' da' gwsele' Criston' gote' neče chio' la'czla' zoacho choncho da' xinj. 9 Na' dan' got Criston' neče chio', Diosen' že' naccho bene' güen da' chejnilaže'cho le'. Na' Criston' lecze gone' cont bi saca'zi'cho cate' žin žan' Diosen' čogbi'e che yogo'lol bene'. 10 Cana' bi gwzoacho binlo len Diosen'. Perw Xi'ine' Criston' bnežjw cuine' gote' neče chio' cont bozoe' chio' binlo len Diosen'. Na' na'a ba zoacho binlo len le' na' nezecho zoacze Criston' chone' cont žin ža šjayzoacho len Diosen'. 11 Na' lecze chebecho nombia'cho Diosen', le Xancho Jesucriston' ba bozoe' chio' binlo len le'.

Adánna' gwleque' da' mal yežlio nga, san Jesucriston' gwleque' da' güen

12 Yela' güedenag che bene' nechw ben' le Adán gwxe da' malen' yežlio nga, na' da' malen' nsan' yela' got. Can' goc, gwzolao chesat yogo' benachen', le yogo'lol'e' chesone' da' mal. 13 Benachen' gwzolao chesoncze' da' xinjen' cate' gwzoate da' Adán, la'czla' biña' gata' ley dan' bzoj da' Moisésen'. Na' gan' bibi ley de, nono chon xbab še cheson bene' da' xinj. 14 Perw na' gwzolaon len da' Adánna' na' len bene' gwnita' caten' gwbane', bžinten len bene' gwnita' caten' gwban Moisésen', yogo'lol'e' gosate' can' chesat bene' ža na'aža. La'czla' legaque' bi gosone' güedenag len to da' gož Diosen' legaque' can' ben Adánna', bia'cze yogüe' gosone' da' xinjen'. Adánna' gwleque' yela' goten', san Jesucriston' ben' ba naquen sela' Diosen', len' bxi'e' yela' mban toli tocaņe.

15 jNža' xen ca dan' gwxe caten' Adánna' bene' da' xinjen' na' ca dan' gwxe cate' Diosen' gwsele' Jesucriston'! Yogo' chio' benač gatcho lagüe da' ben Adánna' da' xinjen', san yogo' chio' benač guac soacho mba da' nži'i Diosen'

benachen' na' gwsele' Xi'ine' Jesucriston' cont chaclene' note'tezcho. ¹⁶ Toz Adánna' bi bzenague' che Diosen' na' da'nan' Diosen' gwne' yesezaca'zi' yogo'cze benachen' toli tocanē che xtolā'gaquen'. Nach Diosen' gwsele' toz bene' güen cont bnitlagüe' xtolā' note'tezcho chejnilaže'chone' na' beyone' chio' bene' güen la'czla' da' zan da' xinj ba bencho. ¹⁷ De yela' got che chio' benach neche da' xinj da' ben toz ben' gože' Adán, san mbalaz juisyw chac che chio' benach neche da' güen da' ben Jesucriston' bnežjw yela' mban che' neche yogo'cho. Diosen' nži'ide' chio', nachen' bibi chchixjue' chonze' chio' ca bene' güen še chejnilaže'cho Jesucriston', na' none' chio' yela' mban toli tocanē cont nabia'cho txen len Jesucriston'.

¹⁸ Can' naquen, da' ben toz Adánna' da' xinj, Diosen' gwchogbi'en saca'zi' yogo' benachen' che xtolā'gaquen'. Na' neche da' güen da' ben toz Jesucriston' da' bnežjw cuine' gosote'ne', da'nan' nitlao xtolā' note'tezcho chejnilaže'chone', cont none' chio' ca bene' güen. ¹⁹ Len da' xinj dan' ben Adánna' cate' bene' güedenag len Diosen', gwxe da' xinj da' chon yogo' chio' benach. Na' da' bzenag Jesucriston' che Diosen' na' bnežjw cuine' cont nitlao xtolā' benachen', da'nan' note'tezcho chejnilaže'chone' none' chio' ca bene' güen.

²⁰ Cate' Diosen' bnežjue' ley chen' da' bzoj Moisésen' na' gwcha'o gwxen ch da' xinj da' goson benachen', le bi bosozenague' chen. Perw na' la'czla' gwcha'o gwxen da' malen', gwcha'o gwxen ch yela' ži'ilaže' che Diosen' len chio' benach. ²¹ Can' chac, de yela' got che yogo' chio' benach da' naccho bene' chon da' xinj, ca'cze Diosen' nži'ide' yogo' chio' benach cont note'tezcho gaccho bene' güen len le' na' gata' yela' mban checho toli tocanē še šejnilaže'cho Xancho Jesucriston'.

6

Bi cheyala' soacho goncho da' xinj san soacho goncho can' chazlaže' Criston'

¹ ¿Naxcen' cheyala' goncho na'a ba nezecho nži'ilaže' Diosen' chio'? ¿Goncho da' malen' cont yezi'xenchze Diosen' che chio'? ² Gague can' goncho. Cate' gwzolao chejnilaže'cho Criston' bich goclaže'cho nabia' da' malen' chio'. Da'nan' guac nacho ba gotcho len da' xinjen cont bich gonchon. ³ ¿Bi chache'ele can' zejen da' gwzoacho nis? Zejen da' chejnilaže'cho Jesucriston' ben' got neche chio', bačh naccho ca to bene' guat len da' xinjen' cont bich gonchon. ⁴ Na' dan' gwzoacho nis lecze guac nacho bgaše'cho can' bosocuaše' Criston'. Na' con can' bečhis bosban Xancho Diosen' Criston' ladjo bene' guaten' len yela' guac xen che', ca'czen' bene' len chio', ba bocobe' yichjlažda'ochon' cont soa cuzcho goncho da' güen.

⁵ Na' can' žacho ba gotcho len da' xinjen' dan' chejnilaže'cho Criston', lecze guac nacho bečhis bosban Diosen' chio' can' bečhis bosbane' Criston', le ba bocobe' yichjlažda'ochon'. ⁶ Cana' ne' chnabia' da' malen' chio' len yogo' da' choncho. perw na'a da' chejnilaže'cho Criston' ben' got neche chio', ba none' chio' ca to bene' guat len da' xinjen' cont bich gonchon na' cont da' mal dan' yo'o lo' yichjlažda'ochon' bich soan nabian' chio'. ⁷⁻⁸ Bene' ba got bich zoe' chone' da' xinj, na' ca' nacczen len chio' chejnilaže'cho Criston', bich che'necho nabia' da' malen' chio' na' bich zoacho chzenagcho chen. Na' chejle'cho gone' cont soacho bancho len le' na'a na' toli tocanē. ⁹ Na' nezecho Criston' beyas bebane' ladjo bene' guaten' na' gwbat gate' da' yoble le bich soe yela' goten' le'. ¹⁰ Na' cate' gosote' Criston', tni'aze bnežjw yela' mban che' neche xtolā'chon'. Bich chyažjen gwnežjw cuine' da' yoble, san ba

zoalene' Diosen' chone' con bi da' chazlaže' Diosen'. ¹¹ Nach dan' gote' neche xtoła'chon', cheyała' soacho goncho cont da' mal dan' yo'o lo' yichjlažda'ochon' bich nabian' chio', na' cheyała' soacho txen len Xancho Jesucriston' cont goncho dan' chazlaže' Diosen'.

¹² Da'nan' bi güe'cho latje năbia' da' malen' cuerp chechon' dan' nac da' gat na' goncho bi da' xinj da' selažen'. ¹³ Bi cheyała' gon cuincho lo na' da' gwxiyen' cont goncho da' mal len cuerp chechon'. Cheyała' gon cuincho lo na' Diosen' cont goncho da' güen. Guac năcho Diosen' bechis bosbane' chio' ladjo bene' guaten' da' bocobe' yichjlažda'ochon'. ¹⁴ Bich năbia' da' malen' chio', le nezecho Diosen' chbede' chio' gague neche da' choncho can' ža ley dan' bzoj da' Moisés, san dan' naque' bene' šagüe'.

Bene' chzenag che da' malen' naque' ca bene' zoa xan, bene' chnăbia' le' cont gonche' da' malen'

¹⁵ ¿Gontezcho da' xinjen' da' nezecho nži'i Diosen' chio' na' nezecho bi chone' cuent še ba bencho da' ža leyna' cheyała' goncho? Bitw goncho ca'. ¹⁶ Nezecho še ba chzenagcho che to bene' cont goncho bite'tez že', choe'cho latje chnăbi'e chio'. Na' ca'cze naquen len chio' še chzenagcho che da' malen' na' chontezchon, ba chnăbia' da' malen' chio' še ca'; na' bi gac šjayzoalencho Diosen' toli tocanē še ca' choncho. San še zoacho chzenagcho che Diosen', nachen' zejczcho choncho da' güen na' šjayzoalencho Diosen' toli tocanē. ¹⁷ Na' choa' yela' choxcen che Diosen' na'a ba chzenagle do yichj do laže'le xtiža' Diosen' da' ba bzejni'ito' le'e, na' bich chzenagle che da' malen' can' benle cana'. ¹⁸ Diosen' ba bebeje' le'e lo' da' malen' na' ba ben cuinle lo ne'en cont soale gonle da' güen. ¹⁹ Ba bzejni'ida' le'e bia' diža' che bi da' chac che chio' benach cont šejni'ile. Nachen' chnia' le'e, con can' gwzoale bentezle da' nac da' yela' zto' len cuerp chelen', na' benchgualē da' malen', lecze can' cheyała' gon cuinle lo na' Diosen' gonle da' güen cont chazlaže' Diosen' can' chonlen'.

²⁰ Caten' ne' zejcho choncho da' malen' bi chzenagcho che Diosen' neca choncho da' güen. ²¹ Na' bibi banez na' le'echo che da' mal ca' ba bencho, san na'a ba cheto'echo chen. Bene' ca' ne' chesontezē da' malen' gata' castigw chegaque' toli tocanē. ²² Na' chio', Diosen' ba bebeje' chio' lo da' malen' na' yo'ocho lo ne'ena'. Da'nan' zezech choncho da' güen can' chazlaže' Diosen' na' šjayzoacho len le' toli tocanē. ²³ Še zoacho choncho da' xinjen', gata' castigw checho toli tocanē cate' gatcho. San Diosen' chonđadze' chio' to da' güen juisyw, chio' chejnlaže'cho Xancho Jesucriston', chone' cont šjayzoacho len Diosen' toli tocanē.

7

Naccho ca to bene' ba got len ley da' bzoj Moisésen'

¹ Bene' migw, da' nga žia' le'e, le nombia'le ley dan' bzoj Moisésen'. Nezczecho con bene' ca' zjamban cheyała'cze yosozenague' che leyna'. ² Ca to no'ole nšagna', šlac mban bene' che' cheyała' soalene' le', le can' chon leyna' mandadw gone'. Na' še ba got bene' chen', cana' ba bele' len leyna' da' chon mandadw soalene' bene' chen'. ³ Še no'olen' soalene' bene' yoble šlac ne' mban bene' chen', nape' doła' len leyna' da' chzoa xtoe'. Perw na' še ba got bene' chen', leyna' žan ba guac yošagna'lene' bene' yoble na' bi năcho chone' da' xinj yošagne'e.

⁴ Bene' migw, can' naquen len chio' chejnilaže'cho Criston'. Ba belacho len leyna' da' žan saca'zi'cho che xtoła'chon' toli tocaņe. Na' ba gwnitlao xtoła'chon' dan' bnežjw Criston' yela' mban čen' gosote'ne' le'e yag cruzen'. Da'n'an' ba zoacho txen len Criston' ben' beban ladjo bene' guaten', na' zoacho cont goncho can' chazlaže' Diosen'. ⁵ Cana' zoacho chzenagcho che da' malen' dan' yo'o lo' yichjlažda'ochon'. Na' cate' gwnezecho can' ža ley dan' bzoj da' Moisésen', nachle be'laže'cho bencho da' malen', na' da' malen' nsan' castigw checho toli tocaņe cate' gatcho. ⁶ Perw na'a ba belacho len ley da' žan cheyala' si'cho castigw toli tocaņe, le Criston' beque'e xtoła'chon'. Na' ba chaclaže'cho goncho can' chazlaže' Diosen', na' chonchon gague cont na Diosen' naccho bene' güen len len', san chonchon dan' ba bocobe Spiritw čen' yichjlažda'ochon'.

Bi güe'cho latje nabia' da' malen' chio'

⁷ Bi cheyala' goncho xbab nac to da' mal ley dan' bzoj da' Moisésen'. Leyna' bzejni'in neda' bi dan' bi cheyala' gona' cont gocbe'eda' chona' da' xinj. Na' gwnezda' naquen mal chzelaža' bi da' de che bene', le leyna' žan: "Bi selaže'le bite'teže da' de che bene'." ⁸ Na' cate' gwnezda' can' ža leyna', nachle da' mal dan' yo'o lo' yichjlažda'oguan' benen gwzelaže'cha'. Da' li cate' bi nezecho can' ža leyna', bi nezecho še choncho da' xinj. ⁹ Neda' gwzoa' to tiemp bi gocbe'eda' bi cheyala' selaža'. Perw cate' bžin ža gwnezda' nžian bia' bi cheyala' selaža', nachle bzenagcha' che da' mal da' yo'o lo' yichjlažda'oguan' na' gwzelaže'cha'. Da'n'an' gwnezda' cheyala' sia' castigw che xtolan' toli tocaņe. ¹⁰ Leyna' nyojen cont gwzenagcho čen na' gata' yela' mban checho toli tocaņe, perw da' bi bzenaga' čen, bzejni'in neda' gata' castigw chia' toli tocaņe. ¹¹ Can' goc, cate' bemb'a leyna', da' malen' da' yo'o lo' yichjlažda'oguan' gwxoayaguen neda' cont bencha' da' malen', nach gwchoglaon chia' gata' castigw che xtolan' toli tocaņe.

¹² Ley dan' bzoj Moisésen' nacczen che Dios, na' to to da' nžian bia' goncho naquen güen na' zejen to liča. ¹³ Nacho leyna' da' naquen güenchguan' chonen cont saca'zi'cho che xtoła'chon' toli tocaņe? Bi nac len. Da' mal da' yo'o lo' yichjlažda'ochon' bi ben' latje goncho can' cheyala' goncho, na' da'n'an' gwchoglaon checho saca'zi'cho che xtoła'chon' toli tocaņe. Leynan' da' nac da' güen chlo'en chio' Diosen' chgue'echgüede' da' mal da' choncho.

¹⁴ Nezecho leyna' naquen che Spiritw che Diosen' na' naquen güen, san chio' yo'o da' malen' lo' yichjlažda'ochon' na' zoacho choncho da' xinj. ¹⁵ Bi choncho da' güen da' chaclaže'cho goncho, san da' xinj da' chgue'echo lelen' choncho. Bi chache'echo bixčen' choncho ca'. ¹⁶ Na' dan' chgue'echo da' mal dan' chonchon', zejen chache'echo nac leyna' güen. ¹⁷ Gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon. ¹⁸ Nezecho bi naccho bene' güen, le yo'o da' malen' lo' yichjlažda'ochon'. Chaclaže'cho goncho da' güen perw bi chac gonchon. ¹⁹ Bi choncho da' güen da' chaclaže'cho goncho, san choncho da' xinj da' bi che'necho goncho. ²⁰ Da'n'an' chnia', gague chion' choncho da' xinj da' bi chaclaže'cho goncho, san da' mal dan' yo'o lo' yichjlažda'ochon' chžigan' chio' cont chonchon.

²¹ Can' chac checho, cate' che'necho goncho da' güen, da' mal dan' yo'o lo' yichjlažda'ochonan' chžonen gonchon. ²² Lo' yichjlažda'ochon' chbecho goncho can' ža ley che Diosen', ²³ perw chache'echo, yo'o yeto da' yo'o lo'

yichjlažda'ochon' chžonen goncho da' güen, na' lenna' chnabian' chio' cont choncho da' xinjen'.

24-25 ¡Nyaše' chac checho! Lo' yichjlažda'ochon' chaclaže'cho goncho can' ža ley che Diosen', perw da' mal dan' yo'o lo' yichjlažda'ochon' chnabian' chio' len cuerp chechon' cont choncho da' xinjen'. ¿Non' soe da' mal dan' yo'o lo' yichjlažda'ochon' cont bi nabian' cuerp chechon' len xbab chechon'? Le dan' chnabia' da' malen' chio' da'nan' si'cho castigw toli tocaṇe. ChoxcLen Diosen' len' soede' da' mal dan' yo'o lo' yichjlažda'ochon' cont bich nabian' chio', le ba chejnilaže'cho Xancho Jesucriston'.

8

Spiritw che Diosen' chonen chio' yela' mban toli tocaṇe

1 Na' na'a da' ba naccho txen len Cristo Jesúsén', bich gata' castigw checho toli tocaṇe, le ba chzenagcho che Spiritw che Diosen' cont choncho da' güen na' bich chzenagcho che da' malen' dan' yo'o lo' yichjlažda'ochon'.

2 Cate' ne' zoacho chontezcho da' malen' nchoglaan checho si'cho castigw che xtoła'chon' toli tocaṇe, perw na'a Spiritw che Diosen' ba benen chio' yela' mban toli tocaṇe da' chejnilaže'cho Cristo Jesúsén' na' Spiritw chen' chnabian' yichjlažda'ochon'. Da'nan' bich saca'zi'cho toli tocaṇe.

3 Ley da' bzoj Moisésén' bi gwzoen yebejen chio' lo' da' malen', le yo'o da' malen' lo' yichjlažda'ochon'. Nach Diosen' gwsele' Xi'ine' Jesucriston' golje yežlion', goczze cuerp chen' ca cuerp che chio' bene' güen da' xinj. Na' Jesucriston' bnežjw cuine' neche xtoła'chon' cont da' malen' bich nabian' chio' len xbab da' yo'o lo' yichjlažda'ochon'. 4 Diosen' gwsele'ne' cont soacho goncho da' güen can' ža ley chen' cheyala' goncho. Le bich chzenagcho che da' malen' dan' yo'o lo' yichjlažda'ochon', san ba zoacho choncho da' güen lagüe dan' chzenagcho che Spiritw che Diosen'.

5 Še chzenagcho che da' mal dan' yo'o lo' yichjlažda'ochon', con da' malzen' chebecho choncho; san še chzenagcho che Spiritw che Diosen', chebecho choncho da' ca' chazlaže' Diosen'. 6 Le še zoacho chebecho da' malen', nachle si'cho castigw toli tocaṇe, na' še chebecho da' ca' chazlaže' Spiritw che Diosen', guata' yela' mban checho toli tocaṇe na' soa cuzecho binlo len xbab dan' yo'o lo' yichjlažda'ochon'. 7 Choncho ze bene' chgue'e Diosen' cate' chebecho da' malen', le cate' chebecho da' malen' bi chazlaže'cho neca chac gwzenagcho che ley chen'. 8 Na' še zoacho chzenagcho che da' mal dan' yo'o lo' yichjlažda'ochon', bi chebe Diosen' chio'.

9 Na' chio', da' ba bedesoa Spiritw che Diosen' lo' lažda'ochon', bi zoacho chzenagcho che da' malen' da' yo'o lo' yichjlažda'ochon', san zoacho chzenagcho che Spiritw che Diosen'. Na' bene' bi zoa Spiritw che Criston' lo' lažda'ogüen', gague da' li chejnilaže' Criston'. (Spiritw che Criston' lecze naquen Spiritw che Dios.) 10 Perw na' še ba zoa Criston' len chio', Diosen' že' naccho bene' güen len le' na' lecze šjayzoacho len le' toli tocaṇe la'czla' yesat cuerp chechon' neche da' malen' dan' de yežlion'. 11 Diosen' bečhis bosbane' Cristo Jesúsén' ladjo bene' guaten', na' lecze gwžin ža cate' Diosen' yechis yosbane' chio' len cuerp checho quinga da' chesat, le Spiritw chen' zoan lo' lažda'ochon'.

12 Da'nan' bene' migw, chonen byen gwzenagcho che Spiritw che Diosen'. Bi cheyala' gwzenagcho che da' mal dan' yo'o lo' lažda'ochon'. 13 Le še soacho gwzenagcho che da' mal dan' yo'o lo' lažda'ochon', saca'zi'cho toli tocaṇe. Na'

še gwzenagcho che Spiritw che Diosen' cont bi gwzenagcho che da' malen', nach gata' yela' mban checho toli tocanē.

14 Na' note'tezcho še chzenagcho che dan' chzejni' Spiritw che Diosen' chio', naccho xi'in' Dios. 15 Diosen' bene' chio' Spiritw chen' caten' gwque'e chio' ca xi'ine'. Da'nan' bich chžebcho Diosen' can' chžebcho to bene' znia cate' choncho xšinen'. Bich chžebcho Diosen', san choļ güižchone', che'chone': "Xa". 16 Na' lecze Spiritw chen' chñen lo' lažda'ochon' cont nezecho naccho xi'in' Dios. 17 Na' da' naccho xi'in' Dios, gwžin ža cate' yogo' da' de che Criston' gaquen checho txen len le'. Na' can' bzanlaže' cuin Criston' gwdi gwxaque', can' cheyala'cze zanlaže' cuincho saca'zi'cho bi da' gac checho cont Diosen' gone' ga gacgqua güen checho txen len le' yaban'.

18 Yežlio nga de da' chzaca'zi' chzaca'yaše'cho. Perw chacda' bibi zaca'czen cue' yichjcho che da' ca' chac checho, le gwžin ža leca mba juisyw gac checho cate' šjayzoacho len Diosen'. 19 Diosen' bene' benač, bene' beyixe', len bica'chle da' zjade. Na' yogo'cho len bichle da' ca' bene' zoacho lo juisyw chbezcho batcan' gon Diosen' gacgqua mba che chio' naccho xi'ine'. 20 Na' yogo' da' ca' ben Diosen' bich zjanacšagüen'. Na' gague con to gualazen zjanauen ca', san Diosen' bžie' bia' zjanauen ca'. Perw za' yeyonšagüe' Diosen' legaquen len beyixe' ca' na' len chio' benač. Na' txen chbezcho gone' cont gac checho binlo. 21 Yogo'cze da' ca' bene' yesebiayin', na' chesebezen batcan' žin ža cate' gone' cont yeyac cuerp che chio' naccho xi'in' Diosen' da' cobe na' da' zaca'chgua can' nac che Criston', le canan' lecze yeseyacšagüe' da' ca' cont bich te chegaquen. 22 Nezecho ža na'aža yogo' da' ca' ben Diosen' chesežaglaon ca to no'ole bene' chzan. 23 Na' gague da' ca'ze chesežaglaon, san lencze chio' benač chžaglaon na' chbežgüe'cho. Ba ben Diosen' chio' Spiritw chen' cont nezecho gwžin ža gaquech güen checho. Na' chbežgüe'cho lo' lažda'ochon' chbezcho batcan' gon Diosen' cuerp cob chechon' cont gwlo'e ba nque'e chio' ca xi'ine'. 24 Cate' Diosen' bene' yela' mban checho toli tocanē gwzolao chbezcho gone' cuerp cobe chechon', na' lenna' ne' chbezcho. Nono zoa ne' chbeze' gac da' nezde' ba goc. 25 Na' še biņa' le'echo da'na' chbezcho gac, cheyala' cuezcho gaquen sin cbi chjaxaque'laže'cho.

26 Na' Spiritw che Diosen' chaclenen chio', le bi nezecho can' cheyala' goncho yoļ güižcho Dios, san Spiritw che Diosen' chache'en cate' con chebanecho na' cate' bi cheželecho diža' da' güe'lencho Diosen', nach chñen gualazcho len diža' da' bi chejni'icho. 27 Na' Dios ben' chña' chgüie' yichjlaždao' yogo'cze bene', chejni'ide' bin' chaclaže' Spiritw chen' cate' chñen gualazcho, le ba gwleje' chio' naccho lo ne'e. Na' con da' chaclaže' Diosen' chñab Spiriton' lagüen'.

Diosen' de'e chio' na' da'nan' nono soe chio'

28 Na' nezecho bite'tez dan' chac, Diosen' chone' cont gac güen che chio' chaquechone', le ba gwleje' chio' cont naccho lo ne'e can' gwnalaže'. 29 Cate' biņa' galjcho Diosen' gwñezde' šejnilaže'chone' na' bsi'e xnezen' gac yichjlažda'ochon' güen can' nac yichjlaždao' Xi'ine' Jesucriston'. Bsi'e xnezen' gac Jesucriston' bene' blao lao yogo'cho na' chio' gaccho ca biše' lježe' bi' xcuide'ch. 30 Can' naquen, cani'te Diosen' bsi'e xnezen' gac yichjlažda'ochon' güen can' nac yichjlaždao' Jesucriston' na' gwleje' chio' cont naccho lo ne'e. Lecze beyone' chio' bene' güen len le' na' bene' cont gacgqua güen checho txen len Jesucriston' yaban'.

31 jCatec güenna' chon Diosen' len chio' ba bsi'e xnezen' gac checho yogo' da' ca'! Len' de'e chio', nachen' notno soe chio'. 32 Diosen' bi bžone' saca'zi' Xi'ine'

Jesucriston', san gwsele'ne' cont yeque'e xtola'chon'. Da'nan' nezecho yebede' gone' chio' yogo' bite'tez da' yažjecho. ³³ Diosen' ba gwleje' chio' naccho lo ne'e, na' beque'e xtola'chon'. Na' notno soe gwcuš chio' lagüen', le ba gwne' bibi xtola'cho de. ³⁴ Nono zoa no gac gon cont na Diosen' de xtola'cho. Criston' bzanlaže' cuine' gosote'ne' cont beque'e xtola'chon', na' beyas bebane' ladjo bene' guat ca', chi'e chnabi'e t xen len Diosen'. Na' len' chnie' gualaz chio' lao Diosen'. ³⁵ ¿De da' gwžon cont Criston' bich gadde' chio'? ¿Gwžon no da' mal da' gac checho? ¿Gwžon no yela' yaše' yela' zi' da' gac checho? ¿Gwžon no yela' xi'a che bene' chgue'e chio'? ¿Gwžon no yela' chbil chdon checho? ¿Gwžon cate' bi de xalana'cho? ¿Gwžon še bi da' xož gac checho? ¿Gwžon še za' no bene' gote' chio'? Bibi de da' gwžon cont Criston' bich gadde' chio'. ³⁶ Chac can' nyojzce Xtiža' Diosen' žan:

Xanto' Dios, da' chejnilaže'to' le' nita' bene' chesaclaže' yesote' neto' do ža do yel.

Chesone' xbab nacto' ca to xila' be yesote'.

³⁷ Na' la'czla' yogo' da' mal ca' za'ac len chio', bi chac chop laže'cho, san chebechgüecho le nezecho zoacde Criston' chacde' chio'. ³⁸ Neda' nezda' bibi de da' gac gwžon cont Diosen' len Criston' bich yesacde' chio'. Yela' goten' bi gonen, ne yela' mbanna', ne no angl, ne no da' xigüe', ne no bene' gwnabia', ne da' chac checho na'a o bichle da' za'za'. ³⁹ Ne da' de le'e yaban', ne da' de gabilen', ne bichle da' ben Diosen' bi gac yosožonen cont Diosen' bich gadde' chio'. Ba blo'ede' catec chacde' chio' dan' gwsele' Xancho Jesucriston' beque'e xtola'chon'.

9

Diosen' gwque'e bene' Israel ca' ca xi'ine'

¹⁻² Neda' naca' t xen len Criston' na' choa' diža' li, bi chonlaža', chnia' chacyaše'chgüeda' na' chacchgüeda' lo' lažda'ogua' che bene' gualaz čhia' bene' bi chesejnilaže' Criston'. Spiritw che Diosen' chaclenen neda' cont nezda' diža' lin' choa'. ³ Chacda' gwzanda' cuina' cuiaya'a šeca' da' cuejiže' Diosen' neda' cuit Criston' gonen cont bene' gualaz čhia' ca' yesejnilaže' Criston'. Chacda' legaque', le gosalje' zjanaque' bene' Israel ca neda'. ⁴ Diosen' gwque'e xoxxtao' neto' bene' Israel ca xi'ine', na' gwzoe' len legaque' lo' be'ni' juisyw. Na' gwne' gadlene'ne', na' bnežjue' legaque' ley da' bzoj Moisésen'. Na' blo'ede'ne' naclen' yesonxene'ne', nach gože' legaque' bichle da' güen da' gone' len legaque'. ⁵ Bene' gole blao bene' za' che'elte' gosaque' xoxxtao' neto' bene' Israel. Na' lo diaža' čhegaque' na' golje Criston' ben' gwsele' Diosen'. Criston' lecze' naque' Dios na' chnabi'e yogo'te benach, yogo'te beyixe' na' yogo'lol bichle da' de yežlio nga na' gate'teze. Cheyala' gonxenchone' toli' tocane. Na' can' gonšcaczcho.

⁶ Na' bi cheyala' goncho xbab bi ben Diosen' can' gwne' gone' güen len neto' bene' Israel. Gague yogo' neto' goljto' lo diaža' che da' Israelen' na Diosen' nacto' bene' Israel, le gague yogo'to' chejnilaže'to'ne'. ⁷ Na' gague yogo' neto' goljto' lo diaža' che da' Abrahanna' nacto' dogualje xi'in diaža' che', le gague yogo'to' chejnilaže'to' Diosen' can' gwyejnilaže' da' Abrahanna' le'. Quinga gož Diosen' Abrahanna' cani, gwne': "Xi'in diaža' che da' Isaaquen' gona' cuent lo diaža' chion'." ⁸ Na' dan' gwne' ca' zeje diža' Diosen' chbeje' bene' zjanaque' xi'ine' gague da' gosalje' lo diaža' che bene' Israelen', san bene' chesejle'e gon Diosen' gac čhegaque' can' že' con can' gwyejle' da' Abrahanna',

legacze' zjanaque' xi'ine' na' zjanaque' xi'in diaža che da' Abraham. ⁹ Quinga gož Diosen' Abrahanna' gone', gwne': "Cate' žin tiempen' bžia' bia' yida', cana' ba zoa to bi' che no'ol' chio' Sara ni."

¹⁰ Na' gague da' na'zen', san lecz ca' Diosen' be'e diža' che xi'in da' Rebecan' bin' gosac choptebe' xi'in da' xozxta'oto' Isaac. ¹¹⁻¹² Cate' biņa' yesalje bi' cuaš ca' na' bibi na' yesombe' cont nacho zjanacbe' bi' güen o bi' mal, Diosen' blo'ede' chbeje' note'tez beņe' chaclaže' cont gone' güen len legaque'. Le Diosen' gože' Rebecan': "Bin' galje da' nechw gwzexjw yichjbe' cont bin' za' čože'ben' nabia'be' lebe'." Gwne' ca' cont nezecho chbeje' beņe' gac güen chegaque', gague lagüe da' chesone' bi da' güen, san cont gac can' chnalazen'.

¹³ Na' ga yoble nyoj Xtiža' Diosen' žan: "Gocda' Jacob na' bgue'eda' Esaú."

¹⁴ Bi cheyala' goncho xbab Diosen' cbi chone' da' zej to licha dan' chone' ca'. Zejczje' to licha. ¹⁵ Chone' can' gože' Moisésen' cani'te, gwne': "Yeyaše'laža' con non' chazlaža' yeyaše'laža', na' ži'ilaže'da' con non' chazlaža' ži'ilaže'da'."

¹⁶ Diosen' chbeje' beņe' cont yeyaše'laže'de' le', gague can' chaclaže' beņachen', na' gague da' chesone' bi da' chesone', san Diosen' cheyaše'laže'de' con non' chbeje' yeyaše'laže'de'. ¹⁷ Na' Xtiža' Diosen' nyojen can' gože' beņe' gwnabia' che Egipton', gwne': "Neda' bena' naco' rey cont chlo'eda' beņe' yela' guac chia' da' chona' len le'. Chonan' cont yeseneze beņe' že' doxen lo yežlion' zoa' chnabi'a." ¹⁸ Can' naquen, Diosen' cheyaše'laže'de' con non' chazlaže' yeyaše'laže'de', na' lecze beņe' zjanaque' beņe' güedenag, lecze chazlaže' gone' legaque' beņe' güedenag.

¹⁹ Na' da' chon Diosen' ca', guacte gonle xbab nale: "Con can' ba nžia Diosen' bia' chon chio' beņach. žBixchen' že' de xtol'a'chon' še ca'?" ²⁰ Perw žno nac chio' beņach gacyožlencho Diosen'? Ca to no yeso' xguague bi gac yen' bene' ben len: "žBixchen' beno' neda' quinga?" ²¹ Bene' güen yeso' xguaguen' guac gone' con can' chazlaže' len gonan'. Chac chone' ton da' nac xdanchgua na' len gona' na'ze gone' yeto da' gon žin len bite'teze.

²² Na' bi nacho chon Diosen' con can' chazlaže' len chio' beņach yogi' ni'a, nžie' bia' gwnežjue' castigw toli' tocanē che beņe' ca' bi chosozenag che', na' nape' yela' guac cont gone' ca'. Perw chooede' sša chape' yela' chxenlaže' len legaque' na' gague la' seļa'te' legaque' lo yi' gabilen' la'czla' zjzaque' yesebiaye'e. ²³ Chone' ca' le nžie' bia' gone' da' güen juisyw len note'tezcho chejnilaže'chone', chion' cheyaše'laže'de'. Cani'te gwleje' chio' gac da' mba juisyw checho cate' šjayzoacho len le'. ²⁴ Chion' ba gwleje' gac güen checho balcho naccho beņe' Israel na' balcho bi naccho beņe' Israel. ²⁵ Can' ža le'e libr dan' bzoj Oseas ben' be' xtiža' Diosen' cani', žan:

Beņe' ca' bi zjanaque' yež chia', neda' Dios nia' legaque' yež chia',
na' beņe' ca' bi godca', yapegaca'ne' chacda' legaque'.

²⁶ Na' yež gan' gož Diosen' beņe' ca': "Bi nacle yež chia'",
na'teze Dios ben' zoa toli' tocanē ye'e legaque' xi'ine'.

²⁷ Na' Isaías ben' be' xtiža' Dios cani' gwne' quinga che da' xozxta' neto' beņe' Israel: "La'czla' chio' beņe' Israel šancho ca' yox da' chi' cho'a nisdao', bal' gacho šjayzoacho len Diosen'. ²⁸ Le Diosen' gone' can' ba nchoglagüen' len chio' beņach, na' bedao'nez gone' doxen can' ba ngüie' gone'." ²⁹ Gac can' ža yeto da' bzoj Isaíasen' cani', žan:

Šaca' Xancho Diosen' ben' nape yela' guac xen bi bocua'ane' to chope beņe' lo
nación Israel chechon',
ba gwžiai'cho can' gosac che beņe' Sodoma na' beņe' Gomorra ca'.

Bene' Israel bene' bi chesejnilaže' Criston'

³⁰ Quinga ba goc, bene' bi zjanaque' bene' Israel bi besyeyiljue' nacle yesone' cont Diosen' ne' zjanaque' bene' güen len le', perw bale' ba chesejnilaže' Criston' na' da'nan' ba zjanaque' bene' güen len Diosen'. ³¹ Na' zan bene' Israel gualaž cheto' zjanao' to ley da' chžian bia' naclen' yesone' cont yesaque' bene' güen len Diosen'. Perw bi zjanaque' bene' güen len le', le bi chesone' doxen can' žanna'. ³² Na' bi goc yesaque' bene' güen len Diosen', le gosacde' yesone' da' güen cont yesaque' bene' güen len le' na' bi gosacbe'ede' con bene' yesejnilaže'ne' yesaque' bene' güen len le'. Goc čhegaque' ca chac che bene' jati'i to yej. ³³ Quinga nyoj Xtiža' Diosen' čhegaque':
 Gan' nzi' Sión sela' to bene',
 na' bena' zaca'lebe' ca to yej da' čhego' bene' na' ca to yej xen da' šjati'i bene'
 na' bixe',
 le bene' zan bi yesejnilaže' ben' sela'.
 Na' note'teze' yesejnilaže' bena' selan', gwbat yesyetinjde' che dan' gosejnilaže'ne'.

10

¹ Bene' migw, lo' lažda'ogua' che'nchgüeda' bene' Israel gualaž chia' yesejnilaže' Jesucriston' cont gata' yela' mban čhegaque' toli' tocañe, nachen' chol' güiža' Diosen' chnaba' gaclene' legaque'. ² Nezda' da' zan da' chesone' chesacde' yebe Diosen' legaque', perw bi chesacbe'ede' bin' chazlaže' Diosen'. ³ Bi chesejni'ide' cheyala' yesejnilaže' Criston' cont yesaque' bene' güen, san chesyeyiljue' bi da' güen da' yesone' chesacde' cont yesaque' bene' güen len le'. Da'nan' bi chesejnilaže' Jesucriston' can' chaclaže' Diosen' yesone'. ⁴ Le yogo' bene' chesejnilaže' Criston' ba besyeyiljue' bene' güen len Diosen'. Na' chio' chejnilaže'chone' ba nezecho nono gac gonyane' can' ža ley dan' bzoj Moisésen', neca gac yeyaque' bene' güen da' na'ogüe' lezen.

⁵ Da' Moisésen' bzoje' can' cheyala' gon bene' cont gaque' bene' güen len Diosen', gwne': "Note'teze bene' chone' cayanen' ža leyna, nachen' guac bane' toli' tocañe." ⁶⁻⁷ Na' chio' ba naccho bene' güen len le' da' chejnilaže'chone', na' bich choncho xbab načo: "¿No gac cue yaban' na' no gac yetj gan' že' bene' guaten'?" šaca' nacle goncho šjaxi'cho Criston' cont gaclene' chio'. ⁸ San diža' güen da' chyixjue'eto' žan: "Ba nombia'cho diža' da' chaclenen chio'. Choncho xbab che len na' choe'cho diža' can' žan." Lenña' diža' da' chyixjue'eto' bene' cont yesejnilaže' Jesucriston'. ⁹ Che'to' bene': "Še güe'lenle bene' diža' cont yesenezde' chejnilaže'le Jesucriston' na' chzenagle che' da' naque' Xanle, na' še šejle'le lo' yichjlažda'ole Diosen' bechis bosbane' Jesucriston' ladjo bene' guaten', nachen' gata' yela' mban čele toli' tocañe." ¹⁰ Le cheyala' šejle'cho lo' yichjlažda'ochon' cont yeyaccho bene' güen len Diosen' na' lecze cheyala' güe'lencho bene' diža' che dan' chejnilaže'cho Criston' cont gata' yela' mban čecho toli' tocañe.

¹¹ Xtiža' Diosen' nyojen žan: "Note'tez bene' yesejnilaže' Diosen', gwbat yesyetinjde' che da' gosejnilaže'ne'." ¹² Balcho naccho bene' Israel na' balcho bi naccho bene' Israel, toz can' chon Diosen' len yogo'cho, le Xancho Jesucriston' naque' Xan yogo'lo' bene', na' cheyaše'laže'de' note'tezcho chnabcho gaclene' chio'. ¹³ Can' gwne': "Note'tez bene' yeseñabe' gaclena' legaque', neda' naca' Xanle yebeja' legaque' lo da' malen'." ¹⁴ Na' žnacxe yeson bene' yeseñabe' goclen lagüen' še bi chesejnilaže'ne'? Na' žnacxe yesone' yesejnilaže'ne' še biña' yesende' xtižen'? Na' žnacxe yesende' xtižen' še nono zoa no güe'lene'

legaque' xtižen'? ¹⁵ na' ħnacxe yeson bene' yeseyixjue'ede' xtiža' Diosen' še Diosen' bi sele' legaque' yeseyixjue'eden'? Chac can' nyoj Xtiža' Diosen' žan: "Chbechgüecho caten' za'ac bene' cheseyixjue'ede' diža' güen chosozejni'ide' guac soacho binlo len Diosen'."

¹⁶ Perw gague yogo' bene' gualaž cheto' chosozenague' diža' güen che Diosen'. Chac can' gwna Isaiás ben' be' xtiža' Diosen' cani', gwne': "Xana', nono chzenagtec diža' dan' chzeneto'ne'." ¹⁷ Bia'cze cheyała'cze yesene bene' diža' güen da' chzejni'in che Criston' cont yesejnilaže'ne'.

¹⁸ Na' chnaba': ħbiña' yesene bene' Israel gualaž cheton' diža' güen da' chzejni'in che Criston'? Baçh gosenden'. Chac can' nyoj Xtiža' Diosen' žan: Bene' že doxen lo yežlion' ba gosende' xtižen'; ba zej xtižen' doxen.

¹⁹ Na' chnaba' da' yoble: ħbi gosejni'i bene' Israel gualaž cheton' diža' dan' chzejni'in che Criston'? Ba gosejni'iczen'. Le da' Moisésen' bzoje' da' gwna Diosen' chegaque', žan:

Neda' Dios gona' güen len bene' bi zjanac bene' nación chia', na' gue'ele legaque'.

Na' gona' güen len bene' nación ca' bene' bi chesejni'i, na' ža'ale.

²⁰ Nach Isaiásen' ben' be' xtiža' Diosen' cani' bi bžebe' gwdixjue'ede' da' nga gwna Diosen', žan:

Bene' bi besyeyilw neda', besyēželde' neda'.

Na' bene' bi gosenab neda', blo'elagua' legaque'.

²¹ Na' Diosen' gože' bene' Israel gualaž cheton', gwne': "Yogo' ni'a chneyoeda' le'e cont gwzenagle chia', na' zoačhačhle chonle güedenag len xtižan!"

11

Baļ bene' Israel yesejnilaže' Jesucriston'

¹ Bi cheyała' goncho xbab Diosen' bechojlaže' nación Israel cheto' to ši'ize. Neda' naca' bene' Israel, golja' lo diaža che da' Abraham na' naca' diaža' che da' Benjamín. ² Biña' yechojlaže' Diosen' neto' nacto' diaža che ben' gože' Israel, le gwleje' neto' cani'te cont nacto' nación che'. Le gon xbab can' nyoj dan' gwna Elías ben' be' xtiža' Diosen' cani', gwdagüe' xya che da' xozxta'oto' ca', gože' Diosen': ³ "Xana', bene' gualaž chia' quinga ba gosote' bene' ca' goso'e xtižon', na' ba bosyočhinje' mes de vej ca' gan' cheyała' yesonxene' le'. Yetoga neda' zoa' chzenaga' čhio' na' lencze neda' chese'nde' yesote'." ⁴ Nach Diosen' boži'e xtižen' gože'ne': "Ne' nita' gaže mil bene' ba gwleja' bene' biña' yosoza' xibe' yesonxene' l' gua'a lsaca' dan' nzi' Baal." ⁵ Na' ca'cze naquen ža ņa'aža, neto' bene' Israel chejnilaže'to' Criston' bi nacto' bene' zan, perw Diosen' ba gwleje' neto' cont chonxento'ne', le nži'ilaže'de' neto'. ⁶ Diosen' gwleje' neto' cont chonxento'ne' da' nži'ilaže'de' neto'. Bi gwleje' neto' lagüe' da' nonto' bi da' güen. Šaca' gwleje' neto' lagüe' da' nonto' bi da' güen, bi naquen con to goclen da' choŋ Diosen' neto' lo yela' bene' šagüe' che' cate' chbeje' neto' še ca', san naquen to goclenze.

⁷ Zan bene' nación Israel cheton', la'czla' chesonchgüe' da' chesacde' cheyała' yesone', bi chesyeželde' naclen' yesone' cont yesaque' bene' güen len Diosen'. Perw Diosen' gwleje' balto' cont šejnilaže'to'ne' na' none' neto' ca to bene' güen. Na' bene' yezica'chle zjanaque' güedenag len Diosen'. ⁸ Chac chegaque' can' nyoj Xtiža' Diosen' žan: "Diosen' bene' cont zjanaque' ca bene'

bicze nte. Na' ža na'aža zjanaque' ca to bene' bi chle'e len yejlagüen', na' ca to bene' bi chene len naguen'." ⁹ Na' da' Davin' gwne' chegaque': Yogo' da' de da' chesyebede' yesaquen ca to da' yeben legaque', na' yesaquen ca to ga šjaselažoe' yesaque' castigw.

¹⁰ Yesečhoḷ yichjlažda'ogaquen', na' yedote yesezaca'zi'e can' chzaca'zi' ben' nḷegw cože' no'e yoa' zi'i.

Diosen' gwleje' bal bene' bi zjanac bene' Israel cont chesejnilaže'ne'

¹¹ Nezczecho zan bene' Israel gualaž četon' bi chesejnilaže' Criston'. Na' chnaba', čzjanaque' ca bene' gwyo'o yeja' ni'e? čše zjanaque' ca bene' gwbiže' na' gote'? Zjanaque' ca to bene' con gwyo'o yeja' ni'e na'ze. Da' bi chesejle'e čhe Criston' de latje cont le'e bi nacle bene' Israel chzenagle xtižen'. Da'nan' legaque' gwžin ža yesezelaže' gon Diosen' güen len legaque' ca ba chone' len le'e bi nacle bene' Israel. ¹² Da' yoble chnia', da' bi chesejnilaže' bene' gualaž četo' ca' Criston', chac ca' cont yezica'chle bene' že' yežlion' yesenite' mba cont še yesejnilaže'ne'. Na' da' bchoj nación Israel četon' lo na' Diosen', de latje cont le'e bi nacle bene' Israel soale mba lo na' Diosen'. Perw gwžin ža cate' yogo'te bene' gualaž četo' yesenite' yesejnilaže' Diosen', na' cana'ch gac mba juisyw.

¹³ Na' le'e bi nacle bene' Israel, che'nda' nezele Diosen' gwsele' neda' cont güe'lena' le'e xtižen' le'e bi nacle bene' Israel. Na' chona' con ga zelao chzaque'da' cont bene' yosozenague' čhe Diosen'. ¹⁴ Le chaclaža' gona' cont bene' gualaž čhia' ca' yesezelaže' gon Diosen' güen len legaque' can' chone' len le'e chejnilaže'lene', na' gata' yela' mban chegaque' toḷi tocaṇe. ¹⁵ Diosen' ba bnite' zan bene' Israel gualaž četon' ca'ale to tiemp cont le'e bi nacle bene' Israel gwbiga'le len le'. Na' gwžin ža cate' gon Diosen' yesyebiga' yezan bene' gualaž četo' len le'. Na' leca mba gac cate' yesyebigue' len Diosen'. ¹⁶ De costumbr čhe neto' nacto' bene' Israel cate' chonto' yetextil, na' chnežjwto' Diosen' to ḷoḷ dao' cuazin' cont chlo'eto'ne' doxenen naquen che'. Na' leče še nacho to loe yaguen' naquen čhe Diosen', zejen leče xoze' yaguen' naquen che'. Na' da' xoxxta'oto' ca' ben' gosejnilaže' Diosen' cani' zjazacalebde' ca ḷoḷ dao' cuazina' na' ca' loe yaguen'.

¹⁷ Nación Israel četon' zaca'leben ca xoze' yag da' ba nčhog xan yaga' to lao yag olivo güen na' ba bniten' šla'ale. Na' le'e bi nacle bene' Israel zaca'leble ca xoze' yag olivo da' ze do yixe', da' ba gwčhogue' lagüen na' ba bozoen' yag güen cont beyaquen toze. Nach guac nacho loe yag güenna' ba noxen' le'e na' niže' čhenna' chac banlenle. ¹⁸ Bi gaguele naquechle bene' güen ca bene' Israel gualaž četo' da' chac čhele ca'. Gague le'e chnežjwle yela' mban čhe loe yaguen', san loe yaguen' chonen le'e yela' mban.

¹⁹ Le'e bi nacle bene' Israel, šeca che'lja lježle: "Diosen' bene' bene' Israel ca yag da' gwčhogue' xozen' cont goc bozoe' chio' gualaz legaque'." ²⁰ Da' li can' žalen'. Perw da' bi gosejnilaže' Criston', Diosen' bene' len legaque' ca xoze' yag da' ba gwčhog xan yaguen' len, na' ba bozoe' le'e lagüe da' chejnilaže'le Criston'. Da'nan' bi ga'laže'le, san le gwsaca' cont soačhačle šejnilaže'lene'. ²¹ Da' bi gosejnilaže' Criston', Diosen' bene' cont gwdi gwxaca' bene' Israel gualaž četo' ca' bene' zjazacalebe' ca xoze' yag güenna', na' leče ca' gone' saca'zi'le še bi soačhačle šejnilaže'lene'. ²² Le gonšč xbab can' nži'ilaze' Diosen' chio' chejnilaže'chone' na' can' chone' cont saca'zi' bene' ca' bi chesejnilaže'ne'. Nachen' cheyala' soačhačle šejnilaže'lene' cont bi gone' saca'zi'le can' ba bene' len bene' Israel gualaž četon' bi gosejnilaže'ne'. ²³ Na'

Diosen' yebede' si' lo ne'e bene' Israel gualaž četo' ca' cate' yesejnilaže'ne', le nape' yela' guac cont yozoe' legaque' binlo len le', nach yesaque' ca' xoze' yag da' bezyone' toze len yag čen da' yoble. ²⁴ Le'e nacle ca' xoze' yag olivo da' ze yix'e, Diosen' gwčogue' le'e na' bozoe' le'e lo xoze' yag güen la'czla' bi nacle dogualje xozen'. Na' naquechxe yebede' yozoe' bene' Israel gualaž četo' ca' le'e yaguen' da' yoble be'ne' ca' zjazaca'lebe' ca' dogualje xoze' yaguen'.

Bene' zan bene' Israel yesyeyaque' lo na' Diosen'

²⁵ Bene' migw, che'nda' šejni'ile da' nga da' nono na' neze cont bi ga'laže'le gaquele zaca'chle clel ca' bene' Israel gualaž četo' ca'. Diosen' be'e latje zane' zjanaque' bene' güedenag len xtižen' šlac yesejnilaže' bene' bi zjanaque' bene' Israel ben' ba bsi'e xneze yesejnilaže'ne'. ²⁶ Nach gwžin ža' yogo' bene' Israel gualaž četo' ca' yesenita' yesaque' lo na' Diosen'. Gac can' nyoj Xtiža' Diosen' žan:

To bene' choj lo ciuda Sión yebeje' le'e lo da' mal da' chonle, le'e za'le lo diaža čhe da' Jacob.

²⁷ Na' cate' žin ža' yeca'a xtoła'len', cana'ch ba' goc can' ba' gwnia' gona'.

²⁸ Dan' bi chesejle' zan bene' Israel gualaž četon' diža' güen čhe Diosen', da'nana' ba' bzoe' šla'ale nación četon' na' ba gwleje' le'e bi nacle bene' Israel cont chejle'le čhe'. Perw na' Diosen' ne' chacde' bene' ca', le gwleje' da' xozxta'oto' ca' cont yesaque' nación čhe'. ²⁹ Na' Diosen' bi chetiñjde' čhe bene' mbeje' yesaque' nación čhe', neca chetiñjde' čhe goclen da' chone' len benachen'. ³⁰ Cana'te le'e bi bzenagle čhe Diosen' na' da' bi gosaclaže' bene' Israel gualaž četon' yosozenague' čhe', nach beyaše'laže' Diosen' le'e na' goclene' le'e cont chzenagle čhe'. ³¹ Na' da' bi chosozenag bene' Israel gualaž četo' ca' čhe Diosen' na'a, chac ca' cont žin ža' gwlo'e Diosen' ne' cheyaše'laže'de' legaque' can' cheyaše'laže'de' le'e. ³² Diosen' ba gwčhoglagüe' čhe yogo' benachen' de xtoła'gaque' da' bi chosozenague' čhe', na' ba bene' ca' cont lecze gwlo'ede' cheyaše'laže'de' yogo'cze'.

³³ Leca bene' sina' Diosen'. Nezczede' yogo'lol. Gwbat šejni'icho da' nžie' bia' gac o da' nžie' bia' gone' lo yela' sina' čhe'. ³⁴ Nyoj Xtižen' žan: "Nono neze yogo' xbab čhe Xancho Diosen'; nono nape yela' sina' cont gwzejni'ide' le' can' cheyała' gonen'. ³⁵ Na' nono cheyała' gon xbab yebi' Diosen' güen len le' še bi da' ba be'ene'." ³⁶ Yogo'lol da' de naquen čhe Dios. Bene' benach, beyix'e na' bica'chle da' zjade. Na' lagüe yogo'lol da' bene' zoe' bla'o. Len' gacxene' toli toca'ne. Can' gacšca.

12

Cheyała' gon cuincho lo na' Diosen'

¹ Bene' migw, Diosen' ba cheyaše'laže'de' chio'. Da'nana' chneyoeda' le'e le gon doxen cuinle lo na' Diosen' na'a mbanle. Le gonen do yichj do laže'le. Na' le gac bene' laždao' xilaže' le can' chazlaže' gonxenchone'. ² Bi goncho ca' cheson bene' bi zjanombia' Diosen'. San cheyała' nabecho Diosen' gwš'e'e xbab chechon' cont yebecho goncho dan' chazlažen'. Na' chaclaže' goncho da' güen, da' chebede' na' yogo' da' zej to liča.

³ Diosen' nži'ilaže'de' neda' na' ba gwsele' neda' cont chyixjue'eda' xtižen'. Da'nana' chnia' bi cheyała' gonxen cuincho, san cheyała' gacbe'echo Diosen' ba goclene' chio' cont chejnilaže'chone' na' non'e' grasyw čecho cont goncho bi da' goncho. ⁴ Can' nac cuerp čechon', zan cuen naquen na' gague toze

žin da' cheson to to cuenen. ⁵ Lecze can' naquen len chio', bene' zan naccho chejnilaže'cho Criston' na' yogo' chion' naccho txen len le' na' len lježcho zaca'lebcho ca toze cuerp.

⁶ Diosen' none' grasyw chechon' gwde gwdele da' gon to tocho. Še ba none' checho chixjue'echo bi da' gože' chio', nach cheyała' chixjue'echon na' šejle'cho gaclene' chio' gonchon. ⁷ Na' še Diosen' ba none' checho gaclencho bene', cheyała' gaclencho legaque'. Na' še ba none' checho gwsed gwlo'echo bene', cheyała' gwsed gwlo'echone'. ⁸ Na' še Diosen' ba none' checho neyoecho bene' cont yesone' da' güen, cheyała' neyoechone'. Na' še ba none' checho gwnežjwcho da' chyažje bene', cheyała' gwnežjwchon do yichj do laže'cho. Na' še ba none' checho gaccho bene' blao na' güia na' ljež chio' chonxenchone', cheyała' cue' yichjcho güia na'cho legaque'. Na' še ba none' checho yeyaše'cho no bene' yaše', no bene' gole o no bene' güe', cheyała' yebecho gaclenchone'.

Da' cheyała' gon chio' chejnilaže'cho Jesucriston'

⁹ Cheyała' gague ljež benachcho do yichj do laže'cho, na' cheyała' gue'echo da' malen' na' soaczcho goncho da' nac da' güen. ¹⁰ Ca chaque biše' goljcho, ca'cze cheyała' gaguecho note'teze bene' lježcho na' gonchone' bene' xench ca cuincho.

¹¹ Bi gaccho bene' xagüed, san goncho da' non Diosen' chio' goncho do yichj do laže'cho, le chonxenchon Xancho Jesucriston' len dan' chonchon'.

¹² Cheyała' yebecho da' nezecho šjajzoacho len Diosen'. Cheyała' gwyo gwčhejcho cate' chyí chzaca'cho. Na' lecz cheyała' yol güižcho Diosen' zan ni'a yogo' ža.

¹³ Cheyała' gaclencho bene' lježcho bene' chesejnilaže' Diosen' še bi da' cheseyažjde' na' gwlebcchone' ližcho še zjanaque' bene' zito'.

¹⁴ Cheyała' nabcho lao Diosen' gac güen che bene' chosoči chososaca' chio'. Nabcho gac da' güen čhegaque', gague da' mal.

¹⁵ Cheyała' yebecho txen len bene' chesyebe na' cuežcho txen len bene' chesebež.

¹⁶ Yogo'cho cheyała' goncho toze xbab. Bi cheyała' ga'laže'cho, san yol güižcho bene' yaše' bene' bibi chac na' bi gon cuincho bene' sina'.

¹⁷ Še bi da' mal chone bene' chio', bi nacho lecze da' mal yebi'icho len le'. Cheyała' cue' yichjcho goncho da' güen cont yesena bene' le naczen güen dan' chonchon'. ¹⁸ Cheyała' goncho bi da' gac goncho cont soacho binlo len yogo'lol bene'. ¹⁹ Chacda' le'e, nachen' chnia' cheyała' gwdecho to šla'ale bite'teze da' chesone bene' chio'. Diosen' gwyoecze' nac gone' len bene' chosoči chososaca' chio'. Xtižen' nyojen žan: "Xancho Diosen' že': Neda' yoži'a čhe da' mal da' chesone', na' neda' gwnežjua'ne' castigw." ²⁰ Na' lecze žan: "Še chbil chdon bene' chgue'ede' chio', cheyała' güe'chone' da' ye'ej gagüe'; le še goncho güen len le', guacbe'eljede' chone' da' mal." ²¹ Bi güe'cho latje nabia' da' malen' chio' na' yebi'icho mal len bene' chonde' chio' mal, san yebi'icho güen len legaque' cont yesyetinjde' che da' malen' chesonen'.

13

¹ To tocho cheyała' gwzenagcho čhe justis bene' chesenabia', le Diosen' bnite' legaque' chesenabi'e. ² Še bi chzenagcho čhe bene' chesenabia', bi choncho da' nžia bia' Diosen' goncho, na' lecze chyljwze xtola'cho na' gaccho castigw da' bi chzenagcho čhegaquen'. ³ Bi cheyała' žebcho bene' ca' chesenabi'e še zoacho choncho da' güen, san še zoacho choncho da' xinj, nachen'

žebcho yesone' chio' castigw. Na' cont bi žebcho legaque', con soacho goncho da' güen da' yesyebede'. ⁴ Justis ca' chesone' xšin Dios cont soacho güen. Perw še choncho da' xinj, cheyała' žebcho legaque', le zjanape' yela' chnabia' cont yesone' castigw che note'teze bene' cheson da' mal, le Diosen' none' lo na'gaquen' yosonežjue' castigw che bene' cheson da' mal. ⁵ Da'n'an' cheyała' gwzenagcho chegaque' cont bi si'cho castigw na' lecze cont gacbe'echo lo' yichjlažda'ochon' choncho can' cheyała' goncho. ⁶ Lecze da'n'an' cheyała' chixjwcho no che bien na' bichle da' cheyała' chixjwcho, cont bene' ca' chesenabia' guac yesone' da' yo'o lo ne'e yesone', na' cheyała' gwzenagcho chegaque', le Diosen' ba bzoe' legaque' cont chesone' dan' cheyała' yesone'.

⁷ Chixjwcho še bi da' čala'cho che bene'. Še čala'cho che bien, chixjwchon. Še čala'cho che impuextw, chixjwchon. Na' gapcho bala'an' bene' cheyała' dap bala'an'. Na' gonxencho bene' cheyała' gacxen. ⁸ Cheyała' chixjwcho doxen bi da' čala'cho che bene', na' lecze cheyała' gaque yogo' ljež benačcho, le še chaquecho legaque', ba choncho da' non ley che Diosen' mandadw goncho. ⁹ Leyna' žan: "Bi gata'lenle no'ole bi nac no'ol čele o bene' byo bi nac bene' čele, bi gotle bene', bi cuanle, bi güe'le diža' güenlaže' che bene' lježle, bi selaže'le bite'teze da' de che bene'." Na' dech da' ža leyna'. Na' yogo'cze da' nžia bia' leyna' goncho, bačh chonchon še chzenagcho che dan' žanna': "Le gaque ljež benačhle ca chaque cuinle." ¹⁰ Še chaque lježcho, bibi da' mal gonechone'. Da'n'an' choncho doxen can' nžia bia' leyna' še ba chaque lježcho.

¹¹ Caten' gwzolaoocho chejnilaže'cho Criston' gwnezecho gwžin ža yide' da' yoble. Na' na'a ba za' bagwze yide' da' yoble. Da'n'an' bich cheyała' gaccho ca bene' čhtas, bene' bi chon xbab. ¹² Yežlio nga zaca'leben ca ga nac choj, le že'chgua bene' cheson da' xinj; san gan' zoa Diosen' naquen ca ga yo'o be'ni'. Nach cheyała' cuejyichjcho bich goncho da' xinj na' goncho con da' čazlaže' Diosen', le ba zoa yide Criston' yedyexi'e chio'. ¹³ Cheyała' goncho da' güen, le ba yo'o be'ni' che Criston' lo' yichjlažda'ochon'. Bi cheyała' goncho txen lo nin' ga chbe' žaš, bi cheyała' gaccho borrašw, bi cheyała' gata'lencho no'ole bi nac no'ol čecho o bene' byo bi nac bene' čecho o goncho bichle da' nac da' yela' zto', na' bi cheyała' tillen lježcho o gue'echo bene'. ¹⁴ Cheyała' gon cuincho lo na' Xancho Jesucriston' na' cue' yichjcho goncho da' čazlaže' cont da' malen' da' yo'o lo' yichjlažda'ochon' bi nabian' chio'.

14

Toz Diosen' nezde' še bene' lježcho nape' doła'

¹ Še zoa to bene' ba chejnilaže' Criston' na' biña' šejni'ide' nac cheyała' gone', con zoe' chacžejaže', le gwlebe' gaque' txen len le'e, perw bi gacyožlenine' che xbab čhen'. ² Nita' bene' chesejnilaže' Diosen' chesacde' bi zjanape' doła' da' chesagüe' bite'teze yela' guagw, na' lecž nita' bene' yoble biña' yesejni'ide' bite'teze da' ye'ej gagwcho naquen güen lao Diosen'. Da'n'an' chesacde' bi cheyała' yesagüe' bela' na' chesagüe' yixe' cuanze. ³ Ben' chagw bite'teze yela' guagw bi cheyała' gue'ede' ben' bi chagüe' bela', na' ben' bi chagw bela' bi cheyała' ne' che ben' chagüe' bela', le Diosen' ba none' chopte' ca xi'ine'. ⁴ ŽNoxe nac chio' gwlaže' čecho še nac chon ben' ba gwlej Diosen' ca xi'ine'?

Diosen' naque' Xan xi'ine' ca', na' len' ne' che to tocho še choncho da' güen o še choncho da' xinj. Na' lecze len' gone' cont soacho goncho da' güen.

⁵ Nita' bene' cheson xbab nchoj to ža xen da' zaca'ch len Diosen' ca yezica'chle ža ca', na' lecze nita' bene' chesacde' toz ca zaca' yogo' ža ca'. To

tocho cheyała' soacho do yichj do laže'cho goncho da' chejni'icho cheyała' goncho. ⁶ Beñe' cheson xbab de ža da' zaca'ch ca ža ca' yezica'chle, chese-beje' žan' cont chesonxene' Dios. Na' beñe' chesacde' toz can' zaca' ža ca', lecze chesonxene' Diosen' chesone' xbaben' ca'. Na' ben' chesagw bite'tez yela' guagw, chesonxene' Xancho Diosen' cate' chesagüen', le cheso'e yela' choxclen che Diosen' che dan' chese'ej chesagüen'. Na' ben' bi chesagw bela', chosožone' yesagüen' da' chesonxene' Diosen' na' lecze cheso'e yela' choxclen che'.

⁷ Ne tocho bi yo'o lo na'cho gwžiacho bia' can' soa cuezcho šlaque mbancho, na' neca yo'o lo na'cho gwžiacho bia' nac gatcho. ⁸ Šlac mbancho zoacho cont goncho da' chaclaže' Xancho Jesucriston', na' še gatcho lecze cate' chaclaže' len' gatcho. Can' naquen, mbancho o gatcho, yo'ochlo lo na' Xancho'. ⁹ Cuiñ Xancho Criston' gote' na' beyas bebane' ladjo beñe' guat ca' cont naque' Xan yogo' beñe' chesejnilaže'ne' beñe' zjamban na' beñe' ba gosat.

¹⁰ Bi cheyała' nacho che beñe' lježcho zjanape' doła' še bi da' chesone', na' bi cheyała' gue'e lježcho. Yogo'czecho techo lao Criston' cont le' chogbi'en checho še de xtola'cho o še bibi de. ¹¹ Nyojczje Xtiža' Diosen' žan: Xancho Diosen' že':

Da' li naca' Dios, zoa' mbana',
na' yogo' beñe' yedesezoa xibgaque' laguan',
na' yogüe' yesene' toz neda' zaca' yesonxen beñach.

¹² Can' naquen, yogo'czecho yodecho cuent lao Diosen' che bite'teze da' ba bencho šlac mbancho.

Bi goncho da' gwžigan' beñe' lježcho gone' da' mal

¹³ Da'nan' chnia', bi cheyała' necho che beñe' lježcho neče bi da' chesone'. Da' cheyała' yechoglaže'cho goncho, cuejyichjcho bi da' choncho še len chžigan' note'teze beñe' lježcho gone' da' xinj o še len chonen ca' šjabix šjalažoe'.

¹⁴ Xancho Jesucriston' bzejni'ide' neda' cont nezda' bi napcho doła' še gagwcho bite'teze yela' guagw. Perw še beñe' chone' xbab gape' doła' lagüe da' gagüe' to da' gagüe', naquen mal gagüen' še ca'. ¹⁵ Še beñe' lježcho chaque' tole lagüe da' chagwcho to da' chone' xbab naquen mal len Diosen', bi chaquechone' še chagwtezhon. Criston' bnežjw cuine' gote' neče beñe' lježchon', na' chio' bi cheyała' gagwcho bi da' gonen cont gac čoplaže' beñe' lježchon' cuejyichje' Criston' na' cuiaye'e. ¹⁶ Še choncho bi da' chaquecho naquen güen, perw na' beñe' lježchon' chesacde' naquen mal, bi gonchon cont bi yesene' choncho da' xinj. ¹⁷ Še ba choe'cho latje chnabia' Diosen' chio' len xbab chechon', dan' che'ej chagwchon' bi naquen da' žialao xen len chio'. Da' nac da' žialao xen, goncho da' zej to licha, soacho binlo len Dios na' len beñe' lježcho, na' soacho mbalaz da' yo'o Spiritw che Diosen' lo' lažda'ochon'. ¹⁸ Še choncho da' zej to licha, na' zoacho binlo len Diosen' na' len lježcho, na' zoacho mbalaz da' yo'o Spiriton' lo' lažda'ochon', da' li chzenagcho che Criston'. Nachen' chebe Diosen' can' chonchon', na' lecze yezica'chle beñe' chesene' choncho güen.

¹⁹ Da'nan' cheyała' yeyiljwlaže'cho can' goncho soacho binlo tocho yetocho na' can' gaclen beñe' lježcho ca' cont yesenita'čhače' yesejnilaže' Criston'.

²⁰ Diosen' ba bñitlagüe' xtola' beñe' lježcho na' bi cheyała' gagwcho da' gonen gac čoplaže' no beñe' lježcho na' gone' da' chacde' naquen mal. Nezda' de latje gagwcho bite'teze yela' guagw, perw naquen mal gagwchon še len chonen čoplaže' beñe' lježcho. ²¹ Güenczen bi gagwcho bela' neca ye'ejcho

vino na' neca goncho bichle da' goncho še len chonen cont bene' lježcho chacchoplaže' o gone' da' xinj o cuejyichje' bich šejnilaže' Criston'. ²² Še nezecho zoacho binlo len Diosen' da' chejnilaže' chone' na' chaquecho bi napcho doła' len bica' da' choncho, chopzcho len Diosen' nezecho. Mbalazen' zoacho še nezecho lo' yichjlažda' ochon' bi napcho doła' len bica' da' choncho. ²³ Na' de xtoła' cho še chagwcho to yela' guagw na' chaczejlaže' cho chaquecho bilja cheyala' gagwchon, le bite'teze da' choncho še chaquecho naquen mal gonchon, napcho doła' chonchon še ca'.

15

Cheyala' cue' yichjcho bene' lježcho

¹ Balcho ba zoachachcho chejnilaže' cho Criston' na' nezecho de latje ye'ej gagwcho bite'teze. Perw cheyala' gapcho yela' chxenlaže' len bene' bina' yesejni' išagüe'de', na' bi goncho con da' žan checho. ² To tocho cheyala' goncho bi da' güen da' chazlaže' bene' lježcho ca' goncho, cont gaclen leğaue' yesejnilaže' che' Diosen'. ³ Goncho ca', le ne Criston' bi bene' con da' gwnazen che', san goc che' can' nyoj Xtiža' Diosen', žan gože' Xe' Diosen': "Bene' besegue'ede' le' na' gosenē' diža' bya' chio', lencze chia' neda' gosenē'!" ⁴ Na' Xtiža' Diosen' da' bosozoj bene' cani' chzejni'in chio' cont gwyo gwčhejcho šejnilaže' cho Diosen' cate' chzaca'zi'cho. Na' še goncho xbab can' žanna', na' gaclenchen chio' cont soacho lez gwžin ža gon Diosen' güen len chio'. ⁵ Diosen' chone' chio' yela' chxenlaže' cont chyo chčhejcho cate' chzaca'zi'cho. Na' chnablaža' lecze gone' gac yichjlažda'ole toze tole yetole, con can' chazlaže' Cristo Jesúsen'. ⁶ Na' gone' ca' cont toze can' nale gonxenle Dios ben' nac Xa Xancho Jesucriston'.

Diosen' chaclaže' bene' bi zjanac bene' Israel yesonxene' le'

⁷ Da'nan' cheyala' le'e to to bene' lježcho binlo ca Criston' chle'ede' to to chio' binlo, chio' chejnilaže' chone'. Goncho ca' cont gacxen Diosen'. ⁸ Can' goc len Cristo Jesúsen', bzexjw yichje' ben cuine' ca to bene' güen žin cont goclene' neto' bene' Israel. Blo'ede' diža' li be' Diosen' cate' gože' da' xozxta'oto' ca' gone' güen len leğaue'. ⁹ Na' lecze bid Criston' cont le'e bi nacle bene' Israel lecze gonxenle Diosen' da' ba beyaše' laže'de' le'e. Chac ca nyoj Xtiža' Diosen' dan' žan:

Da'nan' gua' yela' choxcen chio' gan' že bene' bi zjanac bene' Israel, gola' gonxena' le'.

¹⁰ Na' ga yoble žan:

Le'e bi nacle bene' Israel, le yebe txen len neto' bene' gwlej Diosen' nacto' nación che'.

¹¹ Na' lecze žan:

Yogo' le'e bi nacle bene' Israel, le gonxen Xancho Diosen'.

Yogo'lolle le güe' diža' che yela' gwnabia' che'.

¹² Na' da' Isaías ben' be' xtiža' Diosen' cani' bzoje' da' nga žan:

To bene' gualaž yide', bene' galje' lo diaža che da' Isai.

Le' nabi'e bene' že' to to yež na' to to nación,

na' bene' ca' bi zjanac bene' Israel yesebeze' gaclene' leğaue'.

¹³ Diosen' chone' cont chebecho dan' nezecho šjayzoacho len le'. Na' chnaba' gonšque' cont soale mbalaz juisyw na' soa cuezle binlo len xbab da' yo'o yichjlažda' olen' da' zoale chejnilaže' le Criston'. Gonšque' ca' cont Spiritw che Diosen' gaclenen le'e soachachle yebele da' nezele šjayzoale len le'.

¹⁴ Bene' migw, nezda' ba nacle bene' šagüe' bene' chon da' güen, na' nezda' chejni'ichgüele na' chac chneyoe lježle. ¹⁵ Pero le'e cart nga ba beyaxjda' gwdila' le'e cont gonchle xbab, le Diosen' beži'ilaže'de' neda' gwleje' neda'. ¹⁶ Gwleje' neda' cont chyixjue'eda' xtižen' len bene' bi zjanac bene' Israel. Na' Diosen'yebede' da' ba goclena' legaque' cont baļe' gosejle'e xtižen' na' gosaque' lo'e'e cate' Spiritw čhen' benen lažda'ogaquen' xilaže'.

¹⁷ Chbeda' chona' xšin Diosen' da' ba goclen Cristo Jesúsen' neda' chona'. ¹⁸ Bi cheyaxjda' gua' diža' che bi da' ba ben bene' yoble, san choa' diža' che da' ba ben Criston', le chaclene' neda' choa' xtižen' na' bichle da' chona' cont zan bene' ca' bi zjanac bene' Israel chosozenague' che'. ¹⁹ Spiritw čhe Diosen' goclenen neda' cont bena' yeļa' guac na' bichle da' besyebane bene' gate'teze gwy'a be'lena' legaque' xtiža' Diosen', gwzolagua' Jerusalén na' bžintia' gan' nzi' Ilirico. Na' ba gwdixjue'eda' xtižen' doxen gan' gwseļe' neda'. ²⁰ Na' ba bena' byen ba bia' diža' güen da' chzejni'in čhe Criston' gan' nono na' šejnilaže'ne', le bi chaclaža' tia' gwłana' xlatje bene' ba chosozejni'ide' xtiža' Diosen'. ²¹ Da'nan' chac can' nyoj Xtiža' Diosen' žan:

Bene' ca' biņa' yesende' xtižen' yesombi'ene',
na' bene' ca' biņa' yesenezde' čhe' yesejni'ide' čhe'.

Pablon' šjeje' Roma

²² Da' chzejni'ida' bene' ga yoble xtiža' Criston', da'nan' bi goc yida' gan' zoalen' la'czļa' zan ni'a ba goclaža' yida'. ²³ Cana'te zelaža' yedeņa'a le'e, perw na'ach ba beyož bena' da' gwlo'o Diosen' lo' na' gona' do nga. ²⁴ Nach cate' ša'a España cana' chacda' tia' yedeņa'a le'e. Na' mbalaz soa' yeyož le'eda' le'e na' gaclenle neda' cate' ša'a Españan'. ²⁵ Na'a ša'a Jerusalén šjasana' mechw da' gaclenen bene' lježcho ca' že' na' bene' ca' ba gwlej Diosen' chesejnilaže'ne'. ²⁶ Le bene' lježchon' že' yež ca' zjachi' distritw Macedonia na' Acayan' bosotobe' mechw da' gaclenen bene' lježcho ca' chesejnilaže' Diosen' Jerusalén ben' zjanac bene' yaše'. ²⁷ Bene' ca' bosotoben' besyebede' bosonežjue' mechon', na' naquen to goclen da' cheyla' yesone' len bene' Israel gualaž četo' ca', le la'czļa' legaque' bi zjanaque' bene' Israel, ba zjanone' čhegaque' yogo' da' güen da' ba bzejni'i Diosen' neto' bene' Israel, na' da'nan' cheyla'cze yesaclene' bene' gualaž četo' ca' len da' cheseyažjde'. ²⁸ Cate' bačh beyož bena' lo' na' bene' Jerusalén ca' mechon' bdočen', cana'ch sa'a ša'a Españan' na' tia' na'a le'e. ²⁹ Na' nezda' Criston' gaclene' neda' la'a gan' zoalen' cont güe'lena' le'e diža' güen čhe' da' gaclenen yichjlažda'olen' na' soachguacho mba.

³⁰ Bene' migw, nezda' chaquele Xancho Jesucriston' can' chacda'ne' neda', na' Spiritw čhe Diosen' chonen cont chaque lježcho tocho yetocho. Da'nan', bene' migw, chnaba' gacle neda' txen yol güižcho Diosen' cont gaclene' neda'. ³¹ Nabechone' bi gaca' lo' na' bene' gualaž četo' ca' bene' bi chesejnilaže' Criston' Judean', na' lecze nabechone' cont bene' lježcho ca' že' Jerusalén bene' yo'o lo' na' Diosen' yesazlaže' ca' dan' güe'gaca'ne'. ³² Nach še Diosen' gone' latje, mbalaz yedeņa'a le'e na' yeyaclaža' soa' na' len le'e. ³³ Dios ben' chon chzoa chbezcho binlo len xbab da' yo'o lo' yichjlažda'ochon' gaclene' yogo'le len xbab chelen'. Ca'šcace gac.

¹ Chneyoeda' le'e le gon txen len bene' zanchó Febe cate' le'e gan' zoalen'. Ba benchgüe' xšín Diosen' len bene' ca' chesedop chesežag chesonxene' Jesucriston' lo yež Cencrea. ² Le gwlebe' ca cheyala' gonle len ljež chio' yo'ochó lo na' Diosen'. Na' le gaclene' še bi da' chyažjde', le len' ba goclene' bene' zan na' lecze ba goclene' neda'.

³ Le gwguap tiox Priscila len bene' che' Aquila. Legaque' ba gosone' žin che Cristo Jesúsén' txen len neda'. ⁴ Besezanlaže' cuingaque' yesate' cont bososle' neda' lo na' yela' goten'. Choa' yela' choxcen chegaque' can' gosonen'. Na' lecze yogo' bene' ca' bi zjanac bene' Israel bene' chesedop chesežag chesonxene' Jesucriston' cheso'e yela' choxcen chegaque'. ⁵ Le gwguap tiox bene' ca' chesedop chesežag liž Priscilan' na' Aquilan' chesonxene' Jesucriston'. Na' le gwguap tiox bene' xmigua' Epeneto. Chacda'ne', le naque' bene' nechw bene' Acaya gwejnilaže' Criston'. ⁶ Nach le gwguap tiox Maria no'olen' ba benchgua xšín Diosen' gan' zoalen'. ⁷ Na' le gwguap tiox bene' gualaž cheto' Andrónico len Junias. Legaque' byobch gosejnilaže' Criston' cled ca neda' na' txen gota'to' ližya. Lecz ca' postlw ca' yezica'chle cheso'e diža' güen chegaque'.

⁸ Le gwguap tiox bene' xmigua' Amplias, le chacda'ne' da' ba chejnilaže' Xancho Criston'. ⁹ Na' le gwguap tiox Urbano ben' chon xšín Criston' txen len chio', na' lecze Estaquis, le chacda'ne'. ¹⁰ Lecze le gwguap tiox xmigua' Apeles. Da' zan ba bene' blo'e chejnilaže' Criston' do yichj do laže'. Na' le gwguap tiox bene' ca' že' liž Aristóbulo. ¹¹ Na' le gwguap tiox bene' gualaž chia' Herodión na' lecze bene' ca' že' liž Narciso, con noe' chesejnilaže' Criston'. ¹² Le gwguap tiox no'ole xmigwcho Trifena len Trifosa, no'ol ca' cheson xšín Xancho Jesucriston'. Na' lecze le gwguap tiox bene' zanchó Pérsida. Chaquechone' da' ba benchgüe' xšín Xanchon'. ¹³ Na' le gwguap tiox Rufo. Naque' bene' blao len chio' chejnilaže'cho Xancho Jesucriston'. Na' lecze le gwguap tiox xne'ena', le ba none' neda' ca xi'ine'. ¹⁴ Le gwguap tiox Asíncrito, Flegonte, Hermas, Patrobas na' Hermes len bene' lježcho zjanita' len legaque'. ¹⁵ Na' le gwguap tiox Filólogo na' Julia na' len Nereo na' bene' zanen', na' Olimpas na' yogo' bene' lježcho nita' len legaque'.

¹⁶ Na' cate' chežagle txen le gwnopa' na' lježle cate' chguap lježle tiox cont nacbia' chaque lježle. Na' bene' ca' chesedop chesežag chesonxene' Criston' yogo'te yež gan' ba gwy'a chosoguape' le'e tiox.

¹⁷ Bene' migw, chneyoeda' le'e le gwsaca' cont bi gwzenagle che bene' zjanac bene' güetil, bene' chesaclaže' gonle da' xinj, le bi chesone' txen len dan' ba bsedle che Diosen'. ¹⁸ Bi chosozenague' che Xancho Jesucriston' san chosozenague' che da' mal da' yo'o lo yichjlažda'ogaquen' na' chesone' con can' žanna'. Na' cheso'e diža' xdan chosopede' bene' chesejle'daze cont chesexoayague' legaque'. ¹⁹ Yogo'ze bene' zjanezde' chzenagle che bene' chosozejni'ide' le'e, na' danan' chbeda'. Perw chaclaža' gacle bene' sina' cont gwzenagle che da' nac da' güen, gague gwzenagle che da' nac da' mal. ²⁰ Nach Dios ben' chon cont chzoa chbezcho binlo lecze yob gone' cont Satanásen' dan' chnabia' da' xigüe' ca' bi soen nabi'an chio'. Na' Xancho Jesucriston' soašque' gaclenšcace' le'e.

²¹ Timoteo ben' chon len neda' xšín Criston' nga chguape' le'e tiox, na' lecze ca' cheson bene' gualaž cheto' Lucio na' Jasón na' Sosipater.

²² Neda' Tercio chzoja' cart nga con can' ža Pablon', na' lecze chguapa' le'e tiox, le naccho txen chejnilaže'cho Xanchon'.

²³ Lecze Gayo chguape' le'e tiox. Neda' Pablo zoa' liže' na' lecze liže' nga chesežag beṇe' ca' chesonxen Criston'. Na' lecze Erasto ben' nac lo ne'e mechw che ciudan' chguape' le'e tiox na' len beṇe' biše' Cuarto.

²⁴ Soašca Xancho Jesucriston' gaclenšque' yogo'le. Na' ca'šcaczē gac.

Chonxene' Diosen'

²⁵ Le gonxench Diosen'. Len' nape' yela' guac cont gaclene' le'e soachachle šejnilaže' lene' can' ža diža' güen da' chyixjue'eda' chzejni'ida' beṇe' che Jesucriston'. Na' chzejni'ida' xtiža' Diosen' da' nono na' neze cate' za' xete yežlion',
²⁶ perw na'a Diosen' ba bzejni'ide' chio' bi zejen da' ca' none' mandadw bosozoj beṇe' ca' bosozoj Xtižen' cani'. Na' Dios ben' zoa' toli tocane chaclaže' šej diža' čhen' yogo' yež cont yogo' chio' benač šejnilaže'cho Jesucriston' na' gwzenagcho che'.

²⁷ Toze Diosen' zaque' gonxen chio' benač, na' tozen' napchgüe' yela' sina'. Na' da' gwsele' Xancho Jesucriston' chaclene' chio', da'nan' chac chonxenchone' toli. Ca'šcaczē gac.

CART NECHW DAN' BZOJ POSTLW SAN PABLO CHE BEÑE' CA' ŽE' CORINTO

Pablon' chzoje' bene' chesedop chesežague' chesonxene' Jesucriston' Corinto

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gwnalaže'. Na' chguapa' le'e tiox txen len bene' migw checho Sóstenes ben' lecze chejnilaže' Jesucriston'. ² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosoł güiže' Xancho Jesucriston' na' zjanaque' le' txen gate'tezchle, le lecze naque' Xangaquen'. ³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxcen che Diosen' par le'e can' chaclene' le'e lagüe chejnilaže'le Jesucriston'. ⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' čhen. ⁶ Na' ba chonle cont nacbia' xtiža' Criston' da' chejle'le naugen da' li. ⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. ⁸ Na' Diosen' gaclene' le'e soačahčle gonle can' chazlažen' cont bibi doła' gaple caten' yid Xancho Jesucriston' yeto. ⁹ Diosen' zoacze' chone' can' ba gwn'e gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena bene' chesonxen Jesucriston' Corinton'

¹⁰ Bene' migw, le'e chejnilaže'le Jesucriston'. Da'nan' chñeyoeda' le'e, le gon txen len lježle na' bich gacle čhople o šon' taple len da' chonle xbab na' len da' žale. ¹¹ Chnia' ca' bene' migw, le bene' nita' liž Cloé ba gose'e neda' chdile čšašle. ¹² Chnia' chdile čšašle, le bałle žale: "Naca' txen len da' chsed chlo'e Pablon'." Na' yebałle žale: "Naca' txen len da' chsed chlo'e Apolosen'." Na' yebałle žale: "Naca' txen len da' chsed chlo'e Pedron'." Na' yebałle žale: "Naca' txen len da' chsed chlo'e Criston'." ¹³ ¿Chaquale bid Criston' neče to čhopzle? ¿Chaquale nedan' Pablo bnežjw cuina' gota' le'e yag cruz neče le'e? ¿Zsoale nis cont blo'e chejnilaže'le neda'? Gague can'. ¹⁴ Choa' yela' choxcen che Diosen' bi bzoa' le'e nis, san Crispo na' Gayo na'zen' bzoa' nis. ¹⁵ Da'nan' noch no zoa len le'e bene' yesene' bzoa' legaque' nis, le bi chaclaža' no yesena gwzoe' nis cont blo'e chejnilaže' neda'. ¹⁶ Na' neda' lecze bzoa' nis bene' ca' že' liž Estéfanas, na' bi za'laža' še zoa nochle bene' bzoa' nis. ¹⁷ Nezda' Criston' bi gwsele' neda' cont gwzoa' bene' nis san cont chixjue'eda' diža' güen čhen'. Na' bi cheyiljua' no diža' da' chaque beñachen' diža' sina' choa' cate' chixjue'eda' diža' güen čhen', le še bene' yesone' xbab che yela' sina' chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

Criston' bedelo'ede'yela' guac che Diosen' na'yela' sina' che'

¹⁸ Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neče

xtola'gague' le'e yag cruzen'. San chio' chejnilaže' chone', chio' ba de yela' mban checho toli tocane, nezecho diža' nan' naquen da' zaca'chgua, le nsan' yela' guac che Diosen'. ¹⁹ Chac can' nyojen žan:

Neda' gona' cont nacbia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele žchixe bene' ca' zjansed yela' sina' che benachen'? na' žchixe bene' chososed chosolo'ede' ley che Diosen'? na' žchixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. ²¹ Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata' yela' mban chegaque' toli tocane, la'czla' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyljue' no diža' da' chesacde' naquen da' sina'. ²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž cheto' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecce chesacde' bibi zaca' dižan' chyixjue'eton'. ²⁴ Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac chen' na' yela' sina' chen' dan' gwsele' Criston' bnežjw cuine' neče chio'.

²⁵ Bene' ca' bi chesejnilaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab che Diosen' naquen da' sina'ch ca xbab che benachen', na' nape' yela' guac xench ca benachen'. ²⁶ Bene' migw chia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab che benachen', gague zanle nacle bene' chnabia', gague zanle goljle lo diaža che bene' blao.

²⁷ Diosen' ba gwleje' chio' naccho xi'ine' la'czla' bibi yela' sina' che yežlio nga napcho, na' chesaque benachen' bibi chac goncho; nach Diosen' chaclene' chio' len yela' guac che' na' yela' sina' che' cont bene' zjanac bene' sina' len xbab che benachen' yesacbe'ede' na' yesacde' zto'. ²⁸ Diosen' ba gwleje' chio' naccho xi'ine', zanchi naccho no bene' yixe', no bene' chesegue'e benach, na' gwleje' chio' cont gwlo'ede' bene' zjanaque' blao len benachen' bibi zjazaque' len le'. ²⁹ Diosen' bene' cont nono gac gonxen cuine' lagüen'. ³⁰ Diosen' ba none' chio' txen len Cristo Jesús'en, na' Criston' nse'e yela' sina' che Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xto'la'chon'.

³¹ Da'nan' Xtiža' Diosen' nyojen žan: "Bi cheya'la' gonxen cuincho san gonxencho Xanchon'."

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwejni'ile na' gague bia' diža' xdan cont gaguele naca' bene' sina'. ² San bečhoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xto'la'chon', na' bi be'lena' le'e bichle diža'. ³ Na' cate' gwzoa' len le'e gočbe'eda' bibi chac gona', na' leca bžeba' na' go'la' gwxyzia'

bena' xbab še bi gwzenagle xtižan'. ⁴ Na' diža' da' be'lena' le'e gague bian' len yela' sina' che benachen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. ⁵ Goclaža' šejnilaže'le Criston' gague neche yela' sina' che benachen', san neche da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' čhegaquen'.

⁷ Diosen' ba bzejni'ide' neto' to yela' sina' da' nono gwyejni'i cani', to da' bi'e xnezen' gac cate' biña' xe yežlion', le cana'te bi'e xnezen' yid Criston' yeque'e xtol'a'chon' cont soacho mbalaz toli tocañe. ⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. ⁹ Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.
Nono na' yende' diža' can' gone',

neca na' yesone' xbab lo' lažda'ogüen' can' gaquen'.

¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

¹¹ Can' naquen len benachen', nono neze bi xbab chon bene' yoble, con to tocho nezecho bi xbabn' choncho. Na' ca'cze naquen len Diosen', con Spiritw che' na'zen' nezen bi xbab chone'. ¹² Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'n'an' bi choncho xbab can' cheson bene' bi chosozenag che Diosen'.

¹³ Na' cate' choe'lento' le'e xtiža' Criston', gague choe'to' diža' len yela' sina' čheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' bene' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton' lo' yichjlažda'ogaque' cont gaclenen legaque' yesejni'iden'. ¹⁵ Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw bene' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. ¹⁶ Na' Xtiža' Diosen' da' nyojen žan: "Nono zoa chejni'i xbab che Diosen' cont gwzejni'ide' Diosa'." Perw Diosen' ba bene' chio' Spiritw che' cont šejni'icho xbab che Criston'.

3

Gaccho txen len nochle bene' cheson xšin Diosen'

¹ Bene' migw, bi goc gua' xtiža' Diosen' len le'e can' chona' len bene' chosozenag che Spiritw che Diosen', le ne' chzenagle che xbab čhezle. Da'n'an' zaca'leble ca' bidao'. ² Cate' gwzolao be'lena' le'e xtiža' Diosen' žinten ža' na'aža, biña' šejni'ile da' ca' chaclaže' Diosen' šejni'ile. Da'n'an' ba bsd blo'eda' le'e da' bi naquen zdebe šejni'ile. ³ Chzenagle che xbab čhezle na' da'n'an' bi chac šejni'ile xtiža' Diosen' da' naquen zdebe. Da' chgue'e lježle na' chdile chšaše, nacia' chzenagle che xbab čhezle can' cheson bene' bi

chesejnilaže' Criston'. ⁴ Chnia' chonle ca bene' bi chesejnilaže' Diosen', le balle žale: "Nacto' txen da' chsed chlo'e Pablo", na' yeballe žale: "Nacto' txen da' chsed chlo'e Apolos."

⁵ Le gon xbab chia' neda' Pablo na' che Apolosen', con nacto' bene' güen xšin Dios. Na' Diosen' bene' cont gwejni'laže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnalaze'. ⁶ Neda' zaca'leba' ca to bene' goz, le be'lena' le'e xtiža' Diosen' da' nechw, na' Apolosen' zaca'lebe' ca' bene' chyilen, le bsd blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwejle'le xtižen' da' be'lento' le'e. ⁷ Bitec bi zaca' neda' da' be'lena' le'e xtiža' Diosen' da' nechw, na' neca' Apolosen' da' bsd blo'echde' le'e, san Diosen' zaca'chgüe' da' bene' cont gwejle'le xtižen'. ⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. ⁹ Neto' chzejni'ito' le'e xtiža' Diosen', guac nacho nacto' bene' goz go'õn che Diosen' na' le'e nacle yežlio gan' chac žinña'.

Na' le'e chdop chžagle chonxenle Criston' lecze zaca'leble ca to yo'o che Diosen'. ¹⁰ Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'na' nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyala' gonyane' xbab še xšinen' gonen txen len lene yo'o dan' ba gwlecan'. ¹¹ Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'. ¹² Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. ¹³ Na' cate' žin ža yid Criston', gone' cont gachia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da' zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. ¹⁴ Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. ¹⁵ Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchguaze gac yechojcho bi šeycho.

¹⁶ ¿Ba beyanlaže'le chio' chdop chžagcho chonxencho Jesucriston' yogo'cho txen zaca'lebocho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? ¹⁷ Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocanē che bene' gon ca', le Diosen' zoe' len chio' na' naccho lo ne'e.

¹⁸ Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gache'ele yela' sina' chelen' bi gaclenen le'en Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'. ¹⁹ Bene' bi chesejnilaže' Diosen', yela' sina' čhegaquen' bi naquen da' zejen len Diosen'. Na' Xtiža' Diosen' nyojen žan: "Bene' ca' chesacde' zjanaque' bene' sina', Diosen' gone' cont yela' sina' čhegaquen' gwžiyain' legaue'." ²⁰ Na' yeto gan' nyojen žan: "Xancho nan' nezde' da' yesede che xbab che bene' sina' ca'." ²¹ Da'n'an' bi cheyala' ga'laže'le da' nacle txen len notab'teze bene' chsed chlo'ede' le'e, le yogo'lol bi da' de zjanaquen čhele cont yesaclenen le'e. ²² Neda', len Apolosen', na' len Pedron', gwseła' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da'

de na'a na' da' gata' bate'teze, yogo' da' ca' zjaden cont yesaclenen le'e. ²³ Na' nacle lo' na' Criston' na' Criston' naque' lo' na' Diosen'.

4

Da' yo'o lo' na' postlw ca' yesone'

¹ Cheyala' gache'ele neto' ba gwdixjue'eto' xtiža' Diosen' len le'e nacto' bene' güen xšin Diosen'. Diosen' ba bzejni'ide' neto' da' nono gwneze cani' cont gwsed gwlo'eton' bene'. ² Na' chonen byen gonto' con can' ngüe'e lo' na'to' gonto'. ³ Na' ca naca' neda', bibi nonen len neda' še no justis che yežlio nga o še le'e nale bi chona' can' cheyala' gona'. Na' neca chnia' che cuina' še chona' can' cheyala' gona'. ⁴ Lo' lažda'ogua' chacda' bibi doła' napa' len bite'tez da' chona', perw gague da'nana' na Diosen' chia' bibi xtoła' de. Xancho Jesucriston' ne' še chona' can' cheyala' gona' o še bi chonan'. ⁵ Da'nana' bi cheyala' žialaole nale che note'teze bene' še chone' can' cheyala' gone' o še bi chone'. Caten' yid Xancho Criston' yeto, canan' gone' cont nezecho da' nono neze na'a, na' gone' cont gache'echo can' nac xbab da' yo'o lo' yichjlaždao' benachen'. Na' cana' na' Diosen' še nocho chon güen.

⁶ Bene' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyala' ga'laže'le da' nacle txen len to bene' chsedde' le'e na' gue'ele yetoe'. ⁷ Na' žbixchen' chaquele zaca'chle ca yezica'chle bene'? Diosen' bene' yogo' da' de chele, na' da' ben Diosen' yogo' da' de chele, bi cheyala' ga'laže'le. ⁸ Chacljele bibi chyažjele na' chacljele ba nacle bene' zaca'chgua len Diosen' na' guac nabia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaquelen' cont soato' mbalaz txen len le'e. ⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chegague' yesate'. Na' benachen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'. ¹⁰ Na' da' chonto' xšin Criston' da'nana' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. ¹¹ Ža na'aža zan ni'a chdeto' gwbin chbil chdonto', bibi xalana'to' de, chesebaže' bene' neto' na' bibi ližto' de. ¹² Len ni'a na'to' chonto' žin cont chabchanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chčejto' bi da' chesonde' neto'. ¹³ Cate' chesene' cheto', choł güižto' legaue' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaguele zto' san cont gwzejni'ida' le'e, le nacle ca xi'ina' na' chacda' le'e. ¹⁵ Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwdixjue'eda' le'e diža' güen che Jesucriston' cont chejnilaže'lene'. ¹⁶ Na' da'nana' chneyoeda' le'e gonle can' chonan'.

¹⁷ Da'nana' chsela' Timoteon' gan' zoalen'. Lecze ba nona'ne' ca xi'ina', le bzejni'ida'ne' cont chejnilaže' Xancho Jesucriston', na' zoacze' chone' can' cheyala' gone'. Na' chsela'ne' cont šjajse'ede' laže'le can' gwztoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonxene' Criston'. ¹⁸ Na'

balle cha'laže'le chaquele bich yida' gan' zoalen'. ¹⁹ Perw chacda' yob yida' gan' zoalen' še Diosen' goṅšque' latje. Na' cate' yida', cana'ch yedeṅa'a bene' ya'laže' ca' še yesone' can' chesenen'. ²⁰ Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gague' na'zen' gwlo'en še chnabi'e yichjlažda'ogaque'. ²¹ ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

5

To bene' gwzoalene' xna'zie' ca xo'ole'

¹ Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. ² Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. ³ La'czla' bi zoa' na' len le'e, zoaczcho txen na' ba gwchoglagua' can' cheyala' gonle len ben' chon da' malen', can' gonle la'czla' ca' zoa' len le'e. ⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze Xancho Jesús'en' chaclene' le'e len yela' guac chen'. ⁵ Nach le cuej ben' ca'ale na' le gone' lo na' Satanás dan' chnabia' da' xigüe' ca' cont gonen can' chaclžen' len le'. Le gon ca' cont še yoša'sca yichjlažda'ogüe' na' bi cuiaye'e toli tocaṅe cate' žin ža yid Xancho Jesús'en' yeto.

⁶ Bi cheyala' gaguele chonchgualē güen lao Diosen'. ¿Bi chache'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosochine' cate' chesone' yetextil chonen cont cheyas doxen cuazin'?" ⁷ Bene' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo' ližgaque' lo lnin'. Na' ca'cze chio' chejnilaže'cho Criston' bi cheyala' güe'cho latje šo' da' malen' yichjlažda'ochon'. Cheyala' cuejyichjcho yogo' da' malen' cont gaccho ca to bene' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot bene' Israel gualaž cheton' lo lni pascon'. ⁸ Da'nan' cheyala' cuejyichjcho bite'teže da' mal, cont gaccho ca to bene' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyala' soacho binlo len bene' chosozoa xtoe' na' bene' cheson bichle da' nac da' yela' zto' len cuerp chegaque'. ¹⁰ Gwnia' bi gac soacho binlo len bene' cheson da' nac yela' zto', na' bene' chesezelaže' bi da' de che bene', na' bene' cheseque'e da' de che bene' na' bene' chesonxene' l gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez bene' cheson ca', bich gac bi goncho lo yežlio nga še ca'. ¹¹ San da' žia' cheyala' goncho, bi soacho binlo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheyala' gagwlencho bene' lježcho bene' cheson ca'. ¹² Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheyala' chogbi'acho che lježcho še chesonteže' da' mal. ¹³ Na' Diosen' chogbi'e che xtoła' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Beñe' Corinto chesejnilaže' Criston' chesagüe' xya che lježgaque' lao justis ca'

¹ Chebanda' chele can' chonle da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheyala' nabe lježle le'e ba gwlej Diosen' nacle lo ne'e cont legaque' yesone' yela' justis chele. ² ¿Bi nezele žin ža cate' chio' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. ³ Na' ľecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. ⁴ Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, ľe xbab chegaquen' bi naquen da' zaca'chgua len chio' chejnilaže'cho Criston'. ⁵ Žia' ca' cont yeto'ele che dan' chonle na' bich gonle ca'. ¿Ne tole bi nacle bene' sina' cont gon yela' justis che lježle cate' bi chac chele? ⁶ ¿Da'nan' chjatagwle xya che lježle len justis ca' bene' bi chesejnilaže' Criston'?

⁷ Da' chacyož len lježle na'zen' chlo'en ľeca clelen' chonle. Mbalazech zoale šaca' chdele ca'ale še bi da' chone bene' lježlen' le'e. Jejni'a güe'le latje yeseque'e bi da' de chele. ⁸ Perw le'e chca'ale bi da' de che lježle na' da' zan da' chone lježle.

⁹ ¿Bi nezele bene' ca' zjanaque' bene' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' bene' chosozoa xtoe' na' bene' cheson bichle da' yela' zto' da' nac ca'. Na' nita' bene' chesonxen ľ gua'a ľsaca'. Na' nita' bene' chesata'lene' no'ole bi nac no'ol chegaque' o bene' byo bi nac bene' chegaque', na' nita' bene' byo bxej.

¹⁰ Nita' bene' chesebane' na' bene' chesezelaže' bi da' de che bene', na' bene' borrašw, na' bene' chesežidža' lježgaque' na' bene' cheseziye'e bene' yoble cont yeseque'e da' de chegaque'. Na' ne to bene' chon da' mal dan' zjanac ca' bi yesyežine' yaba gan' zoa Diosen' chnabi'e. ¹¹ Balle benle da' mal dan' zjanac ca', perw na'a da' chejnilaže'le Xancho Jesús'en', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle bene' güen len ľe'.

Cheyala' goncho da' güen len cuerp chechon'

¹² Da' ľi can' chesena bene', de latje goncho bite'teze, perw nezecho gague yogo' da' gonchon' naquen güen. Na' ľa'czľa' še de latje goncho bite'teze, bi cheyala' güe'cho latje nabia' bi dan' gonchon' chio'. ¹³ Na' da' ľi can' chesena yebale', chesene': "Nsa' ľe'echon' par yela' guagw na' decze yela' guagw par gagwchon žinten ľo' ľe'echo." Perw na' ľe'echon' len yela' guagon', chopten žin ža te chegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' ľecze chaclene' chio' len cuerp chechon'. ¹⁴ Diosen' bosbane' Xancho Jesucriston' ladjo bene' guat ca', na' ľecze žin ža cate' yosbane' chio' ladjo bene' guat ca' len yela' guac chen'.

¹⁵ ¿Bi nezele naccho txen len Criston' na' cuerp chechon' zjanaquen che'? Na' bi cheyala' goncho cuerp chechon' da' nac che Criston' lo na' no no'ole zle'. ¹⁶ Note'tezle še chata'le len no'ole bi nac no'ol chelo o bene' byo bi nac bene' chele, cuerp chelen' gaquen toze len cuerp chen', can' ža Xtža' Diosen' da' nyojen žan: "Bene' ca' chope yesaque' toze cuerp." ¹⁷ Perw note'tezcho cate' chon cuincho lo na' Xancho Jesucriston', yichjlažda'ochon' chaquen toze len yichjlažda'ogüen'.

18 Da'nan' bi cheyała' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiayin' cuerp chechon', perw da' ca' zjanac ca' chosožiayin' cuerp chechon'. 19 ĆBi chacbe'ele Spiritw che Diosen' zoan lo' yichjlaždao' to tocho ca' zoa to bene' liže'? Ćle Diosen' ba gwsele' Spiritw chen' zoan lo' yichjlaždao' chio' chejnilaže'cho Criston', na' bi gac goncho con bi žan checho. 20 Na' da' zaca' xen da' ben Xancho Criston' cont bechojcho lo' na' gwxiyen'. Da'nan' cheyała' goncho can' chazlaže' Diosen' len cuerp chechon' na' len yichjlažda'ochon', Ćle chopten zjanaquen che'.

7

Pablon' cho'e diža' che yela' güešagna'

1 Na' che dan' chnabele neda' le'e cart chelen', še bene' byon' bi chaclaže' si'e no'olen' gague' xo'ole', güenna' chone'. 2 Perw na' že'chgua bene' chesedalene' no'ole bi nac no'ol chegaque', na' bene' cheson bichle da' nac da' yela' zto' len cuerp chegaquen', na' da'nan' yejni'a gwšagna'le na' to to bene' byo soa xo'ole' na' to to no'ole soa bene' che'. 3 Na' to to bene' byo cheyała' gone' da' naquen gone' len no'ol che' na' to to no'ole cheyała' gone' da' naquen gone' len bene' che'. 4 No'olen' bi gac ne' to gualaze' nac gone' len cuerp chen' na' neca bene' byon' bi gac ne' to gualaze' nac gone' len cuerp chen', san cheyała' yosozenag che lježe'. 5 Na' le'e nšagna'le bi gwžonle gonlen lježe' da' cheyała' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yol güižle Diosen'. Na' te termen' yezoalen lježe' da' yoble, Ćle Satanás dan' chnabia' da' xigüe' ca' co'oyelan' le'e gonle da' mal še leca žan soalen lježe'.

6 Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. 7 Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

8 Na' le'e nac to gualazle, chacda' güenč bi gwšagna'le, na' ľecze le'e ba got bene' chele bi yošagna'le, san soale to gualazle can' zoa' neda'. 9 Perw še leca žan soalenle no'ole o soalenle bene' byo, yejni'a gwšagna'le cont bi nabia' yela' chzelažen' le'e.

10 Na' le'e no'ole le'e nšagna'le, chona' mandadw bi yela'ale len bene' chelen'. Na' gague neda'ze žia' ca', Ćle naquen da' chon Xancho Criston' mandadw. 11 Na' še no'olen' yele'e len bene' che', cheyała' soa to gualaze' bi yeque'e bene' yoble o cheyała' yeyeje' šjayzoalene' bene' che' da' yoble. Na' ľecze le'e bene' byo le'e nšagna'le, bi yela'ale len xo'ollen'.

12 Na' le'e bene' yezica'chle, nia' can' chona' xbab cheyała' gonle, la'czla' Xančon' bibi gwne' che da' ca'. To to le'e bene' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyała' yela'ale len ľe'. 13 Na' to to le'e no'ole še ba nšagna'lenle bene' bi chejnilaže' Criston' na' chaclaže' soalene' le', bi yela'ale len ľe'. 14 Bi naquen mal lao Diosen' soalenle bene' chele o no'ol chele bene' bi chejnilaže' Criston', Ćle Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanache' ca' xi'in bene' bi chesejnilaže' Diosen', perw gague can', Ćle lente ľegacbe' chi' yichj Diosen' dan' chejnilaže'lene' tole. 15 Perw še bene' chele o no'ole chele bi chejnilaže' Criston' na' bich chaclaže' soalene' le'e, Ćle yela'a, Ćle Diosen' chaclaže' soacho binlo len ľežcho. 16 Na' le'e no'ole še gonle güen len bene'

chele na' le'e bene' byo še gonle güen len no'ol chelen', guacte gonen cont yesejnilaže' Criston'.

17 To tocho cheyala' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. 18 Še ba zoale seřw dan' že' circuncisión cate' gwlej Diosen' le'e nacle xi'ine', bi gonle cont yenit seřon'. Na' še bi'na' soale seřon' cate' gwlej Diosen' le'e nacle xi'ine', bi nable yozozoe' le'e seřon'. 19 Bibi nonen len Diosen' še nsa'cho seřw che circuncisión o še bi nsa'chon. Da' naquen da' zeje, cheyala' goncho con bi chaclaže' Diosen'. 20 Con can' naccho caten' gwlej Diosen' chio' naccho xi'ine', ca'tezeczen' cheyala' soa cuezcho. 21 Še nacle esclavo cate' Xancho Diosen' gwleje' le'e, bibi sa'laže' le che dan'. Perw še guata' latje chixjwle cont chojle lo na' xanlen', le chixjon na' yechojle. 22 Na' la'czla' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague benachen'. Na' chio' bi'na' gaccho esclavo che bene', nac Criston' Xancho, na' guac nacho naccho esclavo che'. 23 Da' zaca' xen da' ben Xancho Criston' cont bechojcho lo na' gwxiyen'. Da'nan' bi cheyala' goncho xbab no benač naque' xancho. 24 Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

25 Na' can' cheyala' gac che no'ol güego' ca', Xancho Criston' bi bene' mandadw can' gac chegacbe', perw neda' nia' can' chacda' cheyala' gac, na' ba beyaše' beži'ilaže' Xanchon' neda', na' da'nan' diža' da' choa' zaca'czen gwzenagle čhen. 26 Ba za' da' saca'zi'cho na'a, na' da'nan' chacda' güenčh soa cuezcho con can' ba zoacho. 27 Le'e nšagna'le, bi yela'ale len xo'olle, na' le'e bi'na' soa xo'olle, bi čhiljw xo'olle. 28 Perw bi nacho naquen mal še gwšagna'le, na' neca naquen mal še no'ol güego' gwšagna'. Con da' zan da' zed de yežlio nga che bene' zjanšagna', na' chaclaža' bi gac chele ca'.

29 Bene' migw, chaclaža' nia' le'e da' nga: Bich chega'an yezan iz cont goncho dan' ngüia Diosen' goncho. Da'nan' le'e zoa xo'olle cheyala' soale gonle xšin Diosen' ca bene' nono xo'ole' zoa. 30 Na' še de da' yegüine'le, cheyala' soale gonle xšin Diosen' ca bene' bi chegüine'. Na' še zoale mbalaz, cheyala' soale gonle xšine' ca bene' bi zoa mbalaz. Na' še si'le bi da' si'le, cheyala' soale gonle xšin Diosen' ca bene' bibi gwxi'e. 31 Na' še bi da' chčhinle da' de yežlio nga, bi cheyala' cue' yichjle che len, le da' te che yogo' da' chle'echo yežlio nga.

32 Na' chaclaža' bi cue' yichjle che da' ca' chac yežlio nga. Bene' nono xo'ole' zoa nlatje' gone' xbab che xšin Xancho Diosen' na' che bi da' chaclaže' Xanchon' gone'. 33 Perw bene' nšagne'e chi' yichje' che da' chac yežlio nga, le chone' xbab che bi da' chaclaže' xo'olen' gone', na' gague gac gone' xbab che toz Diosen'. 34 Na' lecze nža' can' chac che no'ole nšagna' na' che no'olen' bi nšagna'. No'ole bi nšagna' mbec yichje' che xšin Xancho Diosen' na' chon cuine' lo ne'e do yichj do laže'. Na' no'ole nšagne'e chbec yichje' che da' chac yežlio nga na' bi da' chaclaže' bene' che' gone'.

35 Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquele Xancho Diosen' do yichj do laže'le sin cbi gwžonen gonle can' chazlaže'.

36 Na' še to bene' chacde' cheyala' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chnabe' le'. 37 Perw še zoa to bene' chacde' güenčh nono

si' xi'ine' no'olen' na' bi nacho chonen byen gwšagna'be', nacczen güen gone' can' chazlažen' na' bi gwnežjue' bi' čhen' gwšagna'be'. ³⁸ Can' naquen, bene' chnežjue' bi' čhen' chšagna'be' chone' güen, na' bene' bi chnežjue'be' chone' güenč.

³⁹ Na' note'teze no'ole nšagna', cheyała' soe' len bene' čhe'. Perw še ba got bene' čhe', guac yeque'e bene' yoble, con še bene' chejnilaže' Xancho Criston'. ⁴⁰ Perw chacda' neda' soache' mbalaz še yega'ane' to gualaze', na' chacda' xbab čhian' naquen toze len xbab čhe Spiritw čhe Diosen'.

8

Yela' guagw da' chosožia bene' lao l' gua'a l'saca' chesejnilaže'

¹ Na' gwñable nac cheyała' goncho len yela' guagw da' chosožie' lao l' gua'a l'sacan' chesejnilaže'. Da' li yogo'cho chejni'icho bibi zjazaca' l' gua'a l'saca' ca'. Na' cate' choncho xbab čhe da' chejni'icho, con chonxen cuincho, perw cate' chaque lježcho, cheyiljwlaže'cho nacle goncho cont gaclen lježcho. ² Na' še chaquecho ba gwejni'icho to da' zejen, cheyała' gacbe'echo bibi de da' chejni'icho ca cheyała' šejni'ichon. ³ Perw cate' chaquecho Diosen', nachle Diosen' nombi'e chio'.

⁴ Gwñable še guac gagwcho yela' guagw da' chosožia bene' lao l' gua'a l'sacan' chesejnilaže'. Nezecho l' gua'a l'saca' ca' bibi zjazacan', na' toz Diosen' zaque' šejnilaže'chone'. ⁵ Da' li de da' zan da' chesena benačhen zjanaquen xangaque' da' chesejnilaže'. Na' la'czła' nita' bene' chesejnilaže' da' de yaba na' yežlion' chesene' da' ca' zjanaquen xangaque', ⁶ chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benač, beyixe' na' bichle da' zjade, na' le' chone' yela' mban čhecho.

⁷ Gague yogo' bene' lježcho bene' chesejnilaže' Criston' chesejni'ide' da' nga nezecho. Bałe' zjayolagüe' chesone' xbab bene' zaca' l' gua'a l'saca' ca', na' cate' chesagüe' yela' guagw da' ba bžia bene' lao l' gua'a l'sacan', chesacde' chesagüe' da' naquen čhe l' gua'a l'sacan'. Da'n'an' lo' yichjlažda'ogaque' chesacde' malen' chesone', le bina' yesejni'išagüe'de' naquen' naquen. ⁸ Na' yela' guagon' bibi zaca' gonon cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. ⁹ Perw ba l' bene' bina' yesejni'išagüe'de' gague bi nonen len Diosen' še bin' ye'ej gagwcho. Na' neče legaque' cheyała' gwsaca'cho can' goncho cont bi goncho ca yeselažoe' lo da' malen' neče dan' che'ej chagwchon'. ¹⁰ Le'e nezele nono nac l' gua'a l'saca' ca', na' da'n'an' guac cue'le ye'ej gagwle ga chesone' lni čhe l' gua'a l'sacan' sin cbi bi dola' gapple. Na' bene' bina' šejni'ide' cate' le'ede' che'ej chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'. ¹¹ Na' guacte gwžiai'cho bene' lježcho yela' chejni'i čhecho, la'czła' Criston' bnežjw cuine' gote' neče le'. ¹² Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. ¹³ Da'n'an' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

9

Pablon' že' naque' dogualje postlw

¹ Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsen' na' bena' xšine' gan'

zoale na' da'nan' chejnilaže'lene'. ² Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xanchon' ben' gwseła' neda', chlo'en da' li naca' postlw.

³ Quinga choži'a xtiža' bene' ca' chesene' bi gwseła' Diosen' neda' naca' postlw: ⁴ Guac naba' yeson bene' da' ye'ej gagua' šaca' chaclaža' gona' ca'. ⁵ Na' guac gwšagna'lena' no'ole chejnilaže' Criston', na' yechi'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. ⁶ Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

⁷ Nono soldadw zoa bene' nacho cuinze' chyixjue' gastw che'. Na' nono gaz yag uvas še bi gagüe' uvasen' cate' chbian. Na' lecze ca' nono bene' chyo'e šib xila' ca' nacho bi che'eje' late' xiže'ba' cate' chsien'. ⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésen'. ⁹ Quinga bzoje' le'e ley: "Bi gwseyjwle cho'a go'n ca' šlac chosolej chosošošjba' trigon' cont choj xen." Na' gague da' chi' yichj Diosen' che go'n ca' bene' cont byojen žan ca'. ¹⁰ San že' ca' chzejni'icзде' chio' che bene' ca' cheson xšin Diosen'. Da'nan' že' bene' chgua'ane' go'n na' bene' chonšagüe' trigw cheyała' yesenite' lez yesezi'e late' güeje cosešen'. ¹¹ Na' ca' neto' ba bzejni'ito' le'e xtiža' Diosen', le gon xbab žnaquen da' zcha'och ca' da' cheyała' gonle šaca' gonle da' ye'ej gagwto' na' bichle da' chyažjeto'? ¹² Naquen da' cheyała'cze gonle dan' choe'le da' cheseyažje yezica'chle bene' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clcl ca' legaque'.

Perw bi gwñabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. ¹³ Nezele bene' cheson mandadw lo' yodao' che neto' bene' Israel chesachbane' len da' chosonežjw bene' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. ¹⁴ Na' ca'czen' non Xancho Criston' mandadw, bene' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen čhen'. ¹⁵ Perw neda' bi gwñaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clcl ca' naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

¹⁶ Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'. ¹⁷ Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca' laxjua'. Perw chona' da' gwlo'o Diosen' lo' na' gona', na' gague chona' to da' ža xbab chezan'. ¹⁸ Na' še nable bi chcu'a'anen len neda' da' chyixjue'eda' xtiža' Diosen', nach nia' chcu'a'anen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

¹⁹ Bi naca' xmos bene', perw chzexjw yichja' chon cuina' ca' xmos yogo'te bene' cont šanch bene' yesejnilaže' Criston'. ²⁰ Cate' zoa' len bene' Israel gualaž cheton', chona' can' cheson legaque' na' chona' ca' nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'. ²¹ Na' cate' zoa' len bene' bi zjanombia' ley dan' bzoj Moisésen', bi na'ogua' costumbr da' non leyna' mandadw, le chaclaža' yosozenag bene' ca' bi zjanombia' leyna' cate' choe'lena' legaque' xtiža' Diosen'. Perw bi nacho chzoa' ca'ale dan' ža

Diosen', le chzenaga' can' ža Criston'. ²² Na' cate' zoa' len bene' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol bene' cont gaclena' legaque' na' bale' yesejnilaže' Criston'. ²³ Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

²⁴ Nezecho cate' chosoxonj zan bene' cont choj to bene' gon gan, yogüe' chesa'acses'e, la'czla' tozen' gon gan na' si'e premio. Na' ca chesa'acses bene' ca' do yichj do laže', ca' to to chio' cheyala' soacho gwzenagcho che Diosen' do yichj do laže'cho cont gone' soacho mbalaz cate' yežincho gan' zoen'. ²⁵ Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yesejitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. ²⁶ Da'n'an' bi gona' ca to bene' chxonj, to bene' bi nezde' ga cheyala' yežine', o ca to bene' chdile' len ponet, bene' bi nezde' ga cuaže'. ²⁷ Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwdixjue'eda' xtižen' len bene' yoble.

10

Cheyala' na'yañe'cho cont bi goncho da' malen'

¹ Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xña. ² Na' yogüe' gosaque' txen len da' Moisésen' cate' gwche'e legaque' gan' gwžialao bejon' laogaque' na' cate' gosodie' nisdaon'. ³ Na' yogüe' gosagüe' toze yela' guagw da' bnežjw Diosen' legaque'. ⁴ Na' yogüe' gose'eje' toze nis da' bnežjw Diosen' legaque'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' legaque'. ⁵ Na' la'czla' Diosen' goclene' yogüe', zane' bi gosone' cont yebe Diosen' legaque', na' da'n'an' gosebiaye'e latje dašen'.

⁶ Na' yogo' da' goc chegaque' chzejni'in chio' bi cheyala' selaže'cho goncho bi da' mal can' gason legaque'. ⁷ Da'n'an' chnia' le'e, bi šejnilaže'cho l' gua'a lsaca' can' gason bal da' xozxta'oto' ca'. Le nyoj Xtiža' Diosen' žan: "Gosebi'e gose'ej gosagüe' na' gosenite' gosone' lni." ⁸ Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' gason zan da' xozxta'oto' cani', na' da'n'an' šonechoa mile' gosate' yela' güen da' xinj chegaquen' lao toze ža. ⁹ Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' legaque' can' gwnen', na' Diosen' gwsele' bel znia gosotba' legaque'. ¹⁰ Na' lecze bi cheyala' bixjwcho len Diosen' can' gason bal da' xozxta'oto' ca' cani', na' Diosen' gwsele' to angl che' bene' betue' legaque'.

¹¹ Yogo' da' ca' gosac chegaque' zjanyojen le'e Xtiža' Diosen' cont chosozeni'in chio' nac cheyala' goncho zoacho na'a, le ba zoyaž yežlion'. ¹² Da'n'an' note'tezcho še chaquecho ba zoachagcho chejnilaže'cho Jesucriston', cheyala' na'yañe'cho naquen' goncho cont bi lažo'cho lo da' malen'. ¹³ Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen',

bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

14 Da'nan' bene' migw ben' chacda', le cuejyichj yogo' bi da' cheson bene' chesejnilaže' l gua'a lsaca' ca'. 15 Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. 16 Na' da' ca' che'ej chagwcho chjayezecho bi zejen len chio' da' got Criston', choe'cho yela' choxclen che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. 17 Na' can' nac toze yetextil da' chzojxcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

18 Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. 19 Bi chaclaža' gonle xbab žia' l gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. 20 Gague can', le cate' bene' chosožie' bi da' chosožie' lao l gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. 21 Bi gac ye'ej gagwcho da' che'ej chagwcho chjayeze'echo bi zejen da' got Xancho Criston' na' lecze ye'ej gagwcho gonxencho da' xigüe' ca'. Bi gac ye'ej gagwcho chopten. 22 Ža'a Diosen' chio' še goncho ca'. Na' bi naccho bene' gual ca' Diosen' cont soecho bi da' gone' gac checho.

Bi goncho da' chaque bene' lježcho naquen mal

23 Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. 24 Ne tocho bi cheyala' goncho da' naquen güen len chio'ze, san goncho xbab še naquen güen len bene' lježcho.

25 Bite'teze bela' chesote' lagüe' ya'a le gagon' na' bi nable še bosožien' lao l gua'a lsacan' chesejnilaže', cont bi gaczejlaže'le še naple doła' gagwlen. 26 Le Xtiža' Diosen' nyojen žan: "Che Xancho Dios yežlio nga, benach, beyixe' na' yogo'te da' zjade lo yežlion'."

27 Na' cate' bene' bi chesejnilaže' Criston' chesaxe' chio' gagwcho ližgaque', še šejcho nach guac gagwcho bite'teze da' yesone' gagwcho sin cbi nabcho še bosožien' lao l gua'a lsacan', le Diosen' bi che'nde' gaczejlaže'cho še napcho doła' che'ej chagwchon. 28 Perw še no ye' chio': "Da' nga bosožie' lao l gua'a lsacan'", bi gagwchon cont bene' gwna ca' bi gacde' lenczcho chejnilaže'cho l gua'a lsacan', o gacde' napcho doła' chagwchon. 29 Bi nacho naquen da' mal len Diosen' gagwchon, con naquen da' mal len ben' gwna ca'.

Na' chnable žbixchen' cheyala' cuejyichjcho bich goncho bi da' choncho še bene' lježcho chesacde' napcho doła' chonchon? 30 Na' chonle xbab žbixchen' ža' bene' lježcho choncho da' mal chagwcho to yela' guagw še choe'cho yela' choxclen che Diosen' neche len? 31 Quinga naquen, cate' che'ej chagwcho o bite'teze da' choncho, cheyala' gonchon cont gacxen Diosen'. 32 Na' bi cheyala' goncho bite'teze da' choncho še gonen cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonxencho Diosen'. 33 Can' chona' neda', bite'teze da' chona' cheyljwlaža' nacle gona' cont to to bene' soe' mba.

Na' bi cheyiljwlaža' nacle gona' da' gaclen cuina' san da' gaclen bene' zan cont gata' yela' mban čhegaque' toli tocañe.

11

1 Neda' chona' con can' ben Criston', na' chñeyoeda' le'e gonle can' chonan'.

Can' cheyala' yeson no'ol ca' cate' chdop chžagcho chonxencho Diosen'

2 Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. 3 Na' chaclaža' šejni'ile da' nga. Yogo' bene' byo cheyala' yosozenague' che Criston', le Criston' naque' blaoch ca legaque', na' yogo' no'ole cheyala' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. 4 Note'teze bene' byo še nzoa xłape' cate' choł güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. 5 Na' note'teze no'ole še choł güiže' Diosen' o chyixjue'ede' xtiza' Diosen' sin cbi gwcuase' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. 6 Na' še no'olen' bi chaclaže' gwcuase' yichje' can' ba gwnian', yejni'a gwšib doxen yichjen'. Da'n'an' še chaquele zto' gwšiblen, nach gwcuase'czlen can' cheson yezica'chle no'ol ca'. 7 Na' le'e bene' byo, bi cheyala' gwcuase' yichjen' cate' yoł güiže' Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che to tole bene' zaca'. 8 Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. 9 Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. 10 Da'n'an' no'ol ca' cheyala' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. 11 Perw naccho txen len Xancho Jesucriston' la'czla' še naccho bene' byo o še no'ole, na' bi cheyala' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. 12 Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' benač len bica'chle da' zjade.

13 Le gon xbab chele na' gache'ele bi chazlaže'cho cate' to no'ole choł güiže' Dios sin cbi hcuaše' yichje', le can' nac costumbr čhechon'. 14 Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. 15 Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcuasen' yichjen'. 16 Še nole chaquele gwšaše' che da' nga ba gwnia', cheyala' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

17 Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. 18 To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. 19 Na' ca'ljan' cheyala'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. 20 Na' cate' chežagle chagwle txen, bi chonle xbab

bnežjw cuin Xancho Jesucriston' neče xtoła'chon', la'czla' chdop chžagle cont šjayze'elen. ²¹ To tole che'ej chagwle da' chyob chdoxe'le, neca chbez lježle. Da'nan' balle ne' chdonle cate' chedagwle na' yeballe che'ej chagwxattele na' chzože'le. ²² Yejni'a yega'an ližle ye'ej gagwle clcl ca gagwle lao bene' yaše' bene' bi de čegaque'. Da' chonle ca', nacbia' chgue'e lježle bene' cheyla' yesaque' txen len le'e da' chonxenle Diosen', na' chonle cont chesaque' tole da' bi de čegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neče xtoła'chon'
(Mt. 26:26-29; Mr. 14:22-25; Lc. 22:14-20)

²³ Xancho Jesúsen' bzejni'ide' neda' can' šjayze'echo da' bnežjw cuine' neče xtoła'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsen' bexae' to yetextil. ²⁴ Na' be'e yela' choxcen čhe Diosen' na' beyož be'e yela' choxcen čhe' na' bzoxjen', na' gwne': "Le gagw yetextil nga. Lenna' naquen cuerp chia' da' chnežjua' neče xtoła'le. Na' quinga gonle šjayze'ele bi zejen len le'e dan' gwnežjw cuina' yesote' neda'." ²⁵ Na' lecze ca' bene' cate' beyož gosagüe' xše', bexae' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xčhenan' cont gac can' gwne' gonen'. Na' bate'teze ye'ejle ca' da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'." ²⁶ Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neče xtoła' benačhen'. Na' can' gonchczcho šlac biña' yide' da' yoble.

Naquen' goncho cate' chjayze'echo yela' got čhe Xancho Jesúsen'

²⁷ Can' naquen, še chagwcho yetextilen' na' che'ejcho nis uvasen' cont chjayze'echo yela' got čhe Xancho Jesúsen' perw še bi chonxenchone' cate' choncho ca', napcho doła', le chonchon ca da' bibi zaca' cuerp čhe' dan' bnežjue' na' xčhene' da' blalje' neče xtoła'chon'. ²⁸ Da'nan' cheyla' gonyane'cho xbab še choncho da' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got čhe Xancho Jesúsen'. ²⁹ Le še ye'ej gagwcho sin cbi gonxencho Xancho Jesúsen' da' bnežjw cuine' gote' neče xtoła'chon', Diosen' gone' chio' castigw. ³⁰ Na' zanle bi zoale güen na' chacšenele na' bal bene' ba gosate' da' bi gose'ej gosagüen' do laže'. ³¹ Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon. ³² Na' cate' napcho dola' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocañe can' yesezi' bene' bi chesejnilaže'ne'.

³³ Da'nan' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen. ³⁴ Na' še chbil chdonle, yejni'a yega'an ližle ye'ej gagwle, clcl ca gon Diosen' le'e castigw can' chonle caten' chdop chžagle. Na' čhe bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw čhe Diosen' chaclenen to tocho cont choncho bi da' choncho

¹ Na' bene' migw, chaclaža' nezele ca chon Spiritw čhe Diosen' chaclenen to to chio' chejnilaže'cho Jesucriston'.

² Nezele cate' biṇa' šejnilaže'le Criston' gwyejle'le diža' güenlaže' na' da'nan' gwyejnilaže'le l̄ gua'a l̄saca' da' bibi biš grasyw nye'. ³ Na' da'nan' chaclaža' šejni'ile da' nga na'a. Note'teze bene' že': "Chgue'eda' Jesúsen'", bi zoa Spiritw che Diosen' len le', perw bene' že': "Jesúsen' naque Xana'", že' ca' da' zoa Spiritw che Diosen' chaclenen le'.

⁴ Toz Spiritw che Diosen' zoa, perw nža' nža' da' chaclenen to tocho choncho o nezecho. ⁵ Toz Xancriston' chonxencho la'czla' nža' nža' ca chon to tocho xšinen'. ⁶ Na' la'czla' nža' nža' da' chon to tocho, toz Diosen' chone' cont to tocho chac choncho xšinen'. ⁷ Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho. ⁸ Diosen' ba nsi'e xnezen' chon Spiritw chen' cont balcho chac chzejni'icho bene' yoble xbab sina' chen', na' lecze Spiriton' chonen cont yebałcho nezecho to da' nezecho na' chzejni'ichon bene'. ⁹ Na' lecze toz Spiritw chen' chonen cont balcho chejnilaže'chguacho Diosen' na' chac bite'teze da' chṇabechone'. Na' da' chaclen Spiriton' chio', balcho chac choncho cont chesyeyaque bene' chesacšene. ¹⁰ Na' lecze Spiritw nan' chonen cont balcho chac choncho yela' guac, na' balcho chac chyixjue'echo bi da' ba gwna Diosen' chio'. Na' Spiritw che Diosen' chonen cont balcho chacbe'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont balcho choe'cho gwde gwdele diža' da' bi nsedcho, na' yebałcho chac che'cho bene' lježcho bi zeje diža' ca'. ¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp chechon'

¹² Cuerp chechon' nsan' zan part, perw zjangoden' txen na' naquen toze. Na' lecze ca' chio' chejnilaže'cho Criston' naccho toze len le' na' len bene' lježcho ca'. ¹³ Bal chio' naccho bene' Israel na' yebał chio' bi naccho bene' Israel. Balcho naccho esclavo na' yebałcho bi naccho. Perw yogo'czcho gwzoacho nis par blo'echo ba ben Spiritw che Diosen' cont naccho txen len Criston', na' lecze toze Spiritw che Diosen' zoan lo' yichjlaždao' yogo'cho.

¹⁴ Cuerp chechon' nsan' zan part, na' nža' can' nac to to parten'. ¹⁵ Ni'acho guac nan: "Bi naca' toze len cuerpen', le bi naca' ne'en." Perw la'czla' še nan ca', naquen toze len cuerpen'. ¹⁶ Na' nagcho guac nan: "Bi naca' toze len cuerpen', le bi naca' yejlagüen'." Perw la'czla' še nan ca', naquen toze len cuerpen'. ¹⁷ Šaca' doxen cuerp chechon' naquen yejlaochi, bi gac yenecho. Na' šaca' doxen cuerpen' naquen nagcho, bi gac le'echo. ¹⁸ Perw Diosen' bžie' bia' nsa' cuerp chechon' zan part da' cheson žin con can' gwyazlaže'. ¹⁹ Na' bi nya' cuerp chechon' šaca' nsan' toze part. ²⁰ San cuerpen' nsan' zan part da' naquen txen cont naquen toze cuerp.

²¹ Da'nan' yejlaochon' bi gac yen' na'chon': "Bi chyažjda' le'." Na' neca gac ye' yichjchon' ni'achon': "Bi chyažjda' le'." ²² Na' la'czla' bal part cuerp chechon' chaquecho bitec naquen da' gual, perw chyažjehon. ²³ Na' la'czla' bal part cuerp chechon' chaquecho bitec bi zacan', perw chi' yichjchon, da'nan' cheyacw xacho. Na' part che cuerp chechon' da' bi chaclaže'cho le'e bene', chcuaše'chon len xacho. ²⁴ Perw part da' nsa' cuerp chechon' da' naquen xdan, bi chcuaše'chon. Na' Diosen' none' cont chi' yichjcho che part ca' da' bi zjanaquen xdan. ²⁵ Na' none' cuerp chechon' toz cont to to parten' chapš'i' lježen lebze na' chesonen žin txen. ²⁶ Na' še guecho chac, bi zoa güen doxen cuerp chechon' še ca'. Na' še to parten' chaquecho xdan o chac chonen güenchga, doxencho chebecho.

²⁷ Na' chio' chejnilaže'cho Criston', yogo'cho ngode'cho txen len le' na' yogo'cho txen naccho cuerp chen', na' guac nacho to tocho naccho ca to part güeje cuerp chen'. ²⁸ Na' ca nac chio' chdop chžagcho chonxencho Criston', da' nechw Diosen' gwleje' neto' nacto' postlw, na' da' gwchope gwleje' bal bene' cont chesyixjue'ede' da' ba gož Diosen' legaue'. Na' da' gwyone gwleje' yebal bene' chososed cheselo'ede' xtižen'. Na' lecze gwlej Diosen' bene' cheson yela' guac, na' gwleje' bene' cheson cont chesyeyaque bene' chesacšene, na' gwleje' bene' chesaclene' bene' yoble cate' bi da' chesyazjde'. Na' gwleje' bene' chesenabia' chio' chdop chžagcho chonxencho Criston', na' gwleje' bene' chac cheso'e gwde gwdele diža' da' bi zjansede'. ²⁹ Gague yogo'cho naccho postlw. Gague yogo'cho chac chyxijue'echo bi da' ba gwna Diosen'. Gague yogo'cho chac chsed chlo'echo bene' xtižen', na' gague yogo'cho chac choncho yela' guac. ³⁰ Gague yogo'cho chac choncho cont chesyeyaque bene' chesacšene. Gague yogo'cho chac choe'cho gwde gwdele diža' da' bi nsedcho. Gague yogo'cho chac chozejni'icho bi zejen diža' ca'. ³¹ Le yeyiljwlaže' gaclen Spiritw che Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheyala' soa cuezcho.

13

Cheyala' gague lježcho

¹ La'czla' še chachcho gwde gwdele diža' da' chesac benačhen' na' da' chesac angl ca', perw še bi chaque ljež benačcho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž bene' güecuež. ² Na' la'czla' še ba goclen Spiritw che Diosen' chio' cont chac chyxijue'echo bi da' ba gwne' chio', bibi zaca'cho še bi chaque ljež benačcho. Na' la'czla' še nezecho yogo'lol da' nono na' neze, na' la'czla' še chejni'icho yogo'lol da' naquen da' zaque', bibi zaca'cho še bi chaque ljež benačcho. Na' la'czla' še leca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. ³ Na' še gwnežjwcho bene' yaše' yogo' bi da' de checho na' gwnežjw cuincho yosozey bene' chio', bi gaclenen chio' lao Diosen' še bi chaque lježcho.

⁴ Še chaque lježcho, chapcho yela' chxenlaže' len legaue', na' choncho güen len legaue', bi chgue'echo legaue' še chac güen čegaue', na' bi chonxen cuincho len xtiža'cho, na' bi cha'laže'cho. ⁵ Na' cate' chaque lježcho bi choncho nacteze len legaue', bi choncho xbab che cuinzcho, bi chbixjwcho, na' bi chgo'olaže'cho. ⁶ Na' cate' chaque lježcho bi chbecho še chon bene' lježcho da' mal, san chbecho še chone' da' zej to li. ⁷ Na' cate' chaque lježcho, chapcho yela' chxenlaže' bite'teze da' chesonde' chio', na' choncho xbab güen che yogo'lol bene', na' zoacho lez yesone' güen yogo' las, na' chy chchejlaže'cho bite'teze da' chesone bene' chio'.

⁸ Gwbat te che da' cheyala' gague ljež benačcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yažje bichle da' šejni'icho. ⁹ Biña' nezecho na'a yogo' da' za' nezecho, na' biña' gac chixjue'echo binlo yogo'lol da' ba gož Diosen' chio'. ¹⁰ Perw gwžin ža cate' gon Diosen' cont yogo' da' de gaquen can' cheyala' gaquen. Cana' te che da' bi naquen ca cheyala' gaquen.

¹¹ Cate' goccho bidao' be'cho diža' can' chesoe' note'teze bidao' diža', bench choncho xbab can' cheson note'teze bidao' xbab, na' gwwejni'icho can' chesejni'i

bidao'. Na' na'a ba gwcha'ocho na' ba gwlejiyichjcho bich choncho can' cheson bidao'. ¹² Na'a bina' nezecho binlo da' nac che Diosen'. Zaca'lebcho ca bene' chne'e to lo spejw da' bitec chlo'e binlo. Perw gwzin za cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. ¹³ Nachen' da' quinga šone non Diosen' mandadw goncho toli tocanē: šejnilaže'chone', soacho lez gone' ga gacch güen checho, na' gaquecho Diosen' na' ljež beňachcho. Na' da' zejechen goncho lao da' ca' šone, gaquecho Diosen' len ljež beňachcho.

14

Beňe' ca' chesoe'lene' Diosen' diža' da' bi zjansede'

¹ Cheyała' cue' yichjle gaeule Diosen' na' len ljež beňachle, na' lecze cheyała' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen beňe' bi da' chesone', da' zaca'chen da' cheseyixjue'ede' bi da' ža Diosen'. Lenña' cheyała' selaže'chguale gonle. ² Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho beňachen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon. ³ Perw bene' chyixjue'ede' bi da' ba gwna Diosen', chaclene' beňe' yoble yesenita'chache' yesejnilaže' Diosen', na' yesenite' mbalazech, na' cheseyacxenlaže' še bi da' chesac chegaque'. ⁴ Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. ⁵ Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenña' zejechen clēl ca güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen beňe' lježcho yesenita'chache' yesejnilaže'ne'. ⁶ Beňe' migw, nežda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedena'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nežda' che Diosen', o bi da' ba gože' neda' cont chixjue'eda' le'e, o še gwsed gwlo'eda' le'e bi zeje xtižen'.

⁷ Ca nac bžejo, bi mbanen perw zoa ši'in cate' chcuež beňe' len, na' lecze ca' arpan' cate' chyin beňe' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bateteze, nono gacbe'e bin' chosocueže' še bi yosoše'e güeltze nota dan' chosocuežen'. ⁸ Cate' zoa to beňe' chcueže' trompeta cont cheseneze soldadw ca' naquen' yesone', še bi gwcuežen' binlo, bi yesejni'ide' cheyała' šja'aque' lo gwdiēle. ⁹ Ca'cze naquen len chio', še güe'lencho Diosen' diža' da' bi chesejni'i beňe', bi gaclenen legaque', le len legaque' naquen ca che beňe' chšalj toze'. ¹⁰ Nezecho beňe' že' doxen yežlion' gwde gwdele diža' da' chesaque', na' to to beňach chesejni'ide' dižan' goljelene'. ¹¹ Na' še chio' bi chaccho diža' da' chac yeto beňe', nezecho naque' beňe' zito' len chio' na' naccho beňe' zito' len le'. ¹² Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyała' cue' yichjle gaclenen le'e gonle da' gaclen lježle cont yogo'le soachachle šejnilaže'le Diosen'.

13 Na' še Spiritw çe Diosen' gonen cont güe'lencho Diosen' gwde gwdele diža' da' bi nsedcho, cheyała' nabcho ľecze gaclenen chio' gwzejni'icho bene' bi zeje diža' dan' choe'lencho Diosen'. 14 Le cate' Spiriton' chonen cont chol güiža' Diosen' len diža' da' bi nседа', con neзда' lo' yichjlažda'ogua' choe'lena' Diosen' diža', perw bi chona' xbab chen, le bi chejni'idan'. 15 Quinga cheyała' goncho cate' chol güižcho Diosen', cheyała' güe'lenchone' bite'teze diža' da' choñ Spiritw chen' chio' la'czła' še bi chejni'ichon, na' ľecze cheyała' güe'lenchone' diža' da' chejni'icho. Na' cheyała' goľcho bite'teze da' choñ Spiritw çe Diosen' goľcho la'czła' še bi chejni'ichon, na' ľecze cheyała' goľcho da' chejni'icho. 16 Le še chonxencho Diosen' o choe'cho yela' choxcľen çe' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'. 17 La'czła' še choe'cho yela' choxcľen çe Diosen' binlo, perw bi chaclenen bene' yoble še bi chesejni'ide' xtiža'chon'. 18 Choa' yela' choxcľen çe Diosen' da' choe'lencha'ne' gwde gwdele diža' da' bi nседа' cľel ca le'e. 19 Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' ľegaque', cľel ca gua' ši mil diža' da' bi yesejni'ide'.

20 Bene' migw, bi cheyała' šo'cho xbab çe bidao' biña' šejni'i, san šo'cho xbab çe bene' chejni'i. Perw len da' malen' cheyała' gaccho ca bidao' bi' biña' gon da' mal. 21 Xtiža' Diosen' nyojen žan: "Neda' Dios gona' cont bene' zito' yeso'lene' bene' Israel quinga xtiža', perw ne ca'cze bi yosozenague' chia'." Can' ža Xancho Diosen'. 22 Da'nana' nezecho Diosen' chchine' gwde gwdele diža' da' choe'lenchone' cont bene' bi yesejnilaže'ne' yesacbe'ede' zoacze' len chio'. Na' chio' chejnilaže'chone', Spiritw çe Diosen' chonen cont bene' chesejixjue'ede' chio' bi da' ba gož Diosen' ľegaque'. Can' chone' chzejni'ide' chio'. 23 Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho Diosen' gwde gwdele diža' da' bi nsedcho, na' yesela' baľ bene' bi chesejni'i naquen' choncho chonxenchone' o bene' bi chesejnilaže'ne', ľegaque' yesene' chactontcho. 24 Perw še bene' ca' bi chesejnilaže' Diosen' o bene' ca' bi chesejni'i naquen' chonxenchone' yesela'aque' šlac yogo'cho chzejni'i ľježcho bi da' ba gož Diosen' chio', nach yesacbe'ede' žjade xtole' cate' yesende' xtiža' yogo'cho, na' yesyetingde' da' malen' chesonen'. 25 Le yesacbe'ede' Diosen' nombi'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' ľicze zoa Diosen' len bene' quinga."

Cheyała' gonxencho Diosen' binlo na' bi gonchon nacteze

26 Bene' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed gwlo'e ľježle, na' balle de da' ba gož Spiritw çe Diosen' le'e, na' balle de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna bene' ľježlen'. Naquen güen gonle yogo' da' ca' con še gonlen ga gaclenen ľježle. 27 Na' še nole güe'lenle Diosen' gwde gwdele diža' da' bi nsedle, le güen', perw do chopezle o še šonžle na' tgüejle tgüejle, na' tena' choj bene' yozejni'ide' bi zejen diža' dan' ba be'le. 28 Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. 29 Na' še chixjue'ele bi da' ba gwna Diosen', ľecze do chopezle o šonžle chojle chixjue'elen šlac ndop nžagle na' yezica'chle bene' yosozenague' na' yesone' xbab še dan' žalen' naquen ľebze len Xtiža' Diosen'

dan' nyoj. ³⁰ Na' še šlac tole choe'le diža', Diosen' gwzejni'ide' yetole to da' čixjue'ele, cheyała' cuezle na' güe'le latje čixjue'e ben' yeto dižan'. ³¹ Yogo'le guac čixjue'ele da' gož Diosen' le'e, perw gonlen tgüje tgüjele cont yogo'le šejni'ichle na' gaclenen le'e. ³² Na' le'e chyixjue'ele bi da' ba gwna Diosen', cheyała' čixjue'elen con baten' naquen güen čixjue'elen. ³³⁻³⁴ Le Diosen' chaclaže' gwsa'le binlo da' chonle caten' chdop chžagle chonxenle' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'. ³⁵ Na' še bi da' chesaclaže' no'ol ca' yesenezde', guac yesenabde' bene' čhegaque' cate' yesyežin ližgaque', le naquen da' yela' zto' še no no'ole güe'e diža' šlac ndop nžagcho.

³⁶ Le gon xbab, gague le'e gocle bene' nechw bene' gwejnilaže' xtiža' Criston', na' bi načo nezechle ca' bene' chesedop chesežag ga yoble chesonxene'ne'. ³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw čhe Diosen' le'e len bichle da' chonle, nachen' cheyała' gacbe'ele da' quinga chzoja' le'e naquen da' non Xancho Criston' mandaw goncho. ³⁸ Na' note'teze bene' bi chejle'e še Xancho Criston' bene' cont bzojw da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw čhe Diosen' le'e cont čixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw čhe Diosen' yeso'e. ⁴⁰ Perw binlo gonle yogo' da' chonle cate' chdop chžagle na' bi gonlen nacteze.

15

Beban Criston' ladjo bene' guaten'

¹ Bene' migw, chaclaža' gonle xbab čhe diža' güen čhe Criston' da' ba be'lena' le'e. Ba bzenagle čhen na' zoachachle chejle'len. ² Na' nezele šjayzoale len Diosen' še soatezle gwzenagle čhe diža' güen čhen'. Na' še bi gwzenagle čhen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bač gwđixjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. ⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. ⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'. ⁶ Beyoža' jayezlo'elagüe' gwdebe gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czla' bale' ba gosate'. ⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸⁻⁹ Bzebte bedyelo'elagüe' neda', zaca'leba' ca' bi' golje cate' biña' žin ža, le cana' bchi bsaca' bene' ca' chesedop chesežag chesonxene' Criston'. Na' da'nan' chacda' bicze zaca' yososi'e neda' postlw. ¹⁰ Perw Diosen' nži'ilaže'de' neda' na' gwleje'nda' zaca' postlw čhe', na' choncha' xšinen' clcl ca' bene' lježa' ca' yezica'chle. Na' nežda' gague chonan' neda', san Diosen' chaclene' neda' cont chonan'. ¹¹ Da'nan' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' čhe Criston' na' can' nac dan' ba chejle'le čhen'.

Yesyeban bene' guat ca'

12 Yogo' neto' chyixjue'eto' beban Criston' ladjo bene' guat ca'. Da'nan' çbixçhen' ža balle bi yesyeban bene' guat ca'? 13 Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. 14 Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejnilaže'lene' še ca'. 15 Ba be'lento' le'e diža' güenlaže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. 16 Le šaca' bi chosbane' bene' ba gosat, lecze bi bosbane' Criston'. 17 Šaca' naquen da' li Diosen' bi bosbane' Criston', bibi zejen da' chejnilaže'chone' na' bi nacho beque'e xtola'chon'. 18 Šaca' naquen da' li bi bosbane' Criston', ba gosebiayi' yogo' bene' ba gosat bene' gosejnilaže' Criston' še ca'. 19 Na' šaca' da' zoacho lez šjayzoalencho Criston' cate' yeza'cho yežlio nga naquen da' güenlaže', yela' zi' xench chac che chio' chejni'ilaže'cho Criston' clel ca' che yezica'chle bene' še ca'.

20 Perw na' da' li Diosen' bosbane' Criston' ladjo bene' guat ca', na' da'nan' nezecho žin ža yosbane' yezica'chle bene' chesejnilaže'ne' še ba gosate'. 21 Gwxex yela' goten' yežlio nga da' gwzoa' to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat. 22 Le gwxxe yela' goten' cate' Adanna' bene' da' malen', da'nan' yogo' benachen' chesate'. Nach Criston' bene' cont yogo' bene' yesaque' txen len le' yesenite' toli tocane. 23 To tocho yebancho ladjo bene' guaten' cont soalencho Criston' con cate' ba bsi'e xnezenna'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. 24 Nach te che yežlio nga. Na' Criston' gwñitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yežožen' Criston' gone' lo na' Xe' Diosen' yogo' da' nlane' chnabi'e na' yogo' non' chnabi'e. 25 Diosen' bžie' bia' zoa Criston' chnabia'che' ca' yogo' bene' ca' na' bichle da' ca', na' Diosen' gone' cont žin ža cate' gwlej gwšoše' bene' ca' na' bichle da' ca' bi cheson txen len le'. 26 Na' cate' yejož gwlej gwšoše' yogo' bichle da' bi chon txen len le', nach gwcuetze' yela' goten'. 27 Diosen' ba nsi'e xnezen' cont yogo' lo da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'. 28 Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' benač na' yogo' angl yesache'ede' Diosen' naque' Xangaque', na' lecze yesache'e da' xigüe', beyixe' na' bichle da' zjade.

29 Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

30 Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. 31 Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. 32 Guac nacho bež znia' ba gwdillena' Efeso nga ga ba gosedabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezccho, le gwxxen' gatcho."

33 Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'." 34 Le yeyon

xbab šagüe' na' cuejyichjle xbab mal dan' chonlen', le balle bina' šejni'ile che Diosen'. Chnia' ca' da' chaclaža' gaquele zto' che da' malen' chonle.

Cuerp che bene' yesyeban ladjo bene' guat ca'

³⁵ Balle nabljale nac gac yesyeban bene' guat ca' o nac gac cuerp chegaquen' cate' yesyebane'. ³⁶ Nchoj yichjlažda' olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyała' yexinjen cont la' yel dao'. ³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' čhen. ³⁸ Diosen' chone' cont chla' yag dao' dan' chazchon', bi chla' yag yoble da' bi gozcho. ³⁹ Na' gague toze ca nac cuerp che chio' benač len cuerp che be žia tap ni'a na'ba'. Nža' cuerp che benač na' nža' cuerp che be žia xil, na' lecze nža' cuerp che be chesaš lo' nis. ⁴⁰ Nža' cuerp che benač, nža' cuerp che beyixe', na' nža' da' ca' chle'echo le'e yaban', gwbiž, bio' na' beljw ca'. Na' nža' yela' xdan che gwbiž, bio' na' beljw ca', na' nža' yela' xdan che benač na' che beyixe' ca' chesaš lo' yežlion'. ⁴¹ Na' nža' ca chseni' gwbiž, nža' ca chseni' bio' na' lecze nža' ca chseni' to to beljw ca'. ⁴² Nach cate' yesyeban bene' ca' ba gosat, cuerp chegaquen' bi gaquen ca cuerp da' gosape' cate' gosebane'. Cuerp chegaque' da' bosocuaše' lo' ban' ba beyožon', perw cuerp cobe chegaquen' gague da' te čhen. ⁴³ Bibi zaca' cuerp che bene' guat ca', zjanaquen cuerp šen, na' cheyožon', da'nan' chcuša'e'chon lo' ba. Perw bene' gosejnilaže' Criston', cate' yesyebane' ladjo bene' guat ca' yesyeyac cuerp chegaque' da' güen juisyw na' da' gual. ⁴⁴ Cuerp chegaquen' zjanaquen de bela' čhen cate' chosocuašen' perw cate' yesyebane' ladjo bene' guat ca' nža' ba zjanac cuerp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' čhen, na' lecze cheyała' nezecho žin ža cate' yeyaquen da' cobe na' gonen con can' ža Spiritw che Diosen'.

⁴⁵ Xtiža' Diosen' nyojen žan Adán bene' goc bene' nechw gwzoe' gwbane' cani'. Na' na'a zoa Criston' zaca'lebde' ca Adánna', le Criston' chone' yela' mban toli tocañe. ⁴⁶ Na'a cuerp chechon' bi naquen to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. ⁴⁷ Diosen' bene' bene' nechw len bište yo cont gwzoe' lo yežlio nga, perw xancho Criston' ben' zaca'lebde' ca bene' nechon' ze'e yaba. ⁴⁸ Na' chio' benač, cuerp chechon' naquen ca cuerp che bene' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' bene' za' yaba. ⁴⁹ Na'a šlac zoacho yežlion' naccho ca bene' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

⁵⁰ Bene' migw, chnia' le'e bi gac yežincho yaba gan' zoa Diosen' len cuerp chechon' de bela' čhen. Da' te che cuerp checho quinga, da'nan' bi gac šjayzoalenchon len Diosen' toli tocañe. ⁵¹ Chnia' le'e to da' nono gwneze cani', gague yogo'chon' gatcho, perw yogo'chon' yeža' can' gaccho. ⁵² Bedao'nez, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' bene' ba gosat bene' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. ⁵³ Le cuerp chechon' da' mbancho yežlio nga da' te čhen. Naquen da' chat, na' cheyała' yayaquen da' cobe da' bi gat, da' bi gožo' na' da' bi te che. ⁵⁴ Cate' ba beyac cuerp chechon' da' cobe da' bi gat na' bi te čhen, cana' ba goc can' nyoj Xtiža' Diosen' gan' žan: "Diosen'

gwzoede' bcueze' yela' goten', na' chone' yela' mban toli tocane. ⁵⁵ Bich soe yela' goten' chio' da' yoble. Gwbatech gatcho šo'cho lo' ba." ⁵⁶ De yela' got checho na'a le chio' benach choncho da' mal. Da' neze chio' benach can' ža ley che Diosen' cheyała' goncho na' bi chzenagcho gonchon, da' nan' chnabia' da' malen' chio'. ⁵⁷ ChoꝯcLen Diosen' gwsele' Xancho Jesucriston' beque'e xtoła' chio' chejnilaže' chone'. Da' nan' bi soe yela' goten' chio', san de yela' mban toli tocane checho.

⁵⁸ Da' nan' bene' migw chia', chacda' le'e na' chneyoeda' le'e le soachach len toze xbab. Na' le gonchgua xšin Xanchon', le nezczecho cate' choncho xšinen' chejnilaže' chone', gague da' chondadzchon'.

16

Beñe' Corinto chosotobe' mechw cont yesaclene' bene' Jerusalén ca'

¹ Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusalénna'. Le gon can' bena' mandadw yeson bene' ca' chesedop chesežag chesonxene' Criston' to to yež da' zjachi' distritw Galacia. ² Yogo' ža dmigw to tole cheyała' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e. ³ Nach cate' la'a gan' zoalen', cana' gwzoja' cart da' yesoꝯe' bene' ca' chaclaže'le šjasesane' xmechwlen' Jerusalénna'. ⁴ Na' še chonen byen ša'a, cuina' chi'a legaque' Jerusalénna'.

Pablon' chone' xbab šjane'e bene' Corinto ca'

⁵ Na' yida' gan' zoale cate' yeyož yedia' Macedonia, le cheyała' šjajna'a bene' lježcho ca' nita' na'. ⁶ Na' chacda' yega'anlena' le'e do tbio' do chop bio' o še yega'ana' doxen tiemp zag, nach gaclenle neda' cate' yeza' ša'a gate'teze ša'a. ⁷ Bi chaclaža' yedena'a le'e na'a, le con teza' še ba za'a, na' chaclaža' soa' sša len le'e cate' yida' še Xancho Diosen' goñšque' latje. ⁸ Chaclaža' yega'ana' Efeso nga žinch ža gala' lni dan' že' Pentecostés. ⁹ Le bene' zan že' nga bene' chesaclaže' yosozenague' che Criston' na' lecze že' bene' zan bene' bi chesaclaže' chixjue'eda' xtižen'.

¹⁰ Na' še la' Timoteon' gan' zoalen', le gwlebe' na' le gwzenag che' cont bi žebe' gwsed gwlo'ede' le'e, le can' chona' xšin Xancho Diosen', lecz can' chonen'. ¹¹ Ne tole bi cheyała' gonle xbab bibi zaca' da' chsed chlo'ede', san soale güen len le' na' gaclenle' cate' yeze'e cont yeyede' gan' zoa' nga to šagüe' to güen, le chbeza'ne' txen len yezica'chle bene' lježcho ca'.

¹² Na' ca' nac Apolosen', gota'yoeda'ne' lecze šejlene' Timoteon' gan' zoalen', txen len yezica'chle bene' lježcho ca' yesaclene' le'. Perw bi chaclaže' šeje' na'a, na' šeje' cate' soe' to latje.

Yeto chope diža' da' choe'len Pablon' bene' Corinto ca'

¹³ Le soa le na' can' chonlen', na' le soa len toze xbab šejnilaže'le Criston'. Bi žeble, san le soachach gonle can' chazlaže' Diosen'. ¹⁴ Na' le gague lježle bite'teze da' chonle.

¹⁵ Bene' migw chia', nezele bene' ca' že' liž Estéfanos gosaque' bene' nechw gosejnilaže' Criston' distritw Acayan' na' ba gosaclenchgüe' yezica'chle bene' lježcho bene' chesejnilaže'ne'. ¹⁶ Da' nan' chneyoeda' le gwzenag chegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'. ¹⁷ Chebeda' ba besela' Estéfanos,

Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. ¹⁸ Ba gosone' cont beyaclaža' can' ba gosoncze' len le'e cana', na' da'nana' cheyala' güe'cho yela' choxc̄clen c̄hegaque' c̄he dan' ba gosonen'.

¹⁹ Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox. ²⁰ Nach yogo' bene' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gachia' chaque lježle.

²¹ Cuincza' neda' Pablo chzoja' late' dao' le'e cart nga chguapa' le'e tiox.

²² Na' še ne' nchixe balle bi chaquele Xancho Jesucriston', Diosen' gone' cont cuiaye'e toli tocanē. Xancho Jesucristo, yidšco' da' yoble.

²³ Gaclenšca Xancho Jesucriston' le'e. ²⁴ Chacda' yogo'le da' naccho txen chejnilaže'cho Cristo Jesúsēn'. Da' na'zen' žia' le'e.

CART GWCHOPE DAN' BZOJ POSTLW SAN PABLO CHE BENE' CA' ŽE' CORINTO

Postlw Pablo chzoje' bene' chesonxen Jesucriston' ciuda Corinto

¹ Neda' Pablo naca' postlw che Jesucriston', le can' chaclaže' Diosen'. Chzoja' cart nga che le'e chdop chžagle chonxenle Diosen' lo ciuda Corinto, na' che note'tezechle bene' že' doxen distritw Acaya bene' ba gwlej Diosen' cont zjanaque' lo ne'e. Neda' len bene' migw checho Timoteo chguapto' le'e tiox. ² Na' chnabeto' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda' olen'.

Da' ca' gwdi gwxaca' Pablon'

³ Cheyala' soacho gonxnencho Diosen', le naque' Xa Xancho Jesucriston', na' Jesucriston' lecze chonxene' le'. Xacho Diosen' cheyaše' cheži'ilaže'de' chio' na' len' cheyoe'xene' chio' cate' chac bi da' chac checho. ⁴ Ba cheyoe'xene' neto' len yogo' da' chzaca'zi'to' cont chac cheyoe'xento' yezica'chle bene' cate' bi da' cheseyi chesezaque'. Can' cheyoe'xen Diosen' neto', lecze can' cheyoe'xento' bene'. ⁵ Leca chyi chzaca'to' can' gwdi gwxaca' Criston', na' ca'cze leca cheyoe'xen Diosen' neto' da' chejnilaže'to' Criston'. ⁶ Da' zan da' chac cheto' da' chsed chlo'eto' xtiza' Diosen', perw zaca'czen' cont cheyoe'xento' le'e len da' chzaca'zi'le na' chaclenen le'e cont šjazyoale len Diosen'. Na' cheyoe'xen Diosen' neto' cate' bin' chac cheto', cont lecze neto' cheyoe'xento' le'e len bi da' chac chele. Na' cheyoe'xento' le'e cont chzoele cate' chzaca'zi'le can' lecze chzaca'zi' neto'. ⁷ Chbezto' gwyo gwčhejle da' chac chele, le nezeto' caten' chzaca'zi'le can' chzaca'zi' neto', Diosen' lecze cheyoe'xene' le'e can' cheyoe'xene' neto'.

⁸ Bene' migw, chaclaža' nezele can' gwdi gwxaca'to' caten' gwzoato' distritw Asia. Gwdi gwxaca'chguato', con bich bi goc gonto' na' bento' xbab gatzeto'. ⁹ Da' li bento' xbab lo' yichjlažda'oto' ba za' yela' goten'. Na' goc cheto' ca' cont gocbe'eto' bi soeczeto' gwyo gwčhejto' dan' chzaca'zi'ton' san cheyala' šejnilaže'to' Diosen' cont gone' chač laže'to', Dios ben' chosban bene' guat ca'. ¹⁰ Na' caten' bento' xbab gatzeto' catec da' gosonde' neto', Diosen' bosle' neto' cont bi gotto' na' ne' choslacze' neto' na'a. Na' zoato' lez yoslache' neto' bate'teze. ¹¹ Zoato' lez yoslacze' neto' con še gaclenle neto' yoł güizlene' cheto'. Na' še zanle gonle ca', nach lecze zanle güe'le yela' choxclen che' cate' ba goclene' neto'.

Pablon' gwžede' šje' ciuda Corinto

¹² Chbeda' choa' diža' can' chonto', le nezeto' lo' lažda'oto' chonto' güen len le'e do yichj do laže'to' na' lecze len note'tezechle bene'. Bi nacho chonto' güen neche da' nacto' bene' sina', san da' nži'ilaže' Diosen' neto', da'nan' chaclene' neto' chonto' güen len yogo'lol bene'. ¹³ Cart quinga chzojto' le'e, bi gonle xbab še naquechle zejen, san šejni'ilen con can' nyojen, na' zoa' lez šejni'ilen binlo. ¹⁴ Na' zoa' lez žin ža cate' gacbe'eyane'le cont yebele güe'le diža' nacle neto' txen, can' ba chache'ele late' dao' na'a. Na' cate' žin ža yid Xancho Jesusen' da' yoble, yebele güe'le diža' nacle neto' txen na' neto' yebeto' güe'to' diža' nacto' le'e txen.

¹⁵ Cana' godca' yedena'a le'e cont da' yechop ni'a soacho txen, le bena' xbab yebele yedena'a le'e. ¹⁶ Goclaža' tia' yedena'a le'e caten' gwy'a Macedonia na' lece goclaža' yedia' gan' zoalna' cate' beza' Macedonian'. Na' godca' yeyoža' gaclenle neda' yeya'a Judean'. ¹⁷ Do laža' godca' gona' ca', gague chona' con can' žan chia' ca cheson bał bene' bi chesejnilaže' Diosen', to chesene' yesone' to da' yesone' na' to chesene' bi yesonen'. ¹⁸ Ca Diosen' chone' con can' že', lece ca' neto' chnato' do laže'to' cate' chnato' to da' gonto'. ¹⁹ Na' lece Jesucriston' bene' naque' Xi'in Diosen', toz can' naque' bate'teze, na' nac da' li yogo' can' gwnen', con can' gwdixjue'eto' xtizen' len le'e, neda', Silvano na' Timoteo. ²⁰ Na' yogo' da' güen da' ba gwna Diosen' gone', nezecho gonon' da' gwsele' Jesucriston'. Da'n'an' len yela' chaclen che Jesucriston' chonxencho Diosen' che'chone': "Gacšca ca'." ²¹ Na' Diosen' chone' cont neto' na' le'e zoachachcho chejnilaže'cho Criston'. Na' bene' chio' Spiritw che'na' cont gac goncho xšinen'. ²² Na' lece zoa Spiriton' lo' yichjlažda'ochon' cont nezecho Diosen' ba gwque'e chio' ca xi'ine' na' cont nezecho yogo' da' güen da' gwne' gone', žin ža cate' gonon'.

²³ Da' biña' yida' da' yoble Corinto gan' zoalen' yedena'a le'e can' gwnia' gona', biña' yida' cont bi yedetila' le'e che da' malen' chonle. Diosen' nombi'e yichjlažda'ogua' na' nezde' choa' diža' li chnia' ca'. ²⁴ Nezeto' gague neto' ye'to' le'e da' ni da' na' šejle'le. Ba zoachachle chejnilaže'le Criston', na' neto' con chaclento' le'e cont soachle mbalazch.

2

¹ Ca' goquen' bechoglaža' bi yedena'a le'e, le goche'eda' šaca' bedena'a le'e gocyäše'cho. ² Na' šaca' bena' cont gocyäše'le, nono zoa no yeyon cont yezoa' mbalaz, le ba bena' cont gocyäše'laže'le še ca'. ³ Bzoja' carten' ca' cont cate' yida' gan' zoalna' bich gonle da' mal da' gonon gacyäše'da', le cheyala' gonle cont yebeda'. Na' zoa' lez lece mbalaz soa le'e cate' gonle soa' neda' mbalaz. ⁴ Bzoja' le'e do chegüine'laža', da' gwzoachgua' gocyäše'da' che dan' chonlen', na' gwchežchgua' chele. Na' da' bzoja' carten' ca', gague gwzelaža' yegüine'le, san gwzelaža' gache'ele leca chacda' le'e.

Gwne' cheyala' yesyezi'xene' che bene' ben da' malen'

⁵ Da' li gocyäše'da' can' ben bena' ben da' malen', perw gague neda'zen' gocyäše'da'. Yogo'czle ba gocyäše'laže'le late' güeje can' ba goquen'. Chnia' gocyäše'le late' güeje cont bi nia' benche' chio' zi'ch ca cheyala' nia'. ⁶ Ndop nžagle txen gwchoglaole castigw che', na' da' na'zen' cheyala' si'e. ⁷ Bich güe'ne' castigw, san yezi'xenle che' na' le gon chach laže' cont soede' yela' chacyäše'laže' čhen' na' bi cuejyichje' Diosen'. ⁸ Da'n'an' chneyoeda' le'e le gon cont gache'ede' chaquelene'. ⁹ Ba bzoja' le'e cana' cont gwnezda' naquen' chonle, še chzenagle chia' len yogo' dan' gwnia' gonle. ¹⁰ Na' na'a chaclaža' nezele note'teze bene' chezi'xenle che', lece neda' chezi'xena' che'. Na' cate' chezi'xena' che bene', še zoa da' cheyala' yezi'xena', chezi'xenan' lao Criston', na' ba bezi'xena' che bena' cont chaclena' le'e. ¹¹ Na' chezi'xencho che bene' cont Satanás dan' chnabia' da' xigüe' ca' bi soen gonon chio' gan, le nezecho can' chaclažen' siye'czen chio'.

Pablon' goclaže' yežague' Titon'

¹² Cate' bžina' Troas gan' gwdixjue'eda' diža' güen che Criston', nachbia' Diosen' ba bene' cont bene' že' na' gosaclaže' bosozenague'. ¹³ Perw

benchgua' xbab che bene' migw checho Titon' da' bi bžine' na'. Da'nan' goša' bene' ca': "Nayežagcho", na' beza' beya'a distritw Macedonian'.

Zoacho mbalaz da' nombia'cho Criston'

¹⁴ Choxc̄len Diosen', none' cont Jesucriston' ba bebeje' chio' lo' na' gwxiyen' na' mbalaz cheche'e chio' soacho len le'. Na' gate'teze zoacho, Diosen' chone' cont chesacbe'e bene' naquen da' güen juisyw nombia'cho Criston'. ¹⁵ Diosen' chebede' choncho cont chesacbe'e bene' naquen da' güen juisyw yesejnilaže' Criston'. Na' bale' chesejnilaže'ne' na' de yela' mban chegaque' toli tocaṇe, na' yebale' bi chesejnilaže'ne' na' chesebiaye'e. ¹⁶ Na' bene' ca' chesebiayi' bi chesyebede' can' chonchon', le che'chone' yesebiaye'e. Na' bene' chesejnilaže'ne' chesyebede', le ba goclenchone' cont ba de yela' mban chegaque' toli tocaṇe. Perw chio' bi chaccho to gualazcho gwlo'echo bene' ca' güenna' naquen yesejnilaže' Criston'. ¹⁷ Bene' zan chosoše'e diža' da' cheso'e che Diosen' cont chesyebe bene' len xtiža'gaque' na' chosonežjue' legaque' mechw. Neto' bi chonto' ca', san do laže'to' choe'to' diža' lao Diosen' da' nacto' Criston' txen, le Diosen' gwsele' neto' choe'to' xtižen'.

3

Da' cobe da' gwna Diosen' gone' cont gaclene' beṇačhen'

¹ Bi gonle xbab chonxen cuinto' choe'to' diža' quinga. Nezele chonto' xšin Diosen' do laže'to', na' bi chyažžen goxe'to' cart cont nezele nac nacto', na' neca chyažžen gwzojle cart da' goxe'to' cate' šejto' ga yoble. ² Chaqueto' le'e da' gwđixjue'eto' xtiža' Criston' len le'e cont gwyejnilaže'lene'. Na' yogo'ze bene' guac yesele'ede' can' ba boša' yichjlažda'olen' na' guac yesenezde' can' chonto' xšin Diosen'. ³ Gwyejnilaže'le Criston' caten' be'lento' le'e xtižen', na' Spiritw che Diosen' bocoben yichjlažda'olen'. Na' da' nacbia' becobe yichjlažda'olen' zaca'chen ca no cart da' nyoj to le'e yiš o ca ley che Diosen' da' nyoj to le'e yej.

⁴ Cheyaxjeto' žato' ca' le Criston' zoe' chaclene' neto' cont nezeto' chonto' can' chazlaže' Diosen'. ⁵ Nezeto' bi chac bi gonto' to gualazto', na' nezeto' gague neche bi da' ba ben neto' bchoj xšin Diosen' güen, le Diosen' chone' cont chac bite'teze da' chac. ⁶ Na' Diosen' ba bene' cont chac chyixjue'eto' da' coben' da' gwne' gone' gaclene' chio' beṇač. Na' da' coben' bi naquen ca ley che' dan' byoj cani' chzejni'in chio' beṇač cuiayi'cho yela' güen da' mal chechon', san na'a Spiritw čhen' chonen yela' mban toli tocaṇe che chio' chejnilaže'chone'.

⁷ Cate' Diosen' bnežjue' da' Moisésen' ley che' dan' byoj le'e yej ta'a ca', bene' cont bene' Israel ca' gosacbe'ede' ley čhen' naquen da' zaca'. Na' cana' catec goctitechgua cho'alao Moisésen', bi goc yesena' bene' Israel ca' cho'alagüen', la'czla' gwdechle bega'a yela' chactiten' šolaže'. Na' ley nan' con bzejni'in beṇačhen' cuiayi'cho yela' güen da' mal chechon'. ⁸ Da'nan' nezecho leca zaca'ch da' chon Spiritw che Diosen' na'a cont gata' yela' mban checho toli tocaṇe. ⁹ Diosen' blo'e yela' zaca' che ley čhen' la'czla' bzejni'in chio' beṇač si'cho castigw da' bi choncho can' žanna'. Na' zaca'ch xtiža' Diosen' da' de na'a da' chzejni'in cheyone' chio' bene' güen. ¹⁰ Da' naquen da' zaca'chgua cani', bičh naquen da' zaca' na'a, le ba de yeto da' zaca'chgua da' xench. ¹¹ Na' da' blo'e Diosen' yela' zaca' che da' ben žin šložze cani', cheyała' gache'echo leca da' xench zaca' da' coben' da' bi te che.

¹² Na' da' nezeto' gague da' te che da' cobe da' ba gwđixjw Diosen' cont chaclene' beṇačhen', da'nan' bi chedi'ito' chyixjue'eto' xtižen' sin cbi chžebto'.

¹³ Da' Moisésen' bcuaše' cho'alagüen' len to lache' bxin cont bene' Israel ca'

bi besele'ede' chenit late' güeje yela' chactit che cho'alagüen'. Perw na'a gague hcuaše'to' yela' zaca' che da' chon Diosen'. ¹⁴ Beñe' Israel gualaž četo' ca' bi gosejni'ide', ne ža na'aža bi chesezejni'ide' cate' chosolabe' ley dan' byoj cani' gan' nyoj da' ca' gwna Diosen' gone' gaclene' legaque'. Con beñe' ca' chesejnilaže' Criston' chesejni'ide' bi zejen. ¹⁵ Ža na'aža cate' beñe' Israel gualaž četo' ca' chosolabe' da' ca' bzoj Moisésen', zjanauen ca to da' ngaše' len legaque' yela' bi chejle' čhegaquen'. ¹⁶ Perw note'teze' cate' chesejnilaže' Xancho Criston', da' ca' zjanyoj bich chesaquen ca to da' ngaše' len legaque'. ¹⁷ Xancho Criston' naque' toze len Spiritw che Diosen'. Na' cate' ba zoa Spiritw che Xancho'n lo' yichjlaždao' beñe', bač zoe' binlo len Diosen'. ¹⁸ Yogo' chio' chejnilaže'cho Criston', yela' zaca' juisyw che Xancho Criston' bich ngašen' len chio', na' ba zejeh cheyaquechcho beñe' güen can' nac le', le zoa Spiritw che Xancho Criston' lo' lažda'ochon' chocoben xbab chechon'.

4

¹ Diosen' beyaše' beži'ilaže'de' neto' na' gwleje' neto' cont chyixjue'eto' xtižen'. Da'nan' bi cheche'eto' chyixjue'eton'. ² Na' bibi chonto' bagaše'ze ca no da' nac da' yela' zto'. Bi chon'eto' beñe' na' neca choša'to' xtiža' Diosen' cont yesyebe beñe' chosozenag xtiža'ton'. San chle'ecze Diosen' chyixjue'eto' xtižen' con can' naquen cont yogo' beñe' yesene xtiža'ton' yesenezde' lo' lažda'ogaquen' choe'to' diža' li. ³ Con beñe' ca' ba zjambiyi' yela' bi chejle' čhegaquen', legacze' bi chesejni'ide' diža' güen dan' choe'lento' legaque'. ⁴ Le beñe' bi chesejle' xtiža' Diosen' chosozenague' che Satanás dan' chnabia' da' xigüe' ca' latje da' yosozenague' che Diosen', na' Satanásen' chonen cont nčhol' yichjlažda'ogaquen'. Da'nan' diža' güen che Criston' bi chsenin' lo' yichjlažda'ogaquen' ca to be'ni' cont yesenezde' Criston' naque' beñe' zaca' juisyw. Cayane' nac yichjlaždao' Diosen' nac yichjlaždao' Criston', na' toz can' chesone'. ⁵ Na' ca' nac diža' da' chyixjue'eto', chyixjue'eton' gague cont gwzenagle che neto', san cont gwzenagle che Jesucriston' ben' naque' Xancho. Na' da' chaqueto' Jesucriston', zoato' chonto' bite'teze da' chaclenen le'e. ⁶ Na' Dios ben' gwne' gata' be'ni' yežlio nga gan' goc čhol', ba gwlo'e be'ni' čhen' lo' yichjlažda'ochon' cont nombia'cho Jesucriston' ben' nac beñe' zaca' juisyw, na' cate' ba nombia'chone' chache'echo can' nac yela' beñe' zaca' che Diosen'.

Pablo cho'e xtiža' Diosen' lagüe' da' chejnilaže'ne'

⁷ Cuerp čhecho quinga da' chesat zjazaca'leben ca to che'e nis da' naquen de gona'. Perw Diosen' ba gwlo'e be'ni' čhen' lo' yichjlažda'ochon' na'a šlac ne' mbancho len cuerp čhecho quinga cont gache'echo bibi chac goncho še bi gone' yela' guac xen čhen' cont gac bi da' goncho. ⁸ Na' neto', da' zan da' čyi chzaca'to', perw bi chbejyichjto' xšin Diosen'. Zan ni'a bi chežellaže'to' nacle gonto', perw nezeto' Diosen' chaclene' neto'. ⁹ Chosolagšibe' neto', perw Diosen' bi chbejyichje' neto'. Chosoči chososaque' neto', perw Diosen' bi cho'e latje yesote' neto'. ¹⁰ Gate'teze chejto', con yogo' ni'a chosoči chososaca' beñe' neto' na' chesaclaže' yesote' neto' can' gosote' Jesúsen'. Na' Diosen' cho'e latje chac četo' ca' cont nacbia' zoacze Jesúsen' chaclene' neto' šlac mbanto' len cuerp četo' quinga. ¹¹ Na' šlac ne' mbanto', yogo' ža nita'cze beñe' chesaclaže' yesote' neto' lagüe' da' chyixjue'eto' xtiža' Jesúsen'. Na' chac četo' ca' cont nacbia' zoacze Jesúsen' chaclene' neto' šlac mbanto' len cuerp

chetó' quinga da' yesat. ¹² Can' chac, tza tza chesaclaže' yesote' neto', san le'e ba de yela' mban chele toli tocane.

¹³ Xtiža' Diosen' nyojen žan: "Chejnilaža' Diosen' na' da'nan' choa' diža' che'." Na' ca ben' bzoj da'na' gweyjnilaže' Diosen', ca'czen' chejnilaže'to'ne' na' da'nan' choe'to' xtižen'. ¹⁴ Le nezeto' Dios ben' bosban Xancho Jesúsen' ladjó bene' guat ca' lecze žin ža yosbane' chio' še ba gotcho, na' neto' txen len le'e šjayzoacho gan' zoe'na'. ¹⁵ Neche le'e bžaglaoto' yogo'lo' da' ba goc cheto'. Le chaclaže'to' gac zanco gaclenchgua Diosen' chio' cont šejnilaže'cho Xancho Jesúsen', na' lecze gac zanco güe'cho yela' choxcen che' catec bene' zacan' naque'.

¹⁶ Da'nan' bi chjaxaque'laže'to'. La'czla' tza tza zej chaxo'ch cuerp cheto' quinga, lecze tza tza Diosen' chocobche' yichjlažda'oto'. ¹⁷ Yob te che bite'teze da' dao' da' chžaglaoch yezlio nga. Na' da' ca' chyi chzaca'cho chesaclenen chio' cont soacho mbalaz juisyoch cate' šjayzoacho len Diosen' toli tocane, na' lenna' da' zaca'ch ca bite'tezchle. ¹⁸ Nachen' bi chi' yichjcho che da' chle'echo yezlio nga, san chi' yichjcho che da' bi chle'echo. Le yesede che da' ca' zjade yezlio nga da' chle'echo, na' da' ca' bi chle'echo, gague da' yesede chegaquen, nita'czen toli tocane.

5

¹ Cuerp chechon' zaca'leben ca to yo'o da' bi chzibia'. Na' nezecho še ba byinjen, Diosen' ba none' to yo'o güen checho yaban' da' soa toli tocane; na' lenna' gague naquen to da' ben benach. ² Na' šlac ne' zoacho mbancho yezlio nga, chbežyaše'cho lo' lažda'ocho zelaže'chguacho šjayzoacho lo' yo'o da' non Diosen' checho yaban'. ³ Chona' xbab cuerp cobe da' gone' zaca'leben ca to xacho da' chyažjen chazcho cate' yezincho yaba. ⁴ Da' li chio' ne' chžaglaoch len cuerp checho quinga chbežyaše'cho lo' lažda'ochon'. Gague da' chaclaže'cho gatcho, san chaclaže'cho yeža' cuerp checho quinga da' te čhen len to da' soa toli tocane. ⁵ Na' Diosen' gwleje' chio' cont šjayzoacho len le' na' gwsele' Spiritw čhen' zoan lo' yichjlažda'ochon' cont nezecho dech da' gone' checho.

⁶ Da'nan' bi chaczejlaže'cho, le nezecho šlac mbancho len cuerp checho quinga biña' šjayzoacho len Xancho Criston'. ⁷ Na' la'czla' biña' le'echo da' ca' gone' checho, zoacho chejnilaže'chone'. ⁸ Na' da'nan' bi chaczejlaže'cho, le chaclaže'cho cuejyichjcho cuerp checho quinga cont šjayzoacho len Xancho Criston'. ⁹ Nachen' zoacho choncho da' chazlaže' cont yebede' chio' šlac ne' mbancho na' cate' ba gotcho. ¹⁰ Le to tocho cheyala' techo lao Criston' gan' chone' yela' justisen' cont chogbi'en checho na' gone' soacho mbalaz o saca'zi'cho con can' ba bencho šlac mbancho, še bencho da' güen o da' mal.

Benachen' guac yesenite' binlo len Diosen'

¹¹ Na' dan' nezeto' yogo'cho yodecho cuent lao Xancho Criston' che yogo'lo' da' ba bencho, da'nan' chneyoeto' bene' yosozenague' che'. Diosen' nezde' do laže'to' chneyoeto' bene' yosozenague' che', na' zoa' lez lecze le'e chacbe'ele lo' lažda'olen' zoato' chonton' do laže'to'. ¹² Bi načo chonxen cuinto' da' yoble dan' chnia' ca', san chnia' ca' cont yebele can' chonton' na' nezele naquen' yoži'ile xtiža' bene' ca' chesenlagüe' cheto'. Bene' ca' chesa'laže' da' ba zjansede' na' da' zjanaque' no zjanaque'. Bibi xbab chesone' che can' nac yichjlažda'ogaquen'. ¹³ Še chaquele chactontto' can' ba benton', le gon xbab bento' con can' gwna Diosen'. Na' še chaquele zoašagüe'cze yichjlažda'oto', le

gon xbab chonto' bi da' chonto' cont chaclento' le'e. ¹⁴ Leca chaque Criston' chio' na' da'nan' chonto' xšinen'. Na' nezecho toz Criston' bnežjw cuine' gote' neche yogo'cho, na' da' naccho txen len le' guac nacho yogo'cho ba gotcho len le'. ¹⁵ Bnežjw cuine' gote' neche yogo' chio' beñaçh, cont soa cuezcho goncho can' chazlaže' na' bich soa cuezcho goncho con ca žan checho. Gote' na' bebane' ladjo beñe' guaten' neche chio'. ¹⁶ Neto' cate' biña' šejnilaže'to' Criston' goqueto' bibi zaque', le bento' xbab zaca' beñe' še no naque' lo yežlio nga o še bi da' de che'. Perw na'a bich chonto' xbaben' ca' che Criston' o che note'teze beñe'. ¹⁷ Na' note'tezcho še naccho Criston' txen, Diosen' ba bocobe' yichjlažda'ochon'. Na' bich chebecho da' ca' bebecho cana' na' bich choncho can' bencho cana'. Zoacho ca beñe' cobe.

¹⁸ Diosen' bozoe' chio' binlo len le' na' bene' cont beyaccho ca beñe' cobe cate' gwyejnilaže'cho Criston'. Na' gwlo'e lo na'cho ye'cho beñe' can' yesenite' binlo len Diosen'. ¹⁹ Ye'cho legaque' Diosen' gwsele' Criston' cont note'teze beñe' yesejnilaže' le' yesenite' binlo len Diosen', na' Diosen' bich gone' cuent che da' xinj dan' ba gosone'. Can' cheyała' ye'cho beñe' cont yesenite' binlo len Diosen'. ²⁰ Criston' gwsele' chio' ca cuine' na' Diosen' chaclaže' neyoecho beñe' ca cuince' Criston' chneyoede' legaque', ye'chone': "Le soa binlo len Diosen'." ²¹ Criston' bibi da' mal bene'. Perw na' Diosen' bene' cont Criston' gwxcaca'zi'e neche xtoła'chon' cont none' chio' beñe' güen da' chejnilaže'chone'.

6

¹ Neto' chonto' xšin Diosen' txen len le'. Da'nan' chneyoeto' le'e, le gon can' chazlaže' Diosen' cont gwlo'ele naquen to da' zaca'chgua da' beyaše' beži'ilaže'de' chio'. ² Nyoj can' gwne':

Cate' bžin ža goc da' bžia' bia', cana' bzenaga' chio'.

Na' cate' bžin ža benan', cana'chen' goclena' le'.

Na' dan' nyojen ca' zejen na'a baçh bžin žan' chaclen Diosen' beñaçhen', le ža na'aža chnežjue' yeła' mban toli tocañe che beñe' chesejnilaže' Jesucriston'.

³ Bi chonto' bite'teze da' gwžon cont bene' bi yesejnilaže'ne', le chaclaže'to' bibi gata' da' yesenelagüe beñe' che xšin Diosen' da' chonto'. ⁴ Da'nan' bite'teze da' chonto' chlo'eto' chonto' xšin Diosen' ca cheyała'. Chyo chçejto' cate' chosoçi chososaca' beñe' neto', cate' chzaca'zi' chzaca'yaše'to', na' cate' za'ac bichle da' mal len neto'. ⁵ Zoa cate' goseyine' neto', cate' goseyixjue' neto' ližya, na' cate' gosebeque' žaš che xtiža'ton'. Zan las bento' žin gual, na' gwlejto' bišgal na' gwbił gwdonto'. ⁶ Na' da' chi' yichjto' chonto' xšin Diosen' can' chazlažen', bitw bi da' yeła' zto' chonto'. Chzejni'ito' beñe' len yeła' chejni'i che Diosen', napt'o yeła' chxenlaže' len yogo'lol beñe' na' chonto' güen len yogo'lele'. Chonto' con can' chzejni'i Spiritw che Diosen' neto', na' do laže'to' chaqueto' yogo'lol beñe'. ⁷ Zoato' chzejni'ito' beñe' diža' li, na' chonto' yogo'lol da' chonto' len yeła' guac che Diosen'. Na' da' zoato' chonto' da' zej to' licha, chaclenen cont soeto' tillento' da' malen' na' cont bi gwzenagto' che gwxiyen'. ⁸ Zoato' chonto' xšin Diosen' can' chazlaže' cate' chesonxen beñe' neto' na' cate' chesegue'ede' neto', cate' chesene' güen çheto' na' cate' chesene' mal. Choeto' diža' li, cate' beñe' chesejle'e çheto' na' cate' beñe' chesacde' chonlaže'to'. ⁹ Bał beñe' bi chesejle'e chonto' da' zaca', perw yebale' zjañezde' chonto' da' zaca'. Zan las chonto' xbab gatzto', perw ñe' mbanto'. Na' la'czla' yogo' da' ca' chac çheto', biña' yesote' neto'. ¹⁰ Da' zan da' chac cont gacyaše'to', perw chbeto' lo' lažda'oton'. Nga'anyaše'to', perw chonto' cont

beñe' zan nite' mbalaz. Na' la'czla' bibi de çheto', yogo'loł bi da' de naquen çheto' da' nacto' Criston' txen.

¹¹ Le'e bene' Corinto, baçh be'lento' le'e yogo' diža' da' yo'o lo' lažda'oton', le chacchgüeto' le'e. ¹² Nži'ilaže'to' le'e, perw le'e bitec nži'ilaže'le neto'. ¹³ Chata'yoeda' le'e ca chon to bene' len xi'ine', le gaque neda' ca chacda' le'e.

Spiritw çhe Diosen' zoan lo' yichjlaždao' chio' chejnilaže'chone'

¹⁴ Bi cheyała' gaccho txen len bene' bi chesejnilaže' Criston'. Še Diosen' ba none' chio' bene' güen len le', bich gac goncho txen len bene' cheson da' malen'. Chio' yo'o be'ni' che Criston' lo' yichjlažda'ochon' bi cheyała' goncho txen len bene' bi yo'o be'ni' çhen' lo' yichjlažda'ogaque'. ¹⁵ Criston' bi chac gone' txen len Satanás dan' chnabia' da' xigüe' ca', na' ca'cze bene' chejnilaže' Criston' bi cheyała' gone' txen len bene' bi chejnilaže' Criston'. ¹⁶ Nezecho bi gac še' l gua'a lsaca' da' chesejnilaže' bene' lo' yodao' gan' chejnilaže'cho Diosen', na' ca'cze bi chac soa Diosen' len chio' chejnilaže'chone' še zoa bichle da' chejnilaže'cho. Chac can' gwna Diosen': Soa' len legaque' na' talena' legaque'.

Neda' Dios naca' ben' yesejnilaže' na' legaque' yesaque' yež chia'.

¹⁷ Da'n'an' cheyała' goncho can' gwna Xancho Diosen':

Le yechoj len bene' bi chesejnilaže' neda' na' bi gacle toze len legaque'.

Na' bi gonle da' xinjen'.

Nachen' yebeda' soa' len le'e.

¹⁸ Na' gaca' Xale, na' le'e gacle xi'ina'.

Can' ža Xancho Dios ben' nape la'zelagüe yela' guac xen.

7

¹ Le'e bene' chacda', ba nezecho can' gwna Diosen' gone' güen len chio'. Da'n'an' cheyała' cuejyichjcho bich goncho bite'teže da' xinj da' gwchenen cuerp çechon' o yichjlažda'ochon'. Na' cheyała' gapcho Diosen' bala'an gwzenagcho çhe' tža tža na' šejch gaccho bene' güen can' chaclaže'.

Ba bža' xbab çhe bene' Corinto ca'

² Le gaque neto'. Ne tole bibi beneto'. Ne tole bi bzejni'ito' clele, na' ne tole bi gwziye'to'. ³ Gague žia' ca' cont tiła' le'e, le can' ba gwnia' cana', chacda' le'e na'a šlac mbancho na' lecz ca' gacda' le'e cate' ba gota'. ⁴ Nezda' lo' lažda'ogua' gonle can' chazlaže' Diosen', na' chbeda' choe'lena' bene' diža' ca güenna' chonle. Ba beyacxenlaža' da' gwnezda' chonle güen, na' zoa' mbalaz la'czla' da' zan da' chac chia'.

⁵ Cate' bežinto' Macedonian' bibi latje gota' cont yezi'laže'to' len da' gwdi gwxaca'to'. Gwnita' bene' bosošašlene' neto' na' lecze bžebto' lo' yichjlažda'oto' goqueto' nac gacto'. ⁶ Na' Dios ben' cheyoe'xene' bene', beyoe'xene' neto' da' bela' Titon'. ⁷ Na' beyacxenlaže'to' gague da' bele'e na'zen' san da' bedeye'e diža' chebede' can' chonlen'. Na' be'e diža' zelaže'le yedena'to' le'e da' yoble. Na' že' chegüine'le çhe dan' ba goquen' na' chi' yichjle gonle can' gwnian'. Nachen' leca bebechda' gwnezda' da' ca'.

⁸ Chacbe'eda' gocyaše'le can' gwnia' le'e carten' bzoja' le'e. Na' gwdechle betinjda' da' bena' cont gocyaše'le, perw na'a bich chetinjda' da' gwseła' carten', le šložzen' gocyaše'le. ⁹ Chbeda' na'a, le goclenen le'e cont begüine'laže'le çhe da' xinjen' benle na' betinjle çhen, can' goclaze' Diosen'. Na' can' goquen' bi bchojen mal dan' gocyaše'len'. ¹⁰ Cate' ba bencho da' xinj, Diosen' chaclaže' yegüine'cho çhe dan' benchon' na' yetinjechon. Na'

chone' yela' mban toli tocane che chio' chetinje xtoła'chon', na leca mbalazch soacho še ba betinjecho xtoła'chon'. Perw bene' zan cate' chesegüine'laže' bi chesyetinjde' xtoła'gaquen', nach yesebiaye'e. ¹¹ Chebe Diosen' can' begüine'len', le goclenen gwzelaže'le benle can' gwna Diosen'. Goclaže'le gwlo'ele bich chonle txen len ben' ben da' xinjen', san bža'ale che da' xinjen' benen'. Bžeble yedeyena' le'e castigw na' gwzelaže'le gonle ca yebeda'. Nach be'le castigw che ben' ben da' xinjen'. Nacbia' bich bi xtoła'le de can' benina'. ¹² Na' ca nac carten' bzoja' le'e, gague gwche' yichja' che ben' ben da' xinj na'ze, o che ben' bende' ca', san gwche' yichja' che le'e cont gache'ele lao Diosen' ne' chaquele neto' na' ne' chaclaže'le gonle can' che'to' le'e. ¹³ Na' na'a ba beyacxenlaže'to' da' bzenagle cheto'.

Na' lece chebechgüeto' ca mbalaz zoa Titon', le yogo'le benle ga bezoa Titon' binlo len xbab da' yo'o lo' yichjlažda'ogüen'. ¹⁴ Goša' Titon' nezda' gonle güen. Na' bi cheto'eda' da' goša'ne' ca', le ca da' li zjanac yogo' da' chzejni'ito' le'e, lecz ca' da' li bchoj dan' gožto' Titon', na' nacbia' be'to' diža' li. ¹⁵ Na' ba chacchde' le'e cate' chjayze'ede' da' bzenagle che' na' da' bžeble caten' gwnezele benle da' xinjen'. ¹⁶ Da'n'an' chebeda' na' nezda' yeyož gonle can' chazlaže' Diosen'.

8

Besezande' da' gota' chegaque' gosaclene' bene' yoble

¹ Bene' migw, chaclaže'to' nezele can' ba goclen Diosen' to cuen to cuen bene' ca' chesedop chesežag chesonxene' Criston' to to yež gan' mbane distritw Macedonian'. ² Gocchgua yela' yaše' yela' zi' chegaque', perw Diosen' bene' cont gwnitachgüe' mbalaz lo' yichjlažda'ogaquen' na' besyebechgüede' bosotobe' mechw xen cont gosaclene' bene' yoble. ³ Nezda' na' choa' diža' bosonežjochgüe' da' beseyaže' bene' yoble la'czla' bibi gota' chegaque', na' con xbab chegaczen' gosone' ca'. ⁴ Goseneyoede' güe'to' latje yosonežjue' mechw cont yesaclene' bene' ca' chesejnilaže' Diosen'. ⁵ Na' gosonche' can' bento' xbab yesone', le zgua'tec goson cuingaque' lo na' Xancho Criston' na' lece goson cuine' lo na' neto' dan' gosaclaže'chgüe' yesone' can' chazlaže' Diosen'. ⁶ Da'n'an' ba gota'yoeto' Titon' yeyede' yeto gan' zoale cont gaclene' le'e yeyož gwtoble mechw dan' goclene' le'e gwzolao btoble cana'. ⁷ Güenchgua chonle chejnilaže'chguale Criston' na' choe'chguale xtižen', da' zan da' chejni'ile che Diosen', chonchguale xšinen', na' chaquechgüele neto'. Lecze le gon güenchgua na' le gwtobe da' cheseyaže' bene'.

⁸ Bi chona' byen gwnežjwle mechon', san chaclaža' gonle xbab še chaquele Diosen' na' še chaque lježle do laže'le can' goson bene' Macedonian' da' chesacde' Diosen' na' lježgaque'. ⁹ Nezele leca nži'ilaže' Xancho Jesucriston' chio'. Da' chacde' chio' bcua'ane' yogo'loł da' šagüe' da' de che' gan' zoe' len Diosen' na' bide' golje' bene' yaše' yežlio nga, bedeyene' cont yogo' dan' de che' gaquen checho naccho txen len le'.

¹⁰ Nachen' gwzejni'ida' can' chacda' naquen güen gonle. Godgüiz goclaže'le gaclenle bene' yaše' ca' na' gwzolaole btoble mechon' do yichj do laže'le. ¹¹ Na' chacda' güen yeyož gwtoblen na'a do yichj do laže'le can' gwzolaole, na' gwnežjwle con ca zelao saque'le. ¹² Note'tezcho še do laže'cho chaclaže'cho gwnežjwcho bi da' gwnežjwcho, Diosen' yebede' la'czla' late'ze da' de da' gwnežjwchone'. Bi chnabe' gwnežjwchone' da' bi de checho.

13 Bi žia' gonle cont bich bi yega'an chele na' gata' che bene' yoble. 14 Con chaclaža' gata' da' chyažje yogo'le. Šlac na'a de che le'e, cheyaļa' gaclenle bene' ca' cheseyažjde'. ĆChixe še gwžin ža cate' gata' chegaque' na' le'e chyažjele? Cana'chen' yesaclene' le'e cont gata' da' chyažje yogo'le. 15 Nach gac can' nyoj Xtiža' Diosen' žan: "Bene' botobe' da' zčha'o, bitw nacho becho'onen che', na' bene' botobe' late'ze, gota'cze da' byažjde'."

Titon' na' bene' lježe' ca'

16 Chožcnen Diosen' bene' cont Titon' zelaže'chgüe' gaclene' le'e con can' zelaža' neda'. 17 Na' cate' goša'ne' yedene'e le'e da' yoble cont gaclenche' le'e, bebede', le to gualaze' bene' xbab yeyede' gaclenche' le'e.

18 Na' chsela'to' yeto bene' lježcho len Titon'. Na' to cuen to cuen bene' ca' chesedop chesežag chesonxen Jesucriston' cheso'e diža' che benga chsela'to', chesene' binlo chyixjue'ede' diža' güen che Jesucriston'. 19 Nachen' lecze gosebeje' le' cont sa'lene' neda' cate' ša'a gan' že' bene' lježcho ca' šjasana' mechw dan' chtobcho. Na' gwnežjwcho mechon' cont gaxen Xancho Jesucriston' na' cont gwlo'ele chbele chaclen bene' lježe. 20-21 Yo'o yichjto' gonto' da' nac güen lao Xanchon' na' lao benachen', le mechw xenna', na' bi chaclaže'to' yesene' chonto' clele len len.

22 Na' lecze chsela'to' yeto bene' lježcho len legaque'. Zan ni'a ba ble'eto' chone' xšin Diosen' do yichj do laže' na' na'a leca žan yide' gan' zoalen' da' nezde' zelaže'chguale gonle can' chazlaže' Diosen'. 23 Na' ca nac Titon', chone' xšin Diosen' txen len neda' cont chaclento' le'e. Na' bene' ca' yečope, žjanite' chesone' cont Criston' chaxcene', na' bene' ca' chesedop chesežag chesonxene' Jesucriston' gosebeje' legaque' na' chesesele' legaque'. 24 Da'nan' chnia' le gon güen len legaque' cont bene' ca' chesonxene' Criston' to to yež yesenezde' chaquele legaque', na' le gwlo'e chonle güen can' gwnato' cate' be'to' diža' güen chele.

9

Bosotobe' mechon'

1 Bi chonen byen gwzoja' le'e nia' cheyaļa' gwnežjwle mechw da' gaclen bene' chesejnilaže' Criston' ga yoble. 2 Nezda' chaclaže'le gaclenle legaque'. Na' ba be'lena' bene' Macedonia ca' diža' cont yesenezde' le'e zoale distritw Acaya chaclaže'le gaclenle bene' yaše' ca' na' gwzolaole btoble mechon' godgüiz. Da'nan' bene' ca' že' zan yež distritw Macedonia lecze ba chesone' ca'. 3 Perw bia'cze chsela' bene' ca' len Titon' cont diža' dan' ba bia' chele catec güenna' chonle bi gaquen ca da' güenlaže'. Chaclaža' yeyož gwtohle mechua' cont ba den cate' yida'. 4 Le še sa'len no bene' Macedonia neda' cate' yedena'a le'e da' yoble, na' yeto'eda' chele še biņa' gata' mechua', na' lecze le'e yeto'ele da' bi benle can' gwnia' gonle. 5 Da'nan' godca' güen yesebialao bene' lježcho ca' šone yeside' gan' zoalen' cont yesaclene' le'e yeyož gwtohle mechw dan' gwnale gwnežjwle. Nachen' gwnežjwlen do yichj do laže'le, gague gwnežjwche'elen.

6 Le gon xbab can' chesene': "Bene' chaz late'ze, late'ze chelape', na' bene' chaz da' zčha'o, da' zčha'o chelape'." 7 Da'nan' to tole cheyaļa' gwnežjwle gacate' da' chebele gwnežjwle, na' bi gwnežjwche'elen, san gwnežjwlen do laže'le, le chebe Diosen' bene' zoa mbalaz chzande' bi da' chnežjue'. 8 Diosen' nape' yela' guac cont chaclenchgüe' chio' len bite'teze da' chyažjecho. Na' chac chone' cont chata' yogo'loļ da' chyažjecho bat'teze neče gac

gwnežjwcho da' chyažje bene' yoble na' goncho bichle da' güen. ⁹ Quinga nyoj Xtiža' Diosen' che bene' chzande' da' de che', žan:

Ba bnežjue' da' beseyažje zan bene' yaše'.

Na' bi ganlaže' Diosen' da' güen dan' benen'.

¹⁰ Diosen' chone' cont chata' no xoa' biñ na' bichle da' chazcho; chone' cont chata' da' che'ej da' chagwcho. Lecze le' gone' cont gata' bichle da' chyažjele na' cont cha'o xenchen, na' gone' cont šejchle gonchle da' güen. ¹¹ Bite'teze da' chac chele, Diosen' gone' cont gata' da' zcha'o da' gwnežjwle bene' yoble.

Nach cate' šjanežjwto' bene' yaše' ca' dan' ba btoble, yeso'e yela' choxcen che Diosen'.

¹² Le da' gwnežjwle da' cheseyažje bene' chesejnilaže' Jesucriston' ga yoble, bene' zan yeso'e yela' choxcen che Diosen'. ¹³ Na' cate' bene' yaše' ca' yesezi'e mechon' chtoble, gwlo'en chzenagle diža' güen che Criston' do yichj do laže'le. Nach legaque' yeso'e yela' choxcen che Diosen' da' gwseła'le da' zcha'o mechw da' gaclenen legaque'.

Lecze yeso'e yela' choxcen che' da' chaclenle yogo' bene' chesejnilaže' Criston'.

¹⁴ Na' do chesacde' le'e yosol güiže' Diosen' yesenabe' gaclenche' le'e, le nacbia' ba nži'ilaže'chgua Diosen' le'e. ¹⁵ Choxcen Diosen' gwsele' Xancho Jesucriston' len chio'. Bibi diža' de da' nacho catec zaca' goclenna' da' bene' len chio' gwsele'ne'.

10

Diosen' gwleje' Pablon' cont bzejni'ide' bene'

¹ Chesena bał bene' chžeba' tila' le'e cate' zoa' len le'e na' con cate'ze zoa' zito' chzoja' cart chdila' le'e. Bi naquen ca', san chneyoeda' le'e diža' šagüe' ca' Criston' gwneyoede' bene' diža' šagüe' da' goque' bene' xenlaže' na' bene' šagüe'.

² Chneyoeda' le'e gonle da' güen cont bi tila' le'e caten' yedetila' bene' chesacde' chona' con can' žan chia'.

³ Na' la'czla' zoato' lo yežlion' na' nacto' benachze, cate' chdillento' da' malen' bi chdillenton' ca' benachze.

⁴ San Diosen' none' neto' yela' guac cont chozeto' chlej chšoštjo' yogo' da' chon gwxiyen', le bi soeto' tillenton' to gualazto'.

⁵ Can' chac, Diosen' chaclene' neto' chonto' cont chosozexjwyichj bene' chosozenagle' che Criston' na' chesebejyichje' xbab mal čhegaquen' na' bichle da' cheseza'laže' da' chžonen yesombi'e Diosen'.

⁶ Na' cate' yeyož gata'bia' še yogo'le gwzenagle che Diosen', cana' ngüiato' goñto' castigw che nole bi chzenagle che'.

⁷ Le gon xbab che dan' chle'ele chonto'. Še nole chaquele nacle txen len Criston', le yeyon xbab lecze neto' nacto' txen len le'.

⁸ Na' bi yeto'eda' güe'cha' diža' yelate' can' ba bian', le chebeda' gwseła' Xancho Criston' neto' cont bzejni'ito' le'e diža' da' goclenen le'e, gague da' bžiayin' le'e.

⁹ Bi chaclaža' no gacde' še chzoja' cart quinga cont gwšeba' le'e.

¹⁰ Bene' ca' chesenelagüe' chia' chesene' cate' zoa' zito' chzoja' cart znia ca' che no bene' gwnabia', na' chesene' bi chac bi gona' cate' zoa' len le'e na' bi choa' diža' da' zaca' gwzenagle.

¹¹ Bene' ca' chesenelagüe' chia' cheyala' yesenezde' can' žato' le'e cart da' chzójto' le'e cate' zoato' zito', lecz ca' gonto' cate' yedesoato' len le'e.

¹² Bi chaclaže'to' gonlebeto' bene' ca' chesonxen cuingaque'. Chesacde' güenchgua chesone', le to toe' con chesena' lježe' cont chesene' chesonche' güenx clel ca' cheson bene' lježe', na' bibi zejen chesone' ca'.

¹³ Neto' bi gonxen cuinto'. Con güe'to' diža' che da' ca' goclen Diosen' neto' bento' gan' ba gwsele' neto', le lecze gan' zoalen' ba gwsele' neto'.

¹⁴ Da'n'an' bi chonlaže'to' cate' choe'to' diža' che da' ba bento' gan' zoalen', le nacto' bene' nechw bzejni'ito' le'e diža' güen che Criston'. Šaca' bi bento' žin gan' zoalen' chonlaže'to'

choe'to' dižan' ca', perw benton'. ¹⁵ Na' bi güe'to' diža' che da' ben bene' yoble, bi nato' neto' benton'. Zoato' lez šejnilaže'chle Criston' cont gaclenle neto' gonchto' xšin Diosen' gan' zoalen'. ¹⁶ Na' chaclaže'to' chixjue'eto' diža' güen che Criston' ga naquen zito'ch ca gan' zoale na'. Chaclaže'to' chixjue'eton' ga nono na' chixjue'eden' cont güe'to' diža' che xšin Diosen' da' ba bento' na' bi güe'to' che da' ba ben bene' yoble.

¹⁷ Bi cheyała' gonxen cuncho, san cheyała' gonxenko Xancho Dios.

¹⁸ La'czła' še to bene' ne' chone' güen, bi naquen da' šejle'cho. Perw še Xancho Diosen' ne' chone' güen nachen' nezecho da' li chone' güen.

11

Pablon' na' bene' ca' cheson cuingaque' postlw

¹ Chaclaža' gwzenagle yeto čop diža' güen da' gua' che cuina' la'czła' še chaquele naquen diža' da' bibi zaca'. Le gwzenag chia'. ² Neda' bzejni'ida' le'e xtiža' Criston' da' nechw cont gwyejnilaže'lene', na' Diosen' chone' cont chacda' le'e do yichj do laža'. Na' chaclaža' gaquele toze Criston' cont zaca'le gona' le'e lo ne'e, gacle ca to no'ol güego', no'ole napši'i cuine' da' chacde' toz bene' byo bene' si' le'. ³ Chxožda' yeseziye' bene' le'e cont bich šejnilaže'le Criston' do laže'le na' bich gaquele toz le'. Can' gwziye' belen' da' no'ole nechon', no'olen' gože' Eva, da' nacha' be xigüe'. ⁴ Cate' chesela'ac bene' gan' zoale na' chosozejni'ide' le'e che Jesúsen' nža'le can' ba bzejni'ito' le'e, o chosozejni'ide' nža'le che Spiritw che Diosen' o che diža' güen chen', la' chzenagtele chegaque'. Da'nan' chxožda' yeseziye'e le'e. ⁵ Ba nonle bene' ca' ca postlw chele na' chonxenle legaque'. Na' neda' zaca'cha' ca legaque'. ⁶ La'czła' bi choa' diža' xdan ca chesoe' legaque', ba ble'eczele yogo' dan' ba bento' na' nezczele chejni'ito' xtiža' Diosen' binlo.

⁷ ¿Chaquele malen' bena' bibi laxjua' gwxia' cate' be'lena' le'e diža' güen che Diosen'? Ben cuina' ca to bene' bibi zaca' da' bibi laxjua' gwxia' cont bena' ga zoachle mbalaz. ⁸ Gwxia' mechw da' goson bene' ca' chesedop chesežag chesonxene' Criston' ga yoble cont be'lena' le'e xtiža' Diosen'. ⁹ Na' cate' gwzoo' len le'e, la'czła' bi gota' da' byažjda', bi gwnabdan' le'e. Bene' ca' zeya'ac Macedonia gosone' da' byažjda' cont bi benda' le'e zed, na' bate'teze gwbatech gonda' le'e zed gonle da' chyažj chčhinda'. ¹⁰ Chebeda' chac chnia' bibi gan' chona' chyixjue'eda' xtiža' Diosen' len le'e o len bene' ze' yež yoble ga mbane distritw Acayan'. Na' can' nezda' chaclen Criston' neda' choa' diža' li, can' nezda' gwbat gonda' le'e zed cont gonle da' chyažj chčhinda'. ¹¹ Perw gague da' bi chacda' le'e bi gonda' le'e zed. Diosen' nezde' chacda' le'e.

¹² Na' gonchcza' can' chona' bibi laxjua' chzia' cont bi žel bi yosode'e bene' ca' yesene' toz can' chesone' len da' chon neto', le can' chesaclaže' yesene'. ¹³ Legaque' bi zjanaque' dogualje postlw. Con chosozejni'ide' diža' güenlaže' na' chesonlede' le'e cont gaquele gwseła' Criston' legaque'. ¹⁴ Bi yebanele can' chesonen', le ca'czen' chziye' Satanásen' chio', cheyon cuinen ca to angl bene' chactitchgua cont gaquecho naquen to angl güen bene' za' gan' zoa Diosen'. ¹⁵ Na' ca'czen' cheson bene' ca' chosozenag chen, chesonlede' le'e cont gaquele chosozejni'ide' diža' güen. Perw žin ža yesezaca'zi'e toli tocañe yela' güen da' mal chegaquen'.

Da' ca' gwdi gwxcaca' Pablo da' naque' postlw

16 Da' yoble žia' le'e, bi gaquele chona' xbab da' bibi zaca' can' chon bene' bi chejni'i. Perw la'czla' še chaquele chona' xbab da' bibi zaca', le gwzenag chia' ślac gua' to chope diža' güen che cuina'. 17 Gua' diža' güen che cuina' la'czla' neza' Xancho Criston' bi be'e diža' güen che cuine'. Guan' ca bene' chon xbab da' bibi zaca', bene' bi chejni'i. 18 Bene' zan cheso'e diža' güen che cuingaque' che bi da' ba gosone' o bi da' ba goc chegaque', na' ca'czen' gona' neda'. 19 Ba non cuinle bene' sina' na' da'na'ljan' chbele chzenagle che bene' cheson xbab da' bibi zaca'. 20 Chzenagle che bene' ca' ba gosone' le'e ca xmosgaque'. Choe'le latje cheseziye'e le'e cont chnežjwle legaque' bi da' de chele na' chontezle bi da' chesene'. Chesonxen cuingaque' na' chesebaže' le'e cont chzenagle chegaque', na' bia'cze choe'le latje chosozejni'ide' le'e. 21 Chonljale xbab bžepto' le'e dan' bi beneto' le'e ca'.

Na' da' yoble gua' diža' ca bene' chon xbab da' bibi zaca', le bite'teze diža' güen da' cheyaxje bene' güe'e che cuine' note'teze naque', lecze cheyaxjda' gua' dižan' nac ca' che cuina'. 22 Chesonxen cuingaque' da' gosalje' gan' že' bene' chesaque' diža' hebreo. Nezczele lecze goljelena' bene' chesaque' diža' hebreo. Na' chesonxen cuingaque' da' zjanaque' bene' Israel. Nezczele lecze bene' Israel neda'. Na' chesonxen cuingaque' da' gosalje' lo diaža che da' Abraham. Na' nezczele lecze diaža che da' Abrahanna' neda'. 23 Chesene' Criston' gwsele' legaque' cont yesone' xšine'. Nezczele Criston' gwsele' neda' na' ba bencha' xšinen' ca legaque'. Si'xenle dan' choa' diža' ca bene' chon xbab da' bibi zaca', ca bene' bi chejni'i. Ba bencha' žin gual ca legaque', zan ni'ach ba goseyin justis ca' neda' da' choa' xtiža' Diosen' cnel ca da' ba goc che legaque'. Na' zan ni'ach bene' ca' chesegue'ede' neda' ba goseyixjue' neda' ližja cnel ca dan' ba goc che bene' ca' chosozejni'ide' le'e. Na' zan ni'a ba bela' cbi gota'. 24 Gayo' ni'a goseyin bene' Israel gualaž chia' neda' tašjw de yid togaljechoa ni'a güeje. 25 Šone ni'a bene' justis ca' goseyine' neda' xis. Na' tni'a bosotacue' neda' yej yelate'ze ca gosote' neda'. Na' cate' zya'a yež zito' to lo' barcw, šon ni'a bochinj nisdaon' barcon', na' caņe bžina' yo biž. Na' lo šon ni'an beyinjenna', tni'a gwdeļa' nisdaon' tža tyel. 26 Zan ni'a ba gwy'a yež zito' jatixjue'eda' xtiža' Criston'. Zan ni'a caņe goc gwdia' yegw ca'. Zoa cate' goca' lo na' bene' gwban. Zoa cate' bene' Israel gualaž chia' gosaclaže' yesote' neda', na' zoa cate' bene' bi zjanaque' bene' Israel gosaclaže' yesote' neda'. Na' zan ni'a do lo ciuda, do ga nono bene' že' na' do lo nisdaon' yelate'ze bi gota'. Na' yogo' ža chaš bene' chesonlaže' chesene' zjanaque' chio' txen na' chxožda' yosožiaye'e xšin Diosen' dan' chonan'. 27 Zan ni'a ba bena' xšin Diosen' benten ga jaxaque'chgüeda', na' zan ni'a bchejda' bi gwtasa'. Nombi'a yela' chbił chdon, le zan ni'a bi gota' da' ye'ej gagua'. Na' lecze zan ni'a beyaga' bi gota' xa' da' byažjda'.

28 Da' zanch da' ba gwdi gwxcaca' da' bi choa' diža', na' lecze yogo' ža chi'chgua yichja' nac chac che le'e chdop chžagle chonxenle Criston' to to yež. 29 Note'tezle cate' bi zoačachle len Criston' o bi chzoele gonle can' chazlaže' Diosen', chacyaše'chgüeda' cacze načo nedan' chona' ca'. Na' lecze cate' bene' chesego'oyele' le'e cont chonle da' mal, leca chacda' lo' yichjlažda'ogua' na' čiža'a dan' ba chonle can' že'na'. 30 Na' da' chonen byen güe'cha' diža' che cuina', nach gua' diža' che da' ca' chlo'en bi chac bi gona' to gualaza'. 31 Dios bene' cheyala' gonxencho toli tocaņe neзде' choa' diža' li. Len' naque' Xa Xancho Jesucriston' na' chonxen Jesucriston' le'. 32 Na' yeto da' goc chia', cate' gwzoa' ciuda Damasco, bene' goc gobernador ślac gwgnabia' rey Aretas bnite'

beñe' gosape' cho'a puert da' zoa le'e ze'e da' nyeçhj ciudan' cont yesezene' neda' cate' yechoja'. ³³ Perw beñe' lježcho ca' gosegüe'e neda' to lo' žome xen na' besyeletje' neda' to cho'a ventan le'e ze'e da' nyeçhje ciudan' cont bi gosezene' neda'.

12

Da' ble'edagüe' Pablon'

¹ Bi chazlaža' güe'cha' diža' güen çe cuina', san gua' diža' çe da' ca' da' ba ble'edagüe'da' na' da' ca' ba bzejni'i Xancho Criston' neda'. ²⁻³ Ba chejnilaža' Criston' cate' goc chia' quinga ba goc žta' iz. Diosen' bene' neçe gwya'a yaban' gan' zoen'. Bi nežda' še gwya'a len cuerp chia', Dios nan' nežde'. ⁴ Con nežda' bžina' gan' zoa Diosen' na' benda' beñe' ca' že' na' cheso'e diža' zaca' da' bi chac nia', diža' zaca' da' bi de latje güe' benach yežlio nga. ⁵ Šaca' žan gonxen cuina', yejni'a gonxen cuina' çe da' ca' ba blo'e Diosen' neda', perw bi žan gonxen cuina' çe bi da' ba bena' neda'. Con gua' diža' çe da' ca' ba goc chia' da' chosolo'en bi chac bi gona' to gualaza'. ⁶ Šaca' žan gonxen cuina', da' zan da' güen ba bena' da' gac gua' diža' çhen, diža' da' naquen da' li, gague da' güenlaže'. Perw bi gua' diža' çe bi da' güen da' ba bena', le bi chaclaža' no gonxench neda' ca cheyała'. Yejni'a yesone' xbab še zaca' con ca nac da' chesele'ede' chona' na' can' chesende' choa' xtiža' Diosen'.

⁷ Cont bi ga'laža' çe da' ble'edagüe'da' na' da' ba bzejni'i Xancho Criston' neda', Diosen' be'e latje chžaglagua' len to da' zoa cha'an ca cha'a yeše' lo cuerp chia' nga, na' leca chaclaže' Satanásen' gacda' tole da' chac chia' ca'. ⁸ Šone ni'a ba gwñabda' Xancho Criston' yeque'e dan' chžaglagua' len cuerp çhian'. ⁹ Nach Xanchon' gože' neda': "Bi yeca'a dan' chžaglaguon', san soacza' gaclena' le'. Lezen da' chyažjdo'. Cate' bi chac bi gono', canan' gacbe'edo' chaclena' le' cont gono' bi da' cheyała' gono'." Da'nan' chbeda' güe'cha' diža' çe da' ca' chosolo'en bi chac bi gona' še Criston' bi chaclene' neda' len yeła' guac çhen'. ¹⁰ Na' da'nan', cont gaxcen Criston', chbeda' bite'teže da' chac chia' da' chlo'en chyažjda' gaclene' neda'. Chbeda' cate' chesezi'diža' bene' neda', cate' bi de da' chyažjda', cate' beñe' chosolagšibe' neda', na' cate' bichle da' chžaglagua', le cate' chac chia' ca', cana'ch chaclench Criston' neda' len yeła' guac çhen'.

Pablon' gwche' yichje' çe beñe' chesonxen Criston' Corinto

¹¹ Ba bia' diža' benxen cuina' ca chon beñe' bi chejni'i. Le'e cheyała' güe'le diža' chia' naca' beñe' zaca', perw bi chonle ca'. Da'nan' benen byen bia' dižan' ca'. Da' juisyw chonxenle beñe' ca' ba nonele ca postlw çehele. Na' neda' ne late'ze bi chyažjen cont gaca' bene' zaca' ca legaque'. Žia' ca' la'czla' chacbe'eda' bibi zaca' šaca' bi zoa Diosen' len neda'. ¹² Ba ble'ele naca' dogualje postlw, le cate' gwzoa' len le'e, Diosen' blo'e zoa yeła' guac çhen' len neda' na' bene' cont goc bichle da' zaca' yesyebane beñe', na' goclene' neda' bchejda' yogo' da' goc chia' šlac bena' xšinen' gan' zoalen'. ¹³ Tože ca güenna' bena' len le'e na' can' bena' len beñe' yež yoble ga chesedop chesežague' chesonxene' Criston', con da' bi bia' latje gonle da' chyažj chçhinda'. Le si'xen da' malen' bena' bi benda' le'e zed.

¹⁴ Chaclaža' yida' deña'a le'e da' gwyone ni'a. Na' bi gonda' le'e zed cate' yida'. Bi chaclaža' gonle neda' bi da' de çehele, con chaclaža' gwzenagle chia' na' gon cuinle lo na' Criston'. Ca no bidao' bi cheyała' gwnežjwbe' bi da' chyažje xaxna'be', san xaxna'be' cheyała' gwnežjue' da' chyažje lebe', ca'czen'

naquen len le'e na' len neda'. ¹⁵ Chbeda' chzanda' bite'teze da' de chia' na' lente cuina' cont gaclencha' le'e, la'czla' šlac neda' chaquechda' le'e, le'e bi chaquetele neda'.

¹⁶ Na' balle, la'czla' chacbe'ele bi benda' le'e zed len da' byažj bchinda', žale gwziya' a le'e. ¹⁷ ĆBi nezele bi gwziya' a le'e cate' gwseła' note'teze bene' ca' ba gwseła' gan' zoale na'? ¹⁸ Gwneyoeda' Titon' bedene' le'e na' gwseła' yeto bene' lježcho len le'. ĆBi nezele bi gwziye' Titon' le'e? Le' len neda', toz can' chonto', na' toz can' chaclaže'to' gaclento' le'e.

¹⁹ ĆChaquela ba bia' diža' quinga cont nezele bibi da' xinj chonto'? Gague da'nan' ba bia' dižan' ca'. Ba gwnia' yogo' da' ba gwnia' cont chaclena' le'e gonchle xbab can' chazlaže' Diosen', le chacda' le'e. Diosen' nezde' yogo' da' ba gwnia' le'e, na' naca' Criston' txen chzejni'ida' le'e. ²⁰ Con chžeba' cate' yedena' a le'e še gata'bia' bi chonle güen can' chaclaža' gonlen', na' še ba chonle da' mal, bi šolaže'le can' gona' len le'e. Chacda' chixe še chdile chšaše na' chgüe'e lježle o chloc lježle o chazlaže'le gac güen che cuinzle. Chixe še chne che lježle, še chchitjle diža', še cha'laže'le o še de da' zed chele. ²¹ Chžeba' cate' yedyena' a le'e še gata'bia' zanle bina' cuejyichjle da' malen' ba benle, na' bina' yetinjele che da' yela' zot' chonle, che da' nzoa no xtole, o da' chata'lenle no bene' bi nac bene' chele o no'ole bi nac xo'olle. Na' Diosen' gone' yeto'eda' chele na' yegüine'da' chele še naquen ca'.

13

Pablon' že' gone' castigw che no chon da' malen'

¹ Na' a gac šone ni'a yedena' a le'e. Cate' gagwcho xya che note'teze bene', guata'bia' nape' doła' še yotilen can' chesena chope o šone bene' cheso'e diža' can' goquen'. ² Goša' le'e šlac gwzoa' len le'e caten' bedena' a le'e da' gwchope, bi yeyaše'da' bene' ca' goson da' xinjen' še bi yesyetinjde', na' gona' castigw che yogo' nochle chon da' xinjen'. Na' da' yoble žia' ca' na' a šlac zoa' zito' len le'e. ³ Chaclaže'le gona' to da' gwlo'en chne Criston' len neda'. Da'nan' gona' castigw che nole chon da' xinjen'. Na' Criston' gwlo'e yela' guac xen che' cont saca'zi'le che da' xinj da' nonle. ⁴ Na' la'czla' Criston' ben cuine' ca' bene' bibi chac gon cate' gosote'ne' le'e yag cruzen', zoe' na' a da' nape' yela' guac xen che Diosen'. Na' lecze neto' nacto' txen len Criston' ben cuinto' ca' bene' bibi chac gon, perw gwlo'eto' le'e zoa yela' guac che Diosen' len neto'.

⁵ Le gonyane' xbab chelen' še da' li chejnilaže'le Jesucriston'. Nach gacbe'ele zoe' len le'e še da' li chejnilaže'lene'. ⁶ Na' zoa' lez lecze gacbe'ele zoe' len neto' na' nacto' postlw che'. ⁷ Choł güižto'ne' chele chnabto' bich bi da' mal gonle, gague cont gacbe'ele zoa Jesucriston' len neto', san cont soale gonle da' güen. Le toze ca' nonen' še chesache'le bene' zoe' len neto' o še bi chesache'ede'. ⁸ Na' bibi castigw goŋto' le'e še chzenagle diža' li che Jesucriston', con gaclento' le'e, še ca'. ⁹ Yebeto' gonto' ca' bene' bibi yela' chnabia' nape', con še le'e ba chnabia'le chonle can' cheyała' gonle. Na' zoaczt'o' choł güižto' Diosen' chnabto' gaclene' le'e gonle doxen can' cheyała' gonlen'. ¹⁰ Ba bzoja' da' quinga za' yedena' a le'e cont yetinjele xtoła'len' na' bi yažjen gona' znia len le'e. Diosen' gwsele' neda' naca' postlw che' na' bene' neda' yela' chnabia' cont gaclena' le'e, gague cont gwziaya' a le'e.

¹¹ Bene' migw chia', chnaba' gacšca güen chele. Le cuec yichjle gonyane'le yogo' da' chaclaže' Diosen' gonle. Le gon chach laže'le len bi da' chac chele. Le gac toze len ljež le'e chejnilaže'le Criston', na' le soa binlo tole yetole.

Diosen' chacde' chio' na' chone' cont chzoa chbezcho binlo len xbab da' yo'o lo' yichjlažda' ochon', nachen' chnaba' soaščacze' len le'e. ¹²Le gwnopa' na' lježle gwguap lježle tiox cate' chežagle txen, cont gachbia' chaque lježle tole yetole.

¹³Yogo' beñe' ca' chesejnilaže' Criston' do nga chosoguape' le'e tiox.

¹⁴Na' chnaba' Xancho Jesucriston' gaclenščacze' le'e. Na' Diosen' gonšque' gacbe'echle chacde' le'e, na' gonšca Spiritw che Diosen' cont xbab čele gaquen toze len xbab čhen. Da' na'zen' chzoja'.

CART DAN' BZOJ POSTLW SAN PABLO CHE BEÑE' GALACIA CA'

Pablon' chguape' tiox bene' ca' chesonxene' Criston' Galacia

¹⁻² Neda' Pablo chzoja' le'e chdop chzagle chonxenle Criston' yež ca' zjachi' distritw che Galacia. Neda' len yogo' bene' lježcho ca' nite' nga chguapto' le'e tiox. Gague benač gwlej neda' cont gona' xšine', san Jesucriston' t xen len Xe' Diosen' ben' bosban le' ladjo bene' guat ca', legaque' gosebeje' neda' cont naca' postlw chegaque'. ³ Na' chnaba' lao Xacho Diosen' len Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole. ⁴ Jesucristnan' bnežjw cuine' neche xtola'chon' cont bich goncho t xen len da' malen' chac lo yežlio nga. Bene' ca' le can' gwyazlaže' Xacho Diosen' ⁵ ben' cheyala' gonxencho toli tocanē. Na' ca'šcacze goncho.

Bich bi yeto diža' de da' gac nacho diža' güen che Diosen'

⁶ Diosen' gwleje' le'e cont Xi'ine' Criston' gaclene' le'e. Na' chebanda' can' chonlen' bedao'nez ba chbejyichjle Diosen' na' chzenagle che yeto da' chaquele naquen diža' güen. ⁷ Perw bi naquen diža' güen. Con nita' bene' chosed chosolo'ede' xtiža' Diosen' clele na' chesone' cont chaczejlaže'le che diža' güen che Criston' dan' bsd blo'eto' le'e. ⁸ Šaca' neto' chixjue'eto' yeto da' bi naquen diža' güen che Criston', chnabda' Diosen' gone' cont cuiayi'to'. Na' la'cžla' to angl bene' za' gan' zoa Diosen' chixjue'ede' yeto da' bi naquen diža' güen che Criston', lecze chnaba' gon Diosen' cont cuiaye'e. ⁹ Can' ba gwnian', lecze can' žia' da' yoble na'a: še note'teze bene' ba chyixjue'ede' xtiža' Criston' nža'le can' ba nsedlen, chnaba' gon Diosen' cont cuiaye'e toli tocanē.

¹⁰ Chnia' ca' cont na Diosen' chona' güen, gague cont yesena benačen' chona' güen, na' gague cont yebe benačen' neda'. Šaca' chi' yichja' nacle gona' cont yebe benačen' can' chonan', bi chzenaga' che Criston' šaca'.

Diosen' gwleje' Pablon' na' gwsele'ne' cont goque' postlw

¹¹ Bene' migw, che'nda' nezele diža' güen che Criston' dan' ba be'lena' le'e bitw naquen xbab che benač. ¹² Gague benačen' bzenden' neda', na' neca nacho benačen' bene' cont gwyejni'idan', san cuin Jesucriston' bzejni'ide' neda' diža' güen čhen'.

¹³ Ba beneczele diža' can' ba bena' cate' ne' na'ogua' costumbr che neto' bene' Israel. Leca bchi bsaca' bene' ca' chesonxene' Criston', go-claža' yesyenite'. ¹⁴ Na' gwche'chgua yichja' che costumbr dan' gosa'o da' xozxta'ogua' ca' na' bsdchan' clel ca zan bene' l gualja' bene' lecze zjanac bene' Israel. ¹⁵ Perw cate' bina' galjtia', Diosen' bžie' bia' gona' xšinen'. Gwleje' neda' cont gonan', le nži'ide' neda'. Na' cate' bžin ža ben Diosen' can' gwčhoglagüen' gone', ¹⁶ nach bene' cont bemb'i'a Xi'ine' Jesús. Na' bzejni'ide' neda' cont chyixjue'eda' xtiža' Jesús'en' len bene' ca' bi zjanac bene' Israel. Na' cate' ben Diosen' ca' len neda' notno gwnabda' gwzejni'ide' neda'. ¹⁷ Na' neca gwy'a'a Jerusalénna' cont postlw ca' yososed yosolo'ede' neda', bene' ca' gwlej Diosen' cont chesone' xšine' cate' neda' za' gonan'. San la' gwy'a'atia' gan' nzi' Arabia, na' gwdechle beza' Arabia bežina' Damasco.

¹⁸ Na' gocch šon iz gwy'a'a Damascon', nach beza' beya'a Jerusalénna' cont bemb'i'a Pedron' na' jaso'a' len le' žta'gwbiž. ¹⁹ Perw bitw bšaga' yezica'chle

postlw ca' san toze Jacobo bene' biše' Xanchon'. ²⁰ Nezece Diosen' da' nga chzoja' naquen diža' li.

²¹ Nach gwy'a yež ca' zjachi' gan' nzi' Siria na' Cilicia. ²² Na' bene' ca' chesedop chesežag chesonxene' Criston' yež ca' zjachi' distritw Judean', legaque' biña' yesombi'e neda' ca hora'. ²³ Con ba gosende' chesena bene' chia': "Ben' bchi bsaque' neto' bich chone' ca'. Ba chyixjue'ede' cheyala' šejnilaže'cho Criston', la'czla' cana' goclaže' gone' cont nono yesejnilaže' Criston'." ²⁴ Na' bene' Judea ca' chesejnilaže' Criston' gosonxene' Diosen' cate' gosende' can' chonan'.

2

Yezica'chle postlw gosazlaže' can' chon Pablon'

¹ Na' gocch žta' iz gwy'a Jerusalénna' nach da' yoble gwy'a len Bernabén', na' lecce gwchi'a Titon'. ² Diosen' bzejni'ide' neda' cheyala' ša'a, na' da'n'an' gwy'a. Na' btoba' bene' ca' zjanaque' blao len bene' ca' chesonxen Criston' Jerusalénna' na' legacze' bzejni'ida' bin' chyixjue'eda' len bene' ca' bi zjanaque' bene' Israel cate' choe'lena' legaque' diža' güen che Criston'. Bzejni'ida' legaque' bin' chsed chlo'eda', le goclaža' yesenezde' cont bi yesene' bibi zaca' dan' chona' na' da' ba bena'. ³ Ca' goquen' bitw chole gosone' byen soa bene' lježa' Titon' señw dan' nzi' circuncišion la'czla' bi naque' bene' Israel. ⁴ Goc ca' la'czla' gwnita' bal bene' gosaque' txen len bene' lježcho ca' Jerusalénna' ca hora', bene' gague do laže' gosejnilaže' Criston', con bedese'e še na'oto' costumbr ca' zjanyoj le'e ley che neto' bene' Israel. Legaque' gosaclaže' yesone' byen ga'oto' costumbr ca', la'czla' nezecho chebe Diosen' chio' dan' chejnilaže'cho Criston', gague dan' choncho can' ža leyna'. ⁵ Perw neto' ne late'ze bi bzenagto' che legaque', le goclaže'to' bi gata' da' gwžon gwzenaguechle diža' güen che Criston' da' naquen da' li. ⁶ Na' ca nac bene' ca' gosac bene' blao len bene' ca' chesejnilaže' Criston' Jerusalénna', bitw gosazlaže' gwša'a can' chsed chlo'eda' che Criston'. (Žia' ca' la'czla' bitw bi nonen len neda' še gosaque' bene' blao o še bi gosaque', le len Diosen' tozce can' zjazaca' yogo'lol bene'.) ⁷ Gosacbe'ede' Diosen' ngüe'e lo na' chyixjue'eda' diža' güen che Criston' len bene' ca' bi zjanaque' bene' Israel can' ngüe'en lo na' Pedron' chyixjue'eden' len bene' Israel gualaž cheto' ca'. ⁸ Le Diosen' ben' chaclene' Pedron' len yela' guac chen' cont chyixjue'ede' xtiža' Criston' len bene' Israel gualaž cheto', leccen' chaclene' neda' len yela' guac chen' cont chyixjue'eda' xtiža' Criston' len bene' bi zjanaque' bene' Israel.

⁹ Can' goquen', Jacobon' len Pedron' len Juanna', bene' zjanacch blao len bene' ca' chesejnilaže' Criston' Jerusalénna', cate' legaque' gosacbe'ede' can' chaclen Diosen' neda' chona' xšinen', nach gosoxe' taca' len taca' Bernabén' cont bosolo'e zjanaque' txen len neto' na' gosazlaže' can' chonto'. Le gosacde' güencze gonto' xšin Diosen' len bene' ca' bi zjanac bene' Israel na' legaque' yesonen' lon bene' Israel gualaž cheto' ca'. ¹⁰ Toze dan' gose'e neto' gonto', gacento' bene' yaše' ca'. Na' da' ličze chi'chgua yichja' chona' ca'.

Pablon' gwdi'e Pedron' gan' nzi' Antioquia

¹¹ Na' gwdechle gwy'a gan' nzi' Antioquia. Na' šlac zoa' na' bid Pedron', na' gwdi'la'ne' can' chone', le bla'alaon chone' da' mal. ¹² Cate' za' bžine' Antioquian', gwzologüe' che'ej chagüe' txen len bene' ca' chesejnilaže' Criston' la'czla' bi zjanaque' bene' Israel; perw gwdechna' cate' besežin bene'

Jerusalén ben' gwsela' Jacobon', bich goclaže' ye'ej gagüe' txen len bene' ca' bi zjanaque' bene' Israel. Bžebe' še bi yesena bene' ca' cheson xbab note'teze bene' chejnilaže' Criston' cheyala' soe' señw dan' že' circuncisió'n. ¹³ Nach yezica'chle bene' Israel ca' chesejnilaže' Criston' ľecze besyebix'e' bich gose'ej gosagüe' txen len bene' ca' bi zjanaque' bene' Israel, na' gosogo'oyele' Bernabén' cont lencze' bebix'e'. Na' gosone' ca' cont yesebe bene' Jerusalén ca' ľegaque', ľa'czľa' gosenezde' bi naquen mal yese'ej yesagüe' txen len bene' ca' bi zjanaque' bene' Israel. ¹⁴ Gocbe'eda' bi chesone' can' cheyala' gon chio' nombia'cho diža' ľi che Criston'. Na' da'nan' gwdila' Pedron' lao yogo' bene' ca' chesedop chesežag chesonxene' Criston', goša'ne': "Le' naco' bene' Israel, perw ba gwlejiychjo' costumbr che chio' bene' Israel cont chono' txen len bene' ca' bi zjanaque' bene' Israel. Da'nan' bitw cheyala' gono' byen yeson bene' ca' bi zjanaque' bene' Israel can' nac costumbr che chio' bene' Israel."

Con bene' chesejnilaže' Jesucriston' zjanaque' bene' güen len Diosen'

¹⁵ Neto' goljto' nacto' bene' Israel na' bitw goljto' ladjo bene' ca' cbi chesonxen Diosen'. ¹⁶ Perw ba nezeto' Diosen' bitw že' nacto' bene' güen len ľe' neče da' chonto' can' ža ley dan' bzoj da' Moisésen'. Con bene' chesejnilaže' Jesucriston' zjanaque' bene' güen len Diosen'. Da'nan' lencze neto' chejnilaže'to' Criston' cont Diosen' že' cheto' ba nacto' bene' güen lagüe'na'; že' ca' gague neče dan' chonto' can' ža leyna'. Ľe bi nacho zoa bene' nac bene' güen len Diosen' neče chone' bi da' ža leyna'.

¹⁷ Baľ neto' bene' Israel ba chejnilaže'to' Criston' cont Diosen' none' neto' ca' bene' güen. Da'nan' chache'eto' toz ca' bene' güen da' xinj nacto' len bene' bi zjanac bene' Israel. Perw bi nacho Criston' chone' cont nacto' bene' mal. Ľeca' clelen' cheson bene' xbab še chesacde' ca'. ¹⁸ Nezecho bi chyažjen ga'ochó costumbr che da' xozxta'o neto' bene' Israel cont gaccho bene' güen len Diosen'. Na' še ba gwlejiychjcho costumbr ca' na' yezolaocho yeya'ochon da' yoble, gwlo'elaon naccho bene' güen da' xinj. ¹⁹ Ley dan' bzoj da' Moisés ba bzejni'in neda' bi naca' bene' güen len Diosen', ľe bi chona' can' žanna'. Perw dan' bi gwzoen yeyonen neda' bene' güen len Diosen', da'nan' bich chonxenan', san yo'o yichja' soacza' gwzenaga' che Diosen'. ²⁰ Criston' bnežjw cuine' gote' neče xtolan', na' dan' chejnilaža'ne' da'nan' ba none' neda' ca' to bene' guat len da' xinj'en' cont bich gonan'. Na' bich zoa' to gualaza', san Criston' zoalene' neda'. Na' dan' chona' na'a chonan' con can' ža' Xi'in Diosen' ben' chejnilaža'. Ľen' chacde' chio' na' bnežjw cuine' gote' neče chio'. ²¹ Diosen' nži'ilaže'de' chio' na' da'nan' gwsele' Criston', perw chzoacho to šľa'ale dan' bnežjw cuine' gote' še chaquecho naccho bene' güen len ľe' neče choncho dan' ža leyna', ľe bitw byažjen bnežjw cuin Criston' neče chio' šaca'.

3

Naccho bene' güen len Diosen' dan' chejnilaže'cho Criston'

¹ Le'e bene' Galacia, nčhoľ yichjlažda'olen'. ĽNo gwziye' le'e cont chaquele cheyala' gonxenľe costumbr che da' xozxta'oto' ca'? Ba bzejni'iyane'da' le'e che dan' got Criston' le'e yag cruzen' neče chio'. ² Da' ngazen' chnabda' le'e: ĽZoa Spiritw che Diosen' ľo' yichjlažda'ole neče dan' chonľe can' ža ley dan' bzoj da' Moisésen'? Bitw naquen ca', san znan len le'e neče dan' chejnilaže'le Criston'. ³ Spiritw che Diosen' gwyo'on ľo' yichjlažda'olen' caten' gwzolao chejnilaže'le Criston'. ĽDa' ľeca nčhoľ yichjlažda'olen' chaquele chyažjen gonle can' ža leyna' cont yeyož gacle can' chazlaže' Diosen'? ⁴ Da' zan da' bosochi

bososaca' bene' le'e dan' chejnilaže'le Criston'. ¿Na' bixe zacan' byo bchejele len da' ca' še na'a chaquele cheyała' gonle can' ža leyna'? ⁵ Nezele Diosen' ba bene' Spiritw chen' zoan len le'e na' chone' yela' guac da' chle'ele neče chejle'le xtiža' Criston' dan' bzeneto' le'e, gague chac ca' neče dan' chonle bi dan' ža leyna'.

⁶ Da' Abrahanna' gwejnilaže' Diosen', na' da'nan' Diosen' gwne' naque' bene' güen lagüen'. ⁷ Da'nan' cheyała' nezele yogo' bene' chesejnilaže' Diosen', Diosen' none' legaque' ca xi'in diaža che da' Abrahanna'. ⁸ Diosen' bžie' bia' gone' len le'e bi nacle bene' Israel can' chone' len neto' bene' Israel, con note'tezcho chejnilaže'chone' none' chio' bene' güen lagüen'. Da'nan' Xtižen' dan' nyojen žan gože' da' Abrahanna' diža' güen qui cate' biña' žin ža gaquen': "Dan' chejnilažo' neda' gona' güen len bene' ca' že' yogo' nación." ⁹ Na' can' naquen, Diosen' chone' güen len bene' ca' chesejnilaže' le' can' bene' güen len da' Abrahanna' ben' gwejnilaže'ne'.

¹⁰ Na' note'tez bene' chon xbab gague' bene' güen len Diosen' lagüe' chone' bi dan' ža ley dan' bzoj da' Moisésen', da' mal juisyw gac che' še ca', le nyoj Xtiža' Diosen', žan': "Da' mal juisyw gac che note'tez bene' še bi nita'teze' yesone' yogoloł can' ža leyna' bate'teze." ¹¹ Na' Xtiža' Diosen' nyojen, žan': "Bene' chesejnilaže' Diosen' zjanaque' bene' güen lagüe', na' da'nan' guata'cze yela' mban chegaque' toli točane." Na' da' žan ca' nezecho bitw že' che note'tezcho naccho bene' güen lagüen' neče choncho bi dan' ža leyna' goncho. ¹² Na' leyna' bi žan cheyała' šejnilaže'cho Diosen', san con žan': "Note'teze bene' chon doxen can' ža leyna' gac bane' toli točane."

¹³ Perw Criston' bnitlagüe' xtoła'chon' cont bi gac da' mal juisyw checho dan' bi chzoecho goncho doxen can' ža leyna'. Bnežw cuine' goc da' mal juisyw che' laz chio'. Goc che' can' nyojen, žan': "Da' mal juisyw chac che note'tez bene' chesote' chosode'ene' le'e yag." ¹⁴ Goc ca' cont lencze le'e bi nacle bene' Israel šejnilaže'lene' na' soale mbalaz ca' mbalazen' gwzoa da' Abrahanna' dan' gwejnilaže' Diosen'. Nachen' da' chejnilaže'cho Cristo Jesúsén', Diosen' gwsele' Spiritw chen' zoan len chio' can' gwne' gone'.

Ley dan' bzoj da' Moisésen' na' dan' gwna Diosen' gone' len da' Abrahanna'

¹⁵ Bene' migw, gwzejni'ida' le'e len da' nga chac yežlio nga: Cate' to bene' chze'e yiš o chone' testament, bi nacho cate' beyož bosochele' can' gwne' gone' cbi gone' can' žanna' o gwzanche' can' žanna', la'czla' naquen to da' chon beňachze. ¹⁶ Na' ca' nac dan' gož Diosen' Abrahanna' gone' da' güen len le' na' len xi'in diaža che', Xtiža' Diosen' dan' nyojen bi choen' diža' che zan diaža che da' Abrahanna', san choen' diža' che toze', na' zejen Cristo. ¹⁷ Na' dan' gož Diosen' Abrahanna' gone' gac da' güen che', chzaca'leben ca to yiš dan' chosoza' bene', le Diosen' bitw gwše'e can' gwne' gone'. Na' ba gwde tap gayoa šichoa iz gož Diosen' da' Abrahanna' gone' gac da' güen che' cate' bene' cont bzoj da' Moisésen' ley chen'. Perw la'czla' Diosen' bnežjue' leyna', bitw nacho cbi chone' can' gwne' gone' len Abrahanna' na' len xi'in diaža che' ca'. ¹⁸ Šaca' Diosen' že' con bene' cheson doxen can' ža leyna' zjanaque' bene' güen, bitw chone' da' güen che xi'in diaža che da' Abrahanna' can' ba gwne' gone' šaca'. Perw Abrahanna' goque' bene' güen len le' da' gwejle'le gon Diosen' can' gože'ne'.

¹⁹ Še naquen ca' žbixchen byažje ley dan' bzoj da' Moisésen'? Diosen' bnežjuen' da' xozxta'oto' bene' Israel cate' ba gwde tiemp che da' Abrahanna'

cont gosacbe'ede' bi chesone' can' non Diosen' mandadw yesone'. Na' b'zie' bia' gonen žin šlac biña' yid Criston' ben' gwna Diosen' galje' lo diaža che da' Abrahanna', na' che le' be' Diosen' diža' caten' gwne' gone' güen len xi'in diaža che da' Abraham. Na' ca nac leyna', Diosen' bene' cont angl ca' bosonežjuen' da' Moisésen'. Na' Diosen' bchine' Moisésen' bzejni'ide' xoxxta'oto' bene' Israel ca' can' žanna'. ²⁰ Perw cate' Diosen' gože' da' Abrahanna' gone' güen che', cuincze' bzejni'ide' da' Abrahanna', na' bi byažjde' bene' yoble gwzejni'ide' le' can' gone'.

Da' chzejni'i leyna' chio'

²¹ Na' bitw cheyala' gaquecho ley dan' bzoj da' Moisésen' chonen clele len da' gwna Diosen' gone' la'czla' leyna' bitw gac yocoben yichjlažda'ochon'. Šaca' gac yocoben yichjlažda'ochon' guac goncho can' ža leyna' nach gaccho bene' güen len Diosen' šaca'. ²² Perw Xtiza' Diosen' dan' nyojen žan yogo'lol benachen' yesezi'e castigw toli tocañe neche xtoła'gaquen', na' con bene' yesejnilaže' Jesucriston' nitlao xtoła'gaque' can' bsi Diosen' xnezen', cont gac güen chegaque' can' gwne' gac che xi'in diaža che da' Abrahanna'.

²³ Ca nac neto' bene' Israel, cate' biña' nezeto' cheyala' šejnilaže'to' Criston', nchoglañ cheto' si'to' castigw toli tocañe dan' nombia'to' leyna' na' bitw chonto' can' žanna'. ²⁴ Len neto' leyna' zaca'leben ca to bene' chgüia chne'e xi'in bene', da' žan da' chi'ebe' gombe' na' da' žan da' chi'ebe' bi gombe'. Perw na'a ba bid Criston', na' note'tezcho chejnilaže'chone', Diosen' že' naccho bene' güen len le'. ²⁵ Na' dan' ba bid Criston' leyna' bich naquen ca bene' chgüia chne'e neto' bene' Israel, neto' chejnilaže'to'ne'.

²⁶ Yogo' chio' chejnilaže'cho Cristo Jesúsén' naccho xi'in Dios. ²⁷ Na' note'tezcho še ba gwzoacho nisen' cont blo'echo naccho txen len Criston', ba chzolao chac yichjlažda'ochon' can' nac yichjlažda'ogüen'. ²⁸ Na' tozecze can' zaca'cho lao Diosen' še naccho bene' Israel o še bi naccho, na' še naccho bene' esclavo o še bi naccho, na' še naccho bene' byo o še naccho no'ole. Yogo'cho ba naccho ca toze bene' neche dan' naccho txen len Cristo Jesúsén'. ²⁹ Na' dan' naccho txen len Criston', lao Diosen' naccho xi'in diaža che da' Abraham, na' gon Diosen' güen len chio' can' gwne' gone' len xi'in diaža che da' Abrahanna'.

4

¹ To bene' gwni'a še zoa xi'ine', bi'nan' gac lo na'be' da' de che'. Perw na' šlac ne' nacbe' bidao' bitw načo mbalazech chac chebe' clal ca che to bene' güen žin la'czla' žin ža gac lo na'be' yogo' dan' de che xaben'. ² Bene' güen žin ca' nite' lo' yo'o chosogüia chesene'ebe' na' chesenabi'ebe' šlac biña' cha'obe' na' šlac žin ža co'o xaben' lo' na'be' dan' de chen'. ³ Can' goc len neto' bene' Israel šlac biña' yid Criston', gwxcaca'lebto' ca xi'in bene' gwni'an'. Na' leyna' gwzaca'leben ca bene' ca' chesenabia' xi'in bene' gwni'an' šlac biña' žin ža si'be' dan' de che xaben'. ⁴ Perw cate' bžin ža bžia Diosen' bia' gwsela' Xi'inen' yežlio nga, gwcan to no'ole le'. Na' Xi'in Diosen' lecze benen byen bzenague' che leyna'. ⁵ Na' len' bedeyene' cont yogo' chio' chejnilaže'chone' ba non Diosen' chio' ca xi'ine' na' zoacho mbalaz dan' nezecho bich chonen byen gonxencho costumbr ca' da' zjanyoj le'e ley che neto' bene' Israel.

⁶ Na' cont nezecho ba non Diosen' chio' ca xi'ine', ba gwsele' Spiritw chen' dan' lecze naquen Spiritw che Xi'ine' Criston', zoan lo' lažda'ochon'. Na' Spiriton' chaclenen to tocho cont choł güižcho Diosen' che'chone': "Xa". ⁷ Nachen' dan' ba non Diosen' chio' ca xi'ine' bich cheyala' soacho ca to esclavo len dan'

non leyna' mandawd goncho. None' chio' ca xi'ine' na' chone' güen len chio' doxen can' gwne' gone' len xi'in diaža che da' Abrahanna'.

Pablon' chi' yichje' nac cheson bene' ca' chesejnilaže' Criston'

⁸ Cate' bina' gombia'le Diosen', gwejnilaže'le da' ca' bi cheyala' šejnilaže'cho, na' legaquen gosenabian' xbab chele. ⁹ Perw na'a ba nombia'le Diosen', o še güen ch nacho Diosen' ba nombi'e le'e. Na' chebanhgüeda' chele dan' chebiga'le cosxanle na' da' yoble chonxenle costumbr ca' ca no che da' ye'ej gagwcho, che ža ca', na' che cuerp chechon', na' cho'ele latje chesonabian' xbab chele la'czla' bitw zjazacan' cont yesaclenen chio'. ¹⁰ Ba chonxenle costumbr che no ža lni, che bio' ca', che tiemp ca' na' che iz ca'. ¹¹ Chžeba' še bich chzenagle che dan' ba bsed blo'eda' le'e, le še bich chzenagle chen, ba gwžiai' dan' bena' len le'e.

¹² Bene' migw, chata'yoeda' le'e gacbe'ele costumbr che neto' bene' Israel dan' zjanyoj le'e leyna' bi yesaclenen le'e lao Diosen' ca' chacbe'eda' bi yesaclenen neda' lao Diosen'. Na' caten' bedesoa' len le'e cana', bitw nacho ba benle mal len neda'. ¹³ Nezeczele bega'anlena' le'e da' nechw dan' gocšenda' na' gwdixjue'eda' diža' güen che Criston' len le'e. ¹⁴ Na' dan' gocšenda' ca' hora' zacan' gue'ele neda', perw bitw bgue'ele neda', san do yichj do laže'le bleble neda' ca' šale bleble to no angl che Dios o ca' šale cuin Jesucriston'. ¹⁵ Mbalaz gwzoale cate' gwzoa' len le'e cana'. ¿Bixchen' bich chebele xtižan' na'a? Nežda' da' leca goquele neda' bzanele bite'teže da' de chele na' goclaže'le lente cuinle zaele gaclenle neda'. ¹⁶ Na' na'a žba chaquele chgue'eda' le'e dan' choe'lena' le'e diža' lin'?

¹⁷ Bene' ca' chososed chosolo'ede' le'e na'a leca zjachi' yichjgaque' le'e, perw gague cont yesone' güen len le'e, san cont yesyebeje' le'e bich gonle txen len neto', na' cont cue' yichjle legacze'. ¹⁸ Naqueczen güen yesebe' yichj bene' le'e bate'teže, gague cate'zen' zoa' len le'e, con še yesone' güen len le'e. ¹⁹ Xi'indagua', da' yoble chžaglagua' lo' lažda'ogua' neče le'e can' chžaglao to no'ole bene' chzan, na' bich žaglagua' ca' cate'ch gac yichjlažda'olen' can' nac yichjlaždao' Criston'. ²⁰ Yebechgüeda' šaca' netec na'a zoa' len le'e na' šaca' gac nia' chonle güen, perw leca chacžejlaža' chele.

Da' Agar na' da' Saran'

²¹ Le'e chaclaže'le gonxenle costumbr che neto' bene' Israel dan' zjanyoj le'e ley dan' bzoj da' Moisésen' žbina' yenele can' ža dan' nyojen? ²² Žan gwnita' chope xi'in da' Abrahanna' bi' byo, tobe' gwzan to no'ol ben' goque' esclava che' na' yetobe' gwzan no'ol checze', no'ole nga bi goque' esclava. ²³ Na' bin' gwzan no'ole esclavan' gollbe' dan' gwzoalen da' Abrahanna' le', perw bi' gwzan no'ol checze', gollbe' neče Diosen' gože'ne' san no'ol chen' la'czla' naque' no'ol güiž. ²⁴ Na' dan' goc che no'ol ca' chzejni'in chio' che chop dan' gwna' Diosen' gone' cont gaclene' bene' Israel ca'. No'ole esclava ben' le' Agar zaca'lebde' ca' ley dan' ben Diosen' mandawd bzoj da' Moisésen'. Bzojen' par da' xozxta'o neto' bene' Israel lo ya'a Sinaí, na' bene' ca' zjazaca'lebde' ca' esclavos. ²⁵ Na' doxen nación Israelen' zaca'leben ca' da' Agaren' no'ole esclava che da' Abrahanna'. Diosen' bnežjue' da' xozxta'oto' ca' leyna' lo ya'a Sinaín gan' nzi' Arabia, na' ža na'aža bene' Israel gualaž cheto', bene' guac nacho bene' Jerusalén, ne' zjanaque' ca' esclavos neče chesacde' chonen byen yesa'ogüe' costumbr ca' dan' ža leyna'. ²⁶ Perw chio' chejnilaže'cho Criston' naccho txen len yogo' bene' šjaya'aque' yaba gan' zoa Diosen' gan' lecze nzi'

ciuda Jerusalén. Na' nezecho bitw chonen byen ga'ocho costumbr ca' dan' ža leyna'. ²⁷ Quinga ža Xtiža' Diosen' dan' nyojen:

Bebe no'ole güiž, no'ole cbi chzan,

bosya'a yela' chbe čio', le' biña' gaco' bes čhe yela' sanña'.

Chacdo' bi chaque Diosen' le' da' nono xi'ino' zoa,

perw nita' zanch xi'ino' clcl ca nita' čhe no'olen' ba gwzan xi'in beñe' byon' gwzoalene'.

²⁸ Beñe' migw, xi'in da' Abrahanna' bin' le Isaac goljbe' neche gož Diosen' Abrahanna' san no'ol čhen' la'czla' goque' no'ole güiž. Na' ca'cze čio' chejnilaže'cho Criston', Diosen' none' čio' ca xi'in diaža čhe da' Abrahanna' bin' goljbe' neche goc dan' gož Diosen' le'. ²⁹ Bi' čhe da' Agaren', bin' goljbe' neche gwzoalen da' Abrahanna' le', bchi bsaca'be' Isaaquen' bin' ben Spiritw čhe Diosen' cont gwzan da' Saran'. Ca'cze naquen ža na'aža, beñe' ca' chesa'o costumbr ca' dan' ža leyna' chosoči chososaque' čio' chejnilaže'cho Criston'. ³⁰ Na' Xtiža' Diosen' dan' nyojen žan Diosen' gože' da' Abrahanna': "Bebej no'ole esclavan' len bi' čhen', le bitw gwnežjua'be' dan' gwnia' gwnežjua' bi' gwzan no'ol čio'na'." ³¹ Da'nana' beñe' migw, nezecho zaca'lebcho ca xi'in da' Saran', gague ca xi'in da' no'ole esclavan'.

5

Bi cheyala'yesa'ogüe' costumbr da' bi zjazaca'

¹ Caten' gwejnilaže'cho Criston', le' bebeje' čio' lo yogo' da' choncho chaquecho chebe Diosen' čio' lagüe dan' chonchonña'. Da'nana' bi cheyala' yeyonxencho costumbr da' bi zjazacan' len Diosen'.

² Neda' Pablo žia' le'e to da' žialao. Še soale señw dan' nzi' circuncisión na'a ba chejnilaže'le Criston', bibi zacan' dan' ba gwzolao chejnilaže'lene' še ca'. ³ Da' yoble žia' le'e, note'teze beñe' soe' señw dan' nzi' circuncisión, lecze cheyala' gone' yogo'loł bite'teze dan' ža ley dan' bzoj da' Moisésen'. ⁴ Na' še chaquele gonle doxen can' ža leyna' cont gacle beñe' güen len Diosen', ba chzoale Criston' to šla'ale še can' chaquele, na' bich chonle xbab catequen' nži'ilaže' Diosen' čio'. ⁵ Da' chejnilaže'cho Jesucriston' zoa Spiritw čhe Diosen' lo' lažda'ochon', na' chonen ga chebecho nezecho Diosen' ne' naccho beñe' güen len le' cate' yežincho gan' zoe'na'. ⁶ Ca nac čio' chejnilaže'cho Cristo Jesúsén', bitw bi nonen len Diosen' še ba zoacho señw da' nzi' circuncisión o še cbi zoachon. Le dan' naquen da' žialao xen len Diosen', soateze soacho šejnilaže'cho Criston' na' gague lježcho cont gacbia' chejnilaže'chone'.

⁷ Cana' gwzoale chonle can' chebe Diosen', perw na'a žnon' ba ben cont bich chzenagle čhe diža' li čhe Diosen'? ⁸ Dios ben' gwleje' le'e nacle xi'ine', bitw načo le'na' chone' cont chzenagle čhe diža' yoble. ⁹ Le gon xbab can' ža diža' nga: "Late'ze levadura chonen cont chas doxen cuazina'." ¹⁰ Perw na' zoa' lez gon Xancho Jesucriston' cont gwzenagle chia'. Na' Diosen' gwnežjue' castigw čhe beñe' chon cont chacžejlaže'le, note'teze naque'.

¹¹ Beñe' migw, ca nac neda', šaca' ne' chsed chlo'eda' nia' yogo' beñe' byo cheyala' yesezoe' señw dan' že' circuncisión cont yesenite' binlo len Diosen', bilja chosoči chososaca' beñe' Israel gualaž chian' neda' šaca', le can' chososed chosolo'e legaque'. Perw dan' žia' Criston' bnežjw cuine' gote' le'e yag cruzen' cont soacho binlo len Diosen', da'nana' bi chesazlaže' xtižan'. ¹² Na' ca nac beñe' ca' cheson cont chaquele bilja chebe Diosen' le'e še bi zoale señoñ', yebeda' šaca' yesečog cuingaque' yelate'.

¹³ Bene' migw, Dios ben' gwleje' chio' cont naccho xi'ine' chaclaže' nezecho bich chonen byen ga'ochó dan' ža ley cont soacho binlo len le'. Perw bitw cheyala' goncho bite'teze da' mal dan' ža lažda'ochon' goncho. Dan' cheyala' goncho, cheyala' gaclen lježcho lagüe dan' chaque lježcho tocho yetocho. ¹⁴ Na' ba zozccho choncho yogo'lol can' ža leyna' še choncho can' nyojen žan: "Cheyala' gaque lježcho ca chaque cuincho." ¹⁵ Perw še chacyožlen lježcho o chdillen lježcho, chžiai'cho dan' non Diosen' cont naccho toze.

Can' goncho še gwzenagcho che Spiritw che Diosen'

¹⁶ Chnia' le'e to da' zejen, cheyala' soateze soacho goncho can' chaclaže' Spiritw che Diosen'. Na' še goncho ca', bitw gwzenagcho che da' mal dan' yo'o lo' yichjlažda'ochon'. ¹⁷ Cate' chzenagcho che da' mal dan' yo'o lo' lažda'ochon', bitw choen' latje gwzenagcho che Spiritw che Diosen'. Na' cate' chzenagcho che Spiritw che Diosen', bi choncho con can' žan checho. Na' dan' zoa Spiriton' len chio', da'nan' bitw choncho da' mal dan' ža lažda'ochon' goncho. ¹⁸ Na' še chzenagcho che dan' chsed chzejni'i Spiritw che Diosen' chio', bich chonxencho costumbr ca' dan' ža ley dan' bzoj da' Moisésen'.

¹⁹ Nachia'cze bene' ca' chosozenag che da' malen' dan' yo'o lo' lažda'ogaque' chesone' bite'teze da' mal quinga: chesata'lene' no'ol bi zjanac no'ol chegaque' o bene' byo bi zjanac bene' chegaque'; chesebede' chesone' bichle da' yela' zto' len cuerp chegaque'; ²⁰ chesejnilaže' l' gua'a lsaca'; chosozenague' xtiža' bene' ca' chesenelen da' xigüe'; chesegue'e lježe'; bitw nite' binlo len lježe'; chesacxi'a lježe'; cheseloque'; zjachi' yichje' gac güen che cuin-gacze' sin cbi yesone' xbab nac gac che lježe'; bitw chesone' t xen len lježe'; ²¹ chesezelaže' bi da' de che bene' yoble; chesote' bene'; zjanaque' bene' borrašw; zjalene' no lni gan' chac žaš; na' chesone' bichle da' mal dan' zjanac ca da' mal quinga ba gwnia'. Na' da' yoble chnia' le'e can' ba gwnicza', nono yežin yaban' gan' zoa Diosen' chnabi'e še chone' da' xinj ca' zjanac ca'.

²² Perw na' še chzenagcho che Spiritw che Diosen', goncho yogo' da' quinga: gaquecho ljež benačcho; soacho mbalaz dan' nombia'cho Diosen'; soacho binlo len xbab dan' yo'o lo' yichjlažda'ochon'; gapcho yela' chxenlaže' len ljež benačcho bite'teze da' chesonde' chio'; goncho güen len bene' yezica'chle; gaccho bene' šagüe' len yogo'lol bene'; goncho bi da' si' lo na'cho goncho; ²³ gaccho bene' gwzexjwlaže'; bitw soacho goncho con can' žan checho. Na' še choncho da' güen can' chaclaže' Spiritw che Diosen', bitw bibi ley de da' nan choncho da' mal. ²⁴ Na' chio' ba naccho t xen len Cristo, bich choe'cho latje nabia' da' malen' chio' cont goncho can' žanna'. ²⁵ Spiritw che Diosen' ba benen yela' mban toli tocanē checho, na' da'nan' cheyala' soacho goncho can' chaclažen'.

²⁶ Na' bi cheyala' ga'laže'cho gaquecho leca bene' güen naccho, le še goncho ca', chonen cont yeseža'a bene' lježcho chio' na' yesegue'ede' chio'.

6

Cheyala' gaclen lježcho

¹ Bene' migw, še to bene' lježchon' ba blažoe' bene' da' mal, chio' chzenagcho che Spiritw che Diosen' cheyala' gaclenchwne' yetinjden' cont yezoe' binlo len Diosen'. Na' cheyala' gwsaca'cho, le xož lecze chio' lažo'cho goncho da' malen'.

² To tocho cheyala' gaclen bene' lježcho ca' bite'teze da' chesac chegaque', le can' gwna Criston' chaclaže' goncho.

³ Na' še goncho xbab naccho bene' güen cate' bi naccho, chziye' ze cuinchon' še ca'. ⁴ To tocho cheyała' goncho xbab še dan' ba benchon' naquen da' güen o da' mal. Na' yebecho še ba bencho da' nac güen, perw bitw goncho xbab güench ba ben chio' clet ca bene' yoble. ⁵ Le to tocho chogłao Diosen' checho še bencho güen o še bencho mal.

⁶ Še no chsed chlo'e chio' xtiža' Diosen', cheyała' gwnežjwchone' late' bi da' šagüe' da' güen da' de checho.

⁷ Bitw güe'le latje no si'ye' le'e, bitw gac gwcuša'e'cho da' choncho len Diosen'. Le še goncho da' mal, gone' cont si'cho castigw; na' še goncho da' güen, gone' cont soacho mbalaz. Can' zeje diža' dan' žan: "Con dan' chazcho, lenna' yelapcho." ⁸ Ben' chon con can' ža da' mal dan' yo'o lo' lažda'ogüe', gwžin ža cuiaye'e toli tocaņe; perw ben' chon can' chazlaže' Spiritw che Diosen', Spiriton' gonon cont bane' toli tocaņe. ⁹ Na' bitw cheyała' yeche'echo goncho da' güenna', le gwžin ža cate' Diosen' gone' cont soacho mbalaz juisyw, con še bi cuejyichjcho choncho can' chaclažen'. ¹⁰ Da'n'an' cheyała' goncho güen len yogo lol bene' bate'teze de latje, na' chonchen byen goncho güen len bene' chesejnilaže' Criston' clet ca len yezica'chle bene'.

Yeto chope dan' che' Pablon' legaque'

¹¹ Le na'šc letr cha'o quinga, le cuina' chzoja' le'e. ¹² Bene' ca' chesaclaže' yesone' byen soale señw dan' že' circuncisión chesacde' yesyebe bene' Israel gualaž cheto' ca' legaque' še ba bosozoe' le'e señon'. Chesyejiljwlaže' nacle yesone' cont nono yosoči yososaca' legaque' da' chesejle'e Criston' bnežjw cuine' neche chio' cate' gote' le'e yag cruzen'. ¹³ Bene' ca' chesene' cheyała' soale señon' zjachi' yichjgaque' ley dan' bzoj da' Moisésen' perw ne legaque' cbi chesone' can' žanna'. Con chesaclaže' soale señon' cont yesonxen cuingaque' lao bene' Israel gualaž cheton'. ¹⁴ Ca nac neda', bitw gonxen cuina', san gonxena' Xancho Jesucriston' dan' bnežjw cuine' gote' le'e yag cruzen' neche chio'. Bitwbi nonen len neda' še benachen' yesyebede' neda', le neda' bich chebeda' da' ca' chesena benachen'. ¹⁵ Na' len chio' chejnilaže'cho Cristo Jesúsén' nezda' bibi nonen še zoacho señw dan' že' circuncisión o še bi zoachon, perw zaca'chgua dan' ba bocob Diosen' yichjlažda'ochon'. ¹⁶ Lao Diosen' naccho dogualje bene' Israel še ba chejnilaže'cho Jesucriston'. Na' chnaba' gaclen Diosen' yogo'le ba zoale chzenagle che' cont soa cuezchle binlo len xbab chele, na' lecze chnaba' yeyaše' yeži'ilaže'de' le'e.

¹⁷ Na' na'a chnabšca' bich gonle güedenag len xtižan', le cuerp chia' nga nsan' yiž che dan' bosochi bososaca' bene' neda' neche chyixjue'eda' xtiža' Xancho Jesúsén'.

¹⁸ Bene' migw, chnaba' soašca Xancho Jesucriston' gaclenšque' le'e len xbab dan' yo'o yichjlažda'olen'. Da' na'zen' chzoja' na'a.

CART DAN' BZOJ POSTLW SAN PABLO CHE BENE' CA' ŽE' EFESO

Pablon' bzoje' bene' chesejnilaže' Criston' ciuda Efeso

¹ Neda' Pablo naca' postlw che Jesucriston' con can' gwnalaže' Diosen'. Na' chzoja' le'e zoale Efeso le'e nacle lo na' Diosen' da' chejnilaže'le Criston'.
² Chnabda' Xacho Diosen' na' Xancho Jesucriston' yesaclene' le'e na' yesone' cont soa cuezle binlo len xbab chelen'.

Diosen' chaclenchgüe' chio' da' ngode'cho txen len Criston'

³ Cheyala' gonxencho Diosen' ben' nac Xa Xancho Jesucriston' na' le' lecze chonxene' Diosen'. Chio' naccho txen len Criston', Diosen' ba bene' chio' yogu' da' chyažje yichjlažda'ochon' cont šjayzoacho len le' yaban'.
⁴ Na' da' bnežjw cuin Criston' neche chio', da'nan' Diosen' gwleje' chio' cate' biña' xe yežlion' cont gaccho bene' laždao' xilaže' na' bibi doła' gapcho lagüen'.
⁵ Diosen' chacde' chio' cate' biña' soacho. Da'nan' bsi'e xnezen' none' chio' ca xi'ine' con can' gwnalaže', na' da'nan' gwsele' Jesucriston' neche chio'.
⁶ Cheyala' soaczcho gonxencho Diosen' catec nži'ilaže'de' chio', le gwsele' Jesucriston' ben' chacde' cont le' goclenchgüe' chio'.
⁷ Caten' got Criston', blalj xchene' neche da' xinjen' ben' chio' chejnilaže'chone'. Da'nan' Diosen' bezi'xene' xtola'chon', le nži'ilaže'chgüede' chio'.
⁸ Na' chonchgüe' güen len chio', chone' chio' doxen yela' sina' na' yela' chejni'i da' chyažjecho.
⁹ Na' bzejni'ide' chio' da' gwnalaže' da' nono gwneze can' da' bžie' bia' gac.
¹⁰ Le Diosen' bžie' bia' žin ža cate' yogu' bene' že' yaba len bene' že' yežlion' yosozenague' che Criston' na' yesaque' txen len le'.

¹¹ Ca nac chio' naccho txen len Criston', Diosen' bsi'e xnezen' none' chio' ca xi'ine' cont gac lo na'cho da' chaclaže' gone' chio'. Na' Diosen' chone' cont chac dan' chsi'e xnezen' na' chone' da' nezde' naquen güen.
¹² Cani'te neto' bene' Israel ba chbezto' yid Criston', le zgua'tec gwlej Diosen' neto' cont gonxento'ne' da' naque' bene' zaca' juisyw.
¹³ Na' lecze ca' le'e, cate' benele diža' güen che Criston' dan' nac da' li na' gwnezele chaclaže' gone' yela' mban checho toli' tocañe, nach gwyejnilaže'lene'. Da'nan' lecze le'e ba nacle txen len Criston', na' Spiritw che Diosen' bžinen zoan lo' yichjlažda'olen', can' gwne' soan. Na' Spiriton' zoan len chio' cont nezecho ba non Diosen' chio' ca xi'ine'.
¹⁴ Lecze zoan lo' yichjlažda'ochon' cont nezecho žin ža gac lo na'cho yogu' da' ca' za' gonch Diosen' chio' naccho xi'ine' cate' gone' cuerp cobe chechon'. Na' gonche' chio' da' ca' cont gonxenchone' da' naque' bene' zaca' juisyw.

Pablon' gwnabe' gwnežjw Diosen' bene' chesejnilaže'ne' yela' sina' che'

¹⁵ Da'nan' cate' benda' diža' can' chejnilaže'le Xancho Jesús'en' na' can' chaquele yezica'chle bene' chesejnilaže'ne', gwzolagua' ¹⁶ choa' yela' choxclen che Diosen' neche le'e cate' choļ güiža' Diosen', na' bi chezi'laža' chona' ca'.
¹⁷ Dios ben' chonxen Xancho Jesucriston', ben' nac Xe' na' ben' nac bene' zaca' juisyw, len' choļ güiža'. Na' chnabda'ne' cue' yela' sina' chen' lo' yichjlažda'olen' na' gaclene' le'e cont gombia'chlene'.
¹⁸ Na' chnaba' šo' be'ni' che' lo' yichjlažda'olen' cont nezele bi da' güenna' zoacho lez gone' len chion' ba gwleje' naccho xi'ine'. Na' chnaba' gone' cont nezele catec güen juisyw nac yogu' da' ca' za' gone' yesaquen che chio' chejnilaže'chone'.
¹⁹ Na'

lece chnaba' šo' be'ni' che' lo' yichjlažda'olen' cont nezele leca nape' yela' guac xen cont gaclene' chio' chejnilaže'chone'. Blo'e yela' guac xen juisyw che' ²⁰ cate' bosbane' Criston' ladjo bene' guaten'. Na' gwde bosbane'ne' nach nzoe'ne' cuite' yaban' gan' chesenabi'e txen. ²¹ Le Criston' chnabia'che' ca note'teze angl. Chnabia'che' ca beñach, na' ca da' xigüe', na' ca bi da' chesejnilaže' bene', na' ca note'tezehle chesenabia' na'a na' tiemp da' za' za'. ²² Diosen' ba gwlo'e lo na' Criston' yogo' bene' na' bica'chle da' zjade cont le' chnabi'e. Na' Diosen' bzoe' Criston' ca Xancho cont chnabi'e yogo' chio' chejnilaže'chone'. ²³ Da'nan' chio' chejnilaže'chone' zaca'lebcho ca to cuerp, na' Criston' zaca'lebe' ca yichj cuerpen'. Guac nacho nya' Criston' neche chio' chejnilaže'chone'. Na' Criston' zoe' chnabi'e doxen.

2

Diosen' chacde' chio'

¹ Na'a Diosen' ba bocobe' yichjla'ažda'olen' da' chejnilaže'le Criston'. Cana' gwzoale bentezle da' malen' na' gwdaple doła' lao Diosen'. Da'nan' gogle ca bene' guat da' bi bzenagle che'. ² Con gwdaczle benle da' mal can' cheson yezica'chle bene' bi chesejnilaže' Diosen', na' bzenagle che Satanás dan' chnabia' da' xigüe' ca' dan' zjanyechjen beñachen'. Na' ža na'aža Satanásen' ne' chnabian' yichjlaždao' bene' bi chosozenag che Diosen'. ³ Na' ca'cze gwzoa yogo'cho, gwzoatezcho bencho bi da' mal can' gwnan checho na' bi da' mal da' gwzelaže' yichjlažda'ochon'. Na' da' bebecho da' malen' lo' yichjlažda'ochon', da'nan' gwchoglaon checho si'cho castigw che xtola'chon' toli tocañe, can' gac len yezica'chle bene' bi chosozenag che Diosen'. ⁴⁻⁵ Goccho ca bene' guat len yichjlažda'ochon' da' gwzoacho bentezcho da' malen'. Na' šlac ne' naccho ca', Diosen' leca beyaše' beži'ilaže'de' chio' na' gocchgüede' chio'. Na' lagüe da' nži'ilaže' Diosen' chio', da'nan' bocobe' yichjlažda'ochon' cate' gweyjnilaže'cho Criston', na' bene' yela' mban checho toli tocañe. ⁶ Na' da' bocobe' yichjlažda'ochon', guac nacho bene' len chio' can' bene' len Cristo Jesúsén' cate' bosbane' le' ladjo bene' guat ca'. Na' da' naccho txen len Criston', mbalaz bač zoacho chbezcho len le' na'a can' soacho cate' yežincho yaban' gan' chi'ena'. ⁷ Diosen' goclene' chio' ca' cont tiempen' za' za' gwlo'echde' catequen' nži'ilaže'chgüede' chio', le gonchgüe' zanch da' güen len chio' naccho txen len Cristo Jesúsén'. ⁸ Da' nži'ilaže' Diosen' chio', ba bene' yela' mban checho toli tocañe cate' gweyjnilaže'cho Criston'. Con bene' to goclen, gague neche bi da' güen da' ben chio'. ⁹ Le Diosen' bi chaclaže' güe'cho diža' o gaguecho bñitlagüe' xtola'chon' neche bi da' güen da' ba bencho. ¹⁰ Diosen' bene' chio' na' cate' gweyjnilaže'cho Cristo Jesúsén' bocobe' yichjlažda'ochon' cont soacho goncho da' güen. Cate' bina' soacho, bs'i'e xñezen cont soacho goncho da' güen.

Bene' Israel na' bene' bi zjanaque' bene' Israel, Criston' bozoe' legaque' binlo toe'yeto'

¹¹ Da'nan' le gon xbab can' goc len le'e cana', le'e goljle bi nacle bene' Israel can' nac neto'. Canan' neto' che' lježto': "Chio' zoacho señw da' že' circuncisión", na' che'to' le'e: "Bi zoale señw da' že' circuncisión" (señw da' chosozaa bene' Israel gualaž cheto' ca' lo cuerp che bi' byo dao' ca'). ¹² Na' le gon xbab can' gwzoale cana', bi nombia'le Criston', bi nacle nación che Diosen' ca neto' bene' Israel nacto', na' Diosen' bi gwne' gaclene' le'e can' gwne' gaclene' neto' bene' Israel. Bi gwzoale lez šjayzoale len Diosen' na' neca

gweynilaže'le Diosen' lo yežlio nga. ¹³ Perw Criston' bnežjw cuine' gosote'ne' na' blalj xchene' neche chio'. Na' na'a da' chejnilaže'lene' ba nacle txen len Cristo Jesúsen'. Na' ba nacle toze len neto' bene' Israel, la'czla' cana' gogle bene' zito' len neto' na' len Diosen'. ¹⁴ Cana' neto' bene' Israel na' le'e bi nacle bene' Israel bgue'e lježcho. Perw Criston' ba bene' cont naccho toze na' ba bozoe' chio' binlo tocho yetocho. ¹⁵ Caten' bnežjw cuine' gote', bzoe' ca'ale ley da' bzoj da' Moisésen' len yogo' da' žan cheyala' goncho. Na' bzoen' ca'ale cont bozoe' chio' chejnilaže'chone' binlo tocho yetocho na' beyone' chio' to yež cobe che', chio' naccho bene' Israel lente chio' bi naccho bene' Israel. ¹⁶ Da' bnežjw cuine' gote' le'e yag cruzen', zoacho binlo len Diosen', chio' naccho bene' Israel na' chio' bi naccho bene' Israel, na' lecze naccho toze na' bich chgue'e lježcho.

¹⁷ Na' Criston' caten' bide' yežlion' bedeye'e diža', gwne' benachen' guac yesenite' binlo len Diosen', gwdixjue'eden' len le'e bi nacle bene' Israel, le'e bi nombia'le xtiža' Diosen' cana', na' lente neto' nacto' bene' Israel, neto' nombia'to' xtižen'. ¹⁸ Le chio' chejnilaže'cho Criston', chio' naccho bene' Israel na' len chio' bi naccho bene' Israel, toz Spiritw che Diosen' chaclenen chio' cont choe'lencho Diosen' diža'. ¹⁹ Da'nan' le'e bi nacle bene' Israel bich nacle ca' bene' zito' len Diosen'. San yogo' chio' chejnilaže'cho Criston' ba naccho txen, le Diosen' ba none' chio' ca' bene' lo' yo'o che'. ²⁰ Chio' chejnilaže'chone' zaca'lebcho ca to yo'o de yej. Na' neto' postlw na' yezica'chle bene' chesoe'lene' le'e xtiža' Criston' zaca'lebo' ca lene yo'ona'. Na' Jesucriston' zaca'lebe' ca yej squin che yo'ona'. ²¹ Na' chio' naccho txen len Criston' lecze zaca'lebcho ca yej da' zjancua' zjangoden' gan' chac yo'o de yeja'. Zjangoden' txen na' zej cha' yo'ona'. Ca'cze chio' naccho txen len Xancho Criston' na' len lježcho, na' naccho ca to yo'o gan' zoa Diosen'. ²² Le'e txen len neto' na' len note'teze bene' chesejnilaže' Criston' naccho ca to yo'o gan' zoa Diosen', le zoa Spiritw chen' lo' yichjlažda'ochon'.

3

Diosen' gwleje' postlw Pablon' cont jatixjue'ede' xtižen' len bene' bi zjanac bene' Israel

¹ Na' da' naquen ca', neda' Pablo chol güiža' Diosen' neche le'e. Dia' ližya nga da' chyixjue'eda' xtiža' Cristo Jesúsen' len le'e bi nacle bene' Israel. ² Chacda' ba nezeljele nži'ilaže' Diosen' neda' na' bsi'e xnežen' chzejni'ida' le'e xtižen'. ³ Ba bzejni'ide' neda' da' nono gwneze, can' ba bzoja' le'e to chope diža' le'e cart nga. ⁴ Cate' gwlable cart nga gache'ele chejni'ida' da' nono gwejni'i cana' che Criston'. ⁵ Cana' Spiritw che Diosen' bi bzejni'in bene' da' nono gwneze che Criston', perw na'a ba bzejni'in neto' postlw che Diosen', na' ba bzejni'in nochle neto' gwleje' cont choe'to' xtižen', neto' nacto' lo' na' Diosen'. ⁶ Da' nga bzejni'in neto', le'e bi nacle bene' Israel txen len neto' nacto' bene' Israel si'cho da' gwna Diosen' gone' che chio' naccho xi'ine' neche da' chejnilaže'cho Cristo Jesúsen', na' txen naccho ca toze bene', na' txenna' chaclen Diosen' chio' can' gwne' gone'.

⁷ La'czla' bitec bi zaca', Diosen' gwleje' neda' len yela' guac chen' cont chyixjue'eda' diža' güen chen'. ⁸ Chacda' ne late'ze bibi zaca' ladjo yogo' bene' ba gwlej Diosen' zjanaque' lo' ne'e. Bia'cze nži'ilaže'de' neda' na' gwleje' neda' cont chyixjue'eda' len bene' bi zjanac bene' Israel catec da' zan da' güen juisyw gone' len yogo' chio' chejnilaže'cho Criston'. ⁹ Na' Diosen' gwlo'e lo' na' chzejni'ida' yogo'lol bene' da' nžie' bia' gac. Gwzolaoten cate' gwxe

yežlion', nono gwņezze da' nžie' bia' gac, con toz Diosen' gwņezze', Dios ben' bene' yogo'loł bene', yogo' beyixe' na' yogo' bichle da' de. ¹⁰ Le Diosen' nžie' bia' bene' ca' zjanac angl blao che' na' angl gwnabia' zjanita' yaban' yesele'ede' can' chone' len chio' chdop chžagcho chonxencho Jesucriston', cont yesacbe'ede' nape' yela' sina' len yogo'loł da' chone'. ¹¹ Chone' can' bžie' bia' gone' caten' biņa' xe yežlion', le cani'te bsi'e xņezen' sele' Xancho Jesucriston'. ¹² Na' naccho txen len Criston' da' chejnilaže'chone'. Da'nan' bi chžebcho Diosen', san chbecho nezecho chac choe'lenchwne' diža'. ¹³ Nachen' chņeyoeda' le'e bi gacžejlaže'le che da' chac chia' nga chyi chzaca' lagüe da' chyixjue'eda' xtiža' Jesucriston' len le'e. Naquen da' yebele, gague da' gacžejlaže'le.

Criston' chacde' chio' chejnilaže'chone'

¹⁴ Na' da' naquen ca', chzoa xiba' choł güiža' Xa Xancho Jesucriston'. ¹⁵ Le' bxie' yogo' diaža che chio' zoacho yežlio nga na' che bene' že' yaba. ¹⁶ Diosen' naque' bene' zaca' juisyw na' nape' la'zelagüe' yela' guac xen. Nachen' chņabda'ne' gone' ga soa Spiritw chen' lo' lažda'olen' cont soa chach laže'le len yela' guac chen'. ¹⁷ Chnaba' soateze soa Criston' len le'e da' chejnilaže'lene'. Na' chņaba' soacze gaquele Diosen' na' gaque lježle do yichj do laže'le, ¹⁸ cont gac šejni'ile txen len yezica'chle bene' zjanaque' lo' na' Diosen' catec chaquechgüe Criston' chio'. Da' xen chaquechgüede' chio', con bi cheyož yedo ca chacde' chio'. ¹⁹ Le bina' šejni'icho catec chaquechgüede' chio'. Na' lecze chņaba' zej gacchle bene' güen doxen can' nac Diosen'.

²⁰ Na' Diosen' chac chone' yogo'loł, na' chone' da' gualch ca da' chņabechone' o da' choncho xbab gone'. Na' chone' cont Spiritw chen' zoan lo' yichjlažda'ochon' chaclenen chio' len yela' guac chen'. ²¹ Na' chio' chdop chžagcho chonxencho Criston', cheyała' gonxencho Diosen' na'a na' toli tocanē da' gwsele' Cristo Jesusen' neče chio'. Na' can' gonščaczcho.

4

Naccho toze len yogo' bene' chesejnilaže' Criston'

¹ Neda' dia' ližya nga da' chyixjue'eda' xtiža' Xancho Jesucriston'. Nachen' chņeyoeda' šejšcale gonle güen can' cheyała' goncho da' gwlej Diosen' chio' naccho xi'ine'. ² Na' chata'yoeda' le'e bi gonxen cuinle, san le gon xbab bitec bi zaca'le; na' gacle bene' šagüe' na' gaple yela' chxenlaže' len bene' lježle na' le gacde' bite'teze yesone'. ³ Spiritw che Diosen' ba nonen chio' toze da' chejnilaže'cho Criston', na' le gon con ga zelao saque'le cont soacze gonle toze xbab len bene' lježle, le Diosen' ba bozoe' le'e binlo tole yetole. ⁴ Yogo' chio' chejnilaže'cho Criston' naccho ca toz bene', na' toz Spiritw che Diosen' zoan lo' yichjlaždao' yogo'cho. Na' cate' Diosen' gwleje' chio' cont naccho xi'ine', lecze bene' cont toz can' zoacho lez gone' güen len chio'. ⁵ Toz Jesucriston' naque' Xancho, na' toz can' chejnilaže'chone', na' toz ca zejen cate' chzoacho nis. ⁶ Na' toz Diosen' chonxencho ben' nac Xa yogo'cho. Len' chnabi'e yogo'cho, na' chchine' yogo'cho choncho xšinen', na' zoacze' len yogo'cho.

⁷ Na' Criston' chaclene' to tocho na' none' checho gwde gwdele da' gon to tocho. ⁸ Da'nan' nyoj Xtiža' Diosen' žan: Cate' beyepe' yaban' bebeje' bene' zan lo' na' gwxiyen' cont bechi'e legaue'. Na' bi'e che beņachen' da' gac gon to toe'.

⁹ Na' can' žan: "Beyepe' yaban'", zejen betje' golje' beⁿačh yežlio nga na' gwden' gote' bgaše'. ¹⁰ Na' ben' betj golje' beⁿačh, le^cze len' beyepe' yaban' gan' zoa Diosen', na' na'a zoe' chnabi'e doxen. ¹¹ Na' le^cze len' none' che bałcho naccho postlw, na' none' che bałcho chyixjue'echo bi da' ba gwne', na' none' che yebałcho chje'cho diža' güen chen' len bene' bina' yesenden', na' yebałcho none' checho chgüia chna'cho bene' chesonxene' le' na' chsed chlo'echo legaque'. ¹² Can' chon Criston' cont chio' naccho lo ne'en chac choncho xšinen'. Na' chonchon cont to to chio' naccho toze len le' zejech gacchcho can' chazlažen'. ¹³ Diosen' chaclaže' yogo'cho gaccho toze šejnilaže'cho Xi'inen' do yichj do laže'cho na' gombia'chone' binlo. Chaclaže' gacyane'cho can' cheyał' gaccho, na' gaccho bene' güen can' nac Criston'. ¹⁴ Na' še gaccho ca', bich šo'cho xbab ca che to bidao', šejcho qui šejcho ca'ale na'ocho to to yela' chejnilaže' da' chesaljlaže' bene' güenlaže' na' bene' gwxiye' cont chesonlede' chio'. ¹⁵ Na' cheyał' güe'lencho bene' diža' li, perw gaccho bene' šägüe' len legaque' cont yesache'ede' le chaquechone'. Goncho ca' cont zejech gacchcho bene' šägüe' bene' güen can' nac Criston' ben' chnabi'e chio'. ¹⁶ Cate' to to cuen cuerp chechon' ngoden' na' noxe' lježen len bela' na' len žit na' len bechj bnia ca' da' ncan', na' to to cuenen chesonen ž'in, nach doxen cuerp chechon' chonen žin ca cheyał'. Na' ca'cze chio' chejnilaže'cho Criston' ngode'cho txen cont to tocho goncho da' non Diosen' checho goncho, na' yogo'cho txen zej gacchcho bene' šägüe' na' zej gaquech lježcho.

Diosen' ba bocobe' yichjlaždao' chio' chejnilaže'chone'

¹⁷ Da' nga chnia' le'e, Xancho Criston' none' mandadw gwzejni'idan' le'e: bi cheyał' soacho goncho xbab ca cheson bene' bi chesejnilaže' Diosen', le bibi zacan'. ¹⁸ Nchoł yichjlažda'ogaque'. Na' bi zjanape' yela' mban tołi tocaⁿe ca da' non Diosen' chio', neca chesejni'ide' che Diosen', le zjanaque' bene' güedenag len le'. ¹⁹ Bibi zto' zjanombi'e che da' malen' chesone', na' con chesonteze' yogo' yela' zto', na' chesezelaže' yesenite' yesonche' da' malen'. ²⁰ Le'e ba nsedle can' ža Criston' na' nezele bi cheyał' gaccho ca', ²¹ le chacda' ba benele dižan' gwne' lo' yichjlažda'olen', na' neto' le^cze ba bzejni'ito' le'e diža' li chen'. ²² Nezele bich cheyał' gwzenagcho che da' malen' da' chzelaže' lažda'ochon' goncho, can' bencho cana' cate' yela' gwzelaže' chechon' ne' chonlen chio' cont bentezcho da' malen'. ²³ San na'a cheyał' gwša'cho xbab da' choncho lo' yichjlažda'ochon'. ²⁴ Cheyał' güe'cho latje yocobech Diosen' yichjlažda'ochon' cont soacho goncho da' zej to li can' chon le', na' gaccho bene' laždao' xilaže' can' chazlaže' le'.

²⁵ Da'nan' bich gonlaže'cho, san güe'len lježcho diža' li, le ngode' lježcho naccho ca toze bene'.

²⁶ Na' cate' chža'acho bi cheyał' goncho da' xinj. Cheyał' yob yeyacxenlaže'cho na' bich ža'acho do ža. ²⁷ Na' bi güe'cho latje cont Satanás dan' chnabia' da' xigüe' ca' nabian' xbab chechon' cont goncho da' xinj.

²⁸ Na' nole še ba yolaole chbanle, bich cheyał' cuanle. Cheyał' gonle žin da' nac güen len ni'a na'le cont gata' da' gwnežjwle bene' chyažj chchine.

²⁹ Na' bi cheyał' güe'cho bite'teze diža' zban, san güe'cho diža' šägüe' len yogo'loł bene', con can' chyažje to toe' cont gaclen le'. Goncho ca' cont xtžiča'chon' gaquen da' zaca' gwzenag bene'. ³⁰ Na' bi goncho cont yeyaše'laže' Spiritw che Diosen', le Diosen' ba bene' ga zoan lo' yichjlažda'ochon' cont nezecho naccho xi'ine' na' nezecho žin ža yedyexi'e chio'.

³¹ Cheyala' cuejyichjcho yogo' da' mal, bich gonchon. Bich co'olaže'cho, bich ža'acho, na' bich gü'e'cho diža' loc diža' lžej. Bi necho che bene', neca gaccho bene' xi'a. ³² San cheyala' gaccho bene' šagüe' na' yeyaše' lježcho tocho yetocho. Na' cheyala' yezi'xen che lježcho bite'tez da' chesonde' chio' con can' bezi'xen Diosen' checho cate' gwejynilaže'cho Criston'.

5

Cheyala' goncho can' chon Diosen'

¹ Nachen' cheyala' soacho goncho can' chon Diosen', le naccho xi'ine' na' chacde' chio'. ² Cheyala' soacho gaque lježcho ca Criston' chacde' chio' na' bnežjw cuine' gote' neche chio'. Na' chebe Diosen' da' bene' ca', can' chebe bene' to da' chla' zix.

³ Da' naccho lo na' Diosen' cheyala' gue'echo da' malen'. Gwbatech cheyala' gata'lencho no'ole bi nac no'ol checho o bene' byo bi nac bene' checho o goncho bichle da' nac da' yela' zto' len cuerp chechon'. Na' bi cheyala' selaže'cho da' de che bene'. ⁴ Bi cheyala' gü'e'cho diža' da' naquen da' yela' zto' o bite'teze diža' le'e, diža' da' bibi zaca' da' bi nca' xneze, le bi zejen gü'e'cho dižan' zjanac ca'. San cheyala' soacho gü'e'cho yela' choxclen che Diosen'. ⁵ Nita' bene' byo ben' chesata'lene' no'ole bi nac xo'olgaque' na' nita' no'ole ben' chesata'lene' bene' byo bi nac bene' chegaque', na' nita' bene' chesyebede' dan' naquen da' yela' zto'; na' nita' bene' chesezelaže' bi da' de che bene'. Ba nezezele bene' ca' cheson da' malen' zjanac ca' bi yesyežine' yaban' gan' chnabia' Criston' len Diosen'. (Na' ca nac bene' chesezelaže' bi de che bene', toz ca malen' chesone' len da' cheson bene' chesejnilaže' l gua'a lšacan'.) ⁶ Bi gü'e'le latje no siye' le'e len diža' güenlaže'. Diosen' chnežjue' castigw toli tocaņe che bene' ca' bi chosozenag che', bene' cheson da' mal ca' ba gwnia'. ⁷ Da'n'an' bi cheyala' gaccho txen len bene' cheson ca'.

⁸ Cana' nchol yichjlažda'ochon', perw na'a ba yo'on be'ni' che Xancho Criston', na' cheyala' soacho goncho da' güen can' chaclaže' Diosen' gon chio' nombia'chone'. ⁹ Na' še ba gwyo'o be'ni' che Criston' lo' yichjlažda'ochon', nach gaccho bene' šagüe' na' goncho da' güen da' zej to lica. ¹⁰ Cheyala' gwšedcho cont nezecho can' chaclaže' Xancho Criston' goncho. ¹¹ Bi cheyala' goncho txen len da' malen' cheson bene' ca' zjanchol yichjlažda'ogaque', le chesone' da' bibi zaca'. San cheyala' gwzejni'icho legaque' da' malen' chesone', ¹² le naquen da' cheto'echo gü'e'cho diža' che da' ca' chesone' do багаše'ze. ¹³ Na' cate' be'ni' che Criston' šon' lo' yichjlaždao' bene', nach yesacbe'ede' che bite'teze da' chesone' še naquen da' mal, le be'ni' čhen' chzejni'in benachen' che xbab chegaque' na' bi da' chesone' še naquen güen o še naquen mal. ¹⁴ Da'n'an' nyojen quinga che note'teze bene' chon da' malen': Naco' ca bene' chtas na' ca bene' guat da' bi chzenago' che Diosen'. Bzenag che' cont Criston' cue'e be'ni' lo' yichjlažda'oguo'.

¹⁵ Nachen' cheyala' soacho na'cho dan' choncho. Cheyala' goncho da' naquen da' sina', gague goncho ca bene' bi chejni'i. ¹⁶ Na' yogo' ža cheyala' goncho can' chazlaže' Diosen', le na'a že'chgua bene' chesone' da' malen'. ¹⁷ Bi goncho ca bene' bibi xbab nye'. Cheyala' šejni'icho can' chaclaže' Diosen' goncho cont gonchon. ¹⁸ Na' bi cheyala' gaccho bene' borraše, le bene' chesezože' chosožiyai' cuine'. San chio' cheyala' gü'e'cho latje soachgua Spiritw che Diosen' lo' lažda'ochon' nabian' chio' len da' choncho. ¹⁹ Cheyala' gwšaljen lježcho no salmos na' gollen lježcho no himnos o bichle da' ža Spiritw che

Diosen' gołcho. Na' cheyała' nechon na' gołchon do yichj do laže'cho gonxencho Xancho Jesucriston'. ²⁰ Yogo' ni'a cheyała' güe'cho yela' choxclen che Xacho Diosen' che yogo' da' chone' chaclene' chio'. Na' Xancho Jesucriston' zoe' chaclene' chio' cont güe'cho yela' choxclen che'.

Can' cheyała' soalen bene' lo' yo'o chechon'

²¹ Da' chapcho Diosen' bala'an cheyała' gwzexjw yichjcho gwzenagcho tocho yetocho.

²² Na' le'e no'ole, le'e nšagna'le, to tole cheyała' gwzenagle che bene' chele, le chzenagle che Xancho Criston' cate' chzenagle chegaque'. ²³ Diosen' nzoe' bene' chele cont zjanacche' blao ca le'e, can' nzoe' Criston' nacche' blao ca chio' chdop chžagcho chonxenchone'. Le chion' guac nacho naccho cuerp che Criston', na' le' none' chio' yela' mban toli tocañe. ²⁴ Na' ca chio' chonxencho Criston' cheyała' gwzenagcho che', ca'czen' le'e no'ole le'e nšagna'le, to tole cheyała' gwzenagle che bene' chele yogo' bin' chese'e le'e.

²⁵ Na' le'e bene' byo le'e nšagna'le, to tole cheyała' gaque no'ol chelen' con can' chaque Criston' chio' chonxenchwne' na' bnežjw cuine' neche chio' cate' gosote'ne'. ²⁶ Na' cont gwlo'e chio' lo' na' Diosen', beyone' lažda'ochon' xilaže' cate' gweyje'le'cho xtižen'. ²⁷ Na' bene' ca' cont yebede' chio' cate' yežincho lagüen', bibi xtoła'cho gata' na' ne bichle da' mal yo'o nyaz lo' yichjlažda'ochon', san gac lažda'ochon' xilaže' lagüen'. ²⁸ Na' con can' nži'ilaže' Criston' chio', can' cheyała' ži'ilaže' to to bene' byo no'ol chen'. Le'e bene' byo, to tole cheyała' ži'ile no'ol chelen' can' nži'ile cuerp chelen', le nži'icze cuinle cate' chonle ca'. ²⁹ Nono zoa no chgue'e cuerp che', san yogo'cho nži'icho cuerp chechon' na' chapši'ichon. Na' can' chon Criston' len chio' chonxenchone', nži'ide' chio' na' chapši'e chio'. ³⁰ Na' chone' ca' da' naccho ca to cuen güeje cuerp chen', ca žit da' yo'e na' ca xpele'. ³¹ Na' Xtiža' Diosen' nyojen žan: "Da'nan bene' byo le'e len xaxne'e na' si'e no'olen' gwšagna'lene' le' na' yesaque' toze." ³² Diža' quinga ba bzoja' naquen to da' nono gwejni'i cani', perw chnia' naquen to da' chzejni'in chio' chdop chžagcho chonxencho Criston' cont nezecho can' cheyała' soacho len le'. ³³ Na' lecze ca' le'e bene' byo le'e nšagna'le, to tole cheyała' gaque no'ol chele can' chaque cuinle, na' le'e no'ole nšagna'le, to tole cheyała' gagle bala'an bene' chele.

6

¹ Na' le'e bidao', le gwzenag che xaxna'le, le can' cheyała' gon chio' naccho txen len Xancho Criston'. ² Cate' Diosen' bnežjue' xozxta'oto' ca' ley chen', gwne': "Le gap bala'an xaxna'le." Na' goquen da' nechw da' bžie' bia' yesone' da' nsa' to da' güen da' gone' len legaque' še yosozenague' chen, gwne': "Le gap bala'an xaxna'le ³ cont gac güen chele na' cont banle sša lo yezlio nga."

⁴ Na' le'e nita' xi'ınle, le yosgol le yoscha'o bi' chele ca' binlo, diža' šagüe' gwzejni'ile legacbe' cont yosozenagbe' che Xancho Criston' na' gague con gonle ga yeseža'a yeselocbe'.

⁵ Na' le'e mos, le gwzenag che xan žin chelen' do laže'le na' le yeyiljwlaže' naquen' gonle da' yesazlaže' to toe', le lecze chzenagle che Criston' caten' chzenagle chegaque'.

⁶ Le gwzenag chegaque' do yichj do laže'le, gague cate'zen' chesene'e can' chonlen', le nacle bene' güen xšin Criston', na' can' chaclaže' Diosen' goncho. ⁷ Na' cheyała' güe'laže'cho goncho žin che bene' cont yebe Xancho Criston' chio', gague cont yebe bene' nac xan žin na'ze. ⁸ Goncho ca', le nezecho

bite'teze da' güen da' choncho, Xancho Criston' gone' cont žin ža yebi'in güen len chio', chio' naccho esclavos na' len chio' bi naccho esclavos.

⁹ Na' le'e nacle bene' xan žin, le gon güen len bene' ca' cheson xšinle. Bitw co'ole legaque' šeb, le Xancho Diosen' zoe' yaban' chna'cze' can' chonlen', na' lecze chna'cze' can' cheson bene' güen žin chelen', na' toz can' chone' len yogo'lol bene' note'teze zjanaque'.

Can' goncho cont Satanásen' bi gonen chio' gan

¹⁰ Nachen' bene' migw, da' naccho txen len Xancho Criston', cheyala' soachachcho šejnilaže'chone', le nape' yela' guac xen cont chaclene' chio'.

¹¹ Cheyala' gon cuincho gual doxen can' chaclaže' Diosen' goncho, cont soachachcho bi šejle'cho che Satanás dan' chnabia' da' xigüe' ca' cate' chy-ijwlažen' siyen' chio'.

¹² Le gague bene' nac bela' chenna' chdillencho, san chdillencho da' xigüe' ca', da' ca' besyeyaquen da' mal, na' bichle da' chesenabia' bene' že' yežlio nga bene' nchol yichjlažda'ogaque' len da' malen'. Chdillencho yogo'lol spiritw mal ca' gate'teze chesašen.

¹³ Da'nan' cheyala' gon cuincho gual doxen can' chaclaže' Diosen', cont Satanásen' bi soeczen chio' ža cate' tillenen chio'. Na' cate' ba bencho can' chazlaže' Diosen', nach cheyala' soachachcho len le'.

¹⁴ Na' cont soachachcho bi siye' Satanásen' chio', cheyala' güe'cho diža' li yogo' ni'a. Na' še goncho ca', gaclenen chio' ca' da' chchej soldadon' cho'a li'e. Na' cheyala' goncho da' nac güen yogo' ni'a, le še goncho ca', gwcue'ejen chio' ca' xa soldadon' da' naquen de ya chcue'ejen cho'alcho'e.

¹⁵ Na' cheyala' soacho probnidw güe'lencho bene' diža' güen che Criston' da' chzejni'in can' guac soacho binlo len Diosen'. Na' še soacho probnidw güe'lenchon bene', gaclenen chio' can' chaclen xel soldadon' le'.

¹⁶ Na' da' zejechen ca' bichle da' goncho, cheyala' soachachcho šejnilaže'cho Diosen'. Na' še soachachcho šejnilaže'chone', nach gaclenen chio' cont bi gwzenagcho che Satanásen'. Gaclenen chio' ca' escudo da' chchin soldadon' chaclenen le', chosolen yi' che flechas ca' da' chesala'ninen zja'aquen gan' zien', na' chcue'ejen le' len da' ca' zja'ac yesejidjon cuerp chen'.

¹⁷ Na' cheyala' yosa'laže'cho Criston' ba bene' yela' mban checho toli tocane, cont gaclenen chio' ca' chaclen lapa' de ya da' chchin soldadon'. Na' lecze Xtiza' Diosen' da' ben Spiritw che Diosen' cont nyojen, le gonchgua xbab chen cont gaquen len le'e ca' to spada da' chchin soldadon'.

¹⁸ Na' do tiemp cheyala' yol güižcho Diosen' nabcho yogo' da' chzejni'i Spiritw chen' chio'. Na' cheyala' gaccho bene' banlaže' na' yol güižchone' sin cbi yeche'echo, nabcho gaclene' yogo' bene' ba gwleje' cont zjanaque' lo ne'e.

¹⁹ Na' le nab gon Diosen' latje gua' xtižen', na' le nab bi žeba' gua' diža' tcho'a gwzejni'ida' bene' diža' güen che Criston' da' nono gwneze cani'.

²⁰ Le Diosen' gwsele' neda' ca' gualaze' cont bia' xtižen', na' da'nan' dia' ližya nga. Nachen' le nabe Diosen' gaclene' neda' bi žeba' gua' xtižen' tcho'a can' cheyala' guan'.

Pablon' chone' chach laže'gague'

²¹ Chsela' bene' migw checho Tíquico güe'e diža' doxen can' chac cont nezele can' chac chia' na' yogo' da' chona'. Chaquecho Tíquicon' da' naque' txen len chio' chonxencho Criston' na' zoateze' chone' xšin Xancho Criston' can' cheyala' gone'.

²² Nachen' chsela'ne' cont nezele can' chac cheto' na' cont gone' chach laže'le.

²³ Chnaba' lao Xacho Diosen' len Xancho Jesucriston' yesonšque' cont yogo'le chonxenle Criston' soa cuezle binlo len yichjlažda'olen', na' lecze yesonšque' cont yogo'le gague lježle na' soachachle šejnilaže'lene'.

²⁴ Soašcacze

Diosen' gaclene' yogo' bene' chesacde' Xancho Jesucriston' sin cbi yesebeze'.
Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' FILIPOS

Pablo bzoje' carten' šlac die' ližya

¹ Neda' Pablo chseja' cart nga txen len bene' lježa' Timoteo. Chopte neto' gwlej Diosen' cont chonto' xšinen', bite'tezen' že'. Na' chzoja' cart nga che yogo' le'e zoale ciuda Filipos, le'e yo'ole lo na' Diosen' lagüe chejnilaže'le Cristo Jesúsen'. Na' le'e nchojle chgüia chna'le bene' lježle chesejnilaže'ne', na' le'e nchojle chonle žin bixjw da' chata' ladjo le'e chdop chžagle chonxen'ne', decze da' nia' le'e len cart nga. ² Chnabšca' lao Xacho Diosen' na' Xancho Jesucriston' yesaclnšque' le'e na' yesone' cont soa cuezle binlo len xbab da' yo'o lo' yichjlažda'olen'.

Pablo chnabde' Diosen' gaclene' bene' ca' chesejnilaže' Criston' Filipos

³ Yogo' ni'a cate' chjayze'eda' le'e, choa' yela' choxcen che Diosen' ba nacho txen chejnilaže'chone'. ⁴ Na' yogo' ni'a cate' choj güiža' Diosen', chbeda' chnaba' gaclene' le'e. ⁵ Na' choa' yela' choxcen chen' naccho txen chejle'cho diža' güen che Jesucriston', gwzolaoten cate' za' gwyejnilaže'lnē'. ⁶ Na' da' nga nežda', Diosen' gwzolağüe' chone' to da' güen lo' yichjlažda'olen' cana', na' gone' cont yeyož yeyac yichjlažda'olen' can' chazlažen' cate' žin ža yid Jesucriston' da' yoble. ⁷ Da' cheyala'cze gona' xbab chele ca', le chachgüeda' le'e. Na' nežda' Diosen' ba goclene' le'e can' ba goclene' neda' šlac dia' ližya nga, na' šlac ba gwduxjue'eda' diža' güen che Criston' len bene' bi gosejle'e chen, bzejni'ida' legaque' naquen diža' li. ⁸ Diosen' nežde' chachgüeda' yogo'le, le Cristo Jesúsen' chone' cont chacda' le'e. ⁹ Na' chnabda' Diosen' gonšque' cont gaquechne' na' gagueche lježle na' lecze šejni'ichle yogo'loj da' chaclaže' Diosen' šejni'ile na' gache'ele bi da' naquech güen gonle cont gaclen lježle. ¹⁰ Chnaba' da' ca' cont gache'ele bin' chazlaže' Diosen' gonle, na' lecze cont soacze do laže'le na' bibi doła' gapple cate' žin ža yid Criston' da' yoble. ¹¹ Nach gaclen Jesucriston' le'e gonchgualē da' nac güen, na' Diosen' si'e yela' bala'an' na' yezica'chle bene' yesonxene' Diosen' can' chonlen'.

Pablon' chacde' Criston' do yichj do laže'

¹² Bene' migw, che'nda' nezele yogo' dan' ba goc chia' ba gosaclenen cont bene' zanch gosende' diža' güen che Criston'. ¹³ Le yogo'loj soldadw gop ca' cheson žin che bene' gwnabia' nga, na' yezica'chle bene' že' do nga zjanežde' dia' ližya neče choa' xtiža' Criston'. ¹⁴ Na' bene' zan bene' lježcho že' nga lecze ba chesejnilaže'chgüe' Xancho Criston' da' ba besele'ede' can' chaclene' neda' šlac dia' ližya nga. Da'nan' legaque' lecze ba cheseyaxjchde' cheso'e xtiža' Diosen' sin ca' chesežebe'.

¹⁵ Da' li bale' cheseyixjue'ede' xtiža' Criston' da' chesacxi'ede' neda' na' da' chesaclaže' yesacche' blaoch ca' neda', perw yezica'chle bene' ca' cheseyixjue'eden' do laže'. ¹⁶ Na' bene' ca' to cuen cheseyixjue'ede' xtiža' Criston' cont yesacxen cuine', gague cheseyixjue'eden' do laže'gague'. Chesone' xbab zoayaša' da' cheseyixjue'eden'. ¹⁷ Na' bene' ca' yezica'chle cheseyixjue'eden' lagüe chesacde' Criston' na' chesacde' neda', le zjanežde' neda' dia' ližya nga neče chzejni'ida' bene' bi chesejle'e diža' güen che

Criston', chape'gaca'ne' naquen da' li. ¹⁸ Perw bibi nonen len neda' še cheseyixjue'eden' do laže' o še gague do laže', con chebeda' cheso'e diža' che Criston' da' nac diža' li.

Na' dehcze da' chebeda', ¹⁹ le nezda' yechoja' güen len da' quinga chac chia' lagüe dan' chnabe gaclen Diosen' neda' na' lagüe dan' zoa Spiritw che Jesucriston' len neda' chonen chach laža'. ²⁰ Da'n'an' zoa' lez gaclen Diosen' neda' gua' xtiža' Criston' sin cbi žeba'. Na' la'czla' še soacha' o la'czla' še gata', chaclaža' si' Criston' yela' bala'an' na'a len da' gona' na' len da' gac chia' con can' ba gwxi'e yela' bala'an'. ²¹ Chzelaža' gaxcen Criston' len bite'tez da' chona' šlac ne' mbana', na' lecze nezda' soa' mbalazchgua cate' ba gota', le šjayzoalena'ne'. ²² Perw še soacha' yežlio nga na' goncha' xšin Xancho Criston' cont šanch bene' yesejnilaže'ne', o še gata', bi nezda' non' nac güench. ²³ Naquen zdebe nia' non' naquech güen, še soacha' o še gata', le yebeda' gata' na' šjayzoa' len Criston', na' mbalazech soa' neda', še ca'. ²⁴ Perw lecze chona' xbab le'e chyažjele soacha' banča'. ²⁵ Na' da' chacbe'eda' chyažjele soacha', nezda' soacha' len le'e cont gaclena' soachle mbalaz da' chejnilaže'le Criston' na' soachachle šejnilaže'ln'e'. ²⁶ Na' cate' yechoja' nga soacha' len le'e da' yoble, yabele güe'le diža' can' ben Cristo Jesús'en' cont bechoja' ližyan'.

²⁷ Na' bite'teze gac, le soa le gon da' güen can' cheyała' gon chio' ba bzenagcho che diža' güen che Criston'. Le gon ca' cont še yedena'a le'e o še bi yedena'a le'e, con che'nda' yenda' rson chele zoachachle len toze xbab, chonle txen len bene' lježle, na' chonle con ca zelao chzaque'le cont yezica'chle bene' yosozenague' xtiža' Criston' da' ba chejnilaže'le, ²⁸ neca žeble še bi yesone bene' le'e neche chesegue'ede' le'e. Še bi žeble da' yesonde' le'e, gonen cont yesacbe'ede' ba zoa yesebiaye'e toli tocanē; lecze gonen cont yesacbe'ede' Diosen' gone' cont šjayzoale len le'. Yogo' da' ca' zjanaquen da' gon Diosen'. ²⁹ Na' Diosen' ba bsi'e xnezen' gaxcen Criston', gague lagüe da' chejnilaže'lene' na'zen', san lecze gaxcene' da' yosochi yososaca' bene' le'e neche chejnilaže'lene'. ³⁰ Le'e len neda', toz can' chosochi chososaca' bene' chio'; na' ba ble'ele can' bchejda' len da' ba gosonde' neda' cana', na' ba nezele can' chac chia' na'a.

2

Criston' chacxene' da' bzande' yela' zaca' che' cont bide' golje' benach

¹ Nezda' zoale mbalaz da' chejnilaže'le Criston', nezda' chaclaže'le gonle da' güen lagüe dan' chaque Criston' le'e, nezda' zoa Spiritw chen' len le'e, na' nezda' chaque lježle na' cheyaše'laže'lene' cate' bi da' chesac che'. ² Da'n'an' chneyoeda' le'e, le gon cont yebechgüeda' nezda' lecze yogo'czle nacle toz len lježle, na' yogo'czle toz can' zoale chaquele Criston', toz can' chonle xbab, na' toz can' chaclaže'le gac. ³ Bibi cheyała' goncho cont gac güen che cuinzcho na' bibi goncho cont gaxcen cuincho, san cheyała' gwzexjwlaže'cho na' goncho xbab zaca'ch bene' lježcho clal ca chio'. ⁴ Ne tocho bi cheyała' cue' yichjcho che cuinzcho, san cheyała' cue' yichjcho che dan' gaclenen bene' lježcho ca'.

⁵ Cheyała' goncho xbab ca xbab da' ben Cristo Jesús'en'. ⁶ Le la'czla' naque' Dios, bzande' yela' chnabia' che' na' yela' bala'an' xen che' dan' nape' lagüe da' naque' toz len Xe' Diosen' cont bide' golje' benach. ⁷ Bzoe' to šla'ale yogo' da' zaca' dan' gota' che', na' ben cuine' bene' güen xšin Diosen' cate' golje' benach. ⁸ Na' ba naque' benachen' bzexjwlaže' cont bene' con can' gwna Xe' Diosen'. Bzenague' che' cont bnežjw cuine' gosote'ne' le'e yag cruz ca

chesote' bene' malchgua. ⁹ Da'nan' Diosen' benxenchgüe' le' na' bsi'e xnezen' cont Jesucriston' naque' Xan benač, angl, da' xigüe' na' yogo' bichle da' de, na' cont Jesucriston' chnabia'che' ca note'tezechle. ¹⁰ Na' žin ža cate' yogo'lol benač na' yogo'lol angl ca' yosozoa xibgaque' lao Jesucriston', bene' že' yaba, yežlion' na' gate'tezechle. Na' lecze ca' yeson da' xigüe' ca'. ¹¹ Yogo'lol bene' yo'o biš grasyw yosozxjwyichje' yesene' le Jesucriston' nape' la'zelagüe yela' gwnabia' xen. Na' Xancho Diosen' gaxcene' cate' yogüe' yesene' ca'.

Bene' chesejnilaže' Criston' zjazaca'lebde' ca be'ni'

¹² Da'nan' bene' migw, con can' ba gwzoale bzenagle chia' cate' gwzoa' len le'e, ca'czen' chonchen byen gwzenagle chia' na'a bi zoa' len le'e. To tole le gon cont nachia' Diosen' ba bene' le'e yela' mban toli tocaņe, na' le soa cueze gwsaca'le gonle can' chazlaže' Diosen'. Le gon ca' do chžeble, le nezecho bi soečo da' malen' še ba chzenagcho čen. ¹³ Na' Diosen' chone' cont che'nele gonle can' chazlažen', na' chaclene' le'e chonlen.

¹⁴ Le gon yogo' dan' chazlaže' sin cbi gacyožlenlne', neca žeše'le če'. ¹⁵ Le gon ca' cont yesacbe'e bene' chonle can' chazlaže' Diosen' sin cbi doła' gaple. Bibi da' xinj gonle. Bi gonle ca' cheson bene' laždao' mal ben' chesonchgua clele. Nach gacle ca to da' chseni' len yezica'chle bene' že' yežlio nga, ¹⁶ güe'lenle legaque' xtiža' Criston' da' nsa' yela' mban toli tocaņe. Še gonle ca', nach cate' yid Criston' da' yoble, yebechgüeda' can' benlen' na' nezdā' dan' bžaglagua' bena' xšin Diosen' gan' zoalen', gague bendadzan'na'. ¹⁷ Le'e chzane cuinle chonle xšin Diosen' lagüe dan' chejnilaže'lene', na' da'nan' zaca'leble ca to beyixe' be ba gosot bene' cont bosozeye'ba' gosoxene' Diosen'. Na' neda', chebeda' chzanda' yela' mban chia' cont gac doxen can' chazlažen', na' da'nan' zaca'leba' ca to vino da' chosalalje bene' lao Diosen' cate' chesonxene'ne'. ¹⁸ Le yebe len neda' da' chzane cuina' gac da' gac chia', na' le soa mbalaz can' zoa' neda'.

Timoteo na' Epafrodito

¹⁹ Zoa' lez gon Xancho Jesúsēn' latje yob sela' Timoteo gan' zoalen', le yebechgüeda' yenda' can' ba chonlen'. ²⁰ Le nono nochle zoa bene' sela' bene' chi'chgua yichje' gac güen chele can' chi' yichj Timoteon'. ²¹ Yezica'chle bene' con zjachi' yichjgaque' če dan' chac čhegaque', na' bi zjachi' yichje' can' chaclaže' Jesucriston' gac. ²² Perw nezezele ca zoacze Timoteon' chone' da' zaca', na' nezele can' ba goclene' neda' cont gwdixjue'eda' xtiža' Diosen' zan yež. Ca bene' chaque xe' zoe' chaclene'ne' len xšinen', can' zoa Timoteon' chaclene' neda'. ²³ Da'nan' zoa' lez guac sela'ne' gan' zoalen' cate' la' nezteda' nac gac chia' nga, ²⁴ na' sela'ne' la'czla' chejli'a gon Xancho Criston' cont lecze neda' yob yedēna'a le'e.

²⁵ Na' lecze chacda' chonen byen yesela' bene' lježcho Epafrodito gan' zoalen', ben' gwseła'le nga cont chaclene' neda' len bi da' chyažjda'. Ba bene' xšin Diosen' txen len neda', na' lecze ba gwdi gwxaca'to' txen. ²⁶ Che'nchgüede' yele'ede' le'e, na' leca da' chacde' gwnezele gocšēnde'. ²⁷ Na' da' li gocšēnchgüede', yelate'ze ca gote', perw Diosen' beyaše'de' le', na' bi nacho toz le' beyaše'de', san lecze beyaše'de' neda' cate' beyone' le', le da' zan da' ba goc chia' na' nyaše'chgua goc chia' šaca' gote'. ²⁸ Da'nan' zelaže'cha' yesela'ne' gan' zoalen' cont soale mbalaz yežagle da' yoble na' cont bich soayaše'le če'. ²⁹ Le gwlebe' binlochgua da' naque' txen len chio' chejnilaže'cho Xancho Criston', na' le gon xbab ba bene' to da' zaca', na' lecze ca' le gon xbab če

nochle bene' chon can' ba benen'. ³⁰ Le yelate'ze ca gote' da' bzane cuine' goclene' neda' nga len xšin Criston', can' goncze le'e šaca' zoale nga len neda'.

3

Soa cuezcho goncho can' chazlaže' Diosen'

¹ Na' na'a bene' migw, cheyała' soacho mbalaz da' chejnilaže'cho Xancho Criston'. Bi chacda' zed chozoja' che da' ca' ba bzoja', le chyažjen gonchle xbab chen. ² Le gwsaca' cont bi gwzenagle che bene' ca' chesene' cheyała' soale señw dan' že' circuncisión da' yeseçogue' lo cuerp chelen', le zjanaque' bene' zban na' chesyelađe' chesone' da' mal. ³ Le de to señw checho cont nezecho naccho xi'in Dios. Señwna' naquen da' ba ben Diosen' chio' Spiritw chen' cont chaclenen chio' chonxenchone'. Chebechğüecho chejnilaže'cho Cristo Jesúsen', na' bi zoacho lez gata' bichle da' gaclenen chio' lao Diosen', ca no señw da' zoa lo cuerp chechon' o bichle da' goncho. ⁴ De da' zan da' guac gona' xbab gaclenen neda' lao Diosen' šaca' chacda' yebe Diosen' neda' neche da' ba bena' o nac naca'. Nono zoa no nacho ba benche' da' zan da' yebe Diosen' ca neda'. ⁵ Le naca' bene' Israel na' golja' lo diaža che da' Benjamín, na' bosozoe' neda' señw che circuncisión to xmanzda'. Na' goljlena' diža' hebreo da' nac xaxna'a bene' chesaque' diža' hebreo. Na' bsedyana' ley dan' bzoj da' Moisésen' con can' chosozejni'i bene' fariseo ca' len. ⁶ Na' leca gwche' yichja' diža' gole che bene' Israel gualaž chia'. Da'nan' bchi bsaca' bene' ca' chesejnilaže' Criston'. Na' con ga zelao gwzoeda' bzenaga' che yogo' dan' ža ley cheton' cheyała' gonto' o bi cheyała' gonto'. ⁷ Na' cana' bena' xbab yogo' da' ca' yesaclenen neda' cont yebe Diosen' neda', perw na'a ba chacbe'eda' bi yesaclenen. Ba bchojyichja' da' ca' cate' gwyejnilaža' Criston', le goebe'eda' bi yesaclenen neda' lao Diosen'. ⁸ Na' na'a da' nombi'a Xana' Cristo Jesúsen' naquen da' zaca'chgua len neda'. Bibi zaca' yogo' da' ca' godca' cana' yesaclenen neda' lao Diosen'. Yogo' da' ca' bebeda' cana' ba zjanaquen ca to da' bibi zaca' len neda', na' nonan' ca to beb da' ba gwcho'ona' cont gombia'cha' Criston'. ⁹ Le zelaže'chgua' gaca' toz len Criston', na' zelaža' na Diosen' naca' bene' güen len le'. Na' nezda' ne' naca' bene' güen len le' da' chejnilaža' Criston', gague lagüe da' chona' bi da' ža ley dan' bzoj Moisésen' cheyała' goncho. Le con bene' chesejnilaže' Criston' none' legaque' ca bene' güen. ¹⁰ Chaclaža' gombia'cha' Criston' na' gombi'a yela' guac che' dan' nape' lagüe bebane' ladjo bene' guaten', na' chzarlaže' cuina' saca'zi'a can' gwdi gwxcaca' le'. Na' ca Criston' gote' neche xtolan', chaclaža' gaca' ca to bene' guat len da' malen', bich gonan'. ¹¹ Zoa' chbeza' ca', le cheyiljwlaža' nacle gona' cont yechis yosban Diosen' neda' ladjo bene' guat ca' cate' ba gota'.

Pablo chaclaže' gac yichjlažda'ogüe' can' nac yichjlaždao' Criston'

¹² Bi nia' bačh nac yichjlažda'ogua' can' cheyała' gaquen, le biña' gaquen can' nac yichjlaždao' Cristo Jesúsen'. Perw chona' con ga zelao saqueda' cont gaquech yichjlažda'ogua' can' nac che le', le ba gwleje' neda' naca' xi'ine'. ¹³ Bene' migw, nezda' biña' gac yichjlažda'ogua' can' cheyała' gaquen, perw ba bchojyichja' yogo' da' ca' gosac da' zaca' len neda' cana' na' yogo' bin' ba bena', na' chi' yichja' da' mbalaz da' chbeza' gaca'. ¹⁴ Chona' con ga zelao saqueda' cont Diosen' yebede' neda' cate' yežina' gan' zoen'. Le Diosen' gwleje' neda' cont gac yichjlažda'ogua' can' nac yichjlaždao' Cristo Jesúsen' lagüe da' chejnilaža'ne'.

¹⁵ Na' yogo'cho še ba zej chaccho can' chaclaže' Diosen' gaccho, cheyala' goncho xbaben' ca', na' še yo'ocho bichle xbab yoble, Diosen' gwzejni'iden' chio'. ¹⁶ Perw na' cheyala' soaczcho goncho can' ba bzejni'i Diosen' chio'.

¹⁷ Bene' migw, le gon can' chona' neda', na' le na' can' cheson yezica'chle bene' cheson can' ba bzejni'ida' le'e, cont gonle can' chesonen'. ¹⁸ Da' yoble žia' can' ba gwnia' zan las, can' zjanita' bene' zan, nachbia' chesegue'ede' Criston' ben' bnezjw cuine' gote' le'e yag cruzen' neche xtoła'chon'. Na' chbeža' da' chesone' ca'. ¹⁹ Žin ža yesebiayi' bene' ca' toli tocaņe, le chesyebchde' chese'ej chesagüe' clev ca yesonxene' Diosen'. Chesaclaže' cheso'e diža' che bi da' yela' zto' da' chesone', na' zjachi' yichje' tlaoze da' chac yežlio nga. ²⁰ Perw chio', bich choncho xbab nac lažcho yežlion', le nezecho naquen gan' zoa Xancho Jesucriston' ben' non' chio' yela' mban toli tocaņe, na' chbezcho batcan' yide' da' yoble. ²¹ Na' caten' yide' da' yoble, gone' cont cuerp checho quinga da' bitec bi zaca' yesyeyaquen da' cobe, na' yesaquen leca güen can' ba nac cuerp che le'. Gone' ca', le nape' yela' guac neche gone' cont yogo'lol da' zjade yosozenaguen che'.

4

Cheyala' soacho mbalaz da' chejnilaže'cho Criston'

¹ Na' na'a bene' migw, chacda' le'e na' che'nchgüeda' le'e lježcho da' yoble. Chbechgüeda' da' chejnilaže'le Criston', na' zoa' mbalaz neche le'e. Le'e bene' chacda', le soachach šejnilaže'le Xancho Jesucriston'.

² Na' chneyoeda' le' Evodia, na' lecce ca' le' Síntique, le soašca binlo na' le gac txen tole yetole da' chejnilaže'le Xancho'. ³ Na' ca' nac le' bene' lježa', len' beno' xšin Diosen' do yichj do lažo' txen len neda' cana', na' chneyoeda' gacleno' no'ol quinga yesyenite' binlo len lježe' da' yoble, le legaque' ba gosone' xšin Diosen' txen len neda' na' len Clemente na' len yezica'chle bene' lježcho ca', na' zjanyoj la yogo' bene' ca' le'e libr' che Diosen' gan' zjanyoj la bene' ba zjanape' yela' mban toli tocaņe.

⁴ Le yebe yogo'te ža da' chejnilaže'le Xancho Jesucriston'. Da' yoble žia', le yebe. ⁵ Le gon cont yogo'lol bene' yesenezde' nacle bene' šagüe', le ba zoa yid Xancho' da' yoble.

⁶ Bi gacle tole bite'teze da' chac chele, san le yol güiž Diosen', nable gaclene' le'e bite'teze da' chac, na' le güe'e yela' choxcen cate' bi da' nabelene'. ⁷ Nachen' Diosen' gone' soa cuezle binlo len xbab da' yo'o lo' yichjlažda'olen' lagüe da' chejnilaže'le Cristo Jesús'en', cont bi gacle tole. Na' cate' le' ba chone' cont zoa chbezcho binlo len xbab chechon', neca gache'echo bixchen' zoachguacho binlo.

Cheyala' cue' yichjcho che da' zjanac güen

⁸ Na' da' la'zelagüe dan' chaclaža' neyoeda' le'e bene' migw, cue' yichjle che diža' li, che dan' nac da' zaque', che dan' zej to licha, che dan' bibi da' mal nsa', che dan' naquen binlo, na' che da' zaca' yebecho. Bite'teze da' naquen da' güenchgua na' bite'teze da' chazlaže' Diosen', le cuec yichjle che dan' zjanac ca'.

⁹ Da' ca' bzejni'ida' le'e, yogo' dan' benele gwnia' cate' bsd blo'eda' le'e can' cheyala' gonle, na' da' ca' ba ble'ele chona' neda', da' ca' le gon. Na' Dios ben' chon cont chzoa chbezcho binlo len xbab da' yo'o lo' yichjlažda'ochon' soacze' gaclene' le'e.

Can' gosaclen bene' Filipos ca' Pablon'

¹⁰ Chbechgüeda' lao Xancho Cristo Jesúsen' da' ba chi' yichjle chaclenle neda' da' yoble. Nezda' gwzoale chonle xbab chia', perw bi benen gaclenle neda'. ¹¹ Na' žia' da' qui gague neche byažjda' da' ca' byažjda', le Diosen' ba bzejni'ide' neda' cont zoa' mbalaz cate' de da' chyažjda' na' cate' bibi de. ¹² Ba yolagua' yela' yaše' yela' zi', na' yolagua' yela' šagüe'. Diosen' ba bzejni'ide' neda' cont zoa' mbalaz bite'teze chac chia', cate' de da' che'ej chagua' na' cate' chbił chdona', cate' de bichle da' chyažjda' na' cate' bibi de. ¹³ Chac chona' bite'teze da' cheyala' gona', le zoa' Criston' len neda' chaclene'nda'. ¹⁴ Perw benle güen gwseła'le da' goclenen neda' cont naccho txen len dan' chyi chzaca' nga.

¹⁵ Na' le'e zoale Filipos, nezele caten' beyož gwyejle'le diža' güen che Criston' dan' bia' len le'e, benle txen len neda' cate' beza' distritw Macedonian', gwseła'le da' byažjda', na' nono nochle bene' ca' chesedop chesežag chesonx-ene' Criston' yež yoble goson ca'. ¹⁶ Le cate' ne' zoa' Tesalónica gwseła'le da' byažjda' zan ni'a. ¹⁷ Perw gague chzelaža' bi da' gonle neda', san chzelaža' soacze gonle güen cont yebe Diosen' le'e. ¹⁸ Ba benle doxen da' cheyala' gonle na' da' zcha'och cate' da' cheyala' gonle. Ba decze da' zcha'o chia' na'a. Bibi chyažjda', le ba ben Epafrodito da' gwseła'le chia'. Na' da' gwseła'le zaca'leben ca to yal da' chla' zix da' chzey bxozen' lao Diosen', le Diosen' chebede' can' benlen'. ¹⁹ Na' Dios chia' nan' goncze' yogo'te bi da' chyažjele lagüe chejnlaže'le Cristo Jesúsen', le yogo' da' de yo'on lo ne'e. ²⁰ Cheyala' gonxencho Xancho Diosen' toli tocañe. Can' gonšcaczcho.

Pablon' zelagüe' bzedē' legaque' diža'

²¹ Le gwguap tiox yogo'lol bene' Filipos ca' yo'o lo na' Diosen' da' chesejni-laže' Jesucriston'. Bene' lježcho ca' nita' nga len neda' chguapto' le'e tiox. ²² Na' lecze yogo' bene' Roma quinga ba yo'o lo na' Diosen' chosoguape' le'e tiox, lente bene' ca' cheson žin che rey ben' nac la'zelagüe' bene' gwnabia' ben' chi' Roma.

²³ Xancho Jesucriston' soašque' gaclenšque' le'e len xbab da' yo'o lo' yichjlažda'olen'. Da' na'zen' chzoja'.

CART DAN' BZOJ POSTLW SAN PABLO CHE BENE' CA' ŽE' COLOSAS

Pablon' chzoje' bene' chesonxen Jesucriston' ciuda Colosas

¹ Jesucriston' gwleje' neda' Pablo cont naca' postlw che', le can' chazlaže' Diosen'. Neda' txen len bene' lježcho Timoteon' chguapto' le'e tiox. ² Chzoja' le'e zoale Colosas, le'e chejnilaže'le Criston' na' nacle lo na' Diosen'. Chnaba' gaclenšca Xacho Diosen' le'e na' gone' cont soa cuezle binlo.

Pablo chnabde' Diosen' gaclene' bene' ca' že' Colosasen'

³ Yogo' ni'a cate' choj güižto' Dios ben' nac Xa Xancho Jesucriston' choe'to' yela' choxclen che' can' chonlen'. ⁴ Le ba beneto' diža' can' chejnilaže'le Cristo Jesúsen' na' can' chaquele yogo' bene' ca' yezica'chle zjanaque' lo na' Diosen'. ⁵ Na' nezeto' chejnilaže'lene' na' chaquele legaque' lagüe da' zoale lez šjayzoale len Diosen'. Caten' gwzoloa bzenagle che xtiža' Diosen' da' naquen da' güen na' da' li, gwyejni'ile gac chele ca'. ⁶ Na' xtiža' Diosen' da' ba bzenagle ba goslasen doxen, na' bene' zan ba chosozenague' chen. Na' legaque' lecze chesone' güen ca' gwzoloa le'e chonle caten' gwyejni'ile diža' li da' chzejni' in nži'ilaže' Diosen' le'e, na' ne' chonle güen ža na'aža. ⁷ Chaqueto' Epafra ben' bzejni'ide' le'e xtiža' Criston'. Chone' xšin Diosen' can' chon neto', na' zoateze' chone' can' ža Criston' da' chaclaže' gaclene' le'e. ⁸ Len' ba gože' neto' ba ben Spiritw che Diosen' cont chaquele Diosen' na' chaquete lježle.

⁹ Da'nan' caten' gwnezeto' ca güenna' chonle, gwzolaoto' yogo' ni'a cate' choj güižto' Diosen' chnabeto'ne' gaclene' le'e. Chnabto' gon Spiritw chen' le'e yogo' cuen yela' sina' na' yela' chejni'i cont nezele nacyanen' chaclaže' gonle. ¹⁰ Chnabto' soale gonle can' cheyala' gon chio' nombia'cho Xanchon', cont yebede' yogo' dan' chonle. Na' chnabto' gaclene' gonle zan cuen da' güen na' gaclene' šejch gombia'ln'e'. ¹¹ Chnabto' gaclen Diosen' le'e len yela' guac xen che' cont soatezle šejnilaže'lene' na' gapple yela' chxenlaže' bite'tezen' chac. ¹² Na' chnabto' soale mbalaz güe'le yela' choxclen che Xacho Diosen', le le'na' ba gwleje' chio' ba naccho lo ne'e cont šjayzoacho len le' gan' yo'o be'ni' juijyw. ¹³ Bebeje' chio' lo na' gwxyien' cate' da' cholen' ne' chnabian' yichjlažda'ochon', na' gwlo'e chio' lo na' Xi'ine' Jesucriston' ben' chacde', cont na'a gwzenagcho che le'. ¹⁴ Na' Xi'in Diosen' bnežjw cuine' gote' cont beque'e xtoła'chon' na' chezi'xen Diosen' checho.

Criston' bozoe' chio' binlo len Diosen'

¹⁵ Criston' naque' cayanen' nac Xe' Dios ben' nono chle'e. Ba zoacze Criston' cate' biña' xe yežlion' na' cate' biña' gata' yogo'lol da' de le'e yaban' na' lo yežlion'. ¹⁶ Criston' bene' yaban' na' yežlion', bene' bene' že' yaba na' yežlio, len bica'chle da' zjade yaban' na' yežlio nga. Bene' da' ca' chle'echo na' da' ca' bi chle'echo. Bene' cont nita' angl gwnabia' ca' na' da' ca' besyeyac da' xigüe' ca' na' bichle da' ca' chesenabia' yichjlaždao' bene' ca' bi chosozenag che Diosen'. Na' Criston' bene' cont nita' bene' ca' na' yogo' da' ca' cont gacxene'. ¹⁷ Criston' ba zoacze' cate' biña' nita' yogo'lol da' de le'e yaban' na' lo yežlion'. Na' yogo' bite'teze da' zjade zjanaquen con can' zjanaquen, le Criston' zoacze' chone' cont zjanaquen ca'. ¹⁸ Na' Criston' chnabi'e chio' chdop chžagcho chonxen'chone'. Len' bxie' yela' mban toli tocañe che bene' chesejnilaže'ne',

na' naque' bene' nechw bebane' ladjo bene' guaten' ben' bich nabia' yela' goten' le'. Da'nan' naque' la'zelaogüe bene' blao na' chnabi'e yogo'lo' bene' na' bica'chle da' zjade. ¹⁹ Na' Diosen' chazlaže' dan' nac yichjlaždao' Criston' cayanen' nac yichjlaždao' le' na' dan' nac yela' guac che Xi'ine' Criston' doxen can' nac yela' guac che le'. ²⁰ Na' lecze chazlaže' yozoe' binlo len le' yogo' bene' že' yaban' na' yežlion', le Xi'ine' Criston' bnežjw cuine' blaj xchene' le'e yag cruzen' cont gac yesenite' binlo len le'.

²¹ Cana' bi nombia'le Diosen'. Bgue'elne' na' gwzoale benle da' malen'. Perw na'a ba bozoa Criston' le'e binlo len Diosen', ²² le bnežjw cuine' neche chio' caten' gosote'ne'. Na' beyone' lažda'ochon' xilaže' cont bibi doła' gapcho cate' yežincho lao Diosen', na' bibi de da' zaca' yosocuiše' chio' lagüen'. ²³ Na' še soacho šejnilaže'cho Criston' na' soačhačho len toze xbab, na' soateze soacho lez šjayzoacho len Diosen' can' gwzelaže'cho gac checho cate' bzenagcho xtižen' da' nechw, nachen' bibi doła' gapcho cate' yežincho lao Diosen'. Na' diža' güen chen' ba bžinen doxen yežlion' cont benačen' chesenden', na' Diosen' gwleje' neda' Pablo chyixjue'edan'.

Diosen' gwleje' Pablon' cont bsd blo'ede' bene' chesonxen Criston'

²⁴ Da' zan da' chyi chzaca' lagüe da' chyixjue'eda' xtiža' Diosen' len le'e bi nacle bene' Israel. Na' le'e chdop chžagle chonxenle Criston' nacle ca cuerp che'. Na' chbeda' chžaglagua' yogo' da' chaclaže' Criston' žaglagua' da' gaclenen le'e. Na' cate' chžaglagua' neda', guac nacho cuin Criston' chžaglagüe'. ²⁵ Diosen' gwleje' neda' chyixjue'eda' xtižen' len le'e chdop chžagle chonxenle Criston', cont gwzejni'ida' le'e doxen can' zeje xtižen'. ²⁶ Cani' nono na' neze da' güen da' chon Diosen' len bene' chesejnilaže'ne', perw na'a Diosen' ba bzejni'iden' chio', chion' naccho lo ne'e. ²⁷ Diosen' chaclaže' nezecho leca güen juisyw chone' len note'tezcho chejnilaže'chone', la'czla' bi naccho bene' Israel. Cana' nono gwneze gone' da' güen juisyw len note'tezcho, perw na'a Diosen' ba bzejni'ide' chio' zoacce Criston' len chio' chejnilaže'chone' na' da'nan' zoacho lez šjayzoacho len Diosen' gan' yo'ochgua be'ni'. ²⁸ Choe'lena' yogo' bene' diža' che Criston', chata'yoeda' yogüe' yosozenague' che', na' chzejni'ida' yogüe' xtižen' cont yesejni'iden' binlo, le chaclaža' yogo' bene' chesejnilaže' Criston' yesaque' cayanen' chaclaže' Diosen'. ²⁹ Da'nan' chona' con ga zelao choeda' chyixjue'eda' bene' xtižen', na' chaclenchgüe' neda' len yela' guac xen chen'.

2

¹ Chaclaža' nezele chonchgua' ga zelao choeda' cont chaclena' le'e na' bene' lježcho že' Laodicea na' yezica'chle bene' lježcho biña' yesele'ede'nda'. ² Chaclaža' gona' chačh laže'le cont yichjlažda'olen' yesaquen toze lagüe da' chaque lježle. Na' chaclaža' nezeyane'le can' cheyała' gonle xbab cont šejni'ile da' ba bzejni'i Diosen' chio' che Criston' da' nono gwneze cani'. ³ Criston' nse'e doxen yela' sina' na' yela' chejni'i che Diosen' cont gwzejni'iden' chio'. ⁴ Chnia' ca' cont nono siye'e le'e len diža' da' chaquele naquen xdan. ⁵ Na' la'czla' bi zoa' na'le len le'e, zoa' chona' xbab chele na' chebeda' nezda' chonle can' cheyała' gonle na' zoačhačle chejnilaže'le Criston'.

⁶ Na' na'a, can' can' ba gwzolaole chejnilaže'le Criston' na' ba nonlene' Xanle, con can' soačhačle len le'. ⁷ Le soačhač le šejnilaže'ch Criston' can' ba bsdlena', cont gacle ca to yag da' ba gwyaz loen sitjw. Na' le soa le güe'chgua yela' choxcen che Diosen' can' chaclene' le'e.

Criston' ba bocobe' yichjlažda'ochon'

⁸ Le gwsaca' cont nono co'oyele' le'e gwzenagle che diža' sina' che yežlio nga da' naquen da' güenlaže'. Bene' že' yežlion' chosozejni'ide' da' zan da' chesene' cheyala' goncho da' bibi zjazaca', na' bitw chosozejni'ide' che Criston'.

⁹ Yichjlaždao' Criston' naquen' cayanen' nac yichjlaždao' Diosa', na' nac yela' guac che Criston' doxen can' nac yela' guac che le'. ¹⁰ Na' Criston' chnabia'che' ca note'teze angl blao na' ca note'teze da' xigüe', na' chio', da' chejnilaže'chone', bich bi chyažjecho cont soa cuzcho binlo. ¹¹ Na' lecze da' naccho txen len Criston' de to checho da' zaca'leben ca señw da' že' circuncisión, perw bi naquen señw da' bzoa bene' lo cuerp chechon', san da' ba bocob Criston' yichjlažda'ochon' cont da' malen' bich chnabian' chio'. ¹² Na' da' gwzoacho nis caten' gwyejnilaže'chone', zejen con can' got Criston' neche xtola'chon', lecz ca' chio' ba naccho ca to bene' guat len da' malen' cont bi gonchon. Zejen bgaše'cho can' bgašen', na' lecze zejen bechis bosban Diosen' chio' ladjo bene' guat ca' can' bene' len Criston'. Zejen ca' le chejle'cho Diosen' bosbane' Criston' len yela' guac chen'. ¹³ Cana' gwxcaca'lebcho ca to bene' guat len yichjlažda'ochon' da' bi bzenagcho che Diosen' na' gwzoacho bzenagcho che da' malen'. Nach Diosen' bene' len chio' can' bene' bosbane' Criston' ladjo bene' guat ca', le bocobe' yichjlažda'ochon' na' bezixene' xtola'chon'. ¹⁴ Bi bencho yogo'lo' can' ža ley che Diosen' cheyala' goncho, na' bencho da' žan bi cheyala' goncho. Da'nan' gota' xya checho len leyna' na' nchoglaon checho saca'zi'cho toli tocane. Perw Criston' bnežw cuine' bosode'ene' le'e yag cruza' neche doła' xya chechon', na' da'nan' nezecho Diosen' ba bnitlagüe' xtola'chon'. ¹⁵ Criston' cate' gote' le'e yag cruza' beque'e yela' gwnabia' che da' xigüe' ca' na' blo'ede' benachen' ba blej bšošen'.

Cue' yichjcho che da' ca' zjazacan' len Diosen'

¹⁶ Bi gwzenagle che bene' ca' chesena chonle mal che'ej chagwle bi da' che'ej chagwle, o bene' chesene' chele da' bi chonle no ža lni, o bene' chesena qui ca' goncho cate' naquen bio' che'en, o bene' chesena ža ni ža na' nac ža che Dios. ¹⁷ Yogo' da' ca' con bosozejni'in late'lasze che Criston', perw na'a da' bid Criston' bich chyažjecho da' ca', le ba nombia'chone'. ¹⁸ Bi gwzenagle še no bene' chzejni'ide' cheyala' gon cuinle ca to da' bibi zaca' cont soale binlo len Diosen', o bene' chzejni'ide' cheyala' gonxenle no angl o gonle bi da' že' ble'edagüede', le bi chebe Diosen' bene' cheson da' ca'. Bene' ca' chosozejni'ide' ca' chesacde' xbab da' chesaljaže' zaca'chguan, len bitw bi zacan', ¹⁹ le bi chosozenague' che Criston'. Perw chio' chdop chžagcho chonxen'chone', Diosen' none' cont Criston' chnabi'e chio' ca yichjchon' chnabian' cuerp chechon'. Na' naccho txen len le' na' len bene' lježcho ca to cuen güeje cuerp chechon' ngoden' txen, le xpela'chon' na' bečj bnia' ca' zjanoxen' len con ca non Dios chegaquen.

²⁰ Chio' naccho txen len Criston', guac nacho Criston' ba none' chio' ca to bene' guat len da' xinjen' cont bi gonchon, ca bene' guaten' goc le' le'e yag cruzen'. Da'nan' bi cheyala' gwzenagcho cate' chesena bene' da' zan da' goncho cont soacho binlo len Diosen', le bi naccho bene' che yežlion'. ¿Bixchen' chzenagle che yela' sina' che yežlio nga da' ca' chesene' cheyala' gonle na' da' ca' chesene' bi cheyala' gonle? ²¹ Chesene': "Bi goxe'le da' nga", "Bi ye'ej gagwle da' na'", "Bi canle da' na'". ²² Na' yogo' da' ca' chesene' bi goxe'cho, bi ye'ej gagwcho na' bi cancho, da' chesede chen cate' chčhinchon, na' dan' chesene' cheyala' goncho len da' ca', con xbab chegaczen'. ²³ Guacte goncho xbab nac da' sina' da' chesene' cheyala' goncho, na' goncho xbab gaclenen

chío' gonxencho Diosen', le chesene' cheyala' gwchi gwsaca' cuincho na' gon cuincho ca to da' bibi zaca'. Perw bibi zejen goncho ca', le bi chaclenen chío' cont bitw gwzenagcho che da' malen'.

3

¹ Can' bechis bosban Diosen' Criston' ladjo bene' guat ca', lecze can' bocobe' yichjlažda'ochon'. Da'nan' cheyala' cuec yichjcho goncho can' chazlaže' Diosen' na' cuec yichjcho gac can' chebe Criston' ben' zoa yaba chnabi'e txen len Diosen'. ² Na' cheyala' yebecho da' naquen da' zaca' len Diosen', gague da' naquen da' zaca' len benachen'. ³ Le guac načo Criston' ba none' chío' ca to bene' guat len da' malen' cont da' malen' bich nabian' chío', na' mbancho len Criston' na'a cont naccho txen len Diosen'. ⁴ Criston' none' chío' yela' mban toli tocane. Na' cate' le' yide' da' yoble, šjayzoacho txen len le' gan' yo'ochgua be'ni'.

Can' bencho cana' na' can' cheyala' goncho na'a

⁵ Da'nan' cheyala' cuejyichjcho da' mal da' žan goncho len cuerp chechon' dan' nac che yežlio nga. Bitw gata'lencho no'ole bi nac no'ol checho o bene' byo bi nac bene' checho. Bitw goncho bichle da' yela' zto' len cuerp chechon' neca yebecho bi da' nac da' yela' zto'. Bitw selaže'cho goncho bite'teze da' mal, neca selaže'cho da' zan da' gata' checho, le toz ca malen' nac yela' chzelažen' len da' cheson bene' chesejniłaže' l' gua'a lsaca' ca'. ⁶ Žin ža cate' Diosen' gone' cont bene' cheson da' ca' yesezaca'zi'e toli tocane. ⁷ Le'e lecze gwzoale cana' benle da' mal ca' ba gwnia'. ⁸ Perw na'a cheyala' cuejyichjle yogo' da' mal. Bitw ža'a lježle, bitw locle, bitw gacle bene' xi'a len lježle, bitw nele che lježle, na' bitw güe'le diža' zban. ⁹ Na' bich güe'len lježle diža' güenlaže'. Ba gwlejyichjle da' mal da' gwnabia' yichjlažda'olen' cana' na' bich cheyala' gwzenagle chen da' yoble. ¹⁰ Ba chzenagcho che Dios ben' ben chío', le ba bocobe' yichjlažda'ochon'. Na' tža tža chzejni'ide' chío' cont zej chacch xbab chechon' can' nac chen'. ¹¹ Na' chío' ba bocob Diosen' yichjlažda'ochon', bibi nonen še naccho bene' Israel o še bi naccho. Bibi nonen še zoacho señw da' že' circuncisión o še bi zoachon, na' bibi nonen še naccho bene' zito', la'czla' še za'cho gan' že' bene' bi chesejni'i, na' bibi nonen še naccho esclavo o še bi naccho. Da' naquen da' zeje, ba chejniłaže'cho Criston' na' len' zoe' len yogo'cho.

¹² Diosen' gwleje' chío' cont naccho lo' ne'ena' na' chacde' chío'. Da'nan' cheyala' yeyaše'cho bene' na' gaccho bene' šagüe' len yogo'lol' bene'. Bi cheyala' ga'laže'cho, san gaccho bene' chzejwlaže' na' gapcho yela' chxenlaže' len yogo'lol' bene'. ¹³ Na' cheyala' gwdecho ca'ale še bi chac checho len bene' lježcho na' yezi'xencho še bi da' ba gosonde' chío', yezi'xencho con can' ba bezi'xen Xancho Criston' checho. ¹⁴ Na' yeto da' zejehen goncho ca' yogo' da' ca', cheyala' gaque lježcho, le še chaque lježcho gaclenen goncho yogo' da' ca' can' cheyala' gonchon. ¹⁵ Diosen' gwleje' chío' cont soa cuezcho binlo, na' cheyala' gwzenagcho che Criston' na' gache'cho yogo'cho naccho toze cont soa cuezcho binlo. Na' lecze cheyala' soacho güe'cho yela' choxcen che Diosen'.

¹⁶ Cheyala' soacho goncho xbab che xtiža' Criston' na' gwzenagcho chen, na' lecze soacho gwzejni'i lježcho na' neyoe lježcho len doxen yela' sina' che Diosen' cont yogo'cho goncho da' güen. Na' cheyala' gołcho no salmos, no himnos, na' bichle da' ža Spiritw che Diosen' gołcho, na' güe'cho yela' choxcen che Diosen' lo' yichjlažda'ochon'. ¹⁷ Na' bite'teze da' goncho na' bite'teze diža'

güe'cho, cheyala' nabcho gaclen Xancho Jesús'en' gonchon can' chazlaže', na' güe'cho yela' choxclen che Xacho Diosen' con can' chaclen Xancho Jesús'en' chio' chonchon'.

Can' cheyala' goncho len lježcho

¹⁸ Le'e no'ole nšagna'le, to tole le gwzenag che bene' chele, le can' cheyala' gon chio' chejnilaže'cho Xancho Criston'. ¹⁹ Na' le'e bene' byo nšagna'le, to tole le gague no'ol chele na' bi gonle znia len legaue'. ²⁰ Na' le'e bi' bixjw, le gwzenag che yogo'lol bi da' yesena xaxna'le, le can' chazlaže' Xancho Criston' gonle. ²¹ Na' le'e nacle xaxna' bi' bixjw, bi gonle cont yeseloc bi' chele ca', le še gonle ga yeselocbe', yesaquebe' zdebe yosozenagbe' chele. ²² Na' le'e chonle xšin bene', le gwzenag yogo'lol can' ža xan žinna' gonle. Bitw gonlele xan žinna' gonle ca' bene' chonchgua žin cate'zen' chne'e le'e, san le gon žinna' do yichj do laže'le da' chejnilaže'le Diosen'. ²³ Na' bite'teže da' gonle, le gonen do yichj do laže'le cont yebe Xancho Criston', gague contze yebe bene'. ²⁴ Nezczele Xancho Criston' gone' cont yežincho gan' zoen' še soacho goncho can' chazlažen'. Na' zoacho cont goncho con' ža Xancho Criston'. ²⁵ Na' note'tezcho še bi choncho can' cheyala' goncho, Xancho Diosen' gone' saca'zi'cho neče dan' ba bencho. Na' toz can' chon Diosen' len yogo'lol bene'.

4

¹ Na' le'e nacle xan žin, le gon güen na' le gac bene' šagüe' len bene' cheson xšinlen', le nezczele Criston' ben' zoa yaban' naque' Xanle.

² Yogo'te ža cheyala' nabcho gaclen Diosen' chio' len da' choncho na' len bichle da' chac checho, na' cheyala' güe'cho yela' choxclen che', na' bi cheyala' güedcho yol güižcho Diosen'. ³ Na' le nabe Xancho Diosen' gone' cont gac güe'lento' bene' xtiža' Criston' da' bina' yesejni'ide', le neče dan' ba bia' xtiže'n'an' dia' ližya nga. ⁴ Na' le nabe Diosen' gaclene' neda' gwzejni'ida' bene' diža' güen che Criston' binlo cont yesejni'iden'.

⁵ Cheyala' soacho goncho güen len bene' bina' yesejnilaže' Criston' na'a šlac de latje. ⁶ Na' cheyala' güe'cho diža' šagüe' diža' da' zejen len yogo'lol bene', na' cheyala' goncho xbab nac yoži'icho xtiža' yogüe'.

Pablo chguape' bene' migw che' ca' tiox

⁷ Bene' lježcho Tíquico ye'e le'e yogo'lol can' chac chia'. Chaquechone', le zoacze' chaclene' neda' can' cheyala' gone' na' chone' xšin Xancho Criston' txen len neda'. ⁸ Ba gwsela'ne' gan' zoalen' cont nezele can' chac cheto' na' cont gone' chač laže'le. ⁹ Na' txen len le' zeza' bene' lježcho Onésimo ben' nac bene' gualaž chele. Zoacze' chejnilaže' Criston' can' cheyala' gone' na' chaquechone'. Legaue' yese'e le'e yogo' da' ba chac gan'.

¹⁰ Aristarco die' ližya nga txen len neda', na' le' chguape' le'e tiox. Na' lecze Marcos ben' nac biše' ljež Bernabé chguape' le'e tiox. Ba gwnia' can' cheyala' gonle güen len le' cate' le'e gan' zoalen'. ¹¹ Nach Jesús ben' lecze le' Justo lecze chguape' le'e tiox. Šonze bene' Israel ca' chesaclene' neda' len da' chona' cont bene' zan yosozenague' che Diosen' na' nabi'e yichjlažda'ogaquen'. Ba gosonchgüe' chač laža' can' ba gosaclene' neda'. ¹² Nach lecze bene' gualaž chele Epafras chguape' le'e tiox. Chone' xšin Criston' na' yogo' ni'a cate' choj güiže' Diosen' chnabchgüe' gwzejni'i Diosen' le'e yogo'lol da' chaclaže' gonle cont soačhačle gonlen na' gacle cayanen' chazlaže' Diosen'. ¹³ Che'nda' nezele zoateze' choj güiže' Diosen' neče le'e chejnilaže'le Criston'

le'e nita'le Colosas, Laodicea na' Hierápolis. ¹⁴ Nach Lucas ben' chon rmed, ben' chaquecho, chguape' le'e tiox na' ľecze ca' Demas.

¹⁵ Ľe gwguapšca tiox beņe' ľježcho ca' že' Laodicea, len Ninfas na' beņe' ca' chesedop chesežag chesonxene' Diosen' ližen'. ¹⁶ Na' cate' yeyož gwlable cart nga, le gwnežjon beņe' ca' chesedop chesežag chesonxene' Diosen' Laodicean' cont yosolaben'. Na' ľecze le gwlab dan' gwselá' che beņe' Laodicean'. ¹⁷ Na' le ye' Arquipo chņeyoeda'ne' gwza'lagüe' gone' dolol xšin Diosen' da' gwlo'o Xancho Criston' lo ne'e gone'.

¹⁸ Cuincza' neda' Pablo chzoja' late' dao' da' nga ľe'e carten'. Bi ganlaže'le can' dia' ližya nga. Diosen' soašque' gaclenšque' ľe'e. Da' na'zen' chzoja' ņa'a.

CART NECHW DAN' BZOJ POSTLW SAN PABLO CHE BEÑE' CA' ŽE' TESALÓNICA

Pablo bzoje' beñe' Tesalónica ca' ben' chesonxene' Jesucriston'

¹ Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chñabto' lao Xacho Diosen' na' lao Xancho Jesucriston' yesaclene' le'e na' yesone' ca soa cuezle binlo len xbab dan' yo'o lo' yichjlažda' olen'.

Beñe' Tesalónica bosolo'ede' chesejle'e che Jesucriston'

²⁻³ Yogo' ni'a cate' choł güižto' Xacho Diosen' choe'to' yela' choxclen che' par yogo'le. Na' cate' choł güižto'ne' chjayza'laže'to' yogo'loł da' güen dan' chonle dan' chejniłaže'le Diosen' na' chaquelne'. Na' chjayza'laže'to' can' zoachachle chbezle yid Xancho Jesucriston' yeto. ⁴ Nežeto' beñe' migw, Diosen' chacde' le'e na' ba gwleje' le'e cont nacle lo ne'e. ⁵ Na' diža' güen da' bzejni'ito' le'e che Jesucriston' gague naquen con to diža'ze. Spiritw che Diosen' goclenen neto' bzejni'ito' le'e len yela' guac chen na' nežeto' diža' dan' bzejni'ito' le'e naquen da' li. Na' nezele can' bento' da' güen šlac gwzoato' len le'e cont goclento' le'e.

⁶ Na' le'e zoale chonle da' güen can' ba ben neto' na' can' ben Xancho Jesucriston'. Bzenagle dan' gwdixjue'eto' le'e che Jesucriston', na' Spiritw che Diosen' chonen cont chbele chzenaglen, la'czla' da' zan da' ba gwdi gwzaca'le dan' ba bzenagle chen'. ⁷ Na' da' zoale chonle da' güenna', beñe' ca' chesejni-laže' Jesucriston' distritw Macedonia na' distritw Acaya ba zjañezde' naquen cheyala' yesone'. ⁸ Doxen ba bzenele beñe' xtiža' Xancho Jesucriston', gague beñe' že' Macedonia na' Acaya na'zen'. Na' ca'cze yogo'ze beñe' ba zjañezde' can' chejniłaže'le Diosen', na' da'nan' bi chyažjen güe'to' diža' chele. ⁹ Na' beñe' zan cheso'e diža' ca güen beñle len neto' caten' bedeña'to' le'e na' cheso'e diža' can' beñle gwlejyichjle cbich chejniłaže'le l' gua'a lsaca' chele ca', san na'a ba chejniłaže'le ben' nac dogualje Dios ben' zoa toli tocañe. ¹⁰ Na' cheso'e diža' can' chbezle yetj Xi'ine' Jesúsen' yaban' yide' yežlio nga yeto, ben' bosban Diosen' ladjo bene' guaten'. Na' dan' chejniłaže'cho Jesúsen' ba bosle' chio' cont bi saca'zi'cho cate' žin ža beñe' bi chosozenague' che Diosen' yesale'chgüede' toli tocañe.

2

Pablon' gwzoe' Tesalónican'

¹ Beñe' migw, le'e nezele dan' bedeña'to' le'e goclenchguan le'e. ² Na' nezele can' gwdi gwzaca'to' cate' gwyejto' Filipos, na' can' gosezi'diža' beñe' ca' neto' dan' gwdixjue'eto' che Jesucriston'. Perw Diosen' goclene' neto' cont bi bžebto' gwdixjue'eto' diža' güen che' len le'e la'czla' beñe' zan bosožone' chixjue'eton'. ³ Dan' gota'yoeto' le'e gwzenagle che Diosen' bitw nacho bzejni'ito' le'e cele, neca goclaže'to' gonto' da' mal, na' neca bento' xbab gonleto' le'e. ⁴ San zoato' choe'to' diža' can' chazlaže' Diosen' ben' ba gwleje'nto' par chyxjue'eto' diža' güen che'na'. Na' chyxjue'eton' gague cont yebe beñe', san cont yebe Diosen' ben' neze bin' yo'o lo' yichjlažda'ochon'. ⁵ Nezele can' bento', ne tñi'aze biña' gwpeto' le'e len xtiža'ton', na' neca benleto' le'e cont gonle cheto' bi da' de chele. Cuiñ Diosen' nežde' can' naquen. ⁶ Na'

neca cheyljwlaže'to' nacle gonto' cont yesonxen bene' neto'. Neca nacho chaclaže'to' gonxenle neto', na' neca chaclaže'to' yezica'chle bene' yesone' ca'. Zaca'to' gonto' ga gwzenagle cheto' la fuers da' gwsela' Criston' neto' choe'to' xtiže'na', perw bitw chonto' ca'. ⁷ Nži'ito' le'e cacze no'ole šagüe' nži'ide' xi'ine' bi' chosgol chosča'ogüe'. ⁸ Na' dan' chaqueto' le'e, be'lento' le'e diža' güen che Diosen'. Na' gague da' na'zen' bento', lecze bzanlaže' cuinto' bento' ga zelao gwzaque'to' cont godlento' le'e, le chaqueto' le'e. ⁹ Za'laže'czle bene' migw, cate' gwzoato' len le'e benchguato' žin con ga zelao gwzoeto'. Bento' žin do ža do yel cont cbi bi gastw bzoato' le'e. Can' bento' gwduxjue'eto' le'e diža' güen che Diosen'.

¹⁰ Txenczen' nezele len Diosen' gwzoato' do laže'to' cate' gwzoato' len le'e chejnilaže'le Jesucriston'. Benczto' con can' chazlaže' Diosen' cont ne to cono gwna napt'o' doła'. ¹¹ Nezele can' gota'yoeto' le'e gonle da' güen na' can' bento' chačh laže' to tole gonlen. Bento' can' chon to bene' byo len xi'ine'. ¹² Bento' mandadw gonle da' güen ca cheyala' gon chio' naccho lo na' Diosen', le ba gwleje' chio' par nabia'cho txen len le' na' par gone' gac da' mba juisyw checho cate' šjayzoacho len le'.

¹³ Bate'teže choe'to' yela' choxclen che Diosen' dan' bzenagle xtiže'na' caten' gwduxjue'eton' le'e. Zache'ele bi naquen xtiža' benačh, san naquen xtiža' Dios dan' choe'to'. Na' xtiža' Diosen' dan' chejle'le chša'an xbab dan' yo'o lo' yichjlažda'olen'. ¹⁴ Na' bene' migw, ba goc chele can' goc che bene' chesedop chesežag chesonxene' Jesucriston' zan part Judean'. Bene' Israel gualaž čegaque' bosochi bososaque' legaque', na' lecze can' bosochi bososaca' bene' gualaž chelen' le'e. ¹⁵ Na' bene' Israel ca' gosote' Xancho Jesucriston' con can' gosote' da' bene' gosoe'lene' legaque' xtiža' Diosen' cani'. Na' lecze can' gosone' bosolagšibe' neto'. Na' ža na'aža ne' nite' chesone' da' bi chazlaže' Diosen' na' chesegue'ede' yogo'lol benačhen', ¹⁶ le chosožone' gwzejni'ito' yezica'chle bene' bi da' cheyala' goncho cont gata' yela' mban checho toli tocanē. Can' chesone' do tiemp chosozanch xtoła'gaquen' na' Diosen' ba chža'achgüe' legaque'.

Pablo goclaže' šjayne'e bene' nita' Tesalónica

¹⁷⁻¹⁸ Na' neto' bene' migw, cate' zoato' ga bi chle'e lježcho, chjayze'eto' le'e. Da'n'an' cate' ba goc sša biña' le'e lježcho ba chacžejlaže'to' čele na' goclaže'to' yeden'a'to' le'e. Na' to čhop ni'a gocda' yida', perw Satanás dan' chnabia' da' xigüe' ca' bi benen latje. ¹⁹⁻²⁰ Chebeto' chonchguale güen na' da'n'an' zoato' lez soachguato' mbalaz cate' yid Xancho Jesucriston' da' yoble, le yebede' bzjeni'ito' le'e cont chzenagle che'. Da' li le'e chonle cont chbeto' na' cont zoato' mbalaz.

3

¹⁻² Na' bich gwzoeto' dan' bi chle'e lježchon'. Da'n'an' bechoglaže'to' gwsela'to' bene' lježcho Timoteon' gan' zoalen' na' neto' bega'aŋto' Atenas. Timoteon' chone' xšin Diosen' na' chone' txen len neto' chyixjue'eto' diža' güen da' chzejni'in bene' che Criston'. Gwsela'to'ne' bedeyata'yoede' le'e bi soayaše'le na' bedeyene' chačh laže'le cont zoačhačhle chejnilaže'chle Criston'. ³ Gwsela'to'ne' gan' zoalen' cont ne tole bi gacžejlaže'le bixchen' chyi chzaca'le. Ba nezele chio' chejnilaže'cho Criston' cheyala' saca'zi'cho lo željio nga. ⁴ Caten' gwzoalento' le'e bzeneto' le'e leca yosočhi yososaca' bene' chio'. Na' nezele ba chac can' gwnato'na'. ⁵ Na' dan' bi gocxenlaža' dan' biña' la' rson chelen', nachen' gwsela' Timoteon' gan' zoalen' cont nežda' še do laže'le

chejnilaže'le Criston'. Le bena' xbab godca' še ba gwzoe gwxiyen' benlen le'e. Le še ba benlen le'e, con bendadzeto' xšin Diosen' len le'e še ca'.

⁶ Perw na' bela' Timoteon' dan' bide' gan' zoalen' na' be'lene' neto' diža' güen, gwne' zoale chejnilaže'le Criston' na' chaquele yogo'lol bene'. Na' lecze gwne' chjayze'ele neto' na' zelaže'le yežagcho da' yoble lecze can' chaclaže' neto'. ⁷ Ca'czen' bene' migw, chžaglaoto' na' chyi chzaca'to', perw ba beyacxenlaže'to' gwnezeto' can' zoateze zoale chejnilaže'le Criston'. ⁸ Da' li ba beyacxenlaže'to' na' zoato' mbalaz dan' zoachachle chejnilaže'le Xancho Criston'. ⁹ Na' da'nan' leca chbetto' lao Diosen' can' chonle na' leca choe'chguato' yela' choxcen che' can' chonlen'. ¹⁰ Leca chol' güižto'ne' do ža do yel chnabeto'ne' gone' ga yele'e lježcho da' yoble cont gwzejni'ichto' le'e na' šejchle šejnilaže'chlene'.

¹¹ Chnabeto' Xacho Diosen' len Xancho Jesucriston' yesone' latje yedena'to' le'e. ¹² Na' chnabeto' Xanchon' gone' cont gaguech lježle tole yetole na' gone' ga gaguechle yogo' benachen' con catezen' chaqueto' le'e. ¹³ Chnabeczeto'ne' gone' cont soachachle šejnilaže'lene' na' gac lažda'olen' xilaže' lao Xancho Diosen' sin cbibi doła' gaple cate' yid Xancho Jesusen' da' yoble nche'e yogo'lol bene' ba gwlej Diosa' cont zjanaque' lo ne'e.

4

Pablon' bzejni'ide' can' che'ne Diosen' yesezoa yesebeze'

¹ Na'a bene' migw, bach bsed blo'eto' le'e gonle can' chazlaže' Diosen', na' bach zoale chonle ca'. Na' can' ža Xancho Jesucriston' chata'yoeto' le'e na' chonto' mandaw šejchle gonchle dan' chazlaže' Diosen'.

² Ba nezcele bica' da' ca' bento' mandaw gonle na' zjanaquen con ca' ža Xancho Jesusen'. ³ Diosen' chaclaže' soatez soacho gaccho bene' laždao' xilaže'. Bi chazlaže' gata'lencho no'ol bi nac no'ol checho o bene' byo bi nac bene' checho. ⁴ Chaclaže' neze tole naquen' cheyla' soalen xo'ollen' sin cbi gaple doła' na' gonelene' ca bene' zaca'. ⁵ Bitw gonle can' cheson bene' bi zjanombi'e Diosen', con chesezoalene' no'olen' contze yesone' can' chzelaže' lažda'ogaquen'. ⁶ Ne tole bitw gonle da' bi cheyla' gonle na' siye' bene' lježle na' soalenle no no'ol che'. Ba be'czto' diža' bosniseto' le'e can' gon Xancho Diosen' cont yezezaca'zi'chgua bene' cheson bite'tez da' xinjen' zjanac ca'. ⁷ Diosen' gwleje' chio' cont gaccho bene' laždao' xilaže', gague cont goncho bi da' xinj da' zjanac ca'. ⁸ Da'nan' note'tez le'e še bi chzenagle che da' qui ba bzejni'ito' le'e, gague xtiža' benachen' chzoale ca'ale, san Diosa' chzoale ca'ale. Len' bene' chio' Spiritw chen' na' Spiriton' naquen laždao' xilaže'.

⁹ Bitw chyažjen gwzoja' le'e can' cheyla' gague ljež chio' chejnilaže'cho Jesucriston'. Dios nan' ba bsedde' le'e cont chaque lježle tole yetole. ¹⁰ Na' da' li ba chaquele yogo' bene' lježcho ca' nita' doxen Macedonian'. Na' chata'yoeto' le'e bene' migw, le gaguech legaue'. ¹¹ To tole le yeyiljwlaže' bi žin gonle cont soa cuezle binlo can' nonto' mandaw na' bitw tale gwgüia na'le bi cheson bene' yoble. ¹² Le gon can' ba gwnia' cont bene' bi zjanaque' txen len chio' yesache'ede' chonle güen, na' lecze cont bibi gac falt še bi dan' chyažj chchinele.

Can' gac cate'yid Criston' da'yoble

¹³ Bene' migw, chaclaže'to' nezele can' yesac che bene' gosejnilaže' Jesucriston' na' ba gosate'. Chaclaže'to' nezelen cont bi yegüine'le ca cheson bene'

bi nita' lez šjasyezoe' len Jesucriston'. ¹⁴ Nezecho gosot bene' Jesúsen' na' bebane' ladjo bene' guat ca'. Lecze nezecho Diosen' gone' cont yid Jesúsen' da' yoble nche'e bene' ca' ba gosat con bene' gosejnilaže' le'.

¹⁵ Na' diža' nga chzeneto' le'e naquen dan' non Xancho Jesúsen' mandadw gwzeneto'. Chio' mbancho na'a chejnilaže' chone', še ne' mbancho cate' yide' da' yoble, bitw naho yobch yežagchone' clcl ca bene' ca' ba gosat. ¹⁶ Na' ca nac Xancho Jesúsen', cuine' yetje' le'e yaban', na' ne' zižje gone' mandadw yesyeban bene' guaten', na' to angl blaona' ne', na' yenecho cuež trompeta che Diosen'. Nach bene' ca' ba gosat bene' gosejnilaže' Criston', legaque' zgua'tec yesyebane' ladjo bene' guaten'. ¹⁷ Na' ca yeyoža', chio' chejnilaže' chone' še ne' mbancho yežlio nga, gon Diosen' cont yeyepcho txen len legaque' le'e yaban' to lo' bejw na' yežagcho Xancho Jesúsen' le'e yaban'. Nach šjayzoacho len le' toli tocaņe. ¹⁸ Da' nan' le gon chačh laže' lježle tole yetole gü'e le diža' can' gaca'.

5

¹⁻² Bene' migw, bitw chyažjen gwzoja' cont gwzenda' le'e bi ža bi hor yid Xancho Jesúsen' yeto. Nezele con yalzelaže' le žin ža žin hor can' chžin bene' gwban bene' chda šeže' le. ³ Na' šlac chesena bene': "Mba zoacho, bibi chac checho", cate' concze žin ža yesebiaye'e. Can' chac che no'ole cate' yalzelaže' chaque' bes che yela' san, ca' czen' zjayalzelaže' yesebiayi' bene' ca' bi chesejnilaže' ne'. Bitw gac yosoxonje'. ⁴ Perw chio' bene' migw, bi nchole yichjlažda' ochon', da' nan' bitw gac checho can' chac che bene' chzenyal gwbanna' le'. ⁵ Diosen' ba bzejni' ide' chio' nombia' chone' na' be' ni' chen' ba chsenin' len chio'; da' nan' bitw nchole yichjlažda' ochon'. ⁶ Cheyala' gonyane' cho xbab naquen' chaclaže' Diosen' goncho na' nabia' cuincho goncho can' chazlaže' na'. ⁷ Bene' ca' cbi chosozenag che Diosen' zjazaca' lebe' ca bene' zjantas na' ca bene' chesezože. ⁸ Perw ba bzejni' i Diosen' chio' cont bi goncho can' chesone' na'. Da' nan' cheyala' nabia' cuincho goncho can' chazlažen'. Cheyala' šejnilaže' cho Diosen' na' gague lježcho na' yebecho dan' nezecho šjayzoacho len Diosen'. Še goncho yogo' da' ca' gaccho ca soldadw ben' nyaze' to de ya da' chcu'ejen le' cont bibi chac che' cate' chdile' len bene'. ⁹ Gague gwlej Diosen' chio' cont saca' zi' cho che xtoła' chon'. Gwleje' chio' cont šejnilaže' cho Xancho Jesucriston' na' šjayzoacho len le'. ¹⁰ Na' Jesucriston' bnežjw cuine' neče chio' cate' gosot bene' le' cont šjayzoacho len le' la' czla' še mbancho o še ba gotcho cate' yide' da' yoble. ¹¹ Da' nan' le gonch can' ba chonle, le gon chačh laže' lježle tole yetole na' le gaclenč lježle cont soačhačhle šejnilaže' le Jesucriston'.

Pablon' bzejni' ide' bene' chesejnilaže' Jesucriston' can' cheyala' yesone'

¹² Chata' yoeto' le'e bene' migw, gapple bala'añ bene' ca' cheson xšin Xancho Jesucriston' chosogüia chesene' e le'e na' chosozejni' ide' le'e naquen' cheyala' soa cuezle. ¹³ Gapchigualne' bala'añ na' gaguechgüele legaque' dan' chesone' xšin Diosen' do laže'. Na' le soa binlo len lježle tole yetole.

¹⁴ Ca' cze bene' migw, le tile bene' bi chesaclaže' yeson žin, le gon chačh laže' bene' chesacde' zdebe chosozenague' che Jesucriston', na' le gaclen bene' bina' yesejni' ide' naquen' cheyala' yesone'. Le soa le gap yela' chxenlaže' len yogo' lol bene'.

¹⁵ Še bi da' mal cheson bene' len le'e, le gon byen bi yoži' ile da' mal len legaque'. Le yeyiljwlaže' naclen' gonle güen len lježle tole yetole na' len note' tez bene'.

¹⁶ Do timp le yebe. ¹⁷ Le soateze le soa le yol güiž Diosen'. ¹⁸ Le güe' yela' choxc̄len c̄he Diosen' bite'tez da' chac c̄hele, le da'n̄an' chaclaže' gon chio' chejn̄ilaže'cho Cristo Jesúsen'.

¹⁹ Bitw gwžonle gon Spiritw c̄he Diosen' can' chaclažen' gonen len le'e o len bene' yoble. ²⁰ Bi gwzoale ca'ale dan' chesena bene' cheso'e diža' dan' ba gož Diosen' legaque'. ²¹ Na' le gonyane' xbab c̄he yogo'loł diža' da' cheso'e cont soale gwzenagle c̄he da' nac güen. ²² Na' bitw gonle bite'tez da' nac da' mal.

²³ Diosen' chone' ca chzoa chbezcho bin̄lo len xbab dan' yo'o lo' yichjlažda'ochon'. Na' chn̄abda'ne' gone' cont lažda'olen' gacyan̄en' xilaže'. Na' lecze gonšque' cont bibi da' mal gonle len yichjlažda'olen' neca len cuerp c̄helen' cont bibi doła' gapple caten' yid X̄ancho Jesucriston' yeto. ²⁴ Diosen' ben' ba gwleje' chio' cont naccho xi'ine' chone' con da' že' gone', na' da'n̄an' gone' cont gac lažda'ochon' xilaže'.

Pablon' gwn̄abe' gaclen Diosen' bene' Tesalónican'

²⁵ Bene' migw, le soa le nab gaclen Diosen' neto'.

²⁶ Na' cate' chežagle le gwnopa' na' lježle cont nachia' chaque lježle.

²⁷ Chona' mandadw gwlabale cart nga ga yesene yogo'loł bene' lježcho ca' nita' gan' zoalna', le can' chaclaže' X̄ancho Jesucriston' gonle.

²⁸ Na' soateze X̄ancho Jesucriston' gaclenšque' le'e. Da' na'ze chzoja' na'a.

CART GWCHOPE DAN' BZOJ POSTLW SAN PABLO CHE BENE' CA' ŽE' TESALÓNICA

Pablon' bzoje' bene' Tesalónican' bene' chesonxen Jesucriston'

¹⁻² Neda' Pablo chzoja' le'e chdop chžagle chonxenle Xancho Jesucriston' Tesalónica na' nacle txen len le' na' len Xacho Diosen'. Na' neda' len Silvano na' Timoteo chnabto' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab dan' yo'o lo' yichjlažda' olen'.

Cate' yid Criston' da' yoble Diosen' gwnežjue' da' yesezaca'zi' bene' bi chosozenag che'

³ Bene' migw, neto' cheyla' soateze soato' güe'to' yela' choxcen che Diosen' che dan' chonlen'. Cheyla' gonto' ca' da' zejle chejnilaže'chle Diosen' na' zej chaquech lježle. ⁴⁻⁵ Da'nan' chbeto' choe'to' xtiža'len' len yezica'chle bene' ba gwlej Diosen' na' chesežague' chesonxene' Jesucriston' ga yoble. Choe'to' diža' ca' güen chonle dan' chyo chchejele chejnilaže'le Jesucriston' la'czla' da' zan da' chac chele na' chosoči chososaca' bene' le'e. Da'nan' nezecho Diosen' zejczje' to licha da' nchogbi'e zaca'le par yeyejle yaban' gan' zoe' chnabi'e.

⁶ Na' Diosen' zeje' to licha da' gone' cont yesezaca'zi' bene' ca' chosoči chososaque' le'e. ⁷ Na' lecze zeje' to licha da' gwcueze' yogo'te dan' chyi chzaca'chon'. Gwcuezen' cate' le'echo yetj Xancho Jesús'en' le'e yaban' len angl che' ca' bene' zjans'e yela' guac che'. Yetje' nyechjde' yi' bel. ⁸ Na' gwnežjue' da' yesezaca'zi' bene' ca' bi zjanombi'e Diosen', na' neca chosozenague' che diža' güen dan' chzejni'in che Xancho Jesucriston'. ⁹ Legaque' yesezaca'zi'e toli tocanē. Gwbat šjasyenite' len Xancho Jesucriston' ben' nac bene' zaca' juisyw na' nape' yela' guac xen. ¹⁰ Cate' žin žan' yid Jesucriston' da' yoble, chio' chejnilaže'chone' na' naccho lo ne'e gwlo'echo naque' bene' zaca' juisyw na' yebanecho catec bene' güen naque'. Nacto' txen len le'e da' ba chejle'le che diža' dan' be'lento' le'e.

¹¹ Da'nan' zoatez zoato' chnabeto' Diosa' gaclene' le'e gonle güen cont yebede' ba gwleje' le'e par nacle xi'ine'. Na' chnabeto'ne' gaclene' le'e len yela' guac chen' cont yeyož gonle yogo' da' güen da' ba gwchoglaole gonle na' len bica'chle dan' che'nele gonle dan' chejnilaže'lene'. ¹² Chnabto' gonle cont Xancho Jesucriston' gaxene', na' le' gone' ga gacxenle txen len le', le Dios chechon' na' Xancho Jesucriston' nita'cze' chesaclene' le'e.

2

Choj ben' gonchgua güedenag len Diosen'

¹ Bene' migw, da' yoble chnia' le'e ca gac cate' yid Xancho Jesucriston' yeto, yotobe' chio' šjayzoacho txen len le'. ² Chneyoeto' le'e bitw gacžejlaže'le o žeble še no yid yedezejni'ide' le'e, ne' Spiritw che Diosen' žan ba bžin ža yid Jesucriston' da' yoble. Na' neca gacžejlaže'le še bi da' yenele o še la' no cart güenlaže' da' chesena bene' gwseła' neto', žan ba bžin ža yid Jesucriston'. ³ Bi güe'le latje no siye' le'e še bi yesene' o še bi da' yesone'. Le cate' za' yid Xancho Jesús'en' da' yoble, bene' zan yesase' yesyedabague' Diosen'. Lecze cana' choj to bene' blao bene' gonchgüe' güedenag len Diosen'. Benan' ba naquen yeyeje' lo yi' gabilen'. ⁴ Gaque' bene' ya'laže' na' gue'ede' Diosen' na' lecz ca' gue'ede'

bite'tezech da' chesejnilaže' bene'. Na' cui'e lo' yodao' blao gan' chesonxene' Diosen', gon cuine' ca Dios cont yesonxen bene' le'.

⁵ ¿Bi za'laže'le cate' gwzoa' len le'e bzejni'ida' le'e can' gac cate' yid Jesucriston' da' yoble? ⁶ Na' na'a nezeczle bi dan' chžon choj bene' blao ben' gonchgua güedenag len Diosen', perw cate' ba bžin ža bžin hor, cana' choje'. ⁷ Ba nita' bene' chesonchgüe' güedenag len Diosen' na'a, perw ne' ngaše' can' chesone'. Na' gwžin ža cate' bich soa dan' gwžon yesyedabaga'chgüe' Diosen'. ⁸ Cana'chen' choj bene' blaon' ben' gonchgua güedenag len Diosen'. Nach Xancho Jesús'en' yide' nychjchgüede' be'ni', na' cate' bene' blaon' le'ede' le' nach Xancho'n' güe'e diža' na' ši'en goten le'. Can' gone' yonitlagüe'ne'. ⁹ Na' cate' choj bene' blaon' ben' gonchgua güedenag len Diosen', Satanás dan' chnabia' da' xigüe' ca' gonen cont gapchgüe' yela' guac, na' gone' da' yesyebane bene' contze gonlede' legaque'. ¹⁰ Yogo'te da' mal gone' gonlede' bene' ba naquen yesebiaye'e toli tocañe. Yesebiaye'e da' bi chesejle'e diža' lin', le lenna' zaca' yesejle'e cont gata' yela' mban chegaque' toli tocañe. ¹¹ Na' da'n'an' Diosen' güe'e latje yeseziye'e legaque' cont yosozenague' diža' güenlaže'. ¹² Nach yesezaca'zi'e toli tocañe da' bitw gosejle'e diža' li che Xancho'n' san besyebede' da' malen'.

Diosen' chbeje' bene' na' chone' cont gac šjasyenite' len le' toli tocañe

¹³ Bene' migw, chaque Xancho Jesucriston' le'e. Na' neto' cheyała' soatez soato' güe'to' yela' choxclen che Diosen' da' gwleje' le'e cate' bina' xe yežlion' cont šjayzoale len le'. Na' cate' gwzolao chejle'le diža' li che Diosen' nach gwsele' Spiritw čhen' chonen cont nacle bene' laždao' xilaže'. ¹⁴ Neche da'n'an' gwlej Diosen' le'e, na' dan' gwyejle'le diža' güen che Jesucriston' da' be'lento' le'e, žin ža gon Diosen' cont soale mba juisyw can' zoa Xancho Jesucriston'.

¹⁵ Da'n'an' bene' migw, le soa chač le gwzenag do yichj do laže'le che dan' bzejni'ito' le'e, diža' dan' ba be'lento' le'e na' dan' ba bzojto'. ¹⁶⁻¹⁷ Xacho Diosen' chacde' chio'. Gague da' te che dan' bene' cont beyone'xenlaže'cho, na' zoacho lez gonche' güen len chio', le nži'ilaže'de' chio'. Na' chnabda' cuin Xancho Jesucriston' len Xacho Diosen' yesone' chač laže'le na' yesaclenšque' le'e cont yogo' da' gonle na' diža' da' güe'le yesaquen güen.

3

Gwñab Pablon' yosol güiže' Diosen' gaclene' le' len bene' lježe' ca'

¹ Na'a bene' migw, yoł güižšcale Diosen' gaclene' neto' cont yob šjadixjue'eto' che Xancho Jesucriston' doxen, na' cont bene' yezica'chle yesebede' yosozenague' can' ba ben le'e. ² Lecze nabšquele Diosen' yosle' neto' lo' na' bene' mal bene' cheson clele, le gague yogo' bene' chesejnilaže' Jesucriston'. ³ Xancho Jesucriston' zoatez zoe' chone' can' že' gone', na' gaclene' le'e cont soačačle šejnilaže'lene'. Na' lecze gwcuas gwcue'eje' le'e len da' malen'. ⁴ Na' nezeto' chaclencze' le'e cont chonle da' ba bento' mandadw gonle na' cont nita'czle gonlen. ⁵ Chnabda' Xancho Jesucriston' gone' cont nezele catec chaque Diosen' chio'. Na' lecze chnabda'ne' gone' cont gwyo gwčhejle len da' chyi chzaca'le can' gwzoa Criston' byo bcheje' len da' gwdi gwxaque'.

Pablon' bene' mandadw yesone' žin

⁶ Bene' migw, chzeneto' le'e can' chon Xancho Jesucriston' mandadw, bi cheyała' gonle txen len note'tez bene' lježchon' bene' bi chesaclaže' yesone' žin, le bi chesone' ca nac da' bsd blo'eto' legaque'. ⁷ Neto' benczto' žin cate'

gwzoato' len le'e, na' da'nan' nezele can' cheyała' gonle. ⁸ Cuent cheto' gü'e'ej gwdagwto'. Bžaglaoto' bento' žin do ža do yel cont gü'e'ej gwdagwto', na' bi gwnabeto' le'e da' byažje bchineto'. ⁹ Zaca'czto' ša gwnabeto' le'e da' ye'ej gagwto' cate' bento' xšin Diosen' gan' zoalen', perw bi goclaže'to' gonto' ca', le goclaže'to' gwlo'eto' le'e ca' cheyała' gonle. ¹⁰ Caten' gwzoato' len le'e bžiato' bia' gwnato': "Še no bi gon žin, bi cheyała' gagüe'." ¹¹ Perw na' ba beneto' diža' chesene' balle bitw bi žin chonle, con chdale chacle diža'. ¹² Na' še nole chonle ca', chata'yoeda' le'e na' chona' mandadw gonle can' ža Xancho Jesucriston', bich tale ca', san le yezolaošaze le yeyon žin cont gac si'le da' ye'ej gagwle.

¹³ Na' le'e bene' migw, bitw yeche'ele gonle da' güen. ¹⁴ Na' še no bene' chon güedenag len dan' ba bzojto' nga, le gon xbab non' chon ca' na' bich gonle txen len le' cont gacde' zto' che dan' chone'na'. ¹⁵ Perw bitw gue'elne', san gwzejni'ilne' diža' šagüe', le naque' bene' lježcho.

Pablon' gwnabde' Diosen' gaclene' bene' Tesalónica

¹⁶ Na' chnabda' Xancho Jesucriston' ben' chone' cont soa cuezcho binlo len xbab da' yo'o lo' yichjlažda'ochon', gonščacze' cont soa cuezle ca' yogo'te ža bite'teze da' chac. Len' soaščacze' len yogo'le.

¹⁷ Na' cuincza' neda' Pablo chzoja' late' dao' le'e cart nga chguapa' le'e tiox. Can' choncza' len yogo' cart dan' chsel'a' cont nacbia' nedan' chsel'an', le ba nombia'le letr chian' can' chzojan'. ¹⁸ Xancho Jesucriston' gaclenšque' yogo'le. Da' na'zen' chzoja' na'a.

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

¹ Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' chio' yela' mban toli tocaŋe na' Xancho Jesucriston' chone' cont zoacho lez šjayzoacho len le' toli tocaŋe. ² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'oguon'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwya'a Macedonian' gwneyoeda' le' cont bega'ano' Efeson' neche nita' bal bene' chosozejni'ide' bene' Efeso ca' diža' güenlaže'. Con bi cheyož yedo chesonchgüe' xbab che diaža che da' xozxta'ocho ca' na' cheso'e zan cuent che legaue'. Na' da' yoble chneyoeda' le' gono' mandadw bich yosozejni'ide' che da' ca'. Dan' chosozejni'ide' chonen ga yesaczejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtizen'.

⁵ Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyała' yesaque' bene' laždao' xilaže', cheyała' yesone' dan' nezecho naquen güen yog'o ni'a, na' cheyała' yesejli'e diža' li che Diosen' do yichj do laže'. ⁶ Bene' ca' chosozejni'ide' diža' güenlaže' bi chesone' ca', na' da'nana' cheso'e diža' da' bibi zaca'. ⁷ La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyała' goncho.

⁸ Nezecho ley nan' naquen güen con še gwčhinchon can' cheyała' gwčhinchon. ⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an neca chesonxene'ne', na' bene' chesot no xaxna'gaque', na' len nochle bene' güet bene'. ¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' čegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaue' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen' chio'. ¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo' na' chyixjue'dan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtize'na'. Choxclenen chacde' gona' xšinen' can' chazlaže' na' da'nana' gwleje'nda' gonan'. ¹³ Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaže'de' neda', le' biŋa' šejnilaže'ne' ca' hora' na' biŋa'

gacbe'eda' chona' clele. ¹⁴ Nach Xancho Jesucriston' n'zi'ilaže'chgüede' neda' na' goclene'nda' cont gwejnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtola' chio' bene' güen da' xinj. Na' chacda' neda' naca' bene' la'zelagüe gwyanch xtola'. ¹⁶ Na' la'czla' naca' bene' la'zelagüe gwyanch xtola', Jesucriston' beyaše'de' neda' na' bezi'xene' chia' cont blo'e napchgüe' yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocañe. ¹⁷ Cheyala' gonxencho Diosen' ben' nac Rey chechon' toli tocañe. Gague da' te chen'. Zoacze' la'czla' bi chle'ehone' na' naque' la'zelagüe bene' sina'. Totc le' zaque' gonxencho na' gapchone' bala'añ toli tocañe. Na' can' gonščaczocho.

¹⁸ Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czla' še gacdo' zdebe gonon'. Soachacho' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. ¹⁹ Bał bene' chesonteze' da' malen' la'czla' zjanetzte' lo' lažda'ogüe' bi cheyala' yesonen', na' da'n'an' ba gosebejyichje' bich chesejnilaže' Diosen'. ²⁰ Can' goc che Himeneo na' che Alejandro. Da'n'an' ba gwñabda' Diosen' yesaque' lo' na' Satanás dan' chnabia' da' xigüe' ca', na' gonon' con ca' chaclažen' len legaque' cont yesacbe'ede' bi cheyala' yeseneye'e che Diosen'.

2

Dan' cheyala' nabecho Diosen' gone'

¹ Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' choxclen che Diosen' che bi da' güen da' chesac che yogüe'. ² Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuzcho binlo na' bibi gwžon gonxencho Diosen', neca gata' da' gwžon goncho bichle da' cheyala' goncho. ³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' non'e' chio' yela' mban toli tocañe. ⁴ Le chaclaže' gwnežjue' yela' mban toli tocañe che yogo'lol bene' na' chaclaže' yesejni'ide' diža' li che'. ⁵ Toz Diosen' zoa bene' zaca' yesonxen yogo'lol bene', na' lec'z toz ben' chozoe' chio' binlo len Diosen', le'na' Jesucriston' ben' golje benach. ⁶ Jesucristw nan' bnežjw cuine' gote' neče da' mal da' goson yogo'lol benach, na' cate' bžin ža Diosen' bžie' bia', cana' bene' cont goseneze benachen' che'. ⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosol güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'. ⁹ Na' ca nac no'ol ca' chesonxen Jesucriston', bi cheyala' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. ¹⁰ San cheyala' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. ¹¹ Na' no'ol ca' lecze cheyala' nite' šize

yosozenague' che bene' ca' chososed chosolo'ede' xtiža' Diosen', na' yesone' con da' yese'ene'. ¹² Neda' bi chona' latje cont no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyala' yesenite' šize, ¹³ le cate' Diosen' bene' beňachen' zgua'tec bene' Adánna' na' gwdechle bene' Evan'. ¹⁴ Na' cate' Satanás dan' chnabia' da' xigüe' ca' gwxoayaguen bene' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' bene' güen da' xinj. ¹⁵ Perw na' la'czla' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle bene', na' še zjanite' chesone' can' chazlaže' Diosen' len yela' sina' da' ba bnežjue' legaue'.

3

Can' yeson bene' ca' yosogüia yesene'e yezica'chle bene' chesonxene' Diosen'

¹ De to diža' da' zaca' šejle'cho da' žan: "Bene' chesaclaže' yosogüia yesene'e yezica'chle bene' chesonxene' Diosen', chesaclaže' yesone' to da' güen, še ca'." ² Na' bene' gwłane' gone' žin dan' nac ca' cheyala' soateze' gone' da' güen yogo' ža sin cbi gone' da' zaca' tilchone'. Cheyala' soa toz no'ol che', na' cheyala' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej tgli cont bene' yoble yesape' le' bala'an. Cheyala' yebede' gwlebe' bene' liže', na' cheyala' gague' bene' chac chzejni'ide' xtiža' Diosen' binlo. ³ Beňe' chzože bi gac gwłane' žinna'. Bi cheyala' gague' bene' yolao chdile chšaše'. Cheyala' gague' bene' šagüe' bene' chon güen len yezica'chle bene', na' bi cheyala' gague' bene' chon znia, neca selaze'chgüe' gone' gan mechw. ⁴ Na' cheyala' gague' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. ⁵ Le še bi nežde' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. ⁶ Bi cuejle bene' za' chzola' chejnilaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe' le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. ⁷ Na' bene' cuejle cheyala' soe' gone' cont bene' ca' bi zjanac txen yesenežde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

Bene' ca' yeson žin bixjw

⁸ Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaue' bala'an. Lecze cheyala' yesaque' bene' chesoe' diža' li da' šejle'cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone'na'. ⁹ Cheyala' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenežde' lo' yichjlažda'ogüe' chesone' can' chazlaže' Diosen'. ¹⁰ Na' cate' za' cuejle bene' ca' yeson žin bixjwna', le na'yan' can' chesonen', na' še gata'bia' chesonen' binlo bibi chesechoe', nachen' cuejle legaue'. ¹¹ Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. ¹² Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. ¹³ Le še

beñe' ca' cheson žin bixjon' yesone' binlo dan' yo'o lo na'gaque' yesone', nach yesejnilaže' chgüe' Jesucriston' sin cbi yesežebe', na' yezica'chle beñe' yesape' legaque' bała'añ.

Da' chejni'icho che Diosen' dan' nono gwñeze cana'

¹⁴ Chzoja' le' da' quinga da' cheyała' gonle la'czła' zoa' lez yob yida' gan' zon',
¹⁵ cont še šeda' ba nezdō' nac cheyała' yeson beñe' ca' zjanac diaža che Diosen',
 le chio' chdop chžagcho chonxencho Jesucriston' naccho diaža che Diosen'
 ben' zoa toli tocañe. Na' chio' chdop chžagcho chonxenchone' yo'o lo na'cho
 choncho cont chesombia' beñe' diža' li che Diosen'. ¹⁶ Da' licze da' zaca'chgua
 dan' ba bzejni'i Diosen' chio'. Cana' nono gwñeze da' quinga dan' bzejni'ide'
 chio' che Jesucriston', žan:
 Diosen' bide' golje' benach,
 na' Spiritw che Diosen' blo'en naque' beñe' güen juisyw.
 Na' beñe' ca' zjanac angl che Diosen' bedeseñe'e le'.
 Na' bžin ža Diosen' bene' cont beyepe' yaba gan' yo'ochgua be'ni'.
 Na' beñe' ca' cheso'e xtižen' ba goseyixjue'eden' len beñe' že' naciñ zito',
 na' zan beñe' že' lo yežlion' ba chesejle'e che'.

4

Žin ža bał beñe' yesebejyichje' diža' li che Diosen'

¹ Na' Spiritw che Diosen' ba ben' diža' li cont šejni'icho žin ža cate' bał
 beñe' yesebejyichje' diža' li che Diosen' dan' chejle'cho na' yesejle'e che
 bi da' yeson da' xigüe' ca' cont yesexoayaguen' legaque'. ² Da' xigüe' ca'
 yesonen cont nita' beñe' yosozejni'ide' diža' güenlaže' da' siyen' bene', na'
 beñe' ca' yosozejni'ide' diža' güenlažen' bibi yesacde' lo' yichjlažda'ogüe' caten'
 yeseziye'e beñe'. ³ Yosožone' yosošagna' beñe' na' yosožone' ye'ej gagwcho
 bał yela' guagw, la'czła' Diosen' bene' cont zjade yela' guagw ca' cont chio'
 chonxencho Criston' na' nombia'cho diža' li chen' gagwchon na' güe'cho yela'
 choxcen che'. ⁴ Yogo' dan' ben Diosen' naquen güen na' bi naquen da'
 gue'echo, con še güe'cho yela' choxcen che' caten' gagwchon. ⁵ Na' nezecho
 guac gagwcho bite'teze yela' guagw, le ba gwna Diosen' naquen güen, na'
 güe'cho yela' choxcen che' cate' gagwchon.

Can' gon Timoteo xšin Diosen'

⁶ Ca nac beñe' ljež chio' chonxencho Jesucriston', cheyała' gwzejni'ido'
 legaque' da' quinga ba gwnia' le' cont gacleno' legaque' can' chazlaže' Je-
 sucriston', le gwleje' le' cont gwzejni'ido' beñe'. Lecz gonon chachlažo' še
 gwzejni'ido' beñe' xtiža' Diosen' dan' chejle'cho, le naquen to diža' güen,
 na' ba bženago' chen do yichj do lažo'. ⁷ Bi gwženago' che diža' güenlaže'
 dan' chesaljlaže' beñe' bi chesonxene' Diosen'. Ben byen soaczo' gono' can'
 chazlaže' Diosen'. ⁸ Nezecho cate' chda ni'a na'cho chaclenen cuerp chechon'
 late'. Perw na' cate' choncho can' chazlaže' Diosen', chaclenchen chio' cont
 zoa chbezcho binlo na'a na' lecz ca' cate' šjayzoacho len le' toli tocañe. ⁹ Can'
 ža to diža' dan' zaca' šejle'cho na' dan' zaca' gwženagcho chen do yichj do
 laže'cho. ¹⁰ Na' cont choncho can' chazlaže' Diosen', da'nan' chonchguacho
 xšimen' na' chyochhejlaže'cho cate' chzi'diža' beñe' chio', le nezecho Diosen'
 zoe' toli tocañe na' zoacho lez gone' güen len chio'. Le' chaclaže' gwnežjue'
 yela' mban toli tocañe che yogo' benach, na' can' nacczen gone' len beñe'
 chesejnilaže' Jesucriston'.

¹¹ Da'nan' bzejni'i bene' da' ca' ba gwnian' na' ben mandadw yosozenague' che yogo'czen. ¹² Bi go'o latje yosoza bene' le' šla'ale lagüe da' naco' bene' xcuide'. Len xtižo' na' len da' chono' ben güen cont yogo' bene' chesejnilaže' Criston' yesape' le' bala'añ. Len xtižo' na' len da' chono' blo'e legaque' ca cheyała' yesacde' Diosen' na' bene' lježgaque', ca cheyała' yesenita'chache' yesejnilaže'ne' na' ca cheyała' yesaque' bene' laždao' xilaže'. ¹³ Na' ña'a šlac bina' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. ¹⁴ Bi gatlažo' dan' gwlo'o Diosen' lo nao' gono' caten' gosexoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xšinen'.

¹⁵ Cheyała' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. ¹⁶ Na' gwsaco' can' soa cuezo' cont soachacho' gono' con can' chazlaže' Diosen' na' soachacho' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont šjayzoalenle Diosen' cate' žin ža.

5

Can' cheyała' gon Timoteo len yezica'chle bene' chesejnilaže' Criston'

¹ Še no bene' byo gole chone' bi da' mal, bi tiło'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'. ² Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyała' gwsaco' cont gaco' bene' laždao' xilaže' len legaque'.

³ Chio' chdop chžagcho chonxencho Criston' cheyała' gwnežjwcho da' cheseyažje no'ol ca' ba gosat bene' chegaque' še da' li zjanaque' bene' chyažj chchine. ⁴ Perw še nita' no xi'ingaque' no xesoagaque', bzejni'ide' legaque' cheyała' yosonežjue' da' cheseyažje no'ol ca', le no'ol ca' ba bosogole' legaque', na' Diosen' chaclaže' yesone' güen len legaque' cont yosolo'e chesejnilaže'ne'. ⁵ No'ol ca' nono zoa bene' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'. ⁶ Perw no'ol güezeb ca' chesacde' yesone' con ca' žan chegaque', len Diosen' yichjlažda'ogaquen' naquen ca che to bene' ba got la'czla' ne' zjambane'. ⁷ Ben mandadw neče bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tiłe legaque'. ⁸ Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho chen, na' malech chone' ca bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

⁹ Quinga neždo' no no'ol güezeb ca' cheyała' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'. ¹⁰ Cuejle con no'ol ca' zjaneze bene' ba gosonchgüe' da' güen, ca no da' quinga: še bosogole' bi' che' binlo, še blebe'

beṇe' liže', še goclene' yezica'chle beṇe' chesonxene' Diosen', še goclene' beṇe' ca' cheseyi chesezaque', o še ba bene' bite'tezechle da' güen.

¹¹ Beṇe' ca' chesedop chesežag chesonxene' Jesucriston' bi cheyała' yesego'o lo na'gaque' yosogü'e'ej yosoguague' no'ol güezeb xcuide' ca'. Le no'ol ca', gwžin ža yesaclaže' yosyošagne'e da' yoble, ¹² na' yesape' doła' še yesebejychje' xšin Criston' dan' gosechebe' yesone'. ¹³ Na' lecze no'ol güezeb xcuide' ca' bi naquen güen gwco'olaochwne' yeselaže' to to liž bene', cont bi yesaque' bene' xagüed, na' cont bi yesaque' bene' güetob diža'. Bi yeselaže' to to liž beṇe' yesezi'diže' bi chac, le bi cheyała' yesone' dan' nac ca'. ¹⁴ Da'nan' chaclaža' no'ol güezeb xcuide' ca' yosyošagne'e da' yoble na' yesezanche' cont yosyosgole' xi'ingaque' na' yosogüia yesena' ližgaquen' binlo, na' bi yesone' cont beṇe' ca' chesegue'ede' chio' yesene' chesone' da' mal. ¹⁵ Chnia' ca' le nita' bał no'ol güezeb xcuide' ca' ba gosebejychje' Criston' na' chosozenague' che Satanásen'.

¹⁶ Note'tez beṇe' chejnilaže' Criston', še nita' no'ol güezeb lo diaža' čhegaque', cheyała' yosonežjue'ne' da' yes'e'ej yesagüe' cont bibi da' zed yesone' len bene' ca' chesedop chesežag chesonxene' Criston'. Nach con no'ol ca' nono zoa yesaclen legaque', legacze' cheyała' yesego'o lo na' beṇe' ca' chesedop chesežag chesonxene' Criston'.

¹⁷ Na' ca' nac beṇe' blao ba zjanchoj chosogüia chesene'e beṇe' ca' chesedop chesežag chesonxene' Criston' to to yež, še chesene'e beṇe' ca' binlo, da' xen cheyała' yesacxene', na' cheyała' gwnežjwchone' da' yesacbande'. Na' zaca'che' yesacxene' še cheseyixjue'ede' xtiža' Diosen' na' chosozejni'ide' beṇe' bi zejen. ¹⁸ Cheyała' yesacxene' na' gwnežjwchone' da' yesacbande', le nyoj Xtiža' Diosen' žan: "Bitw gwsejywlw cho'a go'n cont ca' gagwba' cate' chlej chšošjba' trigon' neče choj xen'." Na' lecz nyojen žan: "Bene' güen žin cheyała' si' laxjue'."

¹⁹ Bi gono' cuent cate' no beṇe' gagw xya che to beṇe' blao beṇe' nchoj chgüia chne'e beṇe' lježe' chesonxene' Criston' še bi zoa yeto beṇe' o yechope beṇe' co' da' bałi. ²⁰ Na' še da' li ba bene' da' malen', cheyała' tiło'ne' lao beṇe' ca' chesedop chesežag chesonxene' Criston' cont yezica'chle beṇe' ca' yesežebe' yesone' da' malen' nac ca'. ²¹ Na' toze can' cheyała' gono' len note'teze beṇe', bitw nacho bał beṇe' gonxenchguachone' na' yebałe' gonchone' nacteze. Na' Diosen' len Xancho Jesucriston' na' len angl bene' ca' zjanchoj chesone' mandadw che' zjanezde' chona' mandadw gono' yogo' da' ca' ba gwnia' nga. ²² Bitw yob cuejo' beṇe' güia ne'e lježe' cont gague leno' gapo' dola' še ben' gwlejon' gone' da' mal. Gwsaco' cont bibi doła' gapo'.

²³ Na' dan' tołize chac li'o, bi ye'ejo' toze nis, san güe'ej late' güeje vino.

²⁴ Bał beṇe' nacbia' chesone' da' mal na' yogo'ze beṇe' zjanezde' can' chesonen' la'czła' biṇa' žin ža yesezi'e castigw čhen. Na' bał beṇe' chesone' da' malen' dan' ngaše' na' da' bi nacbia', perw žin ža gwlo'elaon. ²⁵ Na' lecz ca' naquen len beṇe' ca' cheson da' güen, nacbia' še da' güenna' chesone', na' la'czła' gague nła' da' güenna' chesone', bi nacho yega'ańcze bagaše'ze dan' chesonen'.

6

¹ Na' beṇe' ca' chesejnilaže' Criston', beṇe' zjanac esclavos, cheyała' yesache'ede' beṇe' ca' zjanaque' xan žin čhegaquen' zjazaque' cont yosozenague' čhegaque'. Cheyała' yesape' legaque' bala'ań cont nono ne yela' ya' che Diosen', neca no ne che dan' chzejni'ichon'. ² Beṇe' ca' zjanac

esclavos, še xanguaque' lecze chesejnilaže' Criston', bi cheyala' yesone' xbab bi yosozenague' chegaque' neche zjanaque' txen chesonxene' Criston', san nachle cheyala' yesone' žinŋa' do laže'che' na' cheyala' yesacde' xan žin ca' ca bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyala' yesone' na' gwneyoe bene' yosozenague' chen.

Cheyala' soacho mbalaz len da' de checho

³ Nita' bene' chosozejni'ide' xbab chegacze' na' bi chososed chosolo'ede' diža' li che Xancho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'. ⁴ Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'. ⁵ Con bi cheyož chedo chesedił chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'. ⁶ Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho. ⁷ Ga'alcho bla'cho yežlion' na' ga'alcho cate' yeza'cho. ⁸ Na' še de da' che'ej chagwcho na' še de xalana'cho da' chyažjecho, cheyala' soacho mba len da' ca'. ⁹ Bene' ca' chesezelaže' yesaque' bene' gwni'a chosozenague' che da' malen' na' cheselažoe' lo' na' gwxiyen'. Chesezelaže' da' zan da' gata' chegaque' da' yesede chen, na' da' ca' chesezelaže' chesonen mal len legaque' na' žin ža yesebiaye'e. ¹⁰ Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

Cheyala' cuec yichj Timoteon' gone' xšin Criston'

¹¹ Na' ca nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to liča, ben con can' chazlaže' Diosen', soachačo' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. ¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocañe, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'. ¹³ Dios ben' chnežjo yela' mban che yogo' benachen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw ¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. ¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'. ¹⁶ Totec Dios nan' bi načo žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyala' gonxenchone' le' chnabi'e toli tocañe. Na' can' gonščaczccho.

¹⁷ Na' ca nac bene' ca' chesejnilaže' Criston', bene' zjanac bene' gwni'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwni'a, le yob te che bite'tez da' de chegaque'. Yo'o legaque' yesezoe' lez yesenite' mbalaz len Dios ben' zoe' toli

tocane. Toga le' chone' chio' yogo' da' güen da' chyažjecho na' da' chbecho. ¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaque' cont yesaclene' bene' na' yesebede' yesone' ca'. ¹⁹ Še yesone' ca', na' gaquen ca to yela' gwñi'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocane še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'. ²¹ Bene' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnlaže'ne'.

Chnabšca' gaclen Diosen' le'. Da' na'zen' chzoja'.

CART GWCHOPE DAN' BZOJ POSTLW SAN PABLO CHE TIMOTEO

Pablon' chzoje' Timoteon'

¹ Neda' Pablo naca' postlw che Jesucriston', le Diosen' gwnalaže' gwsele' neda' chyixjue'eda' can' gwne' gone' cont note'teze bene' yesejnilaže' Jesucriston' gata' yela' mban chegaque' toli tocaṇe. ² Na' chzoja' le' Timoteo, ba nona' le' ca xi'ina'. Chnaba' lao Xacho Diosen' na' lao Xancho Jesucriston' yesaclenšque' le' na' yesyeyaše' laže'de' le', na' yesonšque' ca so' binlo len xbab da' yo'o lo' yichjlažda'oguoṇ'.

Cheyala' güe'cho diža' che Jesucriston'

³ Chonxena' Diosen' do yichj do laža' can' goson da' xoxxta'ogua', na' nezda' lo' yichjlažda'ogua' chona' can' chazlaže' Diosen'. Na' yogo' ni'a cate' choj güiža' Diosen', lagüe ža na' šeže'le, choa' yela' choxclen che dan' chonon'. ⁴ Chjaza'laža' gwchežo' cate' beza' gan' zon', na' zelaža' le'e lježcho da' yoble, le yebechgüeda' še ca'. ⁵ Na' chona' xbab can' chejnilažo' Diosen' do yichj do lažo' can' zgua'tec goson taguo' Loida na' xna'o Eunice, na' nezda' lecz ca' chono' le' na'a.

⁶ Da'nana' chneyoeda' le' da' yoble, güe'lažo' gono' da' gwlo'o Diosen' lo' nao' gono' caten' gwxoā na'ton' yichjon'. ⁷ Diosen' bene' chio' Spiritw chen' zoan lo' lažda'ochon', na' Spiriton' chaclenen chio' cont bi žebcho, na' chonen chio' yela' guac cont goncho can' chazlaže' Diosen'. Lecze chaclenen chio' cont chaque lježcho na' cont choncho da' zejen na' güe'cho diža' da' zaca'. ⁸ Da'nana' chneyoeda' le', bi yeto'edo' chixjue'edo' xtiža' Xancho Jesucriston', na' neca yeto'edo' chia' la'czla' dia' ližya nga da' chzenaga' che Jesucriston' na' chyixjue'eda' xtižen'. Cheyala' gono' can' chonan' na' gwyo gwchejlažo' bi da' gac chio' cate' chixjue'edo' diža' güen chen', le zoa Diosen' chaclene' chio' len yela' guac chen'. ⁹ Diosen' ba nonē' chio' yela' mban toli tocaṇe na' gwleje' chio' cont naccho lo' ne'en. Na' bene' ca' da' nži'ilaže'de' chio', gague neče bi da' güen bencho. Cate' bina' xe yežlion' bsi'e xneze sele' Jesucriston' cont gaclene' chio'. ¹⁰ Na' na'a Diosen' ba blo'e nži'ilaže'de' chio', le ba gwsele' Jesucriston' ben' choṇ yela' mban chechon' toli tocaṇe. Na' žin ža gwcuez Jesucriston' yela' goten' na' gone' cont chio' chejle'cho diža' güen chen' šjayzoacho len le' toli tocaṇe.

¹¹ Na' Diosen' gwleje' neda' naca' postlw che' na' gwsele'nda' cont chyixjue'eda' diža' güen che Jesucriston' na' chsed chlo'eda' bene' bi zjanac bene' Israel. ¹² Na' dan' chona' ca', chžaglagua' da' quinga chac chia', perw bi cheto'eda' chen, le nombi'a Diosen' ben' chejnilaža'. Ba ben cuina' lo' ne'e, na' nezda' nape' yela' guac gone' cont ne' soačača' šejnilaža'ne' caten' žin ža yid Jesucriston' da' yoble.

¹³ Soačačo' gwzejni'ido' bene' diža' zaca' can' ba bendo' chzejni'idan', na' soatezo' šejnilažo' Jesucriston' na' gacdo'ne' do yichj do lažo'. ¹⁴ Be' latje gaclen Spiritw che Diosen' le' cont soatezo' gwzejni'ido' bene' diža' li da' bsd blo'eda' le'e, le zoa Spiriton' lo' lažda'ochon'.

¹⁵ Nezdo' Figelo na' Hermógenes len yezica'chle bene' migw chia' ca' že' distritw che Asia ba gosebejyichje'nda'. ¹⁶ Na' chnaba' gaclenšca Xancho

Diosen' Onesíforo len bene' lo' yo'o che', le bi beto'ede' chia' da' dia' ližya nga, san zan ni'a bedetipe' laža' nga. ¹⁷ Cate' bide' Roma nga, bene' byen beyiljue' neda' con cate'ch beželde'nda'. ¹⁸ Neždo' lecze da' zan bene' goclene' neda' cate' gwzoa' Efeso. Chnaba' lao Xancho Diosen' gacšca güen che' cate' žin ža yid Xancho Jesucriston' da' yoble.

2

Cheyala' gwyo gwčhejcho len da' saca'zi'cho

¹ Xi'indagua', chnaba' soachacho' šejnilažo' Jesucriston' lagüe' da' nži'ilaže'de' le'. ² Na' yogo' da' ba bendo' gwdixjue'eda' lao bene' zan, da' ca' bsd blo'en bene' yosozenag chen do yichj do laže'gaque', bene' ca' guac yosozejni'iden' bene' yoble.

³ Na' byo bčej len da' saca'zi'o šlac chono' xšin Jesucriston'. Goc ca to soldadw bene' bi chžeb bi gac che'. ⁴ Nezecho bene' zej yela' soldadon' bi chac gon xšine' šlac zeje' lao gwđila', san chbejyichjen' cont gone' bin' ža ben' nac xan soldadw ca'. ⁵ Na' nezecho bene' chja'ac lo güitj cheyala' yesone' cayanen' ba bosoxi'e yesone' cate' yesejitje', cont gac yesezi'e da' yesone' gan. ⁶ Na' leze nezecho bene' chelale chone' žin yix'e chzi'e da' nechw da' chbia lao coseš chen'. ⁷ Ben xbab che da' quinga ba gwnia' le', na' Xancho Jesucriston' gaclene' le' šejni'ido' yogon'.

⁸ Ben xbab che Jesucristw ben' beyas bebane' ladjo bene' guaten', ben' nac xi'in diaža che da' rey Davin'. Che len' chzejni'ida' cate' chyixjue'eda' diža' güen che'. ⁹ Na' da' chyixjue'eda' diža' güen chen' chosoči chososaque'nda' na' dia' ližya nga ca to no bene' mal juisyw. Perw nezda' bibi gac yesone' cont bi gas laje xtiža' Diosen' lo yežlion'. ¹⁰ Da'nan' chzanlaže' cuina' gac bi da' gac chia' lagüe da' chyixjue'eda' xtiža' Diosen', le chaclaža' yezica'chle bene' ba gwleje' cont gata' yela' mban chegaque' toli tocane yeseñilaže' Jesucriston', na' žin ža šjasyezoe' len le' toli tocane gan' chac da' güen juisyw. ¹¹ Diža' quinga zjanaquen da' li:

Še chejnilaže'cho Criston' ben' got neche xtoła'chon', chio' lecze naccho ca to bene' guat len da' xinjen' cont bich gonchon. Na' con can' bosban Diosen' Criston' ladjo bene' guaten', lecze ca' bocobe' yichjlaždao' chio' cont šjayzoacho txen len le'.

¹² Na' še soachachcho šejnilaže'chone' bite'teze chac checho, lecze gone' cont nabia'cho txen len le'.

San še cuejyichjcho Criston', lecze le' cuejyichje' chio'.

¹³ Na' la'czla' še chio' bi goncho can' gwnacho goncho, Diosen' zoe' chone' con da' ba gwn'e gone', le Diosen' bi gac gwš'e da' ba nžie' bia' gone'.

Ben' chon xšin Diosen' binlo

¹⁴ Bi go'o latje yesanlaže' bene' ca' chesejnilaže' Jesucriston' da' ca' ba bzejni'ida'. Na' yosnisdo' legaque' naquen mal len Xancho Diosen' yesedił yosošašen lježe' che bize diža'. Bibi zejen yesone' ca', le cate' bene' chesende' chesedił chosošaše', chonen cont bi yesejle'e che xtiža' Diosen'. ¹⁵ Ben con ga zelao saque'do' cont yebe Diosen' can' chonon' na' cont bi gacdo' zto' lagüen' can' chono' xšinen'. Gwsed gwlo'edo' xtižen' to licha. ¹⁶ Bi gono' txen len bene' chesoe'chgüe' bite'teze diža' da' bibi zaca', diža' da' bibi zejen len Diosen', le dižan' zjanac ca' chziyen' bene' yesonche' da' mal. ¹⁷ Dižan' nac ca' chžiyain' bene' ca to yižgüe' mal. Can' ba goc che Himeneo na' Fileto, ¹⁸ gosebejyichje'

diža' li da' chzejni'in che Criston'. Chososed chosolo'ede' chesene' bi soacho lez žin ža yebancho ladjo bene' guaten', le chesene' ba gwde che da' ca'. Na' bal bene' ba chesejnilaže' Criston' chesacžejaže' na'a neche xtiža' bene' ca'. ¹⁹ San chio' zoachachcho chzenagcho diža' li che Criston' na' Diosen' chone' cont bi chbeyijchjon. Da'n'an' zaca'lebcho ca to lene yo'o da' nac da' gual. Na' nyojczye Xtiža' Diosen' žan: "Diosen' nezde' no bene' zjajo'o lo ne'e." Na' lecze nyojen žan: "Note'tez bene' že' chejnilaže' Xancho Diosen', cheyla' cuejijchje' bich gone' da' mal."

²⁰ Nezecho to liž bene' gwni'a de no tas platw na' no yeso' xguag de oro de plata da' zjazaca'chgua. Lecze de yeso' xguag de gona', na' de no batia na' bichle de yag da' chesonen žin da' bitec zjazaca'. ²¹ Can' naquen len chio', note'tezcho že cuejijchjcho da' malen', nach Xancho Diosen' gwchine' chio' neche goncho da' zan da' güen da' chaclaže' goncho. Na' že goncho ca', saca'lebcho ca to tas o to xguag de oro da' zaca'chgua.

²² Na' ca' nac le', cheyla' cuejijchjo' bite'teze da' mal da' chzelaže' lažda'oguo' gono', da' ca' chesezelaže' note'teze bene' güego' yesone'. Beyilwlaže' nac gono' cont gaco' bene' güen len Diosen' na' cont soachcho šejnilažo'ne', cont gacdo' Diosen', na' cont soa cuezo' binlo len bene' liježo' ca'. Ben ca' txen len yogo' bene' chesenab goclen lao Xancho Diosen', bene' zjanac bene' laždao' xilaže'. ²³ Bi gono' txen len bene' bi chesejni'ide', bene' chosošaše' cheso'e diža' da' bibi zejen, le xtiža'gaquen' chonen ga chesacyož bene'. ²⁴ Chio' choncho xšin Diosen' bi cheyla' tile gwšašlencho bene'. Cheyla' gaccho bene' šagüe' len yogo'ze bene', cheyla' nezecho naquen' gwzejni'icho legaque' che Diosen', na' cheyla' gapcho yela' chxenlaže' len legaque'. ²⁵ Na' cate' güe'cho consejw che bene' bi chesaclaže' yosozenague' diža' li che Criston', cheyla' güe'lencho legaque' diža' šagüe', na' cuezcho gaclen Diosen' legaque' yosoša' xbab chegaquen' cont yosozenague' che diža' li čen'. ²⁶ Can' goncho cont Diosen' gwnežjue' legaque' to xbab šagüe' na' yesyechoje' lo na' Satanás dan' chnabia' da' xigüe' ca', le chonen cont nite' chesone' con can' chazlažen'.

3

Naquen' yeson bene' cate' ba zoa yid Xancho Jesucriston' da' yoble

¹ Na' che'nda' šejni'ido' da' nga, cate' žin ža ba zoa yid Xancho Jesucriston' da' yoble, da' zan da' mal gac. ² Bene' zan yesonxen cuingaque', na' zane' yesebec yichje' gata' da' zcha'o xmechwgaque'. Zane' yeso'e diža' ca güenna' chesone' na' yesaque' bene' ya'laže'. Yesene'e che Diosen'. Bi yosozenague' che xaxna'gaque'. Bi yeso'e yela' choxcen che Diosen' na' bi yesape' le' bala'an. ³ Bi yesacde' bene', bi yesyezi'xen che liježe', yesene' mal che bene' yoble, con yesontez' bite'teze da' mal da' žan chegaque', yesacchgüe' bene' znia, na' yesegue'ede' bite'tez da' nac da' güen. ⁴ Yosode liježgaque' lo na' bene' chesegue'ede' legaque', bi yesezebe' yesone' bite'ze da' mal, yesone' xbab zjazaca'chgüe', na' yesaclaže' yesone' con da' chpe legacze' na' bi yesaclaže' yesone' xbab che Diosen'. ⁵ Lecze da' zan da' yesone' cont yesaque' bene' chesonxenchgüe' Diosen', perw bi soa yela' guac che Diosen' len legaque'.

Bi gono' txen len bene' ca' cheson da' ca' ba gwnian'. ⁶ Bene' ca' cheson ca' chja'aque' liž no'ole bene' chesejle'daze', na' chesonlede' legaque' len diža' da' cheso'e. No'ol ca' zjadechgua xtoła'gaque', le chesontez' da' mal can' ža lo' lažda'ogaquen'. ⁷ No'ol ca' chosozenague' che note'teze' že' gwzejni'ide'

legaque', perw na' bi chžin ža yesejni'ide' diža' li che Diosen'. ⁸ Cani'te da' Janes na' da' Jambres besegue'ede' Moisésen' na' bi gosaclačže' yosozenague' diža' li da' be'len da' Moisésen' legaque', na' ca'czen' nita' bene' gwxiye' na'a chesegue'ede' diža' li che Diosen'. Nchoł yichjlažda'ogaque' yela' güen da' mal chegaquen', na' gague da' li chesejnilaže' Diosen'. ⁹ Bi gac yesonlede' bene' sša, le yob gac chegaque' can' goc che da' Janes na' da' Jambres, žin ža cate' yezica'chle bene' yesache'ede' chosozejni'ide' clele yela' bi chejni'i chegaque'.

Consejw da' zelagüe' da' bnežjw Pablon' Timoteon'

¹⁰⁻¹¹ Na' le' Timoteo, nezczedo' can' ba bzejni'ida' le' na' can' zoa' chona' da' güen. Nezdó' chi' yichja' gona' yogo'lol da' ža Diosen'. Nezdó' zoachacha' chejnilaža' Diosen' bite'tez da' chac chia'. Na' nezdó' napa' yela' chxenlaže' len ljež beňacha' na' zoacza' chacda' legaque'. Nezdó' bi chbejyichja' xšin Diosen' da' chona', la'czla' da' zan da' ba bosochi bososaca' bene' neda'. Na' nezdó' da' ca' gosonde' neda' cate' gwzóa' ciuda' Antioquia' na' cate' gwya'a yež Iconio len yež Listra, na' can' gwdi gwxcaca'. Na' nezdó' Xancho Jesucriston' bosle' neda' lo yogo' da' ca' da' goc chia'. ¹² Da' li yesenita' bene' yosochi yososaque' note'tez chio' chejnilaže'cho Cristo Jesúsén', chio' chi' yichjcho chzenagcho che'. ¹³ Bene' mal bene' güexoayag ca' šja'acze' yesonche' da' xinjen', yeseziye'e bene' na' lecze yesejle'e che diža' güenlaže' da' yesoe' bene' yoble.

¹⁴ Na' le' Timoteo, cheyala' soachacho' gwzenago' che da' ca' chejni'ido' che Criston'. Nezdó' naquen diža' li, le bzejni'iton' le'. ¹⁵ Cate' nactio' bidao' ba nombi'o Xtiža' Diosen' da' nyojen. Na' Xtiže' nan' chzejni'in chio' cheyala' šejnilaže'cho Cristo Jesúsén' cont gata' yela' mban checho toli tocane. ¹⁶ Cuin Diosen' bzejni'ide' bene' ca' bosozoj Xtižen' cont bosozoje' xbab chen'. Da'nán' doxen Xtiža' Diosen' dan' nyojen zaca'chguan da' chzejni'in chio' che Diosen', chdilen chio' cate' choncho da' xinj, na' chzejni'in chio' nac goncho cont na' Diosen' choncho da' güen. ¹⁷ Na' chio' chejnilaže'cho Diosen', Xtižen' chzejni'in chio' yogo'lol da' cheyala' nezecho cont soacho goncho yogo' da' güen.

4

¹ Yid Xancho Jesucriston' da' yoble cont gone' yela' justis che yogo' beňach, bene' ne' zjamban lente bene' ba gosat, na' caten' yide' da' yoble nach solao nabi'e yežlio nga. Na' Timoteo, Diosen' len Xancho Jesucriston' zjanezde' chona' mandadw gono' da' quinga: ² Chixjue'edo' xtiža' Diosen' cate' nlatjo' na' cate' chacdo' bi nlatjo'. Be'len bene' diža' cont yesenezde' chesone' da' xinj, gwdił legaque' che da' malen' chesone' cont yesyetinjen', na' gwđap yela' chxenlaže' bzejni'ide' da' cheyala' yesone'. ³ Gwžin ža cate' bi yesaclačže' bene' yosozenague' xtiža' Diosen' da' chzejni'icho da' naquen da' li, na' yosotobe' bene' yosozejni'ide' legaque' diža' yoble da' yesazlaže' legacze'. ⁴ Yesebejyichje' bich yosozenague' che diža' lin' na' yosozenagche' che diža' da' chesaljlaže' bene'. ⁵ Perw ca naco' le', cheyala' gaco' bene' yo'o xbab, na' gwđap yela' chxenlaže' len yogo'te da' sacazi'o, na' soatezo' go'o diža' güen che Jesucriston' do yichj do lažo'. Ben yogo' da' gwlo'o Diosen' lo nao' gono'.

⁶ Na' ca nac neda' ba zoa yesote' neda', da' li ba chžin ža šjayzóa' len Diosen'. ⁷ Na' chebeda' guac nia' do yichj do laža' ba gwđilena' da' chgue'e Diosen'. Ba bena' yogo'lol da' gwlo'o Diosen' lo na' gona' na' ba gwzoachacha' chejnilaža' Jesucriston' na' ne' zoachachcza'. ⁸ Na' cate' šjayzóa' len Diosen', gone' cont soa' mba da' bena' güen šlac mbana'. Xancho Jesucriston' zeje' to licha, na' cate'

žin ža choglagüe' nac gac che yogo'lo' bene', gague neda'zen' gone' soa' mba, san yogo' nochle bene' chesyebede' chesebeze' baten' yide' da' yoble, ľecze gone' cont ľegaque' yesenite' mba.

Da' chaclaže' Pablon' gon Timoteon'

⁹ Ben byen con ga zelao saque'do' yob yido' nga. ¹⁰ Ben ca', ľe Demas ba gwlejiychje'nda' na' ba zjayde' yež Tesalónica da' chi'chgua yichje' bin' gata' che' ľo yežlio nga. Na' Crescente ba zeje' Galacia na' Titon' ba zeje' Dalmacia.

¹¹ Yetoga Lucas nga'anlen neda' nga. Na' che'sco' Marcos cate' yido', cont gaclene' neda' len xšin Dios da' chona'. ¹² Ca nac Tíquicon', ba gwseľa'ne' ciuda Efeso. ¹³ Na' chaclaža' goxo' xadon chia' da' bocua'ana' yež Troas liž Carpo cate' yido', na' ľecze goxo' libr ca', na' da' žialaoch goxo' yid ca' da' ba zjanyoj.

¹⁴ Alejandro bene' güečhač yan' ba benchgüe' mal len neda'. Xancho Diosen' gwnežjue' ľe' castigw che da' malen' bene'. ¹⁵ Na' gwsaco' len ľe', ľe chonchgüe' clele len xtiza' Diosen' da' chyixjue'echo.

¹⁶ Cate' bosodie' neda' ľo na' justis ca' da' nechw, nono gwzoo no gaclen neda', yogo' bene' ca' gocda' yesaclen neda' gosebejiychje'nda'. Diosen' yezi'xene' čhegaque' da' bi gosaclene'nda'. ¹⁷ Bia'cze Xancho Jesucriston' gwzooalene' neda' na' goclenchgüe' neda' cont bia' xtižen' len yogo' bene' ca' že' na', bene' bi zjanac bene' Israel. Na' bosle' neda' ľo na' yeľa' goten'. ¹⁸ Na' nezda' yoslacze Xancho Jesucriston' neda' ľo yogo' da' mal da' gac chia', na' gualencze' neda' šlac žin ža šjayzoalena'ne' gan' zoe' chnabi'e. Čheyaľa' gonxenchwne' toľi tocaņe. Can' gonšcaczcho.

Pablo chguape' tiox yeto čhope' na' chnablaže' gaclen Diosen' ľegaque'

¹⁹ Gwguapšco' tiox Prisca na' Aquila na' ľecz ca' bene' ľo' yo'o čhe Onesíforo. ²⁰ Erasto bega'ane' ciuda Corinto, na' bocua'ana' Trófimo yež Mileto, ľe gocšende'.

²¹ Ben con ga zelao saque'do' cont yido' cate' za' žin tiemp zag. Eubulo, Pudente, Lino, Claudia na' len yezica'chle bene' chesejnilaže' Jesucriston' nga chosoguape' le' tiox.

²² Čhnaba' soašca Xancho Jesucriston' len ľe' na' gaclenšca Diosen' yogo'le. Da' na'zen' chzoja'.

CART DAN' BZOJ POSTLW SAN PABLO CHE TITO

Pablon' bzoje' cart nga

¹ Neda' Pablo chona' xšin Diosen' na' naca' postlw che Jesucriston' cont gaclena' bene' ca' gwlej Diosen' yesejnilaže'ne', cont yesenezde' can' za diža' li che Diosen'. Na' diža' li chen' chzejni'in can' goncho da' chazlaže', ² na' chzejni'in zoacho lez šjajzoacho len Diosen' toli tocaņe. Za' xe yežlion' Diosen' gwne' bene' yesejnilaže' le' šjasyenite' len le' toli tocaņe, na' Diosen' bi chonlaže' bite'teže da' že'. ³ Na' na'a ba chac da' bžie' bia' gac da' ba chzejni'ida' bene' xtižen', le Dios ben' nonē' yela' mban checho toli tocaņe gwlo'e lo na' chyixjue'eda' bene' xtižen'. ⁴ Chzoja' le' Tito, naco' ca dogualje xi'ina' da' bzejni'ida' le', na' naccho txen chejnilaže'cho Jesucriston'. Xacho Diosen' na' Xancho Jesucriston' ben' nonē' yela' mban checho toli tocaņe yesaclenšque' le'e na' yesyeyaše'de' le'e na' yesone' cont soa cuezle binlo len xbab chelen'.

Da' chon Titon' gan' nzi' Creta

⁵ Cate' bocua'ana' le' gan' zoa yežlio da' nzi' Creta dan' chi' lo nisaon', gwnia' gwzožo' gono' dan' chona' cate' gwzoo' na', to to yež cuejo' bene' blao bene' yosozejni'i na' yosogüia yesene'e yezica'chle bene' chesejnilaže' Jesucriston'. ⁶ Na' še zoa bene' zoacze' chone' da' güen cont bibi de da' yosode'e bene' yesene' da' xinjen' chone', še naque' bene' zoa toz no'ol che', še xi'ine' ca' chesejnilaže' Criston', na' še bi zjanaque' bene' chesyedabaga, san chosozenague' cont bi zjalaže' chesone' da' xinj, ca bene' nac ca' cheyla' cuejo' güia na' lježe'. ⁷ Cate' cuejo' bene' co' Diosen' lo ne'e güia ne'e yezica'chle bene' chesejnilaže' Jesucriston', cuejo' bene' zoacze' chone' güen. Bi cuejo' bene' ya'laže', bene' naque' bene' loc, na' bene' borrašw. Bi cuejo' bene' chebede' cueque' žaš, na' neca cuejo' bene' zelaže' gone' da' xinj cont gone' gan mechw. ⁸ Bene' cuejo' cheyla' gaque' bene' chbede' chlebe' bene' zito' ližen'. Cheyla' gaque' bene' zoateze' chone' da' güen na' bene' chon xbab, bene' chon da' zej to licha, bene' chon da' chazlaže' Diosen' na' bene' chon con ga zelao chzaque'de' cont chone' bi da' za Diosen'. ⁹ Cheyla' gaque' bene' zoačhače' do laže' chzenague' diža' li che Diosen' da' bzejni'ida' cont gac gwzejni'ide' bene' yoble diža' güenna', na' gone' chačhlaže' cont yesenite' yesejle'e da' naquen da' li, na' gac gwlo'ede' bene' ca' chesene' contr diža' li che Diosen' cont yesenezde' clelen' chesone'.

¹⁰ Chnia' gono' ca', le nita' bene' zan bene' Israel gualaž chia' na' yebał bene' yoble chesene' zjanaque' chio' txen, perw bi chosozenague' che Diosen'. Bibi zaca' xtiža'gaque' da' chosozejni'ide', con chesonlede' bene'. ¹¹ Na' da' zjachi' yichjgaque' yesone' gan mechw, da'nān' chosozejni'ide' da' zej clele. Cheyla' gonle cont yesenite' šize bich yosozejni'ide' diža' güenlažen', le clelen' chesone'. Na' bene' zan len bene' lo' yo'yo čhegaque' chesacžejaže' che xtiža' Diosen' neče xtiža'gaquen'.

¹² Cana' gwzoo' to bene' gwņeya'a, goque' bene' Creta, na' gwne' che bene' gualaž che' ca': "Bene' Creta bate'teže zjanaque' bene' güenlaže' na' zjanaque' ca bež znia' yela' güen da' xinj čhegaquen'. Lecze zjanaque' bene' lia na' bene' xagüed." ¹³ Na' da' li can' gwnen'. Da'nān' tilo' legaque' che da' xinjen'

chesonen' cont nita'chache' yesejle'e xtiža' Criston'. ¹⁴ Gono' ca' cont bich yosozenague' che diža' güenlažen' chesaljaže' bene' Israel gualaż chia' ca', na' neca yosozenague' che nochle bene' ba gosebeyjichje' diža' li che Diosen'.

¹⁵ Diosen' ba none' yichjlažda'ochon' xilaže', na' ne da' chagwcho ne da' choxe'cho bi chžonen gac yichjlažda'ochon' xilaže'. San ca nac bene' yichjlaždao' mal ca', bene' bi chesejnilaže' Criston', bibi de da' naquen da' xilaže' len legaque'. Chesone' xbab mal, na' bibi de cheseza'laže' cate' chesone' da' xinjen'. ¹⁶ Chesene' zjanombi'e Diosen', perw nacbia' bi zjanombi'ene', le chesonteze' da' xinjen'. Chesone' da' chgue'e Diosen'; zjanaque' bene' güedenag len xtižen' na' bi chesac yesone' da' güen.

2

Xtiža' Diosen' da' chsed chlo'echo bene' naquen güen

¹ Na' le', cheyala' gwzejni'ido' bene' yesone' can' ža diža' li che Diosen'. ² Bzejni'i bene' byo gol ca' bi yesezožde', san yesenite' cont bene' yezica'chle yesape' legaque' bala'an. Bzejni'i legaque' to toe' cheyala' yesenabia' cuine' cont yesenite' yesone' da' güen, na' bzejni'i legaque' cheyala' yesenita'chache' yesejnilaže' Diosen'. Cheyala' yesacde' bene' na' yesape' yela' chxenlaže' bite'teze da' chac. ³ Lecze ca' bzejni'i no'ol gole ca' cont yesenite' yesonxene' Diosen', na' bi yesene' che bene', neca yesezožde'. Cheyala' yesenite' yesone' da' güen cont yeseneze bene' yezica'chle can' cheyala' yesone'. ⁴ Na' no'ol gol ca' cheyala' yosozejni'ide' no'ol xcuide' ca' yesenite' binlo len bene' che to toe' na' yesacde' legaque' len bi' chegaque' ca'. ⁵ Na' yosozejni'ide' legaque' cont to toe' yesenabia' cuine' na' yesone' da' zaca' yesone' cont yesaque' bene' laždao' xilaže' len yogo' da' chesone', na' yosogüia yesena' ližgaque' binlo, yesaque' bene' šagüe' na' yosozenag to toe' che bene' chegaque'. No'ole xcuide' ca' cheyala' yesone' güen can' ba gwnian' cont nono ne mal che xtiža' Diosen'.

⁶ Na' lecze cheyala' neyoedo' bene' byo xcuide' ca' cont to toe' yesenabia' cuine' na' yesone' da' cheyala' yesone'. ⁷ Na' le', bite'teze da' gono', ben con da' nac güen cont yesache'e bene' yoble naquen' cheyala' yesone'. Cate' chsed chlo'edo' bene', bzejni'i legaque' do lažo', benen cont nacbia' chapo' Diosen' bala'an. ⁸ Bsed blo'e diža' li cont nono na xtižon' naquen mal. Na' še soatezo' gwsed gwlo'edo' diža' li, nachen' bene' ca' chesexi'a chio' yesyeto'ede' da' bi chesyezelde' bi da' mal yesene' checho.

⁹ Gož bene' güen žin ca' yosozenague' che xangaquen' na' yesone' bite'teze da' yese'ene' sin cbi yosyoži'e xtiža'gaquen'. ¹⁰ Bi yesebane' bi da' de che xangaquen', san yesenite' do laže' cont yezica'chle bene' yesele'ede' chesone' güen na' yesache'ede' güenna' nac xtiža' Diosen', Dios ben' none' yela' mban checho toli tocanē.

¹¹ Diosen' nži'ilaže'de' chio' benačh na' ba blo'e chaclaže' gone' yela' mban toli tocanē che yogo'cho. ¹² Na' da' none' ca' chzejni'in chio' cheyala' cuejyichjcho yogo' da' choncho da' bi chazlaže' na' yogo' da' chzelaže'cho gata' checho o da' chzelaže'cho goncho da' bi naquen güen lagüen'. To tocho cheyala' soa cuezcho nabia' cuincho cont goncho da' nac da' zaca'. Na' cheyala' goncho da' zej to licha; na' cheyala' soacho gonxencho Diosen' yežlio nga. ¹³ Le šlac zoacho yežlio nga zoacho mbalaz nezecho žin ža yid Jesucriston' da' yoble nse'e be'ni' juisyw'. Naque' Dios checho ben' chonxencho na' ben' none' yela' mban checho toli tocanē, na' zaca'chgüe'. ¹⁴ Len' bnezjw cuine' neche chio' cate' gosote'ne' cont bnitlagüe' xtoła'chon', na' beya' beyibe'

yichjlažda'ochon' len da' malen' cont none' chio' ca xi'ine'. Na' bene' ca' cont yebecho goncho da' güen.

¹⁵ Can' cheyala' gwzejni'ido' bene'. Na' cheyala' gono' chach laže' yesone' da' güen na' tılo' bene' cheson da' xinj, le Diosen' ba gwsele' le' na' ba bene' le' yela' chnabia' cont gwzejni'ido' legaque'. Bi go'o latje yosozoe' le' to šla'ale.

3

Can' cheyala' gon chio' chejnilaže'cho Jesucriston'

¹ Da' yoble yozzendo' bene' chesejnilaže' Jesucriston' cheyala' yosozexjwyichje' yosozenague' che justis ca' na' che bene' gwnabia' chegaque' ca' na' bate'teze cheyala' yesone' da' güen. ² Yozzendo' legaque' bi cheyala' yesene' mal che note'teze bene'. Bi cheyala' yesedił yosošaše', san cheyala' yesaque' bene' šagüe' na' yesape' yela' chxenlaže' len yogo'loł bene'.

³ Chio' lecze bi gwzejni'icho cana' na' bencho güedenag len Diosen'. Gweyle'cho diža' güenlažen' na' bentezcho bi da' xinj da' gwzelaže' lažda'ochon'. Gwdacho bencho con da' bebecho. Gwzoacho bxi'a lježcho. Besegue'e bene' chio' na' bgue'e lježcho. ⁴ Perw bžin ža Dios ben' none' yela' mban checho toli tocañe blo'ede' chio' catec bene' šagüe' naque' na' catec chacde' chio' benach. ⁵ None' chio' yela' mban toli tocañe gague neče bi da' güen benchon', san da' beyaše'de' chio'. Nachen' beya' beyibe' yichjlažda'ochon' len da' malen' cate' gwzolao chejnilaže'chone', na' Spiritw chen' bocoben yichjlažda'ochon'. ⁶ Diosen' gwsele' Spiritw chen' zoan lo' yichjlažda'ochon' chaclenchan chio', le Jesucristw ben' none' yela' mban checho toli tocañe gwnabde'ne' selen'. ⁷ Na' ca' ba beyaže' beži'ilaže'de' chio' cont beyone' chio' bene' güen lagüen' na' cont soa cuezcho nezecho žin ža šjayzoacho len le' toli tocañe.

⁸ Da' ca' ba gwnia' nga zjanaquen da' li, na' gono' byen yosozenag bene' ca' gwzejni'ido' chen. Le bene' ca' ba chesejnilaže' Diosen' cheyala' yesebec yichjgaque' yesone' da' güen. Na' da' quinga ba gwnia' zjazaca'chguan na' yesaclenen note'teze bene'. ⁹ Perw bi gono' txen len bene' chesedił chosošaše' che bize diža' da' bi zejen. Na' bi cuec yichjo' che diaža che da' xozxta'ocho ca'. Bi gono' txen len bene' chesedił chosošaše' che bi zejen dan' nyoj le'e ley da' bzoj da' Moisésen', le da' chesone' ca' bi chaclenen bene' na' bi naquen da' zaca'.

¹⁰ Na' bene' ca' cheson cont bene' ca' chesedop chesežague' chesonxene' Jesucriston' chesechoje' chople, neyoedo' legaque' bich yesone' ca'. Na' še ba gwneyoedo' legaque' to chope ni'a na' bi chosozenague', yebejo' legaque' ca'ale. ¹¹ Le da' bi chosozenague' nachen' nezecho zjambiaye'e na' zjanape' doła' che da' xinjen' chesone'.

Can' cheyala' gon Titon'

¹² Cate' seła' Artemas o Tíquico gan' zon', ben con ga zelao saque'do' cont yido' yežagcho lo' ciuda Nicópolis, le ba bechoglaža' yega'ana' na' tiemp zag.

¹³ Na' ben yogo' da' gac gono' par gacleno' Zenas ben' nsed ley, na' Apolos, cate' yesa'aque' gan' zon' cont bibi yeseyažjde' chanez. ¹⁴ Bene' lježcho ca' chesejnilaže' Criston' cheyala' yesoe'laže' yesone' da' nac güen na' yesaclene' bene' chyažj chchine. Le cheyala' gaccho bene' chon da' zaca'.

Bene' ljež Pablon' chosoguae' Titon' tiox

¹⁵ Yogo' bene' cheson xšin Diosen' txen len neda' nga chosoguape' le' tiox. Na' chñaba' gwguapšco' tiox bene' ca' zoaleno' na', bene' ca' chesacde' chio' da' naccho txen chejnilaže'cho Criston'. Diosen' gaclenšque' yogo'le. Da' na'zen' chzoja'.

CART DA' BZOJ POSTLW SAN PABLO CHE FILEMÓN

Pablo chzoje' carten'

¹ Neda' Pablo dia' ližya nga da' chyixjue'eda' xtiža' Cristo Jesúsén'. Chzoja' le' Filemón, na' txen len bene' lježcho Timoteon' chguapto' le' tiox. Chaqueto' le' da' naccho txen choncho xšin Diosen'. ² Na' lecze chguapto' tiox bene' ca' chesedop chesežague' chesonxene' Jesucriston' ližo'. Na' le' Apia, naco' ca' bene' zanto', na' le' Arquipo, chono' neto' txen choncho xšin Diosen', lecze chguapto' le'e tiox. ³ Chnabeto' Xacho Diosen' na' Xancho Jesucriston' yesaclenšque' le'e na' yesone' cont soa cuezle binlo len xbab chelen'.

Filemónna' chejnilaže' Jesucriston' na' chacdo' bene' lježe'

⁴ Na' le' Filemón, yogo' ni'a cate' chjayze'eda' le' šlac chol giüža' Diosen', choa' yela' choxclen che' can' ba chono'. ⁵ Ba benda' diža' can' chejnilažo' Xancho Jesucriston' na' can' chacdo' lježcho bene' lecze chesejnilaže' Jesucriston'. ⁶ Na' chnaba' gaclen Diosen' bene' ca' ba gosejnilaže' Jesucriston' lagüe be'leno' legaque' diža' can' chejnilažo'ne'. Chnaba' gaclene' legaque' cont yesache'ede' yogo' da' güen juisyw da' chon Diosen' lo' yichjlaždao' chio' chejnilaže'chone'. ⁷ Bene' migw, leca chbeda' na' chac chach laža' nezda' chachgüedo' bene' lježcho ca' chesejnilaže' Jesucriston', le chacleno' legaque' cont nita'che' mbalaz.

Gwnabe' yezi'xen Filemónna' che Onésimo

⁸⁻⁹ Dan' chacdo' Criston' na' chacdo' bene' lježo' ca', da'n'an' chneyoeda' le' gono' to da' chaclaža' gono'. Da' naca' postlw che Criston' guac gona' byen gono' da' gwžia' bia' gono' šaca' žan gwčhina' yela' chnabia' da' yo'o lo na'. Perw bi žan gona' ca'. Neda' Pablo ba naca' bene' gole na' lecze na'a ba dia' ližya nga da' chyixjue'eda' xtiža' Jesucriston'. ¹⁰ Na' chnaba' goclen laguon' par Onésimo ben' ba nona' ca' xi'ina'. Le šlac dia' ližya nga bsd blo'eda'ne' cont chejnilaže' Jesucriston'.

¹¹ Cana' bi goque' mos güen chio', san na'a ba naque' mos güen chio' na' lecze ca' chia' neda'. ¹² Ba chezsela'ne' laguo', na' chneyoeda' le' yolebo'ne' na' yezi'xeno' che', le leca chacda'ne'. ¹³ Zelaža' yega'anlene' neda' cont gaclene' neda', gone' da' cheyala' gono' šlac dia' ližya nga da' chyixjue'eda' xtiža' Jesucriston'. ¹⁴ Perw bi chaclaža' nabda'ne' bi gone', le naquen chio' le' nao' nac gone', cont do lažo' gono' bi da' güen da' gono' na' gague gonchi'on. ¹⁵ Diosen' be'e latje beza' Onésimon' ližon' šlož cont soale txen toli tocaņe. ¹⁶ Na' na'a bich naque' mos chio' na'ze san naque' ca' bene' bišo' da' naque' txen len chio' chejnilaže'cho Xancho Jesucriston'. Leca chacda'ne', na' le' cheyala' gacchdo'ne', gague con ca' chacdo' note'teze benach, san can' chacdo' bene' lježo' chesejnilaže' Xanchon'.

¹⁷ Da'n'an' še da' li naccho txen chejnilaže'cho Jesucriston', yolebo'ne' cacze chlebo' neda' cate' chedena'a le'e. ¹⁸ Na' še bi da' mal bende' le' o še bi da' chale' chio', neda' chixjuan'. ¹⁹ Cuincza' neda' Pablo chzoja' da' nga, neda' chixjua' bi da' chale'. Na' bibi chnia' che da' chal'o' le' chia' neda' da' ba de yela' mban chio' toli tocaņe. ²⁰ Bene' migw, da' chaquecho Xancho Jesucriston' chaclaža'

gono' dan' chḡaba' nga ca to goclen ḡhia'. Benšca ca soa' mbalaz, le naccho txen len Criston'.

²¹ Zoa' lez gwzenago' ḡhia' na' goncho' güen clel ca dan' žia' le', da'nān' chzoja' le'. ²² Na' yeto da' chḡaba', chaclaža' yedesoa' ližon' cate' yida' gan' zoalen'. Le zoa' lez yob gac yedyeḡa' a le'e can' chḡable lao Diosen' cate' chol güižlene'.

Bene' ca' nita' len Pablon' chosoguape' Filemónna' tiox

²³ Epafras die' ližya nga txen len neda' da' chyixjue'ede' xtiža' Cristo Jesúsēn'. Na' le' chguape' le'e tiox. ²⁴ Na' lecz ca' bene' ca' chesaclene' neda' len xšin Diosen' nga, Marcos, na' Aristarco, na' Demas, na' Lucas, chosoguape' le'e tiox.

²⁵ Xancho Jesucriston' soašque' len le' gaclēščacze' le'. Da' na'zen' chzoja'.

CART DAN' NYOJ CHE BEÑE' HEBREO CA'

Diosen' gwsele' Xi'ine' cont be'lene' benachen' diža'

¹ Cani' Diosen' be'lene' da' xoxxta' ocho ca' diža' len beñe' gwsele' gosoe' xtižen'. Zan las gosoe' da' beñe' ca' xtižen' na' nža'te ca gosoen' toe'.

² Perw na'a ba zoa žin ža yeyož yežlion' na' Diosen' ba be'lene' chio' diža' dan' gwsele' Xi'inen' bedezejni' ide' chio'. Na' Xi'in Dios nan' bene' yaba na' yežlio nga len yogo' bichle da' de nga na' gate'teze. Na' bengaquen' con can' gwnalaže' Diosen'. Na' gwžin ža gac lo na' Xi'in Diosen' yogo' benach, beyixe', na' bica'chle da' bene'. ³ Na' Xi'in Diosen' chlo'e catec bene' zaca' nac Diosen', le cayane' nac yichjlaždao' Xe' Diosen' nac yichjlažda' ogüen'. Na' Xi'in Diosen' chone' cont yaban', yežlion' na' da' ca' chle'echo le'e yaban' na' yežlion' chesonen žin, le nape' yela' guac cont chac con can' že'. Len' bzanlaže' cuine' gote' cont bexi beyach chio' len xtoła'chon'. Na' beyož bene' ca' beyepe' yaban' zjajychi'e cuit Xe' Diosen' ben' nac beñe' zaca' juisyw na' chnabi'e txeñ len le'.

Xi'in Diosen' zaca'che' ca angl ca'

⁴ Naque' beñe' zaca'chgua ca angl ben' cheson žin che Diosen', na' Diosen' bene' cont leca ba chacxenche' ca angl ca'. ⁵ Diosen' biña' ye'e ñe to angl ca dan' gože' Xi'inen', gože'ne':

Len' naco' Xi'ina';

na'aža ba blo'a zoaczo'.

Na' biña' güe'e diža' che note'teze angl can' bi'e diža' che Xi'inen', gwne':

Neda' gona' cont gacbia' naca' Xe',

na' gona' cont gacbia' naque' Xi'ina'.

⁶ Na' da' nac Xi'in Diosen' la'zelagüe beñe' zaca', da'nan' cate' Diosen' gwsele'ne' yežlio nga gwne':

Yogo' lol angl chia' cheyala' yesonxene' le'.

⁷ Na' che angl ca' gwne':

Chona' cont angl chia' ca' beñe' chesone' žin chia' chesaque' ca be' dan' chechj na' chesaque' ca yi' bel.

⁸ Perw che Xi'inen' be'e diža', gwne':

Len' naco' Dios na' nabi'o toli tocañe.

Na' leca güen chnabi'o, chono' con da' zej to liča.

⁹ Chebedo' da' zej to liča na' chgue'edo' da' malen'.

Da'nan' neda' Dios ben' chonxeno' ba bena' cont zoacho' mbalazech ca note'teze beñe'.

¹⁰ Na' da' yoble gozna Diosen' che Xi'inen':

Xana' Dios, beno' yežlion' ža gwlaste,

na' yogo' da' chle'echo le'e yaban' lecze le' benon'.

¹¹⁻¹² Na' gwžin ža cate' te che yogo' dan' chle'echo le'e yaban' na' lo yežlion', perw le' bi te chio'; soaczo' toli tocañe.

Na' gwša'a le'e yaban' na' yežlion' ca to beñe' chša' xe' cate' ba beyoen na' chaze' yeton.

Na' le'e yaban' na' yežlion', gono' len len can' chon to beñe' cate' chotob xe'.

Perw le', tozecz can' gaco' toli tocañe, gwbat žin ža te chio'.

¹³ Diosen' biña' ye'e ñe to angl ca dan' gože' Xi'inen', gože'ne':

Gwche'edo' cuita' nga nabia'cho txeñ,

na' gona' cont yogo' no chesegue'e le' yosozexjw yichje' yosozenague' chio'.

14 Na' ca nac angl ca', yogue' zjanaque' bene' cheson xšin Diosen', na' chsele' legaque' chesaclene' chio' ba gwleje' šjayzoacho len le'.

2

Cheyala' gwzenagcho che Diosen' cont yeque'e xtola'chon'

1 Na' da' nac Xi'in Diosen' bene' zaca'ch ca angl ca', do yichj do laže'cho cheyala' gwzenagcho xtižen' da' ba benecho. Le še bi gwzenagcho chen do yichj do laže'cho, guanlaže'chon na' cuejyichjchon. 2 Diosen' goclaže' yosozenag da' xozxta'ocho ca' che ley che' dan' goseyixjue'e angl ca'. Da'n'an' Diosen' bnežjue' castigw da' cheyala' si' to toe' bate'tez bi bosozenague' chen, con ca nac da' mal da' gosone'. 3 Gague da' yelacho bi si'cho castigw še bi gwzenagcho xtiža' Xancho Jesúsen' da' gwdixjue'ede' že' chaclaže' gone' yela' mban checho toli tocañe. Da' zaca'chgua da' ben Xancho Jesúsen' cont gata' yela' mban checho toli tocañe. Cuine' gwdixjue'eden' da' nechw, na' bene' ca' gosedalen le' bosolo'ede' chio' le naquen da' li. 4 Diosen' bene' cont gosone' da' zaca' yebanecho, na' bnežjue' legaque' zan yela' guac, na' Spiritw chen' benen cont gosone' da' zan da' güen len yela' guac chen. Na' yogo' da' ca' goc con can' gwnalaže' Diosen'. Na' Diosen' bene' ga gosac da' ca' cont nezecho xtiža' Xancho Jesucriston' naquen da' li.

Jesucriston' goque' can' nac chio' benach

5 Na' gague angl can' yesenabia' cate' žin ža gata' yežlio cobe dan' choe'cho diža' chen. 6 Na' de late' Xtiža' Diosen' gan' nyoj diža' da' be'len to bene' Diosen', gwne':

¿Bixchen' nži'ilažo' neto' benach? le bitec bi zaca'to'.

Na' ¿bixchen' chi' yichjo' chačleno' neto'?

7-8 Beno' cont benachen' zjanaque' blao, na' con angl ca'ze zjanaquech blao ca benach.

Na' beno' cont benachen' naque' bene' zaca' na' cont chachene'.

Beno' cont yogo'lol da' zjade yesaquen lo na' benach, na' len yogo'lol beyixe' yesacba' lo na'gaque'.

Na' da' ben Diosen' cont yogo'lol da' de yesaquen lo na' benachen' na' yogo' beyixe' yesacba' lo na'gaquen', bibi bocua'an' Diosen' da' bi gwlo'e lo na' benachen', la'czla' na'a bina' le'echo yesac yogon' na' yogo'ba' lo na' benachen'.

9 Perw yogo'lol ba yo'ocze lo na' Jesúsen', la'czla' šlac gwzoe' yežlio nga angl ca' gosacche' blaoch ca le'. Perw na'a da' bzanlaže' cuine' gote', da'n'an' Diosen' bene' cont chachenche' ca legaque' na' cont nachia' naque' bene' zaca' juisyw. Le da' nži'ilaže' Diosen' chio' benach, da'n'an' bžie' bia' got Jesúsen' cont gac yeque'e xtola' to to benach.

10 Diosen' bene' benach, bene' beyixe' ca' na' bite'tezechle da' zjade cont chachene'. Na' Diosen' chaclaže' bene' zan yesaque' xi'ine' na' šjasyezoe' len le' gan' yo'ochgua be'ni', na' güenna' bene' bžie' bia' gwxaca'zi' Jesúsen' cont gac gone' yela' mban toli tocañe che chio' benach. 11 Jesúsen' ba gwlo'e chio' lo na' Diosen' na' txen len Jesúsen' naccho xi'in Dios. Da'n'an' bi cheto'e Jesúsen' ne' naccho biše' lježe'. 12 Quinga gwna Jesúsen' gože' Diosen': Gwzejni'ida' bene' biše' lježa' ca' can' nac yichjlažda'oguoñ', na' txen len bene' ca' zjandop zjanžag chesonxene' le' goła' gonxena' le'.

13 Nach Jesúsen' gwne':

Neda' soacha' šejnilaža' Diosen'.

Nach da' yoble gozne':

Nga zoa' txen len bene' ca' gwlo'o Diosen' lo na', bene' ca' ba gwque'e ca xi'ine'.

¹⁴ Chion' ba gwca'a Diosen' ca xi'ine' naccho bene' bela' chen, na' da'nan' Jesúsen' lecze golje' goque' bene' bela' chen cont bnežjo cuine' gosote'ne'. Na' da' got Jesúsen', da'nan' gwzoede' bzoe' šla'ale Satanás dan' chnabia' da' xigüe' ca' na' dan' choñen yela' got che benačhen'. ¹⁵ Jesúsen' bene' cont bich chžebcho gatcho, can' chesežeb yezica'chle benač šlac de yela' mban chegaque', chesežebe' yesate'. ¹⁶ Jesúsen' bide' yežlion', gague cont gaclene' angl ca', san cont goclene' chio' naccho xi'in diaža che da' Abrahanna'. ¹⁷ Na' da'nan' benen byen goc Jesúsen' doxen can' nac chio' benač cont naque' bžoz blao checho lao Diosen'. Na' bnežjw cuine' bnitlagüe' xtoła'chon' na' zoe' cheyaše'de' chio' con can' chazlaže' Diosen'. Na' da' bnežjw cuine' bnitlagüe' xtoła'chon', zaca'lebde' ca bžoz blao che nación Israel chechon' ben' gwyej lao Diosen' bežue' chen che beyixe' cont gwnabe' yezi'xen Diosen' xtoła'gaquen'. ¹⁸ Na' da' bžaglao Jesúsen' cate' gwlo'oyela' gwxiyen' le' gone' da' mal, perw bibi da' mal bene', da'nan' nezde' naclen' gaclene' chio' cate' chgo'oyela' gwxiyen' chio' goncho da' mal.

3

Jesúsen' zaca'che' ca da' Moisésen'

¹ Bene' migw, Diosen' ba gwleje' chio' naccho lo ne'e, na' cheyała' goncho xbab che Cristo Jesús ben' gwsele'. Naque' bžoz blao checho na' ben' chejnilaže'cho. ² Jesúsen' bene' cayanen' gwna Dios ben' gwseła' le' šlac gwde' yežlion', ca'cze ben da' Moisésen' cate' le' goclene' da' xozxta'ochó ca' cani', bene' ca' gosac diaža che Dios. ³ Perw Jesúsen' zaca'che' ca da' Moisésen', le' len' bxie' diaža che Diosen', na' da' Moisésen' naque' con to bene' za' lo diaža che Diosen'. ⁴ Gwnita' benač bene' bxie' to to diaža yežlio nga, san ca nac Diosen', len' bxie' yogo'te da' zjade. ⁵ Da' Moisésen' goque' ca xmos Diosen' cate' bene' con can' gwna Diosen' cont goclene' da' xozxta'ochó bene' ca' gosaque' diaža che Diosen'. Na' da' Moisésen' be'e diža' che da' za' gac da' za' chixjue'e Diosen' benačhen' ca tiempa'. ⁶ Perw Criston' bi goque' ca to mos dan' gwzoe' bene' can' gwna Diosen', san da' naque' Xi'in Diosen' da'nan' bene' can' gwnen', na' naque' Xan yogo' chio' naccho diaža che Diosen'. Na' da' li naccho diaža che Diosen' še zoačhačcho chejnilaže'chone' na' chebecho nezecho gac güen checho.

Guac soacho mbalaz len Diosen'

⁷ Da'nan' cheyała' gwzenagcho can' ža Spiritw che Diosen' len da' nga da' nyojen, žan:

Še Diosen' nie' le'e na'a,

⁸ bi gonle güedenag can' goson da' xozxta'ole cani' cate' besyedabague' Diosen' latje daš gan' chesaše'.

⁹ Nach Diosen' gwne':

Bi gosejle'e še leda' dan' goša' legaque' gwnežjua' da' yesezaca'zi'e neche xtoła'gaquen'.

Bi gosejle'e chia' cate' gosaše' latje dašen', la'czla' čhoa iz besele'ede' can' bena' len legaque'.

¹⁰ Da'nan' bža'a bene' ca' gwnitan' na' gwnia':

“Yogo' las chesejle'e diža' güenlaže',

na' bi chosozenague' chia' cont yesone' can' chazlažan'.”

¹¹ Nachen' bža'a legaque' na' da' bałi gwlo'a gwnia':

“Gwbat nite' mbalaz yesyezi'laže' can' chezi'laža' neda'.”

¹² Bene' migw, bi güe'le latje ñabia' da' malen' yichjlažda'ole na' gonon cont cuejyichjle bich šejnilaže'le Diosen' ben' zoa toli tocaņe. ¹³ Na' šlac ña'a ñe' decze latje gwzenagcho che Diosen', le ñeyoe lježle tža tža cont ñe tole bi gonle xbaben' clele, gaquele bibi nonen gontezle da' xinj. ¹⁴ Da' li naccho Criston' txeñ še ñe' zoacho chejnilaže'chone' cate' žin ža gatcho, con can' gwzolaicho chejnilaže'chone'.

¹⁵ Nyoj Xtiza' Diosen' che chio', žan:

Še Diosen' ñie' le'e ña'a,

bi gonle güedenag can' goson da' xozxta'ole cani' cate' besyedabague' Diosen'.

¹⁶ Na' da' žan ca', choen' diža' che da' xozxta'ocho ca' bebej da' Moisésen' nación gan' nzi' Egipto. Gosende' can' gož Diosen' legaue', perw bi bosozenague', besyedabague' Diosen'. ¹⁷ Da'nan' čhoa iz Diosen' bže'e legaue' ñeche gosone' da' xinjen', na' gosat ben' besyedabague' Diosen' šlac ñe' zjalaže' latje dašen'. ¹⁸ Na' legaue', da' bi bosozenague' che Diosen', da' baļi gwlo'e, gwne' bi güe'e latje yesenite' mbalaz yesyezi'laže' can' chezi'laže' Diosen'. ¹⁹ Na' nacbia' da' bi gosejle'e che Diosen', da'nan' bi goc ñite' mbalaz yesyezi'laže' can' chezi'laže' le'.

4

¹ Na' ca' ñezecho ľecze ñeche chio' Diosen' gwne' bene' yesejle' xtiže' yesenite' mbalaz yesyezi'laže' can' chezi'laže' le'. Da'nan' cheyaļa' gwsaca'cho cont bi goncho güedenag len le'. ² Chio' ba benecho diža' güen cont gac soacho mbalaz ca diža' dan' gosene da' xozxta'ocho ca' cani', perw diža' da' gosende' bi goclenen legaue', le bi gosejle'en. ³ Na' chio', še chejle'cho da' ža Diosen', ba zoacho mbalaz chezi'laže'cho can' chezi'lažen'. Na' nyoj da' gwne' che da' xozxta'ocho ca', žan:

Nachen' bža'a legaue' na' gwlo'a da' baļi, gwnia':

“Gwbat ñite' mbalaz yesyezi'laže' can' chezi'laža' neda.”

Na' ñezecho Diosen' gwzolaģüe' chezi'laže' cate' beyož bxie' yaban' na' yežlion' na' bichle da' bene' ža gwlaste. ⁴ Na' zoa late' gan' nyoj Xtiza' Diosen' can' bene' ža gažen', žan:

Xop ža ben Diosen' yaban', na' bichle da' bene' cate' bxie' yežlion'.

Na' bžin ža gaže, bich bi bene', con gwzoe' mbalaz bezi'laže'.

⁵ Na' ľecze nyojen can' gwne', žan:

Gwbat ñite' mbalaz yesyezi'laže' can' chezi'laža' neda'.

⁶ Na' ñe' naquen da' li baļ bene' yesejle'e xtiža' Diosen' na' ñite' mbalaz yesyezi'laže' can' chezi'laže' le', na' bene' ca gosende' diža' güen čhen' cani' bi gosejle'en, na' bi goc yesenite' mbalaz yesyezi'laže' yela' güedenag čegaquen'.

⁷ Na' gwdechle gwne' Diosen' da' yoble gwne': “Na'a guac ñita'le mbalaz yezi'laže'le.” Na' bene' cont da' rey David bzoje' da' nga, žan:

Še Diosen' ñie' le'e ña'a,

bi gonle güedenag.

⁸ Da' Josué gwčhi'e da' xozxta' chio' bene' Israel gan' gosezi'e yežlion' da' bnežjw Diosen' legaue', perw bi bene' cont yesenita' bene' ca' mbalaz yesyezi'laže'. Da'nan' Diosen' be'e diža' gwdele, gwne' gwžin ža yesenite' mbalaz yesyezi'laže'. ⁹ Na' da'nan' bene' ba gwlej Diosen' cont yesaque' lo ne'e, legaue' guac yesenite' mbalaz yesyezi'laže' ca' mbalazen' gwzoa le' cate' gwzolaģüe' chezi'laže'. ¹⁰ Na' bene' ca' ba nita' mbalaz chesyzi'laže' can' chezi'laže' Diosen', bich chesone' can' ža xbab čegaquen', san chesone'

can' ža Diosen'. Da'nan' žacho zjanite' mbalaz chesyenzi'laže' can' zoa Diosen' mbalaz chezi'laže' da' beyož bxie' yogo' da' zjade. ¹¹ Da'nan' cheyała' güe'laže'cho šejle'cho xtiža' Diosen' do yichj do laže'cho cont soacho mbalaz yezi'laže'cho can' chezi'laže' Diosen' na' cont bi cuiayi'cho can' gac checho še goncho güedenag len xtižen' can' goson da' xozxta'ochó ca'.

¹² Xtiža' Diosen' chazen lo' yichjlaždao' bene' chesenden' na' chaclenen bene' chosozenag chen. Na' zaca'leben ca to spada da' nłachgua chop la'a. Perw chonch Xtiža' Diosen' ca to spada, le chlo'en chio' še chzenagcho che Diosen' o še che cuincho, na' chzejni'in chio' che xbab da' yo'o lo' yichjlažda'ochon' na' len yogo' da' chzelaže'cho še naquen güen o naquen mal. ¹³ Bibi de da' bi neze nle'e Diosen', ne to benačh, angl, da' xigüe' o bi da' zjade. Diosen' nezde' yogo'te da' yo'o lo' yichjlažda'ochon'. Na' gwžin ža nabyožde' chio' che yogo'te da' ba bencho.

Jesúsen' naque' bħoz gwnabia' checho

¹⁴ Jesús ben' naque' Xi'in Diosen' ba beyepe' yaban' na' zoe' gan' zoa Diosen'. Na' naque' bħoz blao checho bene' la'zelagüe zaca'. Da'nan' cheyała' soačhačho šejnilaže'chone' can' ba be'cho diža' goncho. ¹⁵ Jesús ben' nac bħoz blao chechon' chache'ede' bi da' naquen zdebe len chio', le gwxiyen' goclažen' co'oyelan' le' gone' da' mal, na' bžaglagüe' cayanen' chžaglao chio', perw bibi da' mal bene'. ¹⁶ Na' dan' zoe' naque' bħoz blao chechon' ben' cheyaše'de' chio', da'nan' cheyała' yoł güižcho Diosen' gan' chi'e chnabi'e, na' bi žebcho güe'lenchone' diža', nabechone' yezi'xene' checho na' gaclene' chio' bate'teze chache'echo chyažjecho gaclene' chio', le nži'ilaže'de' chio'.

5

¹ Yogo' bene' ca' ba gosaque' bħoz blao che nación Israel chechon' gosac lo' ne'e šjasesane' bi da' šjasesane' lao Diosen' na' gosote' beyixe' bosolalje' xchengacba' cont Diosen' bezi'xene' xtola' da' xozxta'ochó ca'. ² Na' bħoz ca' gosape' yela' chxenlaže' len bene' bina' yesejni'i can' cheyała' yesone' na' len bene' ba nħoayag da' malen' legaque', le lecze benačh bene' güen da' xinj legaque'. ³ Da'nan' benen byen bħoz ca' gosote' beyixe' na' bosolalje' xchemba' cont gosenabe' yezi'xen Diosen' xtolen' lente xtola' yezica'chle bene'.

⁴ Na' ne to bħoz ca' bi benxen cuine' neca gwlej cuine' cont gague' bħoz blao, san Diosen' gwleje' to toe' gosaque' bħoz blao can' gwleje' da' Aarón. ⁵ Na' ca'zce goc len Criston', bitw beyiljue' nac gone' cont gacxene', neca gwlej cuine' cont naque' bħoz blao checho, san Diosen' gwleje'ne' na' gože'ne': Len' naco' Xi'ina',

na'aža ba bena' cont nachbia' zoaczo'.

⁶ Na' ga yoble nyoj yeto da' gwne':

Naco' bħoz toli tocaņe can' nac bħoz ben' le' Melquisedec.

⁷ Na' Criston' šlac gwzoe' yežlion' boł güiže' Xe' Diosen' ben' nape' yela' guac cont yosle' le' bi gate', gwne' zižje na' gwcheže' gwnabe' gaclene' le'. Na' da' bzejxjw yichj Criston' bene' con can' gwna Xen', na' Xe' Diosen' bzenague' na' goclene'ne' cont bi bžebe' yela' goten'. ⁸ Na' la'czła' Criston' naque' Xi'in Dios, bžaglagüe' yogo'loł da' ca' goc che' cate' bzenague' che Diosen' cont gwyejni'ide' can' chac che chio' benačh. ⁹ Na' beyož goc che' yogo'loł da' goclaže' Diosen', nach ba guaque' gwnežjue' yela' mban toli tocaņe che yogo' bene' yosozenague' che'. ¹⁰ Can' naquen, Diosen' gwleje' le' cont naque' bħoz blao checho, na' naque' ca bħoz Melquisedec.

Gwsaca'cho cont bi cuejyichjcho xtiža' Diosen'

¹¹ Na' ñe' de da' zan da' chaclaža' ñia' le'e che da' ngan', perw naquen zdebe ñian' ca šejni'ilen, le bich chebele šejni'ilen. ¹² Ba gole' gwzejni'ile bene' xtiža' Diosen', perw gualaz da' gonle ca', chyažjele no yozejni'i le'e da' yoble da' ca' bsdle da' nechw. Da'nan' zaca'leble ca to bidao' biña' gac gagw na' con chaže'be'. ¹³ Na' bene' zjanac ca to bidao' ñe' chaže', biña' yesejni'ide' xtiža' Diosen' binlo cont yesone' da' zej to licha len Diosen'. ¹⁴ Na' dan' ža xtiža' Diosen' da' naquech zdebe, zaca'leben ca yeļa' guagw da' chagw bene' gole. Na' bene' chesejni'i lenna' chesacbe'ede' še to da' yesende' o to da' yesone' naquen güen o naquen mal, le ba zjyolagüe' chosozenague' che Diosen'.

6

¹⁻² Cana' betinjecho xtoļa'chon', gwejnilaže'cho Criston', na' bsdcho diža' güen che'. Goccho ca to bene' guat len yichjlažda'ochon' ñeche da' choncho da' xinj, perw ba betinjecho xtoļa'chon' ña'a. Bich chyažjen yezolaocho šejnilaže'cho Diosen'. Bich chyažjen gwsedchcho che dan' chesezoa bene' nis o che dan' chxoa na'cho yichj bene' na' chñabcho gaclen Diosen' legaue'. Bich chyažjen gwsedchcho can' gac cate' yechis yosban Diosen' bene' guat ca' o caten' chogbi'en yesezaca'zi' bene' ca' ba goson da' xinj. Ba nsedcho da' ca', na' ña'a bač cheyaļa' gwsedcho xtiža' Diosen' da' nacch zdebe cont gacch yichjlažda'ochon' can' nac yichjlaždao' Criston'. ³ Lenña' goncho ña'a še Diosen' gonšque' latje.

⁴ Nita' bene' ba gwyo'o be'ni' che Criston' lo' yichjlažda'ogaue', na' ba chesacbe'ede' can' nac yeļa' mban da' choñ Criston', na' ba zoa Spiritw che Diosen' lo' yichjlažda'ogaue'. ⁵ Ba zjanezde' xtiža' Diosen' naquen güen na' ba zjanombi'e yeļa' guac che Diosen' da' za' gwlo'echde' beñachen'. ⁶ Na' še žin ža bich yesejnilaže' Criston' na' yesebejyichje' xtižen', bich gac yesyetinjde' che dan' ba gosebejyichje'ne', le lo' yichjlažda'ogaue' chesone' txen len bene' ca' bosode'e Xi'in Diosen' le'e yag cruzen', na' chesone' cont nochle bene' yesegue'ede' le'. ⁷ Cheyaļa' gac yichjlažda'ochon' ca to yežlio güen gan' chesaz bene'. Cheyož chac yejon' zan ni'a, nach cac cosešen'. Na' chata' dan' cheseyažje bene' chesazen'. Na' nachbia' Diosen' chebede' yežlion' nac ca'. ⁸ Bi gaccho ca to yežlio gan' chla' yag yeše' na' bichle yiçe' da' nono chagw. Yežlion' nac ca' bibi zacan', na' ba zoa cuejyichj xanen len na' yiçe' da' chla' lagüen žin ža šeyen.

Nezecho šjayzoacho len Diosen'

⁹ Le'e bene' migw, chacda' le'e, na' la'czļa' ba bia' dižan' ca', ñezda' bilja gonle can' cheson bene' chesebejyichje' xtiža' Diosen'. Chacda' gonle güen da' ba gwlej Diosen' le'e cont šjayzoale len le'. ¹⁰ Diosen' zeje' to licha, na' bi ganlaže' can' ba benle xšinen' na' can' ñe' chonlen ña'a chaclenle yezica'chle bene' chesejnilaže'ne'. Na' chonle ca' da' chaquele Diosen'. ¹¹ Na' chaclaža' to tole soatezle gonchle ca' do yichj do laže'le šlac biña' žin ža gatle, cont ñezele šjayzoale len Diosen'. ¹² Chaclaža' bi gacle bene' xagüed len da' ža Diosen'. Na' chaclaža' gonle can' ba goson bene' zan bene' gosenite' gosejnilaže' Diosen' cani', gosejle'e gon Diosen' can' gože' legaue' gone', na' gosape' yeļa' chxenlaže' cate'ch bžin ža benen'.

¹³ Cate' Diosen' gože' da' Abraham xi'in diaža che' yesaque' bene' zan, bzoa cuine' gwlo'e da' baļi gac can' gwnen', le nono zoa bene' napch yeļa' gwnabia' ca Diosen'. ¹⁴ Gwne': "Da' li goncza' cont gac güen chio' na' cont

yesac xi'in diaža chio' bene' zan." ¹⁵ Na' Abrahanna' gwdape' yela' chxenlaže' šlac gwleze', nach bžin ža gwzolao chac can' gwna Diosen'. ¹⁶ Benachen' zjayolagüe' chosozoe' Diosen' cue'e da' bałi che bi dan' chesene', le Diosen' chnabia'che' ca legaque'. Chesone' ca' cont bene' ca' chesacyože' len legaque' yesejle'e na' yesyeyacxenlaže'. ¹⁷ Na' Diosen' bzoa cuine' cue'e da' bałi cont neze bene' ca' zjanac xi'in diaža che da' Abrahanna' gague da' te che dan' gwne' gonen'. ¹⁸ Diosen' bene' chope da' qui: gwne' can' gone' na' lecze bzoa cuine' cue'e da' bałi gac can' gwnen', na' gague da' te bi gac can' gwnen'. Chaclaže' chio' ba betinje xtoła'chon' yebecho nezecho šjayzoacho len le'. Na' Diosen' bi chac güe'e diža' güenlaže'. ¹⁹⁻²⁰ Na' da' nezecho šjayzoacho len Diosen', bi soa xbab chechon' quile ca'le. Jesúsen' ba gwzialagüe' gwoyo'e gan' zoa Diosen' gan' nono benačh goc šo', na' bene' cont chio' gac šo'cho. Le naque' bχoz blao checho tołi tocañe, na' naque' ca bχoz Melquisedec.

7

Jesúsen' naque' ca bχoz Melquisedec

¹ Na' Melquisedequen' goque' rey na' gwnabi'e gan' nzi' Salem, na' Dios ben' nac la'zelagüe bene' bláo gwleje' le' cont goque' bχoz. Na' goquen' Abrahanna' zeze'e lao gwđile gan' bene' gan' gayo' rey, na' Melquisedequen' jašague'ne' na' gwdixjue'ede' gac da' güen che da' Abrahanna'. ² Ca horen' Abrahanna' zeze'e zonse'e yogo'loł da' jaytobe' da' bene' gan' lo yela' gwđilen', na' gwlequen' ši cuen na' bnežjue' to cuen che bχoz Melquisedequen'. Na' Melquisedec zejen diža' "rey bene' zej to licha". Na' goque' rey che bene' zjanite' binlo, le Salem gan' gwnabi'e zejen diža' "zjanite' binlo". ³ Bi nyojen še no goc da' xaxna' Melquisedequen'. Neca nyojen še no goc xozxta'ogüe', na' neca nyojen baten' golje' na' baten' gote'. Da'n'an' žacho Melquisedequen' zaca'lebd'e ca Xi'in Dios ben' zoa tołi tocañe naque' bχoz checho, le bi golje Melquisedequen' lo diaža che nochle bχoz, na' neca gwzoa nochle bene' lo diaža che' bene' tie' gwłane' xlatje'.

⁴ Le gon xbab catec bene' blao goc bχoz Melquisedequen'. Da'n'an' da' xozxta'ocho Abrahanna' gwleje' to cuen lo ši cuen da' ca' jaytobe' lo na' rey ca' na' bnežjue' bχoz Melquisedequen'. ⁵ Na' da' xozxta'ocho bene' ca' gosajle lo diaža che da' Leví, ben' besyeyale' gosaque' bχoz che nación Israel chechon', gosone' con can' nyojen le'e ley da' bzoj Moisés, na' bosochixjue' to cuen lo ši cuen yogo' bi da' gota' che yezica'chle bene' gualaž chegaque' ca'. Na' yogo'cze' gosaque' diaža che da' Abrahanna', bχoz ca' na' bene' yezica'chle. ⁶ Perw Melquisedequen' la'czla' bi golje' lo diaža che da' Leví, Abrahanna' bnežjue'ne' to cuen lo ši cuen da' ca' jaytobe', na' Melquisedequen' gwñabde' Diosen' gac güen che da' Abrahanna' ben' gwna Diosen' yesac xi'in diaža che' bene' zan. ⁷ Na' nezecho bene' chac chñabde' Diosen' gac güen che bene' yoble zaca'che' ca ben' gac che' da' güenna'. ⁸ Na' bene' ca' zjanac bχoz can' ža ley dan' bzoj Moisésen' chesezi'e to cuen güeje lo ši cuen yogo' bi da' de che bene' Israel gualaž chechon', na' bχoz ca' zjanaque' con ljež benačhcho bene' chesat. Na' che bχoz Melquisedequen' ben' gwxi' to cuen lo ši cuen da' jaytob da' Abrahanna', Xtíža' Diosen' choen' diža' che' ca to bene' ne' zoacze. ⁹⁻¹⁰ Na' da' bnežjo Abrahanna' le' da' ca', guac načo da' Leví bnežjue' Melquisedequen' to cuen güeje lo ši cuen da' ca', le gwdechle Levín' golje' lo diaža che da' Abrahanna', na' Leví nan' goque' xozxtao' bene' ca' gosac

lo na'gaque' bosotobe' da' ca' bosonežjo bene' Israel gualaž checho ca' che Diosen'.

¹¹ Na' Diosen' bnežjue' bene' Israel gualaž checho ca' ley chen' cani' cont benen žin txen len da' goson bꝑoz ca' bene' gosalj'e lo diaža che da' Levín'. Perw bꝑoz ca' bi goc yesone' cont yichjlaždao' benačen' yesaquen xilaže' len Diosen'. Da'n'an' byažjecho bid Jesús'en' naque' bꝑoz checho toli tocaņe, na' le' naque' ca bꝑoz Melquisedequen', gague ca da' bꝑoz Aarón. ¹² Na' cont goc zoa Jesús'en' naque' bꝑoz chechon', byažjen bža' ley da' nonen mandadw non' gac bꝑoz. ¹³ Le Xancho Jesús'en' ben' nac bꝑoz chechon' bi golje' lo diaža che da' Levi, na' noch no na' choj lo diaža che Jesús'en' bene' naque' bꝑoz. ¹⁴ Nezczecho Xancho Jesús'en' golje' lo diaža che da' Judá, na' da' Moisés'en' bi bzoje' le'e leyna' ga nan bene' galje' lo diaža che da' Judán' guac yesaque' bꝑoz.

¹⁵ Na' nacia' ba bža' leyna', le ba zoa Jesús'en' naque' bꝑoz cobe chechon' na' naque' ca bꝑoz Melquisedequen'. ¹⁶ Bito golje' lo diaža che da' Levi can' gosac bꝑoz ca' bene' goson žin can' ža ley da' bzoj da' Moisés'en', san naque' bꝑoz da' bi gwzoe yela' goten' le' na' zoe' toli tocaņe. ¹⁷ Quinga nyoj da' gwna Diosen' che', žan:

Naco' bꝑoz toli tocaņe, can' nac bꝑoz ben' le' Melquisedec.

¹⁸ Na' bꝑoz ca' gwna Diosen' nita' cana', bich nžie' bia' nite' na'a, le dan' bžia bia' leyna' yesone' bi goc yeca'an xtoła' benačen' to ši'i. ¹⁹ Na' leyna' ľecze bi goc gonon cont yesac yichjlaždao' benačen' xilaže' len Diosen'. Perw na'a ba chaquech güen checho, le ba zoa bꝑoz checho bene' ba beca'a xtoła'chon' to ši'i cont zoacho binlo len Diosen' na' chac chñelenchone'.

²⁰ Na' cont nezecho Jesús'en' naque' bꝑoz checho, Diosen' bzoa cuine' gwlo'e da' baļi le soacze Jesús'en' gague' bꝑoz chechon'. ²¹ Bene' ca' gosaque' bꝑoz can' bzoj da' Moisés'en', Diosen' bitw bzoa cuine' cue'e da' baļi cont šejle'cho zjanaque' bꝑoz. Perw nyoj can' gože' Jesús'en', žan:

Diosen' bzoa cuine' gwlo'e da' baļi na' bi gwš'e can' ba gože'ne' gone':

“Naco' bꝑoz toli tocaņe can' nac bꝑoz ben' le' Melquisedec.”

²² Na' da'n'an' zoa Jesús'en' chone' cont nezecho Diosen' gaclene' chio' toli tocaņe can' gwne' gone'. Na' can' za' gwne' gaclene' chio' na'a, zaca'chen ca da' gože' da' xozxta'ocho ca' cani'. ²³ Na' bene' ca' gosaque' bꝑoz can' ža ley dan' bzoj da' Miosés'en', gosaque' bene' zan, le cate' gosat tgüje tgüje', la' benita'te bene' yoble. ²⁴ Perw Jesús'en' zoe' toli tocaņe, na' da'n'an' naque' bꝑoz checho toli tocaņe. ²⁵ Da'n'an' chac chone' yela' mban toli tocaņe che chio' chñabcho yezi'xen Diosen' checho, le zoacze' toli tocaņe chñabe' goclen lao Diosen' che chio' chejnilaže'chone'.

²⁶ Na' Jesús'en' nacyaņe' bene' chyažjecho gague' bꝑoz blao checho cont gaclene' chio', le naque' bene' laždao' xilaže'. Bibi da' xinj none' na' neca none' bi xbab mal, con bibi doļa' nape'. Nža'le naque' len benačh bene' cheson da' xinj. Jesús'en' ba beyepe' zoe' gan' zoa Diosen', na' chnabi'e txen len le'. ²⁷ Nža'le naque' len bꝑoz blao ca' gosenita' cani'. Legaque' tža tža byažjen gosote' beyixe' bosolalje' xchemba' cont gosenabe' bezi'xen Diosen' xtoła'gague', na' gwdechle gosote' beyixe' yoble bosolalje' xchemba' cate' gosenabe' bezi'xen Diosen' xtoła' yezica'chle bene' Israel gualaž checho ca'. Perw Jesús'en' šni'aze bnežjw cuine' neče xtoła' benačen' cate' gosote'ne' le'e yag cruzen', na' bi byažjde' gote' beyixe' can' goson bꝑoz ca' tža tža neče xtoła'gague' na' neče xtoła' bene' yezica'chle. ²⁸ Bene' gosac bꝑoz blao can' ža ley da' bzoj da' Moisés'en' gosaque' bene' güen da' xinj can' zjanac yezica'chle

beñe'. Na' cate' ba goc zan iz bzoj Moisésen' leyna', Diosen' bzoa cuine' gwlo'e da' bałi zoacze Xi'ine' Jesúsen' naque' b̄xoz blao checho. Na' Xi'ine' Jesúsen' zoacze' tołi tocañe na' nac yichjlaždagüen' cayañen' chazlaže' Diosen'.

8

Jesúsen' bene' cont gwzolao chac da' cobe da' gwna Diosen' gone' cont gaclene' chio'

¹ Da' nga zejechen lao yogo' da' ba gwnia': zoa b̄xoz blao chechon' ben' nac cayañe' chazlaže' Diosen', na' ba chi'e yaban' chnabi'e txen len Diosen' ben' nac la'zelagüe beñe' zaca'. ² Chone' žin gan' zoa Xancho Diosen', gague lo' yo'o dan' goson benačh cont yesonxene' le'. ³ Na' yogo' b̄xoz blao che beñe' Israel gualaž chechon' nite' chosonežjue' Diosen' bi da' chosonežjue'ne' na' chesote' beyixe' chosolalje' xčhembra' lao Diosen'. Na' dan' nac Jesúsen' b̄xoz blao checho, benen byen bnežjw cuine' blalj xchene' neche xtola'chon'. ⁴ Na' šaca' ñe' zoe' yežlio nga bi naque' b̄xoz, le nita' b̄xoz che beñe' Israel gualaž chechon' chjasesane' bi da' chjasesane' lao Diosen' con can' ža ley dan' bzoj da' Moisésen'. ⁵ Na' beñe' ca', chesone' bi da' chesone' lo' yodao' da' naquen ca l gua'a lsaca' che yaban' gan' zoa Diosen'. Na' nezecho naquen ca l gua'a lsaca' che yaban' gan' zoa Diosen', le cate' za' gon Moisésen' yodao' dan' chacte chedobe gan' goson b̄xoz ca' žin che Diosen' cani', Diosen' gože'ne': "Yogo' da' ba gwnia' gonle, le gonen cayañen' blo'eda' le' caten' gwzoacho lo ya'an." ⁶ Na' da' chon Jesúsen', da' xen zaca'chen ca da' cheson b̄xoz che beñe' Israel gualaž chechon', na' can' gwna Diosen' gaclene' chio' lagüe da' bnežjw cuin Jesúsen' neche xtola'chon', lecze da' xen zaca'chen ca dan' gože' da' xozxta'ocho ca' cani'.

⁷ Le Diosen' gože' da' xozxta'ocho ca' gac güen chegaque' še yesone' can' ža ley čen', perw bi bosozenague', na' da'nan' byažjen gwđixjue' to da' cobe.

⁸ Na' Diosen' bi bebede' legaque', san gwne':

Gwžin ža cate' ñia' to da' cobe da' gona' gaclena' le'e nacle xi'in diaža che beñe' ca' gosenite' Israel,

na' len le'e nacle xi'in diaža che beñe' ca' gosenite' Judá.

Neda' naca' Xanle Dios žia' ca'.

⁹ Nža' can' goša' da' xozxta'ole gona' gaclena' legaque' cani', bži'ilaže'da' legaque' na' bena' cont besyechoje' lo na' beñe' nación Egipto.

Legaque' bi gosone' can' goša'ne' cont gac güen chegaque'.

Na' da'nan' gwleza' bich goclena'ne', neda' Xanle Dios žia' ca'.

¹⁰ Na' quinga gona' gaclena' xi'in diaža che le'e nacle beñe' Israelen' cate' žin ža:

Neda' Xanle Dios gona' cont šo' yichjgaque' da' nona' mandadw yesone',

na' gona' cont yesyebeden' lo' yichjlažda'ogaquen',

na' toza' neda' yesejnilaže',

na' legaque' yesaque' nación chia'.

¹¹ Na' bi yažjen yosozejni'i lježe' cont yesombi'e neda',

neca yažjen yosozejni'i no beñe' biše' lježe',

le cana' yogo'lole' yesombi'e neda',

bi' bixjw lente beñe' nac beñe' gole.

¹² Canan' yezi'xena' xtola'gaquen', na' bich gona' cuent še bi da' malen' ba gosonen'.

¹³ Na' Diosen' be'e diža' che da' cobe da' gwne' gone' gaclene' naciõn chechon', na' da'nān' nezecho ba bzoe' to šla'ale da'na' gože' da' xoxzta'ocho ca' canī'. Na' da' gole da' ba bzoe' to šla'ale ba zoa yeniten.

9

Yodao' da' zoa yežlion' na' dan' zoa yaba gan' zoa Diosen'

¹ Canī' Diosen' gože' da' xoxzta'ocho ca' gaclene' legaue' na' gac güen chegaue' še yesone' can' ža ley chen'. Na' šlac ne' chon žin da' nechw da'na' gože' legaue' canī', Diosen' bžie' bia' nacle yesonxene' le' na' nacle yesone' yodao' gan' yesonxene' le' yežlio nga. ² Gosone' yodao' da' nsan' čhope cuart. Na' lo' cuart nechon' bosozoe' to candelar na' to mes gan' bosocue'e yetextil da' naquen che Dios. Na' cuartna' bososi'en Latje che Dios. ³ Na' bosozie' to lache' lo' yo'ona' cont bchojen čhope cuart, na' cuart gwchopen' bososi'en Latje ga Zoa Dios. ⁴ Na' lo' cuart gwchopen' bosozie' yeto mes de oro gan' bosozeye' yal. Na' goseyixjue' to caj da' bosoguazje' oro doxenen. Na' lo' cajen' gosegüe'e to yeso' de oro gan' gosegüe'e late' yela' guagw da' nzi' manā, na' gosegüe'e carrot che da' Aarõn dan' bexeje. *Lece* lo' caj nan' gosego'ošagüe' yej ta'a gan' byoj yogo' dan' bžia bia' Diosen' yesone' cont gaclene' legaue'. ⁵ Na' čože' cajen' bosonite' čhope l' gua'a lsaca' bene' gosone' ca angl bene' bososi'e querubines, cont nacbia' zoa Diosen' gan' žia cajen' na' naque' bene' zaca' juisyw. Na' čože' cajen' ladjo angl ca' gan' nžiljo xilgaquen', bosožie' xchen beyixe' cate' gosenabe' yezi'xen Diosen' xtola' bene' Israel gualaž checho ca' to to iz. Perw bi chonen byen güe'cho diža' na'a doxen can' goca'.

⁶ Na' beyož gosone' yodaon' na' bosonite' yogo' da' ca' lo'enna', nach yogo' ža bžox ca' goso'e lo' cuart nechon' na' gosone' can' bžia bia' Diosen' gosone' gosonxene' le'. ⁷ Na' cuart gwchopen', toz bžox blao goc gwyo'e lo'enna' tñi'a tğüiz. Na' cate' gwyo'ena' benen byen bežoe' chen che beyixe' bži'en lo' cajen' cont Diosen' bezi'xene' xtola' na' bezi'xente' xtola' yezica'chle bene' Israel gualaž checho neče da' xinj da' gosone' sin čbi gosache'ede'. ⁸ Na' da' bi de lsens šo' nochle bene' lo' cuart gwchopen', Spiritw che Diosen' chzejni'in chio' biņa' gac šo' benachen' gan' nac latje ga zoa Diosen' šlac ne' chon žin yodao' nechua' lo' yežlion'. ⁹ Na' yodaon' len yogo' da' cheson bžox ca' lo'enna' chlo'en chio' zoacho na'a can' chac yaban' gan' zoa Diosen'. Na' la'czla' da' zan chesoe' bene' Diosen' na' be zan beyixe' chesote' chesonxene' le', bibi yela' guac zjansa' da' ca' cont yesenezde' bibi doła' zjanape' len Diosen'. ¹⁰ Na' da' ca' cheson bene' gualaž chechon' lo' yodaon' naquen costumbr che no nis yela' guagw, no beyixe' chesote', na' nacle cha' chyib cuingaque', na' bichle da' zjazacan' par cuerp chegaue' na'ze. Na' ba gosonen žin šlac Diosen' biņa' gwše'e costumbr ca' len da' coben'.

¹¹ Na' na'a Criston' naque' bžox blao checho na' ba bžin ža bxie' costumbr güen ca'. Na' zoe' yaban' naque' bžox checho lao Diosen', na' gan' zoen' zaca'chen ca yodao' da' goson benachen' yežlio nga. ¹² Na' bi bežoe' chen che no šib no go'n dao' cate' gwyo'e gwnabe' cont Diosen' bezi'xene' xtola'chon', san da' bnežjw cuine' gosote'ne' na' blalj xchene' neče xtola'chon' tñi'aze le'e yag cruzen', da'nān' goc gwyo'e gan' zoa Diosen' na' ba beque'e xtola'chon' toli tucane. ¹³ Na' ley da' bzoj da' Moisésen' nyojen žan da' zan da' cheson bene' da' chonen cont bi chesaque' xilaže' len Diosen'. Na' cont yesyeyaque' xilaže' len Diosen' da' yoble, chyažjen gwže'e bžozen' legaue' xchen no šib no go'n na' nchixen len de da' chega'an' cate' chosozeye' to vaca' dao'. ¹⁴ Na'

xchen Criston' da' bedelalje' neche xtol'a'chon' zaca'chen ca xchen beyixe' ca', le xchenen' cheyonen yichjlažda'ochon' xilaže' len da' xinj da' ba bencho. Da'nan' bich nchoglaon checho gatcho neche xtol'a'chon', san soaczcho gonx-encho Diosen' ben' zoa toli tocaņe. Spiritw che Diosen' goclenen Criston' bnežjo cuine' beque'e xtol'a'chon', na' bibi xtol'a' Criston' gota'.

¹⁵ Criston' bedelalj xchene' cont gwzolaoc chac da' coben' dan' gwna Diosen' gone' cont soacho binlo len le'. Na' ba bxie' da' coben' cont balteze bene' ba gwlej Diosen' šjasyenite' len le' toli tocaņe. Na' da' got Criston' bedelalj xchene', da'nan' gwnitlao xtol'a' bene' ca' gosejnilaže' Diosen' šlac ne' chon žin dan' gwidxjue' da' nechw dan' gwne' gone' cont chio' bene' Israel soacho binlo len le'. ¹⁶ Cate' to bene' ba bene' testament, cate'ch ba gota'bia' ba got bena' ben testamenta', cana'ch gac can' žanna'. ¹⁷ Le to testament bi gac can' žan šlac ne' mban ben' ben len. Cate'ch ba gote' canan' gac can' žanna'. ¹⁸ Na' goc ca' len da' nechon' da' gož Diosen' da' xoxzta'ocho ca' gone' gaclene' legaque'. Da'nan' bžie' bia' bosolalje' xchen beyixe' cont gwxen. ¹⁹ Cate' da' Moisésen' beyož be'lene' da' xoxzta'ocho ca' diža' che yogo' dan' bžia bia' Diosen' yesone' can' ža ley chen', nach Moisésen' bži'e' legaque' xchen go' n dao' na' xchen šib dao' na' nis. Bži'e' legaque' da' ca' len late' yiša' xa xila' da' mben color xna na' len to xis yixe' dao' da' nzi' hisopo. Lecze bži'en lao libren' gan' nyoj ley chen'. ²⁰ Na' da' Moisésen' gože' legaque': "Chen ni ben Diosen' mandadw gwžia' le'e cate' gože' chio' nac goncho cont gaclene' chio' gac güen checho can' gwnen'." ²¹ Na' lecz ca' bene' bži'e' chenna' yodaon' na' yeso' ša' ca' bosochine' gan' gosonxene' Diosen'. ²² Ley dan' bzoj Moisésen' nžian bia' gwže'e' bxozen' chen lo yogo'ze bi da' chosočhine' cont yesyeyaquen xilaže' lao Diosen'. Na' leyna' lecze žan še biņa' lalj chen, Diosen' bi yezi'xene' xtol'a' benachen'.

Criston' gote' blalj xchene' cont beque'e xtol'a' bene' chesejnilaže'ne'

²³ Na' goc benen byen bosožie' xchen beyixe' lo' yodaon' na' lo da' ca' bosochine' yodaon' cont gosonen žin lao Diosen', na' yodaon' naquen cont to l gua'a lšaca' da' chzejni'in can' nac yaban'. Perw da' de yaban' byažjen to chen da' zaca'ch. ²⁴ Na' gan' gwyo'o Criston' gague naquen to yodao' da' naquen con to l gua'a lšaca' cont nezecho can' nac yaban'. Le' beyepe' yaban' na' gwyo'e gan' zoa Diosen' cont chne' gualaz chio' lagüen'. ²⁵ Bxoz blao che bene' Israel gualaz checho ca' cheso'e yodaon' tni'a tgüiz gan' nzi' Latje gan' Zoa Dios na' chosoži'e' chen che beyixe', perw Criston' bi bnežjw cuine' zan ni'a gosote'ne'. Tni'aze blalj xchene' neche xtol'a' benachen'. ²⁶ Šaca' byažjen blalj xchene' zan ni'a, ba gote' zan ni'a gwzolaon cate' gwxete yežlion', perw bi benen byen gac che' ca'. Bedelalj xchene' tni'aze cate' gwna Diosen' ba bžin ža che', cont chac cheque'e xtol'a' benach. ²⁷ Na' can' chac che benachen', žin ža gat to toe' na' te yesate' nach na Diosen' che to toe' še yezezaca'zi'e' o še yesenite' mbalaz. ²⁸ Na' can' yesat benachen' tni'aze, ca'cze bnežjw cuin Criston' tni'aze gosote'ne' cont chac cheque'e xtol'a' benachen'. Nach žin ža yide' da' yoble perw gague cont yeque'e xtol'a' benachen', san cont yeche'e bene' ca' chesebeze' batcan' yide' nach nite' mbalaz len le'.

10

¹ Ley da' bzoj da' Moisésen' len costumbr da' nžian bia' goncho cate' gonx-encho Diosen' bzejni'in chio' late'lasze che da' güen da' ba chac checho na'a ba bid Criston'. Perw leyna' bi goc yocoben yichjlaždao' bene' ca' gosejnilaže' Diosen' la'czla' gosote' beyixe' yogo' iz. ² Šaca' yichjlažda'ogaque' beyaquen

güen cate' gosote' beyixe' ca' na' cate' bꞑoz ca' bosoži'e legaque' xꞑhemban' neche xtola'gaquen', ba gwnitlao xtola'gaquen' to ši'ize šaca', na' bich bi yesacde' lo' yichjlažda'ogüen' che da' xinjen' chesonen'. ³ Perw da' chesote' beyixe' ca' na' bichle da' chesone' neche xtola'gaquen' to to iz, bi chac yesanlaže' zjanape' doła'. ⁴ Le xꞑhen no go'n dao' no šib dao' bi gac yeca'an xtola' benaꞑh.

⁵ Da'nan' cate' Criston' bide' yežlio nga gože' Diosen':

Dan' chesote' beyixe' na' dan' chjasesane' bichle da' chjasesane' laguo', gague da' can' zelažo'.

Zelažo' gwnežjw cuina' gona' can' chazlažo', le da'nan' beno' cont golja benaꞑh.

⁶ Da' chesote' beyixe' chosozeye'ba' laguo' na' yogo' da' ca' chesone' cont yezi'xeno' xtola'gaquen', gague da' can' chbedo'.

⁷ Da'nan' gwnia' can' nyoj le'e libr gan' žan: "Dios chia', za'a nga zedeyena' con can' chazlažo'."

⁸ Zgua'tec Criston' gože' Diosen': "Dan' chesote' beyixe' na' dan' chjasesane' bichle da' chjasesane' laguo', na' dan' chosozeye' beyixe' cont yezi'xeno' xtola'gaquen', gague da' can' zelažo' na' gague da' can' chbedo'", la'czla' leyna' nžian bia' yogo' da' ca'. ⁹ Nach Criston' gože' Diosen': "Za'a nga zedeyena' con can' chazlažo'". Da'nan' nezecho ba bzo'e to šla'ale dan' bžie' bia' gotcho beyixe' cont yezi'xene' xtola'chon', na' gualaz len, blalj xꞑhen Criston' cont beque'e xtola'chon'. ¹⁰ Na' da' ben Jesucriston' con can' gwyazlaže' Diosen' cate' bnežjw cuine' gosote'ne' tñi'aze cani', da'nan' ba beyac yichjlažda'och o xilaže' lao Diosen', chio' chejnilaže'chone'.

¹¹ To to bꞑoz che bene' Israel gualaž checho ca' con nita'cze' chesotcze' beyixen' tža tža na' chosoži'e xꞑhembra' can' ža leyna' cheyała' yesone', la'czla' xꞑhen beyixen' bi gac yeca'an xtola' benaꞑhen'. ¹² San Criston' tñi'azen' bnežjw yela' mban che' na' zaca'czen cont yeca'an xtola' benaꞑhen' toli tocaṇe. Na' beyože' bnežjw cuine' zjajchi'e gan' chnabi'e txen len Diosen'. ¹³ Na' zoe' chbeze' žin ža yosozexjw yichj yogo' bene' chesegue'e le' na' yosozenague' che'. ¹⁴ Na' da' bnežjw cuin Criston' tñi'aze cani', bene' cont chio' naccho lo' na' Diosen' beyac lažda'ochon' xilaže' toli tocaṇe. ¹⁵ Na' Spiritw che Diosen' lecze benen cont nezecho naquen ca', le nyojen, žan:

¹⁶ Quinga gona' gaclena' legaque' cate' žin ža,
gona' cont šo' yichjgaque' da' nžia' bia' yesone',
na' gona' cont yesyebeden' lo' yichjlažda'ogaquen',
can' ža Xancho Diosen'.

¹⁷ Na' nyoj yeto da' ža Spiritw che Diosen', žan:

Na' bich gona' cuent še bi da' malen' ba gosonen' o še bi xtola'gaque' ba gota'.

¹⁸ Na' cate' ba gwnitlao xtola'chon' bich chyažjen gotcho no beyixe' neche xtola'chon'.

Cheyała' soacho gonxencho Diosen' neca žebcho

¹⁹ Bene' migw, nezecho gac šo'cho gan' zoa Diosen' neca žebcho, le Jesucriston' blalj xꞑhenen' na' beque'e xtola'chon'. ²⁰ Guac nacho gwsaljue' to nez cobe, to da' choṇen chio' yela' mban toli tocaṇe, le da' bnežjw cuine' gote' neche chio', guac šo'cho gan' zoa Diosen' na' bich naquen ca' part yodaon' da' ngaše' len lache' da' ze gan' nono gac šo'. ²¹ Na' zoa bꞑoz blao chechon' naque' bene' zaca'chgua, na' naque' Xan yogo' chio' gwlej Diosen' cont chejnilaže'chone'. ²² Da'nan' cheyała' soacho gonxencho Diosen' do yichj do laže'cho neca žebcho, na' cheyała' soacho šejle'cho xꞑhen Jesucriston' ba

beca'an xtol'a'cho, le nezecho ba gwzoacho nis da' chejnilaže'chone'. ²³ Na' can' gwzolaacho be'cho diža' gwnacho šjayzoacho len Diosen', ca'cze cheyla' goncho bate'teze, na' da' li šjayzoaczcho len Diosen', le zoacze' chone' con can' gwnen'. ²⁴ Lecze cheyla' yeyiljwlaže'cho nacle gaclen lježcho cont gaquech lježcho tocho yetocho na' gonchcho da' güen. ²⁵ Na' bi cuejyichjo da' chdop chžagcho txen chonxencho Diosen' ca' chesebejyichj bał bene'. Cheyla' neyoe lježcho soaczcho šejnilaže'cho Criston', na' gonchcho ca' na'a ba nachbia' ba zoa te che yežlion'.

²⁶ Še ne' chontezechcho da' xinj la'czla' ba nombia'cho diža' li che Criston', bibi de bichle da' gon žin cont nitlao xtol'a'chon'. ²⁷ Na' cheyla'cze žebcho gon Diosen' cont saca'zi'cho še ca', na' yeyejcho lo yi' gabilen' gan' cuiayi' yogo' bene' cheseque'e Diosen'. ²⁸ Cani' da' xozxta'ocho ca' gosote' note'teze bene' bi bzenague' che ley da' bzoj da' Moisésen', bi besyeyaše'de' legaue', con še gwnita' čhope o šone bene' toz can' goso'e diža' che da' xinjen' none'. ²⁹ Na' da' mal juisyoch gac che chio' še gue'echo Xi'in Diosen' na' gaquecho bibi zaca' xchen Criston' da' blalje' cont beque'e xtol'a'chon' na' še necho che Spiritw che Dios ben' nži'ilaže'de' chio'. Le da' blalj xchen Criston' gwzolaao chac da' cobe da' gwna Diosen' gone' gaclene' bene' yesejnilaže'ne'. ³⁰ Nombia'cho Diosen' na' nezecho len' gwne': "Neda' yoži'a che da' mal da' chesone' na' neda' gona' cont yezezaca'zi'e." Na' lecze nyojen žan: "Xancho Diosen' chogbi'e nac gac che bene' ca' ba gwque'e ca xi'ine'." ³¹ Na' leca naquen da' žebcho še cuejyichjo Diosen' ben' zoa toli tocaņe, le gone' cont saca'zi'cho toli tocaņe.

³² Perw le šjayza'laže' can' bchejele da' zan da' gwdi gwxcaca'le cate' beyož gwyo'o be'ni' che Criston' lo' yichjlažda'olen'. ³³ Tgüeje gosezi'diže' le'e lao yogo' bene' yež na' tgüeje cate' gosotlate' le'e na' bichle da' bosochi bososaque' le'e, na' da' juisyw da' goquele cate' gosonde' bene' lježle ca'. ³⁴ Beyaše'le bene' lježcho ca' bene' gosata' ližya na' goclenle legaue', na' gwzoale mbalaz la'czla' bene' besegue'e le'e goseque'e bi da' gota' chele, le nezele de da' zaca'ch chele yaban' da' bi te chen. ³⁵ Da'nan' bi cuejyichjle da' chejnilaže'le Diosen', neca žeble, le žin ža cate' soachgualo mbalaz. ³⁶ Cheyla' gwyo gwchejle cont yeyož gonle yogo'lol da' chnalaže' Diosen', na' tena' gone' cont soale mbalaz toli tocaņe can' gwne'. ³⁷ Can' nyoj Xtiža' Diosen', žan:

La' žinte ža yid ben' seła' gan' zualen', bich šede'.

³⁸ Na' xi'ina' bene' zjanac bene' güen len neda' yesata' yela' mban che' toli tocaņe da' chesejnilaže' neda'.

Na' še bich yesejnilaže' neda', bich yebeda' legaue'.

³⁹ Perw chio' bi naccho ca' bene' ca' bich yesejnilaže'ne', bene' yesebiayi'. Chio' zoaczcho chejnilaže'chone' na' šjayzoacho len Diosen' toli tocaņe.

11

Da' chejnilaže'cho Diosen' naquen to da' zejen

¹ Še chejnilaže'cho Diosen' nezecho gac da' güen da' chbezcho gac, na' nezecho gon Diosen' gac can' že' da' biņa' le'echo. ² Bał bene' gwlas ca' bebe Diosen' legaue' da' gosejnilaže'ne'.

³ Da' chejnilaže'chone' chejle'cho con gwnie' na' goc yaban' len yežlion'. Na' bibi bchine' da' le'echo cate' bene' yogo' da' ca' chle'echo.

⁴ Cani' da' xozxta'ocho Abel gwyejnilaže' Diosen' na' da'nan' bnežjue' Diosen' to da' gocch da' güen ca' da' bnežjw bene' biše' Caín. Na' dan' bebe

Diosen' dan' bnežw Abelen' le', da'nan' gwņeze Abelen' naque' bene' güen len Diosen'. Na' la'czła' ba got Abelen', da' gwzoe' gweyjnilaže' Diosen', naquen ca to da' chņeyoen chio' soaczcho šejnilaže'cho Diosen'.

⁵ Na' ľecze da' xozxta'ochō Enoc gwzoe' gweyjnilaže' Diosen', na' da'nan' Diosen' bezi' beque'ene' šlac ne' mbane'. Bi gote', con noch no ble'e le'. Na' nyoj Xiža' Diosen', žan Diosen' bebede' Enoquen' šlac gwzoe' yežlion'. ⁶ Na' Diosen' bi chebede' note'teze bene' bi chejnilaže'ne'. Le note'tez bene' yol güiže' Diosen' cheyała' šejle'e zoacze Diosen' na' šejle'e gwnežjue' yela' mban toli tocane che note'tez bene' nabden' le' do yichj do laže'.

⁷ Na' ca nac da' Noé, ľecze gweyjnilaže' Diosen', na' cate' Diosen' bosnide' le' can' za' gac, gweyje' Noén' can' gož Diosen' le', na' do bžebe' bene' to barcw gan' gwyo'e len bene' lo' yo'o che' ca' cont bi gosate' lo nisen'. Na' da' gweyje' Noén' can' gwna Diosen', blo'ede' yezica'chle bene' že' na' zjanape' doła' da' bi bosozenague' che Diosen'. Na' ľecze da' gweyjnilaže' Diosen', goc gwna Diosen' naque' bene' güen len le'.

⁸ Da' Abrahanna' ľecze gweyjnilaže' Diosen'. Da'nan' bzenague' cate' bol güiž Diosen' le' na' gože'ne' šejje' ga de to yežlio zito' da' gaquen che'. Na' gweyje' la'czła' bi nombi'e latjen'. ⁹ Na' Abrahanna', da' gweyjnilaže' Diosen' jasoe' laž bene' zito' da' gwna Diosen' gac che' na' gac che xi'in diaža che'. Gwzoe' lo' yo'o de lache'ze na' ľecz lo' yo'o de lache'ze gwnita' xi'ine' Isaaquen' na' xi'in xesoe' Jacob bene' ľecze gož Diosen' gac yežlion' chegaque'. ¹⁰ Abrahanna' gwzoa gwleze' ca' lo yežlion', le gwneзде' žin ža šjayzoe' gan' zoa Diosen' gan' naquen to ciuda güen da' bi te čhen, ciuda da' ben Diosen'.

¹¹ Na' Saran' no'ol nac no'ol che Abrahanna', la'czła' naque' bene' güiž na' naque' bene' gole par soa xi'ine', Diosen' bene' to yela' guac cont gwzoa xi'ine', le gweyje'e gon Diosen' con can' gwne' gone'. ¹² Ca' goquen' gwzoa bi' che da' Abrahanna' la'czła' goque' bene' gole par soa xi'ine', nachen' xi'in diaža che' gosaque' bene' zan can' zjanac beljw ca' na' can' nac yox da' čhi' cho'a nisdaon' da' nono chac gwlab.

¹³ Yogo' bene' ca' ne' chesejnilaže' Diosen' cate' bžin gosate'. Na' la'czła' biņa' gac lo' na'gague' dan' gože' ľegaque' gac chegaquen', bi gosacžejaže', san gwnite' mbalaz gosejle' gwžin ža gon Diosen' can' gwnen'. Goso'e diža' zjanaque' ca bene' zito' len bene' že' lo yežlion' na' bibi lažgaque' de lo yežlion'. ¹⁴ Na' da' goso'e diža' bibi lažgaque' de yežlion', nachia' gosezelaže' yesyežine' ga yoble gan' gac lažgaque'. ¹⁵ Šaca' gosone' xbab che yežen' gan' gosaljen' naquen lažgaque', gota' latje jaya'aque' šaca', perw bi gosone' xbaben' ca'. ¹⁶ Gosezelaže' yesyežine' yaban', le gosejle'e na'len' nac lažgaque', na' gosneзде' nacchen güench ca yežlion'. Da'nan' Diosen' bi cheto'ede' chegaque' že' naque' Dios ben' chesonxene', na' ba benšagüe' to ciuda gan' zjanite'.

¹⁷ Na' Abrahanna' da' gweyjnilaže' Diosen' da'nan' bzenague' cate' Diosen' bene' le' prueba gože'ne' cheyała' got xi'ine' Isaaquen' lao Diosen' cont gonxene'ne'. Ba zoa gote' xi'inen' la'czła' gwneзде' Diosen' gože'ne': ¹⁸ "Gona' cont nita' xi'in diaža chio' bene' yesac xi'in diaža che Isaaquen'." ¹⁹ Da' Abrahanna' bečhoglaže' gote'be', le gwneзде' Diosen' chac chosbane' bene' guat. Perw na' Diosen' bi be'e latje gote'be'. Da'nan' guac nacho bosbane'be' ladjo bene' guaten', la'czła' gague gotbe'.

²⁰ Gwdechle Isaaquen' gweyjnilaže' Diosen'. Da'nan' gwņabde' Diosen' gone' güen len xi'ine' Jacob na' Esaú. ²¹ Ľecze da' Jacoben' gweyjnilaže'

Diosen'. Da'nan' cate' ba zoa gate', gwnabde' Diosen' gone' güen len xi'in xesoe' ca' bin' gosac xi'in da' José. Na' bcheque' yichje' benxene' Diosen' nchiše'teze' carrot che'. ²² Na' da' Josén' gweyjnilaže' Diosen', na' gweyjele'e žin ža yesyechoj bene' gualaž che' ca' Egipton' can' gwna Diosen'. Nachen' cate' ba zoa gate' bžie' bia' yesyeyo'e žit benat chen' cate' yesyeya'aque'.

²³ Cate' golje da' Moisésen', da' leca gosejnilaže' xaxne'en Diosen', bi be-sežebe' yesyedabague' dan' bžia bia' reyen' yesone', gwne' cheyala' yesote' bi' byo chegaque' ca'. Šone bio' bosocuaše'be' ližgaquen', le gosacde' nacchguabe' xdan. ²⁴ Nach bi' no'ol che rey beque'ebe' boscha'ogüe'be'. Perw cate' ba gwcha'o da' Moisésen' bžone' yesone' le' ca' xi'in bi' no'ol che rey che Egipton', le gweyjnilaže' Diosen'. ²⁵ Da'nan' gwyazlaže'che' bžaglagüe' txen len bene' gualaž che' ca' yogo' dan' bososaca'zi' bene' Egipto ca' legaque', clcl ca' gone' txen len bene' Egipto ca', le gocbe'ede' yob te che yela' chebe che da' xinj ca' cheson legaque'. ²⁶ Goclaže' bžaglagüe' can' bžaglaio Criston' cont bene' can' gwyazlaže' Diosen', bi gwzelaže' gac che' yogo' yela' gwni'a da' de che bene' Egipto ca', le gwnezde' gwžin ža gon Diosen' cont soe' mbalaz. ²⁷ Na' da' gweyjnilaže' Diosen', bi bžebe' rey cate' bžin ža besyechoje' Egipton' la'czla' reyna' bža'achgüe' legaque', con gwzoacze' bzenague' che Diosen'. Gwnezde' zoacze Diosen' la'czla' bi chle'echone'.

²⁸ Nach Moisésen' da' gweyjnilaže' Diosen' bžie' bia' da' xozxta'ocho ca', bene' že' to to yo'o gosote' to xila' dao' na' bosožie' xchemban' ližgaquen', cont angl bene' nsa' yela' got bibi goc gonde' bi' byo nechw lo' to to yo'o. ²⁹ Na' da' xozxta'ocho ca' gwnita' cani', da' gosejnilaže' Diosen' da'nan' Diosen' bene' cont Nisdao' Xnan' goquen chople, na' bla' yo biž gacho'len cont goc goselaguen'. Perw bene' Egipto ca' cate' gosaclaže' leze yeselague' nisdan', boscuše' nisa' gan' chesedien', na' gosate' gose'eje' nisen'.

³⁰ Lecze da' gosejnilaže' da' xozxta'ocho ca' Diosen', da'nan' Diosen' bene' cont bebix ze'e da' gweyechj doxen ciuda Jericó cate' gosechje' ze'en yogo' ža lao gaže ža. ³¹ Na' da' no'olen' le' Rahab, no'olen' goque' no'ol zle', lecze gweyjnilaže' Diosen', na' da'nan' bi gwžiyaye' txen len yezica'chle bene' Jericó bene' bi bosozenague' che Diosen', le blebe' chop da' xozxta'ocho ca' ližen' cate' jasegüia jasene'e lažen'.

³² Ba gwnita'ch bene' zan bene' gosejnilaže' Diosen', perw bi de tiemp gua' diža' che da' ben' gože' Gedeón, che da' ben' gože' Barac, che da' ben' gože Sansón, che da' ben' gože' Jefte', che da' rey David, che da' Samuel, na' che yezica'chle bene' goso'e xtiža' Diosen' cani'. ³³ Da' gosejnilaže' Diosen' besechoje' gosone' gan cate' gosedile' len no rey, na' bale' gosaque' bene' gwnabia' na' gosone' byen goson bene' yoble da' güen, yebale' beselē'ede' ben Diosen' bi da' güen da' gwne' gone' len legaque', yebale' Diosen' bene' cont bež znia bi gosagwba' legaque' na' bi gosoneba' legaque' zi' cate' gosegüe'e legaque' gan' že'ban'. ³⁴ Lecze da' gosejnilaže' Diosen', bale' bi goseye' cate' bene' bosozale' legaque' lo' yi', yebale' besyele' cate' bene' gosaclaže' yesote' legaque' len spada, yebale' beyon Diosen' legaque' bene' gual cate' bich zjanale', yebale' goclene'ne' gosaque' soldadw gual cont gosone' gan cate' soldadw bene' zito' gosedillene' legaque'. ³⁵ Na' gwnita' no'ol ca' da' gosejnilaže' Diosen' da'nan' Diosen' bosbane' no bene' lo' yo'o chegaque' ladjo bene' guat ca'.

Na' gwnita' bene' yoble, da' gosejnilaže' Diosen' da'nan' gosate', bi gosaclaže' yesyele' lo' na' bene' mal ca'. Goso'e latje bosochi bososaque' legaque', le gosenezde' gwžin cate' Diosen' yechis yosbane' legaque' ladjo

bene' guat ca' cont yesenite' len le'. ³⁶ Gwnita' yebal bene' leca gosezi'diža' bene' legaque' na' leca goseyine' legaque', na' bosocheje' legaque' gden na' goseyixjue' legaque' ližya. ³⁷ Na' bene' ca' besegue'e legaque' gosote' legaque', bale' bosochele' legaque' yej, yebale' bosozoxje' cuerp chegaquen' len sier, yebale' gosote' len spada. Na' bal bene' ca' gosejnilaže' Diosen' benen byen gosaše' yixe' zjanyaze' no xa xila' no xa šib. Bibi gota' chegaque', leca nyaše' gosac chegaque' catec bosochi bososaca' bene' legaque'. ³⁸ Gosaš goselaže' do latje daš, do ya'adao', do ga ze bloj na' ga zoa no liž beyixe'. Yogo' da' ca' goc che bene' ca' gosejnilaže' Diosen', la'czla' zjazaca'chgüe' na' bene' že' yežlio nga bi zjazaque' yesenite' txen len legaque'. ³⁹ Diosen' bebede' yogo' bene' ca' da' gosejnilaže' le', perw šlac gosenite' bina' gone' yogo' da' güen da' gwne' gone' che xi'in diaža che da' Abraham'a'. ⁴⁰ Le goclaže' gone' ga gac che chio' zoacho na'a yogo' da' güen da' gwne' gone', cont txen len bene' ca' gosejnilaže'ne' cani, yeyož gaccho can' chazlažen'.

12

Cheyała' soacho goncho xbab che Jesúsen'

¹ Nezecho ba gwnita' bene' zan gosone' da' güen neche da' gosejnilaže' Diosen', na' dan' gosonen' chzejni'in chio' can' cheyała' goncho. Da'n'an' cheyała' gwzoacho ca'ale še bi da' chžonen goncho can' chazlaže' Diosen' na' cuejyichjo bi da' xinj da' choncho, le da' xinjen' chziye'czen chio'. Na' cheyała' soatezcho goncho can' ža Diosen' sin cbi yeche'echo. ² Jesúsen' bene' cont gwzolao chejnilaže'cho Diosen' na' gaclene' chio' cont soaczcho šejnilaže'chone' yežintecho gan' zoe'na'. Na' cheyała' soacho goncho xbab ca' Jesúsen' byo bcheje' len da' gwdi gwxaque' cate' gosote'ne' le'e yag cruzen'. Bi bžone' yesonde' le' da' zan da' naquen da' zban juisyw, le gwneзде' za' gon Diosen' cont soe' mbalaz len le'. Na' na'a Jesúsen' ba chi'e chnabi'e txen len Diosen'.

³ Cheyała' goncho xbab can' byo bchejlaže' Jesúsen' len yogo' da' ca' gosone' bene' mal ca' le' na' bene' can' gwna Diosen'. Na' ca'cze cheyała' gwyo gwchejlaže'cho goncho can' chazlaže' Diosen' la'czla' še chaquechon zdebe; bi cheyała' yeche'echo. ⁴ Da' zan da' ba bžaglaole chdillenle da' malen', perw bina' lalj xchenle na' bina' yesote' le'e. ⁵ ¿Ba gonlaže'le can' ža Diosen' chneyoede' chio' can' chon bene' chneyoe xi'ine'? Nyoj xtiže'na', žan:

Xi'indagua', bi gacdo' bibi zejen da' chnežjo Xancho Diosen' le' da' saca'zi'o' cate' chono' bi da' xinj,
na' bi gaco' tole cate' chdile' le'.

⁶ Le Xancho Diosen' chzejni'ide' yogo' bene' chacde',
na' chnežjue' da' saca'zi' yogo' bene' ba gwque'e ca xi'ine' cate' chesone' da' xinj.

⁷ Cheyała' gwyo gwchejlaže'cho cate' Diosen' chone' chio' da' saca'zi'cho, le chonde' chio' ca benachen' chonde' xi'ingaque'. Le yogo'ze bidao' chnežjo xaben' lebe' castigw cate' chontezbe' da' xinj. ⁸ Na' še bi chon Diosen' da' saca'zi'cho cate' chontezcho da' xinjen', zeje diža' bi naccho xi'ine', le yogo' bene' ba gwque'e ca xi'ine' chnežjue' da' yezezaca'zi'e cate' chesontezbe' da' xinjen'. ⁹ Yogo' xaxna'cho bososogle' chio' yežlio nga na' gosone' castigw checho cate' bi da' xinj bencho, na' nezecho ca'cze cheyała' yesone'. Nacchxe cheyała' gwzenagcho che Xacho Diosen' bite'teze da' chzejni'ide' chio', cont šjayzoacho len le' toli tocaņe. ¹⁰ Na' xaxna'chon' to čop izzen' šlac bososogle'

chío' gosone' castigw checho con ca gosaclaže'. San Diosen' nezde' bi da' nac güen par chío', na' chdile' chío' na' chone' da' saca'zi'cho cont gaclenen chío' soacho goncho da' güen na' gac lažda'ochon' xilaže' can' nac lažda'ogüen'.¹¹ Na' bite'tez da' chyi chzaca'cho, šlac chaquen bi chazlaže'chon, perw cate' ba gwden chaclenen goncho da' zej to licha na' chaclenen soacho binloch len xbab da' yo'o lo' yichjlažda'ochon'.

Diosen' gone' da' saca'zi'cho še bi gwzenagcho che'

¹² Da'nan' le soa le gon can' chazlaže' Diosen' sin cbi yeche'ele. ¹³ Le soa le gon da' güen cont gaclenle bene' ca' ne' chesacžejlaže' naquen' yesone' cont legaque' yosozenagche' che Diosen' na' bi yesebejyichje' xtizen'.

¹⁴ Le yeyiljwlaže' nacle gonle soale binlo len yogo'cze bene', na' le gwzenag che Diosen' cont gac lažda'olen' xilaže', le nono yežin gan' zoa Diosen' še bi nac lažda'ogüen' xilaže'. ¹⁵ Le gaclen lježle cont ne tole bi ganlaže'le catequen' nži'ilaže' Diosen' chío', le cate' chzolaicho choncho güedenag len Diosen', bedao' chčha'o chxenen na' guacte gonon cont bene' zan yesonche' da' xinj. ¹⁶ Bi gata'lenle bene' byo bi nac bene' chele o no'ole bi nac no'ol chele. Na' bi gue'ele da' naquen da' zaca' len Diosen' can' ben da' bene' gože' Esaú, ben' bše'ede' to platw yela' guagw da' cheyala' gwnežjo Diosen' le' dan' golje' goque' bene' nechw. ¹⁷ Nezele gwdechle goclaze' yeyac lo ne'e da' bdie' lo na' bene' biše', perw bich bi goc bi gone' cont yeyaquen lo ne'e la'czla' gwcheže' catec gwzelažen'.

¹⁸ Nža'le chac che chío' na'a na' can' goc che da' xozxta'ocho cani' cate' Diosen' bnežjue' legaque' ley chen'. Cate' betje' lo ya'a Sinaí gwyechj yi' bel ya'ana', gwxoan žen, beyaquen chol, na' gwyechjchgua be'. ¹⁹ Gosende' gwchež to trompeta, na' gosende' be' Diosen' diža' len legaque'. Na' be-sežebchgüe' na' gosata'yoede' Moisésen' bich güe'len Diosen' legaque' diža'. ²⁰ Besežebchgüe', le Diosen' ba gožle' legaque' še noe' yesebigue' lo ya'an cheyala' yesote'ne' yosochele'ne' yej, na' lecž ca' yesone' še len beyixe'. ²¹ Da' zaca' žebcho goc lo ya'an, lente da' Moisésen' gwne': "Leca chaž chžeba' can' chaquen'."

²² Perw chío' chejnilaže'cho Criston' ba naccho txen len Diosen' ben' zoa toli tocanē na' len yogo' angl che' bene' že' yaban' chesonxene'ne', bene' zjanaque' bene' zan juisyw. Da'nan' guac nacho ba gwbiga'cho lo ya'a Sión dan' lecze nzin' ciuda Jerusalén da' chi' yaba gan' zoa Diosen'. ²³ Na' naccho txen len yogo'lolte bene' chesedop chesežag chesonxene' Jesucriston' gate'teze, bene' zjanyoj lagaque' le'e libr che Diosen' da' de yaban'. Na' yogo' chío' chejnilaže'chone' zaca'lebcho ca bi' nechw to lo' yo'o, bi' chzi' byen che xaxna'be', le si'cho da' güen da' gon Diosen' chío'. Na' naccho txen len Diosen' bene' choglaogüen' che yogo' benač še de xtola'gaque'. Lecze naccho txen len bene' ca' ba gosat, bene' gosaque' bene' güen lao Diosen' da' gosejnilaže'ne', na' na'a ba beyož zjanacyane' can' chaclaže' Diosen'. ²⁴ Na' naccho txen len Jesús ben' blalj xchene' cont gwzolao chac da' coben' da' gwna Diosen' gone' gaclene' benačhen'. Na' blalj xchene' cont ba bnitlao Diosen' xtola' chío' chejnilaže'chone'. Da'nan' xchen Jesús' zaca'chen ca xchen da' Abelen' da' gwlalj caten' betw bene' biše' le'.

²⁵ Da' mal juisyw še goncho güedenag len Diosen' cate' chne' chío'. Bene' cont gosezaca'zi' da' xozxta'ocho ca' cate' gosone' güedenag len xtizen' da' gwnelene' legaque' lo yežlion' cani', na' gonche' da' saca'zi' chío' še goncho güedenag len xtizen' da' choe'lene' chío' lo' lažda'ochon' zoe' yaba na'ate. ²⁶ Leca

gwxo' cate' Diosen' betje' lo ya'a Sinaín' cont be'lene' da' xoxxta' ocho ca' diža'. Na' na'a ba gwne': "Gwžin ža cate' gona' xo' yežlion' da' yoble, perw gague yežlio na'zen', san lente yogo' da' chle'echo le'e yaba." ²⁷ Na' da' gwne' gone' xo' da' yoble, zejen te che yogo' da' ca' ben Diosen' da' chle'echo, perw bi te che Diosen' na' che yogo' da' güen da' chone' da' bi chle'echo. ²⁸ Da'n'an' cheyała' güe'cho yela' choxclen che Diosen' da' gone' cont šjayzoacho mbalaz txen len le' gan' chnabi'e, na' gague da' te che da' güen da' gac checho len le'. Nach lecz cheyała' gache'echo bene' zaca'chgua nac Diosen' cont gonxenchone' do yichj do laže'cho can' chazlažen'. ²⁹ Cheyała' gwzenagcho chen', le Dios chechon' leca chgue'ede' da' malen', na' sele' lo yi' gabil' bene' ca' bi yesyetiñjde' che da' xinjen', da'n'an' zaca'lebde' ca' yi' bel'.

13

Da' chazlaže' Diosen' goncho

¹ Bitw gwsanle gaque lježle, le yogo'cho chejnilaže'cho Jesucriston' naccho ca biše' lježcho. ² Na' bi ganlaže'le cheyała' gwleble bene' za'ac zito' ližlen' bene' chesejnilaže' Jesucriston'. Bał xoxxta' ocho ca' cate' bosolebe' bene' zito' ližzaquen' bosolebe' angl' bene' gwsela' Diosen' neca gosache'ede'.

³ Cheyała' gonle xbab che bene' lježcho ca' chesata' ližya cont gaclenle legaue'. Na' cheyała' gonle xbab can' gale'le šaca' chac chele can' chac che bene' ca'. Na' bi ganlaže'le bene' lježcho bi da' chosoči chososaca' bene' legaue', le šlac ne' mbancho, cuerp chechon' guac saca'zin' da' quinga. Na' cheyała' gonle xbab can' gale'le šaca' chac chele can' chac che bene' ca'.

⁴ Na' le'e nšagna'le, yogo'le le soa do laže'le len no'ol chele o bene' chele na' bi talenle bene' yoble, le Diosen' gone' saca'zi' bene' chesata'lene' no'ole bi zjanac no'ol chegaue' o bene' byo bi zjanac bene' chegaue'.

⁵ Bi cheyała' selaže'cho mechon', san cheyała' soacho becho bi da' dao' da' de checho, le Diosen' ba gwne' che to tocho: "Bi ganlaža' le' na' bi cuejyichja' le'." ⁶ Da'n'an' bibi de da' žebcho, na' to tocho guac nacho:

Xana' Diosen' zoe' chaclene' neda'.
Bi žeba' bi da' gone beñachen' neda'.

⁷ Le šjayze'e bene' gwnita' bosozejni'ide' le'e xtiža' Diosen'. Le gon xbab can' gosone' cont yogo'ze bene' gosache'ede' gosenite' gosejnilaže' Diosen', na' le nita' le šejnilaže' Diosen' can' gosonen'.

⁸ Na' can' nac yichjlaždao' Jesucriston' nej nase, ca'czen' naque' ža na'aža, na' ca'czen' gague' toli' tocañe. ⁹ Bi güe'le latje yeseziye' bene' le'e len bi diža' yoble da' chosozejni'ide', le nža' xen can' chosod chosolo'e bale'. Da' chon Diosen' lo' lažda'ochon' neče da' nži'ilaže'chgüede' chio', lenna' chaclenen chio', gague da' ca' chesena bene' cheyała' ye'ej gagwcho. Na' ca' nac da' ca' chesene' cheyała' ye'ej gagwcho cont yebe Diosen' chio', bina' yesaclenen bene' ca' chesene' cheyała' gagwchon, na' neca gaclenen chio'.

¹⁰ Xancho Jesucriston' bnežjw cuine' gosote'ne' neče chio', na' da' chejni-laže'chone' ba gwnitlao xtoła'chon'; perw bene' ca' ne' chosolalje' xchen beyixe' na' chosozeye'ba' cate' chesenabe' yezi'xen Diosen' chegaue', da' got Jesucriston' bi chaclenen legaue'. ¹¹ Nezecho tñi'a tgüiz bene' nac bxož bxož che bene' Israel gualaž checho ca' chesote' beyixe' na' chjasesane' xchamba' lo' yodao' gana' nzi' Latje ga Zoa Dios cont chñabde'ne' yezi'xene' xtoła' yogo'lol' gaque'. Nach yezi'ca'chle bxož ca' chosozeye' cuerp che beyixe' ca' cho'a yežen'. ¹² Na' ca' ca'le goc che Jesusen' dan' gosote'ne' cho'a ciuda Jerusalenna' cate' bnežjw cuine' cont beque'e xtoła'chon' len xchene' dan'

blaljen'. ¹³ Da'nan' cheyała' šejnilaže'cho Jesúsen' na' cuejyichjcho costumbr gol ca', la'czła' yesegue'e bene' chio' da' choncho ca'. ¹⁴ Gate'tez zoacho lo yežlio nga da' te čhen, perw chbezcho šjayzoalencho Diosen' lo ciuda da' bi te čhen. ¹⁵ Da' ba beca'a Jesucriston' xtoła'chon' cheyała' güe'cho yela' choxclen che Diosen' yešlale mbancho, gonxenchone' len xtiža'chon'. Lenña' da' chaclaže' Diosen' güe'chone'. ¹⁶ Na' cheyała' soacho goncho da' güen na' cheyała' gwnežjwcho con gaca'te da' saque' gwnežjwcho gaclencho bene' bi de chegaque', le chazlaže' Diosen' cate' chonxenchone' choncho ca'.

¹⁷ Le gwzenag che bene' chososed cheselo'ede' le'e xtiža' Diosen' na' le güe' latje yesene' naquen' gonle, le chosogüia chesene'e le'e cont chesaclene' le'e len yichjlažda'olen', na' legaque' cheyała' yosyodie' cuent lao Diosen' še naquen' ba gosone'. Le gwzenag chegaque' cont yesyebede' na' cont da' chesone' bi gaquen' to da' zdebe, le še gonle güedenag len legaque', bibi da' güen chga'an čhele še ca'.

¹⁸ Le nab cont gaclen Diosen' neto'. Nezeto' chonto' can' chazlaže' Diosen' na' chaclaže'to' gonto' con da' naquen' güen. ¹⁹ Na' leca chata'yoeda' le'e yol güižle Diosen' nable yob gac yidcha' gan' zoalen'.

Čhnabe' gaclen Diosen' legaque'

²⁰ Na' na'a zoa Diosen' chone' cont zoa chbezcho binlo len xbab da' yo'o lo' yichjlažda'ochon'. Len' bečhis bosbane' Xancho Jesucriston' ladjo bene' guat, le da' blalj xčhenen' le'e yag cruzen' gwzolao chac da' cobe da' gwna Diosen' gone' gaclene' bene' yesejnilaže'ne'; na' gague da' te che dan' gwne' gonen'. Na' da' nži'ilaže' Xancho Jesucriston' chio', zaca'lebd'e' ca to bene' güeye' xila' bene' chon da' güen juisyw len be che' ca'. ²¹ Na' chnabda' Diosen' gaclene' le'e bite'tez da' chyažjele cont soale gonle yogo'te da' güen can' chazlažen', na' gone' cont gac yichjlažda'ochon' cayanen' chaclaže' lagüe da' nombia'cho Jesucriston'. Le gonxen Jesucriston' toli' tocañe. Na' ca' gonščaczcho.

²² Bene' migw, chnabšca' bi gaquele zed da' ba bzoja' le'e chñeyoeda' le'e nga, le bitec naquen' da' tone. ²³ Na' chzenda' le'e bene' migw čhecho Timoteon' ba bechoje' ližyan' na' chbeza'ne' nga. Na' še yob yele'e nach čhi'ane' cate' yedena'a le'e.

²⁴ Ca nac neda', chguapa' tiox bene' blao ca' chosozejni'ide' le'e na' chosogüia chesene'e le'e, na' lecze chguapa' tiox yogo' nochle bene' chesejni-laže' Diosen'. Bene' lježcho ca' za'ac Italia lecze chosoguape' le'e tiox.

²⁵ Diosen' gaclenšque' le'e. Da' na'zen' chzoja'.

CART DAN' BZOJ SANTIAGO

Santiago'n chguape' tiox bene' ca' zjanaslas zan yež

¹ Neda' Santiago naca' bene' güen žin che Diosen' na' che Xancho Jesu-riston'. Chguapa' le'e tiox, le'e nacle šižinw cue' xi'in diaža che da' Israel, le'e chejnilaže'le Jesucriston' na' naslasle yežlion'.

Nac nezecho can' che'ne Diosen' goncho

² Bene' migw, cheyla' yebehgüecho cate' chac bite'teze da' chac checho. ³ Cate' chac bi da' chac checho chonen chio' prueba še gončachlaže'cho šejnilaže'cho Diosen'. Na' nezecho cate' chončachlaže'cho chejnilaže'chone', chaclenen chio' cont gapchcho yela' chxenlaže' len bite'teze da' chac checho. ⁴ Na' da'nan' cheyla' gapple yela' chxenlaže' bite'teze dan' chac chele na' gončachlaže'le šejnilaže'le Diosen' cont gacle can' chaclaže' le'.

⁵ Note'tezcho cate' bi nezecho naquen' chaclaže' Diosen' goncho, cheyla' nabechone' gwzejni'iden' chio', na' gwzejni'iczeden'. Le chebede' chaclene' chio', na' bitw chdile' chio' cate' chnabechone' gaclene' chio'. ⁶ Perw cate' chnabechone' gwzejni'ide' chio', cheyla' šejle'cho chzenagcze' chechon' na' bitw gacžejlaže'cho. Bena' chacžejlaže' še chzenag Diosen' che', zaca'lebde' ca nisdao' dan' chas chata' cate' chečj be' lagüen' na' chjatan' nile na'le. ⁷ Ben' chacžejlaže' še chzenag Diosen' che', bitw cheyla' soe' lez gwnežjw Diosen' le' bite'teze da' chnabe'. ⁸ Na' ben' chon ca' bitw neзде' bi xbab chone', con šayičj šayen chaque' len bite'teze dan' chonen'.

⁹ Na' bene' migw, le'e chejnilaže'le Diosen', še nole nacle bene' yaše', le soa mbalaz, le nacle bene' zaque' len Diosen'. ¹⁰ Na' bene' migw, še nole nacle bene' gwni'a, le soa mbalaz dan' ba chache'ele lao Diosen' bitw zaca'chle clel ca yezica'chle bene'; na' yob te che yela' gwni'an' can' chde che yej ca' zjaze yiže'. ¹¹ Cate' chna'chgua gwbižen' chesecud yiže' ca', na' cheseyinj laga' che wejn' na' bich chosolo'en xdan. Can' chac len yej ca', lecze can' gac len bene' gwni'a ca', yeyol yenite' lao xšinen'.

Cheyla' soateze soacho šejnilaže'cho Jesucriston' bite'teze dan' chac checho

¹² Še chyo chchejlaže'cho len da' chac checho na' chončachlaže'cho chejnilaže'cho Diosen', nachen' leca mbalaz zoacho. Na' cate' te dan' chyi chzaca'chon', Diosen' gone' cont bancho len le' toli tocanē can' gwne' ban yogo'cho chaquechone'. ¹³ Na' note'tezcho cate' žan goncho da' malen', bitw gac načo Dios nan' chgo'oyele' chio' goncho da' malen', le Diosen' bitw chgo'oyele' bene' yesone' da' mal. Lecze ca' le', bitw bi de da' chgo'oyela' le' cont gone' da' malen'. ¹⁴ Yela' chzelaže' checho dan' yo'o lo' yičjlažda'ocho chonen cont chzelaže'cho choncho da' mal. ¹⁵ Na' še ba choncho can' ža yela' chzelaže' dan' yo'o lo' yičjlažda'ocho' na' zoacho choncho da' malen', nach gwžin ža cate' cuejyičj Diosen' chio' na' bitw šjayzoacho len le'.

¹⁶ Bene' migw, bitw siye' cuinle gonle xbab Dios nan' chgo'oyele' le'e cont gonle da' malen'. ¹⁷ Dios ben' zoa yaba, le'na' chsele' da' güen da' chac checho na' da' de checho. Xacho Dios ben' ben gwbiž, bio' na' beljw ca' cont chososenin' len chio', chone' cont gac güen checho, na' bitw chše'e ca chone' len chio', bia'cze zoacze' chone' güen. ¹⁸ Gwyazlaže' Diosen' bocobe' yičjlažda'ocho' cate' gwyejle'cho che diža li čen'. Na' ba bocobe'

yichjlažda'ochon' cont žialaocho len bene' nechw ca' chesejnilaže'ne'. Na' da' ba bocobe' yichjlaždao' chio', nezecho za' gone' ca' len bene' zan.

Can' goncho cont yebe Diosen' chio'

¹⁹ Bene' migw, nezele cheyala' yebecho gwzenagcho che diža' güen, na' cheyala' goncho xbab cate' za' necho, na' neca la' ža'atecho. ²⁰ Cate' chža'acho, bitw chac goncho güen can' chaclaže' Diosen' goncho. ²¹ Da'n'an' cheyala' cuejyichjcho yogo'lol da' xinjen' ba benchon' na' yogo'lol da' chgue'e Diosen' da' gwcha'o gwxenen lo' yichjlažda'ocho cate' bina' šejnilaže'chone'. Cheyala' gwzewjw yichjcho na' gwzenagcho diža' li che Diosen' dan' ba yo'o lo' yichjlažda'ochon', cont gata'yela' mban checho toli tocane.

²² Na' cheyala' goncho dan' ža diža' li che Diosen' goncho, gague con yenezcho can' žanna'. Le še con chenecho can' žanna' na' bi chonchon, chziye'ze cuincho še ca'. ²³ Ben' chene diža' li che Diosen' na' bi chone' can' žanna', zaca'lebde' ca to bene' chna' cho'alagüen' lo spejw, ²⁴ le con chne'e can' nac cho'alagüen' na' cate' ba beyož gwne'en la' cheyanlažtie' can' naquenna'. ²⁵ Perw bene' zoacze' chzenague' xtiža' Diosen' do yichj do laže' na' chone' can' žanna' sin chi yeyanlažen', benan' soe' mbalaz, le xtiža' Diosen' chaclenen le' bite'tez da' chone'.

²⁶ Note'tezcho še choncho xbab choncho can' chazlaže' Diosen', perw bi chnabia' cuincho cont bi necho diža' mal, chziye'cze cuincho še ca'. Le še xtiža'chon' bi naquen güen lao Diosen', bitw chebede' bite'tez dan' choncho še ca'. ²⁷ Še goncho can' chebe Xacho Diosen', gaclencho no'ole güezeb ca' na' bi' güezeb ca' še bi dan' cheseyažjde', na' cuejyichjcho bich goncho da' xinj dan' cheson bene' ca' bi zjanombia' Diosen'.

2

Toze can' cheyala' goncho len yogo' bene'

¹ Bene' migw, Xancho Jesucriston' naque' la'zelagüe bene' zaca', na' še chejnilaže'chone', toze can' cheyala' goncho len note'teze bene', bitw nacho balze bene' gonxenchguachone' na' yebale' gonechone' nacteze. ² Še yesela' chope bene' gan' chdop chžagcho chonxencho Jesucriston', na' toe' naque' bene' gwni'a na' nyaze' lache' šagüe' lache' xdan, na' ngo'o xbenen' to niy de oro, na' ben' yeto naque' bene' yaše' na' nyaze' lache' de'exo', toze can' cheyala' goncho len chope'. ³ Bitw naquen güen še gonxencho bene' gwni'a na'ze na' ye'chone': "Gwche'edo' lo yag siy nga ga nac binlo", na' ye'cho bene' yaše'na': "Gwzechateze do dan' na'le", o še ye'chone': "Gwche'etezdo' lo yo". ⁴ Bitw naquen güen lao Diosen' še cuinzcho choglaochon nacho noen' zaque' na' noen' bi zaca'. Xbab chechon' naquen da' mal še goncho ca'.

⁵ Bene' migw, Diosen' ba gwleje' zan bene' yaše' zjanaque' xi'ine' na' chesejnilaže'chgüe' le'. Na' yesenite' mbalaz cate' yesyežine' gan' zoen' chnabi'e, can' gwna Diosen' gac che note'teze chio' chaquecho le'. ⁶ Perw na' chonle bene' yaše' ca' ca bene' bibi zjazaca'. Na' bene' gwni'a ca' chon-gaclene' ca bene' zjazaca'chgua; len legaquen' chosoči chososaque' le'e na' cheseče'xoxje' le'e lao justis ca'. ⁷ Lecze legaquen' chosožie' yela' ya' che Jesucriston' ben' naccho txen, ben' naque' bene' zaca'.

⁸ Ley dan' nac da' žialao lao yogo' da' ca' nyela' le'e Xtiža' Diosen' žan: "Le gague ljež benachle ca chaque cuinle." Še da' licze chonle can' žanna' chonczele güen. ⁹ Perw ley che Diosen' chchoglaon chele naple doła' še chonxenle bal

bene' na' yebale' chongaclene' ca bene' bibi zaca'. ¹⁰ Can' naquen, note'teze bene' zoe' chone' dolol can' ža leyna', perw na' še ba gwchoe' to da' dao', len doxen leyna' chape' dola' še ca'. ¹¹ Diosen' ben' gwna: "Bitw gata'lenle no'ole bi nac no'ol chele o bene' byo bi nac bene' chele", leczen' gwne': "Bi gotle bene'". Na' la'czla' bitw chata'lencho no'ole bi nac no'ol checho o bene' byo bi nac bene' checho, še ba naccho bene' güet bene', bia'cze napcho dolä' len leyna'. ¹² Xtiža' Diosen' chaclenen chio' cont bi gwzenagcho che da' malen'. Na' cheyala' güe'cho diža' güen na' soacho goncho bichle can' žanna', le Diosen' gone' da' saca'zi'cho še bi choncho can' žanna'. ¹³ Diosen' gwnežjwchgüe' da' saca'zi' bene' ca' bi chesyeyaše' chesyezi'ilaže'de' ljež benache'. Perw bene' ca' chesyeyaše' chesyezi'ilaže'de' ljež benache', Diosen' yeyaše' yeži'ilaže'de' legaue'.

Bitwbi zejen še con žacho chejnilaže'cho Jesucriston'

¹⁴ Bene' migw, še to bene' že' chejnilaže' Jesucriston' perw bi chone' da' nac güen, bitwbi zejen že' ca'. Bitw chaclenen le' cont gata' yeļa' mban che' toli tocanē še con žaze' ca'. ¹⁵ Baļ bene' lježcho bene' chesejnilaže' Jesucriston' bi de da' yese'ej yesagüe' na' bi de xalana'gague'. ¹⁶ Na' še bitw gaclenchone' len dan' cheseyažjde', še con ye'chone': "Le šjaya'ac to šagüe' to güen na' Diosen' gaclene' le'e cont želele dan' chyažjelen'", bitwbi zejen dan' con nacho ca'. ¹⁷ Da'nan', še con žacho chejnilaže'cho Jesucriston' perw bitw choncho da' nac da' güen, bitw tze bi zejen dan' žacho chejnilaže'chonen'.

¹⁸ Nita' bene' chesene' guac yesejnilaže' Jesucriston' la ca yesone' da' nac da' güen. Na' lecze nita' bene' chesene' še chejnilaže'cho Jesucriston' cheyala' goncho da' nac güen. Na' žia' le'e, še nacho chejnilaže'cho Jesucriston' perw bitw choncho da' güen, bitw nacbia' še chejnilaže'chone'. Perw še da' li chejnilaže'chone' nach soacho goncho da' güen na' yesacbe'e bene' le chejnilaže'chonen'. ¹⁹ Chejle'cho toze Diosen' zaque' gonxenchone', na' ca'czen' cheyala' šejle'cho. Perw gague da' ca'zen' cheyala' goncho. Da' xigüe' ca' lecze chesejlen' toze Diosen' naque' bene' zaca' na' chesexizen chesežeben. ²⁰ Chnecho diža' da' bi zejen še con žacho chejnilaže'cho Jesucriston' na' bitw choncho da' güenna', le bi gaclenen chio' še con žazcho chejnilaže'chone'. ²¹ Da' xozxta'ocho Abrahanna' blo'e le gwejnilaže' Diosen' dan' bzenague' che Diosen'. Da'nan' bzande' xi'ine' Isaaquen' gote'be' cont gonxene' Diosen'. Na' dan' bzenague' che Diosen', da'nan' Diosen' gwne' che' le naque' bene' güen len le'. ²² Na' nezecho can' ben da' Abrahanna', gague con gwejnilaže'ze Diosen', san lecze bzenague' che'. Na' dan' bene' ca' blo'e le gwejnilaže' Diosen'. ²³ Da'nan' goc can' nyoj Xtiža' Diosen' che', žan: "Abraham gwejni-laže' Diosen' na' da'nan' Diosen' gwne' naque' bene' güen len le'." Na' lecze nyojen che Abrahanna' goque' bene' xmigw Dios.

²⁴ Can' naquen, gague dan' žacho chejnilaže'cho Dios nan' že' naccho bene' güen len le', san dan' chzenagcho che', da'nan' že' naccho bene' güen len le'. ²⁵ Na' da' Rahab goque' no'ole zle' no'ol con gwej len note'teze bene' byo, perw bzenague' che Diosen' cate' blebe' bene' ca' chope jasegüia jasene'e laže'na'. Na' blo'ede' legaue' yetole nez ga jaya'aque' cont bi jasyxen soldadw che rey legaue'. Na' dan' goclene' bene' ca', blo'e gwejnilaže' Diosen'. Na' gwna Diosen' naque' bene' güen len le'. ²⁶ Quinga naquen: Še to bene' bich nye'e biš grasyw, nacbia' naque' bene' guat. Ca'czen' naquen, še bitw choncho da' güen nacbia' bitw chejnilaže'cho Diosen' la'czla' žacho chejnilaže'chone'.

3

Choncho da' xinj len xtiža'cho

1 Bene' migw, nezecho neto' chsed chlo'eto' bene' yoble xtiža' Diosen' saca'zi'chto' še bi gonto' can' žanna'. Da'nan' žia' le'e, gague la' si'te lo na'le gwswd gwlo'ele bene' yoble xtiža' Diosen'. 2 Zan ni'a yogo'cho choncho da' xinj. Perw še to bene' bitw chone' da' xinj len xtiže'na', nacchgüe' bene' güen na' gwzocczde' nabie' doxen cuerp chen' še ca'. 3 Caten' chgo'ochu freno cho'a cabayw ca' cont yosozenagba' checho, na' šja'acba' con gate'teze chaclaže'cho šejlenchoba'. 4 Na' lecze bene' ca' chososa' barcw xen ca' chosočhine' yag da'oze dan' chosose'eden' cont chejen con gate'teze chesende', la'czla' še chžiga' to be' gual legaquen'. 5 Ca'czen' naquen len lože'chon'. Toze da' dao' rizen' naquen lao cuerp chechon', perw chac chnelenchon diža' da' zjazaca'. Na' ca' nac to yi' dao' riz, guac gwzeyen to ya'adao' xen, ca'czen' naquen len lože'chon' cate' chnelenchon diža' mal. 6 Lože'chon' naquen to da' chnabia' chonchguan da' xinj juisuyw lao doxen cuerp chechon'. Lože'chon' naquen ca' to yi' beł da' chla'an chca'an nile na'le chzeyen bite'teze da' de, le še choe'cho diža' malen' chyała'ch yogo'lołte da' xinj dan' chonchon', na' chonen cont zoacho chonchguacho da' xinj yešlale mbancho. Na' che gwxiyen' chzenagcho caten' choe'cho diža' mal ca'. 7 Chac chnabia'cho yogo'te beyixe', be žia tap ni'a na', be žia xil, be chda nxobe le'e, na' be ca' že' lo' nis. Ba gwnita' bene' gosenabi'eba'. 8 Perw ne to chio' bitw soečo lože'chon' cont bi güe'lenchon diža' mal. Con zoacho choe'cho diža' malen', na' diža' mal dan' choe'chon' zaca'leben ca' venen che to beł znia. 9 Len xtiža'chon' chonxencho Dios ben' naque' Xacho. Na' lecze len xtiža'chon' chžiačo yela' ya' che ljež beňachcho bene' ca' ben Diosen' can' nac le'. 10 Na' cho'acho na' chchoj diža' šagüe' cate' chonxencho Diosen' na' lecze chchoj diža' mal cate' chžiačo yela' ya' che ljež beňachcho. Bene' migw, bitw choncho ca' cheyała' goncho. 11 Nezecho ga chal nis bitw žia nis sia na' nis zbapj toz bej. 12 Na' lecze ca' bene' migw, nezecho to yag yixgüigw bitw chbian frut dan' nzi' aceituna, na' neca yag uvas chbian yixgüigw. Na' lecze ca' ga chal nis, bitw chchoj nis sia to bej ga žia nis zbapj.

Can' goncho še Diosen' ba bene' chio' yela' sina' chen'

13 Še note'tezle žale nacle bene' sina' na' chejni'ile xtiža' Diosen', cheyała' gonle yogo'loł can' chazlaže' Diosen'. Cheyała' gonle da' güen sin cbi gonxen cuinle cont nachbia' nacle bene' sina'. 14 Perw še chgue'e lježle na' chzelaže'le gacchle bene' blaoch ca' bene' lježle, bitw cheyała' nacle nacle bene' sina', le con chonlaže'len' še ca'. 15 Na' še chgue'e lježle na' chzelaže'le gacle bene' blaoch ca' bene' lježle, bitw nacle bene' sina', san xbab chelen' zan' che Satanás dan' chnabia' da' xigüe' ca', na' con chonle da' xinjen' can' ža lažda'olen' na' can' cheson bene' ca' bi zjanombia' Diosen'. 16 Še chgue'e lježcho na' chzelaže'cho gaccho bene' blaoch ca' legaque', bitw zoacho binlo len legaque' še ca', na' choncho yogo'te da' xinj. 17 Cate' Diosen' chone' chio' yela' sina' chen', chaclaže'cho goncho yogo' da' nac da' güen. Chaclaže'cho soacho binlo len lježcho na' naccho bene' xenlaže' na' chzexjw yichjcho cont chzenag che lježcho. Na' lecze cheyaše' cheži'ilaže' lježcho na' choncho da' güen len legaque', na' toz ca' choncho len note'tez bene'. Na' bite'tez da' choncho, chonchon do laže'cho. 18 Nach še chebecho yesezoa yesebez bene' binlo na' chaclencho bene' yezica'chle cont yesezoa yesebeze' binlo, na' chaclenen cont yeson bene' da' güen.

4

Bitw gac goncho can' cheson bene' bi zjanombia' Diosen'

1 Chdile chšašlen lježle, na' chonle ca' dan' yo'o nyaz da' malen' yichjlažda'olen' na' chnabian' le'e cont chonle con ca' žan chele. 2 Chzelaže'chgualē bi da' gata' chele na' chdile chšašlen lježle na' chaclaže'tele gotle bene' cont gata' chele dan' chzelaže'len'. Perw bitw gata' dan' che'nelen' lağüete chonle da' xinj na' bi chñabele Diosen' gone' cont gata' dan' chyažjelen'. 3 Na' cate' chñabele Diosen' gone' cont gata' bi dan' gata' chele, bitw chonen', le con che'nele gata' dan' chzelaže'le lo' lažda'olen' cont gonle con nacteze žan chele. 4 Na' da' chzenagle che dan' ža xbab chelen' na' chonle can' chzelažen'na', chonle txen len bene' ca' bi zjanombia' Diosen', na' chonle contr Diosen'. Na' note'tezcho še chaclaže'cho goncho txen len bene' mal ca', choncho contr Diosen' na' bich chaquechone' ca cheyała'. Zaca'lebcho ca to no'ole nzoa xto, no'ole ben' bich chacde' bene' che'. 5 Chonljale xbab Xtiža' Diosen' bitw bi zacan' gan' nyojen žan: "Spiritw che Diosen' dan' zoan lo' lažda'ochon' chzelaže'chguan gwzenagcho che toz Diosen'." 6 Diosen' chaclenchgüe' chio' cont chzenagcho che toz le'. Da'n'an' nyoj Xtiža' Diosen' žan: "Diosen' chone' contr bene' ca' chesonxen cuingaque', perw chaclene' bene' ca' chesacbe'ede' bi chosozenague' che' ca cheyała'." 7 Da'n'an' cheyała' gon cuincho lo na' Diosen' na' gwyo gwchejlaže'cho bi gwzenagcho che Satanásen'. Še goncho ca', gwcuaseczen ca'ale. 8 Le soa le yoł güiž Diosen', nach soe' gaclene' le'e. Cheyała' cuejyichjle da' xinj da' chonle. Na' še chonle xbab guac gonxencho Diosen' na' gontezcho can' ža lažda'ochon', clelen' chonle xbabēn' še ca', na' cheyała' güe'le latje yeyon Diosen' yichjlažda'olen' xilaže'. 9 Bi cheyała' yebele, san cheyała' yegüine'le neche da' xinjen' ba benlen' na' yeto'ele chen. 10 Cheyała' gwzewjw yichjle lao Xancho Diosen', nach Diosen' gone' cont gacxenle.

Bi cheyała' nacho che lježcho nape' doła'

11 Bene' migw, bi cheyała' nelaecho che lježcho. Ben' chñelagüe' che lježe' o chosbaguede' lježe', benan' chñe' che ley che Diosen' na' chzoe' leyna' ca'ale. Na' nezecho ben' chon ca' bi chzenague' che leyna'. Na' dan' chon cuine' ca bene' zaque' cont že' che bene' lježe' nape' doła', chone' ley che Diosen' ca to da' bibi zaca'. 12 Toz Dios nan' gwdixjue' leyna', na' toz le'na' zaque' choglagüe' che to tocho še napcho doła'. Na' toz le' zaque' gone' cont bi šjaya'ac bene' lo yi' gabilen', na' lecze zaque' cont yesele' bene' lo yi' gabilen'. Perw chio' bitw zaca'cho nacho che bene' lježcho zjanape' doła'.

Bitw nezecho bin' gac gwxe güižj

13 Na' le gwzenag da' nga: Balle chchogbia'len šejle to ga šejle gonle negosyw cont gonle gan. Na' chbejle to ža cate' šejle na' chchogbia'len yega'anle na' tğüiz, 14 neca chache'ele bi nezecho bin' gac checho o nac goncho gwxe güižj. Yela' mban chechon' zaca'leben ca to bejw, le bejon' šložze chle'echon na' cheyasen. 15 Cheyała' nacho: "Še Xancho Diosen' gone' latje bancho, na' goncho to da' goncho." 16 Perw da' xinjen' choncho še chonxen cuincho chžiacho bia' naquen' goncho sin cbi nabecho Diosen'. 17 Na' še nezecho cheyała' goncho da' nac güen na' bi chonchon, napcho doła' lao Diosen'.

5

Da' malchgua gac che bene' gwñi'a ca' bene' bi chosozenag che Diosen'

¹ Na' ca nac le'e bene' gwñi'a, le'e bi chzenagle che Diosen', le soayaše' na' le cuežyaše', le leca za' saca'zi'le. ² Lao Diosen' dan' de chele naquen ca to da' ba chbiayi', na' lache' šagüe' chelen' naquen ca to da' ba chl'e'e belzila'. ³ Na' mechw chelen' dan' nac de oro na' de plata, len Diosen' naquen ca to da' ba chzen xche'en. Da'nan' žin ža žaglaochgualo lo yi' gabilen'. Ba gwche' yichjle tlaoze btoble da' sčha'o xmechwlen', la'czla' ba zoa goṅ Diosen' da' saca'zi'le. ⁴ Cheyala' gonle xbab can' benle len bene' güen žin chele ca', bene' yaše' ca' besyelap coseš chelen'. Benle le legaue' dan' bitw gwduxwlene' ca cheyala'. Na' dan' bi bnežjwle laxjwgaquen' ca cheyala', chlo'en nacle bene' güen da' xinj. Diosen' chzenague' che bene' güen žin ca' dan' chesyegüine'de', Dios ben' nape la'zelagüe yela' guac xen. ⁵ Zoatezle che'ej chagwšagüe'le na' chonditjele dan' de chele chonle con ca žan chele, na' bi chacbe'ele ba zoa goṅ Diosen' da' saca'zi'le. Na' lagüe dan' chonle ca', zaca'leble ca to beyixe' ben' chgüe'ej chguagwšagüe'cho cont ba čaṇe'ba' cate' žin go'tchoba'. ⁶ Na' gan' ch'ile chonle yela' justisen', ba gwchoglaolen yesote' bene' goson da' güen, bene' bibi gosonde' le'e.

Cuezcho batcan' yid Xancho Jesucriston' da' yoble na' yol güižcho Dios

⁷ Ca nac le'e bene' migw, le gape yela' chxenlaže' len dan' chyi chzaca'le, le ba zoa yid Xancho Jesucriston' da' yoble. Bene' ca' chesaz, chesente' chesebeze' cosešen', le cosešen' naquen da' zaca'. Na' chesape' yela' chxenlaže' chesebeze' chde tiemp yejon', le cate' chbeze yejon', cana'chen' chosyotobe' cosešen'. ⁸ Da'nan' bite'teže dan' chyi chzaca'le, cheyala' gape yela' chxenlaže' na' gončhačhlaže'le šejnilaže'le Xancho Jesucriston', le ba zoa yide' da' yoble. ⁹ Bene' migw, bitw yosbaga' lježle še bin' chac chele. Še bin' yosbaga' lježle, ba zoa yid Xančon' da' yoble na' čhoglagüen' chele nape doła'. ¹⁰ Le gon xbab che da' bene' ca' goso'e xtiža' Xancho Diosen' cani'. Leca bosochi bososaca' bene' legaue', perw bia'cze bosoyo bosochije', can' cheyala' gonle. ¹¹ Da' li mbalaz bene' ca' gwnita'teže' gosončhačhlaže' gosejnilaže' Diosen' la'czla' besežlagläe'. Na' ba benele xtiža' da' Job can' benčhačhlaže' gwyejnilaže' Diosen', la'czla' da' zan da' gwdi gwxaque'. Perw na' cate' gwde dan' gwdi gwxaquen', Diosen' bene' cont gwzoache' mbalazch clel can' gwzoe' cani'. Can' nac Diosen', leca chazlaže' chaclene' chio', na' leca cheyaše' cheži'ilaže'de' chio'.

¹² Bene' migw, da' naquen da' žialao, gwbat gwzoale no co' da' bałi che bite'teže. Bitw nale yaban' co'on da' bałi choe'le diža' li, neca nale yežlio nga co'on da' bałi choe'le diža' li, neca bite'težeche. Cheyala' güe'cho diža' li da' šejle' bene' cont Diosen' bi čhoglagüen' checho saca'zi'cho.

¹³ Note'tezcho cate' chac bi da' chac checho, cheyala' yol güižcho Dios. Na' note'tezcho cate' zoacho mbalaz, cheyala' gołcho gonxenčone'.

¹⁴ Note'tezcho cate' chacšenecho, cheyala' gaxcho bene' ca' gwlejšcho cont chosogüia chesene'e chio' chdop čžagcho chonxencho Jesucriston'. Na' yosotope' yichjcho late' set, na' yosol güiže' Dios, yesenabe' yeyauecho len yela' guac che Xancho Jesucriston' lagüe' da' chejnilaže'chone'. ¹⁵ Na' chio', cate' chol güižcho Xancho Diosen', cheyala' šejle'cho le chzenagcže' checho cont yeyone' ben' chacšenen', na' še ba bene' da' xinj, güezi'xencze Xančon' che'. ¹⁶ Da'nan' cheyala' xoadoła'cho lao bene' lježcho na' yol güižcho Dios

tocho yetocho cont ca' yezoacho güen še bin' chac checho. Na' še naccho bene' güen len Diosen', Diosen' chzenagcze' checho cate' choḷ güižchone' na' chone' da' zan da' güen dan' chḡabechone' gone'. ¹⁷ Le gon xbab che Elías ben' be' xtiža' Diosen' cani'te. Goque' benaḡ cayanen' nac chio'. Na' cate' boḷ güiže' Diosen' do yichj do laže' gwnabe' bi gac yejw, na' Diosen' bzenague' che' na' bitw goc yejon' lao šon iz yogašjo. ¹⁸ Na' yetni'a cate' boḷ güiže' Diosen' gwnabde'ne' seḷe' yejon' da' yoble, nach Diosen' gwselen'. Na' goc coseš che bene' ca' da' yoble.

¹⁹ Bene' migw, cate' to bene' lježcho ba gwlejyichje' dan' nac da' li dan' bzejni'i Diosen' chio', cheyala' gaclenchone' cont yetinjde' xtole'na'. ²⁰ Chaclaža' nezele, cate' choncho cont note'teze bene' chetinjde' xtole'na', chaclenchone' cont chosla Diosen' le' lo yi' gabil, le chezi'xene' xtole'na' la'czla' še naquen da' zan. Da' na'zen' chzoja' ḡa'a.

CART NECHW DAN' BZOJ POSTLW SAN PEDRO

Pedro chzoje' cart nga che bene' ca' zjanaslas chesejnilaže' Criston'

¹ Neda' Pedro naca' postlw che Jesucriston'. Na' chzoja' cart nga che le'e chejnilaže'le Jesucriston', le'e naslasle distritw ca' gan' nzi' Ponto na' Galacia na' Capadocia na' Asia na' Bitinia. Chio' chejnilaže'cho Jesucriston' naccho ca bene' zito' len yezica'chle bene' že' yežlio nga. ² Con can' bsi'e xnezen' gwlatle, Xacho Diosen' gwleje' chio' cont Spiritw chen' bocoben yichjlažda'ochon' na' gwlo'on chio' lo na' Diosen'. Bene' ca' cont chzenagcho che Jesucriston' na' cont Jesucriston' zoacze' cheyone' lažda'ochon' xilaže' dan' blalj xchenen' neche chio' le'e yag cruzen'. Chnaba' soacze Diosen' gaclenchgüe' le'e na' soacze' gone' cont soa cuezle binlochgua len xbab chelen'.

Zoacho lez šjayzoacho len Diosen'

³ Cheyala' gonxencho Diosen'. Le' naque' Xa Xancho Jesucriston', na' Xancho Jesucriston' lecze chonxene' le'. Leca cheyaše' cheži'ilaže' Diosen' chio', na' da'nan' bocobe' yichjlažda'ochon' na' bene' cont zoacho lez šjayzoacho len le', le Jesucriston' beyas bebane' ladjo bene' guat ca'. ⁴ Na' Diosen' gone' ga gac da' güen checho, to da' mbachgua da' bi yenit neca te chen, to da' ngo'ošagüe' cont gaquen checho cate' yežincho yaban'. ⁵ Na' Diosen' len yela' guac xen chen' chcuas chcue'eje' chio' len da' malen' lagüe chejnilaže'chone'. Chone' ca' šlac biña' žin ža le'echo da' mba da' gone' gac checho caten' šjayzoacho len le'.

⁶ Da'nan' zoachguale mbalaz la'czla' chonen byen da' zan da' chy chzaca'le šlož güeje na'a. ⁷ La'czla' da' te che oron', benachen' chosozeyen' cont chesyebeje' bi da' nchixen da' bibi zaca'. Na' ca'cze zaca'lebe dan' choe' Diosen' latje chac chele, chaquen cont gwlo'ele še da' li chejnilaže'lene' cate' chac bi da' mal chele. Na' še soatezle šejnilaže'lene', leca zaca'chen clal ca no oro. Nach cate' Jesucriston' yide' da' yoble Diosen' güe'e diža' ne' benle güen na' gone' le'e yela' bala'an xen na' gone' soale txen len le' gan' yo'ochgua be'ni'.

⁸ Chaquele Jesucriston' la'czla' biña' le'elne'. Na' la'czla' bi chle'elne' na'a, chejnilaže'lene'. Da'nan' zoale mbalaz juisyw. Na' catec mbalaz zoale con bi chac gwzejni'ile bene' cayanen' chebele. ⁹ Na' da' chejnilaže'le Jesucriston', žin ža šjayzoale len Diosen'.

¹⁰⁻¹¹ Da' bene' ca' goso'e xtiža' Diosen' cani' gosene' yeyaše' yeži'ilaže' Diosen' chio' zoacho na'a. Spiritw che Criston' gwzoan len legaue' bzejni'in legaue' yid Criston' yežlion' na' saca'zi'e na' yeyoža' gwlo'e Diosen' naque' bene' zaca' juisyw. Da'nan' bososedyane' na' besyeyiljwyože' non' selaj Diosen' gaclene' chio' na' batcan' yide'. ¹² Na' Diosen' bzejni'ide' legaue' che da' ca' bosozoje' cont gosenezde' gaquen che chio' zoacho na'a na' gague che cuingaque'. Na' na'a Spiriton' dan' ža' gan' zoa Diosen' ba benen cont gwnita' bene' goseyixjue'ede' le'e diža' güen che Criston', na' diža' güen chen' naquen lebe len dan' bosozoj da' bene' ca' goso'e xtiža' Diosen' cani'. Na' lente angl che Diosen' chesezelaže' yesejni'ide' naquen' chaclen Diosen' chio'.

Cheyala' gac lažda'ochon' xilaže' len yogo' da' choncho

¹³ Da'nan' cheyala' soale len toze xbab na' gonle con ga zelao saque'le cont gonle can' chazlaže' Diosen'. Cheyala' soale yebele gon Diosen' gacchgua mba

chele caten' yid Jesucriston' da' yoble. ¹⁴ Na' da' nacle xi'in Dios cheyała' gwzenagle che', na' bich gwzenagle che da' malen' can' gwna lažda' olen' gonle cana' cate' biņa' šejni'ile che Diosen'. ¹⁵ Dios nan' ba gwleje' chio' naccho xi'ine', na' le' naque' bene' laždao' xilaže'. Na' con ca nac le' bene' laždao' xilaže', leče can' cheyała' gaccho bene' laždao' xilaže' len yogo' da' choncho. ¹⁶ Le Xtiža' Diosen' nyojen žan: "Cheyała' gacle bene' laždao' xilaže', le neda' Dios naca' bene' laždao' xilaže'."

¹⁷ Chio' choł güižcho Diosen' che'chone': "Xato' Dios". Na' Diosen' chchoglagüen' che to to chio' beňach še nocho napcho doła' ca nac da' choncho, na' toz can' chone' len note'tezcho. Da'nan' cheyała' žebcho goncho da' bi chazlaže' Diosen' šlac zoacho yežlio nga. ¹⁸ Nezecho Diosen' ba bebeje' chio' lo da' ca' bosozejni'i da' xozxta'ocho ca' chio' da' bibi zaca'. Na' nezecho ca nac no mechw de plata o de oro na' bichle da' ca' chesede čen, bi goc yesyebejen chio' lo da' ca' choncho da' bibi zaca'. ¹⁹ San byažjen gwseła' Diosen' Criston' blalj xčhene' da' zaca'čgua. Na' le' bnežw cuine' gote' cont bebeje' chio' lo da' ca' bibi zaca'. Na' Criston' zaca'lebe' ca to xila' dao' be bibi yižgüe' da', be bibi naqueba'. Ben' nac ca' gosot bene' Israel gualaž četon' cont bezi'xen Diosen' xtola'gague'. ²⁰ Za' xe yežlion' Diosen' gwleje' Criston' cont bnežw cuine' neče xtola'chon'. Na' Diosen' gwsele'ne' nga na'a ba zoa te che yežlion' cont chaclene' chio'. ²¹ Na' Criston' chone' cont zoacho chejniłaže'cho Diosen'. Na' Dios nan' bosbane' Criston' ladjo bene' guaten' na' blo'e nac Xi'ine' Criston' bene' zaca' juisyw. Nachen' zoacho chejniłaže'cho Diosen' na' zoacho lez gon Diosen' güen len chio'.

²² Na' da' chaclen Spiritw che Diosen' chio', ba chzenagcho diža' li che Diosen' na' choncho can' že'. Da'nan' ba beyac lažda'ochon' xilaže', na' da'nan' do laže'cho ba chaquecho yezičhle bene' chesejniłaže' Jesucriston'. Na' ca'cze cheyała' goncho, cheyała' gague lježcho do yichj do laže'cho, gague gaguechone' de diža'ze. ²³ Xaxna' chio' zoacho yežlio nga zjanaque' bene' chesat, perw gague neče da' goljcho len legaue' naccho xi'in Dios, san naccho xi'ine' da' bocobe' yichjlažda'ochon' cate' gwyejle'cho xtižen'. Na' xtižen' zoan toli tocaņe, gague da' te čen. ²⁴ Chac can' nyojen, žan:

Yogo' beňach chesede che' ca chesede che no yiže' dao',
na' yogo' da' chebe beňachen' yežlio nga da' chesacde' zaca'čguan, zaca'leben
ca yej da' žia yiže'.

Chesebiž yiže' ca' na' chesecquad chesebiž yej da' zjažia yiže'.

²⁵ Perw xtiža' Diosen' zoan toli tocaņe, gague da' te čen.

Na' xtiže' nan' diža' güen da' ba gwđixjue'eto' len le'e.

2

¹ Da'nan' cheyała' cuejyichjcho yogo' bite'teze da' xinj da' choncho. Bi gonlaže'cho, bi goncho contze yesaque bene' naccho bene' güen, bi xi'acho bene', bi necho diža' mal che bene'. ² Na' ca bi' che'eņ dao' žan yesaže'be' xiže'gacbe', can' cheyała' selaže'cho yenecho xtiža' Diosen', le naquen da' güenčgua, na' cate' chzenagchon chaclenen chio' cont choncho can' cheyała' gon chio' ba de yeła' mban čhecho toli tocaņe. ³ Le ba chache'echo na'a Xancho Criston' naque' bene' šagüe'.

Criston' zaca'lebde' ca to yej squin che yo'o

⁴ Cheyała' gwzenagcho che Xancho Jesucriston' ben' chon chio' yela' mban toli tocane. Bene' zan cheseque'ede' le' la'czla' Diosen' gwleje'ne' cont chaclene' chio' na' zaca'chgüe' len Diosen'. Da'nan' Jesucriston' zaca'lebde' ca to yej güen da' gwlej bene' cont gaquen yej squin ližen', perw bene' goson žinña' bi gosazlažen' na' gosebequen' šla'ale. ⁵ Na' chio' napcho yela' mban da' chejnilaže'cho Jesucriston'. Da'nan' yogo'cho txen zaca'lebcho ca yej ca' da' zjancua' zjangoden' gan' chac yo'o de yejen'. Na' zaca'lebcho ca' liž Diosen' dan' zoe' len chio'. Lecze zaca'lebcho ca bħoz bene' zjanac lo na' Diosen', le naccho lo na' Diosen' na' chaclen Jesucriston' chio' cont zoaczcho chonxencho Diosen' con can' chazlaže'. ⁶ Na' Xtiža' Diosen' nyojen, žan: Sela' to bene' ciuda Siön na' zaca'lebde' ca to yej da' zaca' da' gwlej bene' cont gaquen yej squin liže'.

Na' note'teze ben' šejnilaže' le', gwbatech yetinjde' da' gwyejnilaže'ne'.

⁷ Nach len chio' chejnilaže'chone', Jesucriston' naque' leca bene' zaca'. San bene' bi chesejnilaže'ne', nyojczde da' nga čhegaque', žan:

Yej da' bi gosaclaže' bene' güen yo'o ca' yosočhine', len ba naquen yej squin.

⁸ Na' lecze ca' žan:

Zaca'lebde' ca to yej da' chčhego' bene' na' ca to yej da' chgo'o ni'e na' chjasebiže'.

Nyojen žan chesečhegüe' le' bi chosozenague' xtiža' Diosen'; na' Diosen' bžie' bia' yesac čhegaque' ca'.

Chio' chejnilaže'cho Diosen' naccho xi'ine'

⁹ Na' chio', Diosen' ba gwleje' chio' cont chejnilaže'chone'. Na' len Diosen' naccho ca rey na' ca bħoz. Gwleje' chio' cont naccho nación che', na' nactečo diaža' che', le chaclaže' čixjue'echo catec da' güen juisyw chone'. Le'na' be-beje' chio' lo da' malen' bencho na' gwlo'e be'ni' xen čhen' lo' yichjlažda'ochon' cont soačo goncho da' güen. ¹⁰ Cana' le'e bi gwyejnilaže'le Diosen' na' bi gocle nación che', perw na'a ba nacle nación che'. Cana' biña' yeyaše'de' le'e, san na'a Diosen' ba beyaše' beži'ilaže'de' le'e.

Cheyała' goncho can' chazlaže' Diosen'

¹¹ Chacda' le'e bene' migw, na' chņeyoeda' le'e le gon xbab le yežlio nga bi naquen lažle. Da'nan' bitw gonle bite'teze da' xinj da' žan gonle len cuerp chelen', le še gonlen, gwžonen soa yichjlažda'olen' binlo len Diosen'. ¹² Le soa le gon da' güen cont bene' ca' bi chejnilaže' Diosen' yesele'ede' da' güen da' chonle, na' la'czla' na'a chesezi'diže' le'e chesene' chonle clele, žin ža yesele'ede' chonle da' güen na' yesonxene' Diosen' cate' žin ža čhogbi'en nac gac che to toe'.

¹³ Da' chejnilaže'le Xancho Criston', le gwzenag che yogo' bene' ba bosozoa benačen' cont yesenabi'e le'e. Le gwzenag che rey ben' čhnabia' doxen gan' zoačhon', ¹⁴ na' lecze le gwzenag che bene' gwnabia' ca' chselä' reyen'. Le nac lo na'gaque' yesone' castigw che bene' ca' cheson da' xinj na' yesonxene' bene' cheson can' cheyała' yesone'. ¹⁵ Diosen' chaclaže' goncho da' güen cont bene' ca' bi chesejni'i' che', ben' zjančhol yichjlažda'ogaque', bi žel diža' da' yesene' yosocuiše' chio'.

¹⁶ Cheyała' soa cuezcho mbalaz da' bich yo'ocho lo na' gwxiyen', perw bi goncho xbab guacte goncho bi da' xinj. San cheyała' soa cuezcho mbalaz da' yo'ocho lo na' Diosen', na' yo'ocho lo ne'en cont goncho con dan' chazlaže' goncho. ¹⁷ Cheyała' gapcho bala'an yogo'loł bene'. Na' cheyała' gaque

bene' lježcho bene' chesonxene' Jesucriston'. Cheyała' žebcho goncho da' bi chazlaže' Diosen'. Na' cheyała' gapcho bene' gwnabia' chechon' bala'an.

Criston' byo bčeje' dan' gwxaca'zi'ena'

18 Le'e chonle žin che bene', le gwzenag che xan žin chele da' chaple legaque' bala'an. Gague tlaoze gwzenagle che xan žin chelen' še zjanaque' bene' šagüe' bene' yo'o xbab, san lecze le gwzenag chegaque' še zjanaque' bene' znia.

19 Še bibi da' mal nonle na' bia'cze chosoči chososaque' le'e, chebe Diosen' chyo chčejele len da' chesonde' le'e lagüe nezele chaclaže' Diosen' goncho ca'.

20 Perw bibi zacan' še ba benle bi da' xinj na' chyo chčejele cate' chesebaže' le'e. San še chosoči chososaque' le'e cate' chonle da' güen na' chyo chčejele len da' chesonde' le'e, nachle chebe Diosen' le'e. 21 Le Diosen' gwleje' chio' cont gwo gwčejecho len bi da' yosochi yososaca' bene' chio', na' Criston' gwxaca'zi'e neche chio' na' byo bčeje' len da' goc che' cont nezecho ca'czen' cheyała' goncho. 22 Bibi da' xinj ben Criston', ne to diža' güenlaže' bi be'e.

23 Cate' gosezi'diža' bene' le', bi boži'e dižan' nac ca' len legaque'. Na' cate' bosochi bososaque'ne', bi gwne' yebi'e mal len legaque'. Ben cuine' lo na' Diosen', le gwneze' Diosen' chogbi'en yesezaca'zi' bene' ca' con can' cheyała' gac chegaque'. 24 Criston' bnežjw cuine' neche xtoła'chon' cate' gosote'ne' le'e yag cruzen'. Da'nan' cheyała' cuejyichjcho da' xinjen' choncho na' soacho goncho da' güen. Gwxaca'zi'e cont bozoe' chio' binlo. 25 Goccho ca xila' be gosacžeje, perw na'a ba naccho ca be yo'o lo na' xamba' cont chyoeba', le Criston' chgüia chne'e chio' na' yo'o lo ne'e lažda'ochon' chcuas chcue'ejen' len da' malen'.

3

Can' cheyała' yeson bene' zjanšagna'

1 Na' lecze le'e no'ole nšagna'le, to tole cheyała' gwzenagle che bene' chele. Bale' biña' yosozenague' xtiža' Diosen', na' še gwzenagle chegaque', yesache'ede' xtiža' Diosen' naquen da' güen la'czla' bibi ye'lnē'. Na' yosozenague' che Diosen' 2 cate' yesele'ede' chaple legaque' bala'an na' chi' yichjle soa cuezle cont lažda'olen' gaquen xilaže' len Diosen'. 3 Na' le'e no'ole, bi nacho naquen da' žialao gon cuinle xdan yopa'a no yichjle, gwguala' yenle no bga', gwguala'le no ret, co'ole no niy de oro, na' chazle lache' šagüe'. 4 Dan' nac da' žialao, gac lažda'olen' güen, la'czla' nono chle'e len. Zaca'chguan len Diosen' gaccho bene' nexjwlaže' na' bene' xenlaže', le bi te che yichjlažda'ochon'. 5 Gosenita' no'ole cani' no'olen' gosejnilaže' Diosen' na' goson cuine' lo ne'e. Legaque' gosaque' bene' nexjwlaže' na' bene' xenlaže' na' bosozexjwyichje' cont gosone' bin' gwna bene' che to toe'. 6 Da' Sara, no'ol che da' xoxxta'oto' Abrahanna', gwzoe' bzenague' che bene' che' na' gože'ne': "Xana". Na' le'e še soatezle gonle da' güen na' bi žeble, nach yesena bene' nacle xi'in da' Saran' lagüe chonle can' benen'.

7 Na' le'e bene' byo nšagna'le, lecze cheyała' gacle bene' šagüe' len no'ol chele na' gaplene' bala'an, le bi zjanaque' bene' gual can' nac chio' bene' byo. Na' lecze can' ba nži'ilaže' Diosen' chio' na' noņe' chio' yela' mban toli tocaņe, ca'tezeczen' ba none' len legaque'. Nachen' cheyała' goncho güen len legaque' cont bibi gwžon gwzenag Diosen' checho cate' choľ güižchone'.

Can' goncho še yosochi yososaca' bene' chio' la'czla' choncho da' güen

⁸ Yogo'cho cheyała' goncho toze xbab na' cheyała' yeyaše'cho lo' lažda'ochon' še bi da' chac che bene' lježcho. Cheyała' gaque lježcho do laže'cho ca bene' biše' lježcho, na' cheyała' gaccho bene' šagüe' len bene' lježcho na' bi gon cuincho bene' xen. ⁹ Še bi da' mal cheson bene' len chio', bi nacho lecze da' mal yebi'icho len legaue'. Na' še bene' chesezi'diže' chio', bitw yoži'icho dižan' nac ca' len legaue', san nabcho gac da' güen chegaue'. Le Diosen' ba gwleje' chio' cont goncho ca' na' cont gone' latje soacho mbalaz. ¹⁰ Goncho ca' le nyojen, žan:

Bene' chaclaže' soa cueze' mbalaz,
 cheyała' gwsaque' bich güe'e bite'teze diža' mal,
 na' gwsaque' bich güe'e bite'teze diža' güenlaže'.

¹¹ Cheyała' cuejyichje' yogo' da' mal na' gone' da' güen.

Cheyała' cuec yichje' gone' con ga zelao saque'de' cont soe' binlo len bene' lježe'.

¹² Le Xancho Diosen' chgüia chne'e bene' ca' cheson da' zej to licha, na' chzenague' chegaue' cate' chosol güiže'ne'.

San bene' ca' cheson da' xinj, Diosen' ngüie' gone' cont yesezaca'zi'e.

¹³ Na' nono zoa no gone chio' mal še zoatezcho choncho da' güen do yichj do laže'cho. ¹⁴ Na' la'czla' še tgüej cate' yosoči yososaca' bene' chio' lagüe choncho da' zej to licha, Diosen' gone' soacho mbalaz. Na' bi cheyała' žebcho bene', neca gacžejlaže'cho. ¹⁵ San cheyała' gonxencho Criston' lo' lažda'ochon', le naque' Xancho. Na' bate'teze cheyała' soacho probnidw cont yoži'icho xtiža' bene' še yesenabde' chio' bixchen' zoacho lez šjayzoacho len Diosen' toli tocaņe. Na' cheyała' gapcho legaue' bala'an na' güe'lenchone' diža' šagüe'. ¹⁶ Tža tža cheyała' goncho cont nezecho lo' yichjlažda'ochcho bibi doła' napcho len Diosen'; nachen' cate' yesezi'diže' chio' da' chejniłaže'cho Criston', yesache'ede' le choncho güen na' yesacde' zto'. ¹⁷ Yejni'a saca'zi'cho neče choncho da' güen, še can' chaclaže' Diosen' gac checho, clcl ca saca'zi'cho neče choncho da' xinj.

¹⁸ Le Criston' lecze gwdi gwxaque'. La'czla' gwyejczje' to licha len Diosen', bnežjw cuine' gote' neče xtoła' beñač tni'aze, na' da' bene' ca' zaca'czen' toli tocaņe. Gote' cont ba bozoe' chio' binlo len Diosen'. Perw la'czla' gosote'ne', beyas bebane' ladjo bene' guaten', dan' ne' zoa spiritw čen'. ¹⁹ Na' len Spiritw čen' gwyeje' jatixjue'ede' xtiža' Diosen' len bene' ca' ba zjanyeyw gan' yesezaca'zi'e toli tocaņe. ²⁰ Legaue' bi bosozenague' che Diosen' ža gwlaste, la'czla' gwdape' yela' chxenlaže' len legaue', gwleze' yosozenague' šlac da' Noén' bene' to barcw xen. Na' to čopga bene' goso'o lo' barcon' na' bi gosebiaye'e lo' nisen', con xono'gue' besyela. ²¹ Na' dan' goc ca' cani' zaca'leben can' ba gwzoacho nisen' lagüe dan' ba de yela' mban čecho toli tocaņe. Na' gague gwzoacho nisen' cont beyaccho xilaže' len cuerp chechon', san gwnabecho Diosen' beyone' lažda'ochon' xilaže' cont nezecho bibi doła' napcho. Na' ba nac lažda'ochon' xilaže' na'a lagüe beban Jesucriston' ladjo bene' guaten'. ²² Na' na'a Jesucriston' ba beyepe' yaban' gan' chnabi'e txen len Diosen', na' chosozexjw yichj yogo' angl na' yogo' nochle no nape yela' chnabia' chosozenague' che'.

4

Diosen' none' da' gon to tocho cont chaclen lježcho

¹ Criston' goque' bene' bela' chen na' gwxcaca'zi'e yežlio nga, da'nan' chio' cheyała' gončačhlaže'cho bi gacžejlaže'cho cate' saca'zi'cho. Goncho ca', le

cate' ba gwzaca'zi'cho chaclenen bich chzenagcho che da' malen'. ² Na' še bi chzenagcho che da' malen' ślac ne' mbancho, nach soa cuezcho bi goncho da' mal da' žan gon chio' benač, san soa cuezcho goncho con can' chazlaže' Diosen'. ³ Cana' gwzoale benle con can' cheson bene' bi chesejnilaže' Diosen'. Benle da' nac yela' zto', benle bite'teze da' mal da' gwzelaže' lažda'olen', gwžože, benle no žaś len ĺni chelen' na' güe'ejhguale, na' gwyejnilaže'le ĺ gua'a ĺsaca' da' ca' gwna Diosen' bi cheyaġa' šejnilaže'chon. ⁴ Na' bene' ca' ne' cheson ca' chesyebande' bich chonle txeñ len ĺegaque' can' chesaše' chosožiayi' cuingaque', nach chesezi'diže' le'e. ⁵ Perw žin ža cate' Diosen' nabyože' ĺegaque' che yogo'loġ da' ba gosone', Dios ben' chbeze' čhogbi'en nac gac che bene' zjamban len bene' ca' ba gosat. ⁶ ĺe da'n'an' gwseġe' bene' goseyixjue'ede' diža' güen che' len bene' ba gosat can' goseyixjue'eden' len chio'. Diosen' goclaže' yesenite' mbalaz toġi tocañe' can' zoa ĺe', ĺa'czġa' nčhoglagüen' de yela' got che yogo' benač yežġio nga.

⁷ Ba zoa te che yežġion'. Da'n'an' cheyaġa' soacho len toze xbab na' goncho byen goncho can' chazlaže' Diosen' cont bibi gwžon soacho yoġ güižchone'. ⁸ Na' da' nac da' žialaoch, cheyaġa' gaque ĺježcho do yičj do laže'cho, ĺe cate' chaque ĺježcho chezi'xencho čegaque' bite'teze da' chesonde' chio'. ⁹ Na' cheyaġa' gwlebcho bene' ĺježcho cate' yeside' ližchon' sin cbi bixjwcho. ¹⁰ Con can' ba goclen Diosen' to tocho da' none' chio' grasyw che bi da' chac choncho, can' cheyaġa' gaclen ĺježcho len dan' choncho. Cheyaġa' gwčhincho bite'teze grasyw da' non' Diosen' chio' con can' chaclaže' gwčhinchon, ĺe nža' nža'te da' none' che to tocho choncho. ¹¹ Še Diosen' ba none' čecho čixjue'echo xtižen', ĺe xtiže' na'zen' cheyaġa' čixjue'echo. Na' še ba none' čecho gaclencho bene', cheyaġa' gaclenčhone' do yičj do laže'cho, ĺe Diosen' chone' cont chac chaclenčhone'. Cate' bi da' goncho, gonchon ca gacxen Diosen' da' gwseġe' Jesucriston' len chio'. Zaca'cze' gonxenčhone' toġi tocañe' na' zaca'cze' nabi'e toġi tocañe. Can' gacśca.

Guata' da' saca'zi' chio' chejnilaže'cho Criston'

¹² Chacda' le'e bene' migw, na' chaclaža' bi yebanele can' chac čhlen' chosoči chososaca'chgua bene' le'e. Bi naquen da' yebanele, san gwlo'en še da' ĺi chejnilaže'le Diosen'. ¹³ Cheyaġa' yebele caten' chzaca'zi'le da' chejnilaže'le Criston', ĺe chac čhele can' goc che Criston' caten' gwxcaca'zi'e. ĺe yebe caten' chzaca'zi'le cont ĺecze yebele na' soale mbalaz cate' žin ža le'ele yid Criston' ben' nac bene' zaca' juisyw. ¹⁴ Mbalaz chac čhele na'a cate' chesezi'diža' bene' le'e da' chejnilaže'le Criston', ĺe Spiritw che Dios ben' nac bene' zaca' juisyw zoañ chaclenen le'e. Bene' ca' chosoči chososaque' le'e chesene' mal che Criston', san le'e chonxenġe'. ¹⁵ Na' še saca'zi'le, yejni'a gagen neče chonle da' güen, gague neče da' betwle bene' o gwlanle da' de che bene' o benle bichle da' xiñj o blaže' čhele len bi da' chac che bene'. ¹⁶ ĺe še saca'zi'le neče chejnilaže'le Criston', bi cheyaġa' gaquele zto' can' chac čhele, san cheyaġa' gonxenle Diosen' da' ba chejnilaže'le'.

¹⁷ Ba bžin ža Diosen' ba chone' cont chyí chzaca' chio' naccho xi'ine' neče bi da' xiñj da' choncho. Na' dan' chone' ca' zgua'tec len chio' naccho ca bene' lo' yo'o che', nežecho leca gwnežjwche' da' yesezaca'zi' bene' ca' bi chosozenag diža' güen čhen'. ¹⁸ Na' ca' nac bene' zja'ac to ĺicha, nacčguaze yesyele' bi yesezaca'zi'e toġi tocañe, nach bene' bi chesejnilaže' Diosen' na' chesonteze' da' xiñj, gague bi de da' yosla ĺegaque'. ¹⁹ Da'n'an' cate' chsi' Diosen' xnežen'

chyi chzaca'cho, cheyała' soacho gonczcho da' güen na' gon cuincho lo na' Diosen', le len' bene' chio' benaçh na' zoacze' chaclene' chio'.

5

Can' cheyała' gon chio' chejnilaže'cho Criston'

¹ Na'achen' de da' nia' le'e nchojle cont chgüia chna' ljež le'e chejnilaže'le Criston'. Neda' lecze nchoja' chona' ca'. Ble'eda' gwxaca'zi' Criston' na' choe'lena' bene' diža' can' goquen', na' lecze nezda' žin ža šjayzoa' len le' gan' yo'ochgua be'ni' ca' le'e šjayzoalen'ne'. ² Le güia na' bene' ba gwlo'o Diosen' lo na'le güia na'le, ca no xan xila' chgüia chne'e xila' che' ca'. Le gonon do yichj do laže'le can' chazlaže' Diosen', gague gonlen žan ca žan, neca gonlen cont gonle gan mechw, san le yebe gonlen. ³ Na' ca nac bene' ca' güia na'le, bi gonle znia cont yosozenague' chele, san soatezle gonle da' chazlaže' Diosen' cont yesele'ede' can' chonlen', na' yesacbe'ede' lecze can' cheyała' yeson legaque'. ⁴ Xancho Jesucriston' zaca'lebde' ca to bene' güeyoe' xila' bene' chnabi'e nochle güeyoe' xila'. Na' cate' yide' da' yoble, cana'ch gone' soale mbalaz juisyw še ba benle xšin Diosen' can' cheyała', na' gague da' te che yela' zoa mbalaz chelen' ca chde che no premio da' chesone' yežlio nga.

⁵ Nach lecze ca' le'e bene' xcuide', cheyała' gwzexjw yichjle gwzenagle che bene' ca' ba zjanchoj ben' chosogüia chosone' e le'e. Na' yogo'le le gwzexjw yichjle cont gwzenag che lježle, le:

Diosen' chdillene' bene' zjanac ya'laže',
san chaclene' bene' chosozexjwlaže' lagüen'.

⁶ Cheyała' gwzexjw yichjcho gwzenagcho che Dios ben' nape yela' guac xen, cont žin ža gone' ga gacxencho. ⁷ Na' cheyała' gwcua'ancho yogo'lo' da' chi' yichjcho chen lo na' Diosen', le len' chgüia chne'e chio'.

⁸ Cheyała' goncho byen goncho da' nac da' zaca', na' cheyała' gwsaca'cho cont Satanás dan' chnabia' da' xigüe' ca' bi co'on chio' to lo nez mal, le chgue'en chio' na' chejiljwlažen' nac gonon gwžiajin' chio', ca to bež znia chosya'aba' chdaba' chyljwba' be gagwba'. ⁹ Cheyała' soačhačcho bi gwzenagcho che Satanásen' na' soačhačcho šejnilaže'cho Jesucriston', le nezecho bene' lježcho ca' chesejnilaže'ne' gate'tezechle lo yežlion' lecze chesezaca'zi'e can' chac che chio'. ¹⁰ Perw cate' ba gwde da' chyi chzaca'cho šlož dao' na'a, cuin Diosen' gone' cont gacch yichjlažda'ochon' can' chazlažen', cont šejnilaže'chchone', cont soecho gonchcho can' chnalažen', na' cont soačo len toze xbab. Dios nan' nži'ilaže'de' chio' na' chaclene' chio' bite'teze da' chac checho, na' ba gwleje' chio' chejnilaže'cho Criston' cont šjayzoacho txen len le' gan' yo'ochgua be'ni'. ¹¹ Cheyała' soacho gonxenchone' toli tocanē da' naque' bene' zaca' juisyw, na' nabia'che' ca note'tezechle. Can' gonšcaczcho.

Pedron' chguape' tiox bene' ca' yosolab carten'

¹² Bene' migw checho Silvano, ben' chacda', zoateze' chone' can' cheyała' gone', na' ba bzoje' xtiza' le'e cart dao' nga. Na' le'e cart nga chneyoeda' le'e soacze'le gonle da' güen na' chzejni'ida' le'e Diosen' ba goclene' le'e cont nezele da' li nži'ilaže'chgüede' le'e. Da'n'an' cheyała' soacze' šejnilaže'ne'.

¹³ Bene' ca' ba gwlej Diosen' cont chesodop chesežague' chesonxene' Jesucriston' lo ciuda Roma nga chosoguape' le'e tiox, ciudan' da' nsi'a Babilonia. Na' lecze Marcos ben' nona' ca xi'ina' chguape' le'e tiox. ¹⁴ Cate' chdop chžagle txen le gwnopa' na' lježle cate' gwguap lježle tiox cont gacia' chaque lježle.

Na' chnaba' yogo'le chejnilaže'le Criston' soa cuezle binlo len xbab da' yo'o
lo' yichjlažda'olen'. Da' na'zen' chnia'.

CART GWCHOPE DAN' BZOJ POSTLW SAN PEDRO

Pedron' bzoje' cart nga che bene' chesonxen Jesucriston'

¹ Neda' Simón Pedro chona' xšin Jesucriston', na' len' gwsele' neda' naca' postlw che'. Chzoja' le'e ba chejnilaže'le Jesucriston' can' chon neto'. Jesucriston' naque' Dios ben' chonxencho na' none' yela' mban checho toli tocanē le zejzce' to liča. Na' da' zaca'chguan chejnilaže'chone'. ² Chnaba' gaclenchgua Diosen' le'e na' gone' cont leca soa cuezle binlo len xbab chelen' lagüe nombia'lnē' na' nombia'le Jesús ben' nac Xanchon'.

Can' cheyała' gon chio' chejnilaže'cho Jesucriston'

³ Dan' nap Diosen' yela' guac xennan', ba none' chio' yogo' da' chyažjecho cont de yela' mban checho toli tocanē na' cont goncho can' chazlažen'. None' chio' da' ca' lagüe nombia'cho Criston', na' Criston' ben' gwleje' chio' naque' bene' zaca' na' bene' šagüe'. ⁴ Na' da' naque' bene' zaca' bene' šagüe', da'nān' ba gwne' gaclene' chio' na' gone' da' güen juisyw len chio'. Na' zaca'chguan da' gwne' ca', le da' chaclene' chio' can' gwne', da'nān' yichjlažda'ochon' chesyeyaquen güen can' nac yichjlažda'ogüē', na' chac chbejyichjcho da' mal da' chžiyayin' bene' bi chesejnilaže' Diosen', lagüe chesone' con ca žan chegaque'. ⁵ Na' da'nān' chio' chejnilaže'cho Jesucriston' cheyała' goncho con ga zelao saque'cho cont gonchcho da' güēn, na' cont šejni'ichcho. ⁶ Na' cheyała' goncho con ga zelao saque'cho cont bi nabia' da' malen' chio'. Cheyała' soačačhcho šejnilaže'cho Diosen' caten' chyi chzaca'cho, na' cheyała' soaczcho gonxenchone'. ⁷ Na' cheyała' ži'icho bene' lježcho ben' chesejnilaže' Jesucriston', na' lezce cheyała' gaquecho yogo'ze bene'. ⁸ Le še zejcho chonchguacho yogo' da' ca', nachen' gaccho can' cheyała' gac chio' nombia'cho Xancho Jesucriston', na' xšinen' da' goncho chojen güēn. ⁹ Na' note'tez bene' bi chon da' ca' ba gwnia' cheyała' goncho, nchoj yichjlažda'ogüe' na' biña' šejni'išagüe'de' can' cheyała' gone'. Chlo'en ba gonlaže' ba beya' beyib Diosen' lažda'ogüe' len da' xinjen' bene' cana'. ¹⁰ Da'nān' bene' migw, cheyała' gonchcho con ga zelao saque'cho cont nezecho da' li ba gwlej Diosen' chio' cont šejnilaže'chone' na' ba bsi'e xnezen' gwque'e chio' ca xi'ine'. Na' še goncho ca', gwbat cuiayi'cho, ¹¹ na' mbalazchgua gwleb Diosen' chio' cate' šjayzoacho len Xancho Jesucriston' gan' chnabi'e toli tocanē, Jesucristw ben' none' yela' mban checho toli tocanē.

¹² Da'nān' ba gwchoglaža' yogo' ni'a güē'lēna' le'e diža' che da' ca' ba gwnia' le'e cont šjayze'ele, la'czla' ba nezele can' gwnian' na' zoačačhle chejnilaže'le diža' li che Diosen' dan' nombia'le. ¹³ Nan' chacda' šlac ne' mbana' cheyała' gona' cont šjayze'elen. ¹⁴ Le nežda' yob žin ža gata', con can' ba bzejni'i Xancho Jesucriston' neda'. ¹⁵ Da'nān' gona' con ga zelao saque'da' cont šjayze'ele can' gwnia' che da' quinga cate' ba gota'.

Postlw ca' besele'ede' cate' Diosen' blo'ede' yela' zaca' che Criston'

¹⁶ Ca nac da' bzejni'ito' le'e che yela' guac che Xancho Jesucriston' na' che dan' yide' da' yoble, bi nācho naquen diža' da' goljlaže' neto' postlw, le ble'eto' len yejlaoto' cate' Diosen' blo'e yela' zaca' che Jesucriston'. ¹⁷ Ble'eto'ne' cate' Xancho Diosen' bnežjue'ne' yela' bala'an xen na' cate' Dios ben' nac bene' zaca'

juisyw bene' cont gwyeçhje' be'ni' juisyw na' gože'ne': "Benga Xi'ina' ben' chacda' na' chbe chezaquelaže' chgüeda' che'." ¹⁸ Neto' beneto' can' gwna Dios ben' zoa yaba be'e diža' che', le gwzoato' lo ya'ana' len Xancho Jesucriston' caten' goc ca', ya'a dan' gwlej Diosen' cont goc ca' lagüen.

¹⁹ Napcho Xtiža' Diosen' dan' bosozoj bene' ca' goso'e xtižen' cani' na' nezecho naquen da' li. Na' güen gonle še gwzenagle che dan' bosozojen', le gwseñin' lo' yichjlažda' olen' ca to yi' da' chseñi' ga nac çhol. Bi cheyała' yeche'echo gwzenagcho çhen tža tža šlac žin ža yid Criston' da' yoble na' co'oche' be'ni' çhen' lo' yichjlažda' ochon'. Na' dan' yide'na' zaca'leben ca dan' chla' beljw xsilen' cate' cheni'. ²⁰ Na' naquen da' žialao xen šejni'icho da' nga: diža' dan' bosozoj bene' ca' goso'e xtiža' Diosen' cani', ne tozen bi gag šejni'ichon to gualazcho, ²¹ le ne toz da' ca' bosozoje' bi zan' che xbab çhegacze'. San bene' gosaque' lo na' Diosen' gosenie' dan' gož Spiritw çhe Diosen' legaque' na' bosozojen'.

2

Bene' ca' chosozejni'ide' xtiža' Diosen' clele

¹ Cani' lecze besechoj bal bene' gualaž çheto' bene' gosonlaže' gosene' cheseyixjue'ede' xtiža' Diosen', na' ca'czen' yesenita' bene' yosozejni'ide' le'e diža' güenlaže' gwxe güižj. Na' yeseyiljwlaže' nacle yesone' cont yosozejni'ide' le'e diža' güenlaže' da' gwžiyain' le'e sin chi gache'ele. Yosozoe' Xancho Jesucriston' to šla'ale, ben' bnežjw cuine' cont gata' yela' mban çhecho toli toçane. Perw žin ža yesebiaye'e yalzelaže'. ² Bene' zan yosozenague' çhegaque' na' yesone' da' xinj dan' nac da' yela' zto' can' yeson legaque'. Na' neçe yesone' ca', yesenita' bene' yesene' bibi zaca' diža' güen çhe Diosen' da' chlo'en chio' dogualje nez güenna'. ³ Na' bene' güenlaže' ca' yesezelaže' yeseque'e xmechwle. Da'n'an' yosozejni'ide' le'e diža' da' yesaljlaže' cont gwnežjwle legaque' mechw. Perw cani'te Diosen' ba nžie' bia' yesebiaye'e.

⁴ Nezecho Diosen' bi bezi'xene' che angl ca' cate' gosone' da' xinj, san gwsele' legaque' lo yi' gabilen' gan' nac leca çhol, na' zjanite' zjancheje' gden šlac žin ža gone' yesezaca'zi'e toli toçane. ⁵ Neca bezi'xen Diosen' che bene' ca' že' lo yežlion' bene' bi bosozenag che' caten' gwzoo da' Noé. Gwsele' yejw sio' juisyw da' bžiyain' legaque'. Na' Noén' gwzoe' gwduxjue'ede' can' cheyała' yesone' da' zej to licha. Da'n'an' Diosen' bosle' le' len yegaže bene' lježe'. ⁶ Na' Diosen' lecze beçhoglaže' bžiyai'tecze' ciuda Sodoma len ciuda Gomorra cani' yela' güen da' xinj che bene' ca' že'na'. Bzeye' ciuda ca' na' yešinga de bega'an. Na' bene' ca' cont chosnisde' bene' za' za'ac gwnežjue' castigw çhegaque' še bi yosozenague' che'. ⁷ Na' cate' Diosen' bžiyaye'e ciuda ca', bosle' ben' le Lot ben' goc bene' güen len le', le Loten' gocchgüede' zi' lo' lažda'ogüe' che da' yela' zto' goson bene' mal ca' že' ciuda ca'. ⁸ Loten' goque' bene' güen na' bžaglagüe' lo' lažda'ogüe' tža tža ble'ede' goson bene' ca' da' bi cheyała' yesone' na' bende' diža' che da' malen' gosone'. ⁹ Can' naquen, Xancho Diosen' nezde' nac gone' yosle' chio' chejnilaže' chone' lao da' ca' yesonen' cuejyichjchone', na' nezde' nac gone' cont bene' ca' bi zjanac bene' güen len le' yesenite' yesezaca'zi'e na'a na' cate'ch žin ža çhogbi'en yesezaca'zi'e toli toçane.

¹⁰ Diosen' gwnežjwchgüe' da' yesezaca'zi' bene' ca' chesontezze' da' yela' zto' can' chesezelaže' lažda'ogaquen' yesone' len cuerp çhegaquen'. Bene' ca' bi chesape' Xancho Diosen' bala'an cont yosozenague' che'. Bitw chesežebe' chesone' con bi žan çhegaque', na' neca chesežebe' chesezi'diže' no angl bene'

zaca' na' no da' xigüe'. ¹¹ San ca nac angl che Diosen', zjanaque' bene' gualch ca chio' benach na' zjanapche' yela' chnabia' xench ca chio', perw legaque' bi cheseyaxjde' yesezi'diže' no bene' zaca' na' no da' xigüe', san cheso'e diža' šagüe' chosocuiše' bene' ca' na' len no da' xigüe' lao Xancho Diosen'.

¹² Bene' ca' chosozejni'ide' diža' güenlažen', chesezi'diže' da' ca' bi chesejni'ide'. Zjanaque' ca beyixe' be bi chesejni'i. Le beyixen' con nsi' Diosen' xnezen' chesaljba' na' chesenita'ba' cont yesezen benachen' legacba' na' yesote'ba'. Na' ca'cze yesebiayi' bene' ca' chosozejni'i diža' güenlažen', ¹³ yesezaca'zi'e da' chosoči chososaque' bene' yoble. Chesazlaže' chesaše' chese'ej chesagwxatteze' tža tža. Na' cate' chesedobe' txen len le'e cont che'ej chagwle, bi chesacde' zto' da' chesezožde' na' chesagwxate' catec chziye' da' malen' legaque'. Da'nan' zjazacalebde' ca to da' bzigüe' da' dope to lo lache' šiš o ca to yiž xen da' žia cho'alao bene'.

¹⁴ Bate'teze chesele'ede' no'ole, chesezelaže' yesata'lenteze' legaque', na' bi chjasexaque'de' len da' xinjen' chesonen'. Chese'go'oyele' bene' biña' yesenita'čače' len Jesucriston' cont yesone' da' xinjen' txen len legaque'. Bene' ca' chosozejni'i diža' güenlažen' ba zjayolagüe' chesezelaže' bi de che bene'. Diosen' leca chgüe'ede' yogo' da' chesone'. ¹⁵ Le ba gosebejyichje' xnez Diosen' da' zej to licha. Na' ba goseque'e nez malen' can' ben da' Balaam ben' be' xtiža' Diosen' cani', ben' nac xi'in da' Beor. Balaanna' gwzelaže' yeseyxixue'ne' len mechw cont nabe' gac da' mal che bene' Israel. ¹⁶ Na' Diosen' bene' cont xpurren' be bi chac chneba' gwneczba' ca to benach na' gwdlba' le' che yela' tont čhen', gožba' le' cueze' bich gone' da' xinjen' nac ca'.

¹⁷ Bene' ca' chosozejni'ide' diža' güenlažen' zjazacalebde' ca bej gan' bibi nis žia na' ca bejw da' nžiga' to be' gual. Ba nchoglaon čhegaque' yesezaca'zi'e gabil' toli' točane ga nacchgua' čol'. ¹⁸ Le chesoe'chgüe' diža' chesonxen cuingaque' na' chese'go'oyele' bene' za' besyechoj lo da' xinjen' cont da' yoble yesonteze' da' yela' zto' da' chesezelaže' yesone' len cuerp čhegaquen' can' chesoncze bene' ca'. ¹⁹ Bene' ca' chosozejni'ide' diža' güenlaže' chese'e legaque' guac yesenite' mbalaz yesone' bite'ze žan čhegaque', la'czla' zjanaque' ca to esclavo len da' nac da' yela' zto'. Le note'tezčo naccho ca to esclavo len da' xinjen' cate' choncho con can' žan goncho. ²⁰ Na' bene' ba zjanombi'e Xancho Jesucriston' ben' none' yela' mban čecho toli' točane, ba besyechoje' lo' da' xinj ca' dan' nac da' yela' zto' dan' gosone' cate' biña' yesombi'ene', na' še soe da' xinjen' legaque' na' da' yoble yeso'e latje naban' legaque' cont yesonchen', da' malch gac čhegaque' clel ca caten' biña' yesyechoje' lo da' xinjen' da' nechua'. ²¹ Yejni'a šaca' bi gosombi'e xnez Diosen' da' zej to licha clel ca gosebejyichje' nez güen da' nžia bia' Diosen' šejlencho. ²² Ba goc čhegaque' can' ža to diža' li žan: "Beco'na' cheyagwba' dan' ba beyebba' na' cošen' cate' bač bguazjchoba' cheyo'oba' lo gonan' da' yoble."

3

Yid Jesucriston' da' yoble

¹ Bene' migw chia', chacda' le'e, na' da' nga naquen cart gwchope da' chzoja' le'e. Na' ba bzoja' chopten da' chaclaža' gonle xbac che diža' güen da' ba nombia'le. ² Le šjayze'e diža' da' bosozoj bene' ca' gosac lo na' Diosen' ben' goso'e xtižen' cani'. Na' lecze le šjayze'e dan' nžia bia' Xancho Jesucriston' goncho, Jesucristw ben' none' yela' mban čecho toli' točane. Len'na' diža' da' ba bzejni'i neto' postlw le'e.

³ Naquen da' žialao šejni'ile da' nga. Na'a ba zoa te che yežlion', na' yesechoj bene' yesonle' che xtiža' Diosen' na' yesenite' yesone' con can' ža xbab mal čhegaquen'. ⁴ Na' yesonle' che Diosen' yesene': "žBatxen' gac can' gwna Diosen' yid Criston' da' yoble? Bi naquen da' šejle'cho, le toz can' chac ža na'aža lecze can' goc cate' gwnita' da' xozxta'ocho ca', na' lecze ca'czen' goc caten' gwxete yežlion'." ⁵ Bene' chesena ca' bi chesaclaže' yesone' xbab can' ba ben Diosen'. Caten' gwxe yaban' na' yežlion', con gwne' yesaquen na' goc can' gwnen'. Gocxe yežlion' lao nisdao' da' nychj mbi'in doxen, na' bchine' nisen' cate' benen'. ⁶ Nach bžin ža cate' da' ca' bene' bžiaye'en len yejw sio' juisyw da' goc cate' bexoa nisen' lo yežlion'. ⁷ Na' Diosen' lecze ba bžie' bia' yaban' na' yežlion' ne' zjanitan' can' zjanaquen na'a cate' žin ža gac juisyw. Cana' yeseyen cate' gone' yesezaca'zi bene' mal ca' toli tocaņe.

⁸ Na' le'e bene' migw chia', chacda' le'e, na' che'nda' bi ganlaže'le da' nga, len Xancho Diosen' toz ca nac to ža o to mil iz, bi naquen sša len le'. ⁹ Bał bene' chesacde' ba chže Xancho Diosen' da' biņa' yid Jesucriston' da' yoble can' gwne' yide'. Perw bi načo chžede', san da' nape' yela' chxenlaže' len chio' benač na' chbeze' da' bi chaclaže' cuiayi' note'tezcho. Chaclaže' yogo'cho yetinje xtoła'chon'.

¹⁰ Na' Xancho Jesucriston' yide' da' yoble cate' bi nane'laže' bene', can' chac cate' cho'o gwban liž bene' šeže'le. Nach gac to sšag xen, na' te che yogo' da' ca' chle'echo le'e yaban', na' yogo' da' de le'e yaban' cuiayin' lo yi' gual, na' yežlion' na' da' de lağuen lecze yeseyen.

¹¹ Na' da' nezecho yesyenit yogo' da' ca' can' ba gwnia', cheyała' gon cuincho lo na' Diosen' na' soaczcho gonxenchone' do yichj do laže'cho. ¹² Na' cheyała' soa cuezcho batcan' žin ža gon Diosen' gac juisyw, na' goncho cont yob gaquen. Žana' šey le'e yaban' na' da' ca' chle'echo le'e yaban' yesyeyonan' lo yi' gual na' yesyeniten. ¹³ Perw chio' zoacho lez le'e yaban' na' yežlion' yesyeyaquen da' cobe can' ba gwna Diosen', na' con bene' cheson da' güen da' zej to liča yesenita' cana'.

¹⁴ Da'nan' bene' migw chia', šlac chbezcho gac da' ca', cheyała' goncho con ga zelao saque'cho cont soacho binlo len Diosen' cont bibi doła' de da' gwchenen yichjlažda'ochon'. ¹⁵ Na' cheyała' gacbe'echo nape Xancho Diosen' yela' chxenlaže' len chio' benač cont gwzenagcho che' na' gone' yela' mban čecho toli tocaņe. Lecz can' ba bzoj postlw Pablon' čecho ben' chaquecho, cho'e dižan' len yela' sina' da' bnežw Diosen' le'. ¹⁶ Na' yogo' cart che' ca' chesoen' diža' che da' quinga ba bzoja', la'czla' bzoje' bal da' nac zdebe šejni'icho. Na' bene' biņa' yesejni'i xtiža' Diosen' binlo na' biņa' yesezoačache' yesejnilaže'ne' chesejni'ide' da' ca' clele, can' chesone' len bichle Xtiža' Diosen' da' nyoj, na' da'nan' zjangüe'e nez da' gwžiyain' legaque'.

¹⁷ Chacda' le'e bene' migw chia', na' ba nezele da' ca' ba bzoja' le'e. Na' le gwsaca' cont bi šejle'le xtiža' bene' bi chosozenag che Diosen', bene' cheson da' zej clele, san le soačach le gwzenag che Diosen'. ¹⁸ Na' zej gacbe'echle catec chaque Xancho Jesucriston' le'e na' zej gombia'chln'e', Jesucristw ben' none' yela' mban čecho toli tocaņe. Cheyała' soacho gonxenchwne' na'a na' toli tocaņe. Can' gonšcaczcho.

CART NECHW DAN' BZOJ POSTLW SAN JUAN

Jesucriston' chenežjue' yela' mban toli tocane che bene chesejnilaže'ne'

¹ Chyixjue'eda' le'e che ben' nzi' Xtiža' Dios, ben' chnežjue' yela' mban toli tocane che bene' chesejnilaže'ne'. Ba zoacze' caten' gwxe yežlion'. Neto' postlw bzenagto' xtižen', ble'eto'ne' na' gwdanto'ne'. ² Len' golje' beṇačh na' ble'eto'ne' na' choe'to' diža' žato' mbancze'. Chyixjue'eto' le'e ba zoacze' len Xacho Diosen' caten' gwxe yežlion' na' bedesoalene' chio' beṇačh. ³ Chyixjue'eto' le'e che bena' ble'eto' na' che bena' bzenagto' xtižen' cont gonle neto' txen. Na' ca nac neto', da' li ba nacto' txen len Xacho Diosen' na' len Xi'ine' Jesucriston'. ⁴ Chzjoto' le'e cart nga cont soale yebechgüele.

Diosen' naque' la'zelagüe bene' güen

⁵ Neto' bzenagto' be' Jesucriston' diža' che Xe' Diosen' na' chyixjue'eton' le'e, bzejni'ide' gwne' Diosen' naque' ca to be'ni' da' naque' la'zelagüe bene' güen bene' laždao' xilaže'. Bibi da' xinj none'. ⁶ Na' še žacho choncho txen len Diosen' šlac choncho da' xinjen', con chonlaže'cho. Dan' chonchon' bi zejen to li. ⁷ Diosen' naque' la'zelagüe bene' güen bene' laždao' xilaže'. Na' še chio' zoacho choncho da' güenna' can' zoa Diosen' chone' da' güenna', nachen' naccho txen tocho yetocho na' yichjlažda'ochon' chega'anen xilaže' lagüete Xi'ine' Jesucriston' blalj xchene' cont beque'e yogo'lol xtoła'chon'.

⁸ Še žacho bibi xtoła'cho de, chziye'ze cuinchon' na' bi choe'cho diža' li. ⁹ Perw na' še chxoadolā'cho lao Diosen', chezi'xene' doła' chechon' na' chnitlagüe' yogo'te da' xinj da' choncho, le chone' con can' že' na' chone' da' zej to li. ¹⁰ Še žacho bibi da' mal na' goncho, choncho Diosen' ca to bene' güenlaže' na' biṇa' šejle'cho diža' li čhen'.

2

Criston' chṇabe' gaclen Xacho Diosen' chio'

¹ Xi'inda'ogua', chzoja' le' cart nga cont cbi gonle da' xinj. Perw na' še no chio' goncho da' xinjen', zoa Jesucriston' ben' chon da' zej to li na' chṇabe' yezi'xen Xacho Diosen' checho. ² Jesucriston' blalj xchene' neche xtoła'chon' cont yozoe' chio' biṇo len Diosen', na' gague neche xtoła' chio'zen' blalj xchene' san neche xtoła' yogo'lol beṇačh.

³ Na' še choncho can' ža Diosen' nachen' guac ṇacho ba nombia'chwne'. ⁴ Na' še žacho ba nombia'chwne' na' bi choncho can' že'na', naccho bene' güenlaže' na' diža' li che Diosen' biṇa' šon' yichjlažda'ochon'. ⁵ Ba chaquecho Diosen' ca cheyalā' gaquechone' še choncho con can' že'na', na' še ba choncho ca', nezecho ba nacchone' txen. ⁶ Na' note'tezcho še žacho naccho Diosen' txen, cheyalā' soacho goncho da' güen can' ben Jesucriston'.

Dan' ža Diosen' cheyalā' goncho

⁷ Le'e bene' chacda', dan' chzoja' nga chona' mandadw naquen' gonle, bi naquen to da' cobe. Naquen to da' gole dan' gwnezele caten' gwzolaole chejnlaže'le Jesucriston', le naquen diža' da' ba benele. ⁸ Na' dan' chona' mandadw naquen' gonle, bia'cze naquen ca to da' cobe, le ba bla' diža' güen che Criston' len beṇačhen' na' ba chzolao chde che yogo' da' ca' da' chgue'e

Diosen'. Na' dan' chona' mandaw gonle, Criston' ba blo'ede' naquen da' zaque' na' lecz le'e ba chlo'ele naquen da' zaque'.

⁹ Note'tezcho la'czla' žacho ba noncho Diosen' txen, bi naquen ca' še chgue'e lježcho; nac chol lo' lažda'ochon'. ¹⁰ Note'tezcho še chaque lježcho nachen' da' li ba noncho Diosen' txen na' bibi de da' yoslažon' chio' lo da' xinjen'. Lo' yichjlažda'ochon' ba naquen ca to da' yo'o be'ni'. ¹¹ Na' note'tezcho še chgue'e lježcho nac chol lo' lažda'ochon' na' zejcho ca to bene' lchol bene' bi chache'e galen' yeque'e, le bi chache'echo can' cheyala' goncho.

¹² Ba bzoja' da' quinga par le'e xi'inda'ogua', le Diosen' ba bezi'xene' chele dan' chejniłaže'le Jesucriston' do yichj do laže'le. ¹³ Ba bzoja' da' quinga par le'e bene' gole, le ba nombia'le Jesucriston' ben' ba zoa cate' gwxe yežlion'. Ba bzoja' da' quinga par le'e bene' güego' chaban, le bač gwzoele bi chzenagle che Satanás dan' chnabia' da' xigüe' ca'.

Ba bzoja' da' quinga par le'e xi'inda'ogua' da' ba nombia'le Xacho Diosen'. ¹⁴ Ba bzoja' da' quinga par le'e bene' gole, da' ba nombia'le Jesucriston' ben' ba zoacze cate' gwxe yežlion'. Lecz ca' ba bzoja' da' quinga par le'e bene' güego' chaban da' ngo'o yichjle xtiža' Diosen' na' da'nana' ba gwzoele bi chzenagle che Satanásen'.

¹⁵ Bi selaže'le gacle toze len bene' ca' bi chosozenag che Diosen', na' neca selaže'le gonle can' chesonen'. Note'tezcho chzelaže'cho goncho can' chesonen', bi chaquecho Xacho Diosen'. ¹⁶ Bene' bi chosozenag che Diosen' chesone' da' mal dan' chzelaže' lažda'ogaquen', na' chesezelaže' bi dan' chesele'ede', na' lecz ca' chesa'laže'. Na' yogo' da' ca' chesone' bi naquen che Xacho Diosen', naquen che da' mal dan' de yežlio nga. ¹⁷ Na' da' te che yežlio nga len da' ca' chesezelaže' bene' ca' bi chosozenag che Diosen'. Perw še chio' choncho can' chazlaže' Diosen', soaczcho len Diosen' toli tocaņe.

Nezecho bin' nac da' li

¹⁸ Xi'inda'ogua', ba zoa žin ža te che yežlio nga. Neto' ba bzeneto' le'e gwžin ža yid ben' gonchgua contr Criston', na' na'a bene' zan ba za'aque' chesone' contr Criston'. Da'nana' nezecho ba zoa žin ža te che yežlion'. ¹⁹ Ladjio chio' besechoj bene' ca' chesegue'ede' Criston'. Gague do laže' gosone' txen len chio' chejniłaže'chone'. Le šaca' do laže' gosone' txen len chio', ne' nite' chesonche' chio' txen še ca'. Na' dan' bač besyechoje' nacia' bi zjanaque' chio' txen.

²⁰ Criston' ba bene' chio' Spiritw che Diosen' na' da'nana' yogo'cho nezecho can' ža diža' li che Diosen'. ²¹ Chzoja' le'e da' nga le bač nombia'le diža' li che Diosen', gague nacho bi nombia'lenna', na' lecz ca' nezele ne toz diža' güenlaže' ca nchixe diža' li che'na'.

²² Bene' güenlaže' ben' ža Diosen' bi gwsele' Jesucriston' golje' benač. Ben' že' ca' chgue'ede' Criston', le chzoe' Xacho Diosen' to šla'ale len Xi'ine' Criston'. ²³ Na' note'tez bene' cho'e diža' že' Diosen' bi gwsele' Jesucriston', bitw zoa Xacho Diosen' len le'. Perw note'tez bene' cho'e diža' že' Diosen' gwsele' Jesucriston', zoacze Xacho Diosen' lente Xi'ine' Jesucriston' len le'.

²⁴ Le soa le gwzenag che da' ca' ba bzeneto' le'e caten' gwzolaotele chejniłaže'le Criston'. Na' še soatezle gwzenaglen, nachen' soatezle len Xacho Diosen' na' len Xi'ine' Jesucriston'. ²⁵ Na' da' gwna Jesucriston' gone' checho, gone' yela' mban toli tocaņe.

²⁶ Ba bzoja' le'e da' nga bia' diža' che bene' ca' chesaclaže' yesonlede' le'e. ²⁷ Na' Jesucriston' ba bene' chio' Spiritw che Diosen' zoan lo' lažda'ochon'

chzejni'in chio' yogo'loł dan' cheyała' nezecho che cuine'. Na' Spiritw che Diosen' choen' diža' li, bi chonlažen'. Na' dan' zoan chzejni'in chio', bi chyažjecho nochle gwzejni'i chio' bi dan' nac da' li. Da'n'an' le gwzenag dan' bzejni'i Spiriton' le'e na' le soa len Jesucriston'.

²⁸ Na' na'a xi'inda'ogua', cheyała' soatezcho gwzenagcho che Jesucriston' cont bi žebocho cate' yide' da' yoble na' cont bi yeto'echo na' cont bi nan gwcuasaš'chone' cate' le'echo ba ble'e. ²⁹ Na' nezecho Criston' zeje' chone' con can' cheyała' gone', lecze ca' nezecho yogo'czecho še zejcho choncho can' cheyała' goncho naccho xi'in Dios.

3

Naquen' goncho še naccho xi'in Dios

¹ Le gon xbab catec chaquechgüe Xacho Diosen' chio' da' chne' naccho xi'ine', na' da' licze xi'ine' chio'. Beñe' bi chesejnilaže' Diosen' bi chesejni'ide' naccho xi'in Dios, le bi chesacbe'ede' non' nac Diosen'. ² Xi'inda'ogua', chio' chejnilaže'cho Jesucriston' bačh naccho xi'in Dios. Na' biña' gata'bia' nac gaccho. Con nezecho caten' Jesucriston' yide' da' yoble canan' le'echwne' can' naque' na' yeyac yichjlažda'ochon' can' nac yichjlaždao' le'. ³ Na' note'tezcho še zoacho lez gaccho can' naquen', soacho gwsaca'cho cont lažda'ochon' gaquen xilaže', le nezecho laždao' Jesucriston' naquen xilaže'.

⁴ Note'tez beñe' zoe' chone' da' xinjen' chone' clele len ley che Diosen', le cate' choncho da' xinj choncho clele len da' ba bžie' bia' goncho. ⁵ Nezczecho Jesucriston' bide' yežlio nga cont beque'e xtoła' chio' beñach, na' ca nac Jesucriston', le bibi da' xinj none'. ⁶ Na' še chio' zoacho chzenagcho che', bi zoacho choncho da' xinj, san še zoacho choncho da' xinjen', biña' šejni'icho che' na' biña' gombia'chone'. ⁷ Xi'inda'ogua', bi güe'le latje no siye' le'e, še choncho da' güen can' cheyała' goncho, zejcho to liča can' zej Jesucriston'. ⁸ Na' še zoacho choncho da' xinj, naccho xi'in Satanásen', le Satanásen' zoaczen chonen da' xinj cate' gwxxete yežlion'. Na' bid Xi'in Diosen' yežlio nga par gwcuetze' dan' chon Satanásen'.

⁹ Note'tezcho še Diosen' ba gwque'e chio' ca xi'ine' bi zoacho choncho da' xinj, le ba bocobe' yichjlažda'ochon' na' bich žan goncho da' xinjen' da' zoa Diosen' len chio'. ¹⁰ Na' da' nga chlo'en non' nac xi'in Diosen' na' non' nac xi'in Satanásen': note'tezcho še bi zoacho choncho da' güen, bi naccho xi'in Dios, na' lecz ca' note'tezcho še bi chaque lježcho, bi naccho xi'in Dios.

Cheyała' gaque lježcho

¹¹ Na' da' nga ba beneczecho cate' gwzolaoccho chejnilaže'cho Jesucriston': cheyała' gaque lježcho tocho yetocho. ¹² Bi gaccho ca goc da' Cain, goque' xi'in Satanásen' na' beyote' beñe' biše'. ¿Nezele bičen' betue' le'? Betue' le' le gwzoe' bene' da' xinj na' beñe' bišen' gwzoe' bene' da' güen.

¹³ Da'n'an' xi'inda'ogua', bi yebanele cate' beñe' ca' bi chosozenag che Diosen' chesegue'ede' le'e. ¹⁴ Nezecho bich mbiayi' yichjlažda'ochon', san ba de yela' mban checho toli tocañe le ba chaque lježcho. Na' še bi chaque lježcho, ne' mbiayi' yichjlažda'ochon'. ¹⁵ Note'tezcho še chgue'e lježcho, lao Diosen' naccho beñe' güet beñe'. Na' nezecho beñe' güet beñe' bi de yela' mban che' toli tocañe. ¹⁶ Bzane cuin Jesucriston' neche chio' gosote'ne' dan' leca chacde' chio', da'n'an' nezecho can' cheyała' gaque lježcho. Na' ca'cze chio' cheyała' zane cuincho gatcho cont gaclen lježcho še chonen byen. ¹⁷ Na' cate' de da'

de checho na' nezecho bene' lježcho chyažjden', še bi cheyaše'chone' bi gac nacho chaquecho Diosen'. ¹⁸ Xi'inda'ogua', bi cheyała' gaque lježcho de diža'ze. Cheyała' gaque lježcho do yichj do laže'cho na' soacho gaclen lježcho.

Nac goncho cont bi žebcho Diosen'

¹⁹ Na' nezecho naccho txen len Dios ben' choe' diža' li še chaque lježcho can' gwnia'na', na' še goncho ca', na' gacbe'echo zoacho binlo len Diosen'. ²⁰ Na' še zoa cate' choncho xbab bi zaca'cho par na Diosen' xi'ine' chio', Diosen' zaca'che' ca' xbab chechon' na' nezde' yogo'lol. Da'nan' cheyała' gwzenagcho can' žen', gague con can' ža' xbab chechon'. ²¹ Le'e bene' chacda', še lo' yichjlažda'ochon' chacbe'echo bitw napcho doła', nachen' bich chžebcho Diosen'. ²² Na' bite'tez dan' chnabechone' chončen', le choncho da' nžie' bia' goncho na' can' chaclažen'. ²³ Na' da' nga Diosen' nžie' bia' goncho, šejnilaže'cho Xi'ine' Jesucriston' do yichj do laže'cho na' gaque lježcho tocho yetocho, con can' nžie' bia'. ²⁴ Na' še choncho can' nžie' bian', nach zoacho len Diosen' na' Diosen' zoe' len chio'. Na' quinga nezecho Diosen' zoe' len chio': ba bene' chio' Spiritw chen' zoan lo' lažda'ochon.

4

Spiritw che Diosen' na' dan' chon contr Criston'

¹ Le'e bene' chacda', bi šejle'le che yogo' bene' chesene' cheso'e diža' dan' gož Spiritw che Diosen' legaque', san le gone' prueba še xtiža'gaquen' naquen' da' bzejni'i Dios o še cbi naquen. Le gone' prueba, le ba chaš bene' zan bene' chesonlaže' chesene' cheseyixjue'ede' dan' gož Diosen' legaque'. ² Na' quinga guac nezecho še Spiritw che Diosen' bzejni'in legaque' dižan' cheso'e: yogo' bene' cheso'e diža' chesene' Jesucriston' naque' Dios golje' benač, nezecho yo'o Spiritw che Diosen' lo' yichjlažda'ogüe'. ³ Na' bene' cheso'e diža' chesene' Jesucriston' bi naque' Dios golje' benač, nezecho Spiritw che Diosen' bi yo'on lo' yichjlažda'ogüe'. Bene' ca' cheso'e diža' da' chonen contr Criston'. Na' ba bzeneto' le'e yid da' gon contr Criston' na' na'a ba blan' chonen contr le'.

⁴ Xi'inda'ogua', ba nacle Diosen' txen na' da'nan' bi chejle'le che bene' güenlaže' ca'. Chzoele cbi chejle'le chegaque' neče da' yo'o Spiritw che Diosen' lo' lažda'olen' chzejni'in le'e, na' Spiriton' chnabia'chen ca' Satanásen' dan' zoa len bene' ca' bi chosozenag che Diosen' yežlio nga. ⁵ Bene' ca' bi chosozenague' che Diosen' cheso'e diža' che dan' chac yežlio nga, na' da'nan' bene' lježe' ca' chosozenague' chegaque'. ⁶ Ca' nac chio', ba nacho Diosen' txen. Da'nan' yezica'chle bene' chosozenague' che Diosen' lecz chosozenague' xtiža'chon'. Na' bene' ca' cbi zjanague' Diosen' txen bi chosozenague' diža' chechon'. Can' chac nezecho no bene' yo'o Spiritw che Diosen' lo' lažda'ogüe' chzejni'in le' diža' li na' no bene' chzenague' diža' güenlaže' dan' chzejni'i Satanásen' le'.

Diosen' chacde' benač

⁷ Le'e bene' chacda', cheyała' soacho gaque lježcho tocho yetocho, le Diosen' zoacze' chone' cont chaque lježcho. Na' note'tezcho še chaque lježcho nachen' nacbia' naccho xi'in Dios na' nombia'chone'. ⁸ Na' note'tezcho še bi chaque lježcho bi nombia'cho Diosen', le chio' bi choncho can' chonen'. Len' zoacze' chacde' benačhen', le con can' nac yichjlažda'ogüe'. ⁹ Dan' ben Diosen' bzejni'ide' chio' can' chacde' chio', gwsele' laye'e Xi'ine' yežlio nga cont note'tezcho bancho toli tocanē še chejnilaže'chone' do yichj do laže'cho.

¹⁰ Bi goquecho Diosen'; lelen' godce' chio' na' gwsele' Xi'ine' Jesucriston' cont bnitlagüe' xtoła'chon'.

¹¹ Le'e bene' chacda', dan' chaque Diosen' chio' lecz ca' cheyala' gaque lježcho tocho yetocho. ¹² Nono zoa bene' ba ble'ede' Diosen'. Perw na' še zoacho chaque lježcho tocho yetocho, nachbia' Diosen' zoacze' len chio' na' ba chaquechone' can' cheyala' gaquechone'. ¹³ Nezecho zoacho len Diosen' na' le' zoacze' len chio' da' ba gwsele' Spiritw čhen' zoan lo' yichjlažda'ochon'. ¹⁴ Na' neto' postlw ba ble'eto' na' choe'to' diža' nezeto' gwseła' Xacho Diosen' Xi'inen' cont gwnitlagüe' xtoła' note'tez bene' šejnilaže' le'. ¹⁵ Na' note'tezcho še chejle'cho na' choe'cho diža' žacho Jesucriston' naque' dogualje Xi'in Dios, Diosen' zoe' len chio' na' lecz zoacho txen len Diosen'.

¹⁶ Chio' ba nezecho na' chejle'cho chaque Diosen' chio'. Diosen' zoacze' chacde' beñačhen', le con can' nac yichjlažda'ogüe'. Na' note'tezcho še zoacho chaquecho Diosen' na' lecze zoacho chaque lježcho, nachen' zoacho len Diosen' na' le' zoacze' len chio'. ¹⁷ Diosen' zoacze' chaclene' chio' cont chaquechone' can' cheyala' gaquechone' na' chaque lježcho can' cheyala' gaque lježcho, na' Diosen' chone' ca' cont bi žebcho cate' žin ža gone' yela' justis que yogo' beñač. Na' bi žebcho še zoacho chaque lježcho yežlio nga can' chon Jesucriston'. ¹⁸ Še chaquecho Diosen' ca cheyala', bibi de da' žebcho. Caten' chžebchon' naquen ca to castigw len chio', na' še ne' chžebcho biña' gaquecho Diosen' can' cheyala' gaquechone'.

¹⁹ Chio' chaquecho Diosen' le len' godce' chio' da' nechw. ²⁰ Note'tezcho še chgue'e lježcho, la'czla' žacho chaquecho Diosen', con chonlaže'chon'. ¿Nacxe goncho gaquecho Diosen' ben' bi chle'echo še bi chaque lježcho bene' chle'etecho? ²¹ Na' ba bene' mandadw can' cheyala' gon chio' chaquechone', že' lecz cheyala' gaque lježcho.

5

Gwcuascho da' malen'

¹ Note'tez chio' naccho xi'in Dios še chejle'cho Diosen' gwsele' Jesucriston' cont nabi'e. Na' še chaquecho Xacho Diosen', lecz can' gaque lježcho, le lecz xi'in Dios bene' lježchon'. ² Cate' chio' zoacho chaquecho Diosen' na' choncho da' bžie' bia' goncho, nezecho lecze zoacho chaquecho yezica'chle xi'in Dios. ³ Še chaquecho Diosen', choncho can' nžie' bia' goncho. Na' dan' nžie' bia' goncho, bi naquen zdebe gonchon. ⁴ Note'tezcho še ba bobob Diosen' yichjlažda'ochon', ba chzoecho chcuascho da' xinj dan' de yežlio nga. Na' dan' chejnilaže'cho Jesucriston', da'nan' chzoecho chcuascho da' xinjen' dan' de yežlion' bi chonchon. ⁵ Na' noch no chzoede' chcuase' da' xinj dan' de yežlio nga san bene' ca' chesejle'e Jesucriston' naque' dogualje Xi'in Dios, legaquen' chesezoede' chosocuase' da' xinjen'.

Diosen' cho'e diža' že' Jesucriston' naque' dogualje Xi'ine'

⁶ Quinga ben Jesucriston' šlac bide' yežlio nga, bnežjw cuine' gwzoe' nis na' blalj xčhene'. Bi nacho con gwzoaze' nis, san lecz blalj xčhene'. Na' Spiritw čhe Diosen' choen' diža' bene' ca', na' Spiriton' choen' pur diža' li. ⁷ Na' nita' šone bene' chesegüe'e da' bałi yaban' cheso'e diža' che Jesucriston': Xacho Diosen', len Jesucriston' ben' nzi' Xtiza' Dios na' len Spiritw čhe Diosen'. Na' toz can' cheso'e diža' che Jesucriston'. ⁸ Lecz de šone da' chesego'on da' bałi chesoen' diža' čhe Jesucriston' yežlio nga: Spiritw čhe Diosen', na' dan' gwzoe' nis

na' dan' blalj xchenen'. Na' toz ca chesoen' xtižen'. ⁹ Chejle'cho xtiža' benachen', na' nacch xtiža' Diosen' da' zaca'ch, na' Diosen' ba bi'e diža' che Xi'ine' Jesucriston'. ¹⁰ Na' še chejle'cho Jesucriston' naque' dogualje Xi'in Dios, nezecho lo' lažda'ochon' xtiža' Xacho Diosen' dan' bi'e che' naquen da' li. Na' še bi chejle'cho che Diosen', chonchone' ca to bene' güenlaže' da' bi chzenagcho diža' dan' cho'e che Xi'ine'na'. ¹¹ Na' xtiža' Diosen' chzejni'in chio' guata' yela' mban che benachen' toli tocañe še yesejnilaže' Xi'ine' Jesucriston'. ¹² Quinga naquen, de yela' mban checho toli tocañe še chejnilaže'cho Jesucriston', na' bi de yela' mban checho toli tocañe še bi chejnilaže'chone'.

Can' beyož cart nga da' bzoj Postlw San Juan

¹³ Ba bzoja' le'e cart nga, le'e chejnilaže'le Xi'in Diosen', cont nezele de yela' mban chele toli tocañe.

¹⁴ Na' bitw chžebcho chol güižcho Diosen', le nezecho chzenague' checho cate' chñabcho lagüen' da' chazlaže'. ¹⁵ Na' cate' nezecho chzenague' checho bite'tez dan' chñabechone', lecz nezecho gone' da' ca' ba gwñabechone'.

¹⁶ Na' še chache'echo bene' lježcho chone' bi da' xinj da' bi zaca' sela' Diosen' le' lo yi' gabil, cheyala' nabecho Diosen' gaclene' le' cont yezoe' binlo len Diosen' da' yoble. Da' xinj da' cheson baļ bene' zacan' sela' Diosen' legaque' lo yi' gabil. Bi žia' nable gaclen Diosen' bene' ca'. ¹⁷ Napcho dola' še choncho bite'tez da' xinj, perw gague yogo' da' xinj dan' chonchon' sela' Diosen' chio' lo yi' gabilen'.

¹⁸ Nezecho še ba bocob Xacho Diosen' yichjlažda'ochon' bi zoacho choncho da' xinjen' le zoa Jesucriston' ben' nac Xi'in Diosen' chcuase' chio' len dan' chon Satanásen', na' da'nán' bi soen gwžiayin' chio'.

¹⁹ Lecz nezecho Diosen' zoe' len chio', perw bene' ca' bi chosozenague' che', Satanásen' chnabian' yichjlažda'ogaquen'.

²⁰ Na' nezecho ba bid Xi'in Diosen', na' ba bzejni'ide' chio' cont nombia'cho Xe' ben' nac dogualje Dios. Nach zoacho toz len ben' nac dogualje Dios dan' zoacho toz len Xi'ine' Jesucriston'. Len' naque' dogualje Dios na' chnežjue' yela' mban toli tocañe che bene' chejnilaže' le'. ²¹ Xi'in da'ogua', gague nochle šejnilaže'le san ben' nac dogualje Dios. Da' na'zen' chzoja'.

CART GWCHOPE DAN' BZOJ POSTLW SAN JUAN

Chio' nombia'cho diža' li che Diosen' cheyala' gaque lježcho

¹ Neda' naca' beṇe' gole blao, na' chzoja' le' no'ole, len' ba gwlej Diosen' chzenago' xtižen', na' len xi'ino' ca'. Da' li chacda' le'e, na' gague nedaze' san lencze' yogo' beṇe' yezica'chle beṇe' zjanombia' diža' li che Diosen' chesacde' le'e. ² Chaqueto' le'e da' yo'o diža' li che Diosen' lo' lažda'ochon' na' soan lo' lažda'ochon' gaclenen chio' toli tocanē. ³ Xacho Diosen' na' len Xi'ine' Xancho Jesucriston' yesaclene' le'e, yesyeyaše' yesyeži'ilaže'de' le'e na' yesone' cont soa cuezle binlo len xbab dan' yo'o lo' yichlažda'olen', le ba nombia'le diža' li che Diosen' na' ba chaque lježle tole yetole.

⁴ Leca gwbeda' cate' gwnežda' baḷ bi' chio' ca' ba nita'be' chesombe' can' ža diža' li che Xacho Diosen' can' bžie' bia' goncho. ⁵ Dan' cheyala' goncho, no'ole, cheyala' soacho gaque lježcho tocho yetocho. Na' dan' žia' goncho ca', bi naquen to da' cobe; naquen dan' ba bzeneto' le'e caten' gwzolaole chejnilaže'le Jesucriston'. ⁶ Še chaquecho Diosen' goncho da' nžie' bia'. Na' nezele nžie' bia' gaque lježcho, le cate' gwzolaole chejnilaže'le Jesucriston' bzejni'ito' le'e cheyala' gaque lježcho.

Čaš beṇe' chesonlede'

⁷ Beṇe' zan chesaše' lo yežlion' chosozejni'ide' clele, le cheso'e diža' che Jesucriston' chesene' bi naque' Dios ben' bide' golje' beṇač. Note'tez bene' chon ca' naque' beṇe' gwxiye' na' chone' contr Criston'. ⁸ Bi gwzenagle xtiža'gaque' san le soa le gon cont Diosen' gac gone' soale mbalaz juisyw da' chonle can' chazlaže' gonle.

⁹ Note'tezcho še chzoacho ca'ale dan' bsd blo'e Criston' cont chzenagcho bichle diža' dan' chzejni'i beṇe' chio', bi zoa Diosen' len chio' še ca'. Na' note'tezcho še zoacho chzenagcho che dan' bsd blo'e Criston', Xacho Diosen' len Xi'ine' Criston' nite' len chio'. ¹⁰ Na' še no beṇe' yide' gan' zoalen' chaclaže' gwzejni'ide' le'e da' bi nac xtiža' Criston', bi gwleblene' ližlen' na' bi gwguaplene' tiox. ¹¹ Cheyala' gonelene' ca', le še gwlebelene' zejen txen chonlenlne' da' xinjen'.

Goclaže' šjane'e legaque'

¹² De da' zan da' nia' le'e perw bich chaclaža' gwzozan' le'e yiš. Zoa' lez yida' gana' zoale na' güe'lēna' le'e diža' cho'a cont soacho mbalaz juisyw.

¹³ Xi'in' no'ole bilon', no'ole ben' lecze gwlej Diosen' cont chzenague' che', chosoguape' le'e tiox. Da' na'zen' chzoja' na'a.

CART GWYONE DAN' BZOJ POSTLW SAN JUAN

Postlw San Juanna' cho'e diža' güen che ben' le Gayo

¹ Neda' naca' bene' gole blao, na' chzoja' cart nga par le', xmigua' Gayo. Da' li chacda' le'.

² Bene' migw, chnaba' lao Diosen' gac güen chio' na' so' güen ca güenna' ba zoa lo' yichjlažda'oguo'. ³ Leca bebeda' cate' besela'ac to chope bene' lježcho goso'e diža' can' zoaczo' chono' güen da' chzenago' diža' li che Diosen' do yichj do lažo'. ⁴ Len neda' le'e nacle ca xi'ina', na' bich bi de da' chbechda' ca chbeda' chnezda' chzenagle diža' li che Diosen' do yichj do laže'le.

⁵ Bene' migw, chono' güen dan' chacleno' bene' lježcho ca' bene' zjanac bene' zito'. ⁶ Legaque' ba goso'e diža' len neto' chdop chžagto' nga chonxento' Jesucriston' can' bži'ido' legaque'. Na' cate' yesele'e da' yoble güe'šco'ne' bi dan' yeseyažjde' cont yesyegüe'e nez da' yoble, le legaque' chesone' xšin Diosen'. ⁷ Ba gosa'ac laže' cont cheso'e xtiža' Criston' na' bibi goclen chesezi'e che bene' ca' bi chesejle'e che Criston'. ⁸ Da'nan' cheyała' gwlebcho bene' ca', gaclenchwe' na' gonchone' txen cont yesombia' bene' diža' li che Diosen'.

Diótfrefes chone' da' mal

⁹ Bač bzoja' le'e chdop chžagle chonxenle Jesucriston', perw na' Diótfrefes chaclaže' gague' la'zelaoze bene' blao len le'e na' bi chzenague' cheto'.

¹⁰ Da'nan' caten' yida' dezna'a le'e na' yapa'ne' che yogo' dan' chone' contr neto' na' diža' güenlaže' dan' chne' cheto'. Na' gague da' na'zen' chone', lecž bi chlebe' bene' lježchon' liže' bene' za'ac zito', na' cate' no le'e chaclaže'le gwleble legaque' ližlen' nach chžone' gonle ca', na' chbeje' le'e ladjo lježle chdop chžagle chonxene' Jesucriston' cate' chleble legaque'.

¹¹ Bene' migw, bi gono' txen len bene' ca' cheson da' xinjen', san ben txen len bene' ca' cheson da' güen. Note'tez bene' zoateze' chone' da' güen, nacbia' nombi'e Diosen', na' note'tez bene' zoateze' chone' da' xinjen', nacbia' biña' gombi'e Diosen'.

Demetrimon' chone' da' güen

¹² Yogo'ze bene' cheso'e diža' güen che Demetrio na' nacbia' zejlene' diža' li che Diosen'. Lencze neto' choe'to' diža' žato' chone' da' güen, na' nezele choe'to' diža' li.

Can' beyož carten'

¹³ Dech da' zan da' godca' nia' le'e, perw bich chaclaža' gwzojan' le'e yiš. ¹⁴ Zoa' lez yob yežagcho cont güe'cho diža' cho'a cate' soacho txen.

¹⁵ Soago' binlo len xbab dan' yo'o lo' yichjlažda'oguo'. Bene' migw chion' nita' nga chosoguape' le' tiox. Na' chnaba' gwguapšco' tiox to to bene' migw cheto' ca' nita' gan' zoalen'. Da' na'zen' chzoja' na'a.

CART DAN' BZOJ SAN JUDAS

San Judas chzoje' bene' ca' zjanaque' lo na' Diosen'

¹ Neda' Judas naca' bene' güen žin che Jesucriston', na' naca' bene' biše' Jacobo. Chzoja' le'e ba gwlej Xacho Diosen' cont nacle lo ne'en nach zoale chcuas chcue'ej Jesucriston' le'e len da' malen'. ² Chnaba' gon Xacho Diosen' cont gacbe'echle cheyaše' cheži'ilaže' chgüede' le'e, na' gone' cont soa cuezechle binlo len xbab da' yo'o lo' yichjlažda'olen', na' gone' gacbe'echle chacchgüede' le'e.

Bene' ca' chososed chosolo'ede' diža' güenlaže'

(2 Pedro 2:1-17)

³ Bene' migw, chacda' le'e, na' ba goclaže' chgua' gwzoja' le'e gwzejni'ida' le'e can' ben Xancho Jesucriston' cont de yela' mban checho toli tocanē. Perw na'a ba chonen byen chzoja' chneyoeda' le'e soachachle šejle'le diža' li che Diosen' da' bzejni'ide' chio' to ši'ize, chio' naccho lo ne'en. ⁴ Nita' bal bene' cheseziye'e cont chaquele zjanaque' le'e txen. Bi chosozenague' che Diosen', san chesene' da' nži'ilaže' Diosen' chio' guacte goncho bite'teze da' yela' zto' len cuerp chechon', le chezi'xencze' checho. Na' chosozoe' to šla'ale toz ben' nac dogualje Dios ben' cheyalā' yosozenag yogo' benachen' che', na' len Xancho Jesucriston'. Cana'te byoj Xtiža' Diosen' žan bene' cheson ca' yesežaglaochgüe' neche xtola'gaquen'.

⁵ Na' la'czla' ba gwnezele yogo' can' goquen', chaclaža' gona' cont šjajza'laže'le Xancho Diosen' bosle' da' xoxta'o neto' bene' Israel lo na' bene' Egipto ca', perw gwdechle bžiaye'e balteze' bi gosejle'e che'. ⁶ Na' zan angl bi gosazlaže' yesone' da' gwlo'o Diosen' lo na'gaque' yesone', san gosaclaže' yesacche' bene' blaoch. Nachen' besyechoje' gan' bžia Diosen' bia' yesenite'. Nach Diosen' gwsele' legaque' gan' nacchgua chol, na' zjancheje' gden toli tocanē cont yezezaca'zi'e cate' žin ža gac juisyw. ⁷ Na' lecce ca' bene' gwnita' ciuda Sodoma na' ciuda Gomorra len yezica'chle ciuda ca' zjanyechj zjambi'in legaquen, gosonchgüe' da' nac yela' zto' len cuerp chegaquen', le gosata'lene' ljež bene' byogaque' gosone' le' ca xo'ole' cont gosone' da' yela' zto' len legaque'. Nach Diosen' gwsele' yi' da' bzeyen ciuda ca' gosebiiyi'teccnen'. Na' da' bene' ca', chosnišde' chio' benach gata' castigw lo yi' gabil toli tocanē che bene' bi yosozenag che'.

⁸ Na' bia'cze bene' ca' chososed chosolo'ede' le'e diža' güenlaže', zjanite' chesone' da' mal na' chesene' besele'edagüede' nac güen dan' chesonen'. Chesone' da' yela' zto' len cuerp chegaquen' bi chesaclaže' yosozenague' che Xancho Diosen', na' chesezi'diže' angl ca' bene' zjazaca'chgua. ⁹ Perw nža'le cheson angl che Diosen', le cani' gwzoa to tiemp cate' angl blao ben' le Miguel gocyože' len Satanás dan' chnabia' da' xigüe' ca' da' goclažen' yeyoan' cuerp che da' Moisésen'. Na' la'czla' Miguelen' naque' angl blao che Diosen', bi beyaxjde' si'diže' Satanásen', san con gožen': "Xanto' Diosen' tile' le'." ¹⁰ Perw bene' quinga chesezi'diže' bite'teze da' bi chesejni'ide'. Na' chesonteze' da' ca' ža cuerp chegaquen' yesone', ca cheson beyixe' be bi chesejni'i, na' da' ca' chesonen' chosožaiyin' legaque'.

¹¹ Nyasē'chgua gac chegaque'. Zjanite' chesegue'e lježgaque' can' ben da' Caín, na' lecce chesoe'laže' chesone' da' mal cont yesone' gan mechw can' ben da' Balaam. Chesone' güedenag len bene' ca' gwlej Diosen' cont chesenabi'e

legaue' cacze güedenag ben da' ben' gože' Coré cani', na' can' gwžiyai' da' Corén' neche yela' güedenag chen', lecz ca' yesebiaye'e. ¹² Na' cate' le'e che'ej chagwle txen cont chlo'ele chaque lježle, legaue' chesagwxatteze' con nacteze žan chegaue' na' chese'ejchgüe' gualaz da' yesone' güen len bene' lježe'. Na' da' bibi zaca' can' chesone', da'nan' zjazacalebde' ca' bzigüe' da' dope to le'e lache' šiš, na' lecze zjazacalebde' ca' bene' güeye' xila' bene' chna' cuine' na' bi chne'e xila' ca'. Lecze zjazacalebde' ca' bejw da' nžiga' be' da' bi cheyaquen yejw, na' ca' to yag xen da' bibi chbian cate' ba bžin tiemp cuian, na' gualaz da' cuian chbižen na' chbixen lo yo. ¹³ Na' neche yela' zton' cheson bene' ca', zjazacalebde' ca' nisdao' da' chas chata' na' checho'onen bžina' ga nac lo yo cho'a nisdao'. Na' zjazacalebde' ca' beljw da' bich zjažian xišne'en gan' cheyala' yesebian, le Diosen' bžie' bia' yesezaca'zi'e toli tocañe gan' nac leca chol.

¹⁴ Gwzolaon cate' gwzoa da' Adán bžinten cate' gwzoa da' Enoc goc gaže dia che Adánna'. Na' Enoquen' lecze be'e diža' da' bzejni'i Diosen' le' che bene' ca' chososed chosolo'ede' diža' güenlaže', cate' gwne': "Ble'eda' za' Xancho Diosen' len angl zan juisyw che' ca' ¹⁵ cont chogbi'en yesezaca'zi' yogo' bene' zjanape' dola'. Yogo' bene' ca' bi bosozenag che' yesezaca'zi'e toli tocañe neche da' gosone' da' mal juisyw yela' güedenag chegaquen' na' neche da' gosone' diža' ya' che'." ¹⁶ Na' ca' nac bene' ca' chososed chosolo'ede' le'e diža' güenlaže', bate'teze chesežeše' che Diosen', na' bibi chesazlaže'. Con chesonteze' bite'teze žan chegaue'. Len xtiža'gaquen' chesonxen cuingaque' na' chopode' bene' yoble cont yesone' gan' mechw o cont yesaclen bene' legaue'.

San Judas che'e bene' chesonxen Jesucriston' can' cheyala' yesone'

¹⁷ San le'e bene' migw, bene' chacda', cheyala' šjayze'ele diža' nga gosena postlw ca' bene' ca' gwlej Xancho Jesucriston'. ¹⁸ Gosone': "Tiempen' cate' ba zoa yid Xancho Jesucriston', nita' bene' bi yesejle' che Diosen' na' yesonle' che' na' yesonteze' con da' žan chegaue' da' nac yela' zto'." ¹⁹ Na' na'a bene' ca' chesone' cont le'e chejnlaže' le' Criston' bi chonle toze xbab, san nža' nža'te ca' žale. Chesone' xbab che da' chnalaze' cuerp chegaue', le bi yo'o Spiritw che Diosen' lo' yichjlažda'ogaquen'.

²⁰ Perw le'e bene' migw, chacda' le'e, na' chneyoeda' le gonchach laže'le cont soachachle šejle'le diža' li che Diosen' da' zaca'chgua. Na' le yol güiž Diosen' ye'ln'e da' chzejni'i Spiritw chen' le'e. ²¹ Na' le soa le gon cont gache'ele chaque Diosen' le'e. Na' da' cheyaše' cheži'ilaže' Xancho Jesucriston' chio', gone' cont šjyzoalenchone' toli tocañe. Da'nan' le soa le cueze batcan' gone' ca'.

²² Bał bene' chesacžejlaže' še cheyala' yesone' can' ža Diosen'. Le gwzejni'i legaue'. ²³ Na' bene' ca' ba chesezolažüe' chosozenague' che diža' güenlažen', le gon con ga zelao saca'le cont yesyechoje' lo nez malen' na' le co'o legaue' nez güenna'. Na' yebał bene' chesonchgüe' da' xinj, na' lecze cheyala' yeyaše'cho legaue', perw do chaž chžebcho, do chgue'echo dan' chesonen' na' cheyala' gwsaca'cho cont bi goncho txen len da' xinjen' chesonen'.

Judasen' chonxene' Diosen'

²⁴⁻²⁵ Cheyala' gonxencho toz Dios ben' zaca' gonxencho, ben' none' yela' mban checho toli tocañe. Dios nan' naque' bene' sina' juisyw. Chac chone' cont bi laž'cho goncho da' xinj, na' chac chone' cont bibi xtoła'cho gata' cate' yežincho lažüen' gan' yo'ochgua be'ni'. Leca yebecho cana'. Diosen' naque' la'zelagüe' bene' zaca' bene' blao, na' zaque' chnabi'e doxen. Naque' Xan yogo'

beṇaḥ na' yogo' bica'chle da' de. Len' goxene' cate' bina' xe yežlion' na' cheyala' gonxenchone' toli tocanē dan' gwsele' Xancho Jesucriston' chaclene' chio'. Cašca gac. Da' na'zen' chzoja'.

JESUCRISTON' BZEJN'IDE' SAN JUANNA' CHE DA' CA' ZA' GAC

Diosen' bzejni'ide' Jesucriston' diža' quinga

¹ Diosen' bzejni'ide' Jesucriston' diža' quinga cont le' gwlo'ede' bene' ca' chesejnilaže'ne' can' ba zoa gac. Nach ba gwsele' to bene' nac angl che' cont bzejni'iden' neda' Juan, neda' naca' ben' chon xšine'. ² Na' chzoja' diža' li che yogo' da' ba ble'eda', na' nezda' da' li gwna Diosen' gac quinga, le Jesucriston' bzejni'iden' neda'.

³ Mbalaz bene' ca' yosolab da' nga chzoja' da' bzene Diosen' neda' na' bene' ca' yesende' yosolab bene' yoble len, še da' li yosozenague' chen, le ba zoa gac can' žanna'.

Juanna' chzoje' bene' ca' chesonxen Jesucriston' yež ca' gaže

⁴ Neda' Juan chzoja' le'e nita'le gaž yež che Asia chdop chžagle chonxenle Jesucriston'. Diosen' len Spiritw chen' yesenitašque' yesaclene' le'e na' yesone' soa cuezle binlo len xbab chelen', Dios ben' ba zoacze' cate' biņa' xe yežlion', na' soacze' toli tocaņe. Na' Spiritw che Diosen' naquen ca gaže spiritw na' zoan lao Diosen' gan' chi'e chnabi'e. ⁵ Na' Jesucriston' lecze soašque' gaclene' le'e na' gone' soa cuezle binlo. Jesucriston' naque' ben' cho'e diža' li che Diosen'. Naque' bene' nechw bebane' ladjo bene' guaten' ben' bich nabia' yeļa' goten' le'. Na' le' chnabi'e yogo' nochle bene' gwnabia' že' yežlio nga. Dan' chacde' chio' bnežjw cuine' gosote'ne' na' blalj xchene' cont bnitlagüe' xtoļa'chon'. ⁶ Nach ba gwleje' chio' cont nabia'cho txen len le' ca no rey na' cont soacho gonxencho Diosen' ca no bxož, Dios ben' nac Xe' na' lecze naque' ben' chonxene'. Cheyaļa' gonxenchone' toli tocaņe, le zoacze' chnabi'e toli tocaņe. Can' gonščaczcho.

⁷ Jesucriston' yide' da' yoble to lo' bejw, na' yogo'loļ bene' yesele'ede' le', lente bene' ca' gosot le'. Na' bene' ca' že' to to latje lo yežlion', yesebežyaše' cate' yesele'ede' le'. Can' žia', na' can' gacšca.

⁸ "Neda' naca' Dios ben' ben yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z." Can' ža' Xancho Dios ben' nape' yeļa' guac xen juisyw, ben' ba zoacze' cate' biņa' xe yežlion' na' soacze' toli tocaņe.

Juan ble'edaogüede' leca bene' zaca' juisyw nac Criston'

⁹ Neda' Juan naca' bene' lježle dan' naccho txen chzenagcho che Jesús'en' cont Diosen' chnabi'e yichjlažda'ocho, na' toz can' chosoči chososaca' bene' chio' neče xtižen', na' txen chaclen Jesucriston' chio' cont chyo chčhejcho len yogo' da' chac checho. Da' ba gwdixjue'eda' xtiža' Diosen' na' ba biņa' diža' che Jesucriston', da'nana' gosezene' neda' na' gosesele' neda' pres gan' že' Patmos dan' nac to yežlio dao' lo' nisdaon'. ¹⁰ Na' to ža' dmigw Spiritw che Diosen' benen cont ble'edaogüeda', na' benda' Jesucriston' chņe' cožan' zižjehgua ca ga chbež trompeta. ¹¹ Na' gože' neda':

—Neda' naca' ben' ben yežlion' len yogo' bichle da' de, na' naca' ben' gon cont te chen. Da'nana' zaca'lebda' ca letr nechw da' nzi' A na' letr bzebe da' nzi' Z. Bzoj to le'e yiš da' quinga le'edo', na' selon' lao bene' ca' nita' gaž yež

che Asia chesedop chesežague' chesonxene' neda', yež ca' zjanzi' Efeso, na' Esmirna, na' Pérgamo, na' Tiatira, na' Sardis, na' Filadelfia na' Laodicea.

¹² Na' gwyečhja' gwna'a non' chne' na' ble'eda' gaže candeler de oro. ¹³ Na' gachol candeler ca' gaže, ble'eda' to bene' nac ca to benačh perw gocbe'eda' bi naque' benačhze. Nyaze' to lache' ton' da' bžinte lo' ni'e na' nchej cho'alcho'en ca to bant de oro. ¹⁴ Na' yiša' yichjen' naquen da' šiš ca xa xila' o ca no beye'. Na' yejlagüen' gosactiten ca to yi' da' čala'niñ. ¹⁵ Ni'e ca' ble'edan' ca to de bronze da' nlačhgua cate' naquen ya'alj xwan lo' yi'. Na' ši'en nenen žižjehgua ca chziž yegw cate' dechgua nis. ¹⁶ Na' noxe' gaže beljw len ne'e ličan' na' lo' cho'en chchojen ca to spada da' nla chop la'an. Na' cho'alagüen' goctiten ca gwbiž cate' chna'chguan.

¹⁷ Na' cate' ble'eda'ne' gwbiža' xni'en gottia' šlat. Nach bli ne'e ličan' gwxoen' yichja' na' gože'nda':

—Bi žebo'. Neda' naca' ben' ben yežlion' len yogo' bichle da' de, na' naca' ben' gon cont te čen. ¹⁸ Naca' ben' nsa' yela' mban. Cana' gota' perw bebana' ladjo bene' guat na' zoacza' toli tocañe. Na' naquen lo' na' nia' bat yesat to to bene' na' nac gac čegaque' cate' bačh gosate'. ¹⁹ Na' na'a bzoj diža' che da' ca' ba ble'edo' na' diža' che da' ca' chac na'a na' diža' che da' ca' za' gac. ²⁰ Na' da' nono na' neze che beljw ca' gaže dan' noxa' na' che candeler de oro ca' gaže, zejen quinga: beljw ca' zejen gaže bene' ca' cheso'e xtiža' len gaže cuen bene' ca' chesedop chesežag chesonxene' neda' gan' nzi' Asia. Na' candeler ca' gaže zejen gaž cuen bene' ca' chesonxen neda'.

2

Da' gwna Jesucriston' che bene' ca' chesonxen le' lo' ciuda ca' gaže: Da' gože' bene' Efeso ca'

¹ Bzoj ben' choe' xtiža' len bene' ca' chesedop chesežag chesonxene' neda' lo' ciuda Efeson', yo'one' neda' noxa' beljw ca' gaže len na' ličan' na' chda' gachol candeler de oro ca' gaže, na' yo'one' nedan' chapa'ne' diža' quinga:

² “Neze nle'eda' ca' güenna' chonle, can' chčhejlaže'le zoale chonchguale xšinan'. Nezda' bi chleble bene' cheson da' xinj, le' ba ble'ele can' cheson bene' güenlaže' ca' chesene zjanaque' postlw na' chacbe'ele bi zjanaque' dogualje postlw. ³ Ba byo bčhejle len yogo' dan' ba goc čhele na' ba benchguale xšinan' na' bi jača'que'laže'le. ⁴ Perw da' nga bi chazlaža' can' chonle, da' bich chaquele neda' can' goquele neda' cana'. ⁵ Da'n'an' le' gon xbab can' gwzoale goquele neda' na' can' gwzoale bzenagle chia' na' yetinje xtoła'le cont da' yoble gonle güen can' benle cana'. Na' še bi yetinjele xtoła'len', yedeyena' cont bich gacle candeler chia'. ⁶ Perw la'czla' bi chontecle güen, chebeda' chgue'ele da' xinj da' cheson bene' ca' zjanzi' nicolaítas, bene' ca' chesene' guac gontezechle da' xinj, le' neda' lecze chgue'eda' can' chesonen'. ⁷ Le'e žia nagle da' chene, le' gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'teze še soele bi cuejyichjle xtižan', neda' gona' da' gagwle da' chbia lo' yag yela' mban da' zoa latje xdan che Diosen'.”

Da' gože' bene' Esmirna ca'

⁸ Na' na'a bzoj ben' choe' xtiža' len bene' ca' chesedop chesežag chesonxen neda' ciuda Esmirna, yo'one' naca' ben' ben yežlion' na' len yogo' bichle da' de na' ben' gon cont te čen, ben' lecze gote' na' bebane' ladjo bene' guat ca', na' yo'one' nedan' chapa'ne' diža' quinga: ⁹ “Neze nle'eda' ca' güenna'

chonle. Nezda' chyi chzaca'le. Nezda' nacchgualle bene' yaše', la'czla' de chele da' zaca'ch clel ca yela' gwni'an'. Na' ca nac bene' Israel bene' ca' chesene' ba gwlej Diosen' legaque' cont gone' güen len legaque', nezda' bale' chesenie' yela' ya' chele. Perw bi gwleje' ben' cheson ca', le bi chesejnilaže'ne', san zjanaque' dapa' txen chosoznague' che Satanás dan' chnabia' da' xigüe' ca'.¹⁰ Bi žeble da' ca' za' gac chele, le Satanásen' gonen dan' yesejixjue' balle ližya cont gata'bia' še soen gonen cuejyichjle xtižan'. Na' lo to chope ža yosoči yososaque' le'e. Le soateze le gwzenag chia' la'czla' še yesote' le'e, na' gona' cont banle len neda' toli tocañe.¹¹ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', bi gac chele can' yesac che bene' yezesaca'zi' toli tocañe dan' žacho yela' got gwchope."

Da' gože bene' Pérqamo ca'

¹² Na' bzoj ben' choe' xtiža' len bene' ca' chesodop chesežag chesonxen neda' ciuda Pérqamo, yo'one' neda' napa' spada toše' dan' nla chop la'an, na' nedan' chapa'ne' diža' quinga: ¹³ "Neze nle'eda' ca güenna' chonle. Na' nezda' zoale lo ciuda gan' chnabia'chgua Satanásen', perw zoale chzenagle chia'. Nezda' bi chbejyichjle xtižan' dan' chejle'le na' naca gwlejyichjlen cate' gosote' Antipas ben' be'e xtižan' lo ciuda chelen' gan' že' bene' zan bene' chosoznag che Satanásen'.¹⁴ Perw de to chope da' chonle da' bi chazlaža'. Le nita' balle chzejni'i lježle guac gontezle da' xinj. Ca'cze nac dan' bzejni'i da' Balaam da' rey Balac cani'. Da'n'an' gwsele' no'ole gosego'oyele' bene' Israel ca' cont gosagüe' yela' guagw da' nac che l' gua'a lsaca' gosejnilaže' bene' zito' ca' na' cont gosone' da' yela' zto' len cuerp chegaque'.¹⁵ Na' lecze nita' balle chzenagle che dan' chgue'eda' dan' chososed chosolo'e bene' ca' zjan' nicolaífas.¹⁶ Da'n'an' le yetinjle che da' xinjen' chonle. Na' še bi yetinjle xtola'len', la' yidtia' yedetillena' nole chonle da' xinjen' len spada dan' chchoj choan'.¹⁷ Le'e žia nagle da' chene, le gwzenag che da' nga ža Spiritw che Diosen' chen' le'e chdop chžagle chonxenle neda' gate'teze: Note'tezle še soele bi cuejyichjle xtižan', goña' le'e to yela' guagw da' zaca' da' nono na' le'e lo yežlion', to da' zaca'leben ca maná, na' goña' to yej šiš che to tole gan' yoj lala da' naquen to lala da' cobe da' nono nombia', lete le'e gaquen lo na'le gombia'len."

Da' gože bene' Tiatira ca'

¹⁸ Na' bzoj ben' choe' xtiža' len bene' ca' chesodop chesežag chesonxene' neda' lo ciuda Tiatira, na' yo'one' naca' dogualje Xi'in Dios, na' chactit yejlagua' ca to yi' da' chala'nin' na' ni'a ca' chesaquen ca bronce da' cheyac ya'alj cate' xoan lo yi'. Yo'one' neda' chapa'ne' diža' quinga: ¹⁹ "Neze nle'eda' ca güenna' chonle, nezda' zoale chaquele neda', chejnilaže'lenda', chonchgualle xšinan' na' chchejele bite'teze chac chele, na' nezda' chonchle güen na'a clel can' benle cana'.²⁰ Perw de to da' chonle da' bi chazlaža', le choe'le latje zoa to no'ole naque' txen len le'e, no'olen' zaca'lebe ca da' reina Jezabel. Že' chsed chlo'ede' xtiža' Diosen' perw len diža' güenlaže' chen' chziye'e bene' chesejnilaže' neda' cont bale' chesone' da' nac da' yela' zto' len cuerp chegaquen' na' lecze chesagüe' yela' guagw da' chesena bene' naquen che l' gua'a lsaca' chesejnilaže'.²¹ Ba gwleza' cont yetinjde' che yela' zto' dan' chonen', perw bi chaclaže' yetinjden', na' bina' cuejyichjle' yela' zton' chonen'.²² Da'n'an' gona' cont gacšende' na' gate' lo cam, na' gona' cont bene' ca' cheson yela' zton' txen len le' lecze yesale'chgüede' še bi yesebejyichjle' da'

ca' chzejni'ide' legaque' yesone'. ²³ Nach bi' che' ca', gona' cont yesatbe'. Nach yogo' cuen bene' ca' chesedop chesežag chesonxene' neda' gate'teze yesache'ede' nombi'a yogo'te xbab da' yo'o lo' yichjlaždao' benačh, na' gona' cont to toe' soe' mbalaz o saca'zi'e con ca nac da' ba bene'. ²⁴ Na' le'e zoale Tiatiran' le'e bi chonle can' chsed chlo'e no'ole güenlažen' na' neca nsedle dan' chesene' chesejni'ide' che Satanásen' dan' nono nombia', bi nia' bichle da' cheyala' gonle. ²⁵ Con soacze gonle da' güen can' chonle tža tža, cont ne' chonle güen caten' yida' da' yoble. ²⁶ Note'tezle še soele bi cuejyichjle xtižan', na' še soele ne' soatezle gonle can' nona' mandadw cate'ch yida' da' yoble, gona' cont nabia'le nación ca' txen len neda'. ²⁷ Ca Xan' ba bene' cont chnabi'a nación ca', lecze can' gona' cont bene' bi yesebejyichje' xtižan' yesenabi'e txen len neda'. Na' yesenabi'e nación ca' na' žan ca' žan bene' nación ca' yosozenague' čhegaque', na' bene' ca' bi chosozenag, yosožiaje'e legaque' ca to bene' chxoxj to no yeso' xguague. ²⁸ Na' gwnežjua' legaque' beljw xsilen'. ²⁹ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

3

Dan' gože' bene' Sardis ca'

¹ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Sardis, yo'one' napa' Spiritw che Dios dan' nac ca gaže spiritw, na' noxa' beljw ca' gaže, na' neda' chapa'ne' diža' quinga: "Neze nle'eda' yogo'lo' dan' chonle. Nežda' nacle ca bene' guat la'czla' chze čele napple yela' mban toli tocaņe. ² Le gon xbab can' chonle na' le šejnilaže'ch neda' na' le gwzenag čhia' šlac bina' yeyož cuiayi'le, le dan' chonlen' bi naquen can' chebe Dios ben' chonxena'. ³ Le soa le gon xbab che xtižan' dan' bosozejni'i bene' le'e na' da' bzenagle can' cana'. Le gwzenag chen na'a da' yoble cont yetinjele xtoła'len'. Na' še bi gonle xbab yetinje xtoła'len', žin ža yedexenyala' le'e na' gona' castigw čele ca chzenyal to no bene' gwban cate' chbane'. Bi nezele bi ža bi hor. ⁴ Bia'cze nita' halle bene' Sardis bina' gonle da' malen' txen len bene' yezica'chle. Na' le'e nac lažda'olen' xilaže' len neda', žin ža gona' lache' šiš chazle na' talenle neda', le zaca'le cont gonle neda' txen. ⁵ Note'tezle še soele bi cuejyichjle xtižan', žin ža gona' lache' šiš chazle, na' gwbat yoxia' lalen' le'e libr čhia' gan' nyoj la yogo' bene' zjanape' yela' mban toli tocaņe, na' güe'lena' Xan' diža' na' len bene' zjanac angl che' ca' yapegaca'ne' nacle neda' txen. ⁶ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Da' gože' bene' Filadelfia ca'

⁷ Na' lecze bzoj ben' choe' xtiža' len bene' ca' chesedop chesežag chesonxen neda' lo ciuda Filadelfia, yo'one' naca' bene' laždao' xilaže' juisyw, na' zoateza' chona' can' gwnia' gona'. Napa' xinya che da' rey David. Cate' chsaljua' cont yeso'o bene' gan' zoa Diosen' chnabi'e, nono gac yosejyw, na' cate' chseyjua' cont bi yeso'e, nono gac saljw. Yo'one' neda' chapa'ne' diža' quinga: ⁸ "Neze nle'eda' ca güenna' chonle. Nach ba gwsaljua' ca to puert che le'e da' nono gac yososejyw. Na' la'czla' bi nac zanle, ba chzenagle xtižan' na' bi gwlejyichjlen caten' bosochi bososaque' le'e. ⁹ Ba' bene' Israel že' gan' zoalen' chesene' ba gwlej Diosen' legaque' cont gone' güen len legaque', perw bi gwleje' legaque', le bi chesejni'laže'ne'. Zjanaque' dapa' txen chosozenague' che Satanás dan' chnabi'a' da' xigüe' ca'. Na' ca nac legaque', gona' cont žin

ža yesape' le'e bala'an cate' yesacbe'ede' chacda' le'e. ¹⁰ Ba byo bčhejle len yogo' dan' gwdi gwxaca'le na' benle can' nona' mandadw, na' da'nana' gona' yechojle güen cate' žin ža saca'zi' yogo' benach. Cana' gata'bia' che to to benach še yosozenague' chia' o še bi yosozenague'. ¹¹ Ba zoa yida' da' yoble. Le soachach le šejnilaže'nda' na' gwzenagle chia' cont bibi gwžon soale mbalaz toli tocane. ¹² Note'tezle še soele bi cuejyichle xtižan', žin ža gona' gacle ca bdope da' zjanita' lo' yodao' blao che Dios ben' chonxena', le yežinle gan' zoa Diosen' na' yega'anlenle' toli tocane. Na' gwzoja' loxga to tole la Dios ben' chonxena' na' la ciuda che', ciuda Jerusalén da' nac da' cobe da' chi' yaba na' yetjen lo yežlion'. Na' gwzoja' loxga to tole la neda' da' nac da' cobe. ¹³ Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

Dan' gože' bene' Laodicea ca'

¹⁴ Na' bzoj ben' choe' xtiža' len bene' ca' chesodop chesežag chesonxen neda' lo ciuda Laodicea, yo'one' chona' cont chac can' chnalaže' Diosen'. Cho'a diža' li da' nac cayanen' che' Diosen' neda'. Txen len neda' ben Diosen' benach na' yogo'lol' bichle da' de le'e yaban' na' lo yežlion'. Yo'one' neda' chapane' diža' quinga: ¹⁵ "Neze nle'eda' ca chonle, bi nacho chgue'ele neda' na' neca chaquele neda'. Yebechda' šaca' chgue'ele neda' o šaca' chaquele neda'. ¹⁶ Na' da' bi chonle cuent gaquele neda', da'nana' ba zoa cuejyichja' le'e bich gona' le'e ca xi'ina'. ¹⁷ Le'e žale zoale mbalaz, žale chonle da' güenchgua, žale bibi chyažjele le chebechgüe Diosen' le'e. Na' bi chache'ele leca bene' zban nacle len Diosen'. Bi chache'ele nacle ca to bene' bi chle'e o ca to bene' laže' ga'alyid da' bi chejni'ile xtižan' neca chzenagle chen. ¹⁸ Da'nana' chnia' le'e cheyała' si'le da' gona' le'e, le naquen da' zaca'ch ca oro dan' ba bosozeye' cont bega'an da' dogualje. Si'le da' gona' le'e cont da' li soale mbalaz. Na' le nab yezi'xena' xtoła'le cont gac lažda'olen' xilaže' can' chac xałana' bene' nyaz to lache' šiš xila'. Gonle ca' cont bich le'eda' le'e ca to bene' laže' ga'alyid, bene' cheyała' gague zto'. Na' le güe' latje yocoba' xbab chelen' cont bich gacle ca to bene' bi chle'e, bene' chyažje rmed che yejlagüe' cont le'ede', san gacbe'ele da' chaclaže' Diosen' gonle. ¹⁹ Note'teze bene' chacda', chdila'ne' na' chnežjua'ne' castigw cate' chone' da' xinj. Da'nana' cheyała' cuec yichjle yetinjele xtoła'len'. ²⁰ Chnia' to tole ca to bene' zecha cho'a yo'o chelen' chnie' na' chsiže' le'e puerten'. Note'tezle še gwzenagle chia' na' še saljwle cont šo'a, yedesoa' len le'e na' gona' cont soale mbalaz txen len neda'. ²¹ Na' note'tezle še soele bi cuejyichjele xtižan', žin ža gona' cont cue'lenle neda' gan' chi'a chnabi'a. Can' bena' neda', gwzoeda' cont bena' can' gwna Xan' nach chi'lena'ne' chnabi'a to' txen. ²² Le'e žia nagle da' chene, le gwzenag che dan' ža Spiritw che Diosen' chen' le'e chdop chžagle chonxenle neda' gate'teze."

4

Ben' že' yaban' chesonxene' Diosen'

¹ Beyož bzoja' da' ca' gwne' neda', ble'edaogüeda' nyaljo to puert yaban'. Nach da' yoble benda' gwne' Jesucristw ben' gwne' neda' da' nechw zižjehgua cacze zižje chbež to trompeta, gože'nda':

—Gwyep gan' zoa' nga cont gwlo'eda' le' da' ca' za' gac.

² Nach la' bente Spiritw che Diosen' cont ble'edaogüeda' yaban' gan' chi' Diosen' chnabi'e. ³ Na' ble'eda' ben' chi' chnabian' chactite' ca chactit yejese, vej da' nzi' jasje na' da' nzi' cornalina. Na' to da' nac ca to pita' gwyechjen

gan' chi'e chnabi'en, na' chactiten ca chactit to yej da' nzi' esmeralda. ⁴ Na' cue'ej cuit Diosen' gan' chi'e chnabi'e zjachi' yetapechoa bene' gwlej Diosen' zjanaque' blao, bene' chesenabi'e txen len le'. Zjanyaze' lache' šiš na' zjazoa corona de oro yichj to togaque'. ⁵ Na' gan' chi' Diosen' chnabi'e chep yes na' chac sšag na' chašjw chtin. Na' lagüen' nita' gaže yi' da' čala'niñ. Yi' ca' gaže zjanaquen Spiritw che Diosen', na' Spiritw che Diosen' naquen ca gaže spiritw. ⁶ Na' doxen lagüe' gan' chi'e chnabi'en nžiljw lo yon' to da' chactit ca vidrw na' nlan' ca to nis nyadi da' nla'xeje.

Na' nita' yetap bene' gan' zoa Diosen'. Tgüeje' nita' cuite' chop la'ate, yetoe' cože' na' yetoe' lagüe', na' zjažia da' zan yejlaogaque', žia da' žia laogaque' na' lente cože'gaque'. ⁷ Bene' nechw naque' ca to león, na' bene' gwchope ca to go'n, na' bene' gwyone nac cho'alagüe' ca che beñach, na' bene' gwdape naque' ca to bsia be ze lo be'. ⁸ Na' dapte bene' ca' to toe' žia xop güeje xilgaque', na' zjažia zan yejlaogaque' lo xilen' lente cože' xilen'. Na' do ža do yel bi chososane' chesene':

Leca bene' laždao' xilaže' juisyw nac Xancho Diosen' ben' nape la'zelagüe yela' guac xen.

Ba zoacze' cate' za' xe yežlion', na' soacze' toli tocaņe.

⁹ Na' yogo' ni'a cate' bene' ca' tap cheso'e diža' catec bene' zaca' nac Dios ben' chi' chnabia', ben' zoacze toli tocaņe, yogo' ni'a cate' chesonxene' le' cheso'e yela' choxclen che', ¹⁰ bene' tapechoa ca' gwlej Diosen' cont zjanaque' blao chosozoa xibe' lao Dios ben' zoa toli tocaņe chesonxene' le' gan' chi'e chnabi'e na' chosonite' corona čhegaquen' xni'en, chesene':

¹¹ Xanto' Dios, zaco' gonxento' le',

na' soato' le' bala'an na' güe'to' diža' che yela' guac xen chion',

le len' beno' yogo'lol' da' de,

na' beno' yogo'lo len con ca gwналаžo'.

5

Jesusristw ben' zaca'lebe ca xila' daon' gosot bene' Israel ca' neche xtoła'gaque'

¹ Na' ble'eda' Dios ben' chi' chnabia', len ne'e licha noxe' to yiš da' ndobyoyen na' nyoj chop la'aten na' nyeyjon nyišen' gaže seyw. ² Na' ble'eda' to angl gual gwne' zižje gwne':

—čNon' zaca' gwzoxj seyw ca' cont šaš yišen'?

³ Na' nono bžel bene' zaca' gwzaše' yišen' neca yaban' na' ne yežlion' na' neca gan' že' bene' guat ca'. Ne to nono bžel bene' la'ch le'ezden' nac naquen. ⁴ Na' gwchežchgua' da' nono zoa bene' zaca' gwzaše' yišen' gwlaben' na' neca zaque' na'ze' nac naquen. ⁵ Nach to bene' gwlej Diosen' cont naque' blao gože'nda':

—Bitw cuežo'. Gwna'šc, na' zoa Jesusristw ben' golje lo diaža che da' Judá, naque' rey can' nac da' xoxxta'ogüe' David, na' da' nape' yela' chnabia' xen zaca'lebbe' ca to bež be nzi' león. Na' le' zaque' gwzoxje' seyw ca' gaže na' gwzaše' yišen', le ba gwzoede' bene' cont gac nitlao xtoła' beñachen'.

⁶ Nach ble'eda'ne' zeche' gan' chi' ben' chnabian' na' ladjo bene' ca' tap ben' zjažia xil, do gachol bene' blao ca' tapechoa. Ble'eda'ne' ca to xila' dao' ben' ba gosote', ca xila' be žia gaže lozba' na' gaže yejlaoba'. Na' yejlaoban' gaže zejen zoa Spiritw che Diosen' doxen lo yežlion' chonen can' ža Diosen'.

⁷ Nach ben' ble'eda' ca to xila' dao' jaxi'e yiš dan' noxe' ben' len ne'e licha gan' chi'e chnabi'en. ⁸ Na' cate' jaxi'e yišen' bene' ca' tap lente bene' blao ca' tapechoa bosozoa xibgaque' lagüen'. Na' to to bene' blao ca' zjanoxe' to arpa

na' to barser de oro gan' chey yal, na' yalen' zejen xtiža' be'ne' ca' zjanac lo na' Diosen', dižan' chesoe'lene' le' caten' chosol giüize'ne'. ⁹ Nach be'ne' ca' gosole' to da' cobe dan' ža:

Zaco' jaži'o yišen' cont gwzašon' na' gwzoxjo' seyw ca' nyišen',
le bnežjw cuino' gosote' le'.

Blalj xcheno' cont bnitlaguo' xtoła'to',
na' gwxi'o neto' cont nacto' lo na' Dios,
neto' nacto' be'ne' to to naciön, to to yež, to to diaža na' chacto' gwde gwdele
diža' da' de lo yežlion'.

¹⁰ Na' gwlejo' neto' cont nacto' ca rey,
na' zoato' chonxento' Dios cheton' ca bxož,
na' žin ža nabia'to' lo yežlion'.

¹¹ Nach gwna'a na' ble'eda' be'ne' zan juisyw angl, neca gwzoeda' gwlabane'.
Zjzecha angl ca' cue'ej cuit ben' chi' chnabian' na' gan' že' be'ne' ca' tap na'
be'ne' blao ca' tapechoa. ¹² Na' benda' cheso'e dižan' zižje chesene':

Jesucriston' bnežjw cuine' neche xtoła' benachen',
na' da'nan' zaca'lebde' ca xila' daon' gosot be'ne' Israel cont gwnitlao
xtoła'gaque'.

Na' Jesucriston' zaca'cze' gonxenchone',
le chnabi'e doxen, na' yo'o lo ne'e yogo'te da' zjade.

Naque' be'ne' sina' gual, na' nape' yela' guac xen.

Cheyala' güe'chone' yela' bala'an,
na' güe'cho diža' naque' be'ne' zaca' juisyw.

¹³ Na' lecze benda' yogo' be'ne' že' yaban' na' yežlion' na' be'ne' že' latje che
bene' guat, na' bene' zjanita' lo nisdao', cheso'e diža' chesene':

Tołi tocañe chonxencho Dios ben' chi' chnabia'
na' Jesucriston' ben' zaca'lebde' ca xila' daon' gosot be'ne' Israel cont gwnitlao
xtoła'gaque'.

Zjanape' yela' bala'an, na' zjanaque' be'ne' zaca' juisyw,
na' zjanape' yela' guac xen juisyw tołi tocañe.

Na' benda' lecze can' gosena be chaš yežlion' na' be chaš le'e yaban' na' lo' nis,
na' len yogo' bichle da' zjade.

¹⁴ Nach be'ne' ca' tap ben' zjažia xil gosene':

—Ca'šcacze gac.

Na' be'ne' blao ca' tapechoa bosozoa xibgaque' gosonxene' Dios ben' zoa tołi
tocañe.

6

Seyw ca' gaže

¹ Ca nac seyw ca' gaže, ble'eda' cate' ben' zaca'lebde' ca xila' daon' be gosot
be'ne' gualaž cheto' neche xtoła'gaque' bzojje' seyw nechon'. Nach be'ne' ca'
tap zjažia xil, toe' gwne' zižje, ca zižjen' chašjw chtin yi' gwzio', gwne':

—Da, na' gwna' da' nga.

² Na' cate' gwna'a, ble'eda' to cabayw be šiš na' ben' žie' cože'ban' noxe' to
arcw. Ba bosozoe' to corona yichje' neche da' ba bene' gan lo gwdile, na'
na'a ba zeje' da' yoble cont tillene' nöchle be'ne' chesegue'ede' le' na' gone' gan
legaque'.

³ Na' ben' zaca'lebde' ca xila' dao' be gosot be'ne' gualaž cheto' neche
xtoła'gaque', cate' bzojje' seyw gwchope benda' gwne' yeto ben' žia xil, ben'
nac be'ne' gwchope, gwne':

—Da, na' gwna' da' nga.

⁴ Nach bchoj yeto cabayw, na' bena' nacba' be xna. Na' ben' žie' cože'ban' gwyo'o lo ne'e gone' cont bene' že' yežlion' bich yesenite' binlo len lježe' san yesot lježe'. Na' bosonežjue'ne' to spada xen.

⁵ Na' cate' ben' zaca'lebde' ca xila' daon' be gosot bene' gualaž čheto' neče xtoła'gaque' bzojje' seyw gwyone, benda' gwne bene' gwyone ben' žia xil, gwne':

—Da, na' gwna' da' nga.

Nach gwna'a na' ble'eda' to cabayw gasj na' ben' žie' cože'ban' noxe' to xigonz. ⁶ Na' benda' gwne to bene' do gan' že' bene' ca' tap ben' zjažia xil, gože' ben' žia cože' cabayw gasja', gwne':

—Gwey jažiai' trigw na' cebada cont yesaquen gwbin na' cont čhop ya trigw saca' laxjue' da' yesone' gan tža žin na' xop ya cebada saca' laxjue' da' yesone' gan tža žin, perw bi gono' cont cuiayi' set na' vino.

⁷ Na' cate' ben' zaca'lebde' ca xila' daon' be gosot bene' gualaž čheto' neče xtoła'gaque' bzojje' seyw gwdape, benda' gwne bene' gwdape ben' žia xil, gwne':

—Da, na' gwna' da' nga.

⁸ Nach gwna'a na' ble'eda' to cabayw be gaše, na' ben' žie' cože'ban' lie' Yela' Got. Na' yeto bene' zej cože', lie' Latje Gan' Že' Bene' Guat. Na' gosac lo na'gaque' bosoxie' gwdile gan' gosat bene' zan, na' gosone' cont gosat yezane' gwbin, na' gosone' cont yezan bene' gosate' len yižgüe', na' gosone' cont be znia gosotba' yezane', na' goc ca' lao to tlcw yežlion' dan' gosac lo ne'e.

⁹ Nach cate' ben' zaca'lebde' ca xila' daon' be gosot bene' gualaž čheto' neče xtoła'gaque' bzojje' seyw gayo', ble'eda' mes gan' bene' ca' že' yaban' chosozeye' bi dan' chosozeye' cate' chesonxene' Diosen' na' xni'a mesen' ble'eda' bene' ca' ba gosot yezica'chle bene' legaque' lagüe dan' bosozenague' xtiža' Diosen' na' lagüe dan' goso'e diža' gosene' chesejnilaže' Jesucriston'.

¹⁰ Na' bene' guat ca' gosene' zižje gosene':

—Xanto' Dios, le' naco' bene' laždao' xilaže' juisyw na' zoaczo' chono' con ca žo'. ¿Batcan' gono' yela' justis che bene' ca' že' yežlion' ben' gosot neto'? ¿Batcan' gono' cont yezezaca'zi'e da' bosolalje' xchenton'?

¹¹ Nach Diosen' bnežjue' to to bene' guat ca' tgüeje xagaque' da' šiš da' gosaze'. Na' gože' legaque' yesyezi'laže'che' yeto čhop ža šlac yezaza' bene' cheyała' yesat can' gosate' lagüe da' chesonxene' Criston', bene' zjanac ca biše' lježe'.

¹² Nach ben' zaca'lebde' ca xila' daon' be gosot bene' gualaž čheto' neče xtoła'gaque', cate' bzojje' seyw gwwope, gwna'a na' leca gwwo'. Na' gwbižen' beyaquen gasj ca lache' gasj da' chesaz bene' chesegüine', na' doxen bion' beyaquen xna ca chen. ¹³ Na' beljw ca' beseynjen besežinten lo yežlion' can' chynj no yixgüigw da' žia lo xyaguen cate' chechj to be' gual da' chtan len.

¹⁴ Nach le'e yaban' benittecczen ca to no yiš da' chedoblolen. Na' yogo' ya'a ca' na' no yežlio dao' da' ca' zjachi' lo' nisdaon' bososa' xišnan'. ¹⁵ Nach yogo'lol bene' že' yežlion', yogo' bene' ca' chesenabia' lo yežlion', yogo' xan soldadw, yogo' bene' blao bene' gwni'a, yogo' bene' cheson xšin bene' yoble ca beyixe', na' len yezica'chle bene', yogo'cze' bosocuaše' cuingaque' do xan bloj, do ladjo yej xen da' zjažia lo ya'a ca'. ¹⁶ Na' gosene':

—Che'šca bdiñj na' yej quinga na' ya'a quinga yesebixen yeseyenen chio' cont bi le'e Diosen' chio', Dios ben' chi' chnabia', na' yeseyenen chio' cont Jesucriston' ben' zaca'lebde' ca xila' daon' be gosot bene' neče xtoła'gaque' bi

gone' saca'zi'cho. ¹⁷ Le ba bžin ža gac juisyw, na' Diosen' len Jesucriston' leca cheseže'e chio' bi chonxencho legaque', na' nono soe da' yesone' saca'zi'cho.

7

Bene' Israel ca' bene' zjanyiše' seyw che Diosen'

¹ Gwdena' ble'eda' tap angl zjazeche' tap squin che yežlion' bosozague' ben' cont bi gwyečhen lo yežlion', lo nisaon' o gan' ze yag ca'. ² Na' ble'eda' yeto angl bene' za' gan' chla' gwbiž na' noxe' to da' gwčhine' gwčhiše'de' seyw che Dios loxga bene' ca' chesonxen le', Dios bene' zoa toli tocanē. Na' anglen' gwne' zižje bol giūže' angl ca' tap ben' zjanac lo ne'e yesone' gac yela' zi' lo yežlion' len lo nisaon'. ³ Gože' legaque':

—Bi gwžiaiyl' le yežlion', ne nisaon', ne yag ca' šlac biṇa' gwčhiša' seyw che Dios checho loxga bene' ca' chesonxen le'.

⁴ Na' benda' gwne' bał bene' bčhiše' seyon' bene' za'ac lo yogo' diaža che bene' Israel, na' yogüe' gosac to gayoa tapeyon mile'. ⁵ Šižinw mile' za'aque' lo diaža che da' Judá, šižinw mile' lo diaža che da' Rubén, šižinw mile' lo diaža che da' Gad, ⁶ na' šižinw mile' lo diaža che da' Aser, šižinw mile' lo diaža che da' Neftalí, šižinw mile' lo diaža che da' Manasés, ⁷ na' šižinw mile' lo diaža che da' Simeón, šižinw mile' lo diaža che da' Leví, šižinw mile' lo diaža che da' Isacar, ⁸ šižinw mile' lo diaža che da' Zabulón, šižinw mile' lo diaža che da' José na' šižinw mile' lo diaža che da' Benjamín.

Bene' zan zjanyaze' lache' šiš

⁹ Na' gwdena' gwṇa'a da' yoble na' ble'eda' zjaze bene' zan lao Diosen' gan' chi'e chnabi'e na' lao ben' zaca'lebde' ca' xila' daon' be gosot bene' Israel neče xtola'gaque'. Na' nono goc yosolab bał bene' že', le gosaque' bene' zan juisyw, bene' to to nación, to to yež, to to diaža, na' gosaque' bene' chesac gwde gwdele diža' da' de lo yežlion'. Na' yogüe' zjanyaze' lache' šiš na' zjanoxe' zin. ¹⁰ Na' chesyebede' bososye'e gosene':

Xanto' Dios ben' chi' chnabia' na' Jesucristw ben' zaca'lebde' ca' xila' daon' be gosot bene' Israel neče xtola'gaque', legaque' ba gosone' yela' mban checho toli tocanē.

¹¹ Nach yogo'lol angl ca' zjaze' cue'ej cuite' gan' chi'e chnabi'e, na' bene' blao ca' tapechoa na' bene' ca' tap zjažia xil, yogo'lolē' jasechaze' cosčo'ale lo yon' gosonxene' Diosen', ¹² gosene':

Chac can' cheyala' gac, Dios cheto'.

Zaca'czo' gonxento' le' toli tocanē,

le naco' bene' zaca' juisyw,

naco' la'zelagüe bene' sina',

zaco' güe'to' yela' choxclen chio' na' güe'to' yela' bala'an chio' toli tocanē,

chnabi'o doxen, na' napo' la'zelagüe yela' guac xen.

Can' nacczen.

¹³ Nach to bene' blao ben' nac txen len bene' tapechoa ca' gože'nda':

—¿Nezdo' no zjanac bene' quinga zjanyaz lache' šiš na' ga za'aque'?

¹⁴ Na' boži'an goša'ne':

—Le' nezdo' bene' gole, bi nezda' neda'.

Nach gože' neda':

—Bene' quinga ba gosale'de' da' ba gosac chegaque' yežlion'. Na' bač gwnitlao xtola'gaque' na' ba zjanyaze' lache' šiš, le chesejnilaže' Jesucristw ben' blalj xčhene' ca' xila' dao' be gosot bene' Israel cont beži'xen Diosen' xtola'gaque'. ¹⁵ Da'n'an' nite' lao Diosen' gan' chi'e chnabi'en chesonxene'

le' do ža do yel. Na' Dios ben' chi' chnabi'e zoe' chape' legaque'. ¹⁶ Bich yesebil yesedone', na' gwbižen' bich gwzeyen legaque', neca yesacde' zeye'. ¹⁷ Le Jesucristw ben' zaca'lebde' ca xila' daon' ben' gosot bene' Israel neche xtola'gaque', len' chgüia chne'e legaque'. Ze' lao Diosen' gachol gan' chi'e chnabi'e na' gone' cont nita'chgüe' mbalaz. Gone' cont bich yesebeže' neca yesegüine'de'.

8

Seyw gažen'

¹ Gwde gože' neda' ca', nach Jesucristw ben' zaca'lebde' ca xila' daon' be gosot bene' gualaž cheton' bzojxe' seyw gaže da' nyiše' yiša', na' cate' bzojxen' gocži yaban' do gašj hor. ² Na' ble'eda' gaže angl ca' zjazeche' lao Diosen', na' bnežjue' legaque' tgüje trompeta. ³ Na' yeto angl bedeseche' cho'a mes de oro da' zoa lao Diosen' gan' chi'e chnabi'e, mesen' gan' bene' ca' že' yaban' chosozeye' bi da' chosozeye' cate' chesonxene' Diosen'. Na' angla' noxe' to barser de oro gan' yo'o da' zcha'o yal na' bžien' lo yi' ya'alj da' žia lo mesen'. Anglen' bene' ca' cont naquen txen len š'i bene' ca' chesonxene' Diosen' bate'teze chosol güiže'ne'. ⁴ Nach gwyas žen che yala' noxe' anglen' gwloen lao Diosen' len xtiža' bene' ca' chesonxene' le'. ⁵ Nach anglen' gwxi'e ya'alj da' žia lo mesen' gwlo'en lo' barseren' na' bzalen' lo yežlion' na' gošj gwtinchgua, na' goc bichle sšag, gwyep yes na' gwxo'.

Trompeta ca'

⁶ Nach angl ca' gaže ben' zjanoxe' trompeta ca' bosozoan' cho'agaque' cont yosocuežen'.

⁷ Angl nechon' bcuež trompeta chen', na' gwche'chgua yej lo yežlion' na' nchixen yi' na' chen. Na' da' zcha'o yežlion' gwžiai'i, yelate'ze ca goc gašje yo da' de lo yežlion' gwyeyen, lente yag da' ze lagüen goseyen, na' lecze yeto ca'ate' yiže' ga' da' de lo yežlion' goseyen.

⁸ Nach angl gwchope bcuež trompeta chen', na' to da' nac ca to ya'a xen blažon' lo' nisdaon' čala'ninen. Na' yelate'ze ca goc gašje nisdaon' beyaquen chen. ⁹ Na' yelate'ze ca goc gašje be ca' že' lo' nisdaon' gosatba', na' leze yeto ca'te' barcw ca' čaš lo nisen' gosebiayin'.

¹⁰ Nach angl gwyone bcuež trompeta chen' na' to beljw xen blažon' le'e yaba čala'ninen ca to yi' yech. Jago'onen lo da' zan yegw na' da' zan ga chal nis lo yežlion', yelate'ze ca goc gašje yegw ca' na' ga chal nis dan' zjade yežlion' gan' jago'onenna'. ¹¹ Na' beljon' nzin' Da' Zla', na' nisen' gan' jago'onenna' beyaquen zla' na' bene' zan gosat dan' gose'eje' nisen'.

¹² Nach angl gwdape bcuež trompeta chen' na' yelate'ze ca goc gašje gwbižen' gwžiai'in', lecze yeto ca'te' bion' gwžiai'in' na' lecze yelate'ze ca goc gašje beljw ca' gosebiayin'. Na' da' ca' gosebiayin' bich bososenin'. Da'nan' gwdena' goc chol yelate'ze ca goc gašj ža gašj yel, na goc ca' yogo' ža yogo' yel.

¹³ Nach gwna'a na' ble'eda' chda lo be' to angl do gachol le'e yaban' na' benda' gwne' zižje, gwne':

—iNyaše'chgua yesac che bene' ca' že' yežlion' yeyož yosocuež angl ca' yešone trompeta čhegaquen'!

9

¹ Nach angl bene' gayo' bcuež trompeta chen' na' ble'eda' to beljw da' blažon' le'e yaban' jago'onen lo yežlion'. Na' beljon' goquen ca to bene' na'

guaža', da' chesone' da' yela' zto' len cuerp čhegaquen', na' da' chesebane' da' de čhe bene'.

10

Angl bene' noxe' yiš dao' ndobyoyen

¹ Nach ble'eda' yeto angl gual gwze'e yaban' betje' lo yežlion'. To bejw nyečhen le' na' zoa to pita' yičhen'. Cho'alagüen' chna'titen ca gwbiž, na' yeni'e ca' ble'edan' zjanaquen ca bdope da' čala'nin. ² Anglen' noxe' to yiš dao' da' ba beyašen. Na' bzoa šla'a ni'e licha lo nisdaon' na' yešla'an bzoe' lo yežlion'. ³ Na' bosye'e zižje ca zižje chosya'a be nzi' león. Na' cate' bosye'e gwne gwzio' gaž ni'a na' to to gwzion' zoa da' gosenan. ⁴ Beyož goc ca' na' ba zoa gwzjoja' diža' da' benda' šlac gwne gwzion' cate' to bene' zoa yaba gože'nda':

—Bi gwzjoja' dižan' bendo' šlac gwne gwzion', san gwdapen lo' yičhlažda'oguo'.

⁵ Nach angl ben' zoa šla'a ni'en lo nisdaon' na' yešla'an lo yežlion' gwlis ne'e ličan' yabale. ⁶ Na' gwlo'e da' baļi gac can' ža Dios ben' zoa toļi tocaņe, ben' ben le'e yaba len yogo'te da' chle'echo le'enņa', bene' yežlion', beņach, beyixe', na' bite'tezehle da' de lo yežlion', na' bene' nisdaon' len be ca' na' da' ca' že' lo'enņa'. Gwne':

—Bich cuez Diosen' gone' can' ba nžie' bia' gone'. ⁷ San cate' žin ža gwcuež angl gažen' trompeta čhen', cana'ch gac da' nžia Diosen' bia' gac, can' ba gože' bene' ca' goso'e xtižen', da' nono gwneze cani'.

⁸ Nach da' yoble ben' zoa yaban' ben' ba benczeda' gwnie' neda', gwne':

—Gwey jaži' yiš dao' dan' ba beyaš dan' noxe' angl ben' zecha zoa šla'a ni'en lo nisdaon' na' yešla'an lo yežlion'.

⁹ Da'nan' gwy'a a gan' zoa anglen' jaņaba' yišen'. Na' anglen' gože'nda':

—Bexon' gwdagon'. Lo' cho'on gacdon' ziž ca šina' beser, perw lo' li'on yeyaquen zla'.

¹⁰ Nach bexoa' yišen' noxe' anglen' gwdaguan'. Na' lo' cho'an goquen ziž ca šina' beser, perw cate' bedaguan' beyaquen zla' lo' li'an. ¹¹ Nach anglen' gože' neda':

—Da' yoble cheyala' go'o xtiža' Diosen' na' nao' can' gac čhe zan yež, čhe zan nación, čhe bene' chesac gwde gwdele diža' da' de yežlion', na' čhe zan bene' gwnabia'.

11

Čhope bene' goso'e xtiža' Diosen'

¹ Nach anglen' bene' neda' to ya ca nac da' chosočhine' cate' chosočixe' yo'o, na' gože'nda':

—Gwey jachixe yodao' blao na' mes gan' chosozeye' bi da' chosozeye' cate' chesonxene' Diosen', na' gwlabo' baļ bene' že' chesonxene' le'. ² Perw bi gwchixo' chyo'on, le ba naquen lo na' bene' bi zjanac bene' Israel bene' bi chesejniža'e Diosen' cont yesone' nacteze chesačlaže' lo ciuda čhe Dios lao čhopeyon bio'. ³ Na' sela' čhope bene' yeso'e xtiža', na' yesaze' lache' gasj ca to bene' čhegiüne' na' yeseyixjue'ede' xtižan' lao to mil čop gayoa gayon ža.

⁴ Bene' ca' čhope zjazaca'lebe' ca yag olivos ca' čhope na' ca candelar ca' čhope da' zjazoa lao Diosen' ben' nac Xan yežlio. ⁵ Na' še no čhačlaže' gonxi'e legaue', choj yi' cho'a bene' ca' yeso'e xtižan' na' gwzeyen bene' čhue'ede' legaue'. Can' gac yesat note'teze bene' čhende' gonxi'e bene' ca' čhope. ⁶ Na'

bene' ca' yeseyixjue'ede' xtižan', gac lo' na'gaque' yesone' cont bi gac yejw šlac yeso'e xtižan', na' gac lo' na'gaque' yesone' cont nisen' yeyaquen chen, na' bate'teze yesaclaže', yesone' gac bite'tezechle da' yesežaglaō bene' že' yežlion'. ⁷ Perw cate' yeyož yeso'e xtižan', nach choj lo' gabil gan' nac yechw zitjwchgua to bež xigüe' nizba' legaque' na' gotteba' legaque'. ⁸ Na' bene' ca' že'na' yosyocua'ane' cuerp chegaquen' gan' chesetolen la cay che ciuda blaon' gan' gosote' Xancho Jesucriston'. Ciudadan' zaca'leben ca ciuda Sodoma na' ca nación Egipto. ⁹ Na' šone ža yo gašje bene' za'ac zan yež na' zan nación, bene' zjanac zan diaža, bene' chesac gwde gwdele diža' da' de lo yežlion', yesene'e bene' guat ca' na' bi yeso'e latje yesegaše'. ¹⁰ Bene' ca' že' yežlion' yesyebede' da' gosat bene' ca' čhope, na' yosonežjo lježe' bi da' yosonežjo lježe' da' chesyebede' dan' bich nita' bene' ca' yeso'e xtiža' Diosen' len legaque', le leca zed chesacden'. ¹¹ Na' ble'edaogüeda' gwde šone ža yogašje Diosen' bosbane' bene' ca' čhope na' gosezeche' da' yoble. Na' yogo' bene' besele'e legaque' besežebchgüe'. ¹² Nach bene' ca' gosoe' xtiža' Diosen' gosende' gož Diosen' legaque' zižje:

—Le yeda, le yeyep nga.

Nach bene' ca' chesegue'e legaque' besele'ede' besyeyepe' yaban' to lo' bejw. ¹³ Šlac chesyeyepen' leca gwxo' na' gwžiai' late' ciudadan', na' gaže mil bene' gosat caten' gwxon'. Na' bene' ca' besyega'an besežebchgüe' na' gosonxene' Dios ben' zoa yaba.

¹⁴ Ba gwde yela' zi' gwchopen' na' za' gac da' gwyone.

Can' goc cate' angl gaže bcueže' trompeta čhen'

¹⁵ Nach angl bene' gažen' bcuež trompeta čhen' na' benda' ba| bene' ca' že' yaban' gosene' zižje, gosene':

Doxen yela' čhnabia' che yežlion'

bač naquen lo' na' Xancho Diosen' na' lo' na' Cristo ben' gwleje' cont čhnabi'e. Na' Diosen' zoacze' čhnabi'e toli tocaṇe.

¹⁶ Nach bene' blao ca' tapechoa ben' zjachi' cue'ej cuit Diosen', jasechaze' coščo'ale lo' yon' gosonxene' Diosen', ¹⁷ gosene':

Chonto' yela' choxclen čhio' Xanto',
le naco' Dios ben' nap yela' guac xen.

Ba zoaczo' cate' biṇa' xe yežlion',
na' soaczo' toli tocaṇe.

Na' ba gwzolaō čhnabi'o len yela' guac xen čhion' cont gac can' chazlažo' doxen.

¹⁸ Bene' nación ca' že' yežlion' beseže'e le',
perw ba bžin ža gono' yesezaca'zi'e.

Ba bžin ža čhoglaguo' che yogo' bene' ca' ba gosat še noe' nap do|a'.

Na' gono' cont bene' güen xšino' ca' bene' ca' goso'e xtižon' yesenite' mbalaz,
len yogo' bene' gwlejo' cont zjanaque' lo' nao', bene' gosonxen le'.

Con yogo' bene' gosonxen le' yesenite' mba, bene' gole len bene' xcuide'.

Lece ba bžin ža yesebiayi' bene' ca' bosožiai' ljež benače' yežlion'.

¹⁹ Nach byaljo gan' chesonxene' Diosen' yaban' na' ble'eda' caj gan' že' yej ca' gan' nyoj da' ca' gož Diosen' bene' Israel gualaž čheto' ca' yesone' cont gaclene' legaque'. Na' šlac gwṇa'a, gwyep yes, gocchgua sšag, gošj gwtin, gwxo' na' gwche'chgua yej.

12

No'olen' na' beļ be zoa gaž yichj

¹ Na' ble'edaogüeda' to da' yebanchgüecho le'e yaban', ble'eda' to no'ole na' nyaze' gwbižen' ca xe'. Nleje' lo bion' na' zoa to corona yichje' da' žian šžiņw beljw. ² No'olen' no'e bdao' na' chosye'e, le chaque' bes che yela' sanna'. ³ Na' ble'eda' yeto da' zaca' yebanecho le'e yaban', ble'eda' Satanás dan' chnabia' da' xigüe' ca', ba naquen ca to beļ be žia gaž yichj, be xen juisyw. Nacba' be xna na' žia ši lozba' na' zoa tgüeje corona to to yichjban'. ⁴ Na' bta xbamban' cont bchinjen zan beljw ca' žia le'e yaban' na' beselažon' lo yežlion', yelate'ze ca goc gašje beljw ca' zjažia le'e yaban' bchinj xbamban'. Na' gwlezba' xni'a no'olen' ba zoa sanna' cont yebba' bdao' chen' cate' sane'be'. ⁵ Nach no'olna' gwxane' to bi' byo bi' nabia' nación ca' na' žan ca žan yosozenague' chebe'. Nach Diosen' beyo'ebe' gan' chi'e chnabi'e. ⁶ Nach no'olen' boxonjde' belen', na' gwyeje' to latje daš da' benšagüe' Diosen' che', gan' yeso'ene' da' ye'ej gagüe' lao to mil chop gayoa gayon ža.

⁷ Gwde na' goc to gwdile yaban', le angl blao ben' le' Miguel na' soldadw che' ca' gosediłlene' beļ ben' žia gaž yichj lencze angl che belen' beņe' ca' besyeyac da' xigüe'. ⁸ Na' belen' len da' xigüe' ca' bi' gosezoen angl ben' zjanac beņe' che Dios, na' bich bi latje gota' che belen' yaba, neca che da' xigüe' ca' zjanac leba' txen. ⁹ Angl che Diosen' bosozale'ba' lo yežlion'. Na' lecze bosozale' da' xigüe' ca' lo yežlion'. Belnan' ben' zoa ža gwlaste nacba' gwxiye' na' leba' Satanás, na' ne' zoaczba' na'a chziye'ba' yogo' beņach.

¹⁰ Nach benda' to beņe' zoa yaban' gwņe' zižje gwne':

—Bač bžin ža ben Dios chechon' cont beņe' ca' chesejnilaže'ne' zjanite' len le'. Bač bžin ža nacbia' Dios chechon' nape' yela' guac xen. Ba bžin ža chnabi'e cont gac con da' cheyala'cze gac. Na' ba bžin ža Criston' ben' gwleje' cont nabi'e bač chnabia'lene' le'. Gac da' cheyala'cze gac, le Satanás dan' ba gwzoo lao Diosen' do ža do yel bcuišen beņe' chesejnilaže' Criston', bač besyebejen'.

¹¹ Na' beņe' gosejnilaže' Criston' na' ba gosate', gosezoede' bi' bosozenague' che Satanásen', le gosejle' e Jesucriston' blalj xchene' neče xtoła'gague' na' goso'e diža' chesejnilaže'ne'. Beņe' ca' ba gosat gosache'ede' yejni'a yesate' clel ca yesebejyichje' Jesucriston'. ¹² Yaban' cheyala' gosya'an yela' chebe chen, na' le'e že'le gan' zoa Diosen' cheyala' yebele, perw nyaše'chgua gac che le'e zoale lo yežlion' na' lo' nisdaon', le Satanás dan' chnabia' da' xigüe' ca' ba betjen gan' zoalen' chaclocchguan, le nezen yešložga de latj chen.

¹³ Nach cate' belen' gocbe'eba' bosozale'ba' lo yežlion', blagsesba' no'olen' gwxan bi' byo daon'. ¹⁴ Perw Diosen' bnežjue' chop xile' da' xen ca xil bsiadao' cont gwyeje' latje daš gan' bi' goc žin belen', latje gan' benšagüe' che' gan' yeso'ene' da' ye'ej gagüe' šon iz yo gašje. ¹⁵ Na' bchoj nis zil cho'a belen' goquen to yegw cont bžinen gan' zoa no'olen' na' guan' le'. ¹⁶ Perw Diosen' bene' cont yežlion' goclenen no'olen', byaljon güe'ejen nis dan' bchoj cho'a belen'. ¹⁷ Nach belen' blocchguaba' no'olen' na' gwyejba' jatillemba' yezica'chle xi'ine' da' chosozenague' che Diosen', chesone' con da' že' na' zjanita'čače' chesejnilaže' xtiža' Jesucriston'.

13

Chope bež xigüe' be ble'e Juan

¹ Na' gwzia' cho'a nisdaon' na' ble'eda' bchoj to bež xigüe' lo' nisdaon'. Bežen' nita' gaž yichjba' na' žia ši lozba' na' žia tğüje corona lao to to lozban'. Na' to to yichjban' nyoj to laba' da' chlo'en chon cuimba' ca Dios. ² Ble'eda' bežen' nacba' ca to tigr; perw ni'ana'ban' zjanaquen ca ni'a na' oso na' cho'aban' naquen ca cho'a león. Nach beļ ben' žia gaž yichj bnežjwba' bežen' yela' guac na' yela' chnabia' cheban' cont gwnabia'ba' na' cont gosenita' beñach bosozenague' cheba'. ³ Ble'eda' to yichj bežen' nacchguan güe', ca to da' gatlemba', perw beyacba'. Na' yogo'loļ beñach besyebande' dan' beyacban' na' bosozenague' cheba'. ⁴ Yogo'ze beñe' gosonxene' beļen' dan' bemba' cont gwnabia' bež xigüen', na' lecze gosonxene' bež xigüen', gosene':

—Nono zoa beñe' nap yela' chnabia' xen ca bež nga, na' nono zoa beñe' soede' tiļlene'ba'.

⁵ Lecze nono bžon gwna bežen' zaca'chba' ca Dios, na' gwnaba' yela' ya' che Diosen'. Na' goc lo na' bežen' gwnabia'ba' chopeyon bio'. ⁶ Na' gwnechguaba' yela' ya' che Diosen' na' che yaba gan' zoe' na' len che yezica'chle beñe' ca' že' yaban'. ⁷ Na' gwyo'o lo na' bežen' gwđillemba' bene' ca' gosejnilaže' Diosen' na' bi gosezoede'ba'. Bibi goc yesone' cont yesyechoje' lo na'ba'. Gwnabia'ba' yogo' gosiación, yogo' yež, yogo' diaža na' beñe' chesac gwdele diža' da' de lo yežlion'. ⁸ Na' yogo' beñe' že' yežlion' beñe' bi zjanyoj lagaque' le'e libr che Jesucriston', gosonxene' bežen'. Le cate' gwxcete yežlion' Jesucriston' bzoje' le'e libr che' la yogo' bene' nezde' gata' yela' mban chegaque' toli tocañe, Jesucristw ben' zaca'lebde' ca xila' dao' be gosot beñe' gualaza' cheto' neche xtołagaque'.

⁹ Note'tez le'e žia nagle da' chene, le gwzenag da' nga nia' le'e. ¹⁰ Beñe' yeseyixjue' ljež beñache' ližya, decze de ližya yesata' legaque'. Na' beñe' yesot ljež beñache' len spada, decze de gac chegaque' ca'. Da'n'an' chonen byen soachach chio' ba gwlej Diosen' cont naccho lo ne'e, gwyo gwchejcho len bi da' gac checho na' soachachcho šejnilaže'chone'.

¹¹ Gwdena' ble'eda' yeto bež xigüen' be bchoj lo' yo. Na' žia chop lozba' da' nac ca loz xila', perw be'ba' diža' can' choe' beļ ben' žia gaž yichjen' diža'. ¹² Na' bež nechon' bemba' cont bež gwchopen' gwnabia'ba' par leba' na' bež gwchopen' bemba' cont yogo' beñe' že' yežlion' gosonxene' bež nechon' ben' beyaque len güe' dan' naquen ze da' got leba'. ¹³ Na' bež gwchopen' bemba' zan da' bebanchgüe beñe' len yela' guac cheban', na' bemba' cont besele'ede' yi' le'e yaban' na' beselažon' lo yežlion'. ¹⁴ Na' da' bemba' da' ca' gan' zoa bež nechon', gwziye'ba' beñe' že' yežlion' cont bosozenague' cheba'. Nach bemba' mandadw gosone' to l gua'a lsaca' da' nac ca bež nechon' da' gosonxene', bež ben' goc yichjban' güe' len spada, güe' da' naquen ze da' got leba' perw beyacba'. ¹⁵ Na' goc lo na' bež gwchopen' bemba' cont l gua'a lsacan' gwyo'on biš grasyw. Na' goc gwñen, benen mandadw gosote' yogo' beñe' bi gosonxenen'. ¹⁶ Na' bež gwchopen' lecze bemba' byen gosezoa yogo' beñe' señw che bežen' le'e na'gaque' liča o loxgagaque', beñe' gole len bi' bixjw, na' beñe' gwñi'a len beñe' yaše', na' beñe' cheson xšin beñe' yoble ca beyixe' len yezica'chle beñe'. ¹⁷ Na' note'teze beñe' še bi zoe' señw che bežen' o laba' o número da' zejen laba', bi goc bi si'e neca goc bi gote'. ¹⁸ Chyažjecho yela' sina' cont šejni'icho da' nga. Beñe' chejni' i guac gwlabē' número cheban', le naquen número da' chchin beñach, na' número cheban' naquen xop gayoa gayon xop.

14

Da' gosol bene' ca' to gayoa tapeyon mil gosonxene' Diosen'

¹ Na' gwña'a na' ble'eda' Jesucristw ben' zaca'lebde' ca xila' dao' be gosot bene' gualaž cheto' neche xtoła'gaquen', zeche' lo ya'a Sión len to gayoa tapeyon mil bene' yoble. Na' zjanyoj la Jesucriston' len la Xē' Diosen' loxgagaque'. ² Na' benda' chesol bene' zan bene' ze' yaban'. Nenen ca chsiž ga zjadechgua yegw zan na' ca nen cate' chašw chtin. Na' nenen ca nen cate' bene' zan chosogole' arpan' to ši'ize. ³ Na' gosole' to da' cobe lao Diosen' na' lao bene' ca' tap zjažia xil na' lao bene' blao ca' tapechoa gan' chi' Diosen' chnabi'e. Noch no bene' yoble goc gol len, con bene' ca' to gayoa tapeyon mil na'ze gosac bososedē' dan' gosolen' cont gosonxene' Diosen', legacze' bebej Criston' lo na' Satanásen' šlac ne' nite' yežlion'. ⁴ Bene' ca' gosolen' zjanaque' bene' bi gosata'lene' no'ol bi nac xo'olgaque', na' gosapchgua cuingaque' cont gosac lažda'ogaquen' xilaže' len Diosen'. Na' zja'acteze' len Jesucriston' gate'teze zeje' chosozenague' che', le bebeje' legaque' lo na' Satanásen' cont zjanaque' lo ne'e na' lo na' Diosen'. Da'nān' zjazaca'lebde' ca to tlaw coseš da' bnežw bene' Israel gualaž cheto' ca' lo na' Diosen'. ⁵ Gwbat goso'e diža' güenlaže' na' bibi doła' zjanape' lao Diosen' ben' chi'e chnabi'e.

Da' gosena šone angl

⁶ Nach ble'eda' yeto angl le'e yaban' chde' lo be'. Na' gwdixjue'ede' diža' güen che Diosen' da' bi te chen len bene' ze' yežlion', len bene' zjanac to to nación, to to yež, to to diaža, na' bene' chesac gwde gwdele diža' da' de yežlion'. ⁷ Gwñe' zižje gože' legaque':

—Le žeb Diosen' na' le gonxene', le ba bžin hor gone' yela' justis che benach. Le gonxen Dios ben' ben yaban', yežlion', nisdāo' na' ga chal nis.

⁸ Yeto angl za' čožen' gwne':

—Bač bžin ža cuiayi' ciuda Babilonia da' nac da' blao. Bač bžin ža cuiayi' ciuda che bene' ca' bosozoe' Diosen' ca'ale na' gosebēde' da' nac yela' zto', le ba gosego'oyele' bene' ze' yogo' nación cont chesone' güedenag len Diosen'.

⁹ Nach yeto angl zej čože' bene' gwchopa' be'e diža' zižje gwne':

—Note'teze bene' chesonxen bež xigüen' len l gua'a lsaca' cheba' na' cheso'e latje chesezoa señw che beža' loxgagaque' o taca'gaque', ¹⁰ Diosen' ba nžie' bia' yesesaca'zi'chgua bene' ca'. Yesezaca'zi'e gan' chała' yi' len azufre lao angl che Diosen' na' lao ben' zaca'lebde' ca xila' dao' ben' gosot bene' Israel neche xtoła'gaque'. ¹¹ Tołi tocanē chas žen che yi' gan' yesezaca'zi'en. Na' bene' ca' chesonxen bežen' len l gua'a lsaca' cheban', na' bene' zjazoa señw che bežen' loxgagaque' o taca'gaque', bi gac yesyezi'laže' len da' yesezaca'zi'en ne chel ne lagüe ža. ¹² Da'nān' chonen byen soachach chio' ba gwlej Diosen' cont naccho lo ne'en, gwyo gwchējcho len bi da' chac checho, chio' chzenagcho che da' non Diosen' mandadw goncho na' bi chbejyichjcho dan' chejnilaže'cho Jesusen'.

¹³ Nach benda' to bene' zoa yaban' gwne':

—Bzōj da' nga: “Mbalaz bene' ca' ne' chesejnilaže' Xancho Jesucriston' žinte ža yesate'. Can' chac na'a na' can' gac bate'teze.”

Na' Spiritw che Diosen' žan:

—Da' li nite' mbalaz, le yesyezi'laže' len xšingaquen', na' gachbia' yogo' da' güen da' ba gosone'.

Yotob Diosen' bene' bi chosozenague' che' cont yesezaca'zi'e

¹⁴ Nach gwṇa'a da' yoble na' ble'eda' to bejw šiš le'e yaban' na' cože' bejon' chi' to beṇe' nac ca to beṇaḥ. Na' zoa to corona de oro yichjen' na' noxe' to da' nzi' hoz da' nḷachgua. ¹⁵ Na' yeto angl bchoj lo' gan' chesonxene' Diosen' yaban' na' gwṇe' zižje gože' ben' chi' cože' bejon':

—Ba bžin hor yotobo' coseš che uvas dan' de yežlion', le ba golen.

¹⁶ Nach ben' chi' cože' bejon' noxe' hoz botobe' cosešen'.

¹⁷ Nach bezchoj yeto angl lo' gan' chesonxene' Diosen' yaban' na' lecze noxe' yeto hoz da' nḷachgua. ¹⁸ Na' lecze bezchoj yetoe' ben' yo'o lo' ne'e yi' da' čala' lo' mes gan' chesonxene' Diosen'. Na' angl nga gwṇe' zižje boł güiže' angl gwchopa' ben' lecze noxe' hoz, gože'ne':

—Ba güe uvas da' žia lo' yežlion'. Bečhoguen len hoz čhion' dan' nḷachgua cont yotobchon.

¹⁹ Nach anglen' bečogue' uvas da' žia yežlion' len hoz dan' noxen' na' botoben' bzalen' to lo' ša' xen ga yesesien' cont choj xisen'. Zeje diža', Diosen' botobe' beṇe' ca' bi bosozenag che' na' gwlo'e legaque' ga yesezaca'zi'e. ²⁰ Na' gan' gosezaca'zi'en naquen cho'a ciudan', na' lo' ša' xen gan' gwlo'e uvasen' belalje chen zil da' nac xčhengaque', bežinen ca sibe to xčhega' cabayw, na' bžiljon šone gayoa mil metr.

15

Angl ca' zjayo'o lo' na'gaque' gaže yela' zi' da' zelao yesac

¹ Na' ble'eda' yeto da' leca zaca' yebanecho le'e yaban'. Ble'eda' gaže angl beṇe' zjanac lo' na'gaque' yesone' yegaže yela' zi' cont yeyož gwlo'e Diosen' can' chone' da' chloque' beṇe' ca' cheson da' xiṇj.

² Lecze ble'eda' to da' nac ca to nisdao' de vidrw da' nčhiṇen yi'. Na' cho'a nisdao'nzjzecha beṇe' ca' gosezoede' bi gosonxene' bežen' na' l' gua'a lsaca' dan' nac ca leba', na' bi goso'e latje yosozoe' legaque' seřw čeba' o número da' zejen laba'. Na' zjanoxe' tgüeje arpa da' bnežjw Diosen' legaque'. ³ Na' ble'eda' legaque' chesonxene' Diosen' chesole' to da' bsede da' Moisésen' beṇe' Israel gualaž čheto' ca', Moisés ben' ben xšin Diosen' cani'. Lecze chesole' da' naquen to da' bsede Jesucriston' legaque', Jesucristw ben' zaca'lebde' ca' xila' dao' be gosot beṇe' gualaž čheto' neče xtola'gaque'. Quinga žan:

Xanto' Dios, yogo' da' ba beno' len yela' guac xen čhio'

naquen da' güen juisyw na' da' zaca' yebanecho.

Yogo' da' chono' zejen to liča na' naquen da' zaca'.

Len' chnabi'o nación ca'.

⁴ Nono zoa beṇe' bi cheyała' žebe' le' Xanto', da' choṇo' castigw che da' malen'. Nono zoa beṇe' bi cheyała' gonxene' le'.

Tozo' le' naco' beṇe' laždao' xilaže' juisyw.

Na' bene' že' yogo' nación yeside' laguon' yesonxene' le',

le ba besele'ede' da' ba beno' na' zjanezde' zejzen to liča.

⁵ Gwde benda' da'na' nach gwṇa'a da' yoble na' ble'eda' byaljo gan' chesonxene' Diosen' yaban', latje gan' ngo'ošagüe' ley che Dios da' nyoj. ⁶ Na' ble'eda' gaž angl ca' zjayo'o lo' na'gaque' yesone' gac gaž yela' zi' lo' yežlion', besechoje' gan' chesonxene' Diosen' yaban'. Angl ca' zjanyaze' lache' šagüe' da' nac šiš xila' da' chactiten, na' to toe' nčhej cho'alčo'e to bant de oro.

⁷ Na' ble'eda' beṇe' ca' tap zjažia xil ben' nita' lao Diosen', na' toe' bnežjue' angl ca' gažen' tgüeje tas de oro da' zjanža'ten da' zjajožen da' chon cont chac yela' zi' ca' lo' yežlion', na' zejen Diosen' ben' zoa toli tocaṇe chlocchgüe'

da' cheson bene' bi chosozenag che'. ⁸ Na' doxen gan' chesonxene' Diosen' yaban' gwche'chguan ca žen che be'ni' da' nsa' Diosen' na' che yela' guac xen che'. Nono goc šo' gan' chacxen Diosen' šlac bina' yeyož yesac yela' zi' ca' gaž da' zjanac lo' na' gaž angl ca'.

16

Tas ca' gaže na' yela' zi' ca' gosac cate' bososcho'en

¹ Na' benda' gwne Diosen' zizjehgua, zoe' gan' chacxene', gože' angl ca' gaže: —Le šja'ac le šjalalj dan' yože lo' tas chelen' lo' yežlion', da' zejen leca chloca' da' xinj cheson bene' ca' bi chosozenag chia', na' gona' ga yesezaca'zi'chgüe'.

² Nach angl nechon' gwyeye' jalalje' da' yože lo' tas chen' lo' yežlion' gan' nac yo biž, na' yogo' bene' ca' zjazoa señw che bežen' na' chesonxene' l' gua'a lsaca' da' nac ca' leba', gosebije' güe' xen güe' zban na' goselachgüe'.

³ Nach angl gwchopen' jalalje' da' yože lo' tas chen' lo' nisaon' na' nisaon' beyaquen chen ca' chen che bene' guat, na' gosat yogo' be ca' že' lo' nisen'.

⁴ Nach angl gwyonen' jalalje' dan' yože lo' tas chen' lo' yegw ca' na' gate'ze chal nis na' lecze besyeyaquen chen. ⁵ Nach benda' gwne angl ben' chape' nisen' da' de lo' yežlion', gože' Diosen':

—Xanto' Dios, len' naco' bene' laždao' xilaže' juisyw. Ba zoaczo' le' cate' za' xe yežlion'. Zejczu' licha can' ba gwchoglaguo' chac da' quinga, ⁶ le bene' že' yežlion' ba gosote' bene' ca' gosote' xtižon' na' gosote' nochle bene' gosac lo' nao'. Da'nan' ba beno' cont yese'eje' chen neche da' bosolalje' xchen bene' ca'. Na' da' chac chegaque' naquen da' cheyala'cze gac.

⁷ Nach benda' gwne to bene' do cho'a mes gan' bene' ca' že' yaban' chosoz-eye' bi da' chosozeye' cate' chesonxene' Diosen', gwne':

—Xanto' Dios, len' napo' la'zelagüe yela' guac xen, chono' con can' žo' gono', na' chono' da' zej to licha cate' chchogbi'o che bene'.

⁸ Nach angl gwdapen' jalalje' dan' yože lo' tas chen' lo' gwbižen', na' gwbižen' bzeyen benach. ⁹ Yogüe' leca goseye', perw bi besyetiñjde' xtola'gaque' na' bi gosonxene' Diosen', con gosene' yela' ya' che Dios ben' be' latje goc da' ca' chesezaca'zi'e.

¹⁰ Nach angl gayon' jalalje' dan' yože lo' tas chen' gan' chi' bežen' chnabia'ba' na' beyac choł doxen gan' chnabia'ban'. Na' benachen' gosagwxejte lože'gaquen' catec gosesezaca'zi'e. ¹¹ Na' gosene' yela' ya' che Dios ben' zoa yaban' neche dan' chesezaca'zi'en na' neche güe' xen dan' zjažia lo' cuerp chegaquen', perw ne ca' bi besyetiñjde' che da' mal dan' gosonen'.

¹² Nach angl gwxopen' jalalje' dan' yože lo' tas chen' lo' yegw xen da' nzi' Eufrates, na' bebiž nis yegon' cont beyaquen to nez ga yesede bene' gwnabia' ca' za'ac do gan' chla' gwbiž.

¹³ Nach ble'eda' šone da' xigüe' da' zjanac ca' blož. Ton bchojen cho'a beł be zoa gaž yichj, yeton bchojen cho'a bež xigüen' na' yeton bchojen cho'a ben' cho'e diža' güenlaže' cont chesonxene' bežen'. ¹⁴ Na' da' xigüe' quinga gosonen yela' guac da' besyebane bene', na' jasetoben yogo' bene' gwnabia' ca' že' gate'teze lo' yežlion' cont yesediłlene' Dios ben' nap la'zelagüe yela' guac xen cate' žin ža gac ca'. ¹⁵ Na' benda' ben' nac Xi'in Dios gwne':

—Le gwzenag da' nga: ba zoa yida' da' yoble, yedexenyala' bene' bi chosozenag chia' can' chzenyal bene' gwban ga chjalane'. Mbalaz zjazoa note'teze bene' nita'teze' chesebeze' neda' cate' yida' na' chesezaquede' bibi da' mal chesone', le yesacde' zto' še bina' yesyetiñjde' xtola'gaquen' caten' yida', na' yogo'ze bene' yesacbe'ede' da' malen' ba gosonen' še ca'.

16 Nach bezle'eda' da' xigüe' ca' šone bosyotoben yogo' bene' gwnabia' ca' že' lo' yežlion' to latje ga nzi' Armagedón diža' hebreo.

17 Na' angl gažen' jalalje' dan' yože lo' tas chen' lo' be', na' benda' gwne Diosen' zižje, gan' zoe' chesonxene' le' yaban' gan' lecze chi'e chnabi'e, gwne' —Bač goc da' cheyla' gac.

18 Nach gwyep yes, goc sšag, na' gošj gwtin, na' leca gwxo'. Gwxo'ch ca ba goc bate'tezchle šlac že' beñačen' lo' yežlion'. 19 Na' ciuda da' nac la'zelagüe blaol yežlion' gwžiyain' bchojen šonle, na' lecze gosebiayi' yezica'chle ciuda da' zjachi' lo' yežlion'. Diosen' bich gwleze' bene' cont goseyi gosezaca'chgua bene' že' ciuda Babilonia che da' mal da' ba gosonteque', le blocchgüe' yela' mal čhegaquen'. 20 Na' catequen' gwxo' besyenittecze yogo' yež da' zjachi' lo' nisaon' na' yogo' ya'a ca'. 21 Na' gwche'chgua yej ži'a lo' yežlion', yej ži'i da' cha'a do tapa rob güeje beselažon' cože' bene'. Na' bene' že' yežlion' gosene' yela' ya' che Diosen' neče dan' besežaglaochgüe' len yej dan' gwchen'.

17

Diosen' be'e castigw che ciuda blaol da' zaca'lebe ca to no'ole žle'

1 Na' ca nac angl gaž ca' gosoxe' tas de oron', toe' bedenie' neda', gože'nda': —Da, gwlo'eda' le' can' gon Diosen' saca'zi' no'ole blaon' chi' lo' nisaon' ca', no'olen' nac no'ol žle'. 2 Yogo' bene' gwnabia' ca' že' yežlion' ba besyebede bosoznague' che' gualaz che Diosen', na' dan'nan' guac nacho zjanaque' xtoe'. Na' bene' že' yežlion' da' besyebchde' le' cdel ca Diosen', guac nacho gosezožde' da' ba gose'eje' vino da' bnežjue' legaque'.

3 Nach šlac ben Spiritw che Diosen' cont ble'edaogüeda' da' quinga, anglen' gwche'e neda' to latje daš. Na' bžina' na' ble'eda' to no'ole žia cože' bež xna be nac gaž yichjba' na' žia ši lozba'. Na' doxen cuerp cheban' nyoj diža' da' chžiaba' yela' ya' che Dios. 4 No'olen' nyaze' lache' da' nac moradw na' xna, na' non cuine' xdan len oro, len yej zaca' na' len perlas. Na' noxe' to tas de oro da' nža'ten yožen vino. Na' vinon' zejen chbede' chone' da' yela' zto' na' bichle da' chgue'e Dios. 5 Na' loxgue' nyoj diža' da' žan naquen' naque', diža' da' bi gosejni'i beñač, žan: "Naca' ciuda Babilonia na' nacchgua' blaol. Naca' no'ole žle', le chona' cont bene' že' yežlion' bi chesonxene' Diosen', na' chgo'oyela' legaque' cont chesone' da' zan da' chgue'e Diosen'." 6 Na' ble'eda' chože no'olen', le ba güe'eje' xchen bene' ca' zjanac lo' na' Diosen', bene' goso'e diža' chesežnilaže' Jesúsen', na' da' nacho güe'eje' xchengaque' zeje diža' betue' zane'. Na' cate' ble'eda' no'olen' leca bebanda'. 7 Nach gož anglen' neda':

—Bi yebando'. Gwzejni'ida' le' bi zejen dan' ble'edo' no'olen' žie' cože' bež be gaž yichjen' na' žia ši lozba'. 8 Bežen' ble'edo' gwzoaba' gwnabia'ba' šlož na' bich zoaba' na'a, perw yechojba' lo' yechw zitjwchgua dan' nac lo' gabilen' gan' yo'oba' na'a cont soaba' nabi'a'ba' yežlož, na' techle yeyo'oba' na' saca'zi'ba' toli tocañe. Cate' gwxe yežlion' Diosen' bzoje' la bene' ca' zjanape' yela' mban toli tocañe le'e libr chen'. Na' bene' ca' bi zjanyoj lagaque' le'e libr che Diosen' yesyebande' cate' yesele'ede' bežen' gwzoa, ben' bi zoa na'a perw soaba' da' yoble.

9 Čhyažjecho yela' sina' cont šejni'icho da' nga: da' gaž yichj bežen' zjanaquen gaž ya'a gan' chi' no'olen'. 10 Na' lecze zejen gaž bene' gwnabia'. Gayoe' ba gosenite' gosenabi'e na' ba gwnit yela' gwnabia' čhegaquen'. Toe' chnabi'e na'a na' ben' yeto bene' bzeben' za' yedenabi'e, na' cate' yide', šlože yedenabi'e. 11 Na' bež ben' gwzoa cana' perw bich zoaba' na'a, zejen yeto bene'

gwnabia', bene' xono'. Naque' to bene' ca' gaže gosenabi'e na' nabi'e da' yoble, perw Diosen' gone' cont cuiaye'e na' chi saque' toli tocanē.

¹² Na' lozba' ca' ši dan' ble'edo', zejen ši bene' gwnabia' bene' za' za'ac cont yesenabi'e. Na' gac lo na'gaque' yesenabi'e txen len bežen', perw šložze. ¹³ Na' yogo'te bene' ca' ši, toz ca' yesone' yesegüe'e lo na' bežen' yela' gwnabia' čhegaquen' na' bichle da' chac chesone' cont bežen' gacchba' blao. ¹⁴ Na' yesedilene' Jesucristw ben' zaca'lebde' ca' xila' dao' ben' gosot bene' gualaž četo' neče xtoła'gaque', na' Jesucriston' gone' gan lo gwdilen', le len' naque' Rey ben' chnabi'e yezica'chle rey, na' naque' Xancho ben' chnabi'e yezica'chle bene' gwnabia'. Na' bene' ca' yeson txen len Jesucriston' zjanaque' bene' ca' ba gwlež Diosen' cont zjanaque' xi'ine', bene' ca' nezde' yesenita'čače' yesejnilaže'ne' bite'teze da' gac.

¹⁵ Nach anglen' gože' neda', gwne':

—Nisdao' ca' ble'edo' gan' chi' no'ol zlen' zejen yesenita' bene' zan juisyw, bene' yež zan na' nación zan, bene' chesac gwde gwdele diža' da' de lo yežlion'.

¹⁶ Na' bežen' žia no'olen' cože'ban', ben' žia ši loz, gue'eba' no'olen' na' lecz ca' yeson lozba' ca' ši dan' zejen ši bene' gwnabia'. Na' yesaque' txen yeseqe'e da' de čhe no'olen' na' yosyocua'ane'ne' ga'alyide'. Tena' yesagüe' xpele' na' yosozeye' bi da' yega'an da' bi yesagüe'. ¹⁷ Le Diosen' gü'e' latje yesaque' txen yesone' yogo' da' ca' na bežen', na' yesone' yela' chnabia' čhegaque' lo na' bežen' cont yeyož gac yogo' dan' ba gwna Diosen'. ¹⁸ Na' no'olen' bač ble'edo', naque' ciuda blaochgua da' chnabian' bene' gwnabia' ca' že' doxen lo yežlion'.

18

Can' gac cate' cuiayi' ciuda Babilonian'

¹ Gwdena' ble'eda' yeto angl bene' gwza' yaban' betje' lo yežlion'. Goc lo ne'e yela' gwnabia' xen cont goc con can' gwne', na' gwyeni' lo yežlion' len be'ni' che' da' nse'e. ² Na' anglen' gwne' zizje, gwne':

—Ba bžin ža cuiayi' ciuda Babilonian' da' nac leca ciuda blao. Ba bžin ža yeyaquen xišna' da' xigüe' ca'. Na' ba bžin ža yeyaquen xišna' yogo'cze be zoa xil be chesegue'e be'nač. ³ Cuiayin', le bene' ca' že' ciudan' gosego'oyele' bene' že' yogo' nación cont bosozoe' Diosen' ca' ale bi gosonxene' le'. Na' bene' gwnabia' ca' že' yežlion' ba gosonchgüe' da' mal txen len bene' Babilonia ca' catequen' besyebede' gosone' da' yela' zto', na' bene' güen delgens ca' že' lo yežlion' ba gosaque' bene' gwni'a, le bene' Babilonia ca' gosonditjchgüede' dan' gota' čhegaque' gosezi'en.

⁴ Nach benda' gwne' yeto bene' zoa yaban', gwne':

—Le'e nacle xi'ina', le yechoj ciuda Babilonian' cont bi gonle da' mal txen len bene' ca' na' cont bi saca'zi'le txen len legaque', ⁵ le dechgua xtoła' bene' Babilonia ca', na' bich cuz Diosen' gwnežjue' castigw čhegaque'. ⁶ Yesezaca'zi'sque' lagüe dan' bosochi bososaque' bene', na' yesežaglaošque' da' xench ca dan' bosochi bososaque' bene' yoble. Gacšca čhegaque' castigw gualch ca da' gosone' che bene'. ⁷ Con can' gota'chgua da' šagüe' da' güen čhegaque' na' gosone' con bi da' žan čhegaque', chnablaža' gacchgua čhegaque' yela' yaše' yela' zi' cont yesyegüne'chgüede'. Bene' Babilonia ca' ba gosone' xbab lo' yichjlažda'ogaque' gosene': "Gwbat te yela' chnabia' četon'; gwbat soato' yela' güine', neto' že'to' ciuda blao nga." ⁸ Da'n'an' lo toze ža gac yogo' da' ca' gosacde' gwbat gac čhegaque'. Bene' zan yesat, bene' zan

yeseğüine'de', na' yesebil yesedone', na' yeseye' len yi'. Gac ca' che bene' že' ciuda Babilonian', le Xancho Diosen' nape' yela' guac xen cont gone' yezezaca'zi'e neche xtoła'gaque'.

⁹ Bene' gwnabia' ca' že' lo yežlion' bene' bosozenag che bene' Babilonia ca' cont bosozoe' Diosen' ca'ale na' gosone' bichle da' chgue'e Diosen', legaue' yesebeže' na' yeseğüine'de' cate' yesele'ede' žen da' chas cate' šey ciudan'. ¹⁰ Na' yesyega'aņe' zito'le yesene'e can' gac che bene' Babilonia ca', le yesežebchgüe'. Na' yesene':

—iNyaše'chgua chac che ciuda Babilonia nga da' nac blaoch ca yogo' ciuda! Ba chbiayi' ciuda da' gwnabia'ch lo yezica'chle ciuda da' zjachi' yežlion'. Ba bžin ža cuiayin' to ši'ize.

¹¹ Nach bene' güen delgens ca' že' yežlion'a yesebeže' na' yeseğüine'de' cate' cuiayi' ciudan', le noch no si' dan' yesoten'. ¹² Nono žel bene' si' da' yesote' da' nac de oro, de plata, de yej zaca', na' de perlas. Nono žel bene' si' lache' la'ay da' chesote' de lino, de sed, na' lache' moradw na' lache' xņa. Nono žel bene' si' da' yesote' da' nac de yag da' chļa' zix o de bichle yag zaque', de marfil, de ya na' de mármol. ¹³ Nono žel bene' si' canel, no set zix, no yal, no mirra, no perfume, no vino, no set yela' guagw, no yezj šiš, no trigw, no burr bžina', no xila', no cabayw, no carret, na' no beņach bene' yesote' ca beyixe'. ¹⁴ Na' bene' güen delgens ca' yesene' che ciudan':

—Ba gwde che yogo' da' zix ca' na' yogo' bichle da' ca' gosazlaže' bene' Babilonia ca' yesezi'e lo yela' gwņi'a chęgaquen'. Gwbatech yesezi'e da' ca'.

¹⁵ Na' bene' güen delgens ca' bene' gosote' da' ca' gosezi' bene' Babilonian', ben' gosata' yela' gwņi'a chęgaque' neche bene' Babilonia ca', yeseze' zito'le yesežebchgüe' che dan' chesežagłao bene' Babilonian'. Na' yesebeže' na' yeseğüine'de', ¹⁶ na' zižje yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Bene' gwže' ciudan' gosazchgüe' lache' šägüe' lache' zaque', no lache' moradw na' no lache' xņa. Gosonchgua cuingaque' xdan len oro, len yej zaca' da' chesactiten, na' len perlas. ¹⁷ Perw ņa'a zejzenez gwžiai' yogo' da' šägüe' chęgaquen'.

Yogo' xan barcw ca', yogo' bene' ca' chja'ac lo' barcw ca', len bene' ca' cheson žin lo' barcon' na' nochle bene' cheson žin lo' nisdaon', yogüe' yeseze zito'le yesene'e. ¹⁸ Na' yesele'ede' chas žen cate' šey ciudan' na' yesene':

—Biņa' gata' yeto ciuda yoble doxen lo yežlion' da' žinlaže' ca ciuda nga len yela' gwņi'a yela' šägüe' chen.

¹⁹ Na' yosožia yo bište yichjgaque' da' yesyegüine'de', na' yesebežyaše', yesene':

—iNyaše'chgua ba goc che ciuda nga da' gocch blao ca yezica'chle ciuda ca' zjachi' yežlion'! Neche yela' gwņi'a che bene' ca' gwže' lo ciudan' yogo' chio' bencho gan xen len žin da' bencho len barcw checho quinga. Na' ņa'a zejzenez gwžiai' ciudan'.

²⁰ Perw le'e že'le yaban', le yebe. Le'e gwseļa' Diosen' gocle postlw che', na' le'e gwsele' be'le xtizen', na' yezica'chle le'e zoale lo na' Diosen', le yebe. Le Diosen' ba gwchoglagüe' yesebiayi' bene' Babilonia ca' neche dan' bosochi bososaque' le'e.

²¹ Nach to angl gual bcose' to yej xen ca dan' chon žin gan' chi' molin xen, na' bzaļen' lo' nisdaon', gwne':

—Can' gac che ciuda Babilonian', yeniten can' benit yej xen dan' bzaļa' lo' nisdaon', na' gwbatech le'echon da' yoble. ²² Gwbatech yosogole' arpa lo

ciudan'; gwbatech yosocuež güecuež ca' no flauta no trompeta. Gwbatech žel bene' zjansed cont yesone' no xšinłaze' da' chosochine', neca yenecho sšag che bene' chesot len molin lo ciudan'.²³ Gwbatech le'echo be'ni' che lámpara, na' gwbatech yenecho bene' cheson lni che yela' güešagna'. Yesebiayi' bene' güen delgens che ciudan' bene' zjanac bene' blao lo yežlion', le bene' Babilonia ca' ba goseziye'e bene' že' yogo' nación len yela' güaža' chegaquen'.

²⁴ Bene' Babilonia ca' gosote' bene' goso'e xtiza' Diosen' na' nochle bene' gwlej Diosen' cont gosaque' lo ne'e, na' bene' ciuda nan' zjanape' doła' che yela' got che yezičhle bene' gosot bene' doxen lo yežlion'.

19

¹ Gwdena' benda' bene' zan juisyw bene' že' yaban' chesonxene' Diosen', na' nen zižje, chesene':

Bene' güen juisyw nac Dios chechon'.

Ba bene' cont chio' chejnilaže' chone' zoacho len le'.

Naque' bene' zaca' juisyw, na' nape' yela' guac xen.

² Zejčze' to liča na' chone' can' cheyala'cze gac dan' chchoglagüe' yesezaca'zi' bene' bi chosozenag che'.

Ba gwchoglagüe' cuiayi' ciuda xen da' zaca'lebe ca to no'ole zle',

le bene' lo ciudan' gosego'oyełe' bene' že' doxen lo yežlion'

cont bosozoe' Diosen' ca'ale bi gosonxene' le'.

Diosen' ba gwchoglagüe' cuiayi' laž bene' Babilonia ca',

le cheyala'cze yesezaca'zi'e da' gosote' bene' ca' gosonxen le'.

³ Nach da' yoble gosene':

—Bene' güen juisyw nac Diosen'. Tołi točane čhas žen gan' šey ciudan'.

⁴ Nach bene' blao ca' tapechoa na' bene' ca' tap bene' žia xil jasechaze' coscho'ale lo yon' gosonxene' Diosen' gan' chi'e chnabi'e, gosene':

—Can' cheyala' gac. Bene' güen juisyw nac Diosen'.

⁵ Na' benda' gwne to bene' do gan' chi' Diosen' chnabi'e, gwne':

Yogo' chio' naccho bene' güen xšin Diosen' cheyala' gonxenchone',

chio' chzenagcho che', chio' naccho bene' gole na' chio' naccho bene' xcuide' na' bi' bixjw.

Yela' güešagna' che ben' zaca'lebde' ca xila' daon' gosot bene' Israel neče xtoła'gaque'

⁶ Nach benda' be xne che bene' zan juisyw chesonxene' Diosen'. Na' xtiza'gaquen' nenen ca chac ga chziž yegon' cate' dechguan na' ca nen cate' leca čašjw chtin, chesene':

¡Bene' güen juisyw Xancho Diosen'!

Len' nape' la'zelagüe yela' guac xen na' len' chnabi'e.

⁷ Chebechgüecho na' zoachguacho mbalaz chonxenchone'.

Le ba bžin ža gac yela' güešagna' che ben' zaca'lebde' ca xila' dao' be gosot bene' Israel neče xtoła'gaque'.

Ba zoa no'olen' si'e gac xo'ole'.

⁸ Ba bnežjue'ne' lache' šagüe' da' nyaze', lache' šiš xila' juisyw.

Na' lache' šagüe' da' šiš xila' nyaze' zejen da' güen da' chon chio' ba gwlej Diosen' cont naccho lo ne'e.

⁹ Nach anglen' da' yoble gože'nda':

—Bzoi da' nga: "Mbalaz bene' ca' ba goxe' cont yesenite' cate' gac lni che yela' güešagna' che ben' zaca'lebde' ca xila' dao' be gosot bene' Israel neče xtoła'gaquen'."

Nach anglen' gwne':

—Diosen' gože' neda' dan' ba gwnia', na' naquen da' li.

¹⁰Nach bzoa xiba' cont gonxena' anglen', perw anglen' bi bene' latje, gwne':

—Bi gono' ca'. Neda' naca' con to bene' güen xšin Diosen' can' naco' le' na' bene' lježo' ca' bene' bi chesebejyichje' xtiža' Jesúsen' da' chesejle'e. Benxen Diosen'.

Na' note'teze bene' cheso'e diža' li che Jesúsen', zoa Spiritw che Diosen' chzejni'in leaque' cont cheso'e xtižen'.

Bene' žia cože' cabayw šiš

¹¹Nach ble'eda' yaban' ca to da' nyaljo, na' ble'eda' to cabayw šiš na' žia to bene' cože'ba'. Na' ben' žia cože'ban' zjansi'ene' Ben' Chon Con Can' Že' na' Cho'e Diža' Li. Zejczte' to licha can' chchoglagüe' saca'zi' bene' bi chosozenag che' na' can' chdillene' da' malen'. ¹²Na' ble'eda' yejlagüe' ca' chesactiten ca to yi' da' chala'nin, na' zjazoa zan corona yichje'. Na' ble'eda' nyoj yeto le' loxgwen' da' nombia' toze le'. ¹³Ble'eda' nyaze' to lache' da' dope chen, na' le' Xtiža' Dios. ¹⁴Na' ble'eda' bene' zan bene' zjanac soldadw che Diosen' zjana'ogüe'ne', zjanyaze' lache' šagüe' da' nac da' šiš na' da' naquen xilaže', na' to to bene' ca' zjažie' tgüeje cabayw šiš. ¹⁵Cho'a ben' le' Xtiža' Dios chchoj to spada da' nlachgua da' gwchine' chine' nación ca' bi chosozenag che'. Le nabi'e nación ca' na' žan ca žan yosozenague' che'. Na' gone' yezezaca'zi'chgua bene' ba goson da' malen', le Dios ben' nap la'zelagüe yela' guac xen chlocchgüe' can' ba gosonen'. ¹⁶Na' le'e xcamise' na' le'e xichje' nyoj diža' quinga žan: "Naca' Rey ben' chnabia' yezica'chle rey na' naca' Xan yezica'chle bene' gwnabia'."

¹⁷Nach ble'eda' to angl bene' zecha lo gwbižen', na' bosye'e bol güiže' yogo' cuen šod ca' chesaš le'e yaban', gože'ba':

—Le da, le yedobe nga gagwle to xše' xen da' gon Diosen' gagwle. ¹⁸Gata' xpela' bene' gwnabia', xpela' xan soldadw, xpela' no bene' gual. Gata' xpela' cabayw na' xpela' bene' gosebie'ba'. Gata' xpela' yogo' cuen bene', bene' gosac esclavos na' bene' bi gosac esclavos, bene' gosac bene' xcuide' na' bene' gosac bene' gole.

¹⁹Nach ble'eda' bež xigüe' nechon' len yogo' bene' gwnabia' ca' že' yežlion' na' soldadw chegaque' ca'. Ba besedobe' txen cont yesedillene' Jesús ben' žia cože' cabayw šišen' len soldadw che' ca'. ²⁰Na' bež nechon' gočba' lo na' Jesúsen'. Na' lecze ca' goc che bež xigüe' gwchope ben' choe' diža' güenlaže' na' bamba' yela' guac cont beňachen' bosozenague' che bež nechon', cont gosoxene' l' gua'a šaca' cheba' na' cont gosezo'e seňw cheba'. Chošteba' gosacba' lo na' Jesúsen', na' ca' zjambamba' bosozale'ba' lo' yi' gabil' gan' chala'nin azufre, yi' xen da' nac ca to nisdao'. ²¹Nach bene' ca' yezica'chle, Jesúsen' ben' žia cože' cabayw šišen' betue' leaque' len spada da' chchoj cho'en', na' yogo' šod ca' gosagwaxatba' xpela'gaquen'.

20

Can' gac lo to mil iz

¹Na' ble'eda' to angl bene' zoa yaban' betje' cont gwsaljue' yechw zitjwchgua dan' nac lo gabilen', na' noxe' to gden xen. ²Na' anglen' beřoxe' beł ben' zoa gaž yichj, be bla' da' nechw ža gwlaste. Leba' chnabia'ba' da' xigüe' ca' na' leba' Satanás. Anglen' bcheje'ba' gdenna' to mil iz. ³Nach beyož bcheje'ba', na' bzale'ba' lo' yechw gabilen' na' la' bseyjwrtie' cho'a yechon' na' bchišen' to seyw. Bene' ca' cont bich siye'ba' beňach šlac biņa' te to mil iz. Na'

cate' ba gwde to mil izen', cana'ch yeseže'ba' gdenṇa' cont yechojba' yešlož dao'.

⁴ Nach ble'eda' bene' ca' gwlo'o Diosen' lo na'gaque' gosone' yela' justis che beṇač zjachi'e gan' chesenabi'e. Na' lecze ble'eda' bene' bi gosonxene' bež xigüen' len l' gua'a lsaca' cheba' neca gos'o'e latje yosožoe' seṇw cheba' loxgagaque' o taca'gaque'. Gosenita'čače' gos'o'e diža' chesejnilaže' Jesüsen' na' goseyixjue'ede' xtiža' Diosen'. Da'nān' bene' ca' besegue'ede' Diosen' gosote' legaque' gosechogue' yengaque'. Perw Diosen' bene' cont besyebane' ladjo bene' guat ca', na' txen len Criston' gosenabi'e to mil iz. ⁵ Cate'ch ba goc to mil iz besyeban bene' ca' gosenita'čach gosejnilaže' Criston', ben' gosac bene' nechw besyebane' ladjo bene' guat ca', cana'ch yosbane' yezica'chle bene' guat. ⁶ Mbalaz nita' bene' ca' belis bosbane' ladjo bene' guat ca' da' nechw, bene' ba gwlej Diosen' cont zjanaque' lo ne'e. Bi yesac chegaque' can' gac che bene' ca' yesežaglägüe' neče xtoła'gaque' toli tocaṇe, da'nān' žacho yela' got gwchope. San yesenite' yesonxene' Diosen' na' yesonxene' Criston', na' da'nān' guac nacho yesaque' bṇoz. Legaque' yesenabi'e len Criston' to mil iz.

⁷ Na' cate' ba goc to mil izen', Diosen' güe'e latje yechoj Satanás dan' chnabia' da' xigüe' ca' lo' yechw zitjwchgua dan' nac lo gabil' gan' bseyjuen'. ⁸ Na' yechojen na' da' yoble siyen' bene' že' yogo' nación ca' že' lo yežlion'. Na' siyen' bene' ca' zjanzi' Gog na' Magog, gwtoben legaque' cont yesedillene' Criston', na' yesaque' bene' zan juisyw ca' yox da' chi' cho'a nisdāo' da' nono chac gwlab. ⁹ Nach ble'edagüe'da' bene' zan juisyw ca', gosa'aque' doxen lo yežlion', ja'aque' gan' chi' ciuda dan' chaque Diosen' gan' že' bene' ca' gwleje' cont zjanaque' lo ne'e. Na' cate' gosechje' ciudan', Diosen' bene' cont bchoj yi' le'e yaban' bzeyteccen legaque'. ¹⁰ Na' ca' nac Satanás dan' gwziye' bene' ca' že' yežlion', angl che Diosen' bosozalen' lo yi' gabil' gan' čala' azufre, yi' xen da' nac ca' to nisdāo' gan' ba bosozale' bež xigüe' nechon' na' bež xigüe' gwchopen' ben' be' diža' güenlaže' cont gosonxen beṇačhen' bež nechon'. Na' yesežaglaon do ža do yel toli tocaṇe.

Goc yela' justis che bene' ca' ba gosat

¹¹ Nach ble'eda' chi' Diosen' to lo siy xen da' nac da' šiš, chi'e chnabi'e. Na' chṇa'tie' yežlion' len da' ca' chle'echo le'e yaban' na' besyeniten, noch no besele'e len, na' gach ga gosac xišne'en ga yoble. ¹² Na' ble'eda' bene' ba gosat, bene' gole len bene' xcuide' len bi' bixjw, zjazeche' lao Diosen'. Nach Diosen' bzaše' libr ca' gan' zjanyoj yogo'lo' da' goson to toe'. Na' gwdena' bzaše' libr gan' zjanyoj la bene' ca' zjanape' yela' mban toli tocaṇe. Na' bene' yela' justis chegaque' con ca' gosone' šlac gosebane', le yogo' da' gosone' zjanyojen le'e libr ca'. ¹³ Yogo' bene' gosat lo' nisdāon' besyechoje' zjazeche' lao Diosen', na' yogo' bene' gosat ga yoble lecze besyechoje' zjazeche' lagüe' cont bene' yela' justis che to toe' con ca' gosone' šlac gosebane'. ¹⁴⁻¹⁵ Nach Diosen' bcueze' yela' goten' nombia'cho, na' bene' cont noch no gwže' latje che bene' guat ca' na' bñitlagüen'. Na' bene' bi bosozenag che Dios, yogo' bene' bi nyoj lagaque' le'e libr gan' nyoj la bene' zjanap yela' mban toli tocaṇe, bosozale' legaque' lo yi' gabil' da' nac da' xen ca' to nisdāo'. Na' dan' goc chegaque', lenṇa' yela' got gwchope chegaque'.

¹ Gwdena' ble'eda' le'e yaban' ba beyaquen da' cobe na' lecze ca' yežlion', le yaba dan' goc da' nechw na' yežlio nechua' besyeniten. Na' lecze bich gota' nisdao'. ² Neda' Juan ble'eda' ciuda che Diosen', ciuda Jerusalén cobe da' chi' yaban' gan' zoa Diosen', betjen lo yežlion'. Ba nonen' xdan ca to no'ole bene' ba bpa'a cuine' cont naque' xdan cate' gwšagne'e. ³ Na' do gan' chi' Diosen' chnabi'e benda' gwne' to bene' žizje, gwne':

—Gwna'šc, Diosen' ba betje' zoalene' beṇach. Soateze' len legaque', le gwleje' legaque' cont zjanaque' yež che', na' yesonxene'ne'. ⁴ Na' Diosen' gone' cont bich gac da' yesyeyaše'laže'de', da' yesyegüine'de' o da' yesebeze' čhen. Nono gat, nono šey la, le ba gwde che yogo' da' ca' gota' lo yežlio nechon'.

⁵ Nach Dios ben' chi' chnabi'e gwne':

—Da' li ba chocoba' yogo'loḷ da' de.

Lecze gwne':

—Bzoj diža' quinga ba bendo', le naquen diža' li na' gac can' gwnian'.

⁶ Nach gože' neda':

—Bač goc da' cheyaḷa' gac. Neda' naca' ben' ben' yežlion' len yogo' bichle da' de, na' naca' ben' gon cont te čhen. Da'nan' zaca'lebda' ca letr nechw da' nzi' A na' letr bzebe da' nzi' Z. Note'teze bene' chaclaže' si'e da' gwnežjua'ne', gwnežjua'ne' yela' mban toḷi tocaṇe da' zaca'lebe ca nis ya'a da' che'ejcho cate' chbilecho, na' bi sia' laxjuen. ⁷ Na' bene' chesejnilaže' neda', še ba gosezoede' bi yesebeyičhje' xtižan', gac čhegaque' yogo' da' šagüe' da' ba bia' diža' čhen, na' yesonxene' neda', na' gwlo'a zjanaque' xi'ina'. ⁸ Perw ca nac bene' ca' chesežeb yosozenague' chia', bene' bi chesejnilaže' neda', bene' cheson da' ca' chgue'eda', bene' chesot ljež beṇače', bene' cheson da' nac da' yela' zto' len cuerp čhegaque', bene' cheson txen len bite'teze yela' guaža', bene' chesejnilaže' l' gua'a l'saca', na' yogo' bene' cheso'e diža' güenlaže', yogo' bene' ca' yesezaca'zi'e toḷi tocaṇe lo yi' xen da' nac ca to nisdao', yi' gabiḷ gan' čhala' azufren'. Na' da' gac čhegaquen', lenna' žacho yela' got gwchope.

Ciuda Jerusalén da' nac da' cobe

⁹ Na' bezle'eda' to angl gažen' ben' gosoxe' tas ca' gaže dan' zjanža'te da' zjajožen da' bosolalje' cont gosac yela' zi' ca' la'zelagüe lo yežlion'. Gwbigue' gan' zoan' na' gože' neda':

—Da len neda' cont gwlo'eda' le' bene' ca' zjazaca'lebde' ca to no'ole za' gwšagna'. Na' Jesucristw ben' zaca'lebde' ca xila' dao' ben' gosot bene' Israel neče xtoḷa'gaque', guac načo le' si'e no'olen'.

¹⁰ Nach Spiritw che Diosen' benen cont gwy'a'alena' anglen' to lo ya'a xen da' nac sibe, na' blo'ede' neda' ciuda Jerusalén da' nac ciuda che Dios. Ble'eda' gwzoan yaba gan' zoa Diosen' na' chetjen lo yežlion'. ¹¹ Na' ciudan' goctitchguan len be'ni' da' nsa' Diosen', na' ble'eda' chactiten ca to yej da' zaca'chgua, ca yej da' nzi' jasje da' chle'echo ca vidrw. ¹² To ze'e xen da' nac sibe nyechjen ciudan', na' nita' šižinw puert čhen, na' to to cho'a puerten' zecha tgüeje angl. Na' le'e puert ca' zjanyoj la šižinw bene' ca' bosoxie' šižinw cuen diaža che neto' nacto' bene' Israel. ¹³ Na' le'e ze'e dan' zoa šla'a ciudan' gan' chla' gwbiž nita' šone puert, na' šla'a gan' chxoa gwbiž yešonen, na' šla'a zej yichjelen yešonen, na' šla'a zej xanelen yešonen. ¹⁴ Na' ze'e dan' nyechje ciudan', lenenna' naquen de šižinw yej xen, na' zjanyoj le'e yej ca' la šižinw neto' nacto' postlw che Jesucristw ben' zaca'lebde' ca xila' dao' ben' gosot bene' gualaž čheto' neče xtoḷa'gaquen'.

15 Na' angl ben' be'len neda' diža' noxe' to ya da' nac de oro da' bchine' gwxi'e medidw ciudan', che ze'e chen na' che puert ca'. 16 Ciudan' naquen da' cuadradw, toze ca naquen zлага' len ton. Anglen' bchixe' ciudan' len ya chen' na' goquen chope mil chope gayoa kilómetros to to šla'an, ca'te' ndonen, ca'te' zlagan' na' ca'te' siben'. 17 Nach bchixe' ze'e dan' nyechj ciudan' na' goquen gayontap metr yela' sib chen, metr da' nombia' benach, le lenna' bchin anglen' gwxi'e medidon'.

18 Ze'e da' nyechj ciudan' naquen de yej da' zaca' da' nzi' jasje, na' doxen ciudan' naquen de oro na' nlan' ca to vidrw da' nac xilaže'. 19 Na' ze'e da' nyechj ciudan', zjanone' lenen xdan len yogo' cuen yej da' zaca' da' de da' zjanac beya color na' chesactiten. Da' nechon' naquen de jasje; da' gwchope de zafiro; da' gwyone de ágata; da' gwdupe de esmeralda; 20 da' gayo' de ónice; da' gwchope de cornalina; da' gaže de crisólito; da' xono' de berilo; da' ga de topacio; da' ši de crisoprasa; da' šnej de jacinto; na' da' šižinw de amatista. 21 Na' puert ca' šižinw zjanaquen šižinw perlas, to ton zjanonen' de toze perla. Na' nez yo da' de lo ciudan' naquen de oro na' zjanlan' ca vidrw da' nac xilaže'.

22 Bibi yodao' ble'eda' lo ciudan', le bene' ca' ze' ciudan' zjanite' lao Xancho Dios ben' nap la'zelagüe yela' guac xen na' lao Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque'. Legaque' chesonxen bene' lo ciudan'. 23 Bene' ca' ze' ciudan' bi cheseyažjde' gwbižen' ne bion' yososenin' lo ciudan', le be'ni' da' nyechj Diosen' chsenin' len legaque' na' lecz ca' be'ni' da' nsa' Jesucriston'. 24 Na' be'ni' che Diosen' gwsenin' len bene' za'ac yogo' nación bene' chesejnilaže' Diosen', na' bene' gwnabia' ca' ze' yežlion' yesonxene' Diosen' yosonežjue'ne' bi da' zaca' da' šagüe' da' de chegaque', len no yela' bala'an da' de chegaque'. 25 Bitw šeyjw puert ca' zjanita' ciudan' lagüe' ža, na' gwbat gac šeže'le. 26 Can' ba gwnia', yela' zaca' yela' xdan da' zjade yogo' nación len yela' bala'an da' zjade che bene' gwnabia' che nación ca', yosonežjuen' Diosen' lo ciudan'. 27 Lo ciudan' gwbat gac šo' bene' chon da' zban. Bi gac šo' bene' chon bite'tez da' chgue'e Diosen' o bene' choe' diža' güenlaže'. Con bene' zjanyoj lagaque' le'e libr che Jesucriston' gan' zjanyoj la bene' zjanape' yela' mban toli tocaņe, legacze' gac yeso'e na'.

22

1 Nach anglen' blo'ede' neda' yegw gan' yože nis da' chnežjon benachen' yela' mban toli tocaņe. Nisen' nacten ca vidrw le nyadichguan. Yegwna' chchojen do gan' chi' Diosen' chnabi'e txen len Jesucriston' ben' zaca'lebde' ca xila' dao' ben' gosot bene' gualaž cheto' neche xtoła'gaquen'. 2 Na' gachol' nez yo xen che ciudan' na' chop la'a cho'a yegon' ze yag da' chnežjon benachen' yela' mban toli tocaņe. Na' yogo' bio' chesebian frut, šižinw ni'a chesebian lao tgüiz, na' bene' nación ca' yosočhine' xlaguenna' ca rmed cont yesenite' güen. 3 Gwbat gata' bi da' chgue'e Diosen' lo ciudan', le ciudan' cu'i'e nabi'e txen len Jesucristw ben' zaca'lebde' ca xila' dao' ben' gosot bene' gualaž cheto' neche xtoła'gaque', na' yogo' bene' ze' ciudan' yesonxene' le'. 4 Yesenite' yesele'ede' cho' alao Diosen', na' yoj la Diosen' loxgagaque'. 5 Gwbatech gac šeže'le lo ciudan'. Na' bene' ze' lo ciudan' bi yeseyažjde' be'ni' che no lámpara o che gwbiž, le be'ni' da' nyechj Xancho Diosen' gwsenin' len legaque'. Na' yesenabi'e len le' toli tocaņe.

Ba zoa yid Jesucriston' da' yoble

6 Nach anglen' gože' neda':

—Yogo' diža' quinga ba bendo' zjanaquen da' li na' gac con can' ba gwnato'. Xancho Diosen' chbeje' bene' cheso'e xtižen' na' chzejni'ide' legaque' bin' yesene', na' len' ba gwsele' neda' chzejni'ida' le' len bene' lježo' ca' chesonxene' Diosen' cont gache'ele da' ca' za' gac.

⁷Nach gwna Jesúsen':

—Da' li ba zoa yida' da' yoble. Na' mbalaz bene' chosozenag che da' ca' ba bzojo' le'e libr chio' choen' diža' che da' ca' za' gac.

⁸Neda' Juan benda' na' ble'eda' da' quinga ba bzoja' nga, na' beyož bendan' na' ble'edan' jazoa xiba' xni'a angl ben' blo'e neda' da' ca', godca' gonxena'ne'.

⁹Perw anglen' bi bene' latje, gwne':

—Bi gono' ca', le naca' con to bene' güen xšin Diosen' can' naco' le', can' zjanac bene' lježo' ca' ba gwleje' cheso'e xtižen', na' can' zjanac yogo' bene' yosozenag che da' ca' ba bzojo' le'e libr chion'. San benxen Dios.

¹⁰Lecze gože' neda':

—Bi gwcuašo' diža' ca' ba bzojo', le ba zoa gac da' ca' bzojon'. ¹¹Na' bene' cheson da' mal, yesonchcze' da' malen' chesonen'. Na' bene' cheson da' yela' zto', yesonchcze' da' yela' zton' chesonen'. Na' bene' cheson da' chazlaže' Diosen', yesonchcze' da' güenna' dan' chesonen'. Na' bene' ba gwlej Diosen' cont zjanaque' lo ne'e, lo ne'en yesyega'ancze'.

¹²Nach Jesúsen' gozne':

—Da' li ba zoa yida' da' yoble, na' yedeyena' gac güen che to to benach o saca'zi'e con can' ba ben to toe'. ¹³Neda' naca' ben' ben yežlion' len yogo' bichle da' de, na' naca' ben' gon cont te chen. Da'n'an' zaca'lebda' ca' letr nechw da' nzi' A na' letr bzebe da' nzi' Z. Ba zoa' cate' gwxe yežlion' na' soacza' cate' te chen.

¹⁴Mbalaz bene' ca' nita'teze' chesenabe' yeca'a xtoła'gaque' cont yesaque' txen len bene' ca' ba ble'edo' ben' ba besyeyach xalana'gaque'. Legaque' gac yesagüe' frut dan' chbia yag yela' mban toli tocanē, na' gac yeso'e cho'a puert che ciudan'. ¹⁵Perw ca nac bene' ca' cheson da' nac da' zban, bene' ca' cheson txen len no yela' guaža', bene' cheson da' nac da' yela' zto' len cuerp chegaque', bene' chesot ljež benache', bene' chesejnilaže' l gua'a lsaca' o bi da' ca' ben Diosen', na' yogo' bene' cheso'e diža' güenlaže' o chesyebede' chosozenague' dan' zjanac ca', yogo' bene' ca' bi gac yeso'e lo ciuda chian'.

¹⁶—Neda' Jesús ba gwseła' angl chian' cont ba bzende' le' yogo' da' ca' ba bzojon'. Na' cheyala' gwnežjon' bene' ca' chesedop chesežag chesonxene' neda'. Neda' naca' xi'in diaža che da' rey David na' naca' ben' gwseła' Diosen' yežlion' lo diaža che'. Na' zaca'leba' ca' beljw xsil.

¹⁷Spiritw che Diosen' na' lecze ca' chio' chonxencho Jesúsen' chnablaže'cho yob yidšca Jesúsen' da' yoble, chio' zaca'lebcho ca to no'ole si'e. Na' yogo' bene' yesene diža' quinga lecze yesenablaže'sque' yide' da' yoble.

Na' note'teze bene' chaclaže' si'e da' gwnežjw Jesúsen' le', cheyala' yedenaben', na' gwnežjue'ne' yela' mban toli tocanē da' zaca'lebe ca nis ya'a da' che'ejcho cate' chbičcho, na' bi si'e laxjuen.

¹⁸Na' chosnisda' le'e chzenagle can' ža libr nga che da' ca' za' gac, note'tezle še gwzanchle ca dan' ža libr nga, Diosen' gone' gac chele yogo' yela' zi' dan' zjanyoj le'e libr nga. ¹⁹Na' note'tezle še žale bi gac yogo' da' qui zjanyoj le'e libr nga, Diosen' yoxie' lale le'e libr chen' gan' nyoj la bene' ca' zjanape' yela' mban toli tocanē na' gone' cont bi gac šo'le lo ciuda chen', neca gac chele yogo' da' güen da' zjanyoj le'e libr nga.

²⁰Nach Jesús, ben' bzejni'ide' neda' yogo' da' ca' ba bzoja', že':

—Da' li ba zoa yida' da' yoble.

Na' neda' chapane':

—Ca' gacšca. Yob yidšco', Xana' Jesús.

²¹ Xancho Jesucriston' soacze' gaclenšcacze' yogo'le. Da' na'zen' chzoja'.